



# Xtiidx Dios

Santo Domingo Albarradas Zapotec New Testament



## Contents

Xtiidxa'c Jesucrist ni bacaa San Matew	1
Xtiidxa'c Jesucrist ni bacaa San Marcw	50
Xtiidxa'c Jesucrist ni bacaa San Lujc	81
Xtiidxa'c Jesucrist ni bacaa San Juan	132
Ni been ree xi Apóstoles Jesucrist	168
Gui'ch ni guxhaal San Pabl loj ree bén Rom rililadx Jesucrist	216
Gui'ch yaløj ni guxhaal San Pabl loj ree bén Corinto rililadx Jesucrist	237
Gui'ch barojp ni guxhaal San Pabl loj ree bén Corinto rililadx Jesucrist	258
Gui'ch ni guxhaal San Pabl loj ree bén Galacia rililadx Jesucrist	272
Gui'ch guxhaal San Pabl loj ree bén Éfeso rililadx Jesucrist	279
Gui'ch guxhaal San Pabl loj ree bén Filipos rililadx Jesucrist	286
Gui'ch guxhaal San Pabl loj ree bén Colosas rililadx Jesucrist	291
Gui'ch yaløj guxhaal San Pabl loj ree bén Tesalónica rililadx Jesucrist	296
Gui'ch barojp guxhaal San Pabl loj ree bén Tesalónica rililadx Jesucrist	300
Gui'ch yaløj guxhaal San Pabl loj Timoteo	303
Gui'ch barojp guxhaal San Pabl loj Timoteo	309
Gui'ch guxhaal San Pabl loj Tito	313
Gui'ch guxhaal San Pabl loj Filemón	316
Gui'ch par ree bén Hebreos	317
Gui'ch bacaa Santiaaw	333
Gui'ch yaløj bacaa San Pedr	338
Gui'ch barojp bacaa San Pedr	344
Gui'ch yaløj bacaa San Juan	348
Gui'ch barojp bacaa San Juan	354
Gui'ch bayon bacaa San Juan	355
Gui'ch bacaa San Judas	356
Ni balüü Jesucrist loj San Juan	358



**Xtiidx Dios**

**New Testament in Zapotec, Santo Domingo Albarradas  
(MX:zas:Zapotec, Santo Domingo Albarradas)**

Language: Zapotec, Santo Domingo Albarradas  
Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

**Copyright and Permission to Copy**

Copyright © 2010 Wycliffe Bible Translators, Inc.

Copyright © 2010 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

a0971816-812f-5679-8319-3f4810762240

ISBN: 978-1-5313-0745-5

## Xtiidxza'c Jesucrist ni baca San Matew

### Xdiaagulal Jesucrist

(Lc. 3:23-38)

**1** Guie zëed laj ree bën naj xdiaagulal Jesucrist, bën zëed ree loj xdiaa rey Davi në loj xdiaa Abraham.

<sup>2</sup> Abraham brieri laj xdad Isaac, abi' Isaac gojc xdad Jacob, guiaad Jacob gojc xdad Judá con ree bijchaman. <sup>3</sup> Dxel Judá cwa'man Tamar, abi' guyu xi'n reeman brieri laj reeman Fares con Zara. Fares gojc xdad Esrom, Esrom gojc xdad Aram. <sup>4</sup> Aram gojc xdad Aminadab, Aminadab gojc xdad Naasón, Naasón gojc xdad Salmón. <sup>5</sup> Salmón gojc xdad Booz, guiaad xniaa Booz brieri laj Rahab. Booz cwa'man Rut, abi' xi'n reeman brieri laj Obed. Obed gojc xdad Isaí, <sup>6</sup> Isaí gojc xdad rey Davi. Dxel rey Davi con bën goc lacheel Urías guyu xi'n reeman brieri lajman Salomón.

<sup>7</sup> Dxel Salomón gojc xdad Roboam, Roboam gojc xdad Abías, Abías gojc xdad Asa. <sup>8</sup> Asa gojc xdad Josafat, Josafat gojc xdad Joram, Joram gojc xdad Uzías. <sup>9</sup> Uzías gojc xdad Jotam, Jotam gojc xdad Acáz, Acáz gojc xdad Ezequías. <sup>10</sup> Ezequías gojc xdad Mainán, Mainán gojc xdad Amón, Amón gojc xdad Josías. <sup>11</sup> Dxel Josías gojc xdad Jeconías con ree bijchaman, tiamp ni guzu ree bën Israel Babilonia zi'c bën yu' ladxguiib.

<sup>12</sup> Chi ma barrii reeman Babilonia lod guzu reeman zi'c bën yu' ladxguiib, gojl Salatíel, xdadaman gojc Jeconías. Dxel Salatíel gojc xdad Zorobabel. <sup>13</sup> Zorobabel gojc xdad Abiud, Abiud gojc xdad Eliaquim. Eliaquim gojc xdad Azor, <sup>14</sup> Azor gojc xdad Sadoc, Sadoc gojc xdad Aquim. Aquim gojc xdad Eliud, <sup>15</sup> Eliud gojc xdad Eleazar. Eleazar gojc xdad

Matán, Matán gojc xdad Jacob. <sup>16</sup> Jacob gojc xdad Xiëb lacheel Li. Dxel Li gojc xniaa Jesús, bën la gajc Cristo.

<sup>17</sup> Zian gojc, diizd xtiamp Abraham xt tiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bën Israel Babilonia zi'c bën yu' ladxguiib, abi' zachidaj generacion guyu diizd tiamp ni barrii ree bën Israel Babilonia xt chi bidxin dxej gojl Jesucrist loj guidxliuj.

### Gojl Jesucrist

(Lc. 2:1-7)

<sup>18</sup> Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios. <sup>19</sup> Abi' Xiëb guial najman benza'c, ad guyëntaman nusa'nxtuman Li. Beenman xgab niro'n ladxaman laaman ralanzi. <sup>20</sup> Per la'tgaj cayijnman xgab zian, balüüloj tijb xianjl Dios lojman loj bacaal, rëb anjl guin lojman:

—Xiëb, xdiaa Davi, ad bal rdxe bil tia' Li, din xindo nüüm por xSprijt Dios zëëdix. <sup>21</sup> Tijb xindoniguiiaaw gac xi'n Li, yagu'l lajx “Jesús”, din por laax gra ree xbejn x gac perdon xtol.

<sup>22</sup> Gra ree ni guie gojc persi guzobj xtiidx Dios zi'c gunee bën badëë xtiidxaman loj ree bejn, chi rëbaman:

<sup>23</sup> Tijb biinxdüb chu' xi'n,

abi' chi galix grii lajx Emanuel, rën guieban: Dios za'në dunuj ree.

<sup>24</sup> Chi baban Xiëb, dxel beenman zi'c gunabee xianjl Dios laaman, cwa'man Li, <sup>25</sup> per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

### Bignaj ree bën rajc Jesús

**2** Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree bën rajc, Jerusalén, laa reeman naj magos, za ree-

man niz oriente. <sup>2</sup>Abi' gunabdiidx reeman, rëb reeman:

—¿Con xrey ree bén Israel, bén ma gojl? Din dunujn diizd duladxan baguiaa xbajlaman xanyabaa, zeel zio'pan din yazuxiban lojman.

<sup>3</sup>Chi biguien rey Herodes zian, dád guyunawëëgaman, nëgajc gra ree bén Jerusalén guyunawëëg. <sup>4</sup>Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo. <sup>5</sup>Dxel rëb reeman:

—Belén naj galaman, tijb guiedx naaz Judea, din ze bacaa bén badëë xtiidx Dios loj ree bejn:

<sup>6</sup>Lij Belén, tijb guiedx naaz Judea, majsi guiedx dobëz najl loj gra ree guiedxro' naaz Judea.

Per lasajquil din luguiedx Belén guin grii tijb bén nabee guiniaj tëëman da bén Israel reen.

<sup>7</sup>Dxel ralanzi gurejdx rey Herodes bén rajc guin ree, persi gunabdiidxaman goc balüüloj bajl xanyabaa guin loj reeman.

<sup>8</sup>Abi' guxhaalaman laa reeman Belén, rëbaman loj reeman:

—Gol wej, gol bignabdiidxchaaw graczi xcwent xindobëz guin. Abi' chi yadxeljidi laax, laa gol bagojn gajc naj, din në naj chigzuxib lojx.

<sup>9</sup>Chi gulox rëb Herodes loj reeman zian, dxel zë reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobëz guin guzudxen. <sup>10</sup>Chi baguiaa reeman bajl guin, dád babaa reeman. <sup>11</sup>Abi' chi guyu reeman lënu guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, në yaal, nëtëë mirra par xindo guin. <sup>12</sup>Chi ma guidxin dxey yaza reeman, dxel bagojn Dios laa reeman loj bacaal chitëë yayejc reeman niz lod za'

Herodes, zianan zeel bayejc reeman niz lood ren.

### Zë reeman Egipto

<sup>13</sup>Chi ma zia ree bén rajc guin ladx reeman, dxel balüüloj tijb xianjl Dios loj Xiëb loj bacaal, rëbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lëjt, din zaguiil Herodes laax din gugijtaman laax.

<sup>14</sup>Dxel bixche Xiëb, cwa'man xindobëz guin con xniaax, abi' guxhin guin brii reeman zë reeman niz Egipto. <sup>15</sup>Ni guzu reeman xt güjt rey Herodes. Zian guzobj xtiidx Dios ni gunee bén badëë xtiidxaman loj ree bejn, chi rëbaman: “Babedx da xi'nan Egipto.”

### Gunabee Herodes guiët ree xindobëz

<sup>16</sup>Chi gogbee Herodes guial basquiee ree bén rajc guin laaman, dád bidxe'chaman. Dxel gunabeeman guiët gra ree xindoniguiiaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén në gra ree guiedx riga' niz ni, guial yu'guijcaman ni rëb ree bén rajc guin guial ma gojc tio'p ijz ni baguiaa reeman bajl guin. <sup>17</sup>Zian gojc cumplid ni bacaa Jeremías, bén badëë xtiidx Dios loj ree bejn, chi rëbaman:

<sup>18</sup>Biguien cha' tijb bejn guiedx Ramá, yu' guialroon në guialrbixdiaj, Raquelan cayoon por ree xi'nman, abi' ad rilet' chu gusquiejn laaman guial güjt ree xi'nman.

<sup>19</sup>Per chi güit Herodes, dxel balüüloj tijb xianjl Dios loj Xiëb loj bacaal lod zobj reeman, Egipto, abi' rëbaman lojman:

<sup>20</sup>—Bixche, cwa' xindobëz guin con xniaax. Gol baguiaj niz Israel, din ma güjt ree bén guyën nugüjt laax.

<sup>21</sup>Dxel bixche Xiëb cwa'man xindobëz guin con xniaax, bayejc reeman niz Is-

rael. <sup>22</sup>Per chi gogbee Xiëb guial Arquelao, xi'n Herodes, naj Bén canabee niz Judea, bidxebaman naguij reeman niz ni. Dxel bagojn Dios laaman loj bacaal din che reeman niz Galilea, dxel zë reeman. <sup>23</sup>Chi bidxin reeman ni, gurej reeman guiedx Nazaret. Zian gojc persi guzobj diidx ni gunee ree Bén badëë xtiidx Dios loj ree bejn, guial grii laj Jesús Bén Nazaret.

### Diidx gunee Waj Bén baroobnijs bejn ree

(Mr. 1:1-8; Lc. 3:1-9, 15-17; Jn. 1 :19-28)

**3**Lën ree dxej ni bidxin Waj, Bén baroobnijs bejn ree, loj yujbidx niz Judea catie'chaman xtiidx Dios. <sup>2</sup>Rëbaman:

—Gol bayüjn xgab por xtolidi din ma zidyob xgualrniabee Dios.

<sup>3</sup>Xcwent Waj guinan bacaa Isafas, Bén badëë xtiidx Dios loj ree bejn, chi rëbaman:

Rguien cha' tijb Bén rbidxa' niz loj yujbidx, rëbaman:

“Gol beenchaaw xnejz dux Dad ree Dios, gol guxhal tijb nejz nali.”

<sup>4</sup>Con guidxlad camell gojcnë xab Waj, abi' lënman bixii tijb guid. Gudaw tëeman bi'tsu con dxijn yu' dajn. <sup>5</sup>Dxel Bén Jerusalén ree në los demazri ree Bén Judea nëtëë gra ree Bén zobj gadëd ro' guiiw Jordán, brii reeman bicaagdiajg reeman ni rniee Waj. <sup>6</sup>Dxel guxhoobdol reeman, abi' baroobnijs Waj laa reeman loj guiiw Jordán guin.

<sup>7</sup>Per chi baguiaa Waj zien ree Bén-farisew në ree bénsaducrew bidxin din tiobnijs reeman, rëbaman loj reeman:

—¡Xi'n xindxab! ¿Chu bagojn lëjt din laadi loj castiro' ni zëed? <sup>8</sup>Gol gubajn zagdxë din guiguien guial waliquidi ma bayüjndi xgab por xtolidi, <sup>9</sup>abi' ad bal rlies xvalorgajquidi, rëbidi: “Dunujn zio'p loj xdiaa Abraham”, din naj rni lëjt

xt guiaj guie ree zile' yayüjn Dios xdiaa Abraham. <sup>10</sup>Abi' ree Bén ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rutüügaman laan din che'can. <sup>11</sup>Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per Bén zidnal naj, laaman guroobnijs lëjt con xSprijt Dios con në bajl, din laaman mazri rajp gualrniabee guial lon, abi' ni'qui xgurëchaman ad rayalt gaxhiecan. <sup>12</sup>Abi' zi'c raya trigo zian güünnëman bejn. Din Bén zinal ree xnejz Dios chinëman laa reeman lod rniabeeman, guiáad ree Bén ad zinalt xnejz Dios guixhiaalaman laa reeman loj bajl ni ad yu't dxej yayü'.

### Gurobnijs Jesús

(Mr. 1:9-11; Lc. 3:21-22)

<sup>13</sup>Lën ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman. <sup>14</sup>Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

<sup>15</sup>Dxel rëb Jesús lojman:

—Yo guna gac zian, din mazri zagdxë yaguieen gra zi'c rniabee Dios.

Dxel cwëjb Waj baroobnijsaman laaman. <sup>16</sup>Chi gulox guroobnijsaman, naabzi bariiman loj nijs guin, dxejczí bixal xanyabaa, abi' baguiaaman zidguiajt xSprijt Dios zi'c tijb palom xt guijcaman. <sup>17</sup>Dxel biguieen cha' tijb bejn xanyabaa, rëbaman:

—Bén guie naj da Xi'n'an, Bén rën da'tan Bén rabaanë' tëen.

### Gojc Jesús prueb

(Mr. 1:12-13; Lc. 4:1-13)

**4**Dxel binë xSprijt Dios Jesús niz loj yujbidx, din güün xindxab laaman prueb.

<sup>2</sup>Ni guzuman tiuu dxej tiuu guiaal sin guialraw, dxel gulaanman. <sup>3</sup>Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guidxtil.

<sup>4</sup>Per badxi' Jesúsán rëbaman:

—Loj xtiidx Dios rëb: “Ad ganaxtizi guidxti guiban bejn, nëgajc gra diidx nree Dios.”

<sup>5</sup>Dxel binë xindxab guin laaman Jerusalén, abi' gulë'pix laaman guijc yadooro' zojb luguiedxzi, <sup>6</sup>abi' rëbix lojman:

—Bal wali najl xi'n Dios, gudidya' dizd guie, din loj xtiidx Dios rëb: Dios guixhiaal ree xianjlaman din guinia reeman lüj.

Guiniaaz reeman lüj con yaa reeman chitëë ladx ni'czi tijb guiaj guia'l.

<sup>7</sup>Badxi' Jesúsán, rëbaman:

—Rëb gajc loj xtiidx Dios: “Ad güünl prueb xDadil Dios.”

<sup>8</sup>Dxel binë xindxab guin laaman tijb guijc guia' ya da't, lod balüüx laaman gra ree guiedx riga' loj guidxliuj në ree guialnaza'c yu' loj reen. <sup>9</sup>Abi' rebix lojman:

—Naj gune gra ree ni guie lojl, bal guzuxibil lon guiniajchi' tël naj.

<sup>10</sup>Badxi' Jesúsán, rëbaman:

—Biquied, xindxab, din loj gajc xtiidx Dios rëb: “Gunajchi' xDadil Dios, tijbzi lojman been sirv.”

<sup>11</sup>Dxel biquied xindxab guin lojman, abi' bi't tio'p choon ree xianjl Dios persi been reeman laaman sirv.

### **Rzuloj Jesús rtie'chaman xtiidx Dios niz Galilea**

(Mr. 1:14-15; Lc. 4:14-15)

<sup>12</sup>Chi gogbee Jesús guial yu' Waj ladxguuib, bayejcaman Galilea. <sup>13</sup>Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabulón në Neftalí. <sup>14</sup>Zian

gojc persi gojc cumplid ni bacaa Isaías, bën badëë xtiidx Dios loj ree bejn, chi rëbaman:

<sup>15</sup>Bën Zabulón con ree bën Neftalí, në ree bën zojb gajxh ro' nijsdoo, nëtëë ree bën zojb xijch guiiw Jordán

con gra ree bën zojb niz Galilea, lod zojb ree bën ad najt bën Israel, <sup>16</sup>gra reeman gubajn loj xcaj.

Yan ma brii tijb biani par laa reeman, abi' biani guin guxhal xquiarguejn ree bën ad nabant xnejz loj Dios.

<sup>17</sup>Diizd dxejzii guzuloj gutie'ch Jesús xtiidx Dios, rëbaman:

—Gol bayüjn xgab por xtolidi din ma zëed gajxh xguialrniabee Dios.

### **Rbejdx Jesús tajp ree bën gac xbejnman**

(Mr. 1:16-20; Lc. 5:1-11)

<sup>18</sup>La'tgaj caza Jesús gajxh ro' nijsdoo Galilea, baguiaaman Simón bën la gajc Bëd con bijchaman Andrejs. Cuzaal reeman guijxh loj nijs din guiniaaz reeman bëjl. Guial laan naj xchiin reeman.

<sup>19</sup>Dxel rëb Jesús loj reeman:

—Gol tanal naj, din gulün lëjt xhien-aag güüнди din guto'pidi bejn par Dios luar guiniaazidi bëjl.

<sup>20</sup>Loj hor guin gajc basa'n xguijxh reeman abi' zinal reeman laaman.

<sup>21</sup>Guzaman zatibda'n dxel baguiaaman zatío'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayüjnchaaw xguijxh reeman. Dxel gurejdx Jesús laa reeman, <sup>22</sup>abi' basa'n reeman barcw guin con xdad reeman, dxel laa zinal gajc reeman laaman.

### **Rulüü Jesús zien ree bejn**

(Lc. 6:17-19)

<sup>23</sup>Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiidx Dios, rëbaman loj reeman

xhienaag naj xgualrniabee Dios, abi' bayüjnman Bén rdoob ree në gra ree Bén rajc xhietëez gualguijdxan. <sup>24</sup> Guidibczi niz Siria bire'ch xtiidx Jesús, abi' bidnë reeman Bén cusagdiaj ree gadxagayaa ni mal në graloj ree gualguijdx, Bén yu' ree xindxab luxdoo, në ree Bén rëjtya', nëtëe ree Bén ad rile't sulì, abi' bayüjn Jesús laa reeman. <sup>25</sup> Dád zien ree bejn binal laaman, Bén Galilea ree, Bén zëed ree Decápolis, Bén Jerusalén ree, Bén zëed ree niz Judea në ree Bén zëed stiblad ro' guiiw Jordán.

### Ni balüü Jesús tijb guiyc guia'

**5** Chi baguiaa Jesús Bén guixiuj ree, wë'paman tijb guiyc guia' abi' gurejman, dxel gubig ree xbejnman lojman. <sup>2</sup> Abi' guzuloj culüüman laa reeman, rëbaman:

#### Xiquilbaa ree bejn

(Lc. 6:20-23)

<sup>3</sup>—Xiquilbaa ree Bén ragbee gual ryaadx gagnë Dios laa reeman, din por zian yayal reeman lod rniabeeman.

<sup>4</sup> Xiquilbaa ree Bén yu'naya, din Dios yagu' luxdoo reeman zagdxë.

<sup>5</sup> Xiquilbaa ree Bén naj Bén chaawladx, din laa reeman tia' guidxliuj ni rëb Dios gudëedaman loj reeman.

<sup>6</sup> Xiquilbaa ree Bén rzajc zi'c chi rliaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

<sup>7</sup> Xiquilbaa ree Bén raya lasa', din zian yaya Dios laa reeman.

<sup>8</sup> Xiquilbaa ree Bén naya loj Dios, din laa reeman guguaa laaman.

<sup>9</sup> Xiquilbaa ree Bén rüjn naguiejn cwedxenë lasa', din laa reeman grii laj xi'n Dios.

<sup>10</sup> Xiquilbaa ree Bén cadëd loj gualzi por graloj ni rujnnë bejn laa reeman

gual cayüjn reeman zi'c rniabee Dios, din laa reeman yayal lod rniabeeman.

<sup>11</sup> Xiquilbaadi, chi rüjnnë reeman lëjt xhiernarajc në chi rnieeguijdx reeman lëjt nëtëe chi rudxiib reeman guijquidi graczi, gual najdi da bejnan. <sup>12</sup> Gol badxe' luxdoodi nix, gol babaa tëe din narooB naj ni gunee Dios lojdi xanyabaa. Abi' lëjt ragbee gual ziangajc basagzi reeman Bén badëe ree xtiidx Dios loj ree bejn gocli chi gadidi gui't loj guidxliuj.

### Lëjt naj zi'c zëd në zi'c bajì

(Mr. 9:50; Lc. 14:34-35)

<sup>13</sup> Lëjt naj zi'c zëd loj guidxliuj guie. Per bal id naxijran, ¿xhieza naag yaya-jcan naxij zatijb? Achetri dxiin güünan, gaz guire'chan abi' chë'p ree bejn guijcan.

<sup>14</sup> Lëjt naj zi'c tijb biani loj guidxliuj guie, naj tëedi zi'c tijb guiedx ni riga' tijb guiyc guia' abi' ad zajct guiguie'chan. <sup>15</sup> Ad ritiaguij tëet tijb guij par guida'cwan lën tijb yagalm, rtiaguijn persi rzojban ya din gusnin loj gra ree Bén yu' lënü. <sup>16</sup> Ziangajc lëjt, gol gojc zi'c biani loj ree bejn, din chi guguaa reeman ni zagdxë cayüjndi guza't reeman xDadidi Dios zagdxë Bén yu' xanyabaa.

### Rulüü Jesús xewent ley

<sup>17</sup> Ad naladxidi zialan par günan ley tibladd, ley ni badëe Dios loj Moisejs o ni balüü ree Bén badëe xtiidx Dios loj ree bejn, zialan par günanan cumplid. <sup>18</sup> Din naj rni lojdi, la'tgaj yu' xanyabaa në guidxliuj, ad ziquiedt tijb punt o tijb lejtr loj ley xt chi gac gra ni naj gac. <sup>19</sup> Zianan zeel Bén ad ruzoobt tijb mandamient ni zëed loj ley guin majsi nidobëz naj mandamient guin, bal rulüü tëeman bejn ree güün reeman zian, laaman lasajc ta'nzi lod rniabee Dios. Per Bén ruzoob gra ree mandamient ni zëed loj ley guin, rulüü tëeman bejn ree guzoob reeman laan, laaman naj mazri Bén lasajc lod rniabee



Dios. <sup>20</sup> Zeel naj rni lojdi, bal id zabajndi mazri zagdxé guial loj ree mextr rajc ley në ree bénfarisew, ad zayaltidi lod rniabee Dios.

**Rulüü Jesús xcwent  
guialrdxe'ch lasa'**

(Lc. 12:57-59)

<sup>21</sup> 'Lëjt ragbee guial rëb Dios loj ree xbéngulalidi: "Ad gugüjtil bejn, din bën gugüjt bejn yayalaman casti." <sup>22</sup> Per naj rni lojdi, chutéëz bën rdxe'chnë lasa', yayalaman casti, në bën rniece diidxgüjdx lasa' xt loj guxtis zajc cheman, guiaád bën rëb loj lasa' achet sirv lüj, laaman yayal loj bajl yu' gabijl.

<sup>23</sup> 'Zeel bal zinël gon lën yadoo abi' yagaj rusaaladxil guial yu' bën rdx-e'chil, <sup>24</sup> basa'nsii xgonl yagaj, yalojxgaj babenë bën rdxe'chil zagdxé, dxel ma zile' yajejquil din gusa'n xgonl.

<sup>25</sup> 'Bal chu bën rudëed lüj loj guxtis, baya'nnëman diidx zagdxé la'tgaj yu' tiamp, chitéë yayüman lüj loj guxtis, abi' guxtis guin nabee chu' l adxgüiib. <sup>26</sup> Naj rni lüj, ad zariitil ladxgüiib guin xtczi quixil gra ni na guxtis guin.

**Rulüü Jesús xcwent  
guialrzunë lacheel ben ren**

<sup>27</sup> 'Lëjt ragbee guial loj ley rëb: "Ad sunël lacheel ben ren." <sup>28</sup> Per naj rni lëjt, chutéëz bën rüjn xgabmal chi ruguiaaman tijb béngunaa, con laan ma beenman dol lën luxdooman por béngunaa guin.

<sup>29</sup> 'Bal laagajc guiaaløj ladbeel rüjn din güünl dol, mazri zagdxé naj gulëen bazaalan zijt. Din mazri zagdxé naj nit tibläd guiaaløjluar che guidibil gabijl. <sup>30</sup> Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdxé naj nit tibläd yaal luar che guidibil gabijl.

**Rulüü Jesús xcwent  
guial rala' lasa' bejn**

(Mt. 19:9; Mr. 10:11-12; Lc. 16:18)

<sup>31</sup> 'Ma bacaagdiajg tëëdi: "Chutéëz bën rala' lacheel, rayal gudëédaman gui'ch lojman guial ma bala' lasa' reeman."

<sup>32</sup> Per naj rni lëjt: Xinguaaw rala' xbéngunaa, abi' ad za'nët béngunaa guin xin ren, laagajc laax cayüjn din sunë xbéngunaa xin ren. Abi' xin tia' béngunaa guin dolan cayüjnx.

**Ad rayalt guza't xlia' bejn Dios**

<sup>33</sup> 'Rëb tëë Dios loj ree xbéngulalidi: "Ad guza't xlia'di Dios, rayal güündi cumplid ni rëbidi gudëëdidi lojman."

<sup>34</sup> Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lëjt din ni zojb Dios, <sup>35</sup> ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee. <sup>36</sup> Ad guza't tëë guijquidi par chililadx reeman lëjt, din ni'qui tijb guidxguijquidi ad zajct güündi ni ya's o ni naquich ya. <sup>37</sup> Zagdxeli con gol güjdx "an" o "a'n", din los demazri ree ni guinieedi loj xindxab zan.

**Ad yadxi'di ni mal por ni mal**

(Lc. 6:29-30)

<sup>38</sup> 'Lëjt ragbee guial loj ley rëb: "Bën cwëë guiaaløjluar, gulëë gajc guiaaløjman. Guiaád bën cwëë layil, gulëë gajc layaman." <sup>39</sup> Per naj rni lëjt: Ad yadxi'di ni mal por ni mal, bal chu chëëz xhajg ladbeedi, gol badëë stibladan chëëzaman. <sup>40</sup> Bal chu bën tilë lüj din cwëëxuuman xanguil, badëë në xchamarril tia'man. <sup>41</sup> Abi' bal rüjn reeman lüj naguiejn güül tijb yuu din sanëlan tib kilometro, guzanën tio'p kilometro. <sup>42</sup> Chutéëz bën rniab xhienin lojl, badëëdan, bal chu tëë rgui'n xhienin lojl ad bal cwexuul gudëëdilan.

## Guyën bén rdx'e'ch lüj

(Lc. 6:27-28, 32-36)

<sup>43</sup> 'Ragbee tëëdi rëb ree bejn: "Guyën bén rën lüj, bidxe'ch tëë bén rdx'e'ch lüj." <sup>44</sup> Per naj rni lojdi: Gol guyën bén rdx'e'ch lëjt, gol gurejdx tëë Dios por ree bén rzunal lëjt, din güün reeman lëjt ni mal. <sup>45</sup> Din zian gaquidi xi'n xDadidi Dios bén yu' xanyabaa, din laaman ruslejn xgubijdxaman par ree benza'c në par ree benmal, ruscal tëëman guia par ree bén naban zi'c rayal në par ree bén ad nabant zi'c rayal. <sup>46</sup> Din bal rëndi ganaxzi bén rën lëjt, ¿xhieza tia'di loj Dios zian? Din xt bëndol ree rüjn zian. <sup>47</sup> Abi' bal ganaxzi bén rëndi rugajpdiozidi, ¿xhieza ni zagdxë cayüjndi? Din xt bén ad nünbeet ree Dios rüjn zian. <sup>48</sup> Zeel gol gojc benza'c, zi'c naj xDadidi Dios bén yu' xanyabaa.

## Xhienaag gagnë lasa' bejn

**6** <sup>1</sup> Ad güündi ni zagdxë niz loj ree bejn naabzi par yadxaløj reeman lëjt. Din bal güündi zian, xDadidi Dios bén yu' xanyabaa achet guneeman lojdi. <sup>2</sup> Zeel chi güünl yudar bén ryaadx xhienin, ad gutie'chil diidx par gagbee bejn xhie cayüjnl zi'c rüjn ree bén rusquiee, lën ree yadoo në ree lunejz, din guilies bejn xvalor reeman naj reeman benza'c. Per diidxliczi rni lojdi, laazan naj ni rayal reeman. <sup>3</sup> Zeel chi güünl yudar bén ryaadx xhienin, ni'czi loj xmiwda'til ad gül diidx ni cayüjnl. <sup>4</sup> Mazri zagdxë lüjzi gagbee ni cayüjnl, abi' xDadil Dios laaman cuguiaa ni cayüjn lüjzi, laaman gunee ni rayalil.

## Xcwent xhienaag cwedx guiniab bejn Dios

(Lc. 11:2-4)

<sup>5</sup> Chi cwedx guiniabidi Dios, ad güündi zi'c rüjn ree bén rusquiee, bén ruladx ree rzuli par cwedx guiniab

reeman Dios lën ree yadoo në ree xquin nejz, din yadxaløj bejn laa reeman. Din naj rni lojdi, laazan naj ni rayal reeman. <sup>6</sup> Per lüj chi cwedx guiniabil Dios, bayu lënü lidxil, basiaaw ro' port, dxel gurejdx gunab Dios bén za'në lüj. Abi' laaman cuguiaa ni cayüjn lüjzi, laaman gunee ni rayalil.

<sup>7</sup> Chi rbejdx rniabidi Dios, ad radxi'di diidx guin guië'tzi guië't naabzi par gacxhie xtiidxidi, zi'c rüjn ree bén ad nünbeet Dios. Din laa reeman naladx guial zien ni rniee reeman mazri guidxga' Dios laa reeman. <sup>8</sup> Ad güündi zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan. <sup>9</sup> Zeel chi cwedx guiniabidi Dios, gol güjdx:

Dad, lüj yu' xanyabaa, rayal yaya'p da'tan lajl respejt.

<sup>10</sup> Gac zi'c rniabeel.

Gac zi'c rënl loj guidxliuj zi'c rajë xanyabaa.

<sup>11</sup> Baneë ni yadaawan guixie guixie.

<sup>12</sup> Been dunujn perdon gra ree ni mal ma baguieenan

zi'c raguieenan perdon bén rüjn ree dunujn ni mal.

<sup>13</sup> Ad guslaal dunujn yaguieenan dol, babëë dunujn loj gra ni mal.

<sup>14</sup> Din bal güündi perdon bén rüjn lëjt ni mal, ziangajc xDadidi Dios bén yu' xanyabaa züjn gajcaman perdon xtolidi.

<sup>15</sup> Per bal id züjndi perdon bén rüjn ree lëjt ni mal, ziangajc xDadidi Dios ad züjntaman lëjt perdon.

## Xcwent guialrba'n

<sup>16</sup> Chi rba'ndi ad güün lojdi naya, zi'c rüjn ree bén rusquiee din guguiaa bejn guial naba'n reeman. Naj rni lojdi, guial laazan naj ni rayal reeman. <sup>17</sup> Per lüj, chi rba'nl, gudiib lojl gudüjn tëë guijquil <sup>18</sup> chitëë gagbee ree bejn guial naba'nl. Tijbzi xDadil Dios bén za'në lüj naj bén

gagbee laan, abi' laaman gunee lüj ni rayal tia'l.

### **Guialnaza'c yu' xanyabaa**

(Lc. 12:33-34)

<sup>19</sup>'Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaan cwan laa reen. <sup>20</sup>Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tēet xingubaan cwan laa reen. <sup>21</sup>Lod gapil guialnaza'c guin yagaj su luxdool.

### **Guiaalaj bejn naj zi'c biani**

(Lc. 11:34-36)

<sup>22</sup>'Guiaalaj bejn naj zi'c tijb biani par xcuerpaman. Zeel bal cayüjnl ni zagdxex, guidib xcuerpil rajp biani. <sup>23</sup>Per bal cayüjnl ni mal, guidib xcuerpil naj zi'c lod nacay, zi'c naj lod nacaybuu.

### **Dios ya o milia**

(Lc. 16:13)

<sup>24</sup>'Ad zile't chu güün sirv loj tio'p patron, din zadxe'chaman tijbaman abi' guiēnman stijbaman, o gacaman benza'c con tijbaman abi' ad zēntaman stijbaman. Zeel ad zile't güündi sirv loj Dios nē loj milia.

### **Achetczi rayal chu' bejn xgab**

(Lc. 12:22-31)

<sup>25</sup>'Naj rni lējt: Ad chu'di xgab por ni gawidi nē por ni guiē'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. <sup>26</sup>Gol baguiaa ree be rzuj xanyabaa, ad rxübint reeb, ad rato'p tēet reeb guialnaza'c, ad naj tēet lod cu'chaaw reeb guialnaza'c guin. Per xDadidi Dios bēn yu' xanyabaa rudēēd ni raw reeb. Abi' mazri lasajquidi guial loj reeb. <sup>27</sup>Abi' tēē, ¿wen guial ru da'tidi xgab ma güün lējt mazri ziool ya?

<sup>28</sup>'¿Chexquiza zeel dād rudi xgab por xabidi? Gol baguiaa xhienaag rni's ree guiaa dajn. Achet dxiin rüjn reen ad rguib tēet reen, <sup>29</sup>per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman. <sup>30</sup>Abi' bal gui'xh dajn ruzujchaaw Dios yan, majsi guixiezi che'can. Diidxgui lējt bēn ad riladxza'ct ree laaman, nid zuneeman ni gacwidi ya. <sup>31</sup>Zeel ad rudi xgab xhie gawidi, o xhie guiē'di, o xhie gacwidi. <sup>32</sup>Din bēn ad nünbeet ree Dios rüjn zian, laa reeman ru xgab por gra ree ni guin. Per lējt yu' xDadidi xanyabaa, abi' laaman ragbeechaaw xhienin ryaadxidi. <sup>33</sup>Per yalojxgaj gol baguiil güündi zi'c rniabee Dios, gol been tēē zi'c rēnman, dxel laaman gunee gra ree ni ryaadxidi. <sup>34</sup>Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

### **Xcwent guialrula'ch**

(Lc. 6:37-38, 41-42)

**7**'Ad gula'chidi bejn chitēē saquidi zian. <sup>2</sup>Din bal rula'chidi bejn zian-gajc saquidi, zi'c rüjnnēdi bejn ziangajc güünnē reeman lējt. <sup>3</sup>Ad gula'chidi bēn ren por falt dobēz ni rajpaman, zagdxeli gol guyu xgab por falt narooob ni rajpidi. <sup>4</sup>Abi' bal mazri falt narooob rajpidi, ¿zoza guiēbidi loj stijb bejn: “Ad laat naj ni rüjnl?” <sup>5</sup>¡Bēn rusquiee! Yalojxgaj gol been zi'c rayal, chi ma rüjndi zian dxel ma zile' guiēbidi loj stijb bejn: “Ad laat naj ni rüjnl.”

<sup>6</sup>'Ad güündi naguiejn güüncwent ree bēn ad rēnt güüncwent xtiidx Dios, chitēē xhie güünnē reeman lējt. Din bal güündi zian, laan naj zi'c chi ruzaal bejn tijb ni nagle' loj bē'cw, o chi ruzaal bejn tijb ni lasajc loj cüch abi' chē'pzib guijcan.

## Ni guiniabidi zaca'dan

(Lc. 11:9-13; 6:31)

<sup>7</sup>Naj rni lëjt: Gol gunab loj Dios, abi' laaman guneë ni rniabidi. Gol bagu- ilaman, zadxejlidi laaman. Gol gurejdx gunabaman, züjncwentaman lëjt. <sup>8</sup>Din bën rniab, zaca'man. Abi' bën rguuil, zadxejlaman, guiáad bën rbejdx rniab laaman, züjncwentaman laaman.

<sup>9</sup>Lëjt najdi dad, ¿wen zudëedi tijb guiaj loj xi'ndi ya chi guiniabix guiajdx- til?, <sup>10</sup>¿o zudëedi tijb bëel ya chi guini- abix bëjl? <sup>11</sup>Nacli lëjt najdi bëndol rajc rudëedi ni rën xi'ndi. ¡Diidxgui xDadidi bën yu' xanyabaa, nid zudëedaman ni zagdxe loj ree bën rniab laan ya!

<sup>12</sup>Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bën badëë xti- idxaman loj ree bejn.

### Port nadëë

(Lc. 13:24)

<sup>13</sup>Gol been nagueijn din chu'di niz ro' port nadëë. Din port gulajg në nejz gu- lajg, laa reen naj ni zinë bejn loj nejz mal, abi' zien bejn zë loj nejz guin. <sup>14</sup>Per port nadëë guin në nejz nadëë guin laa reen naj ni rnë bejn lod yu' guialnaban tiblayaa, abi' ta'nzi ree bejn zë loj nejz guin.

### Por ni rüjndi zayünbee ree bejn lëjt

(Lc. 6:43-44)

<sup>15</sup>Gol gojp cudad con ree bën rusquiee rëb rudëed reeman xtiidx Dios. Din ruliüü dád bën chaawladx reen, per rüjnzi reeman par gusquiee reeman bejn. <sup>16</sup>Per zayünbeedi laa reeman por ni rüjn reeman, din ad rtiat uv loj yaquiejch ad rtia tëët higo loj gui'xh guiejch. <sup>17</sup>Zeel gra yag zagdxe rtia ni zagdxe lojn. Guiáad gra yag guijdx rtia ni guijdx lojn. <sup>18</sup>Ad rtiat ni guijdx loj yag zagdxe, ad rtia tëët ni zagdxe

loj yag guijdx. <sup>19</sup>Gra yag ad rtiat ni zagdxe, rirugan dxel re'can. <sup>20</sup>Ziangaje lëjt zayünbeedi laa reeman por ni rüjn reeman.

### Ad grat bejn chu' lod rniabee Dios

(Lc. 13:25-27)

<sup>21</sup>'Ad grat ree bën na lon: "Dad, Dad," chu' lod rniabee Dios, ganaxzi ree bën rüjn zi'c rën da Dadan, bën yu' xanyabaa. <sup>22</sup>Dxejzii, zien ree bën na lon: "Dad, Dad, por lüj batie'chan xtiidxil, abi' guial baza'tan lajl balëen xindxab ree luxdoo ree bejn, baguieen tëen zien ree milagr guial baza'tan lajl." <sup>23</sup>Dxel guien loj reeman: "Ad benbeetzan lëjt, gol gubi'ca lon bëndol."

### Tio'p loj cimiant

(Lc. 6:47-49; Mr. 1:22)

<sup>24</sup>'Chutëez bën rucaagdiajg da diidxan abi' rüjnman ni rën, laaman naj zi'c tijb bën nasin gules xcimiant lidx loj guiaj. <sup>25</sup>Abi' gol guia, dxel biguiajt nijs ro' gu- bi' tëë bidoxh, gulaj reen lad yu guin, per ad gulenxantan guial naj xcimiantan loj guiaj. <sup>26</sup>Per bën rigueijn da diidxan abi' ad rüjntaman ni rën, laaman naj zi'c tijb bën ad nasint bazoob lidx loj üx. <sup>27</sup>Abi' chi gol guia biguiajt nijs narooob, gubi' tëë bidoxh. Abi' gulaj reen lad yu guin zianz gulenxanan, ni'qui tibda'nan ad baya'nt.

<sup>28</sup>Chi gulox guneenë Jesús bën guin ree, graczi reeman badxa da't loj zi'c baliüüman laa reeman, <sup>29</sup>guial ruliüüman laa reeman zi'c bën rajp guialrniabee, ad zi'c ruliüüt ree mextr rajc ley.

### Rayün Jesús tijb bën rajc guialguijdx la lepra

(Mr. 1:40-45; Lc. 5:12-16)

**8** Chi baza Jesús ruguia' guin, dád zien bejn nal laaman. <sup>2</sup>Dxel gu- big tijb bejn lojman rajcaman guialgui-

jdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

<sup>3</sup>Dxel basli yaa Jesús baqui'man laaman, rëbaman:

—Rënan. Bayajc.

Chi rëb Jesús zian, loj hor ziigajc biquied guialguijdx guin abi' bayaman.

<sup>4</sup>Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

### **Bayajc xmojs tijb Bén sultad rniabee ree sultad**

*(Lc. 7:1-10)*

<sup>5</sup>Chi guyu Jesús luguiedx Capernaum, tijb sultad Rom rniabee ree sultad bibig lojman, guzajcaman laaman li-aadx, <sup>6</sup>rëbaman:

—Dad, laa da mojsan naga' lidxan ragxuux. Ad rilet chixchex, dád cusagzi guialguijdx guin laax.

<sup>7</sup>Dxel rëb Jesús lojman:

—Gan din yayünan laax.

<sup>8</sup>Badxi' Bén rniabee ree sultad guinan, rëbaman:

—Dad, ad rayaltan chu'l lidxan, per gunee diizd guie din yayajc da mojsan.

<sup>9</sup>Din zi'c naj yu' ree Bén rniabee naj, ziangajc naj yu' ree da sultad xan rniabeen. Chi rën loj tijb reex: “Wej”, rejx, chi rën loj stijbix: “Guda,” ri'tix. Abi' chi rë loj da mojsan: “Been ni guin”, rüjnxan.

<sup>10</sup>Chi biguiejn Jesús zian, dád badx-alojman abi' rëbaman loj ree Bén zinal laaman:

—Naj rni lojdi, ni'qui Israel ad wadx-aaglojtan tijb Bén rliladx Dios zi'c rliladx Bén guin Dios. <sup>11</sup>Naj rni lëjt, dád zien ree Bén gralad yayal gawnë Abraham, në Isaac, në Jacob lod rniabee Dios. <sup>12</sup>Guiáad ree Bén rayal niu lod rniabee

Dios, laa reeman yayal lod nacay da't lod goon reeman lod gaw tëë lay reeman.

<sup>13</sup>Dxel rëb Jesús loj sultad rniabee guin:

—Baguiaj lidxil, gac tëë zi'c ma bililadxil.

Abi' loj hor guin gajc bayajc xmojs Bén guin.

### **Rayüjn Jesús xnasuegr Bëd**

*(Mr. 1:29-31; Lc. 4:38-39)*

<sup>14</sup>Chi we Jesús lidx Bëd, baguiaaman xnasuegr Bëd naga'man yu'man xliaa.

<sup>15</sup>Dxel gunaazaman yaaman, abi' bari-iman xliaa guin, dxel bixchewan guzuloj cyaanman laa reeman.

### **Rayüjn Jesús zien ree Bénragxuu**

*(Mr. 1:32-34; Lc. 4:40-41)*

<sup>16</sup>Chi ma caxhin, binë ree bejn zien ree Bén yu' xindxab luxdoo loj Jesús. Abi' con tijb diidx ni gunee-man babëëman xindxab guin luxdoo ree-man, bayüjn tëëman gra ree Bénragxuu.

<sup>17</sup>Zian gojc persi gojc cumplid ni rëb Isaías, Bén badëë xtiidx Dios loj ree bejn, chi rëbaman: “Laaman zignë dux guialguijdx ree, laa tëëman zignë dux guialzi ree.”

### **Bén rën chinal Jesús**

*(Lc. 9:57-62)*

<sup>18</sup>Chi baguiaa Jesús bénguixiuj nayaw laaman, gunabeeman tédaman stiblad ro' nijs naj yagaj. <sup>19</sup>Dxel gubig tijb mextr rajc ley loj Jesús, rëbaman:

—Mextr, rënan guidnaalan lüj bantëëz guin chel.

<sup>20</sup>Abi' rëb Jesús lojman:

—Bëz ree yu' xbiliaa reeb, abi' ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

<sup>21</sup>Dxel rëb stijb ree Bén zinal laaman:

—Dad, baslaa naj gabenë' da dadan xt chi guiëtaman.

<sup>22</sup> Per rëb Jesús lojman:

—Tanal naj, basa'nman con ree bén ad rënt guidnal naj, laa reeman guquie'ch laaman chi guëtaman.

### Racwëez Jesús bidoxh

(Mr. 4:35-41; Lc. 8:22-25)

<sup>23</sup> Guyu Jesús loj barcw con ree xbejnman, <sup>24</sup> abi' la'tgaj zë reeman loj nijs guin dxejlczi gubi' tijb bidoxh, ma cazëbczi barcw guin xan nijs. Per Jesús naga'yëjsaman. <sup>25</sup> Dxel bicwëen ree xbejnman laaman, rëb reeman:

—¡Dad, gunaj dunujn! ¡Ma cayzëëban xan nijs!

<sup>26</sup> Badxi'man laan rëbaman:

—¿Chexc zeel dád rdxebidi? ¿Chexc zeel ad rliadxa'ctidi naj?

Dxel bixchewan abi' gunabeeman bacwëez bi guin në nijs guin. Loj hor zigajc babedxe reen. <sup>27</sup> Abi' ree xbejnman badxa da't loj reeman, zianz gunabdiidx loj lasa' reeman, rëb reeman:

—¿Chu bén guin, zeel xt bi në nijs ruzoob xtiidxaman?

### Tio'p ree bén yu' xindxab luxdoo

(Mr. 5:1-20; Lc. 8:26-39)

<sup>28</sup> Chi bidxin Jesús stiblad ro' nijs guin, loj xguidxliuj ree bén Gadara, dxel tio'p ree xinguaaw yu' xindxab luxdoo brii reex lād ree baa abi' wej reex loj Jesús. Dád nadoxh reex, zeel ad rile't chu téd lunejz guin. <sup>29</sup> Chi baguiaa reex Jesús, gurixdiaj reex rëb reex:

—¿Xhie rënl con dunujn, Jesús, Xi'n Dios? ¿Zëedil guie ya din gusagzil dunujn chi gadli dxej guidxin?

<sup>30</sup> Per gajxh yagaj za' zien ree cüch, cayaw reeb, <sup>31</sup> abi' guzajc ree xindxab guin liaadx loj Jesús, rëb reex:

—Bal yabëël dunujn, banee mod yadx-u'n lën ree cüch guin.

<sup>32</sup> Dxel rëb Jesús:

—Gol wej.

Dxel barii ree xindxab guin luxdoo ree bén guin bayu reex lën ree cüch guin. Abi' gra reeb guzuloj cuxiün zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

<sup>33</sup> Abi' ree bén cayajp cüch guin ree, baxiün reeman. Dxel chi badxin reeman luguiedx guin, be reeman diidx gra ni goc në gra ni guzac ree bén yu' ree xindxab guin luxdoo. <sup>34</sup> Dxel gra ree bén guiedx guin brii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

### Bayüjn Jesús bén nëjt xcuerp

(Mr. 2:1-12; Lc. 5:17-26)

**9** Dxel bayu Jesús loj tijb barcw, badëdaman stiblad ro' nijs guin abi' badxin ladxaman. <sup>2</sup> Yagaj binë ree bejn tijb xin nëjt xcuerp, naga'x loj da. Chi baguiaa Jesús guial rliadxa reeman laaman, rëbaman loj xin ragxuu guin:

—Bagu' luxdool zagdxë, xi'n. Ma benan perdon xtolil.

<sup>3</sup> Dxel tio'p choon ree mextr rajc ley been reeman xgab: “Diosan rüjnx tiblād guial rnieex zian.” <sup>4</sup> Per guial gogbee gajc Jesús xhie xgaben cayüjn reeman, dxel rëbaman loj reeman:

—¿Chexc zeel rüjndi xgabmal?

<sup>5</sup> ¿Conin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”? <sup>6</sup> Per yan, gulün lëjt guial naj, Bén guxhaal Dios ra'pan guialrniabee loj guidxliuj guie par gūnan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

<sup>7</sup> Laa bixchegajquix zia lidix. <sup>8</sup> Chi baguiaa ree bén guin zian, bidxeb reeman, abi' baza't reeman Dios zagdxë por guialrniabee ni badëëman loj ree bejn.

### Rbejdx Jesús Matew

(Mr. 2:13-17; Lc. 5:27-32)

<sup>9</sup>Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

<sup>10</sup>Tijb dxej chi cayaw Jesús lidx Matew con zien ree bën ruquijx impuest në ree bën zëëb xtiidx ad nabant xnejz, gra reeman zojbnë Jesús xan mex con ree xbejnman. <sup>11</sup>Chi baguiaa ree bënfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi bën ruquijx ree impuest në ree bëndol?

<sup>12</sup>Chi biguiejn Jesús ni rëb reeman, dxel rëbaman:

—Bënnadaan ree ad ryaadxt reeman doctor, bënragxuu ree laa reeman ryaadx doctor. <sup>13</sup>Gol chej, gol basiid xhie rën guiëb loj xtiidx Dios lod rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree bëndol, din yayüjn reeman xgab por xtol reeman.

### Rniabdiidx reeman loj Jesús xcwent guialrba'n

(Mr. 2:18-22; Lc. 5:33-39)

<sup>14</sup>Dxel ree xbejn Waj, bën baroobnijs bejn ree, bibig reeman loj Jesús, zianz gunabdiidx reeman lojman, rëb reeman:

—¿Chexc zeel dunujn con ree bënfarisew dád zienvolt raba'nan, guiáad ree xbejnl ad rba'nt reeman?

<sup>15</sup>Badxi' Jesús san rëbaman:

—Lod yu' guialruxhliaa, ¿wen runaya ree biooz ya chi za'në xin cuxhliaa guin laa reeman? Per guidxin dxej chiquiedix, dxel guiba'n reeman.

<sup>16</sup>Achut rata' lajd cüb loj lajd yojx din zaxü'n lajd cüb guin, abi' mazri quixya'n

lajd yojx guin. <sup>17</sup>Ad rgu' tëët reeman vin cüb lën anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cüb lën anfr cüb, din ni'qui tijb reen ad zaxint.

### Bayajc xi'n Jairo në búngunaa bagaal xab Jesús

(Mr. 5:21-43; Lc. 8:40-56)

<sup>18</sup>La'tgaj canee Jesús zian, bidxin tijb bën miabee lën xyadoo ree bën Israel, abi' bazuxibaman loj Jesús, rëbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

<sup>19</sup>Dxel zinë Jesús laaman con ree xbejn Jesús. <sup>20</sup>Abi' tijb búngunaa ragxuu ma gojc chiptio'p ijz ad rbëzt ryajbaman rejn, gubigaman niz xijch Jesús abi' bagaalaman guia' xabaman, <sup>21</sup>guial gunaladxaman: “Bal gugaalaman majsi xabzaman, zayajcaman.” <sup>22</sup>Per badxi' loj Jesús, abi' baguiaadxiichaman búngunaa guin, dxel rëbaman lojman:

—Zagdxë bagu' luxdool, xi'n. Ma bayajquil guial bililadxil naj.

Abi' loj hor ziigajc bayajc bën guin.

<sup>23</sup>Chi bidxin Jesús lidx bën miabee guin, baguiaaman ma riga' ree xinrucwejdix din chiquie'ch reex xi'nman, abi' ree bejn roon rbixdiaj reeman guijquim. <sup>24</sup>Dxel rëb Jesús loj reeman:

—Gol barii guie, din ad güjtt bindo guin, naga'yëjszim.

Abi' baxijdxnë reeman laaman. <sup>25</sup>Chi ma barii reeman, zianz guyuman. Gunaaazaman yaa bindo guin dxel bixchem. <sup>26</sup>Abi' guidib niz yagaj bire'ch diidx ni goc.

### Rayüjn Jesús tio'p bënlutia'p

<sup>27</sup>Chi baza Jesús yagaj, binal tio'p bënlutia'p laaman, rbixdiaj reeman, rëb reeman:

—¡Jesús, xdiaa Davi, baya dunujn!

<sup>28</sup> Chi badxin Jesús lod zojbaman, dxel bibig ree bèn guin lojman, abi' gunabdi-idxaman loj reeman, rëbaman:

—¿Rliladxidi ya guial zile' yayünan læjt?

Badxi' reeman laan rëb reeman:

—Raliduladxan, Dad.

<sup>29</sup> Dxel bagaal Jesús guiaaloj reeman, rëbaman:

—Gac zi'c rliladxidi.

<sup>30</sup> Abi' bayajc guiaaloj reeman, dxel rëb Jesús loj reeman:

—Ad bal chu loj guiëbidi guial bayajc guiaalojdi.

<sup>31</sup> Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

### Rayüjn Jesús tijb bengop

<sup>32</sup> Chi baza ree bèn bayüjn Jesús guiaaloj, dxel bidxinnë ree bejn tijb bengop, yu' xindxab luxdooan. <sup>33</sup> Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dád badxaloj ree bejn, rëb reeman:

—Ad goct waguiaa ree lasa' milagr guie niz Israel.

<sup>34</sup> Per ree bënfarisew rëb reeman:

—Bèn guin rabëë xindxab luxdoo ree bejn por xguialrniabee gajc xindxab rniabee ree xindxab.

### Raya Jesús bejn ree

<sup>35</sup> Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn tëëman graloj guialrdoob në graloj guialguijdx ni rajc ree bejn. <sup>36</sup> Chi baguiaa Jesús benzien guin ree, bayaman laa reeman, guial dád naya riga' reeman, riga' reeman zi'c xiil ad rya'pt. <sup>37</sup> Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bèn gulüü laa

reeman yu'. <sup>38</sup> Zeel gol gunab loj Dios din guixhiaalaman mazri ree bèn gulüü laa reeman.

### Gulej Jesús chiptio'p ree apóstoles

(Mr. 3:13-19; Lc. 6:12-16)

**10** Gurejdx Jesús chiptio'p ree xbejnman, abi' badëëman guialrniabee loj reeman din yabëë reeman xindxab luxdoo ree bejn din yayüjn tëë reeman bejn ree graloj guialrdoob në graloj guialguijdx.

<sup>2</sup> Bèn guie ree naj guidxiptio'p ree xi apóstoles Jesús: Simón bèn gulëëljaman Bëd, con bijchaman Andrejs, në Jacob con Waj, bèn naj ree xi'n Zebedeo. <sup>3</sup> Në Felip, Tol, Tumajs con Matew bèn baquijx impuest, nëtëë Jacob xi'n Alfeo con Lebeo bèn la gajc Tadeo <sup>4</sup> në Simón bèn bi'ch loj ree bèn Cananistas con Judas Iscariote bèn yayü Jesús.

### Rxhiaal Jesús gra ree xbejnman chigliüü reeman xtiidx Dios

(Mr. 6:7-13; Lc. 9:1-6)

<sup>5</sup> Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zojb ree bèn ad najt bèn Israel, ni'qui ree guiedx riga' niz Samaria, <sup>6</sup> gol chejli niz lod zojb ree bèn Israel bèn ad zinalt ree xnejz Dios. <sup>7</sup> Gol güjdx loj reeman guial ma zëëd gajxh xguialrniabee Dios. <sup>8</sup> Gol bayüjn bënragxuu ree, gol basban bèn ma güjt ree, gol bayüjn bèn rajc ree guialguijdx la lepra, gol babëë tëë xindxab luxdoo ree bejn. Zi'cgajc cwa' lagajdi guialrniabee, ziangajc yayüjndi bejn lagajzi.

<sup>9</sup> Ad chinëdi or, ni'qui plajt, ni'qui cobr, <sup>10</sup> ni'qui guijxh. Ad bal chinë stib nejz xabidi, ni'qui stib nejz xgurëchidi, ni'qui yagriadxidi, din bèn riijn dxiin rayal gudëëd ree bejn ni gawaman.

<sup>11</sup> Chi guidxindi tijb guiedx o tijb ciuda, gol gule'c ruson chu bèn naj benza'c yaya'ndi lidx, yagaj gol baya'n xt chi



yazadi luguiedx guin. <sup>12</sup> Abi' chi chu'di lënü guin, gol güjdx loj ree bën zobj yagaj: “Yabe'cdxe Dios luxdoodi.” <sup>13</sup> Bal rayal reeman guialnaza'c guin, zaya'nan con laa reeman guiáad bal id rayal reeman laan zayejan con lëjt. <sup>14</sup> Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxijp guxyuj guia'di zi'c tijb sen guial ad bazoobt reeman xtiidxidi. <sup>15</sup> Naj rni lëjt guial dxej ni yadëed ree bejn cwent loj Dios, mazri casti narooob yayal reeman guial loj ree bën Sodoma në Gomorra.

### Guialzi ni zëed

<sup>16</sup> Rëb tëë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëël, gol gojc tëë nadoo zi'c palom. <sup>17</sup> Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo. <sup>18</sup> Abi' xt chinë reeman lëjt loj ree gobernador në loj ree rey guial rliladxidi naj, zian güdi da diidxan loj reeman në loj ree bën ad zinalt xnejz Dios. <sup>19</sup> Per chi chinë reeman lëjt loj guxtis, ad chu'di xgab xhie guinieedi xhie tëë naag guinieedan, din chi guidxin hor guinieedi, Dios yazaladx lëjt diidx ni guinieedi. <sup>20</sup> Din ad lëjtgan guinee, xSprijt xDadidi Diosan guinee por lëjt.

<sup>21</sup> Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman. <sup>22</sup> Gra bénguidxliuj guidxe'ch lëjt guial najdi da bejnan, per bën sudxi'ch loj guial rliladxaman naj xt dxej chigra guibanman, laaman yayal xanyabaa. <sup>23</sup> Chi sunal reeman lëjt tijb luguiedx par güün reeman lëjt xhienin,

gol chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

<sup>24</sup> Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. <sup>25</sup> Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëëläj ree bejn naj Beelzebú, diidxgui lëjt najdi da bejnan.

### Chu rayal guidxeb bejn

(Lc. 12:2-9)

<sup>26</sup> Ad guidxebidi bejn ree, din achet ni ralan yu' ni ad zaguiant, ni'qui tijb ni naguie'ch ad yu't ni ad zagbeet bejn.

<sup>27</sup> Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn. <sup>28</sup> Ad rdxebidi bën rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

<sup>29</sup> Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDadidi Dios.

<sup>30</sup> Guiáad lëjt xt guidxguijquidi graczan nayab loj Dios. <sup>31</sup> Zeel ad rdxebidi din mazri lasajquidi guial loj zien da't ree biguijndoo.

### Bén rëb loj ree bejn guial najman xbejn Jesucrist

(Lc. 12:8-9)

<sup>32</sup> Bén guiëb niz loj ree bejn guial da bejnanan, ziangajc naj guië loj da Dadan Dios bën yu' xanyabaa guial da bejnanan. <sup>33</sup> Per bën guiëb niz loj ree bejn guial ad da bejntanan, ziangajc guië loj da Dadan Dios bën yu' xanyabaa guial ad da bejntanan.

### Por Jesús rlia' lasa' ree bejn

(Lc. 12:51-53; 14:26-27)

<sup>34</sup>Rëb tëë Jesús:

—Ad zialtan par yabecdxen luxdoo bejn, zialan din guial chililadx reeman naj chu' wadijl. <sup>35</sup>Din guial chililadx bejn naj, zadxe'ch xinguaaaw xdadix, guiaád biingunaa zadxe'ch xniaam, abi' biinwalidx zadxe'ch xnasuegrim. <sup>36</sup>Abi' laagajc bën zojb ree lënüldixdi guidxe'ch lëjt.

<sup>37</sup>'Bën rën xdad o xniaa mazczi guial lon, ad zajct gacaman da bejnan. Ziangajc bën rën xi'ngaan o xi'ndxap mazczi guial lon, ad zajct gacaman da bejnan. <sup>38</sup>Bën rën guidnal naj, abi' ad rëntaman sagdiajman por naj, ad zile't gacaman da bejnan. <sup>39</sup>Bën rniajchi' guialnaban rajpaman loj guidxliuj guie, zadxin dxej gunijtaman laan, per bën guiët por naj, zapaman guialnaban tiblyaa con Dios.

### Ni tia' ree bejn

(Mr. 9:41)

<sup>40</sup>'Bën ridxga' lëjt, najn ridxga'man, guiaád bën ridxga' naj, bën guxhaal najn ridxga'man. <sup>41</sup>Bën ridxga' tijb bën rudëë xtiidx Dios loj ree bejn, guial zëédaman por Dios, zaca'man lasa' ni rayal tia' bën guin loj Dios. Ziangajc bën ridxga' tijb bën naban zi'c rën Dios, zaca'man lasa' ni rayal tia' bën guin loj Dios. <sup>42</sup>Abi' chutëëz bën gudëéd majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëéd Dios tia' reeman.

### Bigneenë ree xbejn Waj Jesús

(Lc. 7:18-35)

**11** Chi gulox rëb Jesús loj guidxip-tio'p ree xbejnman con ree nin chiguieen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

<sup>2</sup>Abi' Waj, la'tgaj yu'man ladxguiib, cwa'man ruson gra ree ni cayün Jesús. Dxel guxhaal tio'p choon ree xbejnman, <sup>3</sup>bignabdiidx reeman lojman, rëb reeman:

—¿Lüj naj Cristo ya bën naj gui't, o yalëjzan ben ren ya?

<sup>4</sup>Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdiajguidi. <sup>5</sup>Gol güjdx lojman guial ma ruguiaa ree bën-lutia'p, ma rajc rza ree bencoj, ma bayajc tëë ree bën rajc guialguijdx la lepra, ma riguejn ree bën nacwa't guiaád ree bengüt ma baban reeman, abi' ree bënprob ma caguiejn reeman xtiidx Dios. <sup>6</sup>Xiquilbaa ree bën ad zucwëëzt chililadx naj.

<sup>7</sup>Chi baza ree bën guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj bën biquiaadi loj yujbidx? ¿Naladxidi ya najman zi'c tijb biqui ni runiib bi? <sup>8</sup>¿O xhienaag naj bën biquiaadi? ¿Najman tijb bën najcw lajd zagdx ya? Lëjt ragbee guial bën rajcw ree lajd zagdx lën palas zojb reeman. <sup>9</sup>¿Chuz a biquiaadi? ¿Tijb bën rudëë xtiidx Dios loj ree bejn ya? Per naj rni lojdi guial biquiaadi tijb bën mazri zojbloj guial loj bën rudëéd xtiidx Dios loj ree bejn. <sup>10</sup>Wajn din laaman naj ben ruza't loj xtiidx Dios lod rëb:

Naj rxhial tijb bën ned lojl, ben güünchaaw xnejzil.

<sup>11</sup>Naj rni lëjt, loj graczi ree bénguidxliuj, ad wayut bën mazri zojbloj guial loj Waj. Per majsi zian, bën ad zojblojt loj xguial-rniabee Dios, laaman mazri zojbloj guial loj Waj.

<sup>12</sup>'Diizd chi bi't Waj xt yan, zien bejn rüjn da't naguiejn chu' lod rniabee Dios. Abi' ree bën rüjn da't naguiejn laa reeman chu' lod rniabeeman. <sup>13</sup>Diizd ley badëë Dios loj Moisejs con loj ree bën badëë xtiidx Dios loj ree bejn, xt Waj,

laa reeman gunee xcwent xgualrniabee Dios. <sup>14</sup> Abi' bal chililadxidi ni ganin lëjt, naj rni guial Wajn naj Elías bën badëë xtiidx Dios loj ree bejn. <sup>15</sup> Bën rën ree gucaagdiajg, gol bacaagdiajg.

<sup>16</sup> ¿Xhienaag ganin lëjt naj ree bën riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: <sup>17</sup> "Bacwejdxan bidxa, per ad baya'tidi, badoolan ni naya ree per ad biintidi." <sup>18</sup> Din bi't Waj bën baroobnijs bejn ree, ad rawtaman ad rë' tëtaman vin, abi' rëbidi xindxab yu' luxdooan. <sup>19</sup> Yan, bi't Bën guxhaal Dios, rawaman rë' tëëman vin abi' rëbidi nalaman ruladx tëëman guië'man, ruchajg tëëman bëndol ree con ree bën ruquijx impuest. Per ree bën ma ca' xgualrniabee Dios, por laa reeman rguien guial gra ni rüjn Dios naj zagdx.

### **Bën ad bazoobt ree xtiidx Dios**

(Lc. 10:13-15)

<sup>20</sup> Dxel guzuloj Jesús cadilëman bën zojb ree guiedx lod beenman mazri zien ree milagr. Din bën guin ree ad bayüjnt reeman xgab por xtol reeman, abi' rëbaman loj reeman:

<sup>21</sup> —¡Probza lëjt bën Corazín! ¡Probza lëjt bën Betsaida! Din bal luguiedx Tiro në luguiedx Sidón niajc ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guijc reeman zi'c tijb sen guial ma bayüjn reeman xgab por xtol reeman. <sup>22</sup> Per rnin lëjt guial dxej yadëëd ree bejn cwent loj Dios, mazri casti narooob yayalidi guial loj ree bën Tiro në ree bën Sidón. <sup>23</sup> Guiáad lëjt bën Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin. <sup>24</sup> Per rnin lojdi guial dxej yadëëd ree bejn

cwent loj Dios, mazri casti narooob yayalidi guial loj ree bën Sodoma.

### **Gol guda lon din yaziiladxidi**

(Lc. 10:21-22)

<sup>25</sup> Lën ree dxejzii rëb Jesús:

—Dad, ruzatan lüj zagdx, din ni baquie'chil loj ree bën rajc në loj ree bën rignia', laan ma balüül loj ree bën ad rajct. <sup>26</sup> Zian gojc Dad, din zian guyën.

<sup>27</sup> 'Da Dadan banee gra lon. Abi' achut nünbee Jesucrist xi'n Dios, tijbzi Dios, achu tëët nünbee Dios, tijbzi Jesucrist xi'nman, con ree bën rënman güünbee Dios. <sup>28</sup> Gradi, bën ma badxag rüjn xhienin din yaya'ndi zagdx loj Dios, ma badxag tëëdi nüü xtolidi. Gol guda lon, naj gune guialraziiladx lojdi. <sup>29</sup> Gol bazoob da diidxan, gol basiid tëë gaquidi benza'c në bën chaawlaxd zi'c naj, din yabedxe luxdoodi loj Dios. <sup>30</sup> Din ad nawëëgt guial guzoobidi da diidxan, ad nawëëg tëët guial güündi zi'c rënan.

### **Rgui'ch ree xbejn Jesús trigo dxej raziiladx ree bën Israel**

(Mr. 2:23-28; Lc. 6:1-5)

**12** Tijb dxej raziiladx ree bejn, chi cadëd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan. <sup>2</sup> Abi' chi baguiaa ree bënfarisew ni cayüjn reeman, rëb reeman loj Jesús:

—Baguiaa ree xbejnl nial cayüjn reeman ni ad rayalt güün reeman dxej raziiladx ree bejn.

<sup>3</sup> Dxel rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? <sup>4</sup> Guyu Davi lën xyadoo Dios abi' cwa'man guiadxtil ma nagle' ree gudawaman con ree xcompniaraman, ni ad rayalt niajw reeman, bixhiosi ree rayal gaw laa reen. <sup>5</sup> ¿O gadidi gool loj xley Moisejs

ya guial achet dol rüjn ree bixhioz chi rüjn reeman dxiin lën yadoo majsi ad raziiladxt reeman dxej raziiladx ree bejn? <sup>6</sup> Abi' naj rni lëjt guial naj, bën za'në lëjt mazri lasajcan guial loj yadoo. <sup>7</sup> Bal rignia'di xhie rën guiëb loj xtiidx Dios lod rëb: "Ni rënan naj guial yaya lasa'di, ad guial gunetidi gon lon." Bal rignia'di diidx guin ree ad zudxiibtidi guijc ree bën ad rajpt dol. <sup>8</sup> Abi' Bén guxhaal Dios rajpaman gualrniabee dxej raziiladx ree bejn.

### Rayajc tijb bën nëjt tiblاد yaa

(Mr. 3:1-6; Lc. 6:6-11)

<sup>9</sup> Chi gudëd gojc zian, dxel baza Jesús abi' guyuman lën tijb yadoo naj niz ya-gaj. <sup>10</sup> Lën yadoo guin za' tijb bën nëjt tiblاد yaa. Abi' guial ree bënfarisew raguiil reeman mod xhie gudxiib reeman guijc Jesús, dxel gunabdiidx reeman loj-man, rëb reeman:

—¿Zile' yayüjn bejn tijb bënragxuu dxej raziiladx bejn ya?

<sup>11</sup> Badxi' Jesúsán rëbaman:

—Bal tijb lëjt rajp tijb xiil, abi' yabib lën bala' dxej raziiladx bejn. ¿Nid zabëëdi laab dxej guin ya? <sup>12</sup> ¿Wen id mazri lasajc tijb bejn guial loj tijb xiil ya? Zeel achet güünan zajc güün bejn ni naj zagdx dxej raziiladx bejn.

<sup>13</sup> Dxel rëb Jesús loj bënragxuu yaa guin:

—Basli yaal.

Abi' basli yaa bën guin, loj hor zi-igajc bayajc yaaman zi'c naj stibladan.

<sup>14</sup> Per chi barii ree bënfarisew guin lën yadoo guin, guzuloj cayü reeman diidx xhienaag güün reeman din gugüjt ree-man Jesús.

### Bën gule Dios

<sup>15</sup> Chi gogbee Jesús zian, laa zia gaj-caman, abi' zien ree bejn binal laa-man. Dxel bayüjnman gra ree bënragxuu, <sup>16</sup> abi' gunabeeman laa reeman

chitëë guitie'ch reeman diidx chu bayüjn laa reeman. <sup>17</sup> Zian guzobj xtiidx Isaías, bën badëë xtiidx Dios loj ree bejn, chi rëbaman:

<sup>18</sup> Gol baguiaa, bën guie naj bën gulen din güünman naj sirv, laaman naj bën rën da'tan, rabaanë' tëen laaman.

Gudë da Sprijtan lojman abi' guiëbaman loj ree bënguidxliuj xhienaag naj da gualrniabeen.

<sup>19</sup> Achut tilnëman,

ad zabixdiaj tëëtaman

achut tëët guien cha'man niz lunejz.

<sup>20</sup> Ad zudëëdtaman casti bën ad za'dxi'cht

ree loj da nejzan, në ree bën ad ridx-ga'za'ct naj,

xt chi ma beenman gan gac gualguxtis.

<sup>21</sup> Abi' xt ree bën ad najt bën Israel cwëz reeman yabëëman laa reeman loj dol.

### Rëb ree bejn ca' Jesús xgualrniabee Beelzebú

(Mr. 3:19-30; Lc. 11:14-23; 12:10)

<sup>22</sup> Binë ree bejn tijb xinguaaaw lod za' Jesús, yu' xinxab luxdoox, natia'p lojx naj tëëx gop. Dxel bayüjn Jesús laax abi' guzuloj rnieex ruguiaa tëëx. <sup>23</sup> Graczi ree bejn dád badxalaj reeman, abi' rëb reeman:

—¿Id bën guinan zëëd loj xdiaa Davi ya?

<sup>24</sup> Chi biguiejn ree bënfarisew zian, dxel rëb reeman:

—Bën guin rabëë xinxab luxdoo ree bejn por xgualrniabee Beelzebú xin rniabee ree xinxab.

<sup>25</sup> Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' ree-man, rlia' lasa' reeman. <sup>26</sup> Ziangajc bal xinxab su contr laagajquix, nayob nitix.

<sup>27</sup> Lëjt na guial naj rabë xindxab luxdoo ree bejn por xguialrniabee Beelzebú, per bal zianan, ¿chuza rudëë guialrniabee loj xbejndi din yabëë reeman xindxab? Zeel laagajc reeman ruliüü guial ad laat rnieedi. <sup>28</sup> Per naj, bal por xSprijt Dios rabën xindxab luxdoo ree bejn, rën guiëban guial ma za'në xguialrniabee Dios lëjt.

<sup>29</sup> 'Din ¿xhieza naag chu' tijb bejn lidx tijb bën gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

<sup>30</sup> 'Bën ad za't con naj, za'man contr naj. Guiáad bën ad ruto'pt bejn par naj, rtie'chaman laa reeman.

<sup>31</sup> 'Zeel rnin lëjt: Züjn Dios perdon xhietëëz dolan, në ree diidxguijdx ni rnieetzi ree bejn, per ad züjntaman perdon bën rnieeguijdx ree xSprijt Dios. <sup>32</sup> Chutëëz bën guinieeguijdx Bën guxhaal Dios, zajcaman perdon, per bën guinieeguijdx xSprijt Dios ad zajctaman perdon yan, ni'qui chi yaguialan.

### **Nünbee bejn tijb yag por ni rtia lojn**

(Lc. 6:43-45)

<sup>33</sup> 'Lëjt ragbee, bal tijb bejn ruzuj tijb yag zagdxe, rtia ni zagdxe lojn, per bal guzujman tijb yag guijdx, rtia ni gui-jdx lojn. Din tijb gaj yag nünbee bejnan por ni rtia lojn. <sup>34</sup> ¿Xi'n xindxab! ¿Xoza guinieedi diidx zagdxe ree awa benmal lëjt? Din ni yu' luxdoo bejn laan rnieeman. <sup>35</sup> Benza'c rnieeman diidxza'c, din laan yu' luxdoo man. Guiáad benmal rnieeman diidxmal din laan yu' luxdoo man. <sup>36</sup> Per naj rni lëjt guial dxej ni güün xguialguxtis Dios, gra ree bejn yadëëd cwent lojman por gra ree diidxguijdx ni rniee reeman. <sup>37</sup> Din por xtiidx gajc bejn guiguien bal rayalaman xcasti Dios o ad rayaltaman laan ya.

### **Rniab ree bënfarisew tijb milagr**

(Mr. 8:12; Lc. 11:29-32)

<sup>38</sup> Yu' ree bënfarisew con ree mextr ni rajc ley, rëb loj Jesús:

—Mextr, rayënan yaguiaan güünl tijb milagr.

<sup>39</sup> Badxi' Jesúsán rëbaman:

—Lëjt benmal, bën ad rüjnt ni rën Dios abi' rëndi günan tijb milagr. Per achetri guguaadi, tijbzi zi'c guzac Jonás bën badëë xtiidx Dios loj ree bejn. <sup>40</sup> Din zi'c guyu Jonás lën bëjl narooob choon dxej choon guiaal, ziangajc Bën guxhaal Dios, choon dxej choon guiaal chu'man lën baa. <sup>41</sup> Abi' chi yadëëd ree bejn cwent loj Dios, bën guban ree Nínive zaban reeman abi' guiëb reeman guial ree bën riga' yan, yayal reeman xcasti Dios. Din bën Nínive ree bayejc reeman loj Dios chi bacaagdiajg reeman xtiidx Dios ni gunee Jonás. Abi' yan, bën za-'në lëjt mazri lasajcaman guial loj Jonás. <sup>42</sup> Ziangajc bën goc reina niz sur, zabanman chi yadëëd ree bejn cwent loj Dios, dxel guiëbaman guial ree bën riga' yan, yayal reeman xcasti Dios. Din laaman dád zijt guzaman persi bicaagdiajgaman xguialrajc rey Salomón. Abi' yan, bën za-'në lëjt mazri lasajcan guial loj Salomón.

### **Xindxab ni rayejc**

(Lc. 11:24-26)

<sup>43</sup> 'Chi rarii tijb xindxab luxdoo tijb bejn, abi' rzax niz loj yujbidx rguuilix lod yaziiladxix. Abi' chi ad rdxejlt lod yaziiladxix, dxel rüjnx xgab naladxix: <sup>44</sup> “Zagdxeli yaye'can lod guzaan.” Abi' chi rayejquix ruguiaax luxdoo bën guin najn zi'c tijb lëñü lod achut zobj, lod bilioob lod najcchaaw tëë. <sup>45</sup> Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bën guin. Dxel mazri benmal gacaman guial loj ni gocaman yaloj. Ziangajc sac ree benmal riga' loj guidxliuj yan.

**Xniaa Jesús con ree bijchaman***(Mr. 3:31-35; Lc. 8:19-21)*

<sup>46</sup>Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. <sup>47</sup>Abi' yu' tijb bën rëb lojman:

—Laa xniaal con ree bijchil za' lule' guin, rën reeman guinieenë reeman liij.

<sup>48</sup>Per Jesús badxi'man xtiidx bën guin rëbaman:

—¿Chu naj da nan chu tëë ree nin naj da bichan?

<sup>49</sup>Dxel con yaaman balüü ree xbejman rëbaman:

—Bën guie ree naj da nan në ree da bichan. <sup>50</sup>Din chutëëz bën rüjn zi'c rën da Dadan bën yu' xanyabaa, laaman naj da bichan, da zanan, në da nan.

**Xcwent bën rtie'ch bin***(Mr. 4:1-9; Lc. 8:4-8)*

**13** Dxejzii brii Jesús yu lod zojbaman, bisobaman ro' nijs Galilea. <sup>2</sup>Abi' guial dád zien ree bejn bido'p yagaj, beenan naguiejn wë'p Jesús loj tijb barcw dxel gurejman lojn, guiáad ree bën guin za' reeman ro' nijs guin. <sup>3</sup>Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman. <sup>4</sup>Chi catie'chaman bin guin, ta'nan biajb loj nejz, abi' bi't ree biguijn gudaw reeb laan. <sup>5</sup>Sta'nan biajb loj ree guiay lod ad riga't zien yuj, cari gulejnan guial ad zient yuj riga'. <sup>6</sup>Per chi brii gubijdx, baze'can laan, abi' guial ad yu't liujn gubidxan. <sup>7</sup>Dxel sta'nan biajb loj ree yaquiejch, chi guni's ree yaquiejch guin banidloj reen laan. <sup>8</sup>Per sta'nan biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' tëën cwa gajlbichii. <sup>9</sup>Bën rën gucaagdiajg, gol bacaagdiajg.

**Chexc zeel ruliüü Jesús con ni naj ree zi'c cwent***(Mr. 4:10-12; Lc. 8:9-10)*

<sup>10</sup>Dxel gubig ree xbejn Jesús lojman rëb reeman:

—¿Chexquiza zeel ruliüül bejn ree con ganax zi'c cwent ree?

<sup>11</sup>Badxi' Jesús laan rëbaman:

—Lëjt, Dios ma basa'n lëjt din chignia'a'di xhienaag naj xguialrniabeeman, per bën guin ree ad basa'nt Dios laa reeman chignia' reeman laan. <sup>12</sup>Din Bén ma rignia', gusnuu chignia'man mazri, abi' zignia' da'taman. Per bën ad rignia'za'ct ad rüjn tëëtaman naguiejn chignia'man mazri, xt ta'n ni rignia'man zayanladxaman. <sup>13</sup>Zeel rniën'n laa reeman con ganaxzi zi'c cwent ree. Din majsi rani loj reeman per rüjn reeman zi'c bën ad ruguiaat, abi' majsi rigujiejn reeman per rüjn reeman zi'c bën ad rigujiejnt, bën ad rignia' tëët. <sup>14</sup>Zian rzojb xtiidx Isaiás, bën badëë xtiidx Dios loj ree bejn, chi rëbaman:

Majsi rigujiejn reeman, per achetczi chignia' reeman.

Abi' majsi rani loj reeman, per ad ruguiaat reeman.

<sup>15</sup>Din ma been luxdoo reeman gojl,

nayaaw guidiajg reeman,

nayaaw tëë guiaaløj reeman.

Chitëë guguaa reeman,

guiguiejn reeman,

chignia' tëë reeman.

Din ad rënt reeman gui't reeman lon din gūnan laa reeman perdon.

<sup>16</sup>Per xiquilbaadi cuguiaadi caguiejn tëëdi. <sup>17</sup>Din naj rni lojdi guial dád zien ree bën badëë xtiidx Dios loj ree bejn, në ree bën guban zi'c rayal, guyën reeman nuguaa reeman ni cuguiaadi per ad baguiaat reeman laan. Guyën reeman niguiejn reeman ni caguiejndi per ad bigujiejnt reeman laan.

**Rusignia' Jesús  
xcwent bén rtie'ch bin**

(Mr. 4:13-20; Lc. 8:11-15)

18 'Yan gol bacaagdiajg xhie rën guiëb ni rnin lojdi xcwent bén bigtie'ch bin. 19 Bén rigueijn xtiidx Dios abi' ad rignia'taman laan, laaman naj zi'c bin bi-ajb loj nejz, guial laa ri't gajc xindxab rquiedix ni bacaagdiajgaman. 20 Guiáad bin biajb loj ree guiaj naj zi'c bén rigueijn xtiidx Dios, abi' dád nix ru luxdooman rigueijnman laan, 21 per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdx-e'ch ree bejn laaman por xtiidx Dios, laa rusa'n gajcaman ni rililadxaman. 22 Abi' bin biajb loj ree yaquiejch naj zi'c bén rigueijn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwëez rucaagdiajgaman xtiidx Dios achet sirv been ni bacaagdiajgaman. 23 Per bin biajb loj yuj za'c naj zi'c bén rigueijn xtiidx Dios abi' rignia'man laan rüjn tëëman zi'c rën Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

**Trigo con gui'xhguijdx**

24 Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c tijb bén badxe' ganax bin zagdxe loj xguiniaa. 25 Per la'tgaj naga'yëjs gra reeman, bidxin bén rdxe'ch laaman guxübinman gui'xhguijdx ree loj trigo guin dxel ziaman. 26 Abi' chi gulen trigo guin brii tëë dojn lojn në ree gui'xh guin ma yu' lojn. 27 Dxel bicojn ree xmojs bén naj xguiniaa laan laaman, rëb reeman: “Dad ¿nid ganax bin zagdxe badxe' loj xguiniaal ya? yan, ¿banza guza gui'xh yu' lojn?” 28 Badxi'man laan rëbaman: “Wed tijb bén rdxe'ch naj bidgadxe' laan.” Dxel gunabdiix ree mojs guin lojman rëb ree-

man: “¿Xhie nal zudojxhan gui'xh guin ree ya?” 29 Dxel rëbaman loj reeman: “Yajqui, chitëë guial gaxhidi gui'xh guin gaxhidi në trigo guin. 30 Zagdxe' gol basa'nan din ni'snën trigo guin xt chi ma gojcan. Abi' chi guidxin dxej yado'p trigo guin guiën loj ree bén guto'p laan din yalojxgaj gui'xh guin yato'p reeman din guixhii reeman lënan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

**Xcwent xhaj moxtajs**

(Mr. 4:30-32; Lc. 13:18-19)

31 Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c xhaj moxtajs, ni rudxe' tijb bejn loj xguiniaaman. 32 Abi' bin guin naj mazri ni wit loj gra ree bin, per chi rni'san laan rajc mazri ni naroo loj gra ree cwaan. Abi' guial naroo da't rajcan, xt rüjn xguixbitia's ree biguijn xidzan.

**Xcwent levadur**

(Lc. 13:20-21)

33 Be tëë Jesús stijb ni naj zi'c cwent loj reeman, rëbaman:

—Xguialrniabee Dios naj zi'c levadur ni rugo'ch tijb béngunaa choon midid harin, abi' laan rusaaguij gra cob guin.

**Chexc zeel rulüü Jesús con  
ni naj ree zi'c cwent**

(Mr. 4:33-34)

34 Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent. 35 Zian gojc persi guzojb xtiidx bén badëë xtiidx Dios loj ree bejn, chi rëbaman: Con ganaxzi ni naj ree zi'c cwent gulün bejn ree, guiën loj reeman ni gad reeman gagbee diizd chi gocchaaw guidxliuj.

**Rusignia' Jesús xcwent gui'xhguijdx**

<sup>36</sup> Chi ma bazaadiidxnë Jesús benzien guin ree, dxel bayuman lënü con ree xbejnman, abi' gunabdiidx reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

<sup>37</sup> Badxi' Jesúsán rëbaman:

—Bén rudxe' bin zagdxe guin naj Bén guxhaal Dios, <sup>38</sup> abi' guiniaa guin naj guidxliuj. Guiáad bin zagdxe guin naj ree bén naj par loj xguialrniabee Dios. Abi' ree gui'xh guin naj bén naj ree par xindxab. <sup>39</sup> Guiáad bén rdxe'ch, bén guxübin trigo guin naj xindxab. Abi' guial rado'p guialnaza'c guin rën guiëb chi nit guidxliuj, guiáad ree bén ya-to'p guialnaza'c guin naj ree xianjl Dios. <sup>40</sup> Zian zi'c rado'p ree gui'xhguijdx guin par che'c reen, zian gac chi nit guidxliuj. <sup>41</sup> Bén guxhaal Dios guixhiaal ree xianjlaman din yabëë reeman bén rayal ree yarii loj xguialrniabeeman, bén ruzaal-guiiw bejn ree din güün reeman dol në gra ree bén cayüjn dol. <sup>42</sup> Abi' guzaal reeman laa reeman loj bajl lod goon reeman xt gaw lay reeman. <sup>43</sup> Dxel bén naban ree zi'c rën Dios, guidiin reeman bacha' loj xguialrniabee xDad reeman Dios, zi'c rdiin gubijdx bacha'. Bén rën gucaagdiajg, gol bacaagdiajg.

**Xcwent ni lasajc**

<sup>44</sup> Xguialrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëëman laan. Abi' dád rabaaman ruto' gra ni rajpaman persi rsiiman guidxliuj guin.

**Xcwent perl**

<sup>45</sup> Rni tëen lëjt: Xguialrniabee Dios naj zi'c tijb bén rguuil perl zagdxe din siiman laan. <sup>46</sup> Chi rdxejlaman tijb perl

lasajc, ruto' gra ni rajpaman abi' rsiiman laan.

**Xcwent guijxh rniaaz bëjl**

<sup>47</sup> 'Abi' tëë xguialrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl. <sup>48</sup> Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëëb reeman. <sup>49</sup> Zian gac dxej nit guidxliuj, gui't ree xianjl Dios yabe reeman benmal loj ree benza'c. <sup>50</sup> Abi' guzaal reeman benmal guin ree loj bajl lod goon reeman abi' xt gaw lay reeman.

**Bén rbe nicüb në ni yojx**

<sup>51</sup> Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'nán, Dad.

<sup>52</sup> Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xguialrniabee Dios, laa reeman naj zi'c tijb bén rbe nicüb në ni yojx loj gra ni rajpaman.

**Badxin Jesús Nazaret**

(Mr. 6:1-6; Lc. 4:16-30)

<sup>53</sup> Chi gulox gunee Jesús loj reeman zian, zianz bazaman. <sup>54</sup> Dxel badxin ladxaman, ni guzuloj culüüman bejn ree lën xyadoo reeman. Abi' dád badxaloj ree bén guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rüjnman milagr ree? <sup>55</sup> ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, në Judas? <sup>56</sup> ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

<sup>57</sup> Abi' ad bidxga't reeman Jesús. Per rëbaman loj reeman:



—Bantëez guin rajp ree bejn respejt tijb bën rudëë xtiidx Dios loj ree bejn, per ladxaman achut rajp laaman respejt ni'qui lidxaman.

<sup>58</sup> Abi' ad zient milagr beenman yagaj guial ad bililadxt reeman laaman.

### Güjt Waj Bén baroobnijs bejn ree

(Mr. 6:14-29; Lc. 9:7-9)

**14** Tiampzii Herodes bën canabee niz Galilea, biguiejnman ni cayüjn Jesús. <sup>2</sup> Abi' rëbaman loj ree xbejnman:

—Waj bën baroobnijs bejn ree, laaman baban zatijb, zeel rajpaman guialrniabee rüjnman milagr ree.

<sup>3</sup> Rëb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguuib. Been Herodes guin zian por Herodías lacheel bijchaman bën la Felip, <sup>4</sup> guial rëb Waj guin loj Herodes:

—Ad laat guial zojbnël laagajc lacheel bijchil.

<sup>5</sup> Guyën Herodes nugüjtaman Waj, per bidxebaman xhie nüjn ree bejn laaman guial graczi reeman rëb Waj naj tijb bën rudëëd xtiidx Dios loj ree bejn. <sup>6</sup> Per chi baza' Herodes ijz, brieri xi'n Herodías baya'm loj ree xbioozaman. Abi' dád bayuladx Herodes zi'c baya'm, <sup>7</sup> dxel rëb Herodes gudëëdaman xhietëez ni guini-abim. <sup>8</sup> Abi' xniaam rëb lojm xhie guini-abim, dxel rëbim loj Herodes:

—Banee guijc Waj bën ruroobnijs bejn ree, baneen loj tijb pliajt.

<sup>9</sup> Dád gyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudëëd reeman ni gunabim. <sup>10</sup> Dxel gunabeeman guitü' reeman guijc Waj lën ladxguuib guin, <sup>11</sup> abi' bidxinnë reeman laan loj tijb pliajt badëëd reeman laan lojm, dxel bayüimin loj xniaam.

<sup>12</sup> Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

### Ruyaan Jesús gaay mil bejn

(Mr. 6:30-44; Lc. 9:10-17; Jn. 6 :1-14)

<sup>13</sup> Chi gogbee Jesús zian, guyuman loj tijb barcw zëman niz lod achutczzi zojb din su laazaman. Chi gogbee ree bejn, dxel brieri ladx reeman zë guia'zi reeman lod guidxinman. <sup>14</sup> Chi barii Jesús loj barcw guin baguiaaman bën guixiuj ree riga' yagaj, bayaman laa reeman abi' bayüjnman bënragxuu zinë reeman. <sup>15</sup> Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Güjdx loj ree bën guin ma gojl yaguiaj reeman, din che reeman guiedx lod sii ni gaw reeman.

<sup>16</sup> Per badxi' Jesúsán rëbaman:

—Ad rüjnt naguiejn yaguiaj reeman, lëjt gol badëë ni gaw reeman.

<sup>17</sup> Badxi' reeman laan rëb reeman:

—Per gaayzi guiadxtil naca'n con zatio'p bëjl.

<sup>18</sup> Dxel rëb Jesús loj reeman:

—Gol tanë reen guie.

<sup>19</sup> Dxel gunabeeman gurej gra ree bën guin loj guixya'. Abi' cwa'man guigaay guiadxtil guin con grop bëjl guin. Dxel gules lojman xanyabaa badëëman quixtëë loj Dios, abi' gula'man guiadxtil guin badëëman laan loj ree xbejnman persi gudi's reeman laan loj gra ree bën guin. <sup>20</sup> Gra reeman gudaw xt bigdxinladx reeman, abi' staczi bacha reeman za chip-tio'p dxüm ni baya'n. <sup>21</sup> Bén gudaw guin ree naj reeman cost gaay mil xinguaaw garenqui ree béngunaa con ree xindoo.

### Riza Jesús loj nijs

(Mr. 6:45-52; Jn. 6 :16-21)

<sup>22</sup> Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la't-

gaj cuzaadiidx nëman benzien guin ree.  
<sup>23</sup> Chi ma gulox bazaadiidx nëman laa reeman, dxel zë xtijbaman guijc tijb guia' din cwedx guiniabaman Dios. Chi gure guiaal xtijbzaman za' guijc guia' guin. <sup>24</sup> Guiáad barcw guin zijt ma zën loj nijs, dád rliaro' xtüjp nijs guin laan guial rliaj bi niz loj barcw guin. <sup>25</sup> Chi ma cayreguiaal, zibig Jesús loj ree xbejnman rzaman loj nijs guin. <sup>26</sup> Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—¡Tijb anman!

<sup>27</sup> Per guneenë Jesús laa reeman rëbaman:

—¡Gol bagu' luxdoodi! ¡Najn, ad rdxebidi!

<sup>28</sup> Badxi' Bëdan rëbaman:

—Dad, bal lüjn, gunabee gazan loj nijs guin guialan lojl.

<sup>29</sup> Abi' rëb Jesús lojman:

—Guda.

Dxel baguiajxt Bëd loj barcw guin, rzaman loj nijs guin zëman loj Jesús.

<sup>30</sup> Per chi baguiaaman bidoxhan cabi' dxel bidxebaman, abi' guial guzuloj cazëebaman xan nijs guin guridxa'man rëbaman:

—¡Gognë naj, Dad!

<sup>31</sup> Loj hor ziigajc basli yaa Jesús gu-naazaman yaa Bëd, rëbaman lojman:

—¿Chexc zeel ad rililadxza'ctil, chexc zeel yu' nawëëguil?

<sup>32</sup> Abi' chi bayë'p reeman loj barcw guin, laa bacwëëz gajc bi guin. <sup>33</sup> Guiáad ree bën yu' loj barcw guin bazuxib reeman loj Jesús, rëb reeman:

—Diidxliczi lüjn naj xi'n Dios.

### **Rayüjn Jesús bënragxuu ree Genesaret**

(Mr. 6:53-56)

<sup>34</sup> Chi gudëd reeman loj nijs guin dxel bidxin reeman xyuj ree bën Genesaret.

<sup>35</sup> Abi' ree bën niz ni bayünbee reeman

Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bënragxuu ree lojman, <sup>36</sup> guzajc reeman liaadx lojman din tiëbaman gu-gaal reeman majsi guia'zi xabaman. Abi' gra ree bën bagaal xabaman bayajc.

### **Ni rüjn persi rajc bejn bëndol**

(Mr. 7:1-23)

**15** Bënfarisew ree con ree mextr rajc ley, bën za ree Jerusalén, gubig reeman loj Jesús abi' gunabdiidx reeman lojman, rëb reeman

<sup>2</sup> —¿Chexc zeel ad zinalt ree xbejn costumbr ni basa'n dux béngulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

<sup>3</sup> Dxel rëb Jesús loj reeman:

—Laadx lëjt, ¿chexc zeel rüjndi xti-idx Dios tiblax persi zinal xcostumbridi?

<sup>4</sup> Din Dios rëb: “Gojp respejt xDadil con xnial”, abi' “Bën rníe diidxguijdx loj xdadaman o xníaaman ya, rayal guië-taman.”

<sup>5</sup> Per lëjt rëb zile' guiëb bejn loj xdadaman o xníaaman: “Ad zile't gü-nan lüj yudar, din gra ni ra'pan naj par Dios.”

<sup>6</sup> Rëbidi guial bën guiniee zian, ad zile't güün yudar xdadaman con xníaaman, abi' zian rbëëladxidi xti-idx Dios persi zinal xcostumbridi.

<sup>7</sup> ¡Bën rusquiee! ¡Rüjnzidi guial nabandi xnejz!

Waliqui ni gunee Isaías, bën badëë xtiidx Dios loj ree bejn, chi rëbaman:

<sup>8</sup> Bën guie ree rëbzi reeman rniajchi' reeman naj,

per ad rënt reeman naj con guidib lux-doo reeman.

<sup>9</sup> Xli'a'czi rniajchi' reeman naj, abi' rulüü reeman bejn ree ganaxzi ni rbëëguijc ree bénguidxliuj.

<sup>10</sup> Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tëë ni ganin lojdi. <sup>11</sup> Ad ni rawt bejn rüjn laa-

man béndol, ni ririi ro'man laan rüjn laaman béndol.

<sup>12</sup> Dxel gubig ree xbejn Jesús lojman, rëb reeman:

—¿Gogbeel ya bidxe'ch ree bënfarisew chi biguejn reeman ni guneel?

<sup>13</sup> Badxi' Jesús laan rëbaman:

—Gra ni ad zëéd't por da Dadan Dios bën yu' xanyabaa, yu' dxej nitan. <sup>14</sup> Zeel gol basa'n reeman din laa reeman naj zi'c tijb bën'lutia'p ruluü stijb bën'lutia'p ban niz cheman. Abi' bal tijb bën'lutia'p guluü stijb bën'lutia'p guin, zayajb grop reeman ro' bala'.

<sup>15</sup> Dxel rëb Bëd loj Jesús:

—¿Basignia' dunujn xhie rën guiëb ni guneel?

<sup>16</sup> Badxi' Jesúsán rëbaman:

—¿Wen, ni'qui lëjt ad rignia'tan ya? <sup>17</sup> ¿Id rignia'di ya guial gra ni raw bejn rej lënman abi' rariin? <sup>18</sup> Per didix ririi ro' bejn, luxdooan zan, abi' laan rüjn laaman béndol. <sup>19</sup> Din luxdoo bejn za graloj ree xgabmal, guialrugüjt bejn, guial rüjn nidxuudx, guialrzunë lacheel ben ren, guialrban, guialrusquiee në guialniee diidxguijdx loj lasa'. <sup>20</sup> Gra ree ni guie naj ni rüjn bejn béndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman béndol.

### **Tijb búngunaa Canaán bililadx Jesús**

(Mr. 7:24-30)

<sup>21</sup> Chi baza Jesús yagaj zëman niz Tiro në niz Sidón. <sup>22</sup> Abi' yagaj zobj tijb búngunaa za niz Canaán, briiman, rbixdiajman rëbaman loj Jesús:

—¿Dad, xdiaa Davi, baya naj! Da xi'ndxa'pan yu' bendxab luxdooan, dád rusagziman laam.

<sup>23</sup> Abi' Jesús ad badxi'taman xtiidx búngunaa guin. Dxel gubig ree xbejnman lojman, rëb reeman:

—Bidxga' búngunaa guin, din yaguaianman, din rbixdiajman nalaman dunuj ree.

<sup>24</sup> Dxel rëb Jesús:

—Dios guxhaal naj din günan yudar ganaxzi ree bën Israel zë loj nejz mal.

<sup>25</sup> Per búngunaa guin bigzuxibaman loj Jesús, rëbaman:

—¿Dad, gognë naj!

<sup>26</sup> Badxi' Jesúsán, rëbaman:

—Ad zagdxet naj chiquied bejn guidxtil loj xi'nman din gudëédaman laan loj ree bë'cw.

<sup>27</sup> Badxi' búngunaa guinan, rëbaman:

—Waliquil, Dad, per në ree bë'cw ru-to'p guidxtil laay ni ryajb xan xmex bën naj xbë'cw laa reeb.

<sup>28</sup> Dxel rëb Jesús lojman:

—¿Na, waliquil rililadxil con guidib luxdool! Gac zi'c rënl.

Loj hor guin gajc bayajc xi'n bën guin.

### **Rayüjn Jesús zien ree bënragxuu**

<sup>29</sup> Baza Jesús yagaj, bidxinman ro' nijs Galilea, dxel wë'paman guijc tijb guia'abi' gurejman yagaj. <sup>30</sup> Dád zien bejn bido'p lod za'man. Binë reeman bencoj ree, në ree bën'lutia'p, në ree bën ad rüjnt xu'c dxiin, con ree bengop në zien ree bënragxuu ren ree, badxig reeman laa reeman loj Jesús, abi' bayüjnman laa reeman. <sup>31</sup> Dád badxa loj ree bejn chi baguiaa reeman ma rniee ree bengop, ma bayajc xu'c ree bën ad rüjnt dxiin xu'c, guiáad ree bencoj ma rza reeman abi' ree bën'lutia'p ruguiaa reeman. Zianz guzuloj cuza't reeman zagdxë xDios ree bën Israel.

### **Ruyaán Jesús tajp mil bejn**

(Mr. 8:1-10)

<sup>32</sup> Abi' gurejdx Jesús bën naj ree xbejnman, rëbaman loj reeman:

—Rayan bën guin ree, din ma gojc choon dxej za' reeman con naj, abi' achet ni gaw reeman. Ad rëntan yagu'nejzan

laa reeman sin guialraw ad nial yadaj reeman niz lunejz.

<sup>33</sup> Dxel rëb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutczu bejn zobj?

<sup>34</sup> Gunabdiidx Jesús loj reeman, rëbaman:

—¿Bël guiadxtil ca'di?

Badxi' reeman laan rëb reeman:

—Gajdx guiadxtil con zatio'p choon bëjl.

<sup>35</sup> Dxel gunabee Jesús gurej gra ree bën guin luyuj. <sup>36</sup> Abi' cwa'man guigajdx ree guiadxtil guin con ree bëjl guin, badëëman quixtëë loj Dios. Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bën guin. <sup>37</sup> Gra reeman gudaw xt bigdxinladx reeman. Abi' staczi bacha reeman gajdx dxüm ni baya'n. <sup>38</sup> Bén gudaw ree naj reeman tajp mil xinguaaw, garenqui ree béngunaa con ree xindoo. <sup>39</sup> Dxel bazaadiidxnë Jesús laa reeman, abi' guyuman loj barcw ziaman niz Magadán.

**Rniab reeman güün Jesús tijb milagr**

(Mr. 8:11-13; Lc. 12:54-56)

**16** Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien guial Dios guxhaal laaman. <sup>2</sup> Per badxi' Jesús laan rëbaman:

—Wadxe ree chi ruguiaadi naxnia xanyabaa, rëbidi: “Zagdxë gac guixie din naxnia xanyabaa.” <sup>3</sup> Guiáad rsil chi naxnia xanyabaa yu' tëë zaj, rëbidi: “Ad laat gac yandxej.” ¡Bën rusquiee!, bal ragbeedi xhie rën guiëb sen yu' xanyabaa, ¿chexc ad rignia'tidi xhie rën guiëb gra ni cuguiaadi yan? <sup>4</sup> Bén mal, ad rliadxtidi abi' rniabidi güün tijb milagr, per achet gugiaaadi, tijbzi zi'c guzac Jonás.

Dxel basa'n Jesús laa reeman, ziataman.

**Xlevadur ree bénfarisew**

(Mr. 8:14-21)

<sup>5</sup> Dxel gudëdnë ree xbejnman stiblad ro' nijs guin, per bayanladx ree xbejnman ninë reeman guiadxtil. <sup>6</sup> Abi' rëb Jesús loj reeman:

—Gol gojp cudad con xlevadur ree bénfarisew në ree bénsaducew.

<sup>7</sup> Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

<sup>8</sup> Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil? Ta'nnijt rliadxidi naj.

<sup>9</sup> ¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi? <sup>10</sup> ¿Nid zaladx tëedi ya chi gudi'san gajdx guiadxtil loj tajp mil bejn, abi' zabël dxüman bato'pidi? <sup>11</sup> ¿Chexc zeel ad rignia'tidi guial ad guiadxtiltan cuzatan lojdi, chi rnin lojdi gapidi cudad con xlevadur ree bénfarisew në ree bénsadusew?

<sup>12</sup> Dxel bignia' ree xbejnman guial ad xlevadurt guiadxtilan cuza'taman loj reeman, rëbaman zian din gap reeman cudad con ni ruluü ree bénfarisew në ree bénsaducew.

**Rëb Bëd guial Jesús naj Cristo**

(Mr. 8:27-30; Lc. 9:18-21)

<sup>13</sup> Chi bidxin Jesús niz Cesarea de Filipo, gunabdiidxaman loj ree xbejnman, rëbaman:

—¿Chu rëb ree bejn, naj Bén guxhaal Dios?

<sup>14</sup> Badxi' reeman laan, rëb reeman:

—Yu' reeman rëb guial Wajn, bën baroobnijs bejn ree. Yu'za reeman rëb guial Elíasan, bën badëë xtiidx Dios loj ree bejn, yu' tëë reeman rëb guial

Jeremíasan, bén badëéd xtiidx Dios loj ree bejn o stijb ben ren ya, bén badëéd xtiidx Dios loj ree bejn.

<sup>15</sup> Dxel rëbaman loj reeman:

—Laadx lëjt, ¿xhie nadi, chu naj?

<sup>16</sup> Badxi' Simón Bëdan, rëbaman:

—Lüjn naj Cristo. Lüjn naj Xi'n Dios naban.

<sup>17</sup> Dxel rëb Jesús lojman:

—Xiquilbaal, Simón, xi'n Jonás, din ad bénguidxliujt guna lojl ni guinieel, da Dadan bën yu' xanyabaa laaman naj bën guna lojl. <sup>18</sup> Abi' naj rni lojl, Bëd, (rën guiéban “guiaj”) lüj naj zi'c tijb guiaj ni gacné lidxan, din por lüj grii ree bën gac da bejnan abi' ni'qui guialgüjt ad zunijtt laa reeman. <sup>19</sup> Naj gune lüj guialrniabee ni za xanyabaa, abi' gra ni tiëbil gac loj guidxliujt guie ma naj gacan xanyabaa, guiaád ni ad zatiëjbtill gac loj guidxliujt guie ad najt gacan xanyabaa.

<sup>20</sup> Dxel gunabee Jesús loj gra ree xbejnman guial achu loj guiëb reeman guial laaman naj Cristo.

### Rugojn Jesús guiëtaman

(Mr. 8:31–9:1; Lc. 9:22–27)

<sup>21</sup> Diisd nadxel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz në ree mextr rajc ley, laa reeman naj bën gusagzi laaman, gugüjt reeman laaman, per ni yayon dxej yabanman. <sup>22</sup> Dxel gulëëcaan Bëd laaman, rëbaman lojman:

—¡Dios ad zabëëladxt lüj, Dad! ¡Laa-man ad zatiëjbt saquil zian!

<sup>23</sup> Per badxi' loj Jesús, rëbaman:

—¡Basa'n naj, xindxab!, ad rüjn nawëëguil lon. Din ad por Diost zëéd ree xgab ni rüjnl, xixgab bénguidxliujn rüjnl.

<sup>24</sup> Dxel rëb Jesús loj ree xbejnman:

—Bal yu' bën rën gac da bejnan ad zajct güünman zi'c naj xixgabaman, si-

ibnejzaman gualzi ni tëdzaman abi' guidnalaman naj. <sup>25</sup> Din bën mazri rën xguialnaban ni rajpaman loj guidxliujt guie zadxin dxej gunijtaman laan. Per bën guiët por naj, zajpaman guialnaban tiblyaa con Dios. <sup>26</sup> Xhieczy gan gap bejn gra ni yu' loj guidxliujt, abi' nitaman loj Dios. Din ad zile't sii bejn xguialnabanman xanyabaa. <sup>27</sup> Abi' Bën guxhaal Dios, gui'taman con xguialrniabee xDadaman Dios në ree xianjl Dios din gudëëman ni rayal tijbgaj bejn, bal gonin been bejn. <sup>28</sup> Diidxliczi rnin lojdi guial yu' ree bën riga' guie ad zëjtt reeman chi gad reeman guguaa Bën guxhaal Dios, gui'taman con xguialrniabee-man din nabeeman.

### Bidxaa Jesús loj choon ree xbejnman

(Mr. 9:2-13; Lc. 9:28-36)

**17** Chi gudëd xho'p dxej, binë Jesús Bëd, në Jacob con Waj bijch Jacob, binëman laa reeman guijc tijb guia' ya. <sup>2</sup> Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiaád xabaman bayajcan naquich, balaa tëën bacha' zi'c guij. <sup>3</sup> Abi' loj hor guin baguiaa reeman Moisejs con Elías cayünë reeman Jesús diidx. <sup>4</sup> Dxel rëb Bëd loj Jesús:

—Dad, ¡zagdxe naj nadxu' ree guie! Bal rënl, günan choon ranch, tijban par lüj, tijban par Moisejs, stijban par Elías.

<sup>5</sup> La'tgaj canee Bëd zian, biguiajt tijb zäj xt guijc reeman ridiinan bacha', loj zäj guin brii cha' bejn rëbaman:

—Bën guie naj da Xi'n'an, bën rën da'tan, bën rabaanë' tëën, gol bacaagdiajg xtiidxaman.

<sup>6</sup> Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman. <sup>7</sup> Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxebidi.

<sup>8</sup>Abi' chi gules loj reeman achutri baguiaa reeman, tijbzi Jesús za' yagaj.

<sup>9</sup>La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

<sup>10</sup>Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaløj Elías gui't?

<sup>11</sup>Badxi' Jesúsán, rëbaman:

—Walican guial yaløj Elías gui't, laaman guzuxnejz gra. <sup>12</sup>Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

<sup>13</sup>Dxel gogbee ree xbejnman guial Wajn bén baroobnijs bejn ree cuza'taman.

### Rayüjn Jesús tijb xin rëjtya'

(Mr. 9:14-29; Lc. 9:37-43)

<sup>14</sup>Chi badxin Jesús con guiyon ree xbejnman, lod cabëz ree ben zien laaman bibig tijb xinguaaw lojman, bazuxibix lojman rëbix:

<sup>15</sup>—Dad, baya da xi'nán, din dád rzagdiajx rëjtya'x. Bëlczi volt riyajbix lojguij o lojnijs ya. <sup>16</sup>Bidnë'n laax loj ree xbejn, per ad rajct rayüjn reeman laax.

<sup>17</sup>Badxi' Jesúsán, rëbaman:

—¿Benguijdx, bén ad rliladxt! ¿Xt goc gazunë'n lëjt? ¿Xt goc gadaanan lëjt? Gol tanë xinzii guie.

<sup>18</sup>Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

<sup>19</sup>Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëën xindxab guin luxdoo xin guin?

<sup>20</sup>Dxel rëb Jesús loj reeman:

—Guial ta'nzi rliladxidi. Naj rni lodji bal naj xguialrliladxidi majsi zi'tctzi naj xhaj moxhtajs, zile' guiëbidi loj

guia' guin: “Bisüd guie, bisob lood ren”, zucaagdiajgan xtiidxidi. Achetzi gac nawëëg par lëjt. <sup>21</sup>Per par yarii lasa' ree xindxab guie ryaadx chu cwedx guiniab Dios guiba'n tëë.

### Rugojn Jesús zatijb guial guiëtaman

(Mr. 9:30-32; Lc. 9:43-45)

<sup>22</sup>La'tgaj za' Jesús niz Galilea con ree xbejnman, rëbaman loj reeman guial yayü reeman Bén guxhaal Dios loj ree bejn, <sup>23</sup>abi' gugüjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

### Ni rajx par yadoo

<sup>24</sup>Chi badxin Jesús con ree xbejnman guiedx Capernaum, bén ruquijx ree impuest par yadoo wej reeman loj Bëd bignabdiidx reeman, rëb reeman:

—¿Rguijx xmextril impuest par yadoo ya?

<sup>25</sup>Badxi' Bëdan, rëbaman:

—Riguijxcaman laan.

Dxel chi bayu Bëd lënü lod za' Jesús, yaløjli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

<sup>26</sup>Badxi' Bëd laan rëbaman:

—Benzit ree.

Dxel rëb Jesús:

—Abi' ree bén ladx reeman ad rguijxt reeman laan. <sup>27</sup>Per chitëë guidxe'ch reeman, wej ro' nijs, bazaal xiansuelil, dxel bëjl yaløj ni guiniaazil babëëb. Ro' bëjl guin guidxelil tijb cintabl, con laan bitijx dux impuest.

### ¿Chu mazri zojbloj?

(Mr. 9:33-37; Lc. 9:46-48)

**18** Lën ree dxejzii bidxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zojbloj lod rniabee Dios?

<sup>2</sup>Dxel gurejdx Jesús tijb xindoo, bazuman laax galay reeman, <sup>3</sup>abi' rëbaman:

—Diidxliczi rmin lojdi bal id zayüjndi xgab por xtolidi, bal id zajc tëëdi zi'c tijb xindoo, ad zutidi lod rniabee Dios. <sup>4</sup>Bén güün naya loj Dios, gac tëëman zi'c xindo guie, laaman gac bén mazri zojbloj lod rniabee Dios. <sup>5</sup>Abi' bén yaca' tijb xindoo, por naj, najn raca'man.

### **Bén rüjn persi ryajb ree bejn loj dol**

(Mr. 9:42-48; Lc. 17:1-2)

<sup>6</sup>Bal chu gusajb tijb bén qui rliadxri naj loj dol, zagdxeli guixhii reeman tijb guiajro' yëjnman guzaal reeman laaman xt xan nijs. <sup>7</sup>¡Probza bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per ¡probza bén gusajb bejn ree loj dol!

<sup>8</sup>'Zeel, bal laagajc yaal o guia'l rusajb lüj loj dol, zagdxeli gutü'n bazaalan zijt, din zagdxeli chu' xanyabaa con tiblodzi yaal o con tiblodzi guia'l, luar chu' con groplad yaal o groplad guia'l loj bajl ni ad yu't dxej yayü'. <sup>9</sup>Abi' bal laagajc guiaalojl rusajb lüj loj dol, gulëen bazaalan zijt, zagdxeli chu' con tiblodzi guiaalojl xanyabaa, luar chu' con gropladan loj bajl yu' gabijl.

### **Xcwent xiil gunit**

(Lc. 15:3-7)

<sup>10</sup>'Ad guiniajgaadi loj ree bén qui rliadxri naj. Din diidxliczi rmin lëjt guial xanyabaa yu' ree anjl rnij laa reeman zianczi za' reeman loj da Dadan Dios bén yu' xanyabaa. <sup>11</sup>Guiáad Bén guxhaal Dios zëëdaman par ree bén ad zinalt xnejz Dios din laa reeman loj dol.

<sup>12</sup>'¿Xhie nalaxidi? Bal tijb bejn rajp tibgayuu xiil, abi' rizëëb tijbib, ¿nid zusa'nman zatajggajlchiinbitapib dajn ya din chigdiilaman be bizëëb guin? <sup>13</sup>Abi' bal yadxejlamen laab, diidxliczi

rmin mazri yabaanëman laab guial loj tajpgajlchiinbitap be ad bizëëb guint. <sup>14</sup>Ziangajc dux Dad ree Dios bén yu' xanyabaa ad rëntaman nit ni'czi tijb ree bén qui rliadxri laaman.

### **Xhienaag yaguieen perdon du lasa' ree**

(Lc. 17:3)

<sup>15</sup>'Bal xhie tijb ni mal güün lasa'l lüj, guneenëman lüjzi din gagbeeman xhie falt badxe'man. Bal guidxga'man xtiidxil, ma beenl gan yaneenël laaman zagdx. <sup>16</sup>Bal id ridxga'man lüj, binë zatijb o zatio'p bejn, din chigneenëdi laaman din con xtiidx tio'p o choon bejn guiguieen guial ma bigneenël laaman. <sup>17</sup>Dxel bal ni'qui xtiidx reeman ad ridxga'taman, bagojn ree bén zinal xnejz Dios, abi' bal ni'qui xtiidx reeman ad ridxga'taman, dxel ma guguaadi laaman zi'c tijb bén ad rliadxrt Dios o zi'c tijb bén ruquijx impuest par Rom.

<sup>18</sup>'Diidxliczi rmin, gra ni ad zatiëjtidi gac loj guidxliuj guie ad rajctan xanyabaa, guiáad ni tiëbidi gac loj guidxliuj guie mal rajcan xanyabaa.

<sup>19</sup>'Rni tëën lëjt: Bal yaya'n tio'pidi diidx loj guidxliuj guie, par guiniabidi xhienin loj da Dadan bén yu' xanyabaa, laaman gunee laan. <sup>20</sup>Din lod rado'p tio'p o choon bejn por naj, laa naj za' galay reeman.

<sup>21</sup>Dxel gubig Bëd gunabdiidxaman loj Jesús, rëbaman:

—Dad, ¿bël volt rayal günan perdon lasa'n, bal güünman naj xhienin? ¿Xt gajdx volt ya?

<sup>22</sup>Badxi' Jesúsán rëbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchii.

### **Xcwent bén ad rüjnt perdon lasa'**

<sup>23</sup>'Xguialrniabee Dios naj zi'c tijb rey ni been xgab guial ma gojl yaguujx ree

xmojsaman lojman. <sup>24</sup>Chi guzulojman caybëeman cwent guin, bidxin tijb xmojsaman lojman bën ral zro' da't. <sup>25</sup>Abi' guial achet rajp bën guin din yaguijxaman ni ralaman, gunabee rey guin to' man loj ree bejn në lacheelaman con ree xi'nman nêtëë gra ni rajpaman din chile' yaguijxaman di'n guin. <sup>26</sup>Dxel bazuxibaman loj rey guin, beenman naya rëbaman: "Dad, gojp naj pacens zaguixcan graczi ni ralan lojl." <sup>27</sup>Zianz baya rey guin laaman, beenman laaman perdon gra ni ralaman, abi' baslaaman laaman ziaman. <sup>28</sup>Per chi barii mojs guin yagaj, badxajgaman tijb bën rüjnnëman dxiin, ralaman ta'nzi milia lojman. Dxel gunaazaman laaman guzuloj caguiajman yëjnman, rëbaman: "iBaguijx ni ralil lon!" <sup>29</sup>Dxel bazuxib bën guin lojman beenman naya rëbaman: "Gojp naj pacens zaguixcan graczi ni ralan lojl." <sup>30</sup>Per ad guyënt bën guin, badxe'man laaman ladxguiib xt lodzi yaguijxaman di'n guin. <sup>31</sup>Chi baguiaa ree los demazri ree xmojs rey guin, dád gognaa luxdoo reeman, abi' wej reeman biguiedx reeman lojman gra ni goc. <sup>32</sup>Dxel gurejdx rey guin mojs guin, zianz rëbaman lojman: "iMojs guijdx! Benan perdon gra ni ralil lon guial beenl naya. <sup>33</sup>iNid nëgajc lüj rayal naya xcompniaril ya, zi'cgajc bayan lüj?" <sup>34</sup>Abi' guial tant balen rey guin, gunabeeman badxe' reeman laaman ladxguiib xt lodzi baguijx gra ni ralaman.

<sup>35</sup>Basnuu Jesús rëbaman:

—Ziangajc güünnë da Dadan lëjt, bën yu' xanyabaa, bal id züjn perdon lasa'di con guidib luxdoodi ni rüjnnë reeman lëjt.

### Rulüü Jesús xcwent guial rala' lasa'

(Mr. 10:1-12; Lc. 16:18)

**19** Chi gulox guneë Jesús zian, bazaman niz Galilea, zëman niz

Judea, niz stiblad ro' guiiw Jordán. <sup>2</sup>Zien ree bejn binal laaman, yagaj bayüjnman bënragxu ree.

<sup>3</sup>Abi' tio'p choon ree bënfarisew bibig loj Jesús, dxel par güün reeman laaman prueb, gunabdiidx reeman lojman rëb reeman:

—iZile' yala' bejn lacheelaman por xhiedxitzinin ya?

<sup>4</sup>Badxi' Jesúsán rëbaman:

—iNid wayoolidi loj xtiidx Dios ya, guial diidz guia'xchej Dios "been xinguaaw në bëngunaa"? <sup>5</sup>Rëb tëëman: "Zeel xinguaaw gusa'n xdad xniaax din guibannë lacheelix, dxel grop reex ma gac zi'c tijbzi bejn." <sup>6</sup>Zianan zeel ad najtri reex tio'p, ma naj reex tijbzi. Zeel bënguidxliuj ad rayalt yala'man lasa' ni ma bachajg Dios.

<sup>7</sup>Dxel rëb ree bënfarisew guin loj Jesús:

—iChexquiza zeel rëb Moisejs guial zile' yala' lacheel bejn, con gudëëdaman gui'ch guial ma bala' lasa' reeman?

<sup>8</sup>Badxi' Jesúsán, rëbaman:

—Cwëjb Moisejs gojc zian guial ad rëntidi guzoobidi diidx, per ad ziant gojc diidz guia'xchej. <sup>9</sup>Naj rni lojdi. Xin yala' lacheel, bal id za'në lacheelix xin ren, abi' tia'x ben ren dolan cayüjnx. Ziangajc xin tia' bën qui bala'ri lasa' guin dolan cayüjnx.

<sup>10</sup>Dxel rëb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

<sup>11</sup>Badxi' Jesúsán rëbaman:

—Ad grat bejn zile' chignia' ni canin, bën ca'zi ree quiarguejn par chignia' reeman laan. <sup>12</sup>Yu' bejn diidz rajlaman ad zëëdtaman loj guidxliuj par guxhliaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli guitie'ch reeman xtiidx Dios luar guxhliaa reeman. Bën rën chignia', gol bignia'.



**Rüjnle' Jesús xindoo ree***(Mr. 10:13-16; Lc. 18:15-17)*

<sup>13</sup> Binë ree bejn xindoo ree lod za' Jesús, din guixhioob yaaman guijc reex cwedx guiniab tëeman Dios por laa reex, per ree xbejnman guzuloj cadilë reeman bën zinë ree laa reex. <sup>14</sup> Dxel rëb Jesús loj reeman:

—Gol baslaa gui't reex lon, ad bal ruxdoondi, din lod rniabee Dios naj par ree bën naj zi'c laa reex.

<sup>15</sup> Abi' guxhoob yaa Jesús guijc ree xindo guin, dxel ziaman.

**Tijb xinrijcw***(Mr. 10:17-31; Lc. 18:18-30)*

<sup>16</sup> Bidxin tijb xin guin loj Jesús, abi' gunabdiidix lojman, rëbix:

—Mextr, çxhie ni zagdxë günan din ga'pan guialnaban tiblyaa con Dios?

<sup>17</sup> Dxel rëb Jesús lojx:

—ÇChexc zeel rniabdiidxil lon conin naj ni zagdxë? Achut naj benza'c, tijbzi Dios. Per bal rënl gapil guialnaban tiblyaa con Dios, been zi'c rëb ree mandamient.

<sup>18</sup> Dxel gunabdiidix loj Jesús rëbix:

—ÇCon ree mandamientan?

Badxi' Jesúsán, rëbaman:

—Ad gugüjtil bejn, ad sunël lacheel ben ren, ad cwanl, ad cwëël xtiidx bejn, <sup>19</sup> gojpw respejt xdad xniala, guyën tëë ree lasa'l zi'c rën lüj gajc.

<sup>20</sup> Dxel rëbix:

—Gra ree ni guin cayünan diidz najn xindoo, çxhiëri ryaadx günan yan?

<sup>21</sup> Badxi' Jesúsán, rëbaman:

—Bal rënl gaquil benza'c loj Dios, bigto' gra ni rajpil dxel gudëël milia guin loj ree bënprob. Zian gapil guialnaza'c xanyabaa. Zianz guidnalil naj.

<sup>22</sup> Chi biguiejn xin guin zian, dád guyu nayax ziax, guial dád xinrijcwán.

<sup>23</sup> Dxel rëb Jesús loj ree xbejnman:

—Diidxiczi rnin lojdi: Dád nawëëg chu' benrijcw lod rniabee Dios. <sup>24</sup> Naj rni lëjt. Adli nawëëgt tëd tijb camell xan gagux, guial chu' tijb benrijcw lod rniabee Dios.

<sup>25</sup> Chi biguiejn ree xbejn Jesús zian, dád badxaløj reeman, abi' rëb reeman:

—ÇChuzazajc gac perdon loj Dios?

<sup>26</sup> Dxel baguiaa Jesús loj reeman, rëbaman:

—Nawëëg gac zian par bënguidxliuj, per par Dios achet ni nawëëg yu'.

<sup>27</sup> Abi' rëb Bëd lojman:

—Ma basa'nan graczi ni raya'pan, persi zudnaalan lüj. Abi' çxhieza yayalan?

<sup>28</sup> Badxi' Jesúsán, rëbaman:

—Diidxiczi rnin lojdi chi guidxin dxej yacüb gra, guidxin tëë dxej cwe Bën guxhaal Dios luar lod nabeeman, në lëjt, guial zidnalidi naj, cwedi loj chiptio'p ree luar lod nabeedi, din güün xguialguxtisidi loj guidxiptio'p ree xdiaa Israel. <sup>29</sup> Abi' gra ree bën basa'n lidx, bijch, bizan, xdad, xniala, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tëë reeman guialnaban tiblyaa con Dios.

<sup>30</sup> Per zien ree bën naj bën yaløj, gac reeman bën bigra, abi' zienza ree bën naj bën bigra, gac reeman bën yaløj.

**Xcwent ree bën rüjn dxiin**

**20** Rëb tëë Jesús:  
—Xguialrniabee Dios naj zi'c tijb bën rajp tijb guiniaaro', rsildoo briiman zitiilaman mojs güün dxiin loj xguiniaaman. <sup>2</sup> Baya'nnëman laa reeman diidx plac quixaman tijb gaj reeman tibdxëj, dxel guxhaalaman laa reeman loj xguiniaaman. <sup>3</sup> Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. <sup>4</sup> Zianz rëbaman loj reeman: “Gol biguieen dxiin loj da guiniaan, naj gaguix lëjt zi'c rayal.” Dxel zë

reeman. <sup>5</sup> Cost garol dxej briiman stijb, abi' brii gajman cost raca choon wadxe ziangajc rëbaman loj ree bën riga' yagaj, bën achet xchiin. <sup>6</sup> Cost raca gaay wadxe wejman galay luguedx guin stijb, abi' bidxaaglojman ben ren ree, bën achet ree xchiin, gunabdiidxaman loj reeman, rëbaman: “¿Chexc zeel za'di guin gudëdchej ad cayüjntidi dxiin?” <sup>7</sup> Badxi' reeman laan rëb reeman: “Achut wanee dxiin yaguieenan.” Dxel rëbaman loj reeman: “Në lëjt gol biguieen dxiin loj da guiniaan naj gaguix lëjt zi'c rayal.” <sup>8</sup> Chi ma gurej guiaal, rëb bën naj xguiniaan loj bën naaz dxiin guin: “Gurejdx ree mojs guin din quixil laa reeman, per yalojxgaj gudijx ree bën bigra guyu, zianz quixil bën guyu ree yaloj.” <sup>9</sup> Chi bidxin ree bën guyu loj dxiin guin raca gaay wadxe, gojx tijbgaj reeman xieen tibdxej. <sup>10</sup> Dxel chi bidxin ree bën guyu loj dxiin diizd rsil, gunaladx reeman niajx reeman mazri, per nëgajc reeman gojx xieen tibdxej. <sup>11</sup> Abi' chi cayajx reeman, guzuloloj cadxe'ch reeman bën naj xguiniaa laan, <sup>12</sup> rëb reeman lojman: “Bën bigra guyu ree, been reeman dxiin tib horzi abi' zi'cgajc caguixil dunujn gudijxil laa reeman, abi' dunujn badaanan baguieenan dxiin dëchej loj guialnalaa.” <sup>13</sup> Per rëb bën guin loj tijb reeman: “Achet ni mal cayünan lüj. ¿Nid baya'n diidx ya plac gunen tia'l tibdxej? <sup>14</sup> Cwa' ni bayalil baguiaj. Din naj rënan gaguixan bën bigratë guyu zi'c gudixan lüj, <sup>15</sup> zajc günnë' da milian ni rëntzan. ¿O nadëdojl ya guial najn benza'c?” <sup>16</sup> Zianan zeel bën naj ree bën bigra gac reeman bën yaloj, guiaad ree bën yaloj gac reeman bën bigra.

### Bayon volt bagojn Jesús guial guiëtaman

(Mr. 10:32-34; Lc. 18:31-34)

<sup>17</sup> Chi zë Jesús Jerusalén, gurejdx guidxiptio'p ree xbejnman tibläd, rëbaman loj reeman:

<sup>18</sup> —Ganin lëjt, ziyu' ree Jerusalén, lod yayü reeman Bën guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabee guiëtaman, <sup>19</sup> yayü reeman laaman loj ree benzit, din guze' reeman laaman quin tëë reeman laaman, abi' gucaa reeman laaman loj crüjz, per yayon dxej yabanman.

### Ni gunab xniaa Jacob con Waj

(Mr. 10:35-45)

<sup>20</sup> Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman. <sup>21</sup> Gunabdiidx Jesús lojman, rëbaman:

—¿Xhie rën?

Badxi' bën guinan, rëbaman:

—Rënan nabeel cwe tijb da xi'nman xladbeel, stijbim xladruvejsil, chi ma canabeel.

<sup>22</sup> Dxel rëb Jesús:

—Ad ragbeetidi ni rniabidi. ¿Wen zajc tëdidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

<sup>23</sup> Abi' rëbaman:

—Diidxliczi rnin zajc tëdidi guialzi zi'c naj ni gadëëdan, per guial cwedi da ladbeen o da ladruvejsan ya ad najt rayal ganabee, din ma najn par ree bën ba-caabee da Dadan.

<sup>24</sup> Chi biguiejn zachii ree xbejn Jesús zian dád balen reeman grop bijch reeman. <sup>25</sup> Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiaad ree bën zojbloj

rüjnnë reeman bejn ree zi'tctzi rën reeman por gualrniabee ni rajp reeman. <sup>26</sup>Per con læjt ad rayalt gac zian. Bal chu rën gac bën rniabee lojdi, rayal güünman sirv lojdi. <sup>27</sup>Ziangajc bën rën gac bën zobjloj lojdi, rayal güünman sirv lojdi zi'c bën nado'. <sup>28</sup>Zi'c Bén guxhaal Dios ad bi'ttaman par güün reeman sirv lojman, bi'taman par güünman sirv gudëë tëë xguialnabanman din laa zien bejn loj dol.

### Rayüjn Jesús tio'p ree bénlutia'p

(Mr. 10:46-52; Lc. 18:35-43)

<sup>29</sup>Chi bazaman luguiedx Jericó con ree xbejnman, dád zien ree bejn binal laaman. <sup>30</sup>Dxel tio'p ree bénlutia'p zobj cwë' nejj chi biguejn reeman cadëd Jesús niz yagaj, gurixdiaj reeman rëb reeman:

—¡Dad, xdiaa Davi, baya dunujn!

<sup>31</sup>Abi' rdilë ree ben guin laa reeman din yacwëez ro' reeman, per mazri ribixdiaj reeman rëb reeman:

—¡Dad, xdiaa Davi, baya dunujn!

<sup>32</sup>Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rëndi günan por læjt?

<sup>33</sup>Badxi' reeman laan, rëb reeman:

—Dad, rayënan yaxal du lojn.

<sup>34</sup>Dxel baya Jesús laa reeman, abi' baqui'man loj reeman. Loj hor zii baxal loj reeman, dxel binal reeman Jesús.

### Ru Jesús Jerusalén

(Mr 11:1-11; Lc. 19:28-40; Jn. 12 :12-19)

**21** Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman, <sup>2</sup>rëbaman loj reeman:

—Golchej guiedx riga' lad ni, ni guidx-aaglojdi tijb bur, caduunë xi'nb. Gol guxhie reeb gol tanë reeb guie. <sup>3</sup>Abi' bal chu xhie na lojdi, gol güjdx guial Dad

Jesús cayaadx laa reeb, gandoo yaxhaalaman laa reeb.

<sup>4</sup>Zian gojc persi gojc cumplid ni gunee bën badëë xtiidx Dios loj ree bejn, chi rëbaman:

<sup>5</sup>Gol güjdx loj ree bën Sión:

“Gol baguiaa laa xreydi zëed lojdi, ad zëedtaman nabë, dxiibaman tijb bur, tijb burdoo xi'n tijb be rüü.”

<sup>6</sup>Dxel wej ree xbejn Jesús abi' been reeman zi'c rëbaman loj reeman, <sup>7</sup>binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin. <sup>8</sup>Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman. <sup>9</sup>Abi' zi'c ree bën ned zi'c ree bën zidnal laaman, rbixdiaj reeman, rëb reeman:

—¡Benza'c bendxoon naj xdiaa rey Davi! ¡Nüjnle' Dios bën guxhaalaman! ¡Benza'c bendxoon naj Dios bën yu' xanyabaa!

<sup>10</sup>Chi guyu Jesús luguiedx Jerusalén, gra ree bën luguiedx guin badxaloj, abi' riniabdiidx loj lasa' reeman, rëb reeman:

—¿Chu bën guin?

<sup>11</sup>Dxel rëb ree benzien guin:

—Laaman naj Jesús, bën rudëë xtiidx Dios loj ree bejn, bën Nazaret guiedx riga' niz Galilea.

### Rabëë Jesús bën ruto' ree lën yadoo Jerusalén

(Mr. 11:15-19;

Lc. 19:45-48; Jn. 2 :13-22)

<sup>12</sup>Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii. Barexguiataman xmex ree bën cuchaa milia në xmex ree bën cuto' palom. <sup>13</sup>Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per læjt nüjndan zi'c lidx ree xingubaan.

<sup>14</sup> Dxel bénlutia'p ree con ree bencoj bibig reeman loj Jesús lén yadoo guin abi' bayüjnman laa reeman. <sup>15</sup> Per chi baguiaa ree bixhioz rniabee ree bixhioz con ree mextr rajc ley milagr cayüjn Jesús, biguiejn tēē reeman rēb ree xindoo lén yadoo guin: “Benza'c bendxoon naj xdiaa rey Davi”, dxel dád bidxe'ch reeman. <sup>16</sup> Abi' rēb reeman loj Jesús:

—¿Rguiejnl ni canee ree xindo guin ya?

Badxi' Jesúsán, rēbaman:

—Rguiejncan. Per ¿gadidi gool loj xtiidx Dios ya? Lod rēb:

Lüj badēēd ni gool ree xindoo nē ree xindobēz sta rē' dud, din guilies reex xvaloril.

<sup>17</sup> Dxel basa'n Jesús laa reeman, zēman Betania ni baya'nman guxhin guin.

### Tijb yag higo ni gubidx

(Mr. 11:12-14, 20-26)

<sup>18</sup> Chi bareguiaal rsil la'tgaj zē Jesús Jerusalén stijb, guzuloj gulaanman.

<sup>19</sup> Abi' baguiaaman zobj tijb yag higo cwē' nejz, dxel gubigaman cwē'n, per ganaxzi balag ca lojn. Zianz rēbaman loj yag higo guin:

—¡Ad yu'tri dxej tial higo!

Loj hor guin gajc gubidx yag guin.

<sup>20</sup> Chi baguiaa ree xbejnman zian, dád badxaløj reeman abi' gunabdiidx reeman loj Jesús, rēb reeman:

—¿Xhienaag gojc zeel laa gubidx gajc yag higo guin?

<sup>21</sup> Badxi' Jesúsán, rēbaman:

—Naj rni lojdi, bal riladxidi Dios abi' ad zunawēēgtidi, ad ni bentzan con yag higo guin zajc güündi, zajc guiēbidi loj guia' guie: “Biquied guie, bisob loj nijsdoo”, abi' zajc gajc zian. <sup>22</sup> Gra ni guiniabidi loj Dios, bal riladxidi laaman, zuneeman laan.

### Xguialrniabee Jesús

(Mr. 11:27-33; Lc. 20:1-8)

<sup>23</sup> Chi guyu Jesús lén yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rēb reeman:

—¿Chu na güünl ni guin ree? ¿Chu bane guialrniabee loj?

<sup>24</sup> Badxi' Jesúsán, rēbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lējt chu bane guialrniabee günan ni guin ree.

<sup>25</sup> ¿Chu guxhaal Waj chigroobnijsaman bejn ree, Dios ya o bénguidxliuj?

Dxel guzuloj cayü reeman diidx, rēb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?” <sup>26</sup> Abi'za bal yaguie'ch ree: “bénguidxliuj guxhaal laaman”, radxeb ree yalen ree bejn din gra reeman riladx guial Waj naj bēn badēēd xtiidx Dios loj ree bejn.

<sup>27</sup> Dxel rēb reeman loj Jesús:

—Ad rayagbeetan.

Badxi' Jesúsán, rēbaman:

—Ni'qui naj ad zanitan lojdi chu bane guialrniabee günan ni guin ree.

### Tijb bēn guyu tio'p xi'n

<sup>28</sup> Basnuu Jesús rēbaman loj ree bixhioz rniabee ree bixhioz nē loj ree guxtis Israel.

—¿Xhie nadi ni ganin lējt? Tijb bejn guyu tio'p xi'nman, dxel rēbaman loj tijbix: “Xi'n, wej yandxej biguieen dxiin loj guiniaa yu' uv.” <sup>29</sup> Badxi'xan, rēbix: “Ad zatan.” Per dxelri bayüjnx xgab zianz wejx. <sup>30</sup> Abi' rēbaman loj stijb xi'nman din chex, badxi'xan, rēbix: “Yo dad, gazacan.” Per ad wejtix. <sup>31</sup> Yan, ¿chu loj grop reex been ni rēn xdad reex?

Badxi' reeman laan, rēb reeman:

—Xin rēbaman loj yaloj guin.

Dxel rëb Jesús loj reeman:

—Diidxiczi rmin, bën ruquijx ree impuest con ree béngunaa naban nadxuudx, yalojl laa reeman chu' lod rniabee Dios guial lojdi. <sup>32</sup>Din bi't Waj, bën baroobnijs bejn ree par gulüüman lëjt xhienaag guibandi, per ad bililadxtidi xtiidxaman. Guiáad ree bën ruquijx impuest con ree béngunaa naban nadxuudx, bililadx reeman xtiidxaman. Per lëjt majsi baguiaadi gra ree ni guin, ad bayüjntidi xgab por xtolidi din nililadxtidi laaman.

### Xcwent ree mojs guijdx

(Mr. 12:1-12; Lc. 20:9-19)

<sup>33</sup>Rëb tää Jesús loj reeman:

—Yan, gol bacaagdiajg ganin lëjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tääman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

'Zianz badëedaman laan garol loj ree bën güün dxiin lojn, zëtaman zijt. <sup>34</sup>Chi bidxin dxej yaru' ree uv guin, guxhaalaman tio'p choon ree xmojsaman chigxii reeman ni rayalaman. <sup>35</sup>Per ree bën rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguiaj reeman. <sup>36</sup>Dxel bën naj xguiniaan guxhaalaman mazri ree mojs guial loj ree bën we yaloj, per ziangajc beennë ree bën guin laa reeman.

<sup>37</sup>'Ni bigra, guxhaal xi'nman guial gunaladxaman: “Zajpqui reeman da xi'nnan respejt.” <sup>38</sup>Per chi baguiaa ree bën guin xi'nman, rëb loj lasa' reeman: “Xin guinan naj xin tia' guidxliuj guin, yagüjt reex din gacan du xieen ree.” <sup>39</sup>Abi' gunaaz reeman laax, babëë reeman laax loj guiniaa guin dxel bagüjt reeman laax.

<sup>40</sup>Dxel gunabdiidx Jesús loj ree bën caneenëman, rëbaman:

—Chi yadxin bën naj xguidxliuj laan, ¿xhie naladxidi güünëman bën guin ree?

<sup>41</sup>Abi' rëb reeman loj Jesús:

—Ad zayataman gugüjtaman bën guin ree, dxel gudëëman guidxliuj guin garol loj ree ben ren, bën yayü ni rayalaman chi guidxin dxej yaru' ree uv guin.

<sup>42</sup>Dxel rëb Jesús loj reeman:

—¿Id wayolczidi loj xtiidx Dios ya? Lod rëb:

Guiaj ni gulëëgo'n ree bën rüjn yu.

Laan goc ni mazri been sirv gojcnë yu guin.

Laan naj ni been Dios,

abi' dád radxa du loj ree.

<sup>43</sup>Zeel rmin lojdi, zariicadi loj xguialrniabee Dios abi' ben ren ree yayu xluaridi, bën wali ree güün zi'c rënman.

<sup>44</sup>Abi' chutëëz bën yab guijc guiaj guin, zarooxaman, guiáad bal yab guiaj guin guijcaman zanidlojman.

<sup>45</sup>Chi biguiejn ree bixhioz rniabee ree bixhioz con ree bënfarisew guin ni cayü Jesús zi'c cwent, dxel gogbee reeman guial laa reeman cuza'taman. <sup>46</sup>Abi' guyën reeman niniaaz reeman laaman, per bidxeb reeman bejn ree guial rliiladx reeman laaman naj bën rudëëd xtiidx Dios loj ree bejn.

### Xcwent guialruxhliia

**22** Basnuu Jesús beman zi'c cwent loj reeman rëbaman:

<sup>2</sup>—Xguialrniabee Dios naj zi'c tijb rey bën been lanijro' chi baxhliia xi'nman.

<sup>3</sup>Abi' guxhaalaman mojs ree bignee reeman biooz ree, per biooz guin ree ad guyënt reeman niej reeman. <sup>4</sup>Dxel guxhaalaman mojs ren ree, rëbaman loj reeman: “Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliia guin.”

<sup>5</sup>Per biooz guin ree ad bidxga't ree-

man xtiidx rey guin, yu' reeman zë loj xguiniaa, yu' reeman zë xmandad, <sup>6</sup> yu' tëë reeman gunaaz mojs guin ree gudijn reeman laa reeman abi' bagüjt reeman laa reeman. <sup>7</sup> Chi gogbee rey guin zian, dád bidxe'chaman. Guxhaalaman bën naj ree xsuldadaman persi bagüjt reeman bën guin ree baze'c tëë reeman lidx reeman. <sup>8</sup> Dxel rëbaman loj ree xmojsaman: "Graczi ma najcchaaw par loj guialruxhliaa guin, per ree bën gunen ad najt guial ni't reeman. <sup>9</sup> Yan, gol wej lod radxaag lasa' ree nejz, gol güjdx loj ree bën guidxaalojtzidi din gui't reeman loj guialruxhliaa guin." <sup>10</sup> Abi' brii ree mojs guin wej reeman lunejz guin ree, bato'p reeman gra ree bën bidxaalojtzi reeman, zi'c ree benmal zi'c ree benza'c, zian gudxa ree biooz lidx rey guin.

<sup>11</sup> Per chi guyu rey guin din guguaaman biooz guin ree, baguaaman tijb bën ad najcwt xab ni rayal gacwaman loj guialruxhliaa guin. <sup>12</sup> Abi' rëb rey guin lojman: "Laadx lüj, ¿xhienaag beenl guyul guie abi' ad najcwt xabil ni rayal gacwil loj guialruxhliaa?" Dxel achet badxejl niëjb bën guin. <sup>13</sup> Zianz rëb rey guin loj ree bën cagui's guialraw: "Gol guxhii guia'x në yaax, gol bazaal tëëx xchu lod nacay da't lod goonx gaw tëë layix." <sup>14</sup> Din zien ree bejn rdxejl, per ad grataman chu'.

### ¿Rayal gax impuest ya?

(Mr. 12:13-17; Lc. 20:19-26)

<sup>15</sup> Dxel baza ree bënfarisew yagaj, abi' baya'n reeman diidx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman. <sup>16</sup> Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee guial lüj rniece diidxli, abi' walil rulüül guial xhienaag rën Dios guiban bejn, ad ridxga' tëëtil chu naj bejn. Din lojl tiblojzi

naj bejn. <sup>17</sup> Guna du lojn: ¿Zagdxen ya yadijxan impuest loj César o ad zagdxentan ya?

<sup>18</sup> Per gogbee gajc Jesús xgabmal ni cayüjn reeman, abi' rëbaman loj reeman: —Bén rusquiee, ¿chexc zeel raguiilidi mod xhienaag gutidia'di naj? <sup>19</sup> Gol balüü tijb cintabl lon ni rguijxnëdi impuest.

Dxel badëëd reeman tijban lojman, <sup>20</sup> abi' gunabdiidx Jesús loj reeman, rëbaman:

—¿Chu loj ca lojn chu tëë laj ca lojn?

<sup>21</sup> Badxi' reeman laan, rëb reeman:

—Laj César në lojman.

Dxel rëbaman:

—Gol badëëd loj César ni naj xieen César, guiáad loj Dios gol badëëd ni naj xieen Dios.

<sup>22</sup> Chi biguiejn reeman zian, dád badxaloy reeman, dxel basa'n reeman laaman, zianz zia reeman.

### Gunabdiidx reeman xcwent guial yaban ree bengüt

(Mr. 12:18-27; Lc. 20:27-40)

<sup>23</sup> Dxejzii gajc tio'p choon ree bën sadusew wej reeman bignaj reeman Jesús, bénsadusew guin ree ad riladxt reeman guial yaban ree bengüt, zeel rëb reeman loj Jesús:

<sup>24</sup> —Mextr, Moisejs rëb guial bal guiët tijb xinguaaw abi' achut xi'n reex guyu con lacheelix, bijch xingüt guin guxhliaanë béngunaa bizëjb guin din chu' xi'n reex luar bijchix. <sup>25</sup> Du lojn guyu tijb famil lod gojc reex gajdx bijch. Baxhliaa xin yaloy guin, per güjtix abi' guial ad guyut xi'nx, dxel bijch barojpix baxhliaanë béngunaa guin. <sup>26</sup> Per zian-gajc guzajc xin barojp guin abi' ziangajc guzajc xin bayon guin, xt bagajdx reex guzajc zian. <sup>27</sup> Chi bara reex güjt dxel güjt béngunaa guin. <sup>28</sup> Yan, chi yaban ree bengüt, loj guigajdx reex, ¿chu gac

xbéngunaa laaman guial gra reex baxh-  
liaanë laaman?

<sup>29</sup> Badxi' Jesúsan, rëbaman:

—¡Ragdxadi guial ad nünbeetidi xti-  
idx Dios ad nünbee tēetidi xhienaag naj  
xguialrniabeeman! <sup>30</sup> Din chi yaban ree  
bengüt, ad zuxhliatri reeman ad zudēēd  
tēetri xi'n reeman guxhliaa, ma gac ree-  
man zi'c ree anjl yu' xanyabaa. <sup>31</sup> Abi'  
xcwnt ni yaban ree bengüt, ¿gadidi  
gool ya lod ca guial Dios gajc rëb: <sup>32</sup> “Naj  
naj xDios Abraham, xDios Isaac nē xDios  
Jacob?” Abi' Dios ad najtaman xDios ree  
bengüt, najman xDios ree bën naban.

<sup>33</sup> Chi biguiejn ree bejn zian, dád badx-  
aloy reeman zi'c rulüüman laa reeman.

### Mandamient mazri zojbloj

(Mr. 12:28-34)

<sup>34</sup> Chi gogbee ree bënfarisew guial  
achet badxejl niëjb ree bénsadusew loj  
Jesús, dxel baya'n reeman diidx badx-  
aag lasa' reeman. <sup>35</sup> Abi' tijb ree bën-  
farisew guin, bën naj mextr rajc ley, gun-  
abdiidxaman loj Jesús din guidoon xhie  
guiëbaman, rëbaman:

<sup>36</sup> —Mextr, ¿con mandamientan mazri  
zojbloj loj gra ree mandamient ni zēēd  
loj ley?

<sup>37</sup> Badxi' Jesúsan rëbaman:

—“Guyën xDadil Dios guidiblagaa  
guidib guijc guidib ladxil.” <sup>38</sup> Laan naj  
mandamient mazri zojbloj. <sup>39</sup> Ziangajc  
naj mandamient rarojp ni rëb: “Guyën  
ree bejn zi'c rën lüj gajc.” <sup>40</sup> Con grop  
ree mandamient guie, ma cayüjn bejn  
cumplid gra ley bacaa Moisejs nē ree ni  
bacaa ree bën badēē xtiidx Dios loj ree  
bejn.

### Chu loj xdiaa za Cristo

(Mr. 12:35-37; Lc. 20:41-44)

<sup>41</sup> La'tgaj nadxag lasa' ree bënfarisew  
guin, gunabdiidx Jesús loj reeman,  
rëbaman:

<sup>42</sup> —¿Xhie xgab rüjndi por Cristo?  
¿Chu loj xdiaa zaman?

Badxi' reeman laan rëb reeman:

—Loj xdiaa Davi.

<sup>43</sup> Dxel rëb Jesús loj reeman:

—Per, ¿chexquiza zeel por xSprijt Dios  
rëb Davi lojman, Dad? Din Davi rëb:

<sup>44</sup> Dios rëb loj bën rniabee naj:

“Gurej da ladbeen, xt gabecan  
xin rdxe'ch ree lüj guia'l.”

<sup>45</sup> Yan, bal xi'n Davi naj Cristo,  
¿chexquiza zeel rëb Davi lojman Dad?

<sup>46</sup> Achutdzi gojc nadxi' xtiidx Jesús,  
ni'czi tijb diidx. Abi' diizd dxejzii  
achutdzi bayax niniabdiidx xhienin  
lojman.

### Ni rüjn ree mextr rajc ley nē ree bënfarisew

(Mr. 12:38-40; Lc. 11:37-54; 20:45-47)

**23** Rëb Jesús loj ree bejn nē loj ree  
xbejnman:

<sup>2</sup> —Mextr rajc ree ley con ree bën-  
farisew rulüü reeman xhie rën guiëb ni  
ca loj xley Moisejs. <sup>3</sup> Zeel gol bazoob xti-  
idx reeman, gol been tēē gra ni na ree-  
man lojdi, per ad güündi zi'c rüjn ree-  
man, din laa reeman ni ren na reeman  
abi' ni ren rüjn reeman. <sup>4</sup> Rniabee ree-  
man güün bejn ni nawëēg da't, per rni-  
abeezi reeman güün bejn zian, guiáad  
laa reeman ni'qui ta'n ad rüjnt reeman  
bejn yudar din güün reeman zi'c rën ree-  
man. <sup>5</sup> Gra ni rüjn reeman, rüjn reeman  
laan din yadxaloy bejn laa reeman. Ru-  
ladx reeman guixhiü lucwaj reeman nē  
xu'c reeman tijb cint ni ca xtiidx Dios loj,  
ruladx tēē reeman gacw reeman lajd za-  
gdxe. <sup>6</sup> Ruladx reeman cwe reeman lod  
rayal rbej ree bën zojbloj, loj tijb guial-  
raw, abi' ziangajc rüjn reeman lën ree  
yadoo. <sup>7</sup> Ruladx tēē reeman gugajpdioz  
bejn laa reeman zagdxe niz lunejz guiëb  
tēē reeman loj reeman mextr.

<sup>8</sup> Per lëjt ad sëēbladxidi guiniee bejn  
lëjt mextr, din tijbzi naj gradi, tijbzi

mextr rajpidi abi' laaman naj Cristo. <sup>9</sup>Ni'qui tijb loj bénguidxliuj, bén ad najt xdadidi, ad guiébidi dad, din tijbzi xdadidi yu', laaman yu' xanyabaa. <sup>10</sup>Ad güün tēēdi naguiejn yayagbee ree bejn lējt zi'c bén rniabee, din tijbzi bén rniabee yu', laaman naj Cristo. <sup>11</sup>Bén mazri zobjloj lojdi, laaman rayal güün sirv lojdi. <sup>12</sup>Din bén rlies xvalor gajc achet lasajcaman. Guiáad bén rijn naya, zajs xvaloraman.

<sup>13</sup>'iProbza lējt mextr rajc ley nē lējt bénfarisew, bén rusquiee!, ad rtiēbtidi gagbee ree bejn xhienaag din gac reeman xbejn Dios, ni'quiza lējt ad rijnntidi naguiejn gaquidi xbejn Dios, abi' rudxoondi gac xbejn Dios bén rēn ree gac xbejnman.

<sup>14</sup>'iProbza lējt mextr rajc ley nē lējt bénfarisew, bén rusquiee!, din raca'di lidx ree béngunaa bizējb, abi' din guiēb bejn guial benza'c lējt dád xchej rbejdx rniabidi Dios. Zeel mazri castiro' yayalidi.

<sup>15</sup>'iProbza lējt mextr rajc ley nē lējt bénfarisew, bén rusquiee!, zizadi guidibdoo rguilidi bén gac ree xbejnidi, abi' chi ma beendi gan tijbaman al mazri xi'n xinxab rijnndi laaman guial lojdi.

<sup>16</sup>'iProbza lējt, bénlutia'p!, rēbidi: "Achet güünan bal id züjn bejn ni guneeman, majsi ma baza'taman yadooro' Jerusalén, per bal guza'taman ni or yu' ree lēn yadoo guin, dxel ma rijn naguiejn güünman ni guneeman." <sup>17</sup>iNatontidi, wed natia'p lojdi! ¿Conin mazri lasajc: Or guin ya o yadoo beenle' or guin? <sup>18</sup>Rēb tēēdi: "Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rijn naguiejn güünman ni guneeman." <sup>19</sup>iBénlutia'p! ¿Conin mazri lasajc par lējt: Gon guin ya o altar beenle' gon guin? <sup>20</sup>Bén ruza't altar guin ad altar guintzan ruza'taman, nēgajc gra ni dxiib

lojn ruza'taman. <sup>21</sup>Guiáad bén ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin. <sup>22</sup>Abi' bén ruza't xanyabaa, Diosan ruza'taman nē lod zobjbaman.

<sup>23</sup>'iProbza lējt mextr rajc ley nē lējt bénfarisew, bén rusquiee!, rbēecadi bidxtil, anís nētēē comin ni rayal gudēēdi loj Dios, abi' ad ruzoobtidi xley Moisejs ni mazri zobjloj, ad rijnntidi zi'c rayal, ad rayat lasa'di, ad za'dxi'ch tēētidi loj xnejz Dios. Laa reen rayal güündi, per ad cwēēladxidi gudēēdi ni rayal loj Dios. <sup>24</sup>iBénlutia'p, rajpidi cudad chitēē guiébidi tijb bizēdlajs, abi' rguiejbidi tijb camell!

<sup>25</sup>'iProbza lējt mextr rajc ley nē lējt bénfarisew, bén rusquiee!, rusiadi xijch ree vajs nē xijch ree pliajt naj nadxuudx, guiáad luxdoodi guidxa ni dxuudx, nē guialgubaan nētēē guialrdxe'ch lasa'. <sup>26</sup>iBénfarisew lutia'p: Yalojxgaj gol basia, zian guiguien waliquididi nayadi loj Dios!

<sup>27</sup>'iProbza lējt mextr rajc ley nē lējt bénfarisew, bén rusquiee!, najdi zi'c baa nayē! culor naquich, guijcan rguien nix da't, per lēnan guidxa ree xdxijt bengüt nē graloj ree ni dxuudx. <sup>28</sup>Zian najdi, niz loj ree bejn, rultüüdi benza'c, per luxdoodi guidxa guialrusquiee nē guialnaladx.

<sup>29</sup>'iProbza lējt mextr rajc ley nē lējt bénfarisew, bén rusquiee!, rijnndi xbaa ree bén badēē xtiidx Dios loj ree bejn, abi' rijnchaawidi xbaa ree bén goc benza'c, <sup>30</sup>dxel rēbidi: "Bal nabajnan xtiamp ree dux béngulalan, ad nēt dunujn nagüjt bén badēē ree xtiidx Dios loj ree bejn." <sup>31</sup>Abi' con ni guin ree, rayünbeegajquidi guial loj xdiaa bén bagüjt ree bén badēē xtiidx Dios loj ree bejn zēēdidi. <sup>32</sup>iGol baloozza ni guzuloj been xbéngulalidi!



<sup>33</sup>¡Béndol, xi'n xindxab! ¿Xhienaag laadi loj castiro' ni yu' gabijl? <sup>34</sup>Zeel gaxhalan lojdi b́en gudēē ree xtiidx Dios, b́en rajc ree nē ree mextr. Per yu' reeman gugijtidi, yu' reeman gucaadi loj crújz, yu' tēē reeman quindi lēn ree xyadoodi abi' sunalidi laa reeman guiedx por guiedx din güüdi laa reeman xhienin. <sup>35</sup>Zianan zeel guijquidi yab xtol gra ree b́en bagüjt b́en goc ree benza'c diizd Abel b́en guban xnejz loj Dios xt Zacarías xi'n Berequías, b́en bagüjt reeman lule' yadooro' Jerusalén. <sup>36</sup>Diidxliczi rnin lējt, xcasti gra ree ni guin yab guijc ree b́en riga' loj guidxliuj yan.

### Roon Jesús por Jerusalén

(Lc. 13:34-35)

<sup>37</sup>Rēb tēē Jesús:

—¡B́en Jerusalén, b́en Jerusalén, rugüjtidi b́en rudēē ree xtiidx Dios loj ree bejn abi' rucaguiajdi b́en rxhiaal Dios lojdi! ¡B́elczi volt guyēnan nuchagan lasa'di, zi'c rüjn tijb guíd ruchajg lasa' ree xi'nb lēn xhiilib, per ad gutiējbtidi! <sup>38</sup>Zianan zeel yaya'n ladxidi zi'c tijb guiedx lod achut zobj. <sup>39</sup>Abi' rnin lējt diizd yan ad zuguaatrudi naj, xt chi guidxin dxej guiēbidi: “¡Nüjnle' Dios b́en guxhaalaman!”

### Rēb Jesús guial yaze'n yadooro'

(Mr. 13:1-2; Lc. 21:5-6)

**24** Chi barii Jesús lēn yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman. <sup>2</sup>Abi' rēb Jesús loj reeman:

—Diidxliczi rnin, gra ni cuguiaadi yu' dxej ni'qui tijb guiaj guin ad zaya'nt guijc stijban, gran yaze'n.

### Ni gac chi gad guidxliuj nit

(Mr. 13:3-23; Lc. 21:7-24; 17:22-24)

<sup>3</sup>La'tgaj zobj Jesús guijc guia' la Olivos, gubig ree xbejnman lojman, rēb reeman:

—Rayēnan nal goc gac zian. ¿Xhie ree sen gac chi ma zidyob gui'til stijb, nē chi ma zidyob nit guidxliuj?

<sup>4</sup>Dxel rēb Jesús loj reeman:

—Gol gojp cudad achu gusquiee lējt. <sup>5</sup>Din zien ree bejn gui't guiēb reeman guial por naj zēēd reeman, guiēb tēē reeman: “Naj naj Cristo”, abi' zien bejn gusquiee reeman. <sup>6</sup>Per lējt chi guiguiejni cayajc wadijl o zēēb diidx guial gac wadijl, ad guidxebidi din zian naj gac. Per ad wadxint dxej nit guidxliuj. <sup>7</sup>Din til nacion con stijb nacion, nē b́en rajp guialrniabee con stijb b́en rajp guialrniabee. Abi' gui't xudoxh nē gubijn niz ni niz guie. <sup>8</sup>Gra ree nine ree gac chi ma suloj guialzi guin.

<sup>9</sup>Dxel yayü ree bejn lējt loj ree b́en gusagzi lējt, gugüjt reeman lējt, abi' gra ree b́enguidxliuj guidxe'ch lējt guial najdi da bejnan. <sup>10</sup>Chi gac zian zien ree bejn gusa'n guialrliladx reeman naj, guidxe'ch lasa' reeman abi' yayü lasa' reeman loj ree b́en ralen laa reeman. <sup>11</sup>Gui't tēē zien ree b́en gusquiee, guiēb reeman guial rudēēd reeman xtiidx Dios, abi' zien bejn gusquiee reeman. <sup>12</sup>Abi' guial dád zien ni mal gac, zien da't b́en ad zēntri ree lasa'. <sup>13</sup>Per b́en sudxi'ch loj guialrliladxaman naj, xt dxej chigra guibanman, laaman yayal xanyabaa. <sup>14</sup>Abi' xtiidx Dios ni canin lējt yan guire'chan guidibczi guidxliuj din gagbee gra bejnan, dxelri nit guidxliuj.

<sup>15</sup>Zianan zeel chi guguiaadi zobj tijb ni dxuudx, ni ad rüjnt sirv lēn yadooro' Jerusalén, zi'c gunee Daniel b́en badēē xtiidx Dios loj ree bejn (b́en gool gui'ch guie ree, gol bignia'), <sup>16</sup>guial b́en zobj ree Judea rayal guxüün reeman che ree-

man dajn. <sup>17</sup>Guiáad ree b́en yě'p guijc yulidx dxejzii, ad yayu lēnūlidx reeman par tia' xhie xieen reeman. <sup>18</sup>Abi' ree b́en za' dajn, ad yayejc reeman chigxii xab reeman. <sup>19</sup>iProbza ree b́engunaa niūū xi'n o b́en ca' ree xindobēz lēn ree dxejzii! <sup>20</sup>Gol gurejdx gunab Dios chitēē gac zian tiamp nayaag o dxej raziiladx ree bejn ya. <sup>21</sup>Din naxdel dád guialziro' chu', zi'c ad wayajcteci diizd guia'xchej chi gad guidxliuj gacchaaw ad yu' tēēt dxej gac zian. <sup>22</sup>Abi' bal id Dios gucwēēz guialzi chu' lēn ree dxej guin, ni'qui tijb bejn ad zalaat, per gucwēēzaman laa reen por ree b́en guleman.

<sup>23</sup>Lēn ree dxejzii bal chu na lojdi: "Gol baguiaa, laa Cristo za' guie", o "Gol baguiaa laaman za' ni", ad bal chililadxidi. <sup>24</sup>Din zi't zien ree b́en gusquiee na guial laa reeman naj b́en guxhaal Dios o na reeman guial laa reeman naj b́en rudēēd xtiidx Dios. Abi' zūjn reeman milagr ree nē graloj ni yadxaloj bejn din gusquiee reeman laa reeman, abi' bal zile'n xt nē ree b́en gulej Dios gusquiee reeman. <sup>25</sup>Ma rni xgajn lojdi ni gac. <sup>26</sup>Zeel bal chu na lojdi: "Gol baguiaa laa Cristo za' niz loj yujbidx", ad bal chedi o na reeman lojdi: "Laa Cristo yu' lēnū ni", ad bal chililadxidi. <sup>27</sup>Din zi'c chi rē'p nijs, abi' rulaan bacha' niz lod rliejn gubijdx xt lod rēēzan, ziangajc gac dxej gui't B́en guxhaal Dios stijb. <sup>28</sup>B́en rliidx ree naj gui't reeman lon, zi'c chi rado'p ree golbich lod naga' tijb begūt.

### Gui't B́en guxhaal Dios stijb

(Mr. 13:24-37; Lc. 21:25-33;  
17:26-30, 34-36)

<sup>29</sup>'Chi ma gudēd ree dxej ni gac ree guialzi guin, guicajy loj gubijdx, ad zunit bēēw, guiyajb ree bajl xanyabaa abi' gra ree ni yu' xanyabaa guiniib. <sup>30</sup>Dxel guiguien tijb sen xanyabaa guial ma gui't B́en guxhaal Dios. Abi' gra ree

b́enguidxliuj goon da't chi guguaa reeman B́en guxhaal Dios, rdiinman bacha' zēēdaman loj zaj con xguialrniabeeman. <sup>31</sup>Dxel guixhiaal ree xianjlaman, abi' rejs da't gucwejdx reeman trompejt, din yadxajg lasa' ree b́en guleman, b́en za' ree gralad guidiblagaa guidxliuj.

<sup>32</sup>'Yan, gol baguiaa xhienaag rajc con tijb yag higo. Chi ma naquie'n xidxan, chi ma caydixib ree xbalagan, lējt ragbee guial ma zēēd tiamp nalaa. <sup>33</sup>Ziangajc chi guguaadi ma cayajc ree ni guin, gagbeedi guial ma zidyob gac zi'c rnin lējt. <sup>34</sup>Diidxliczi rnin lējt guial gra ree ni guin gac chi gad ree b́en naban yan guiēt. <sup>35</sup>Guidxliuj nē xanyabaa zanijt reen, per da diidxan ad zanijtjan.

<sup>36</sup>'Per achut ragbee xhie dxejn nē xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

<sup>37</sup>'Zi'c goc gulal chi guban Noé, zian gac chi yaguaaad B́en guxhaal Dios. <sup>38</sup>Din chi gad Dios guixhiaal guiadoxh loj guidxliuj, bejn ree, raw reeman, rē' reeman, ruxhliaa reeman, rudēē tēē xi'n reeman ruxhliaa, xt chi bidxin dxej guyu Noé lēn barcwro' ni beenman. <sup>39</sup>Abi' ad bidxgatczi reeman, dxejlczi gol guiadoxh abi' zinē nijs laa reeman, ziangajc gac chi yaguaaad B́en guxhaal Dios. <sup>40</sup>Dxej guin, lod za' tio'p ree xinguaaw dajn, tijbix yaza, stijbix yaya'n. <sup>41</sup>Guiáad lod cayojt tio'p ree b́engunaa, tijbaman yaza, stijbaman yaya'n.

<sup>42</sup>'Zeel gol guzujsin din ad ragbeetidi xhie dxej yaguaaad xDadidi. <sup>43</sup>Gol been xgab, bal tijb bejn ragbee xhie guxhin xhie tēē horan chu' xingubaan lidxaman cwanx, zabejnaaman abi' ad zatiējbtaman chu' xingubaan guin lidxaman. <sup>44</sup>Zianan zeel gol guzujsin, din ad ragbeetidi dxejlczi yaguaaad B́en guxhaal Dios.

## Mojs za'c në mojs guiidx

(Lc. 12:41-48)

<sup>45</sup> ¿Chu lëjt naj zi'c tijb mojs rusa'n xpatronx lidxaman din gulenx gra ree mojs, gudëë tëëx ni gaw reeman chi gal hor? <sup>46</sup> Xiquilbaa mojs cayüjn dxiin zi'c rayal chi yadxin xpatronx. <sup>47</sup> Din diidxliczi rnin lëjt, patron guin zusa'n gra xieenman loj mojs guin. <sup>48</sup> Per bal naj mojs guin mojs dxuudx, naladxix: “Zaglaari da patronan.” <sup>49</sup> Zianz suloj gusagzix los demazri ree mojs guin, suloj gawix, guië'në tëëx xingu' ree. <sup>50</sup> Abi' yadxin xpatronx tijb dxex ni ad ragbeetix ad rbëz tëëtix laaman. <sup>51</sup> Dxel dád castiro' gudëëd patron guin laax, guixhiaal tëëman laax lod rayal ree bën rusquiee, lod goonx gaw tëë layix.

## Xcwent chii biinxdüb

**25** Basnuu Jesús rëbaman: —Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuxhliaa guin. <sup>2</sup> Gaay reem been xgab xhie güün reem, per za gaay reem ad beent xgab. <sup>3</sup> Biin ad beent ree xgab guin binë xguij reem per ad binët reem mazri sejt ni che'cnë ree guij guin. <sup>4</sup> Guiáad ree biin been xgab guin xhie güün reem, binë reem za tib lumejtgaj sejt con xguij reem. <sup>5</sup> Abi' guial goglaa badxin xinruxhliaa guin, bi't baaal loj gra reem, abi' goodyëjs reem. <sup>6</sup> Cost garol guiaal, biguien cha' tijb bejn rëbaman: “¡Laa xinruxhliaa guin ma ziaad, gol tagchaaglojx!” <sup>7</sup> Dxel bixche gra ree biinxdüb guin, abi' beenchaaw xguij reem. <sup>8</sup> Abi' gaay ree biin ad beent xgab guin xhie güün reem, rëb reem loj za gaay biin been xgab guin: “Gol baneesii tibda'n xsejtidi, din dux guiijn ma cayü' reen.” <sup>9</sup> Per badxi' reemin rëb reem: “Yajqui, din dool ad zadaantan par lëjt ni'qui par dunujn. Zagdxeli gol wëj lod

rdo'n din siidan par lëjt gajc.” <sup>10</sup> Abi' la'tgaj zë reem zisii reem sejt, bidxin xinruxhliaa guin, abi' za gaay ree biin been xgab guin guyunë reem laax loj guialruxhliaa guin dxel bida'cw ro' port. <sup>11</sup> Dxel chi badxin za gaay biin bisii ree sejt guin, rëb reem: “¡Dad, dad, guxhal din yadxu'n!” <sup>12</sup> Per badxi'xan rëbix: “Diidxliczi rnin, ad nünbeetan lëjt.”

<sup>13</sup> Dxel basnuu Jesús rëbaman:

—Zeel gol guzusin din ad ragbeetidi goc yaguaaad Bén guxhaal Dios.

## Xcwent bën badëëd milia

<sup>14</sup> Dxel rëb tëë Jesús:

—Xguialrniabee Dios naj zi'c tijb bën ma grii cheman zijt, abi' gurejdx ree xmojsaman, basa'n xmiliaman loj reeman. <sup>15</sup> 'Loj tijbaman badëëman gaay mil cintabl, loj zatijbaman badëëman zatío'p milan, guiáad loj zatijbaman badëëman za timilan. Loj tijbgaj reeman badëëdaman ni naladxaman zajc güünnë reeman dxiin, dxel briitaman zëman zijt. <sup>16</sup> Abi' mojs cwa' gaay mil cintabl guin beennëman laan dxiin abi' beenman gan za ziant gajcan. <sup>17</sup> Ziangajc been mojs cwa' tio'p milan, beenman gan za tio'p mil gajcan. <sup>18</sup> Per mojs cwa' timil cintabl guin bitëënman luyuj persi baquie'chaman cintabl guin ni badëëd xpatronman.

<sup>19</sup> 'Gojc xchej da't dxel badxin patron guin abi' babëëman cwent con la reeman. <sup>20</sup> Yalój bidxin mojs cwa' gaay mil cintabl guin abi' bayüman zagaay milan, rëbaman: “Dad, lüj banee gaay milan lon, yan, laa za gaay milan guie ni benan gan.” <sup>21</sup> Dxel rëb patron guin lojman: “Zagdxen, mojsza'c, zagdxee beenl, guial zagdxee beenl con tibda'n ni banen, yan, gunen mazri guial loj ni banen. Guyu, babaa con naj.” <sup>22</sup> Zianz bidxin mojs cwa' zatío'p mil cintabl guin rëbaman: “Dad, lüj banee tio'p milan lon, yan, laa zatío'p milan guie ni benan

gan.” <sup>23</sup> Dxel rëb patron guin lojman: “Zagdxen, mojsza'c, zagdxee beenl, guial zagdxee beenl con tìbda'n ni banen, yan, gunen mazri guial loj ni banen. Guyu, babaa con naj.”

<sup>24</sup> Per chi bidxin mojs cwa' timil cintabl guin, rëb loj xpatronman: “Dad, naj ragbee guial ad rayatil bejn, rabëel guialnaza'c lod ad rgu'til bin, rato'p tëel guialnaza'c lod ad rtie'chtil bin. <sup>25</sup> Zeel bidxeban abi' biquiechan xmilial lën liuj, yan, laa xmilial guie.” <sup>26</sup> Badxi' patron guinan, rëbaman: “Mojs mal, mojs ploj, bal ragbeel rabën guialnaza'c lod ad rgu'tan bin, ratop tëen guialnaza'c lod ad rtiechtan bin. <sup>27</sup> Adil nilu' da milian lën bancw, din chi naguialan naca'-nan con xi'nian ni beenan gan.” <sup>28</sup> Dxel rëb patron guin loj ree bën za' yagaj: “Gol biquied timil cintabl guin lojx, gol badëedan loj xin rajp chii milan. <sup>29</sup> Din bën rajp zaca'man mazri, abi' gapaman zro' da't, per bën rajp ta'nzi, xt ni rajpaman chiquied lojman. <sup>30</sup> Abi' mojs ad rünjt sirv guin gol bazaalix xchuni lod nacay, lod goonx, lod gaw tëe layix.”

### Xguialguxtis Jesús

<sup>31</sup> Chi gui't Bén guxhaal Dios, gui'taman con xguialrniabeeman, në con gra ree xianjlaman din cweman lod nabeeman. <sup>32</sup> Dxel gra ree bënguidxliuj yado'p lojman, abi' cweman laa reeman zi'c rünjt tìjb bën rajp xiil chi rabëecaman xiil ree loj ree dxib. <sup>33</sup> Abi' guzujman bën naj ree xbejnman xladbeeman, guiáad ree bën ad najt xbejnman guzujman xladruvejsaman. <sup>34</sup> Dxel guiëb rey guin loj ree bën za' xladbeeman: “Gol guda bën ma nünjle' da Dadan. Gol guyu loj guialrniabee najcchaaw par lëjt, diizd chi go'tchaaw guidxliuj. <sup>35</sup> Din chi gulaanan, baneedi ni gudawan, chi we'-can nijs, baneedi ni gu'n, chi bizaan zi'c tìjb benzit, baneedi lod baya'nian. <sup>36</sup> Chi byaadx da xaban, lëjt banee ni go'-

tan, chi gogxuun, bidgatixlojdi naj, abi' chi guyu'n ladxguiib, bidganajdi naj.”

<sup>37</sup> Dxel guiëb ree bën za' ladbee guin: “Dad, ¿goc baguiaan lüj rliaanl, abi' baneen ni gudawil?, ¿o goc baguiaan lüj we'quill nijs, abi' baneen nijs gu'l? <sup>38</sup> ¿Goc baguiaan lüj zizal zi'c tìjb benzit, abi' baneen lod baya'nian, o goc biyaadx xabil, abi' baneen ni gotil? <sup>39</sup> ¿Abi' goc baguiaan lüj ragxuul, o guyl ladxguiib, abi' budganajn lüj?” <sup>40</sup> Dxel guiëb rey guin loj reeman: “Diidxliczi rnin lojdi, gra yudar beendi da bejn reen majsi ad najt reeman bën lasajc, najn beendi yudar.”

<sup>41</sup> Dxel guiëbaman loj ree bën za' xladruvejsaman: “Gol biquied lon, benmal gol chej loj bajl ni ad yu't dxej yayü' ni ma naj par xindxab në ree xbejn. <sup>42</sup> Din chi gulaanan, ad baneetidi ni niawan, chi we'can nijs, ad baneetidi ni nië'n. <sup>43</sup> Chi bizaan zi'c benzit, ad baneetidi lod naya'nian, chi biyaadx da xaban, ad baneetidi ni nia'cwan. Abi' chi gogxuun në chi guyu'n ladxguiib, ad bidganajtidi naj.” <sup>44</sup> Dxel guiëb reeman lojman: “Dad, ¿goc baguiaan lüj rliaanl o re'quill nijs, o zizal zi'c tìjb benzit, o goc baguiaan lüj ryaadx xabil, o ragxuul, o yu'l ladxguiib, abi' ad bayidxgatan lüj?” <sup>45</sup> Abi' yadxi'man laan guiëbaman: “Diidxliczi rnin lëjt, gra ni ad beentidi din nünjdi yudar da bejn reen majsi ad najt reeman bën lasajc, najn ad beentidi yudar.” <sup>46</sup> Laa reeman yayal loj casti tiblyaya, guiáad ree bën been zi'c rayal, laa reeman rayal guialnaban tiblyaya con Dios.

### Baya'n reeman diidx xhienaag guiniaaz reeman Jesús

(Mr. 14:1-2; Lc. 22:1-2; Jn. 11 :45-53)

**26** Chi gulox gunee Jesús diidx guin ree, dxel rëb loj ree xbejnman:

<sup>2</sup>—Lëjt ragbee guial ryaadx zatio'p dx-ejzi guial guidxin lanij pascw, abi' Bén

guxhaal Dios yayü ree bejn laaman din tiaman loj criijz.

<sup>3</sup>Lën ree dxejzii badxaag lasa' ree bixhioz rniabee ree bixhioz, con xguxtis ree bén Israel, lidx Caifás quijb bixhioz zobjbloj. <sup>4</sup>Ni baya'n reeman diidx xhienaag gusquiee reeman Jesús din guiniaaz reeman laaman, abi' guguijt reeman laaman. <sup>5</sup>Per rëb reeman:

—Ad zaguieent ree zian loj lanij guin chitëë gac naquie' luguiedx guin.

### **Ruroob tijb béngunaa perfum guijc Jesús**

(*Mr. 14:3-9; Jn. 12 :1-8*)

<sup>6</sup>Chi za' Jesús luguiedx Betania lidx Simón, bén rniee reeman Leproso, <sup>7</sup>bidxin tijb béngunaa ca'man tijb lumejt guidxan perfum ni lasajc wayëjx. Abi' la'tgaj zobj Jesús xan mex, baroobaman perfum guin guijc Jesús. <sup>8</sup>Chi baguiaa ree xbejn Jesús ni been béngunaa guin, dád bidxe'ch reeman, abi' rëb reeman:

—¿Chexc zeel bixie' perfum guin?

<sup>9</sup>Zile' nido'n zro' da't din nüjnan yudar bënprob ree.

<sup>10</sup>Chi biguiejn Jesús ni canee reeman, rëbaman loj reeman:

—¿Chexc zeel rdxe'chidi béngunaa guin? Zagdxë naj ni beenman naj. <sup>11</sup>Din bënprob guin ree zianczi za'në reeman lëjt, sa'n naj ad ziantczi gazunë'n lëjt. <sup>12</sup>Abi' ni baroobaman perfum guin guican, rën guiëban guial ma beenchaaw xgajman naj par chi guiguie'chan. <sup>13</sup>Diidxliczi rnin, bantëëz guin guire'ch xtiidxza'c Dios loj guidxliuj, zü ree bejn gra ni been béngunaa guin por naj, din gusaaladx reeman laaman.

### **Rayü Judas Jesús**

(*Mr. 14:10-11; Lc. 22:3-6*)

<sup>14</sup>Loj guidxiptio'p ree xbejn Jesús, bén la Judas Iscariote, bigneenëman bix-

hioz rniabee ree bixhioz, <sup>15</sup>rëbaman loj reeman:

—¿Plac guneedi din yanen Jesús lojdi?

Abi' badëëd reeman gajlbichii milia plajt lojman. <sup>16</sup>Diidx dxejzii guzulojman raguiilaman mod xhienaag yayüman Jesús.

### **Gudawnë ree xbejn Jesús xche**

(*Mr. 14:12-25; Lc. 22:7-23;  
Jn. 13 :21-30; 1Co.11 :23-26*)

<sup>17</sup>Dxej ni guzuloj lanij ni raw ree bejn guidaxtil ni ad yu't levadur, gubig ree xbejn Jesús lojman, rëb reeman:

—¿Ban guin rënl yaguieenchaawan ni yadaaw ree guxhin lanij pascw?

<sup>18</sup>Badxi' Jesúsán rëbaman:

—Gol chej Jerusalén lidx bén guin, gol biguiedx lojman: “Na Mextr: Ma bidxin xihoraman abi' rënman tëdaman pascw lidxil con ree xbejnman.”

<sup>19</sup>Dxel been ree xbejnman zi'c rëbaman, been tëë reeman ni gaw reeman guxhin lanij pascw.

<sup>20</sup>Chi gure guiaal, zobj Jesús xan mex con guidxiptio'p ree xbejnman.

<sup>21</sup>Abi' la'tgaj cayaw reeman, rëbaman loj reeman:

—Diidxliczi rnin, tijb gajc lëjt yayü naj.

<sup>22</sup>Abi' dád guyunaya reeman, zianczi guzuloj rniabdiidx tijbgaj reeman loj Jesús, rëb reeman:

—¿Najn ya, Dad?

<sup>23</sup>Badxi' Jesúsán, rëbaman:

—Bén cayaw loj pliajt ni cayaw gajcan, laaman yayü naj. <sup>24</sup>Walican, Bén guxhaal Dios naj guial sacaman zi'c rëb loj xtiidx Dios. Per jprobza bén yayü laaman!, zagdxeli naj par laaman ad niutaman loj guidxliuj.

<sup>25</sup>Dxel Judas bén yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

<sup>26</sup> La'tgaj cayaw reeman, cwa' Jesús guiadxtil, badëédaman quixtëë loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

<sup>27</sup> Dxel cwa'man tib cojp vin, chi gulox badëédaman quixtëë loj Dios, badëédaman cojp guin loj reeman, rëbgajman:

—Gol gu' gradi loj cojp guie. <sup>28</sup> Din laan naj da rejnman ni gaxhie'n chi guiëtan por zien ree bénguixdliuj. Din por da guialgüjtan guixal tijb nejb cüb xhienaag gap ree bejn perdon loj Dios por xtol reeman. <sup>29</sup> Abi' diidxiczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

**Rëb Jesús guial guiëb Bëd ad nünbeetaman laaman**

*(Mr. 14:26-31;*

*Lc. 22:31-34; Jn. 13 :36-38)*

<sup>30</sup> Chi gulox biil reeman tijb cant par Dios, dxej zë reeman guijc guia' Olivos.

<sup>31</sup> Abi' rëb Jesús loj reeman:

—Gradi zabëëladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, dxej guire'ch ree xiil guin.”

<sup>32</sup> Per chi yabanan, yaloj naj ganeed ga gajn Galilea dxejri gui'tidi.

<sup>33</sup> Dxel rëb Bëd lojman:

—Majsi gra reeman cwëëladx lüj per naj ad yu't dxej gabëladxan lüj.

<sup>34</sup> Per rëb Jesús lojman:

—Diidxiczi rnin lojl, yan guxhin gajc chi gad gujdx cwidxa', mal rëbil choon volt guial ad nünbeetil naj.

<sup>35</sup> Abi' rëb Bëd lojman:

—Majsi guiëtnë'n lüj, per ad yu't dxej guien guial ad nünbeetan lüj.

Abi' gra ree xbejn Jesús ziangajc rëb reeman.

**Gurejdx gunab Jesús Dios lod la Getsemaní**

*(Mr. 14:32-42; Lc. 22:39-46)*

<sup>36</sup> Chi bidxin Jesús con ree xbejnman tijb luar la Getsemaní, rëbaman loj reeman:

—Gol gurejsii guie, la'tgaj gan ni din gabedx ganaaban Dios.

<sup>37</sup> Dxel zinëman Bëd con grop ree xi'n Zebedeo, zianz guzuloj cayunayaman abi' ad nixtri yu' luxdooman. <sup>38</sup> Zianz rëbaman loj reeman:

—Dád yu'naya luxdoon, ruliü ma gugüjt guialyu'naya guin naj. Gol baya'n guie ad gaayëjsidi.

<sup>39</sup> Dxel zë Jesús mazri delant abi' gurerulejman gurejdx gunabaman Dios, rëbaman:

—Dad, bal zile' yabëël naj loj guialzi ni gadëëdan, per ad gac zi'c rënan, gac zi'c rënl.

<sup>40</sup> Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Bëd:

—¿Wen ni'qui tib hor ad bile't natie'ch xbacaalidi ya, din sunëdi naj? <sup>41</sup> Gol batie'ch xbacaalidi gol gurejdx gunab tëë Dios, chitëë güün xinxab lëjt gan, din rënuquidi güüendi zi'c rayal, per xcuerpidi ad rtiëjbtan.

<sup>42</sup> Ni barojp volt wejman gurejdx gunabaman Dios, rëbaman:

—Dad, bal id zile' tëd guialzi ni naj gadëëdan, bal rüjn naguiejn gadëëdanan gacri zi'c rënl.

<sup>43</sup> Chi badxinman lod za' ree xbejnman stijb, laa reeman naayëjs guial dád guidxa bacaal loj reeman. <sup>44</sup> Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. <sup>45</sup> Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziiladx tëëdi? Guiáad Bën guxhaal Dios ma bidxin hor yayü reeman laaman loj

ree béndol. <sup>46</sup> Gol bixche, yo' ree, gol baguiaa laa bèn yayü naj ma zëéd gajxh.

### Gunaaz reeman Jesús

(Mr. 14:43-50;

Lc. 22:47-53; Jn. 18 :2-11)

<sup>47</sup> Sta caneenë Jesús bèn naj ree xbejnman, chi bidxin Judas bèn naj gajc tijb xbejn Jesús. Bidxinnëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree bèn Israel laa reeman. <sup>48</sup> Abi' Judas bèn bayü laaman mal rëbx-gajman loj ree bèn guin: "Bèn gawan xid xhajg, laaman raguilidi, gol gunaazaman." <sup>49</sup> Chi bidxin Judas bibigaman loj Jesús, dxel rëbaman:

—¡Xchan, Mextr!

Laa gudaw gajcaman xid xhajgaman.

<sup>50</sup> Abi' rëb Jesús lojman:

—Judas, been ni zidguieenl.

Dxel gubig ree bèn guin, gunaaz reeman Jesús persi zinë reeman laaman.

<sup>51</sup> Per tijb ree bèn za'në Jesús yagaj, gulëe xiespadaman dxel gutü'man guidi-ajg xmojs quijb bixhioz zojbloj. <sup>52</sup> Dxel rëb Jesús lojman:

—Bagu'chaaw xiespadil xluaran. Din bèn rdil con espad, con espad rëjtaman. <sup>53</sup> ¿Wen, id ragbeel ya guial zajc gabedx ganaab da Dadan, abi' laa guixhiaal gajcaman por mil ree xianjlaman din gagnë reeman naj? <sup>54</sup> Per ¿xoza gac cumplid zi'c ca loj xtiidx Dios ni rëb guial rüjn naguiejn gac ree ni cayajc?

<sup>55</sup> Loj hor guin gajc rëb Jesús loj ree benzien guin:

—¿Chexc zeel zëédidi con espad në con yag din guiniaazidi naj zi'c tijb xingubaan? Guixie guixie guzun'ën lëjt lën yadooro' Jerusalén balün lëjt xtiidx Dios, abi' ad gunaaztidi naj. <sup>56</sup> Per gra ree ni guie cayajc din gac cumplid ni bacaa ree bèn badëë xtiidx Dios loj ree bejn.

Loj hor guin gajc baxüün ree xbejn Jesús, guro'nldax reeman laaman.

### Za' Jesús loj ree guxtis Israel

(Mr. 14:53-65; Lc. 22:54-55,  
63-71; Jn. 18 :12-14, 19-24)

<sup>57</sup> Bèn gunaaz ree Jesús binë reeman laaman lidx Caifás, quijb bixhioz zojbloj, yagaj badxaag lasa' ree mextr rajc ley con ree xguxtis ree bèn Israel. <sup>58</sup> Abi' Bëd zijt zijt nalaman Jesús, xt lule' lidx bixhioz guin. Dxel guyuman abi' gurejnëman bèn rajp ree lidx bixhioz guin, din guguaaman xhie güünnë ree bèn guin Jesús.

<sup>59</sup> Guiáad ree bixhioz rniabee ree bixhioz con gra ree guxtis guin raguil reeman xhie gusquiee reeman din gute-dia' reeman Jesús din nabee reeman guiëtaman. <sup>60</sup> Per ad radxejlt xhienaag gutedia' reeman laaman majsi zien ree bèn basquiee. Dxel bibig zatio'p reeman, <sup>61</sup> rëb reeman:

—Bèn guie rëb: "Zile' yase'nán xyadoo Dios abi' loj choon dxejzi yayünanan."

<sup>62</sup> Dxel guzuli quijb bixhioz zojbloj guin, rëbaman loj Jesús:

—¿Nid zadxi'llan ya? ¿Waliqui ni canee ree bèn guin contr lüj ya?

<sup>63</sup> Per achet rëb Jesús. Dxel rëb bixhioz guin lojman:

—Por Dios bèn naban, rniabeen lüj guna diidxli. Guna bal lüjn naj Cristo, Xi'n Dios.

<sup>64</sup> Badxi' Jesúsán rëbaman:

—Waliquil. Rni tëen lëjt, zuguaadi Bèn guxhaal Dios zojbaman xladbee Dios bèn rajp guialrniabee abi' zuguaa tëëdi gui'taman loj zaj xanyabaa.

<sup>65</sup> Chi biguiejn bixhioz guin zian, gudixya' xabaman, rëbaman:

—Diosan canee guijdx bèn guin. ¿Xhie mazri rüjn naguiejn yadiil ree testiw? Lëjt gajc ma biguiejn guial rniee guijdxaman Dios. <sup>66</sup> Yan, ¿xhie nadi?

Badxi' ree bèn guinan rëb reeman:

—Rayal guiëtix.

<sup>67</sup>Dxel bacojp xhiejn reeman lojman, gudijn reeman laaman, yu' tëë reeman wëëz ro'man, <sup>68</sup>rëb reeman lojman:

—Bal lüjn naj Cristo, guneeya' chu gudin lüj.

### Rëb Bëd ad nünbeetaman Jesús

(*Mr. 14:66-72; Lc. 22:56-62; Jn. 18 :15-18, 25-27*)

<sup>69</sup>La'tgaj zobj Bëd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, bën Galilea.

<sup>70</sup>Per Bëd gurexuuman, rëbaman niz loj gra reeman:

—Ad ragbeetan xhienin rnieel.

<sup>71</sup>Chi zëman niz ro' port baguiaa stijb biin rüjn dxiin yagaj laaman, abi' rëbim loj ree bën riga' yagaj:

—Në bën guin nal Jesús bën Nazaret.

<sup>72</sup>Per Bëd gurexuuman stijb, xt baza'-taman Dios, rëbaman:

—Ad nünbeetan bën guin.

<sup>73</sup>Dxel ad gojct xchej, gubig ree bën riga' yagaj loj Bëd, rëb reeman lojman:

—Laa rguien gajc në lüj naj xbejn reeman, din zi'cgajc rniee reeman rnieel.

<sup>74</sup>Per Bëd baza'taman Dios, rëbaman loj reeman:

—Dios gudëëd naj casti bal rusquieen, per ad nünbeetan bën guin.

Hor guin gajc guridxa' tijb guid. <sup>75</sup>Abi' basaaladxaman guial rëb Jesús lojman: “Chi gad guid cwidxa', mal rëbil choon volt ad nünbeetil naj.” Dxel barii Bëd yagaj abi' dád naya biinman.

### Binë reeman Jesús loj Pilato

(*Mr. 15:1; Lc. 23:1-2; Jn. 18 :28-32*)

**27** Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guiët Jesús. <sup>2</sup>Dxel guxhii reeman laaman abi' binë reeman laaman loj gobernador Pilato.

### Güjt Judas

<sup>3</sup>Dxel Judas, bën bayü Jesús, chi baguiaaman guial ma naj guiët Jesús, guyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, <sup>4</sup>rëbaman loj reeman:

—Ma benan dol guial banen tijb bën achet dol rajp.

Badxi' reeman laan rëb reeman:

—Xhieczi yaguieenan, ¡lüj gunaj!

<sup>5</sup>Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

<sup>6</sup>Dxel bato'p ree bixhioz rniabee guin milia guin, abi' rëb reeman:

—Ad rayalt yadxe' ree milia guin lën lod ru gon, din con laan bio' bën guiët.

<sup>7</sup>Dxel be reeman diidx, abi' con milia guin guzii reeman xguidxliuj bën rüjn trast bajn ree, din gacan lod guiguie'ch ree benzit. <sup>8</sup>Zeel xt yan la guidxliuj guin Yuj Rejn. <sup>9</sup>Zian gojc cumplid ni gunee Jeremías, bën badëë xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bën Israel lasajcaman, <sup>10</sup>abi' con milia guin guzii reeman xguidxliuj bën rüjn trast bajn ree, zi'c gunabee Dios naj.”

### Rniabdiidx Pilato loj Jesús

(*Mr. 15:2-5; Lc. 23:3-5; Jn. 18 :33-38*)

<sup>11</sup>Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree bën Israel ya?

Badxi' Jesúsán, rëbaman:

—Najcan.

<sup>12</sup>Abi' chi cutedia' ree bixhioz rniabee ree bixhioz con ree guxtis Israel laaman, achetzi radxi'man. <sup>13</sup>Dxel rëb Pilato lojman:

—¿Nid riguieljnl gra ni canee reeman contr lüj ya?



<sup>14</sup>Per Jesús ni'qui tijb diidx ad badx-i'taman, zeel dád badxa loj gobernador guin.

### Gunabee reeman guiët Jesús

(Mr. 15:6-20; Lc. 23:13-25;

Jn. 18 :38–19:16)

<sup>15</sup>Lën ree dxej lanij, ruslaa gobernador Pilato tijb bén yu' ladxguiib bén guiëb ree bénguiedx guin laa, zi'c naj xcostumbr reeman. <sup>16</sup>Lën ree dxejzii yu' Barrabás ladxguiib, tijb bén nünbee ree bejn niz ni niz guie. <sup>17</sup>Abi' chi badxaag lasa' gra ree bejn, gunabdiidx Pilato loj reeman, rëbaman:

—¿Chu rëndi guslaan? ¿Barrabás ya, o Jesús, bén rëb ree bejn naj Cristo?

<sup>18</sup>Rëbaman zian guial gogbeeman ganaxzi guialnadëdlojn zeel bayü reeman Jesús.

<sup>19</sup>La'tgaj zojb Pilato lod rijnman guialguxtis, bidxin xruson lacheelaman, rëbaman lojman: “Adxhie güünnël bén guin achet dol rajpaman, din dád nadxuudx gune'xchalan laaman nuche.”

<sup>20</sup>Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guiëtaman. <sup>21</sup>Gunabdiidx Pilato loj reeman stijb, rëbaman:

—¿Chu loj grop reeman rëndi guslaan?

Badxi' reeman laan rëb reeman:

—Barrabás.

<sup>22</sup>Abi' rëb Pilato loj reeman:

—¿Xhieza günnë'n Jesús, bén rëb ree bejn naj Cristo?

Badxi' gra reeman laan rëb reeman:

—¿Bacaaman loj crüjz!

<sup>23</sup>Abi' rëb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rëb reeman:

—¿Bacaaman loj crüjz!

<sup>24</sup>Chi baguiaa Pilato guial achet rile' güünman, al mazri naquie' cayüjn ree bén guin, dxel cwa'man nijs abi' banaaman delant loj gra reeman, rëbaman:

—Achet dol ra'pan guial guiët bén guie, xcwentidan.

<sup>25</sup>Badxi' gra ree bén guinan rëb reeman:

—¿Du guiican, në guiic du xi'nan cwiban guial guiëtaman!

<sup>26</sup>Dxel baslaa Pilato Barrabás, zianz gunabeeman gudijn reeman Jesús abi' bayüman laaman din gucaa reeman laaman loj crüjz.

<sup>27</sup>Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man. <sup>28</sup>Dxel gulëë reeman xabaman bascajcw reeman laaman tijb lajd xnia. <sup>29</sup>Abi' beenchaaw reeman tijb coron guiëjch badxe' reeman laan guiicaman, zianz baga's reeman tijb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—¿Guibanri xrey ree bén Israel!

<sup>30</sup>Abi' rucojpx xhiejn reeman lojman, laagajc tëë yag ni ca'man rugaz reeman guiicaman. <sup>31</sup>Chi gulox baze' reeman laaman, dxel babëë reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

### Cwa Jesús loj crüjz

(Mr. 15:21-32;

Lc. 23:26-43; Jn. 19 :17-27)

<sup>32</sup>Chi zinë reeman Jesús, badxaagloj reeman tijb bén Cirene, laman Simón, abi' been reeman laaman naguiejn byaaman xcrüjz Jesús.

<sup>33</sup>Chi bidxin reeman tijb luar la Gólgota (rën guiëban Xluar Calaver), <sup>34</sup>ni badëëd reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

<sup>35</sup> Chi gulox bacaa reeman laaman loj crüjz, dxel gudxijt reeman suert guiyc xabaman din yala' reeman laan. <sup>36</sup> Dxel gurej reeman yagaj din gap reeman laaman. <sup>37</sup> Abi' guiyc crüjz guin bacaa reeman lejtr ni rëb, chexc zeel cwaman loj crüjz. Rëb lëjtr guin: "BEN GUIE NAJ JESÚS XREY REE BEN ISRAEL."

<sup>38</sup> Nè tio'p xin gubaan bacaa reeman loj crüjz, tijbix xladbee Jesús stijbix xladruvejsaman. <sup>39</sup> Abi' ree bën rdëd, rnieeguijdx reeman Jesús, runij guiyc reeman, <sup>40</sup> rëbgaj reeman:

—Lüj rëb, nuse'nl yadooro' abi' loj choon dxejzi nayüjnlan, baslaa lüj gajc. Bal walil najl Xi'n Dios baguiajt loj crüjz guin.

<sup>41</sup> Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

<sup>42</sup> —Baslaax ben ren ree, abi' ad rajct ruslaa laagajquix. Bal wali najx xrey ree bën Israel, yaguiajtix loj crüjz guin, din yaliladx reex. <sup>43</sup> Rililadxix Dios. ¡Yan, guslaaza Dios laax, bal wali rënman laax, din rëbix: "Xi'n Dios najx"!

<sup>44</sup> Abi' nëgajc ree xingubaan ca cwë'-man ruze' laaman.

### Güjt Jesús

(Mr. 15:33-41;

Lc. 23:44-49; Jn. 19 :28-30)

<sup>45</sup> Dxel diizd garol dxej bicajy loj guidib guidxliuj, xt raca choon wadxe. <sup>46</sup> Loj horzii gurixdiajman rejs da't, rëbaman:

—Elí, Elí, ¿lama sabactani? —rën guieban: Dios, Dios, ¿chexc zeel gulëëladxil naj?

<sup>47</sup> Yu' ree bën za' yagaj, chi biguiejn reeman, rëb reeman:

—Laaman cabejdx Elías, bën badëë xtiidx Dios loj ree bejn.

<sup>48</sup> Laa baxüün gajc tijbaman bicajdxaman tijb xiil loj vinagr, abi' bacaaman

laan loj tijb yag zianz badxigaman laan ro' Jesús din guie'man laan. <sup>49</sup> Per rëb los demazri reeman:

—Basa'nx, din yaguaiaa ree don zidgaslaa Elías laax ya.

<sup>50</sup> Zianz gurixdiaj Jesús rejs da't stijb, dxel güjtaman. <sup>51</sup> Loj hor zii goxya' lajd nal lën yadooro' Jerusalén gojcan tio'p lala', diizd guiyc guin xt guia' guin goxya'. Abi' guxu, gula' tëë ree guiajro'. <sup>52</sup> Guiáad ree baa bixal reen, abi' zien ree bejn bën naj xbejn Dios, bën ma güjt ree baban. <sup>53</sup> Dxel chi baban Jesús, bari lën xbaa reeman, abi' guyu reeman Jerusalén, lod baguiaa zien ree bejn laa reeman.

<sup>54</sup> Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, dád bidxeb reeman abi' rëb reeman:

—Walican Xi'n Dios bën guin.

<sup>55</sup> Zien ree béngunaa guzanal Jesús diizd Galilea, bën been tëë ree laaman yudar, za' reeman zijt ruguiaa reeman ni cayajc. <sup>56</sup> Loj reeman no'ch María Magdalena, në Li xniaa Santiaaw con Xiëb nëtëë xniaa ree xi'ngaan Zebedeo.

### Biguie'ch Jesús

(Mr. 15:42-47;

Lc. 23:50-56; Jn. 19 :38-42)

<sup>57</sup> Chi gure guiaal, bidxin tijb benri-jcw laman Xiëb, bën Arimatea, në laaman binal Jesús. <sup>58</sup> Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman. <sup>59</sup> Abi' cwa'man cuerp guin batüübaman tijb lajd naya. <sup>60</sup> Dxel biquie'chaman laaman lën tijb baa cüb ni gudëenman par laagajcaman lën tijb guiaj. Zianz basi-aawaman ro' baa guin con tijb guiajro', ziataman. <sup>61</sup> Abi' zojib María Magdalena con stijb bën la gajc Li, ro' baa guin.

### Rajp ree suldad ro' xbaa Jesús

<sup>62</sup>Chi bareguiaal, dxej raziiladx ree bejn, wej ree bixhioz rniabee ree bixhioz në ree bēnfarisew, bigneenē reeman Pilato, <sup>63</sup>rēb reeman lojman:

—Dad, rasaaduladxan, chi ziz naban bēn rusquiee ni, rēbaman guial chi gac choon dxej yabanman. <sup>64</sup>Zeel gunabee guiyaawdxich ro' baa guin xt chi gac choon dxej, chitēē gui't ree xbejnman guxhin cwan reeman xcuerpaman. Abi' guiēb reeman loj ree bejn guial ma babanman. Abi' mazri gusquiee reeman bejn guial loj ni yaloj.

<sup>65</sup>Dxel rēb Pilato loj reeman:

—Laa ree suldad za' yagaj. Gol chinē reeman, gol basiaawdxich ro' baa guin zi'c rēndi.

<sup>66</sup>Abi' zē reeman, dxel basiaawdxich reeman ro' baa guin. Zianz basa'n reeman suldad guin ree cayajp reeman laan.

### Raban Jesús

(Mr. 16:1-8; Lc. 24:1-12; Jn.20 :1-10)

**28** Chi gudēd dxej raziiladx ree bejn, bareguiaal chidumingw, María Magdalena con stijb bēn la gajc Li biquiaa reeman ro' baa guin. <sup>2</sup>Dxel bi't tijb xudoxh, guial biguiajt tijb xianjl Dios diizd xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan. <sup>3</sup>Dád rli-ajman bacha' zi'c chi rē'p nijs, guiáad xabaman naquichbējn. <sup>4</sup>Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. <sup>5</sup>Dxel rēb anjl guin loj ree bēngunaa guin:

—Ad rdxebidi, ragbeen cayguilidi Jesús bēn cwa loj crūjz. <sup>6</sup>Per achutri laaman guie, ma babanman zi'c naman. Gol guida nial din guguaadi lod gudixh reeman laaman. <sup>7</sup>Yan, gol baxüün gol bicojn ree xbejnman guial ma babanman, ma nedaman lojdi zēgajman Galilea, ni

guguaadi laaman. Ni nezan naj ni rugojnan lējt.

<sup>8</sup>Dxel cari da't baza reeman ro' baa guin rdxeb reeman rabaa tēē reeman, ruxüün reeman zia reeman zicojn reeman xbejn Jesús. <sup>9</sup>La'tgaj zia reeman, balüüloj Jesús loj reeman, bagajpdiozman laa reeman. Abi' bibig reeman lojman, bazuxib reeman, gudiidx reeman guia'man, <sup>10</sup>abi' rēbaman loj reeman:

—Ad rdxebidi. Gol chej, gol biguiedx loj ree da bejnman din che reeman Galilea, ni guguaa reeman naj.

### Ni rēb ree suldad

<sup>11</sup>La'tgaj zia ree bēngunaa guin, në tio'p choon ree suldad cayajp ro' baa guin zē luguiedx guin zicojn reeman bixhioz rniabee ree bixhioz gra ni goc. <sup>12</sup>Dxel wej ree bixhioz rniabee guin bigneenē reeman guxtis Israel ree persi baya'n reeman diidx xhie güün reeman. Abi' dad zro' milia badēēd reeman loj ree suldad guin, <sup>13</sup>rēb reeman:

—Con gol güjdx loj ree bejn: “Guxhin la'tgaj nadoodyējsan, bi't ree xbejn Jesús abi' gulan reeman xcuerpaman.” <sup>14</sup>Abi' bal gagbee gobernador, dunujn yaneenē' laaman chitēē xhie güünnēman lējt.

<sup>15</sup>Dxel cwa' ree suldad guin milia guin abi' been reeman zi'c rēb reeman. Laan naj diidx ni nare'ch loj ree bēn Israel xt yan.

### Rxhiaal Jesús bēn naj ree apóstoles

(Mr. 16:14-18;

Lc. 24:36-49; Jn.20 :19-23)

<sup>16</sup>Guidxiptib ree xi apóstoles Jesús, wej reeman Galilea, guijc tijb guia' lod rēb Jesús che reeman. <sup>17</sup>Abi' chi baguiaa reeman Jesús, bazuxib reeman lojman, majsi yu' reeman ad bililadxza-'ct. <sup>18</sup>Dxel bibig Jesús loj reeman, rēbaman:

—Dios ma banee gra guialrniabee din ganabeen xanyabaa në loj guidxliuj.

<sup>19</sup>Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijta-

man, <sup>20</sup>gol balüü tëë reeman din guzoob reeman diidx gra ni ma rmin lëjt. Abi' naj gazunë' lëjt gradxejczy xt chi nit guidxliuj. Amén.

## Xtiidxza'c Jesucrist ni baca San Marcw

### Rzuloj Waj rulüüman xtiidxza'c Jesucrist

(Mt. 3:1-12; Lc. 3:1-9,  
15-17; Jn.1 :19-28)

**1** Ze guzuloj xtiidxza'c Jesucrist, Xi'n Dios.

<sup>2</sup> Guyu tijb bën badëë xtiidx Dios loj ree bejn brii lajman Isafías, bacaaman xtiidx Dios, rëbaman:

Naj rxhial tijb bën ned lojl, bën güünchaaw xnejzil.

<sup>3</sup> Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree, gol guxhal tijb nejz nali.”

<sup>4</sup> Zian bi't Waj bën baroobnijs bejn ree, guzujman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëë reeman.

<sup>5</sup> Gra ree bën zobj niz Judea, në ree bën Jerusalén brii reeman zicaagdiajg reeman ni rniee Waj, abi' rxhioobdol reeman. Zianz ruoobnijs Waj laa reeman loj guiw Jordán.

<sup>6</sup> Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn. <sup>7</sup> Chi guneenëman bejn ree, rëbaman:

—Xichan zëëd tijb bën mazri zobjloj guial lon, ni'qui xgurëchaman ad zajct gaxhiecan guial mazri zobjlojman guial lon. <sup>8</sup> Naj curobnijs lëjt con nijs, per laaman guroobnijs lëjt con xSprijt Dios.

### Rirobnijs Jesús

(Mt. 3:13-17; Lc. 3:21-22)

<sup>9</sup> Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiw Jordán. <sup>10</sup> Chi bariiman loj nijs guin, laa baguiaa gaj-

caman bixal xanyabaa, zidguiajt xSprijt Dios zi'c tijb palom xt guijcaman. <sup>11</sup> Dxel biguien cha' bejn xanyabaa, rëbaman:

—Lüj naj da Xi'nan, rënan lüj rabaanë' tëën lüj.

### Been xindxab Jesús prueb

(Mt. 4:1-11; Lc. 4:1-13)

<sup>12</sup> Dxel binë xSprijt Dios Jesús loj yujbidx. <sup>13</sup> Ni guzuman tiuu dxej tiuu guiaal, loj ree bedoxh. Abi' been xindxab laaman prueb chitëë nuzoobaman xtiidx Dios, guiáad ree xianjl Dios gunaj laaman.

### Rzuloj Jesús rulüüman bejn ree niz Galilea

(Mt. 4:12-17; Lc. 4:14-15)

<sup>14</sup> Chi mal guyu Waj ladxguiib, wej Jesús niz Galilea bigneeman xtiidxza'c Dios, <sup>15</sup> rëbaman:

—Ma bidxin dxej zëëd xguialrniabee Dios gajxh, zeel gol bayüjn xgab por xtolidi, gol bililadx tëë xtiidxza'caman.

### Rbejdx Jesús tajp ree bën gac xbejnman

(Mt. 4:18-22; Lc.5:1-11)

<sup>16</sup> La'tgaj caza Jesús ro'nijsdoo Galilea, baguiaaman Simón në bijchaman Andrejs, cuzaal xguijxh reeman lojnijs din guiniaaz reeman bëjl.

<sup>17</sup> Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

<sup>18</sup> Loj hor guin gajc basa'n guijxh rniaaznë reeman bëjl persi zinal reeman Jesús.

<sup>19</sup> Guzaman zatibda'n, dxel baguiaaman Jacob con Waj bën naj ree xi'n Zebedeo, yu' reeman loj barcw rayüjnchaaw xguijxh reeman. <sup>20</sup> Dxel gurejdx Jesús laa reeman, abi' basa'n reeman Zebedeo loj barcw guin, bën naj xdad

reeman con ree xmojsaman, guiáad laa reeman zinal reeman Jesús.

### **Rabëë Jesús xindxab luxdoo tijb bejn**

(Lc. 4:31-37)

<sup>21</sup> Chi bidxin Jesús luguiedx Capernaum. Abi' dxej raziiladx ree bejn guyu-man lën xyadoo ree bën Israel culüü-man laa reeman. <sup>22</sup> Dád radxa loj reeman zi'c rnieenëman laa reeman guial ruliüman laa reeman zi'c tijb bën rniabee, ad ruliütaman zi'c ruliü ree mextr rajc ley. <sup>23</sup> Lën yadoo guin yu' tijb xin yu' xindxab luxdoo, dxejczy guridxa'x rëbix:

<sup>24</sup> —¿Xhie rën con dunujn, Jesús bën Nazaret? ¿Zëedil ya zidganijtíl dunujn? Nünbeen lüj, ragbeen guial naya nalil najl xi'n Dios.

<sup>25</sup> Dxel gudilë Jesús xindxab guin, rëbaman:

—¡Bacwëöz ro'l, barii luxdoo xin guin!

<sup>26</sup> Abi' been xindxab guin xin guin zi'c bën rëjtya', zianz gurixdiajx rejs, bariix luxdoo xin guin. <sup>27</sup> Graczi ree bën riga' dád badxaloj reeman, riniabdiidx loj lasa' reeman rëb reeman:

—¿Xhie ree nicüban ruliü bën guin? ¡Con guialrniabee ni rajpaman xt ree xindxab ruzoob xtiidxaman!

<sup>28</sup> Tibrajtzi bire'ch xtiidx Jesús guidib niz Galilea.

### **Rayüjn Jesús xnasuegr Bëd**

(Mt. 8:14-15; Lc. 4:38-39)

<sup>29</sup> Bariiz reeman lën yadoo guin, binë Jesús Jacob con Waj lidx Simón con Andrejs. <sup>30</sup> Abi' naga' xnasuegr Simón, yu'man xliaadoxh. Dxel bagojn reeman Jesús guial ragxuuman. <sup>31</sup> Abi' gubigaman cwë'man gunaazaman yaaman, gulesaman laaman. Loj hor guin gajc bariiman xliaa guin dxel guzuloj cudëdaman ni gaw reeman.

### **Rayüjn Jesús zien ree bënragxuu**

(Mt. 8:16-17; Lc. 4:40-41)

<sup>32</sup> Chi ma gurej guiaal, binë reeman bënragxuu ree lod za' Jesús, nè ree bën yu' xindxab luxdoo. <sup>33</sup> Graczi ree bën luguiedx guin bido'p ruyu lod za' Jesús. <sup>34</sup> Bayüjn Jesús zien ree bën rajc ree gadxagayaa guialguijdx, babëë tëëman zien ree xindxab luxdoo ree bejn. Per ad rudëëtaman mod guinee ree xindxab guin guial nünbee reex laaman.

### **Rulüü Jesús xtiidx Dios niz Galilea**

(Lc. 4: 42-44)

<sup>35</sup> Bixche Jesús rsildoo, chi ziiz nacay, briiman luguiedx guin wejman tijb luar lod achutczy bejn zojb, persi gurejdx gunabaman Dios. <sup>36</sup> Abi' Simón con ree xcompniaraman bigdiil reeman laaman.

<sup>37</sup> Chi badxejl reeman laaman, rëb reeman lojman:

—Gra ree bejn cayguiil lüj.

<sup>38</sup> Per rëbaman loj reeman:

—Yo' ree guiedx ni riga' ree gajxh din gulün xtiidxza'c Dios, din par zian zialan.

<sup>39</sup> Abi' balüü Jesús xtiidx Dios lën ree xyadoo ree bën Israel guidib niz Galilea babëë tëëman xindxab luxdoo ree bejn.

### **Rayüjn Jesús tijb bën rajc guialguijdx la lepra**

(Mt. 8:1-4; Lc. 5:12-16)

<sup>40</sup> Tijb bën rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiënl, zajc yayüjnl naj.

<sup>41</sup> Baya Jesús laaman, baqui'man laaman, rëbgajman:

—Rënan, bayajc.

<sup>42</sup> Chi gunee Jesús zian, hor guin gajc bayajc bën guin abi' baya xcuerpaman.

<sup>43</sup> Dxel bagu'nejz Jesús laaman, rëbaman lojman:

<sup>44</sup>—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguiaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

<sup>45</sup>Per Bén guin chi ziaman guzuloj catie'chaman diidx loj gra bejn xhien-aag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zobj. Per gra lad rza ree bejn rej reeman lod za'man.

### Rayüjn Jesús xin nëjt xcuerp

(Mt. 9:1-8; Lc. 5:17-26)

**2** Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj, <sup>2</sup>tibrajtzi bido'p zien da't reeman lod za'man, xt ni'quid rdaant ro' port chu' reeman, guiáad laaman culüüman laa reeman xtiidx Dios. <sup>3</sup>Dxel bidxin tajp ree bejn yagaj lejn reeman tijb xin nëjt xcuerp. <sup>4</sup>Per ad gojct niunë reeman laax lod za' Jesús guial Bén guixiuj guidxa. Abi' guxhal reeman guijc yu lod za'man persi gulet reeman xinragxuu guin guidib ni naga'x loj xt lod za' Jesús. <sup>5</sup>Chi baguiaa Jesús guial rililadx reeman laaman, rëbaman loj xinragxuu guin:

—Xi'n, ma benan xtolil perdon.

<sup>6</sup>Per yagaj zobj tio'p choon ree mextr rajc ley, been reeman xgab naladx reeman: <sup>7</sup>“¿Chexc zeel rniece xin guin zian? ¿Chexc zeel rüjnx mazri xin zobjloj guial loj Dios? Achutczí rajc rüjn perdon dol tijbzi Dios.” <sup>8</sup>Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian?

<sup>9</sup>¿Conin ad nawëëgt gac, guial guiën loj Bénragxuu guin ya: “Ma benan xtolil perdon”, o guiën ya: “Bixche, gules ni go'til loj, baguiaj”? <sup>10</sup>Per yan gutün lëjt guial Bén guxhaal Dios rajpaman guialrniabee loj guidxliuj guie din

güünman dol ree perdon. Dxel rëbaman loj xinragxuu guin:

<sup>11</sup>—Lüj rmin, bixche, baca' ni go'til loj baguiaj lidxil.

<sup>12</sup>Loj hor guin gajc bayajc xin guin, bixchex baca' ni go'tix loj, bariix lënú guin guidib loj gra ree Bén riga' yagaj. Abi' gra reeman badxalaj, ruza't reeman Dios zagdx, rëb reeman:

—Ni'qui tijb ad waguiaat ree zi'c naj ni cayguiaa ree yan.

### Rbejdx Jesús Leví

(Mt. 9:9-13; Lc. 5:27-32)

<sup>13</sup>Dxel wej Jesús ro'nijsdoo Galilea za-tijb. Dád zien ree bejn rdxin lod za'man persi rulüüman laa reeman xtiidx Dios. <sup>14</sup>Chi cadëdaman, baguiaaaman Leví xi'ngaan Alfeo, zobjbaman lod ruquijxaman impuest. Dxel rëb Jesús lojman: —Tanal naj.

Laa bisu gajc Leví binalaman laaman.

<sup>15</sup>Dxel chi cayaw Jesús lidx Leví con zien ree Bén ruquijx impuest në ree Bén ad nabant zi'c rën Dios, gra reeman zojbnë Jesús xan mex con ree xbejnman, guial zinal zien ree bejn laaman. <sup>16</sup>Chi baguiaa ree Bénfarisew con ree mextr rajc ley guial cayawnë Jesús Bén guin ree, rëb reeman loj ree xbejnman:

—¿Chexc zeel rawnë xmextridi Bén ruquijx ree impuest në ree Bén dol?

<sup>17</sup>Chi biguiejn Jesús ni rëb reeman, zeel rëbaman:

—Bénnadaan ree ad riaadxt reeman doctor, Bénragxuu ree, laa reeman ri-aadx doctor. Ad zialtan par ree benza'c, zialan par ree Bén dol din yayüjn reeman xgab por xtol reeman.

### Rniabdiidx reeman loj Jesús xcwent guialrba'n

(Mt. 9:14-17; Lc. 5:33-39)

<sup>18</sup>Lën ree dxej zii guba'n ree xbejn Waj Bén ruroobnijs bejn ree, në ree Bén-

farisew. Abi' yu' ree b́en gunabdiidx loj Jesús, rēb reeman:

—¿Chexc zeel ad rba'nt ree xbejnł zi'c rba'n ree xbejn Waj con ree b́enfarisew?  
<sup>19</sup> Badxi' Jesús laan rēbaman:

—Wen, ¿zajc guiba'n ree biooz za' loj guialruxhliaa ya la'tgaj za'nē xin cuhxhliaa guin laa reeman? La'tgaj za-nēx laa reeman ad zajct guiba'n reeman.  
<sup>20</sup> Per guidxin dxej chiquiedix loj reeman, abi' chi guidxin dxej guin dxel guiba'n reeman.

<sup>21</sup> 'Achut b́en rata' lajd cúb loj lajd yojx, din zaxü'n lajd cúb guin abi' mazri quixya'n lajd yojx guin.  
<sup>22</sup> Ad rgu' tēēt bejn vin cúb lēn anfr yojx, din zaguixya' vin cúb guin anfr guin, abi' zi'c anfr guin zi'c vin guin zaxin reen. Zeel vin cúb rayal chu'n lēn anfr cúb.

### **Rgui'ch ree xbejn Jesús trigo dxej raziiladx ree b́en Israel**

(Mt. 12:1-8; Lc. 6:1-5)

<sup>23</sup> Tjib dxej raziiladx ree b́en Israel, cadēd Jesús con ree xbejnman loj guiniaa lod yu' trigo, abi' ree xbejnman guzuloj cagui'ch reeman trigo guin chi cadēd reeman.  
<sup>24</sup> Dxel rēb ree b́enfarisew loj Jesús:

—¿Chexc zeel rüjn ree xbejnł ni ad rayalt gac dxej raziiladx ree bejn?

<sup>25</sup> Per rēb Jesús loj reeman:

—¿Gadidi gool loj xtiidx Dios ya ni been Davi' chi gulaanman con ree xcompniaraman?  
<sup>26</sup> Tiamp ni goc Abiatar bixhioz rniabee gra ree bixhioz, guyu Davi' lēn xyadooro' Dios, gudawnē ree xcompniaraman guiadxtil ma nagle' abi' bixhiosi ree rayal gaw laa reen.

<sup>27</sup> Rēb tēē Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn.  
<sup>28</sup> Abi' naj, guial najn B́en guxhaal Dios, ra'pan guialrniabee dxej raziiladx ree bejn.

### **Rayajc tijb xin naxü'n tiblax yaa**

(Mt. 12:9-14; Lc. 6:6-11)

**3** Tjib dxej guyu Jesús lēn tijb yadoo. Lēn yadoo guin za' tijb xin naxü'n tiblax yaa.  
<sup>2</sup> Abi' ree b́en yu' lēn yadoo guin rula'ch reeman Jesús din guidoon zayüjnman laax dxej raziiladx reeman ya, din gac gutedia' reeman Jesús.  
<sup>3</sup> Dxel rēb Jesús loj xin naxü'n yaa guin:

—Bisu, guzuj galay guin.

<sup>4</sup> Abi' rēbaman loj ree b́en guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtan laaman?

Per ad badxi't reeman xtiidxaman.

<sup>5</sup> Dxel rdxe'ch Jesús ruguiaaman loj gra reeman, dád guyunaya luxdooan guial ad guyēt reeman naya lasa' reeman. Zianz rēbaman loj xin guin:

—Basli yaal.

Abi' basli yaax, loj hor guin gajc bayajcan.  
<sup>6</sup> Chi baza ree b́enfarisew guin, zianz baya'n reeman diidx con ree xbejn Herodes din gugüjt reeman Jesús.

### **Zien ree bejn riga' ro'nijdsdo**

<sup>7</sup> Per Jesús zē gajcaman ro'nijdsdo Galilea con ree xbejnman. Zien da't ree b́en Galilea con ree b́en Judea binal laaman,  
<sup>8</sup> nē ree b́en Jerusalēn con ree b́en Idumea, nē ree b́en zojb zatiblad ro' guiwro' Jordán, nē ree b́en Tiro con ree b́en zojb niz Sidón. Dád zien ree bejn wej lod za' Jesús guial gogbee reeman ni rüjnman.  
<sup>9</sup> Zeel rēbaman loj ree xbejnman din guzujsin reeman tijb barcw par laaman chitēē gutēē ree b́en guin laaman.  
<sup>10</sup> Guial ma bayüjnman zien ree bejn, zeel rbig gra ree b́enragxuu lojman din guqui' reeman laaman.  
<sup>11</sup> Guíaad ree b́en yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rēb reeman:

—¡Lüj naj Xi'n Dios!



<sup>12</sup>Per gunabeeman xindxab guin ree chitëë guiëb reex chu laaman.

### Rbe Jesús chiptio'p ree apóstoles

(Mt. 10:1-4; Lc. 6:12-16)

<sup>13</sup>Dxel wë'p Jesús tijb ruguia', abi' gurejdxaman gra ree bën guleman. Zianz wej reeman, <sup>14</sup>loj gra reeman gulejman chiptio'p reeman din su reeman con laaman zianczi guixhiaal tēëman laa reeman chigtie'ch reeman ttiidx Dios. <sup>15</sup>Abi' badëëman guialrniabee din yayüjn reeman bënragxuu ree yabëë tēë reeman xindxab luxdoo ree bejn. <sup>16</sup>Bën guie ree naj guidxiptio'p ree bën gule Jesús: Simón bën gulëälajman Bëd, <sup>17</sup>Jacob con Waj, bën naj ree xi'n Zebedeo, gunee Jesús laa reeman Boanerges (rën guiëban, xi'n guziaaw); <sup>18</sup>në Andrejs, Felip, Tol, Matew, Tumajs con Jacob xi'n Alfeo, në Tadeo, nētëë Simón bën bi'ch loj ree bën Cananistas, <sup>19</sup>con Judas Iscariote bën bayü Jesús.

### Rëb ree bejn ca' Jesús xguialrniabee Beelzebú

(Mt. 12:22-32; Lc. 11:14-23; 12:10)

Chi gulox bacaabeeman laa reeman dxel badxinnëman laa reeman lod zojban. <sup>20</sup>Dád zien ree bejn bido'p yagaj stijb, xt ni'quid bile't niajw Jesús con ree xbejnman. <sup>21</sup>Chi gogbee ree xfamil Jesús, dxel bidxin reeman din yaca' reeman laaman guial rëb reeman guijcaman rajc.

<sup>22</sup>Abi' ree mextr rajc ley bën zëed ree Jerusalén rëb reeman:

—Bën guin rabëë xindxab luxdoo ree bejn por xguialrniabee Beelzebú, xin rniabee ree xindxab.

<sup>23</sup>Dxel gurejdx Jesús laa reeman, rëbaman:

—¿Xhienaag yabëë satanás lasa' xindxab gajquix? <sup>24</sup>Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman,

<sup>25</sup>ziangajc tijb famil, bal rdilnë lasa' reeman, nayob la' lasa' reeman. <sup>26</sup>Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

<sup>27</sup>'Abi' achut zajc chu' lidx tijb béngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

<sup>28</sup>'Naj rni lojdi guial yu' perdon par gra dol ni rüjn bejn, yu' tēë perdon par gra diidxguijdx ni rniee bejn chutëëz. <sup>29</sup>Per bën guinieeguijdx xSprijt Dios, ad yu't dxej gacaman perdon, ma banijtaman loj Dios.

<sup>30</sup>Rëb Jesús zian guial rëb reeman yu' xsprijt xindxab luxdooan.

### Xniaa Jesús con ree bijchaman

(Mt. 12:46-50; Lc. 8:19-21)

<sup>31</sup>Hor guin bidxin xniaa Jesús con ree bijchaman yu' lod za'man, per ad bile't niu reeman zeel guxhaal reeman bën chignee laaman. <sup>32</sup>Dxel ree bën zojbnë laaman yagaj bagojn reeman laaman, rëb reeman:

—Laa xniaal con ree bijchil za' lule' guin cayguuil reeman lüj.

<sup>33</sup>Badxi' Jesús xtiidx reeman rëbaman:

—¿Chunin naj da nan con ree da bichan?

<sup>34</sup>Dxel baguiaaman bën zojb ree gadëd lod zojbaman, rëbaman:

—Bën guie ree naj da nan con ree da bichan, <sup>35</sup>din graczi ree bën rüjn ni rën Dios, laa reeman naj da bichan, da zanan në da nan.

### Xcwent bën rtie'ch bin

(Mt. 13:1-9; Lc. 8:4-8)

**4**Zatijb dxej culüü Jesús xtiidx Dios ro'nijsdoo Galilea. Abi' guial dád benzien bido'p lod za'man zeel wë'paman loj tijb barcw yu' lojnijs guin, abi' gurejman lojn guiaad ree bën guin riga'

reeman ro' nijs guin. <sup>2</sup>Zien ree ni balüüman laa reeman, rüman laan loj reeman zi'c cwent, loj ree ni culüüman laa reeman rëbaman:

<sup>3</sup>—Gol bacaagdiajg ni ganin lojdi: Tijb bejn briiman bigtie'chaman bin loj xguiniaaman. <sup>4</sup>Chi catie'chaman laan, ta'n nan biajb lunejz abi' bidxin ree bigu-ijn gudaw reeb laan. <sup>5</sup>Zata'n nan biajb loj ree guiaj lod ad riga't zien yuj, abi' cari gulejnan guial ad zient yuj riga'. <sup>6</sup>Per chi gunan gubijdx, bigoolan abi' guial ad zro't liujn yu', gubidxan. <sup>7</sup>Zata'n nan biajb loj ree yaquiejch. Abi' chi guni'san, bandloj yaquiejch guin laan, abi' ad cwat ladan. <sup>8</sup>Per zata'n nan biajb loj yuj za'c, abi' dád gojcan, yu' ni cwa gajlbichii, yu' ni cwa gayojn yu' tää ni cwa tibgayuu.

<sup>9</sup>Rëb tää Jesús loj reeman:

—Bén rën gucaagdiajg, gol bacaagdiajg.

### **Chexc zeel rulüü Jesús con cwent ree**

*(Mt. 13:10-17; Lc. 8:9-10)*

<sup>10</sup>Chi ma baya'nnë Jesús zata'nz ree bejn con guidxiptio'p ree xbejnman, dxel gunabdiidx reeman xhie rën guiëb cwent guin. <sup>11</sup>Badxi'man laan rëbaman:

—Dios ma basa'n lëjt din chignia'di xhienaag naj xguialrniabeeman ni goc naguie'ch par lëjt, sa'n ree bén ad riladxt xguialrniabeeman, con ganaxzi ree cwent naj guial gulün laa reeman. <sup>12</sup>Din majsi rani loj reeman, per ad zugüiaat reeman, majsi rigueijn reeman, per ad zignia't reeman chitëë yayejc reeman loj Dios abi' güünman perdon xtol reeman.

### **Rusignia' Jesús xcwent bén rtie'ch bin**

*(Mt. 13:18-23; Lc. 8:11-15)*

<sup>13</sup>Abi' rëb Jesús loj reeman:

—¿Nid rignia'di ya xhie rën guiëb cwent guin? ¿Xhieza naag chignia'di gra

ni ganin lojdi? <sup>14</sup>Bén gutie'ch bin guin, laaman naj zi'c bén rtie'ch xtiidx Dios. <sup>15</sup>Bin biajb lunejz, naj zi'c ree bén rigueijn xtiidx Dios, per rdxin gajc xindxab rquiedix laan luxdoo reeman. <sup>16</sup>Yu' ree bén naj zi'c bin biajb loj ree guiaj. Rigueijn reeman xtiidx Dios abi' dád nix ru luxdoo reeman rigueijn reeman laan. <sup>17</sup>Per guial naj reeman zi'c tijb cwaan ni ad yu't zro' liuj, chi rzagdiaj reeman o chi rzunal ree bejn laa reeman din güün reeman laa reeman ni mal por xtiidx Dios, laa rusa'n gajc reeman ni riladx reeman. <sup>18</sup>Yu' tää ree bén naj zi'c bin ni biajb loj yaquiejch. Rigueijn reeman xtiidx Dios, <sup>19</sup>per ru reeman xgab por ree ni riga' loj guidxliuj guie. Rusquiee guialnaza'c laa reeman rën reeman gap reeman graløj. Abi' guial yu' xgab guin guijc reeman, zianz rucwëëz rucaagdiajg reeman xtiidx Dios, abi' achet sirv rüjn ni rucaagdiajg reeman. <sup>20</sup>Per yu' ree bén naj zi'c bin biajb loj yuj zagdx, ridxga' reeman laan con guidib luxdoo reeman. Rüjn reeman zi'c rën Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

### **Achet ni naguie'ch yu'**

*(Lc. 8:16-18)*

<sup>21</sup>Abi' rëb Jesús loj reeman:

—Achut bén ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib. <sup>22</sup>Din achet ni naguie'ch yu' ni ad zagüent ad yu' tää ni ralan ni ad zagbeet bejn. <sup>23</sup>Bén rën gucaagdiajg, gol bacaagdiajg.

<sup>24</sup>Rëb tää Jesús:

—Gol been xgab por ree diidx ni caguejndi. Bal ridxga'di xtiidx Dios, mazri gustëdguienman lëjt. <sup>25</sup>Din bén ma rignia' xtiidx Dios, chignia'man mazri. Per bén ad rignia't, xt ta'n ni rignia'man ad zignia'traman.

### Xcwent guial rni's bin

<sup>26</sup> Rëb tëë Jesús loj reeman:

—Xguialrniabee Dios naj zi'c rzajc bën rxübin loj xguiniaaman. <sup>27</sup> Din majsi naga'yëjsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan. <sup>28</sup> Din yuj guin gajc rusni's laan, yaløj rliejnan najn tijb gui'xhdoo, dxel ririin dojn, zianz rtia ladan. <sup>29</sup> Chi ma gojc reen dxel raru' reen guial ma bidxin tiamp yado'p reen.

### Xcwent xhaj moxtajs

(Mt. 13:31-32; Lc. 13:18-19)

<sup>30</sup> Rëb tëë Jesús:

—¿Xhienaag ganin naj xguialrniabee Dios, o xhienaag gïn diidx lojdi din chignia'di xhienaag naj xguialrniabeeman? <sup>31</sup> Rnin lojdi guial xguialrniabee Dios naj zi'c naj xhaj moxtajs. Chi rxübin reeman laan. Laan naj ni mazri ni dobëz loj gra ree bin yu' loj guidxliuj. <sup>32</sup> Per chi ma guxübin reeman laan, rni'san rajcan mazri naroo loj gra ree cwaan, xt rajc rüjn xguixbitia's ree biguijn xidxan.

### Balüü Jesús con ganax cwent

(Mt. 13:34-35)

<sup>33</sup> Balüü Jesús laa reeman xtiidx Dios con ganaxczi cwent zi'c naj ree ni ma beman, xt lodzi bignia' reeman. <sup>34</sup> Ad rulüütaman laa reeman zezi, bal id zulüüman con cwent. Per chi ma za'-man con ree xbejnman dxel rusignia'-man laa reeman zagdxe xhie rën guiëb ree ni rëbaman.

### Racwëëz Jesús bidoxh

(Mt. 8:23-27; Lc. 8:22-25)

<sup>35</sup> Dxej zii, chi gure guiaal, rëb Jesús loj ree xbejnman:

—Yo' ree zatiblad ro' nijs guin.

<sup>36</sup> Dxel basa'n reeman bën riga' ree yagaj, wë'p reeman loj barcw ni yu'

Jesús zinë reeman laaman con ree barcw ren. <sup>37</sup> Dxel brii bidoxh loj nijs guin, xt guzuløj cadxa nijs loj barcw guin. <sup>38</sup> Per Jesús naga'yëjsaman loj barcw guin tijb luar naj xijchan, nucuugaman tijb al-moad. Dxel bacwëën reeman laaman rëb reeman:

—¡Mextr! ¿Nid yu'l xgab ya? ¡Ma cayzëëb ree xan nijs!

<sup>39</sup> Abi' bixche Jesús, bacwëëzaman bidoxh guin rëb tëëman loj nijs guin:

—¡Bacwëëz, bayajcdxe!

Dxel bayajcdxe bi guin con nijs guin.

<sup>40</sup> Zianz rëb Jesús loj reeman:

—¿Chexc zeel rdxebidi? ¿Gadzidi chililadx naj ya?

<sup>41</sup> Per laa reeman dád bidxeb reeman abi' rniabdiidx loj lasa' reeman:

—¿Chu bën guin zeel xt bi con nijs ru-zoob xtiidxaman?

### Rayüjn Jesús tijb xin yu' xindxab luxdoo

(Mt. 8:28-34; Lc. 8:26-39)

**5** Chi badxin Jesús con ree xbejnman zatiblad ro' nijsdoo guin, xdajn ree bën Gadara, <sup>2</sup> baguiajzti Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa, <sup>3</sup> guial nabanx ni. Achutczí rajc rixhii laax ni'qui con caden. <sup>4</sup> Zien volt ma guxhii reeman yaax në guia'x con caden, per rüjngajquix gan rurooxix laan. Achut rüjn laax gan. <sup>5</sup> Dxejz guiaal rizax niz dajn con lād ree baa, rbixdiajx rguuilguijdx laagajquix con guiaj. <sup>6</sup> Zijtri baguiaax Jesús, baxüünx bigchaaglojx laaman abi' bazuxibix lojman. <sup>7</sup> Zianz guneex rejs rëbix:

—¿Xhie rënl con naj Jesús, Xi'n Dios yu' xanyabaa? Rniaaban lojl ad gusagzil naj.

<sup>8</sup> Rëbix zian, guial cayëb Jesús lojx:

—¡Xindxab, barii luxdoo xin guin!

<sup>9</sup> Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

<sup>10</sup> Abi' rëbix lojman chitëë guixhiaalaman xindxab guin ree lood ren.

<sup>11</sup> Abi' gajxh yagaj riga' zien ree cüch cayaw reeb. <sup>12</sup> Zianz rëb ree xindxab guin loj Jesús:

—Guxhaal dunujn lod za' ree cüch guin din yadxu'n lën reeb.

<sup>13</sup> Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb. <sup>14</sup> Guiáad ree bën cayajp laa reeb, baxüün reeman bicojn reeman luguiedx në ree dajn abi' zien ree bejn wej biquiaa ni goc. <sup>15</sup> Chi bidxin reeman lod za' Jesús, baguiaa reeman xin barii xindxab guin ree luxdoo, zojbix najcw xabix, ma badëdguienx. Abi' bidxeb reeman. <sup>16</sup> Guiáad ree bën baguiaa gra ni goc con xin guin, në con ree cüch guin, be reeman diidx loj ree bën bidxin.

<sup>17</sup> Dxel guzuloj rëb reeman loj Jesús din yazaman niz ladx reeman.

<sup>18</sup> Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman. <sup>19</sup> Per ad cwëjbt Jesús, rëbaman:

—Baguiaj lidxil, bignaj xfamilil, biguie diidx loj reeman gra ni ma been Dios por lüj, xhie tëë naag bayaman lüj.

<sup>20</sup> Dxel ziax, guzuloj rëbix loj ree bën zojb niz Decápolis gra ni been Dios por laax, abi' graczi reeman badxaloj.

### **Rayajc xi'n Jairo në béngunaa bagaal xab Jesús**

(Mt. 9:18-26; Lc. 8:40-56)

<sup>21</sup> Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman. <sup>22</sup> Dxel bidxin tijb bën rniabee lën tijb xyadoo ree bën Israel, laman Jairo. Chi baguiaa-

man Jesús, bazuxibaman lojman, <sup>23</sup> abi' guzajcaman laaman liaadx, rëbaman:

—Ma cayëjt da xi'n'an. Yo'sii din gudxiib yaal guijquim din yayajquim din guibanm.

<sup>24</sup> Zinët Jesús bën guin, dád zien bejn zinal laaman xt rixa't reeman laaman.

<sup>25</sup> Loj graczi reeman no'ch tijb béngunaa, ma gojc chiptio'p izj ragxuuman ryajbaman rejn. <sup>26</sup> Dád ma guzagdiajman, ma banijt graczi ni rajpaman guial wejman loj ree doctor, per ad bayajc-taman, aal mazri zro' rajcaman. <sup>27</sup> Chi biguiejnman gra ni rüjn Jesús, gudëdaman lad ree bën guin, gubigaman niz xijchaman dxel bagaalaman xabaman.

<sup>28</sup> Guial gunaladxaman: “Gugalzan xabaman, ma bayajc gajcan.” <sup>29</sup> Loj hor zii gajc gulëjz biajbaman rejn, abi' gogbeeman ma bayajcaman. <sup>30</sup> Laa gogbee gajc Jesús guial yu' chu ma bayajc por xguialrniabeeman, abi' badxi' lojman loj ree bën guin dxel gunabdiidxaman, rëbaman:

—¿Chu baqui' da xaban?

<sup>31</sup> Abi' rëb ree xbejnman lojman:

—Awa ruguiaal xt rixa't reeman lüj guíáad lüj rniabdiidxil chu baqui' xabil. <sup>32</sup> Per Jesús ruguiaaman gra lad din guguiaaman chu baqui' laaman.

<sup>33</sup> Abi' guidib rnij béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman. <sup>34</sup> Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdxë. Ma bayajquil guialguijdx ni goquil.

<sup>35</sup> Sta canee Jesús zian, chi bidxin ree bën guza lidx Jairo, rëb reeman loj Jairo:

—Ma güjt xi'n'l. Ad ruslenril mextr guin mazri.

<sup>36</sup> Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

<sup>37</sup> Ad cwějbt Jesús ninal gra ree b́en riga' laaman, Bédzi, con Jacob, con Waj bijch Jacob. <sup>38</sup> Chi bidxin reeman lidxaman, baguiaa Jesús cayajc naquie' guial roon rbixdiaj reeman. <sup>39</sup> Dxel guyuman lénü abi' rēbaman loj reeman:

—¿Chexc zeel roon rbixdiajdi? Ad güjtjtim, naga'yějsim.

<sup>40</sup> Per baze' reeman laaman. Dxel gunabeeman barii gra reeman, zianz binēman xdadim con xniaam con ree b́en zinēman, lod naga' bindo guin. <sup>41</sup> Dxel gunaazaman yaam rēbaman:

—Talita, cumi —Rēn guiēban: Lūj rnin, bindoo, bixche.

<sup>42</sup> Loj hor ziigajc bixchem guzuloj cazam. Yu'm chiptio'p ijz. Abi' dád badxa loj ree b́en riga'. <sup>43</sup> Per gunabee Jesús laa reeman chitēē chu loj guiēb reeman ni goc, gunabee tēēman gudēēd reeman ni gawim.

### Radxin Jesús Nazaret

(Mt. 13:53-58; Lc. 4:16-30)

**6** Baza Jesús yagaj, badxin ladxaman con ree xbejnman. <sup>2</sup> Chi bidxin dxej raziiladx ree bejn, guzuloj culüüman bejn ree lēn yadoo. Abi' gra ree b́en cucaagdiajg dád badxa loj reeman ni rnieeman, abi' rēb reeman:

—¿Ban basiid b́en guin gra ni rnieeman? ¿Ban gulēēman guialrignia' guin abi' chu badēē guialrniabee zeel rüjnman milagr guin ree?

<sup>3</sup> ¿Nid laaman naj b́en carpinter ya, xi'n Li abi' ree bijchaman naj Jacob, Xiēb, Judas, nē Simón? Guíaad ree bizanman zojb luguiedx guie.

Abi' ad bidxga't reeman Jesús. <sup>4</sup> Per rēbaman loj reeman:

—Guidibczi rajp reeman respejt tijb b́en rudēē xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

<sup>5</sup> Ad bile't nüjn Jesús zien ree milagr yagaj. Bēlzi ree b́enragxuu bayüjnman, badxiib yaaman guijc reeman. <sup>6</sup> Dád badxalojman guial ad bililadxt reeman laaman. Dxel zēman guiedx naj ree gajxh, ziglüüman bejn ree.

### Rxhiaal Jesús guidxiptio'p ree xbejnman chiglüü reeman xtiidx Dios

(Mt. 10:5-15; Lc. 9:1-6)

<sup>7</sup> Dxel gurejdx Jesús guidxiptio'p ree xbejnman, abi' guxhaalaman tio'p gaj reeman. Badēēman guialrniabee loj reeman din yabēē reeman xindxab ree luxdoo ree bejn. <sup>8</sup> Dxel gunabeeman din achetczi chinē reeman par runejz, ni'qui guijxh, ni'qui guialraw, ni'qui milia, tijbzi yagriiadx reeman, <sup>9</sup> con xgurēch reeman, con tijbzi lajd najcw reeman. <sup>10</sup> Dxel rēbaman loj reeman:

—Yu lod guidxindi, tijbzi yagaj yaya'ndi xt guidxin dxej yazadi luguiedx guin. <sup>11</sup> Bal yu' guiedx lod ad rēnt reeman lējt o ad rēnt reeman gucaagdiajg reeman ni rnieedi, gol barii yagaj, gol gudxijp guxyuj guia'di zi'c sen guial ad rēnt reeman guzoob reeman diidx. Din naj rni lojdi, guial dxej ni yadēēd ree bejn cwent loj Dios mazri casti narooob yayal reeman guial loj ree b́en Sodoma nē Gomorra.

<sup>12</sup> Zianz brii reeman zigüiedx reeman loj ree bejn guial rayal yayüjn reeman xgab por xtol reeman. <sup>13</sup> Abi' rabēē reeman zien ree xindxab luxdoo ree bejn, zien tēē ree b́enragxuu gudēēb reeman sejt, abi' bayüjn reeman laa reeman.

### Güjt Waj b́en baroobnijs bejn ree

(Mt. 14:1-12; Lc. 9:7-9)

<sup>14</sup> Chi biguiejn rey Herodes ni rüjn Jesús guial ruza't ree bejn laaman guidibczi, rēb reeman:

—Waj, b́en baroobnijs bejn ree ma baban, zeel rajpaman guialrniabee rüjnman milagr ree.

<sup>15</sup> Per yu' reeman rëb:

—Elíasan, bën rudëë xtiidx Dios loj ree bejn.

Yu'za reeman rëb:

—Tijb bën rudëë xtiidx Dios loj ree bejn lasa' ree bën gocli.

<sup>16</sup> Chi biguiejn Herodes rëb reeman zian, rëbaman:

—Wajna, xin gunabeen biru' yëjn, laaxan ma baban yan.

<sup>17</sup> Rëb Herodes guin zian din laagajcaman gunabee gunaaz reeman Waj, abi' badxe'man laaman ladxguiib por Herodías. Herodías naj xbéngunaa Filip bijch Herodes. Per Herodes cwa'man Herodías. <sup>18</sup> Abi' guial rëb Waj loj Herodes:

—Ad laat tia' xbéngunaa bijchil.

<sup>19</sup> Zeel bidxe'ch Herodías Waj, guyëman nugüjtaman laaman. Per ad riletan, <sup>20</sup> din rdxeb Herodes guial ragbeeman rüjn Waj ni rën Dios, rüjn tëëman zi'c rayal, zeel ad cwëjbtaman xhie nüjnnë Herodías Waj. Majsi ad ragbeet Herodes xhie güünman por ni rëb Waj lojman, per ruladxaman gucaagdiajgaman ni rnieeman.

<sup>21</sup> Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bën rniabee ree në par ree bën rniabee ree suldad nëtëë ree bën zojbloj niz Galilea. <sup>22</sup> Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojm:

—Gunab ni rëntzil, naj gune laan.

<sup>23</sup> Xt badëë xtiidxaman gudëëman ni guiniabtzim, majsi garol ni rajpaman. <sup>24</sup> Dxel bariim bignabdiidx loj xniaam, rëbim:

—¿Xhie ganaaban?

Badxi'man laan rëbaman:

—Gunab guijc Waj bën ruuroobnijs bejn ree.

<sup>25</sup> Laa bayugajquim lod za' rey Herodes, rëbim lojman:

—Yan gajc rënan guneel guijc Waj, bën ruuroobnijs bejn ree, guneelan loj tijb pliajt.

<sup>26</sup> Dád guyu naya Herodes, per mal badëëd xtiidxaman guidib loj ree bën riga', zeel ad bile't nibexuuman nudëëman ni gunabim. <sup>27</sup> Dxel gunabee Herodes tijb suldad din chica'x guijc Waj. <sup>28</sup> Zianz wej suldad guin lën ladxguiib guin, gutü'x guijc Waj badxe'xan loj pliajt binëxan lojm. Dxel bayü loj xniaamin.

<sup>29</sup> Chi gogbee ree xbejn Waj guial ma güjtaman, baca' reeman xcuerpaman persi biquie'ch reeman laaman.

### Ruyaan Jesús gaay mil bejn

(Mt. 14:13-21; Lc. 9:10-17; Jn.6 :1-14)

<sup>30</sup> Chi bayejc ree xi apóstoles Jesús, be reeman diidx lojman gra ni been reeman në ni balüü reeman. <sup>31</sup> Dxel rëb Jesús loj reeman:

—Gol guda, yo' dunujz ree niz lod achut bejn zojib din yaziiladx ree ta'n.

Rëbaman zian guial dád zien ree bën zia zien tëë ree bën zëëd, xt ni'qui guial gaw reeman ad riletan.

<sup>32</sup> Dxel Jesús con ree bën naj ree apóstoles zë reeman loj barcw tijb luar lod achut zojib. <sup>33</sup> Per dád zien ree bejn baguiaa guial zë reeman, abi' bayünbee reeman laa reeman zeel zien ree bejn bria luguedx guin ree ruxüün reeman, abi' yalohl laa reeman bidxin lod zë Jesús con ree xbejnman.

<sup>34</sup> Chi baguiajt Jesús loj barcw guin, baguiaaman bën guixiuj riga' yagaj, abi' bayaman laa reeman guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman. <sup>35</sup> Chi ma gudxe, gubig ree xbejnman, rëb reeman lojman:

—Ma gudxe yan, abi' achut bejn zojib niz guie. <sup>36</sup> Güjdx loj ree bën guin din

che reeman ranch ree në ree guiedx ni riga' gajxh chisii xhienin gaw reeman.

<sup>37</sup> Per rëb Jesús loj reeman:

—Lëjt gol badëéd ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bën guin, zi'ct ni rüjn bejn gan loj tio'p gayuu dxej.

<sup>38</sup> Abi' rëb Jesús loj reeman:

—¿Bël guiadxtil ca'di? Gol baguiaa don.

Chi baguiaa reeman, dxel rëb reeman:

—Gaay guiadxtil con zatio'p bëjl.

<sup>39</sup> Dxel gunabeeman din cwe tbcwaa gaj reeman loj guixya'. <sup>40</sup> Zianz gurej reeman zian, yu' lod gure tibgayuu reeman, yu' lod gure tü'pchii reeman.

<sup>41</sup> Abi' cwa' Jesús guigaay guiadxtil guin con grop bëjl guin. Dxel gules lojman xanyabaa, badëëman quixtëë loj Dios, gula'man guiadxtil guin badëëman loj ree xbejnman persi gudi's reeman laan loj ree bën riga', gudi's tëëman grop bëjl guin loj gra reeman. <sup>42</sup> Graczi reeman gudaw xt bigdxinladx reeman, <sup>43</sup> abi' staczi bacha reeman chiptio'p dxüm guiadxtil laay con bëjl ni baya'n. <sup>44</sup> Loj ree bën gudaw no'ch cost gaay mil xinguaaw.

### Rza Jesús loj nijs

(Mt. 14:22-27; Jn. 6 :16-21)

<sup>45</sup> Dxel gunabee Jesús guyu ree xbejnman loj barcw din tédgaj reeman stiblad ro' nijs par guidxin reeman Bet-saida, la'tgaj cuzaadiidxnëman benzien guin ree. <sup>46</sup> Chi gulox bazaadiidxnëman laa reeman, wejman guijc tijb guia', persi gurejdx gunabaman Dios. <sup>47</sup> Chi ma cabej guiaal, ma yu' barcw guin galay nijs guiáad Jesús baya'n xtijbzaman guijc guia' guin. <sup>48</sup> Dxel baguiaaman dád cazagdiaj ree xbejnman cusa reeman barcw guin guial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, been-

man zi'c bën tédnejz. <sup>49</sup> Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman. <sup>50</sup> Dád cadxeb reeman por ni cugiaaa reeman. Per guneenë Jesús laa reeman rëbaman:

—|Gol bagu' luxdoodi, ad bal rdxe-bidi, najn!

<sup>51</sup> Dxel guyuman loj barcw guin, zianz gulëjz bi guin. Guiáad laa reeman dád badxa loj reeman, <sup>52</sup> din nayaaw xquiar-guiejn reeman, abi' ad bignia't reeman milagr ni beenman con guiadxtil guin ree.

### Rayüjn Jesús bënragxuu ree Genesaret

(Mt. 14:34-36)

<sup>53</sup> Chi ma gudëd reeman lojnijs guin bidxin reeman xdajn ree bën Genesaret, yagaj guxhii reeman barcw guin ro' nijs. <sup>54</sup> Naabzi baguiajt reeman loj barcw guin, laa bayünbee gajc ree bejn Jesús. <sup>55</sup> Abi' gutie'ch reeman diidx guidib niz yagaj. Dxel guzuloj zinë ree bejn bënragxuu ree lod riguejntzi reeman za' Jesús. <sup>56</sup> Bantëëz zëman, majsi guiedx narooob o guiedx dobëz o ranch ree, rguijxh reeman bënragxuu guin ree niz lod tédaman. Dxel rzajc reeman laaman li-aadx din tiëbaman gugaal reeman majsi guia'z xabaman. Abi' graczi ree bën bagaal xabaman bayajc.

### Ni rüjn persi rüjn bejn dol

(Mt. 15:1-20)

**7** Tijb dxej, tio'p choon ree bënfarisew con ree mextr rajc ley, bën guza ree Jerusalén, bibig reeman loj Jesús. <sup>2</sup> Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman. <sup>3</sup> (Din bënfarisew në gra ree bën Israel zinaldxi'ch reeman xcostumbr xbéngulal reeman guial ad zajct gaw reeman bal id reeman gunaa

zi'c naj costumbr guin. <sup>4</sup>Në chi raza ree-man lugua', ad rawt reeman bal id zunaan reeman zi'c naj costumbr guin. Dád zien ni zinal reeman güün reeman zi'c xhienaag quib reeman re, con vajs, con ree trast guib, në xloon reeman riguiib reeman.) <sup>5</sup>Zeel bénfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejnl zi'c naj xcostumbr dux béngulal ree? ¿Chexc zeel raw reeman zianzi?

<sup>6</sup>Dxel rëb Jesús loj reeman:

—¡Bén rusquiee!, waliqui ni gunee Isafas por lëjt, bén badëe xtiidx Dios loj ree bejn, chi bacaaman: Bén guie ree, rëbzi reeman guial rën da't reeman naj, per ad rënt reeman naj con guidib luxdoo reeman.

<sup>7</sup>Xlia'czi rën da't reeman naj, abi' ruluü reeman bejn ree ganaxzi ni rbëëgujic ree bénguidxliuj.

<sup>8</sup>Yan, rusa'ndi xtiidx Dios tiblax persi zinalidi xcostumbr ree bénguidxliuj.

<sup>9</sup>Rëb tëë Jesús loj reeman:

—Par chitëë nit xcostumbridi zeel rusa'ndi xtiidx Dios tiblax. <sup>10</sup>Rëb Moisejs: “Gojp respejt xdadil con xniaal”, abi' “Bén guzaal diidxmal gujic xdad o xniaa, rayal guiëtaman.” <sup>11</sup>Per lëjt rëbidi guial zile' guiëb bejn loj xDadaman o xniaaman: “Ad zajct günan lüj yudar, din gra ni ra'pan naj Corbán” (Corbán rën guiëb gran naj par Dios). <sup>12</sup>Rëbidi, bén guiëb zian, ad zile'tri güün xdad xniaaman yudar. <sup>13</sup>Abi' rbëëladxidi xtiidx Dios persi zinal xcostumbridi ni ruluü lasa'di, në zien ree ni ren rüjndi lasa' ree ni guin.

<sup>14</sup>Dxel gurejdx Jesús bén zien guin ree, rëbaman:

—Gol bacaagdiajg gradi gol bignia' tëë ni ganin: <sup>15</sup>Ad ni rawt bejn rüjn persi rüjnman dol. Ni ririi ro'man në ni rüjn-

man, laan rüjn persi rüjnman dol. <sup>16</sup>¡Bén rën gucaagdiajg, gol bacaagdiajg!

<sup>17</sup>Chi baza Jesús lod za' ree bén guin bayuman lënü, dxel gunabdiidx ree xbejnman xhie rën guiëb ni rëbaman.

<sup>18</sup>Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rüjn persi rüjnman dol, <sup>19</sup>din ni raw bejn ad rejtan luxdooan, rejn lënman, abi' rariin?

Zian basignia'man guial ad rüjnt bejn dol por ni rawzaman. <sup>20</sup>Rëbaman:

—Ni ririi ro' bejn në ni rüjnman, laan rüjn persi rüjnman dol. <sup>21</sup>Din gujic bejn zëëd graloj xgab mal, guial rüjn ni dxuudx, guialgubaan, guialrugüjt lasa', <sup>22</sup>guial rzunë béngunaa ren o xinguaaw ren, guialrzëëbladx xieen ben ren, guial rüjn ni mal, guialrusquiee, guialrajp vijs, guialnadëdloj, guialrbëë xtiidx bejn, guialrüjn benro', në guial rüjn ni ad rayalt. <sup>23</sup>Graczi ree ni guin zëëd gujic bejn, abi' laan rüjn persi rüjnman dol.

### Rayajc xi'n tijb Bén Sirofenicia

(Mt. 15:21-28)

<sup>24</sup>Chi baza Jesús niz yagaj, zëman niz Tiro në Sidón. Dxel guyuman tijb lënü guial ad guyëntaman niagbee ree bejn, per ad gojct nuquie'ch lojman. <sup>25</sup>Din gogbee gajc xniaa tijb bindoo yu' xindxab luxdoo. Abi' wej xniaam lod za' Jesús zianz bazuxibaman lojman. <sup>26</sup>Ad najtaman Bén Israel, najman Bén Sirofenicia. Dxel guzajcaman liaadx loj Jesús din yabëëman xindxab guin luxdoo bindoo guin. <sup>27</sup>Per rëb Jesús lojman:

—Badëëdxgaj mod gaw yaloj ree xindoo, din ad rayalt chiquied bejn guidahtil loj xi'nman din gudëëman laan gaw ree bé'cw.

<sup>28</sup>Badxi' Bén guinan rëbaman:



—Waliquil, Dad, per në ree bë'cw raw xguiadxtil laay reem ni ryajb xan mex.

<sup>29</sup>Dxel rëb Jesús:

—Laaqui guneel. Ma zajc yaguiajl, ma barii xinxab guin luxdoo xi'nl.

<sup>30</sup>Chi badxin lidx bën guin, baguiaaman laa bindo guin naga' loj loon, ma barii xinxab guin luxdoo.

### **Bayajc tijb bën nacwa't ad rniee tēetaman zagdx**

<sup>31</sup>Baza Jesús niz Tiro, gudēdaman niz Sidón, në loj ree guiedx riga' Decápolis abi' bidxinman ro'nijdsdoo Galilea.

<sup>32</sup>Ni bidxinnë reeman tijb xinguaaw nacwa'tix ad rajc tēet rnieex zagdx. Abi' rëb reeman loj Jesús din gudxiib yaaman guijquix. <sup>33</sup>Zianz binë Jesús laax tibladd, badxe' xbacwënman lën guidiajguix, abi' con xhiejnman bagaalaman lüdxix. <sup>34</sup>Dxel gules lojman xanyabaa, banajladxaman, rëbaman:

—¡E'fata! —rën guiëban: ¡Baxal!

<sup>35</sup>Loj hor zii gajc baxal ree guidiajg xin guin, baban lüdxix dxel guzuloj caneez zagdx. <sup>36</sup>Dxel gunabee Jesús laa reeman chitëe chu loj guiëb reeman ni goc. Per guial rëbaman zian, mazri rü reeman laan loj ree bejn. <sup>37</sup>Dád badxa loj reeman rëb reeman:

—Xi zagdx naj gra ree ni rüjnman, xt rüjnman persi riguejñ ree bën nacwa't, abi' ree bengoc rniee reeman.

### **Ruyaan Jesús tajp mil bejn**

(Mt. 15:32-39)

**8** Tijb dxex bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

<sup>2</sup>—Rayan bën guin ree din ma gojc choon dxex nadxu'në! reeman guie, abi' ad ca't ni gaw reeman. <sup>3</sup>Abi' bal yaxhalaan laa reeman lidx reeman sin guialraw, dool yadaj reeman lunejz, din yu' reeman zēed zijt.

<sup>4</sup>Dxel rëb ree xbejnman:

—Per, ¿ban guin yuca'n ni gaw ree bën guin, achutczzi bejn zojz niz guie?

<sup>5</sup>Dxel gunabdiidxaman loj reeman rëbaman:

—¿Bël guiadxtil ca'di?

Abi' rëb reeman:

—Gajdxan.

<sup>6</sup>Dxel gunabeeman gurej ree bën guin luyuj. Zianz cwa'man guigajdx guiadxtil guin, badëeman quixtëe loj Dios, abi' gula'man laa reen badëed loj ree xbejnman persi gudi's reeman laa reen loj gra ree bën guin. <sup>7</sup>Nëgajc tio'p choon ree bëjldoo ca' reeman, abi' badëeman quixtëe loj Dios dxel gunabeeman gudi's reeman në laa reeb loj ree bën guin. <sup>8</sup>Graczi reeman gudaw xt bigdxinladx reeman, abi' staczi bacha reeman gajdx dxüm guiadxtil laay në bëjl ni baya'n. <sup>9</sup>Bën gudaw ree naj reeman cost tajp mil. Chi gulox gudaw reeman, dxel bazaadiidxnë Jesús laa reeman. <sup>10</sup>Zianz guyuman loj barcw con ree xbejnman zë reeman niz Dalmanuta.

### **Rniab ree bënfarisew tijb milagr loj Jesús**

(Mt. 16:1-4; Lc. 12:54-56)

<sup>11</sup>Dxel bidxin ree bënfarisew, guzuloj cadildiidxnë reeman Jesús, abi' par güün reeman laaman prueb, gunab reeman güünman tijb milagr zi'c tijb sen guial por Dios zēedaman. <sup>12</sup>Dxel banajladd Jesús, rëbaman:

—¿Chexc zeel rëndi günan tijb milagr? Diidxli ganin, achetczzi milagr günan guguaadi.

<sup>13</sup>Dxel basa'nman laa reeman, bayuman loj barcw zatijb, zignë ree xbejnman stibladd ro' nijs guin.

### **Xlevadur ree bënfarisew**

(Mt. 16: 5-12)

<sup>14</sup>Bayanladx ree xbejn Jesús ninë reeman guialraw, tijbzzi guiadxtil ca' ree-

man loj barcw guin. <sup>15</sup> Abi' chi rëbaman loj reeman:

—Gol gojp cudad con xlevadur ree bënfarisew në xlevadur Herodes.

<sup>16</sup> Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

<sup>17</sup> Abi' gogbee Jesús ni canee reeman, zianz rëbaman:

—¿Chexc zeel rëbidi guial ad ca'tidi guiadxtil? ¿Staczi ad rignia'tidi ya? ¿Sta nayaaw xquiarguejndi ya? <sup>18</sup> Yu' guialojdi per rulüü ad ruguiaatidi, yu' guidiajguidi per rulüü ad riguejntidi. ¿Nid rusaaladxidi ya? <sup>19</sup> Chi gudi'san gaay guiadxtil loj gaay mil bejn, ¿bël dxüm ni laay bato'pidi?

Badxi' reeman laan rëb reeman:

—Chiptio'pan.

<sup>20</sup> Dxel rëbaman:

—Laadx chi gudi'san gajdx guiadxtil loj tajp mil bejn, ¿bël dxüm guidxa baca'di?

Badxi' reeman laan rëb reeman:

—Gajdxan.

<sup>21</sup> Dxel rëbaman:

—¿Staczi ad waygnia'tidi ya?

### **Rayüjn Jesús tijb bën ad ranit loj**

<sup>22</sup> Chi bidxin Jesús guiedx Betsaida con ree xbejnman. Binë ree bejn tijb bën ad ranit loj, rëb reeman loj Jesús din gugaalaman guialojman. <sup>23</sup> Dxel gunaaz Jesús yaaman gulëëman laaman luguiedx guin, abi' gudëëb xhiejnman guialojman, baqui'man guialojman. Zianz gunabdiidxaman rëbaman:

—¿Rajc ruguiaal ta'n ya?

<sup>24</sup> Dxel guzuloj cuguaaman, abi' rëbaman:

—Ruguian bejn ree, per rulüü naj reeman zi'c yag ni caza.

<sup>25</sup> Dxel bagaal Jesús guialojman stijb, abi' rëbaman lojman din guguaadxi-jchaman, dxel guzuloj cuguaaman zagdx, naynidxuj ma ruguaaman gra.

<sup>26</sup> Abi' baxhaal Jesús laaman lidxaman, rëbaman:

—Ad yayul luguiedx guin achu tëë loj guiëbil xhienaag bayajc lojl.

### **Rëb Bëd guial Jesús naj Cristo**

(Mt. 16:13-20; Lc. 9:18-21)

<sup>27</sup> Bazanë ree xbejn Jesús niz Galilea, wej reeman guiedx riga' ree Cesarea de Filipo. Chi zë reeman lunejz gunabdiidx Jesús loj ree xbejnman, rëbaman:

—¿Chu rëb ree bejn najn?

<sup>28</sup> Badxi' reeman laan rëb reeman:

—Yu' reeman rëb lüj naj Waj bën baroobnijs bejn ree, yu'za reeman rëb lüj naj Elías, yu' tëë reeman rëb lüj naj tijb ree bën badëëd xtiidx Dios loj ree bejn gocli.

<sup>29</sup> Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo.

<sup>30</sup> Per rëb Jesús loj reeman achu loj guiëb reeman zian.

### **Rugojn Jesús guiëtaman**

(Mt. 16:21-28; Lc. 9:22-27)

<sup>31</sup> Guzuloj Jesús rëb loj ree xbejnman: —Rayal sagdiaj da't Bën guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

<sup>32</sup> Zagdx basignia'man laa reeman. Dxel gulëëcaan Bëd laaman, rëbaman lojman chitëë rëbraman zian. <sup>33</sup> Per badxi' lojman baguiaa ree xbejnman, dxel gudilëman Bëd rëbaman:

—¿Bisüd lon, Satanás!, din ad por Diost zëëd ree xgab ni rüjnl, rüjnl zi'c naj xixgab bénguidxliuj.

<sup>34</sup> Dxel gurejdx ree xbejn Jesús con ree bën riga' yagaj, abi' rëbaman loj reeman:

—Bal chu rën gac da bejnan, ad rayalt güünman zi'c naj xixgabaman. Si-ibnejzaman gualzi ni tëdzaman abi'

guidnalaman naj. <sup>35</sup>Din bën mazri rën guialnaban ni rajpaman loj guidxliuj guie, zadxin dxej gusëëbaman laan, per bën guiët por naj në por da diidxan, zajpaman guialnaban tiblyaa con Dios. <sup>36</sup>¿Xhie gan güün bejn gapaman gra ni yu' loj guidxliuj bal canijtaman loj Dios? <sup>37</sup>Din ad zile't sii bejn xguialnabanman xanyabaa. <sup>38</sup>Din bën yatunë naj në da diidxan niz loj ree bëndol bën ad zinalt ree xnejz Dios, bën riga' ree yan, ziangajc naj, najn Bén guxhaal Dios, yatunë'n laaman chi guialan con xguialrniabee da Dadan con ree xianjlaman.

**9** Rëb tëë Jesús loj reeman:  
—Diidxliczi ganin, yu' ree bën za' guie, ad zëjtt xt guguaa reeman gui't xguialrniabee Dios.

### **Bidxaa Jesús loj choon ree xbejnman**

(Mt. 17:1-13; Lc. 9:28-36)

<sup>2</sup>Chi goc xho'p dxej, wej Jesús tijb ruguia'ya, binëman Bëd, Jacob con Waj. Yagaj bidxaa Jesús niz loj reeman. <sup>3</sup>Balaa xabaman bacha', gojcan naquich-bëj, achutczu rguiib lajd zian loj guidxliuj guie. <sup>4</sup>Dxel baguiaa reeman Elías në Moisejs cayünë reeman Jesús diidx. <sup>5</sup>Abi' rëb Bëd lojman:

—Mextr, ¡zagdxen nadxu'n guie! Yaguieenan choon ranch, tijban par lüj, tijban par Moisejs, zatijban par Elías.

<sup>6</sup>Per ad ragbeet Bëd xhienin canee-man guial dád bidxeb reeman. <sup>7</sup>Loj hor guin biguiajt tijb zaj beenan bala guijc reeman, abi' loj zaj guin biguien cha' bejn rëbaman:

—Bën guie naj da Xi'nán, bën rën da'-tan, gol bazoob xtiidxaman.

<sup>8</sup>Abi' chi baguiaa reeman gadëd lod za' reeman achutri za'në Jesús, tijbzi laaman za' yagaj. <sup>9</sup>La'tgaj cayguiajt reeman ruguia' guin, rëb Jesús loj reeman chitëë chu loj guiëb reeman ni baguiaa reeman, xt yaban Bén guxhaal Dios. <sup>10</sup>Abi' laaz reeman ragbee ni baguiaa reeman,

rniabdiidx tëë loj lasa' reeman xhie rën guiëb guial yabanman loj ree bengüt. <sup>11</sup>Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaloj Elías gui't?

<sup>12</sup>Badxi'man laan rëbaman:

—Walican yaloj Elías gui't, laaman guzuxnejz gra. Per, ¿chexc zeel ca loj xtiidx Dios guial Bén guxhaal Dios sagdiaj da'taman ad zën tëët reeman laaman? <sup>13</sup>Naj rni lojdi guial mal bi't Elías, abi' beennë reeman laaman ni guyëntzi reeman zi'c ca loj xtiidx Dios ni rayal sacaman.

### **Rayüjn Jesús tijb xin yu' xindxab luxdoo**

(Mt. 17:14-21; Lc. 9:37-43)

<sup>14</sup>Chi badxin Jesús lod za' sta'n ree xbejnman, baguiaaman dád zien bejn riga', në ree mextr rajc ley za' yagaj cadildiidx reeman con ree xbejnman. <sup>15</sup>Chi baguiaa reeman zëëd Jesús, dád badxa loj reeman abi' baxüün reeman bicajpdioz reeman laaman. <sup>16</sup>Dxel gunabdiidxaman loj reeman rëbaman:

—¿Chexc zeel cadildiidxidi?

<sup>17</sup>Abi' rëb tijb bën za' yagaj:

—Mextr, zidnë' da xi'nán lojl guial yu' xindxab luxdoox abi' nusa'nx laax gop. <sup>18</sup>Bantëëz guin za'x, chi ru xindxab guin luxdoox rureeyujx laax, abi' rbëëx bichijn ro'x, raw tëë ree layix, dxel ratiaguix. Ma gunaaban loj ree xbejn din nabëë reeman xindxab guin, per ad gojct reeman.

<sup>19</sup>Zeel rëb Jesús:

—¡Bën ad rliladxt! ¿Xt goc gazunë'n lëjt gadaan tëën lëjt? Gol tanë xinzii guie.

<sup>20</sup>Dxel binë reeman laax lojman. Per chi baguiaa xindxab guin laaman, laa bagüjtya'gajquix xin guin, bareeyujx laax abi' rbixtjüpix ririi tëë bichijn

ro'x. <sup>21</sup> Dxel gunabdiidx Jesús loj xdadix rëbaman:

—¿Goc guzuloj rajquix zian?

Badxi'man laan rëbaman:

—Diisd xindobëzix. <sup>22</sup> Dád zien volt ruzaalix laax loj guij në loj nijs din guiëtix. Zeel bal zajc güünl xhienin por dunujn, gognë dunujn, baya dunujn.

<sup>23</sup> Dxel rëb Jesús lojman:

—¿Chexc zeel nal, “bal zajcan”? Graczan zajc bal chu riladx naj.

<sup>24</sup> Dxel gurixdiaj xdadix rëbaman:

—¿Riladxan lüj, gognë naj din chililadxan mazri!

<sup>25</sup> Chi baguiaa Jesús cado'p zien bejn dxel gudilëman xinxab yu' luxdoo xin guin, rëbaman:

—Xinxab gop nacwa't tëtë, rniabeen lüj din yarii luxdoo xin guin. Ad bal yayejcril luxdoo zatijb.

<sup>26</sup> Dxel gurixdiaj xinxab guin, abi' bagüjtya'x laax zatijb abi' bariix luxdoo, basa'nx laax zi'c xingüt zeel rëb ree bejn guial ma güjtix. <sup>27</sup> Per gunaaz Jesús yaax gulesaman laax, dxel guzulix.

<sup>28</sup> Dxel bayu Jesús lënu con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalëen xinxab guin luxdoo xin guin?

<sup>29</sup> Badxi' Jesúsán rëbaman:

—Par yarii lasa' ree xinxab guin, rayal cwedx guiniabidi Dios guiba'n tëtëdi.

### Rugojn Jesús zatijb guial guiëtaman

(Mt. 17:22-23; Lc. 9:43-45)

<sup>30</sup> Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj, <sup>31</sup> guial culüü ree xbejnman, rëbaman:

—Yayü reeman Bén guxhaal Dios loj ree bën gugüjt laaman, per ni gac choon dxej yabanman.

<sup>32</sup> Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

### ¿Chu mazri zobjloj?

(Mt. 18:1-5; Lc. 9:46-48)

<sup>33</sup> Dxel badxin Jesús Capernaum con ree xbejnman, abi' badxin reeman yu' lod zobj reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

<sup>34</sup> Per achet rëb reeman guial cadildiidx reeman lunejz chu reeman mazri zobjloj. <sup>35</sup> Dxel gurej Jesús, gurejdxaman guidxiptio'p reeman, rëbaman:

—Bal chu bën rën gac mazri bën zobjloj lojdi, rayal güün laagajcaman zi'c tijb bën ad zobjlojt güün tëtëman sirv loj gradi.

<sup>36</sup> Dxel cwa'man tijb xindoo, bazuman laax galay reeman, zianz gudiidxaman laax, rëbaman:

<sup>37</sup> —Bën ridxga' tijb xindoo por naj, najn ridxga'man, guiáad bën ridxga' naj, bën guxhaal najn ridxga'man.

### Bén ad za't contr dunuj ree za'man con dunuj ree

(Lc. 9:49-50; Mt. 10 :42)

<sup>38</sup> Rëb Waj loj Jesús:

—Mextr, baguiaan tijb bejn rabëëman xinxab luxdoo ree bejn por xguialrniabeel. Per badxoonan guial ad najtaman dux bejn ree.

<sup>39</sup> Badxi' Jesúsán rëbaman:

—Ad rudxoondi, din bën rüjn milagr por da guialrniabeen, ad zile't guinieeguijdxaman naj. <sup>40</sup> Bén ad za't contr dunuj ree, za'man con dunuj ree.

<sup>41</sup> Chutëëz bën gunee majsi tibxijgzi nijs lojdi guial najdi xbejn Cristo, diidxli rmin guial ziangajc yu' ni gudëd Dios lojman.

### Bén ruzaalguiiw bejn din güünman dol

(Mt. 18:6-9; Lc. 17:1-2)

<sup>42</sup> Chutëez bén guzaalguiiw tijb bén qui rliladxri naj din güünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo. <sup>43</sup> Bal laagajc yaal rusajb lüj loj dol, zagdxeli gutü'n. Mazri zagdxe chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü', <sup>44</sup> lod ad rëjtt ree bizog lod ad rayü' tëët bajl. <sup>45</sup> Abi' bal laagajc guia'l rusajb lüj loj dol, zagdxeli gutü'n. Mazri zagdxe chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü', <sup>46</sup> lod ad rëjtt ree bizog lod ad rayü' tëët bajl. <sup>47</sup> Bal laagajc guialojl rusajb lüj loj dol, zagdxeli gulëen. Mazri zagdxe chu' con tiblodzi guialojl xanyabaa guial che con groplad guialojl gabijl lod yu' bajl ni ad yu't dxej yayü', <sup>48</sup> lod ad rëjtt ree bizog lod ad rayü' tëët bajl.

<sup>49</sup> Zi'c ru zëd guiyc guialraw, ziangajc ree bén rliladx naj sagdiaj reeman din gac reeman naya.

<sup>50</sup> Ni zagdxe naj zëd, per bal id zajcran naxij, ¿xhieza naag yayajcan naxij zatijb? Gol been zi'c rayal chitëë saquidi zi'c zëd ni ad rüjnt sirv, gol gubajnnë tëë lasa'di zagdxe.

### Rulüü Jesús xcwent guial rala' lasa'

(Mt. 19:1-12; Lc. 16:18)

**10** Chi baza Jesús Capernaum, dxel wejman niz Judea në stiblad ro' guiiw Jordán. Abi' lod za'man bido'p ree bejn zatijb, dxel guzuloj culüüman laa reeman zi'c goc xcostumbraman. <sup>2</sup> Yu' ree bënfarisew gubig lod za'man. Abi' par güün reeman laaman prueb, gunabdiidx reeman lojman rëb reeman:

—¿Zajc yala' xinguaaw lacheelix ya?

<sup>3</sup> Badxi'man laan rëbaman:

—¿Xhie gunabee Moisejs güündi?

<sup>4</sup> Abi' rëb reeman:

—Cwëjb Moisejs yala' xinguaaw lacheelix, per gudëédix gui'ch tia'man guial ma bala' reex.

<sup>5</sup> Dxel rëb Jesús:

—Rëb Moisejs gac zian guial nadidi.

<sup>6</sup> Per guia'xchej chi gule'cchaaw Dios guidxliuj, “beenman xinguaaw con bën-gunaa”. <sup>7</sup> “Zeel xinguaaw gusa'n xdad xniaax din guibannë lacheelix, <sup>8</sup> dxel grop reex ma gac zi'c tijbzi bejn.” Zianan zeel ad najtri reex tio'p, ma naj reex tijbzi. <sup>9</sup> Zeel, bénguidxliuj ad rayalt yala'man lasa' ni ma bachajg Dios.

<sup>10</sup> Chi bayu reeman lënü, gunabdiidx ree xbejnman lojman zatijb, xcwent ni guneeman. <sup>11</sup> Abi' rëbaman loj reeman:

—Xin rala' lacheel, abi' rtia'x ben ren dolan cayüjnx, <sup>12</sup> ziangajc bal tijb bën-gunaa yala' lacheelaman abi' tia' xin ren laaman, dolan cayüjman.

### Rüjnle' Jesús xindoo ree

(Mt. 19:13-15; Lc. 18:15-17)

<sup>13</sup> Binë ree bejn xindoo ree lod za' Jesús din gudxiib yaaman guiyc reex. Per ree xbejnman guzuloj cadilë reeman bén binë ree laa reex. <sup>14</sup> Chi baguiaa Jesús zian, balenman zeel rëbaman:

—Gol badëëd mod gui't reex lon, ad bal rudxoondi. Din lod rniabee Dios naj par ree bén naj zi'c laa reex. <sup>15</sup> Diidxliczi rnin, bén ad rliladxt xguialrniabee Dios zi'c tijb xindoo, ad zile't chu'man lod rniabee Dios.

<sup>16</sup> Dxel gudiidx Jesús laa reex, badxiib yaaman guiyc reex, beenle'man laa reex.

### Xcwent tijb xinrijcw

(Mt. 19:16-30; Lc. 18:18-30)

<sup>17</sup> Chi ma gusnuu xnejz Jesús, ruxüün tijb xinguaaw bidxinx abi' bazuxibix lojman, dxel gunabdiidx rëbix:

—Mextr za'c, ¿xhie rayal günan din ga'pan guialnaban tiblyaa con Dios?

<sup>18</sup> Badxi' Jesús laan rëbaman:

—¿Chexc zeel nal lon benza'c? Achut naj benza'c, tijbzi Dios. <sup>19</sup>Lüj rajc ree mandamient, “Ad gugüjtil bejn, ad sunël bêngunaa ren, ad cwanl, ad cwëel xtiidx bejn ad gasquiee tëël, gojp respejt xdad xniaal.”

<sup>20</sup> Dxel rëbix loj Jesús:

—Mextr, gra ree ni guin cayünan diizd xindoon.

<sup>21</sup> Baguiaa Jesús lojx, bayaman laax, rëbaman:

—Per yu' zatijb ni riaadx güünl: big-to' gra ni rajpil, badëed milia guin loj ree bënprob, zian gapil guialnaza'c xanyabaa dxel guidnalil naj majsi xhi-tëëz saquil.

<sup>22</sup> Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

<sup>23</sup> Dxel baguiaa Jesús loj gra reeman, abi' rëbaman loj ree xbejnman:

—¡Dád nawëëg naj chu' benrijcw loj xguialrniabee Dios!

<sup>24</sup> Dád badxa loj ree xbejnman ni rëbaman. Per rëbaman loj reeman zatijb:

—Xi'n, ¡bén yu'guijc mazri ni rajpaman, dád nawëëg naj chu'man loj xguialrniabee Dios! <sup>25</sup> Adli nawëëgt téd tijb camell xan gagux guial chu' tijb benrijcw loj xguialrniabee Dios.

<sup>26</sup> Chi biguien reeman diidx guin ree, mazri badxa loj reeman, dxel rniabddiidx loj lasa' reeman, rëb reeman:

—¿Chu zajc laa loj xcasti Dios?

<sup>27</sup> Baguiaa Jesús loj reeman, abi' rëbaman:

—Par bejn nawëëgan, per par Dios ad nawëëgtan din par Dios graczan zile' gac.

<sup>28</sup> Dxel guzuloj rëb Bëd loj Jesús:

—Dunujn basa'nan graczi ni raya'pan persi zudnaalan lüj.

<sup>29</sup> Badxi' Jesúsán rëbaman:

—Diidxliczi ganin lëjt, chutëëz bën rusa'n lidx, o bijch, o bizan, o xdad xniaa, o lacheel o xi'n, o guidxliuj ree por naj në por xtiidxza'c Dios, <sup>30</sup> loj guidxliuj guie tia'man tibgayuu volt mazri guial loj ni basa'nman, bal najn lidxaman, bi-jchaman, bizanman, xniaaman, xi'nman, në xguidxliujman, majsi guidib wazag-diaj, abi' guidxin dxej gapaman guialnaban tiblyaa con Dios. <sup>31</sup> Per dád zien ree bën naj bën yaloj yan, gac reeman bën bigra, guiáad ree bën naj bën bigra yan, gac reeman bën yaloj.

### Rugojn Jesús zatijb guial guiëtaman

(Mt. 20:17-19; Lc. 18:31-34)

<sup>32</sup> Chi zë reeman Jerusalén, ned Jesús loj ree xbejnman, abi' dád radxaloj reeman guial zëman Jerusalén, guiáad ree bën nal laaman rdxeb reeman. Dxel gurejdx guidxiptio'p ree xbejnman lood ren, zianz guzuloj rëbaman ni sacraman:

<sup>33</sup> —Rëbaman loj reeman: Lëjt ragbee guial ziyo' ree Jerusalén, abi' naj najn Bén guxhaal Dios, yayü reeman naj loj ree bixhioz rniabee ree bixhioz, në loj ree mextr rajc ley. Abi' nabee reeman guiëtán, yayü tëë reeman naj loj ree bën ad najt bën Israel. <sup>34</sup> Guze' reeman naj, gucojpxhiejn reeman lon, quin reeman gugüjttëë reeman naj, per yayon dxej yabanan.

### Ni gunab ree Jacob con Waj

(Mt. 20:20-28)

<sup>35</sup> Dxel Jacob con Waj xi'n Zebedeo, gubig reeman loj Jesús rëb reeman:

—Mextr, rayënan güünl tijb favor ni yanaaban lojl.

<sup>36</sup> Abi' gunabdiidxaman rëbaman:

—¿Xhie rëndi günan?

<sup>37</sup> Badxi' reeman laan rëb reeman:

—Rayënan guial chi ma canabeel, yadxu'n cwë'l, tijb dunujn yadxu' xlad-beel, zatijb dunujn yadxu' xladruvejsil.

<sup>38</sup> Badxi'man laan rëbaman:

—Ni'quid ragbeetidi xhie ni guin rni-abidi. ¿Wen zajc sagdiajdi zi'c gazaagdi-ajjn ya? ¿Zajc guiëtidi zi'c guiëtan ya?

<sup>39</sup> Badxi' reeman laan rëb reeman:

—Zayajcan.

Dxel rëb Jesús:

—Waliquidi sagdiajdi zi'c naj guiët tëëdi o'c naj, <sup>40</sup> per guial cwedi da lad-been o da ladruvejsan, ad najt rayal gune laan, din ma najn par ree bën rayal laan.

<sup>41</sup> Chi biguien zachii xbejn Jesús ni rëb reeman, dád balen reeman Jacob con Waj, <sup>42</sup> per gurejdx Jesús laa reeman rëbaman:

—Lëjt ragbee guial ree bën rniabee loj guidxliuj guie, rniabee reeman bejn ree zi'ctzi rën reeman, guiáad ree bën zobjloj rüjnnë reeman bejn ree zi'ctzi rën reeman por guialrniabee ni rajp reeman. <sup>43</sup> Per con lëjt ad rayalt gac zian. Din bal chu rën gac bën rniabee lojdi, rayal güünman sirv lojdi, <sup>44</sup> guiáad bën rën gac bën zobjloj, rayal güünman sirv loj gradi zi'c bën nado'. <sup>45</sup> Din ni'qui naj najn Bén guxhaal Dios, ad zialtan loj guidxliuj par güün ree bejn sirv lon, zialan din güün laa reeman sirv, abi' con da guialnabanan gaguixan por xtol zien ree bénguidxliuj.

### Rayajc guialloj tijb xin ad ranit loj la Bartimeo

(Mt. 20:29-34; Lc. 18:35-43)

<sup>46</sup> Bidxin reeman guiedx Jericó, abi' chi ma cayrii Jesús luguiedx guin, con ree xbejnman në ree benzien. Tijb xin ad ranit loj lax Bartimeo, xi'n bën la Timeo, zobjix cwë' nejz rniabix carda.

<sup>47</sup> Chi biguiejnx cadëd Jesús bën Nazaret niz yagaj, guzuloj cabidxa'x rëbix:

—¡Jesús, xdiaa Davi, baya naj!

<sup>48</sup> Dád zien ree bejn ridilë laax din yacwëëz ro'x. Per mazri rejs rbidxa'x rëbix:

—¡Xdiaa Davi, baya naj!

<sup>49</sup> Dxel guzudxe Jesús rëbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, liuj caneeman.

<sup>50</sup> Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús. <sup>51</sup> Gunabdiidx Jesús lojx rëbaman:

—¿Xhie rënlon güünan por liuj?

Badxi'xan rëbix:

—Mextr, rënan yani lon.

<sup>52</sup> Dxel rëb Jesús:

—Ma zajc yaguiajl, ma bayajquil guial bililadxil naj.

Loj hor zii gajc bani lojx dxel zinalix Jesús niz yagaj.

### Ru Jesús Jerusalén

(Mt. 21:1-11; Lc. 19:28-40; Jn. 12:12-19)

**11** Chi ma zë reeman gajxh Jerusalén, niz lod riga' guiedx Betfagé con Betania, gajxh guia' la Olivos, dxel guxhaal Jesús tio'p ree xbejnman, <sup>2</sup> rëbaman:

—Gol chej guiedxdo riga' delant guin. Chi guidxindi guidxaaglojdi tijb burquie'n, caduub achut wabib laab. Gol guxhiequib gol tanëb. <sup>3</sup> Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

<sup>4</sup> Dxel wej reeman, bidxaagloj gajc reeman burdo guin, caduub runejz ro' tijb port, abi' guxhiec reeman laab.

<sup>5</sup> Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

<sup>6</sup> Badxi' reeman laan zi'c rëb Jesús, abi' cwëjb ree bën guin zinë reeman laab. <sup>7</sup> Bidxinnë reeman laab lojman, badxiib xab reeman xijchib, persi gudxibaman laab. <sup>8</sup> Zien ree bejn riguijxh xab niz lod rdëdaman, yu' tëë reeman rutüüg zijn persi rguijxh reeman laan niz lod rdëdaman.

<sup>9</sup>Abi' zi'c ree bën ned, nē ree bën nal  
rbixdiaj reeman, rēb reeman:

—¡Gagnēman dunuj ree yan! ¡Nagle'  
bën zēēd por Dios! <sup>10</sup>¡Nagle' bën zēēd  
nabee zi'c dux bēngulal ree rey Davi!  
¡Quixtēē dux Dad ree Dios Bēn yu'  
xanyabaa!

<sup>11</sup>Zian guyu Jesús Jerusalén abi'  
guyuman lēn yadooro' Jerusalén. Chi  
gulox baguiaaman graczi, dxel zinē  
guidxiptio'p ree xbejnman Betania guial  
ma gudxe.

### **Bazaal Jesús diidx guijc yag higo**

(Mt. 21:18-19)

<sup>12</sup>Chi bareguiaal, barii reeman Beta-  
nia. Dxel guzuloj calaan Jesús. <sup>13</sup>Zijtri  
baguiaaman tijb yag higo ca ree balag  
lojn. Abi' wejman biquiaaman bal ca  
higo lojn. Per achet bidxaaglojman, bal-  
agzi ree ca lojn din ad xtiamptanan.

<sup>14</sup>Dxel rēbaman loj yag higo guin:

—¡Ad yu'tri dxej gaw bejn ninejxh tia  
lojl!

Abi' biguiejn ree xbejnman ni  
rēbaman.

### **Rabēē Jesús bēn ruto' ree ro' yadooro' Jerusalén**

(Mt. 21:12-17; Lc. 19:45-48; Jn. 2:13-22)

<sup>15</sup>Chi bidxin reeman Jerusalén. Dxel  
guyu Jesús ro' yadooro' Jerusalén guin,  
abi' guzuloj caybēēman bēn cuto' ree nē  
ree bēn cazii. Barexguiataman xmex ree  
bēn ruchaa milia con xyagxhil ree bēn  
ruto' ree palom, <sup>16</sup>ad rtiējbtaman xhie  
chu'nē ree bejn ro' yadoo guin. <sup>17</sup>Abi'  
guzuloj culüüman laa reeman, rēbaman:

—Loj xtiidx Dios rēb: “Lidxan grii laj  
yu lod rbejdx rniab bejn Dios.” Per lējt  
nūjndan zi'c lidx ree xingubaa.

<sup>18</sup>Bixhioz rniabee ree bixhioz con ree  
mextr rajc ley, chi biguiejn reeman ni  
rēb Jesús, guzuloj raguiil reeman mod  
xhienaag gugüjt reeman Jesús, guial  
rdxeb reeman laaman din gra bejn radx-

aloj ni rulüüman. <sup>19</sup>Chi ma caxhin,  
bazanē ree xbejn Jesús Jerusalén.

### **Tijb yag higo ni gubidx**

(Mt. 21:20-22)

<sup>20</sup>Chi bareguiaal rsildo, badēd ree-  
man niz lod zojb yag higo guin, abi'  
baguiaa reeman ma gubidx diidx liujn.  
<sup>21</sup>Dxel basaaladx Bēd ni rēb Jesús, abi'  
rēbaman lojman:

—Mextr, ¡baguiaa yag higo ni bazaalil  
diidx guijc ma gubidxan!

<sup>22</sup>Badxi' Jesúsán rēbaman:

—Gol bililadx Dios. <sup>23</sup>Din diidxliczi  
ganin, bal chu guiēb loj guia' guin:  
“Bisüd guie biajb loj nijsdoo”, bal id  
yu' nawēēg luxdoooman, bal rililadxaman,  
gac ni guneeman. Zian gacan. <sup>24</sup>Zeel  
rnin lojdi, gra ni rniabidi loj Dios, gol  
bililadx guial ma cwa'di laan, abi' za-  
ca'dan. <sup>25</sup>Guiáad chi ribejdx rniabidi  
Dios, bal yu' bēn rdx'e'chidi, gol been-  
man perdon din ziangajc xDadidi bēn  
yu' xanyabaa güünman perdon xtolidi.  
<sup>26</sup>Din bal id zūjndi perdon, ziangajc  
xDadidi Bēn yu' xanyabaa ad zūjntaman  
perdon xtolidi.

### **Xguialrniabee Jesús**

(Mt. 21:23-27; Lc. 20:1-8)

<sup>27</sup>Chi badxin reeman Jerusalén. Chi  
caza Jesús niz lēn yadooro' Jerusalén  
guin, dxel gubig bixhioz rniabee ree bix-  
hioz con ree mextr rajc ley con ree xgux-  
tis ree bēn Israel, <sup>28</sup>gunabdiidx reeman  
loj Jesús, rēb reeman:

—¿Xhie guialrniabee rajpil zeel rūjnl  
ni guin ree? ¿Chu banee guialrniabee lojl  
güünl zian?

<sup>29</sup>Badxi' Jesúsán rēbaman:

—Ziangajc naj yu' ni ganabdiidxan lo-  
jdi, bal yadxi'dan dxel ganin chu ba-  
nee guialrniabee günan ni guin ree.  
<sup>30</sup>¿Chu guxhaal Waj bidgaroobnijsaman  
bejn ree? ¿Dios ya o bēnguidxliuj? Gol  
badxi'n.



<sup>31</sup> Dxel guzuloj rëb loj lasa' reeman:

—Bal yaguie'ch ree, Dios guxhaal laaman, zanaman: “¿Chexquiza zeel ad bililadxtidi laaman?” <sup>32</sup> Ad zajc tëët yaguie'ch ree, bénguidxliuj guxhaal laaman.

Rëb reeman zian guial rdxeb reeman bejn ree, din graczi reeman riladx guial gojc Waj tijb bën badëë xtiidx Dios loj ree bejn, bën wali gunee xtiidx Dios.

<sup>33</sup> Abi' badxi' reeman laan rëb reeman:

—Ad rayagbeetan.

Zeel rëb Jesús loj reeman:

—Ni'qui naj ad zanitan lojdi chu baneë guialrniabee günan ni guin ree.

### **Xcwent ree mojs guiidx**

(Mt. 21:33-46; Lc. 20:9-19)

**12** Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguini-aaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin.

<sup>1</sup> Zianz badëëman laan garol loj ree bën güün laan dxiin, briitaman zëman zijt.

<sup>2</sup> Chi bidxin dxej yala' reeman uv guin, guxhaal tijb xmojsaman din chigxiiman ni rayalaman. <sup>3</sup> Per ree bën rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi. <sup>4</sup> Dxel guxhaal bën naj xguidxliuj laan zatijb xmojsaman, per ziangajc, bacaaguij reeman laaman, gula' reeman guijsaman abi' guneeguijdx reeman laaman. <sup>5</sup> Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

<sup>6</sup> Dxel bën naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: “Zajp reeman da xi'n nan respejt.” <sup>7</sup> Per ree bën guin, rëb loj

lasa' reeman: “Xin guin naj xin yaya'nnë guidxliuj guin, yagüjt reex din gacan du xieen ree.” <sup>8</sup> Dxel gunaaz reeman laax, bagüjt reeman laax abi' babëë reeman laax loj guidxliuj guin.

<sup>9</sup> Dxel gunabdiidx Jesús loj ree bën caneenëman, rëbaman:

—Yan, ¿xhie naladxidi güün bën naj xguidxliuj laan? Zi'taman din gugüj-taman bën guin ree, dxel gudëëman guidxliuj guin loj ree ben ren.

<sup>10</sup> ¿Nid wayoolidi loj xtiidx Dios ya?, lod rëb:

Guiaj ni gulëëgo'n ree bën rüjn yu, laan goc ni mazri been sirv gojcnë yu guin.

<sup>11</sup> Zian been dux Dad ree Dios, zeel radxaduloj ree.

<sup>12</sup> Chi biguiejn ree bën rniabee guin ni gunee Jesús, guyën reeman niniaaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

### **Xcwent Impuest**

(Mt. 22:15-22; Lc. 20:20-26)

<sup>13</sup> Guxhaal reeman tio'p choon ree bënfarisew në tio'p choon ree xbejn Herodes lod za' Jesús, din yaguuil reeman mod guinee Jesús diidx ni gudxiib reeman guijs din gac cwe'c reeman xguialquiaman. <sup>14</sup> Abi' rëb reeman:

—Mextr, dunujn rayagbee guial lüj rniece diidxli ad ridxga' tëëtil chu naj bejn. Din par lüj tiblojzi naj bejn, abi' walil rülüül guial xhienaag rën Dios guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxtan? ¿Zadijxanan ya o ad zadijxtanan?

<sup>15</sup> Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

<sup>16</sup> Dxel badëed reeman cintabl guin lojman, abi' rëbaman:

—¿Chu loj ca lojn, chu tëë laj ca lojn?

Badxi' reeman laan rëb reeman:

—Loj César ca lojn në lajman.

<sup>17</sup> Dxel rëb Jesús loj reeman:

—Gol badëecliza loj César ni naj xieen César, guiáad loj Dios gol badëed ni naj xieen Dios.

Dád badxa loj reeman ni rëbaman.

### **Xcwent guial yaban ree bengüt**

(Mt. 22:23-33; Lc. 20:27-40)

<sup>18</sup> Tio'p choon ree bénsaducew bignaj Jesús, laa reeman ad riladxt guial yaban ree bengüt. Zeel gunabdiidx reeman loj Jesús rëb reeman:

<sup>19</sup> —Mextr, loj xley Moisejs rëb guial bal guiët tijb xinguiiaaw abi' achut xi'nx guyu con lacheelix, bijch xin güt guin guxhliaanë béngunaa bizëjb guin din chu' xi'n reex zi'c gulüü xi'n xingüt guinan. <sup>20</sup> Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix. <sup>21</sup> Dxel bijch barojpix baxhliaanë béngunaa guin, per güjt gajquix, ad guyu gajct xi'n reex. Abi' ziangajc guzajc xin bayon guin, <sup>22</sup> abi' zianz baxhliaanë-man guigajdx reex, zianz bara reex güjt achut xi'n reex guyu con laaman. Ni bigra tëë në béngunaa guin güjt. <sup>23</sup> Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhliaanë laaman?

<sup>24</sup> Badxi' Jesúsán rëbaman:

—Ad laat naj xgab rüjndi guial ad nünbeetidi xtiidx Dios ad ragbee tëëtidi xhienaag naj xguialrniabeeman. <sup>25</sup> Din chi yaban ree bengüt, ad zuxhliatri reeman, ad zudëë tëëtri xi'n reeman guxhliaa, ma gac reeman zi'c ree anjl yu' xanyabaa. <sup>26</sup> Abi' xcwent ni yaban ree bengüt, ¿nid wayoolidi loj xlibr Moisejs ya, lod rëb guial baguiaaman yag ni cayë'c? Yagaj biguien cha' Dios, rëba-

man lojman: “Naj naj xDios Abraham, xDios Isaac në xDios Jacob.” <sup>27</sup> Din Dios ad najtaman xDios ree bengüt, najman xDios ree bën naban. Zeel ad laat naj xgab rüjndi.

### **Mandamient mazri zojbloj**

(Mt. 22:34-40)

<sup>28</sup> Chi biguiejn tijb mextr rajc ley badxi' Jesús xtiidx reeman zagdx guial bacaagdiajgaman diidx ni cayü reeman, gubigaman lojman, abi' gunabdiidxaman rëbaman:

—¿Con mandamientan mazri zojbloj loj gra ree mandamient?

<sup>29</sup> Badxi'man laan rëbaman:

—Mandamient mazri zojbloj rëban: “Gol bacaagdiajg, bën Israel, dux Dad ree Dios, tijbzi laaman naj Dios. <sup>30</sup> Guyën xDadil Dios guidiblagaa guidib guijc guidib ladxil.” Laan naj mandamient mazri zojbloj. <sup>31</sup> Mandamient rarojp, rëban: “Guyën ree ben ren zi'c rën lüj gajc.” Achet mandamient mazri zojbloj guial loj grop ree mandamient guie.

<sup>32</sup> Dxel rëb mextr guin loj Jesús:

—Zagdxequi guneel, Mextr. Waliquul tijbzi Dios yu', achutri ben ren yu'. <sup>33</sup> Abi' guidib guijc guidib ladx bejn guiënman laaman guidiblagaa, guiën tëëman ben ren ree zi'c rën laagajcaman. Laan naj ni mazri zojbloj guial loj gra gon ni rudëed bejn loj Dios.

<sup>34</sup> Chi biguien Jesús badxi' mextr guinan zagdx, rëbaman:

—Ad zijtt za'l par chu'l loj xguialrniabee Dios.

Dxel achutri bayax xhie niniabdiidx lojman.

### **Chu loj xdiaa za Cristo**

(Mt. 22:41-46; Lc. 20:41-44)

<sup>35</sup> Chi culüü Jesús bejn ree lën yadooro' Jerusalén, gunabdiidxaman loj reeman rëbaman:

—¿Chexc zeel rëb ree mextr rajc ley guial za Cristo loj xdiaa rey Davi? <sup>36</sup> Awa Davi guin gajc guneer por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdxe'ch ree lüj guia'l.”

<sup>37</sup> Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bën riga' lën yadoo guin dád nix yu' luxdoo reeman rucaagdiajg reeman xtiidxaman.

### Ni rüjn ree mextr rajc ley

(Mt. 23:1-36; Lc. 11:37-54; 20: 45-47)

<sup>38</sup> Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdxe, ruladx tää reeman gugajpdioz ree bejn laa reeman con respajt niz lunejz. <sup>39</sup> Abi' lën ree yadoo ruladx reeman cwe reeman lod rbej ree bën zojbloj, ziangajc rüjn reeman lod ritaw reeman. <sup>40</sup> Raca' tää reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

### Gon badëed tijb béngunaa bizëjb

(Lc. 21:1-4)

<sup>41</sup> Tijb dxej zojb Jesús lën yadooro' Jerusalén niz lod za' alcancia ni ru gon, abi' ruguiaaman rgu' ree bejn milia lën alcancia guin, në zien ree benrijcw rgu' zro' milia. <sup>42</sup> Dxel bidxin tijb béngunaa bizëjb prob, badxe'man tio'p zintabldoo ni lasajc ta'nzi. <sup>43</sup> Abi' gurejdx Jesús bën naj ree xbejnman, rëbaman:

—Diidxli rmin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin. <sup>44</sup> Din graczi reeman rudxe' ni rüjn laa reeman sobr, per laaman majsi najman

bénprob, badxe'man graczi ni rajpaman par guibannëman.

### Rëb Jesús guial yaze'n yadooro' Jerusalén

(Mt. 24:1-2; Lc. 21:5-6)

**13** Chi barri Jesús lën yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tää naj ree yu guin!

<sup>2</sup> Badxi' Jesús reeman rëbaman:

—Zi'c ruguiaal yu narooob guin ree, zadxin dxej, ni'czi tijb guiaj guin ad za-ya'nt guijc stijban, gran yaze'n.

### Ni gac chi gad guidxliuj nit

(Mt. 24:3-28; Lc. 21:7-24; 17:22-24)

<sup>3</sup> Chi zojb Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Bëd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:

<sup>4</sup> —Guna, ¿goc gac zian? ¿Xhie sen gac chi ma zidyob gac zian?

<sup>5</sup> Badxi' Jesús laan rëbaman:

—Gol gojp cudad chitëë chu gusquiee lëjt. <sup>6</sup> Din zien ree bën gui't guiëb reeman guial por naj zëed reeman, guiëb tää reeman: “Naj naj Cristo”, abi' gusquiee reeman zien bejn.

<sup>7</sup> Per lëjt chi guiguiejndi cayajc wadijl o zëeb diidx gac wadijl, ad guidxebidi; din najczi gac zian, per ad por laatan ma bidxin dxej nit guidxliuj. <sup>8</sup> Din til nacion con stijb nacion, til tää bën rajp guialrniabee con stijb bën rajp guialrniabee, gui't tää ree xudoxh në gubijn niz ni niz guie. Zian gac chi ma suloj ree guialzi ni naj gac.

<sup>9</sup> Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lën ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile'

güdi da diidxan loj reeman. <sup>10</sup>Per yalojx-gaj riijn naguiejn guire'ch xtiidxxa'c Dios loj gra ree nacion, dxelri nit guidxliuj. <sup>11</sup>Chi chinë reeman lëjt loj ree guxtis, ad bal chu'di xgab, ad bal güün tēdi xgab xhie guiëbidi loj reeman. Gol guneë di-idix guneë Dios lëjt loj hor guin. Din ad lëjttn guinieë, xSprijt Diosan guinieë. <sup>12</sup>Abi' guidxin dxej yayü bejn laagajc bi-jchaman din guiëtix, ziangajc ree bën naj dad yayü laagajc xi'n reeman, abi' ree bejn yayü xdad xniaa reeman par guiët reeman. <sup>13</sup>Gra bénguidxliuj guidxe'ch lëjt guial najdi da bejnan, per bën sudx-i'ch loj ni rililadxaman naj xt dxej chigra guibanman, laaman yayal xanyabaa.

<sup>14</sup>'Chi guguaadi zojb tijb ni dxu-udx lën yadooro' Jerusalén, zi'c bacaa Daniel, bën badëë xtiidx Dios loj ree bejn diizd gulal (bën gool ree gui'ch guie, gol bignia'n), guial bën zojb ree niz Judea chigxüün reeman niz dajn. <sup>15</sup>Guiáad bën yë'p guijc yu lidx dxejzii, ad yayu lënu lidxaman tia' xhie xieenman. <sup>16</sup>Guiáad bën za' dajn, ad yayejc lidxaman chigxii xabaman. <sup>17</sup>iProbza ree béngunaa nüü xi'n o bën ca' ree xindobëz lën ree dxej zii! <sup>18</sup>Gol gurejdx gunab Dios chitëë yayal gac zian tiamp nayaag, <sup>19</sup>din dád guialziro' chu' dxejzii ree, zi'c ad wayajcteci diizd chi beenchaaw Dios guidxliuj, ad yu' tēetri dxej gac zian. <sup>20</sup>Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bën rënman, bën gulejman par laaman.

<sup>21</sup>'Bal chu na lojdi: "Gol baguiaa, laa Cristo za' guie", o "laaman za' ni", ad bal chililadxidi. <sup>22</sup>Din gui't zien ree bejn, na reeman guial laa reeman naj Cristo o na reeman laa reeman naj bën rudëë xtiidx Dios loj ree bejn, abi' güün reeman milagr ree në ree graloj ni yadxaløj ree bejn, din gusquieë reeman laa reeman, abi' bal zile'n xt zajc në ree bën gulej

Dios gusquieë reeman. <sup>23</sup>Zeel gol gojp cudad, ma bagojnxgajn lëjt gra ni gac.

### Gui't Bén guxhaal Dios zatijb

(Mt. 24:29-35, 42-44; Lc. 21:25-36)

<sup>24</sup>'Per lën ree dxej ni ma gudëd gra ree guialzi guin, zacajy loj gubijdx abi' ad zusnitri bëëw, <sup>25</sup>zayajb ree bajl yu' xanyabaa guiáad gra ree ni yu' xanyabaa guiniib reen. <sup>26</sup>Dxel guguaa ree bejn Bén guxhaal Dios rdiinman bacha' zëëdaman loj zaj con xguialrniabee narobaman. <sup>27</sup>Abi' guixhiaal ree xianjlanman guidiblagaa guidxliuj din guchajg reeman lasa' ree bën ma naj par Dios.

<sup>28</sup>'Gol badxe'guijc ni ganin lëjt: Chi ma naquie'n xidx yag higo abi' ma caydxib ree xbalagan, lëjt ragbee guial ma zidyob tiamp nalaa. <sup>29</sup>Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rmin. <sup>30</sup>Diidxli rmin lëjt guial gra ree ni guin gac chi gad ree bën naban lën ree dxej guie guiët. <sup>31</sup>Guidxliuj në xanyabaa zanijt reen, per da diidxan ad zadëdt gacan cumplid.

<sup>32</sup>'Per achut ragbee xhie dxejn xhie tēë horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

<sup>33</sup>'Zeel gol gojp cudad, gol guzujsin tēë, gol gurejdx gunab Dios din ad ragbeetidi goc gac zian. <sup>34</sup>Ni guin ree naj zi'c chi ririi tijb bejn rejman zijt. Abi' chi gadaman grii rudëëman dxiin loj tijbgaj ree xmojsaman, rniabee tēëman susin bën rajp ro' port. <sup>35</sup>Yan ziangajc lëjt gol guzujsin, din ad ragbeetidi goc o xhie horan guialan bal chi ma ribej guiaal ya, o garol guiaal, o chi ma rbidxa' guid, o rsildoo. <sup>36</sup>Zeel gol guzusin din bal dxejzci guialan ad guidaaglojn lëjt ad cayüjntidi zi'c rayal. <sup>37</sup>Abi' ni canin lojdi, loj gradi caninan: Gol guzujsin.

**Baya'n reeman diidx  
xhienaag guiniaaz Jesús**

(Mt. 26:1-5; Lc. 22:1-2; Jn. 11 :45-53)

**14** Zatio'p dxej riaadx gal lanij pascw, lanij raw ree bejn guiadx-til ni ad yu't levadur. Abi' ree bixhioz rniabee ree bixhioz con ree mex't rajc ley, raguiil reeman mod xhienaag gusquiee reeman Jesús, din guiniaaz reeman laaman gugüjt reeman laaman. <sup>2</sup>Per rëb reeman:

—Ad zaguieent ree zian loj ree dxej lanij guin, chitëë gac naquie'!

**Baroob tijb béngunaa  
perfum guijc Jesús**

(Mt. 26:6-13; Jn. 12 :1-8)

<sup>3</sup>Dxel chi za' Jesús luguiedx Betania lidx Simón, bën gunee reeman leproso, abi' chi zojbaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojcchaw-nën ganax nardo, zianz guxhalaman ro' lumejt guin persi baroobaman perfum guin guijc Jesús. <sup>4</sup>Abi' yu' ree bën za' yagaj bidxe'ch, rëb loj lasa' reeman:

—¿Chexc zeel guxhie'man perfum guin? <sup>5</sup>Awa zajc nido'n choon gayuu denario din nünjan yudar bënprob ree.

Abi' caneeguijdx reeman béngunaa guin.

<sup>6</sup>Per rëb Jesús loj reeman:

—Gol basa'nman. ¿Chexc zeel ruslendi laaman? Zagdxe naj ni beenman con naj. <sup>7</sup>Zianczi sunëdi bënprob ree, abi' zajc güüundi laa reeman yudar chi guiëndi, sa'n naj ad ziantczi sunëdi naj. <sup>8</sup>Béngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan. <sup>9</sup>Diidxliczi rnin lëjt, guial guidib loj guidxliuj bantëëz guin guiniee reeman xtiidxza'c Dios, zü ree bejn diidx ni been béngunaa guin con naj din gusaaladx reeman laaman.

**Baguiil Judas mod  
xhienaag yayüman Jesús**

(Mt. 26:14-16; Lc. 22:3-6)

<sup>10</sup>Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman. <sup>11</sup>Chi biguiejn ree bixhioz guin zian, dád babaa reeman. Abi' rëb reeman gudëëd reeman milia lojman. Dxel guzuloj raguiilaman mod xhienaag yayüman Jesús.

**Gudawnë ree xbejn Jesús xche**

(Mt. 26:17-29; Lc. 22:7-23;  
Jn. 13 :21-30; 1Co. 11 :23-26)

<sup>12</sup>Dxej ni guzuloj lanij raw ree bën Israel guiadxtil ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rënl yuguieenan ni yadaaw ree guxhin pascw?

<sup>13</sup>Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaadi tijb xinguaaw ca' re yu' nijs. Gol chinalix.

<sup>14</sup>Abi' lod yayux, gol güjdx loj bën naj lidxan: “Na mextr: ¿Ban lënü gawnë ree xbejnman yan guxhin pascw?” <sup>15</sup>Dxel guluüman lëjt tijb lënü naroo ni rarojp cwaa, ma najcchaaw lënü guin. Yagaj gol been ni yadaaw ree xche.

<sup>16</sup>Dxel brii ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

<sup>17</sup>Chi gure guaial, bidxin Jesús con guidxiptio'p ree xbejnman. <sup>18</sup>Dxel chi zojb reeman xan mex cayaw reeman, rëb Jesús loj reeman:

—Diidxliczi rnin lojdi guial tijb lëjt, bën cayawnë naj, laaman yayü naj.

<sup>19</sup>Dád guyunaya reeman, abi' guzuloj canabdiidx tijb gaj reeman, rëb reeman lojman:

—¿Najn ya?

Abi! rëb stijbaman:

—¿Wa najn ya?

<sup>20</sup> Badxi! man laan rëbaman:

—Loj guidxiptio'pidi, tijb lëjtan, bën cugajdx xguidxtil loj gajc pliajt lod cugajdx da guiadxtilan, laaman. <sup>21</sup> Walican guial Bén guxhaal Dios naj sacaman zi'c ca loj xtiidx Dios. Per, i'prob bën yayü laaman! Zagdxeli naj par laaman ad nitaman loj guidxliuj

<sup>22</sup> La'tgaj cayaw reeman, cwa' Jesús guiadxtil abi' badëëman quixtëë loj Dios, dxel gula'man laan badëëman loj reeman, rëbaman:

—Gol gudaw guiadxtil guie, laan naj da cuerpan.

<sup>23</sup> Dxel cwa'man tijb cojp yu' vin, chi gulox badëëman quixtëë loj Dios, badëëman cojp guin loj reeman, abi' gra reeman gu' vin yu' lojn. <sup>24</sup> Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guixal tijb nejz cüb xhienaag gap ree bejn perdon loj Dios. <sup>25</sup> Naj rni lëjt, ad yu'tri dxej guië'n vin rajcchaawnë uv, xt dxej ni guië'n vin cüb lod rniabee Dios.

### **Rëb Jesús guial guiëb Bëd ad nünbeetaman laaman**

(Mt. 26:30-35;

Lc. 22:31-34; Jn. 13 :36-38)

<sup>26</sup> Chi gulox biil reeman tijb cant par Dios. Dxel zë reeman ruguia' Olivos.

<sup>27</sup> Dxel rëb Jesús loj reeman:

—Graczi ti'o'nladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, abi' guire'ch reeb.”

<sup>28</sup> Per chi yabanan, yaloj naj ganeed loj gan Galilea.

<sup>29</sup> Dxel rëb Bëd lojman:

—Majsi gra reeman ti'o'nladx lüj, per naj ad zaro'nladxan lüj.

<sup>30</sup> Badxi! Jesúsán rëbaman:

—Naj rni lüj Bëd, yan guxhin gajc chi gad guid cwidxa' ti'o'p volt, choon volt mal rëbil guial ad nünbeetil naj.

<sup>31</sup> Per naguiejn rüjn Bëd rëbaman:

—Majsi guiëtnë'n lüj, per ad zëtan guial ad nünbeetan lüj.

Abi' graczi reeman rëb zian.

### **Rbejdx rniab Jesús Dios lod la Getsemani**

(Mt. 26:36-46; Lc. 22:39-46)

<sup>32</sup> Chi bidxin reeman tijb luar la Getsemani, dxel rëb Jesús loj ree xbejnman:

—Gol gurejsii guie, la'tgaj gabedx ganaaban Dios.

<sup>33</sup> Abi' binëman Bëd, Jacob con Waj, dxel guzuloj guyunayaman abi' ad nixtri yu' luxdooman. <sup>34</sup> Zianz rëbaman loj reeman:

—Yu' naya da't luxdon, rülüü ma gugüjtan naj. Gol baya'n guie ad gaayëjsidi.

<sup>35</sup> Abi' guzaman zata'n, zianz gurero-lojman, gunabaman loj Dios, bal zile' téd ni naj sagdiajman. <sup>36</sup> Chi cabejdx canabaman Dios, rëbaman:

—Dad, graczi zajc güünl. Babëë naj loj ni gazaagdiajn. Per ad gac zi'c rënan, rayal gac zi'c rënl.

<sup>37</sup> Dxel ziaman lod baya'n ree xbejnman, chi badxinman cwë' reeman laa reeman naga'yëjs, zianz rëbaman loj Bëd:

—Simón, ¿naga'yëjsil ya? ¿Ni'qui tib hor ad gojct nibejnaal ya? <sup>38</sup> Gol gurenaa, gol gurejdx gunab Dios chitëë güün xindxab lëjt gan. Din rëndi güündi zi'c rayal, per xcuerpidi ad rtiëjbtan.

<sup>39</sup> Dxel zëman zatijb persi gurejdx gunabaman Dios con diidx guin gajc ree. <sup>40</sup> Chi badxinman lod riga' reeman, laa-gajc reeman naga'yëjs zatijb, guial yu' da't bacaal loj reeman, abi' ni'quid radxejlt xhie guiëb reeman lojman. <sup>41</sup> Ni bayon volt badxinman, rëbaman:

—¿Sta naga'yëjsidi ya? ¿Sta cayziladxidi ya? Gol batie'ch xbaaalidi din naj, najn Bén guxhaal Dios ma bidxin hor yayü reeman naj loj ree bëndol. <sup>42</sup> Gol bixche, yo' ree, laa bén yayü naj ma zëëd gajxh.

### Gunaaz reeman Jesús

(Mt. 26:47-56; Lc. 22:47-53; Jn. 18 :2-11)

<sup>43</sup> Sta caneenë Jesús laa reeman chi bidxin Judas, bén goc tijb ree xbejman. Bidxinnëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel.

<sup>44</sup> Abi' Judas bén bayü laaman ma bagojnxgajman bén guin ree rëbaman:

—Bén gawan xid, laaman naj Bén raguiilidi, gol gunaazaman gol chinëman, gol gojpaman ad guslaadi laaman.

<sup>45</sup> Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid. <sup>46</sup> Zianz gunaaz ree Bén guin laaman din chinë reeman laaman. <sup>47</sup> Per tijb Bén za' yagaj gulëë xiespadaman, gutü'man guidi-ajg xmojs bixhioz rniabee gra ree bixhioz. <sup>48</sup> Dxel rëb Jesús loj ree Bén guin:

—¿Chexc zeel zëëdidi con espad con yag din chinëdi naj zi'c tijb xingubaan?

<sup>49</sup> Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

<sup>50</sup> Dxel graczi ree xbejn Jesús baxütün, guro'nladx reeman laaman.

### Tijb xin binal Jesús

<sup>51</sup> Per guyu tijb xinguiag binalix Jesús, nadüübix tijbzi lajd. Abi' chi gunaaz ree Bén guin laax, <sup>52</sup> baslaagajquix lajd guin, zigxüünt ziladix.

### Za' Jesús loj ree guxtis

(Mt. 26:57-68; Lc. 22:54-55, 63-71; Jn. 18 :12-14, 19-24)

<sup>53</sup> Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley. <sup>54</sup> Abi' zijt zijt binal Bëd Jesús xt rule' lidx bixhioz guin, dxel gurejman rudëj con ree Bén rajp rulidx bixhioz guin,

<sup>55</sup> Abi' ree bixhioz rniabee ree bixhioz con gra ree guxtis, baguiil reeman mod xhienaag gutedia' reeman Jesús din chile' gugüjt reeman laaman, per ad badxejlt xhienaag nutedia' reeman laaman, <sup>56</sup> majsi zien reeman rudxiib diidx rusquiee guijcaman, per garent garen rëb tijb gaj reeman. <sup>57</sup> Dxel guzuli tio'p choon reeman gunee reeman diidx rusquiee ree contr laaman, rëb reeman:

<sup>58</sup> —Dunujn baguiejn rëbix: “Naj guse'n yadooro' Jerusalén ni been ree bejn, abi' choon dxejzi yayünanan sin xyudar ree bejn.”

<sup>59</sup> Per ni'qui zian ad gunee reeman tibloj, garent garen gunee reeman.

<sup>60</sup> Dxel bixhioz rniabee gra ree bixhioz guzuliman galay ree Bén riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr liij ya?

<sup>61</sup> Per achetczi rëb Jesús, ad badxi'taman diidx, dxel gunabdiidx bixhioz rniabee guin lojman zatijb, rëbaman:

—¿Lüj naj Cristo ya, Xi'n Dios Bén nagle'?

<sup>62</sup> Badxi' Jesúsán rëbaman:

—Walicán, najcan. Abi' lëjt zuguaadi naj najn Bén guxhaal Dios zooban xladbee Dios Bén ca' gra guialrniabee guguaa tëëdi naj guialan loj zaj xanyabaa.

<sup>63</sup> Chi biguiejn bixhioz guin zian, gudixya' xabaman, dxel rëbaman:

—Ad rijntri naguiejn yadiil ree testiw.  
<sup>64</sup>Lëjt ma biguiejn caneeguijdxix Dios.  
 Yan, ¿xhie nadi?

Abi' graczi reeman rëb, guiëtaman.

<sup>65</sup>Yu' reeman rucojp xhiejn lojman,  
 ruta'cw tëë reeman lojman, dxel riguin  
 reeman laaman, rëb reeman:

—¡Guneeya' chu gudin lüj!

Guiáad ree bën rajp yagaj wëëz ree-  
 man lojman.

### Rëb Bëd ad nünbeetaman Jesús

(Mt. 26:69-75; Lc. 22:56-62;  
 Jn. 18 :15-18, 25-29)

<sup>66</sup>Chi za' Bëd rule' guin, dxel bidxin  
 tijb béngunaa rüjn dxiin lidx bixhioz rni-  
 abee guin. <sup>67</sup>Chi baguiaaman zobj Bëd  
 rudëj guin cucha'man, baguiaaman loj-  
 man, dxel rëbaman:

—Në lüj za'në Jesús bën Nazaret.

<sup>68</sup>Per gurexuu Bëd rëbaman:

—Ad nünbeetan laaman, ad ragbeetan  
 xhienin rnieel.

Chi bariiman ro' port guin, dxel  
 guridxa' guïd. <sup>69</sup>Dxel baguiaa béngunaa  
 guin Bëd zatijb, zianz guzuloj rëbaman  
 loj ree bën riga' yagaj:

—Në bën guin naj xbejn Jesús.

<sup>70</sup>Per gurexuu Bëd zatijb. Gojc xchej-  
 doo rëb ree bën riga' yagaj loj Bëd:

—Walican në lüj naj xbejnx din xin  
 Galilea lüj, abi' zi'cgajc nree reeman  
 rnieel.

<sup>71</sup>Per guzudxi'ch Bëd con ni rëbaman,  
 zianz rëbaman:

—Gudëed Dios naj casti bal rusquieen,  
 ad nünbeetan bën nadi.

<sup>72</sup>Loj hor zii gajc barojp volt guridxa'  
 guïd. Dxel basaaladx Bëd guial rëb Jesús  
 lojman: “Chi gad guïd cwidxa' tio'p  
 volt, mal gojc choon volt rëbil ad nün-  
 beetil naj.” Chi basaaladxaman zian,  
 dxel guzuloj cayoonman.

### Binë reeman Jesús loj Pilato

(Mt. 27:1-2, 11-14;  
 Lc. 23:1-5; Jn. 18 :28-38)

**15** Chi bareguiaal rsildoo, badxajp  
 lasa' ree bixhioz rniabee ree bix-  
 hioz con ree guxtis Israel në ree mextr  
 rajc ley con gra ree guxtis, abi' baya'n  
 reeman diidx xhienaag güün reeman.  
 Dxel guxhii reeman Jesús binë reeman  
 laaman loj Pilato. <sup>2</sup>Abi' gunabdiidx Pi-  
 lato loj Jesús rëbaman:

—¿Lüjn naj xrey ree bën Israel ya?

Badxi' Jesús laan rëbaman:

—Najcan.

<sup>3</sup>Abi' ree bixhioz rniabee ree bix-  
 hioz zien ni rudxiib reeman guijcaman,  
<sup>4</sup>zeel gunabdiidx Pilato lojman zatijb,  
 rëbaman:

—¿Nid xhie diidx yadxi'l ya? Baguiaa  
 dád zien ni rudxiib reeman guijquil.

<sup>5</sup>Per acheteci badxi' Jesús, zeel dád  
 badxa loj Pilato

### Gunabee reeman guiët Jesús

(Mt. 27:15-31; Lc. 23:13-25;  
 Jn. 18 :38–19:16)

<sup>6</sup>Loj ree dxej lanij pascw, ruslaa Pilato  
 tijb bën yu' ladxguiib, bën rëb ree bën  
 guiedx guin guslaaman. <sup>7</sup>Lën ree dxej zii  
 yu' bën la Barrabás ladxguiib con ree ben  
 ren, bën bagüjt ree bejn loj tijb wadijl  
 ni been reeman contr gobiarn. <sup>8</sup>Dxel chi  
 bido'p ree bejn, rëb reeman loj Pilato din  
 güünman zi'c naj costumbr, <sup>9</sup>Abi' rëb Pi-  
 lato loj reeman:

—¿Rëndi ya guslaan xreydi?

<sup>10</sup>Rëbaman zian guial ragbeeman  
 bayü ree bixhioz guin laaman por guial  
 rdëdlojzi reeman laaman. <sup>11</sup>Per ree bix-  
 hioz rniabee guin badxe' reeman bejn  
 ree diidx din guiëb reeman loj Pilato gus-  
 laaman Barrabás. <sup>12</sup>Abi' gunabdiidx Pi-  
 lato loj reeman rëbaman:

—¿Xhie rëndi günnë'n bën nadi naj  
 xreydi?



<sup>13</sup> Dxel gurixdiaj reeman rëb reeman:

—¡Bacaax loj crüjz!

<sup>14</sup> Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—¡Bacaax loj crüjz!

<sup>15</sup> Abi' guial rën Pilato yaya'nman zagdxe loj reeman, zeel baslaaman Barrabás, gunabeeman a Jesús, dxel bayüman laaman loj reeman din tiaman loj crüjz.

<sup>16</sup> Abi' binë ree xin suldad guin Jesús xlule' palas, yagaj badxaag lasa' gra reex. <sup>17</sup> Abi' bascajcw reex laaman tijb lajd murad, dxel been reex tijb coron guiëjch badxe' reex guijcaman. <sup>18</sup> Dxel guzuloj rbixdiaj reex rëb reex:

—¡Guibanri xrey ree bën Israel!

<sup>19</sup> Zianz rugaz reex var guijcaman, ru-laa xhiejn reex lojman, abi' ruzuxib reex lojman. <sup>20</sup> Chi gulox baze' reex laaman, babëë reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

### Bacaa reeman Jesús loj crüjz

(Mt. 27:32-44;

Lc. 23:26-43; Jn. 19 :17-27)

<sup>21</sup> Chi zinë reex Jesús, badxaagloj reeman tijb bën Cirene, laman Simón, xdad Lejandr con Rufo, ziaadaman bazaman dajñ. Abi' been ree suldad guin naguiejn biaaman xcrüjz Jesús.

<sup>22</sup> Abi' binë reex Jesús luar la Gólgota, rën guiëban Calaver. <sup>23</sup> Yagaj badëëd reex vin no'ch ni la mirra lojman din guië'man laan, per ad gu'taman laan.

<sup>24</sup> Chi ma bacaa reex laaman loj crüjz, dxel gudxijt reex suert guijc xabaman din guidoon xhie yayal tijbgaj reex

<sup>25</sup> Raca gaa rsil bacaa reex laaman loj crüjz. <sup>26</sup> Guijc crüjz guin bacaa reex lejtr ni rëb chexc zeel bacaa reex laaman loj crüjz, rëban: “Xrey ree bën Israel.” <sup>27</sup> Chi bacaa reex laaman loj crüjz, në zatio'p

ree xin gubaan bacaa reex loj crüjz, tijbix cwa xladbeeman, zatijbix cwa xladruvejsaman. <sup>28</sup> Zian gojc cumplid ni ca loj xti-idx Dios, lod rëb: “Nayabaman loj ree benmal.”

<sup>29</sup> Abi' ree bën ridëd yagaj ruze' reeman laaman runij guijc reeman, rëb reeman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb, <sup>30</sup> yan baslaa lüj gajc baguiajt tëë loj crüjz zii.

<sup>31</sup> Ziangajc ruze' ree bixhioz rniabee laaman con ree mextr rajc ley, rëb reeman:

—Gognëx ben ren ree, guiáad laax ad rajct ruslaa laagajquix. <sup>32</sup> Yaguiajtix loj crüjz guin, bal laax naj Cristo, xrey ree bën Israel, din yaguaiaa ree, dxel yaliduladx ree.

Xt në ree xingubaan canëman loj crüjz guneeguijdx laaman.

### Güjt Jesús

(Mt. 27:45-56;

Lc. 23:44-49; Jn. 19 :28-30)

<sup>33</sup> Chi gol garol dxej, bicajy guidib guidxliuj xt raca choon wadx. <sup>34</sup> Dxel raca choon guin gurixdiaj Jesús rejs, rëbaman:

—Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëëladxil naj? <sup>35</sup> Yu' ree bën za' yagaj biguiejn, abi' rëb reeman:

—Gol bacaagdiajg niad. Laax cabejdx Elías bën badëë xtiidx Dios loj ree bejn.

<sup>36</sup> Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguaiaa ree don zi't Elías yalet laax loj crüjz guin ya.

<sup>37</sup> Per Jesús dád rejs gurixdiajman, dxel güjtaman. <sup>38</sup> Loj hor zii goxya' lajd nal lën yadooro' Jerusalén, gojcan tio'p lala', diizd guijc guin xt guia' guin

goxya'. <sup>39</sup>Dxel suldad rniabee ree suldad guial za'x niz loj Jesús. Chi baguiaax xhienaag güjtaman, rëbix:

—Walican, Xi'n Dios bën guin.

<sup>40</sup>Në tio'p choon ree béngunaa za' zijt ruguiaa ni cayajc. Loj ree béngunaa guin no'ch María Magdalena, në Salomé në Li xniaa Xiëb con Jacob bën naj ben-guiag loj Xiëb. <sup>41</sup>Béngunaa guin ree binal Jesús, been tëë reeman laaman yudar chi guzuman Galilea, në zien ree béngunaa ren binal laaman diizd Galilea xt Jerusalén.

### Biguie'ch Jesús

(Mt. 27:57-61;

Lc. 23:50-56; Jn. 19 :38-42)

<sup>42</sup>Chi bidxin dxej rüjn ree bën Israel gra, chi guixiezi naj dxej raziiladx reeman, ma cabej guiaal, <sup>43</sup>bidxin Xiëb bën za guiedx Arimatea. Gojcaman tijb xgux-tis ree bën Israel, abi' gojp ree bejn laaman respejt, në laaman rbëz xguial-rniabee Dios, abi' guyuman valor wejman loj Pilato, persi banabaman xcuerp Jesús. <sup>44</sup>Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walin. <sup>45</sup>Abi' rëb suldad guin guial walican ma güjtaman, dxel cwëjb Pilato baca' Xiëb cuerp guin. <sup>46</sup>Guzii Xiëb tijb lajd, abi' chi baletaman xcuerp Jesús loj crüjz guin dxel battüübaman laaman lajd guin, biquie'chaman laaman lën tijb baa ni bidëen lën tijb guiaj, dxel basiaawaman ro' baa guin con tijb guiajro'. <sup>47</sup>María Magdalena con Li xniaa Xiëb, baguiaa reeman lod baquie'ch reeman Jesús.

### Raban Jesús

(Mt. 28:1-10; Lc. 24:1-12; Jn. 20 :1-10)

**16** Chi gudëd dxej raziiladx ree bejn, María Magdalena, në Salomé, në Li xniaa Jacob, bisii reeman perfum din chitëëb reeman laan xcuerp Jesús.

<sup>2</sup>Bareguiaal chidumingw, rsildoo brii reeman wej reeman ro' xbaa Jesús, naabzi rliejn gubijdx. <sup>3</sup>Chi zë reeman lunejz, rëb loj lasa' reeman:

—¿Chuza chisüd guiaj nayaaw ro' baa guin?

<sup>4</sup>Per chi bidxin reeman baguiaa reeman ma biniib guiaj za' ro' baa guin ad za'tri loj xluaran. <sup>5</sup>Chi guyu reeman lën baa guin, baguiaa reeman tijb xinguiag zobjix ladbee, najcwix lajd naquich yool, abi' bidxeb reeman. <sup>6</sup>Per rëbix loj reeman:

—Ad rdxebidi, raguiilidi Jesús bën Nazaret bën cwa loj crüjz. Per ma babanman, achutri laaman guie, gol baguiaa lod gudixh reeman laaman. <sup>7</sup>Yan, gol chej gol chiguiedx loj Bëd në loj los demazri ree xbejnman guial yaloj Jesús ned cheman Galilea dxel chedi, ni guguiaadi laaman zi'c ma naman lojdi.

<sup>8</sup>Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

### Balüüloj Jesús loj María Magdalena

(Jn. 20:11-18)

<sup>9</sup>Chi ma baban Jesús, chidumingw rsildoo, yaloj loj María Magdalena balüülojman, bën babëëman gajdx xindxab luxdoo. <sup>10</sup>María Magdalena guin bicojn ree xbejn Jesús, bën yu'naya ree roon tëë reeman por laaman. <sup>11</sup>Chi biguiejn reeman guial naban Jesús baguiaa tëë María Magdalena laaman, ad bililadxt reeman.

### Balüüloj Jesús loj tio'p ree xbejnman

(Lc. 24:13-35)

<sup>12</sup>Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn. <sup>13</sup>Dxel bën guin ree bicojn lasa' reeman, per ni'qui laa reeman ad bililadxt reeman.

**Rucaabee Jesús bén naj ree apóstoles***(Mt. 28:16-20;**Lc. 24:36-49; Jn.20 :19-23)*

<sup>14</sup>Ni bigratë baliüüloj Jesús loj za chiptib ree xbejnman, chi zojb reeman xan mex cayaw reeman, gudilëman laa reeman guial nad reeman, ad rlliladxt reeman bén baguiaa ree laaman guial ma babanman. <sup>15</sup>Dxel rëbaman loj reeman:

—Gol chej guidib guidxliuj, gol chigtie'ch xtiidxza'c Dios loj gra ree bejn. <sup>16</sup>Bén chililadx tiobnijs tëë zajcaman perdon loj Dios. Per bén ad zaliladxt xtiidxza'c Dios, laaman yayal casti. <sup>17</sup>Sen guie ree gap ree bén chililadx naj: Por da guialrniabeen

zabëë reeman xindxab luxdoo ree bejn, zanee tëë reeman diidx ren ree, <sup>18</sup>zanaaz reeman bëël ree, abi' majsi guië' reeman ni yu' venen guijc achet gac reeman, chi gudxiib yaa reeman guijc ree bénragxuu, zayajc reeman.

**Bayë'p Jesús xanyabaa***(Lc. 24:50-53)*

<sup>19</sup>Chi gulox guneenë Dad Jesús laa reeman, dxel bayë'paman xanyabaa, gurejman xladbee Dios. <sup>20</sup>Guiáad laa reeman brii reeman zigtie'ch reeman xtiidxza'c Dios guidibczi. Abi' Dad Jesús gognë laa reeman, been reeman milagr ree, persi gogbee ree bejn guial xtiidxqui Dios naj ni rniece reeman. Amén.

## Xtiidxza'c Jesucrist ni bacaa San Lujc

### Rxhiaal Lujc gui'ch loj Teófilo

**1** Zien ree b́en ma been naguiejn gu-  
caa ni goc con dunuj ree, <sup>2</sup>zi'cgajczi  
balüü ree bejn dunuj ree, b́en baguiaa  
ree diidz guida'xchej ni been Jesús nē  
ni guzacamán, gutie'ch tēē reeman xti-  
idxaman. <sup>3</sup>Naj baguilknejzchaaw diidz  
guia'xchejn, dad Teófilo, zeel naladxan  
zagdxen gucanan xnejz par lüj, <sup>4</sup>din  
chignia'l zagdxē diidxli balüü reeman  
lüj.

### Rugojn tijb anjl gal Waj

<sup>5</sup>Tiamp gunabee rey Herodes guidib  
niz Judea, guyu tijb bixhioz brii laj  
Zacarías, bachajgaman tib cwaa ree bix-  
hioz brii laj xbejn Abías. Xbéngunaa  
Zacarías brii laj Elisabet, zaman loj xdiaa  
bixhioz brii laj Aarón. <sup>6</sup>Grop reeman  
gubajn xnejz loj Dios bazoob tēē reeman  
diidz graczi ni rniabee Dios, abi' achut  
rile' guiēb guial rajp reeman dol. <sup>7</sup>Per  
achut xi'n reeman guyu guial ad gojct  
niu xi'n Elisabet, grop reeman ma naj  
bengol.

<sup>8</sup>Tijb dxej ni bayal ree bixhioz no'ch  
Zacarías loj, been reeman sirv loj  
Dios, <sup>9</sup>zi'c naj xcostumbr ree bix-  
hioz guin, gudxijt reeman suert dín  
guidoon chu yayal gudxe' goxyaal lēn  
yadooro' Jerusalén, abi' bayal Zacarías  
cu'man goxyaal guin. <sup>10</sup>La'tgaj cagu'-  
man goxyaal guin, gra ree bejn riga'  
lule' cabejdx canab reeman Dios. <sup>11</sup>Dxel  
balüüloj tijb xianjl Dios loj Zacarías, za-  
'liman xladbee altar lod cayu goxyaal  
guin. <sup>12</sup>Chi baguiaa Zacarías anjl guin,  
ad badxeljx xhie nüjnman, dád bidxeba-  
man. <sup>13</sup>Per rēb anjl guin:

—Zacarías, ad rdxebil ma bacaagdiajg  
Dios ni gunabil. Chu' xi'n xbéngunaaal

Elisabet, gaquix xinguaaw abi' yagu'l  
lajx Waj. <sup>14</sup>Yabaa da'til, nē zien ree bejn  
yabaa chi galix, <sup>15</sup>guial gaquix xin lasajc  
loj Dios. Ad zē'tix vin ni'qui ni gusüdx  
laax. Abi' diidz chi gadix gal mal za-  
'nē xSprijt Dios laax. <sup>16</sup>Por laax zien  
ree b́en Israel yayejc loj xDad reeman  
Dios. <sup>17</sup>Laax ned lojman, chu' xSprijt  
Dios luxdoox gap tēēx guialrniabee zi'c  
Elías, b́en badēē xtiidx Dios loj ree bejn,  
yabe'cdxex b́en naj ree dad con xi'n ree-  
man, guluü tēēx b́en ad ruzoobt ree diidz  
din guzuxnejzix bejn ree guidxga' ree-  
man laaman chi gui'taman.

<sup>18</sup>Dxel rēb Zacarías loj anjl guin:

—¿Xhienaag gagbeen guial gac  
cumplid ni nal? Din naj con da  
béngunaan ma nayajcan bengol.

<sup>19</sup>Badxi' anjl guinan rēbaman:

—Naj naj Gabriel, rünan sirv loj Dios,  
laaman guxhaal naj zidnē'n diidzxa'c  
guie lojl. <sup>20</sup>Per yan guial ad bililadxtil  
da diidxan, yaya'nl gop ad zajct guinieel  
xt guidxin dxej gal xindo guin.

<sup>21</sup>Guiáad ree ben riga' lule' guin  
cabēz reeman Zacarías yu' nawēēg ree-  
man guial cayaglaaman lēn yadoo guin.  
<sup>22</sup>Chi bariiman ad rajctri rnieeman,  
gaz sen rüjnman guial ma baya'nman  
gop. Dxel gogbee reeman guial yu' xhie  
baguiaaman lēn yadoo guin.

<sup>23</sup>Zianz baza' ree dxej ni been Zacarías  
sirv lēn yadoo guin, dxel zia lidxaman.  
<sup>24</sup>Chi gudēd ree dxej guin, guyu xi'n  
xbéngunaaaman Elisabet. Gaay bēēw tib  
guyuzaman lēnü, rēbaman: <sup>25</sup>“Ze naj ni  
beennē Dios naj lēn ree dxej guie chitēē  
guze'ri ree bejn naj.”

### Rugojn tijb anjl Li gal Jesús

<sup>26</sup>Ni goc xho'p bēēw, guxhaal Dios  
anjla Gabriel luguiedx Nazaret ni riga'  
niz Galilea, <sup>27</sup>din chignajman tijb bi-  
inxdüb lam Li. Ma naj tia' tijb xin la Xiēb  
laam, xin zēēd loj xdiaa rey Davi.

<sup>28</sup> Guyu anjl guin lod yu' Li abi' rëbaman:

—;Xchan Li, Dios ma gulej lüj! Dios za-në lüj, ma beenle' tëëman lüj loj gra ree béngunaa.

<sup>29</sup> Chi baguiaa Li anjl guin dád badxa lojm guial rëbaman zian, abi' gunabdiidxim xhie rën guiëb ree diidx guin.

<sup>30</sup> Dxel rëb anjl guin:

—Li, ad rdxe bil din lüj gule Dios beenle' tëëman lüj. <sup>31</sup> Chu' xi'nl, abi' chi galaman yagu'l lajman JESÚS. <sup>32</sup> Laaman gac bën zobjloj, guiniee ree bejn laaman Xi'n Dios bën yu' xanyabaa. Güün dux Dad ree Dios laaman rey zi'c goc xdiaagulalaman Davi, <sup>33</sup> din nabeeman bën Israel ree xt goctëëz, abi' xguialrniabeeman ad yu't dxej loxan.

<sup>34</sup> Dxel rëb Li loj anjl guin:

—;Xhienaag chu' da xi'n nan awa achut bénguiaaw nabannë'n?

<sup>35</sup> Badxi' anjl guinan rëbaman:

—Por xSprijt Dios chu' xi'nl, abi' xguialrniabee Dios bën yu' xanyabaa gusiaawan guijquil con xbalan. Zeel xi'nl bën gal, gacaman naya nali abi' guiniee ree bejn laaman Xi'n Dios. <sup>36</sup> Ziangajc lasa'l Elisabet ma yu' xi'nman, majsi ma najman bengol, bën rëb ree bejn ad zajct chu' xi'n, per yan ma gojc xho'p bëëw yu' xi'nman. <sup>37</sup> Din Dios graczi zajc güünman.

<sup>38</sup> Dxel rëb Li loj anjl guin:

—Dios naj bën rniabee naj, gacza zi'c rënman.

Ziat anjl guin.

### Rignaj Li Elisabet

<sup>39</sup> Lën ree dxej guin wej Li cari da't tijb guiedx ni riga' lad ree guia' niz Judea, <sup>40</sup> dxel guyum lënu lidx Zacarías, bagajpdiozim Elisabet. <sup>41</sup> Chi biguiejn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa. <sup>42</sup> Abi' gunee Elisabet rejs, rëbaman:

—;Dios ma beenle' lüj loj gra ree béngunaa, beenle' tëëman bejndobëz yu' lën! <sup>43</sup> ;Chuza najn zeel zidganaj xniaa da Diosan naj, bën rniabee? <sup>44</sup> Din biguiejnzan cha'l bagajpdiozil naj, laa baniib gajc da bindoon lënan guial babaam. <sup>45</sup> Xiquilbaal guial bililadxil, din gac zi'c bagojn Dios lüj.

<sup>46</sup> Dxel rëb Li:

Ruzatan Dios zagdxe,

<sup>47</sup> rabaanë' tëën laaman, guial ragnëman naj.

<sup>48</sup> Guial baguiaaman naj, majsi biin rüjnzi sirv lojman naj.

Abi' diidz yan xt goctëëz guza't ree bejn naj, guiëb reeman xiquilbaam.

<sup>49</sup> Din Dios, bën rniabee, dád zro' naj ni ma beennëman naj.

Naya naliman.

<sup>50</sup> Ad rbëzt rayaman graczi ree bën ru-zoob xtiidxaman.

<sup>51</sup> Zro' naj ni ma beenman con xguialrniabeeman.

Base'nman xixgab ree bën rüjn benro',

<sup>52</sup> biquiedaman guialrniabee loj ree bën rniabee,

guiáad loj ree bën ad zobjlojt badëëman guialrniabee loj reeman.

<sup>53</sup> Badëëman guialnaza'c loj ree bën bi-aadx guialraw,

guiáad ree benrijcw basa'nman laa reeman zezi.

<sup>54</sup> Gognëman bën Israel ree, xbejnman, abi' ad bayanladxtaman nayaman laa reeman,

<sup>55</sup> zi'c rëbaman loj dux béngulal ree,

Abraham në loj ree xdiaaman.

<sup>56</sup> Abi' baya'nnë Li Elisabet cost choon bëëw, dxel baguiaj lidxim.

### Rajl Waj

<sup>57</sup> Chi bidxin dxej gojl xi'n Elisabet najx xinguaaw. <sup>58</sup> Abi' gogbee ree lasa'man në ree bën zobj gajxh guial baya Dios laaman, dád babaa reeman big-naj reeman laaman. <sup>59</sup> Chi ma gojc xin-

dobëz guin toxman, dxel binë reeman laax guyux sen ni ru ree bën Israel. Abi' guyën reeman nagu' reeman laj-doox Zacarías zi'c la xdadix, <sup>60</sup> per guneex xniaax, rëbaman:

—Ad zayutan zian. Rayal gaquim Waj.

<sup>61</sup> Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

<sup>62</sup> Abi' con sen gunabdiidx reeman loj

xdad kindobëz guin chu rënman grii lajx.

<sup>63</sup> Zianz gunabaman tibia' tabl abi' baaaman lojn: “Waj grii lajx.” Dád badx-aloj gra ree bën guin. <sup>64</sup> Loj hor ziigajc gojc banee Zacarías, abi' guzuloj cuza'taman Dios zagdx. <sup>65</sup> Gra ree bën zojbnëman gajxh dád badxa loj reeman, xt gra ree guiedx riga' lad ree guia' niz Judea gogbee reeman graczi ni goc. <sup>66</sup> Guiáad graczi ree bën gogbee zian, rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

### Ni guneex Zacarías

<sup>67</sup> Zacarías, bën naj xdad xindo guin guyu xSprijt Dios luxdooxman guidiblagaa, zianz guzuloj caneeman, rëbaman:

<sup>68</sup> Benza'c bendxoon naj Dios, dux Dad ree nayajc ree bën Israel,

guial bi'taman bidganajman dunuj ree nayajc ree xbejnman, bidgalëë tëeman dunuj ree loj ni cayza'c ree.

<sup>69</sup> Guxhaalaman tijb bën rajp guialrniabee din yabëëman dunuj ree loj ni cayza'c ree,

zëëdaman loj xdiaa rey Davi, bën naj xbejn Dios.

<sup>70</sup> Zi'c been Dios promejs diizd gocli, zian guneex ree bën badëë xtiidxaman loj ree bejn, bën guban ree zi'c rënman:

<sup>71</sup> guial yabëëman dunuj ree loj ree bën ralen dunuj ree, në loj gra ree bën yu'xyajnx dunuj ree,

<sup>72</sup> yaya tëëman dux bëngulal ree, abi' ad zayanladxtaman promejs ni beenman.

<sup>73</sup> Ni ne naj promejs ni beenman loj dux bëngulal ree Abraham:

<sup>74</sup> guial yabëëman dunuj ree loj ree bën ralen dunuj ree,

din chile' yaguieen ree sirv lojman sin guialrdxeb,

<sup>75</sup> yabajn ree yaguieen tëë ree zi'c rënman, guidib tiamp ni yabajn ree.

<sup>76</sup> Guiáad lüj xi'n, guinieex ree bejn lüj bën rudëë xtiidx Dios loj ree bejn, Dios yu' xanyabaa.

Din nedil chiguieenchaawil xnejz bën naj Dad,

<sup>77</sup> guliüü tëël xbejnman din gagbee reeman xhienaag gac xtol reeman perdon,

laa tëë reeman loj casti.

<sup>78</sup> Guial raya da't dux Dad ree dunuj ree, zeel guxhaal xi'nman, bën naj zi'c xbacha' gubijdx din gusniman du loj ree,

<sup>79</sup> guixhial tëëman xquiarguejnx ree bën zë loj nejzmal, bën ad nabant ree xnejz zi'c rën Dios,

guliüü tëëman dunuj ree yadxoo ree loj xnejzaman din yabajn ree zagdx sin wadijl.

<sup>80</sup> Guiáad xindo guin guni'six guyu tëë xquiarguejnx mazri por Dios. Guzujx loj yujbidx, xt bidxin dxej guneex xtiidx Dios loj ree bën Israel.

### Rajl Jesús

(Mt. 1:18-25)

**2** Lën ree dxejzii gunabee rey César Augusto guiyab gra ree bejn guidib lod rniabeeman. <sup>2</sup> Laan naj ni yaloj biyab ree bejn chi goc Cirenio gobernador Siria. <sup>3</sup> Graczi ree bejn naj yaguiaj ladx ladx din guiyab reeman. <sup>4</sup> Zianan zeel brii Xiëb luguiedx Nazaret ni riga' niz Galilea, wejman Belén, ni riga' niz Judea, lod gol rey Davi din loj xdiaa rey

Davi zëed Xiëb. <sup>5</sup>Wejman binëman Li, lacheelaman din guiyab reeman. Ma yu' xi'n Li. <sup>6</sup>Abi' la'tgaj za' reeman Belén, bidxin dxej gojl bejndobëz guin. <sup>7</sup>Yagaj gol xi'n yaløj Li, dxel batüübaman bejndobëz guin lajd, gudijxhaman laaman lod ru ni raw ree be, guial ad bidxejlt lënu naya'n reeman.

**Bidxin ree xianjl Dios lod  
za' ree bën rajp xiil**

<sup>8</sup>Gajxh Belén guin za' ree bën rajp xiil, abi' dajn guin gajc rdëd reeman guiaal rajp reeman laa reeb. <sup>9</sup>Dxejczy balüüloj tijb xianjl Dios loj reeman, naynidxuj basni xbiani Dios lod riga' reeman abi' dád bidxeb reeman. <sup>10</sup>Per rëb anjl guin loj reeman:

—Ad rdxebidi din zidnë'n diidxza'c lojdi, por laan yabaa gra ree bejn. <sup>11</sup>Yan, ladx rey Davi ma gojl bën yabëë lëjt loj ni cazajquidi, laaman naj Cristo, laaman naj Dad. <sup>12</sup>Abi' din yayünbeedi laaman; nadüübaman lajd, naga'man lod ru ni raw ree be.

<sup>13</sup>Dxejczy balüüloj zien da't ree anjl cwë' anjl yaløj guin, ruza't reeman Dios zagdxë, rëb reeman:

<sup>14</sup>¡Benza'c bendxoon naj Dios bën yu' xanyabaa, abi' loj guidxliuj yabe'cdxëman luxdoo bën rüjn ree zi'c rënman!

<sup>15</sup>Chi ma zia ree anjl guin xanyabaa, dxel rëb loj lasa' ree bën rajp ree xiil guin:

—Yo' ree Belén yuquiaa ree ni goc ni, zi'c ma bagojn dux Dad ree Dios dunuj ree.

<sup>16</sup>Dxel cari da't zë reeman, abi' bidx-aagloj reeman Li në Xiëb, nëtëë bejndobëz guin naga'man lod ru ni raw ree be. <sup>17</sup>Chi baguiaa reeman laaman, be reeman diidx ni rëb anjl guin loj reeman xcwent bejndobëz guin, <sup>18</sup>abi' graczi ree bën biguiejn dád badxa loj reeman ni rëb ree bën rajp ree xiil guin. <sup>19</sup>Per Li,

rgu'chaaw luxdooan gra ni rucaagdia-jgaman, rüjn tëëman laan xgab. <sup>20</sup>Dxel zia ree bën rajp ree xiil guin, rabaa reeman rudëë tëë reeman quixtëë loj Dios por gra ni baguiaa reeman biguiejn tëë reeman, guial gojc zi'c rëb anjl guin loj reeman.

**Binë reeman Jesús lën  
yadooro' Jerusalén**

<sup>21</sup>Chi ma gojc toxman gojl bejndobëz guin, badxe' reeman laaman sen ni ru ree bën Israel, bagu' tëë reeman lajman Jesús zi'c rëb anjl guin loj Li chi gad Jesús gacxhiey lënman.

<sup>22</sup>Chi bayaaloj ree dxej ni been Li zi'c rüjn ree béngunaa rajl xi'n, dxel binë reeman bejndobëz guin loj Dios lën yadooro' Jerusalén. <sup>23</sup>Been reeman zian din loj ley guin ca: “Gra ree xindonigu-iaaw rajl yaløj ma naj reex par Dios.” <sup>24</sup>Abi' binë reeman gon par Dios zi'c rniabee ley: rayal chinë reeman tio'p gug-doo o tio'p palomdoo.

<sup>25</sup>Tiamp zii zojb bën la Simeón Jerusalén. Najman benza'c rën tëëman Dios, rbëzaman bën gagnë bën Israel ree za'në tëë xSprijt Dios laaman. <sup>26</sup>Abi' por Sprijt guin gogbeeman guial ad zëjtta-man xt guguiaaman Cristo, bën guix-hiaalaman. <sup>27</sup>Dxel por xSprijt Dios wejman lën yadoo guin, Xiëb con Li bidx-innë reeman Jesús din güün reeman zi'c rniabee ley, <sup>28</sup>zianz gudiidx Simeón bejndobëz guin baza'taman Dios zagdxë, rëbaman:

<sup>29</sup>Dad, yanri ma babedxe luxdon.

Ma zajc guslaal naj guiëtan najn xmojsil, ma gojc zi'c nal.

<sup>30</sup>Din con quijb guiaaloon ma baguian bën gagnë dunujn.

<sup>31</sup>Guial ma bazujl laaman loj gra ree bénguidxliuj.

<sup>32</sup>Laaman naj biani par ree bën ad najt bën Israel,

naj tēeman bacha' par ree xbén Israelil.

<sup>33</sup>Guiáad Xiëb con xniaa Jesús dád badxa loj reeman ni bigueijn reeman rëb Simeón xcwent bejndobëz guin. <sup>34</sup>Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bën Israel laa loj dol, per zien reeman yaya'n loj xtol. Zidgalüüman bejn ree conin naj ni ruladx Dios, per zien reeman ad zënt laaman. <sup>35</sup>Abi' zian gagbeeman xhienaag naj xixgab tijbgaj bejn, guiáad lüj zi'c tijb espad chëez luxdool chi gac ree ni guin.

<sup>36</sup>Yagaj gajc za' tijb béngunaa yo'xh laman Ana, rudëeman xtiidx Dios loj ree bejn, xdadaman brii laj Fanuel, xdi-aagulalaman gojc Aser. Benguiagan chi cwa' xinguaaw laaman, abi' gajdx ijsi gubajnnë lacheelaman. <sup>37</sup>Ma gojc tajp-gajlbitap ijz baya'nman bizëjb. Zianczi yu'man lën yadooro', rba'nman rbejdx rniab tēeman Dios. <sup>38</sup>Loj hor ziigajc bibigaman lod za'në Xiëb Li con Jesús, guzuloj cudëedaman quixtëë loj Dios cuza't tēeman bejndobëz guin loj gra ree bën cabëz guixhiaal Dios bën gagnë bën Jerusalén ree.

### Zia reeman Nazaret

<sup>39</sup>Chi ma been reeman graczi ni rniabee xley Dios, dxel zia ladx reeman Nazaret ni riga' niz Galilea. <sup>40</sup>Cani's bejndobëz guin, cayuman gojl, cayajcaman nasin, cayüjnle' tēë Dios laaman.

### Yu' Jesús lën yadooro' Jerusalén

<sup>41</sup>Gazob ijz rej ree xdad Jesús Jerusalén lanij pascw. <sup>42</sup>Chi baza' Jesús chiptio'p ijz, binë ree xdadaman laaman lanij zii zi'c naj xcostumbr reeman. <sup>43</sup>Chi ma gudëd lanij guin, baza ree xdad Jesús ma zia ladx reeman. Ad gogbeet reeman baya'n Jesús Jerusalén. <sup>44</sup>Gunaladx reeman ma no'chaman loj

ree bën zia. Zian guza reeman tibdxej. Per chi baguiil reeman laaman loj lasa' reeman në loj ree bën nünbee reeman, <sup>45</sup>achut laaman naguiee. Dxel bayejc reeman zia reeman Jerusalén zatijb zigdiil reeman laaman.

<sup>46</sup>Xt ni gocri choon dxej badxejl reeman laaman lën yadooro' Jerusalén, zojbaman galay ree mextr rajc ley, cucaag-diajgaman canabdiidx tēeman laa reeman. <sup>47</sup>Gra ree bën caguiejn ni rnieeman caydxaloy reeman guial rajcaman në ree diidx radxi'man. <sup>48</sup>Chi baguiaa ree xdadaman laaman, dád badxaloy reeman, dxel rëb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan lüj.

<sup>49</sup>Badxi' Jesús laan rëbaman:

—¿Chexc zeel raguiilidi naj? ¿Nid rag-beedi ya rayal günan xchiin da Dadan?

<sup>50</sup>Per ad bignia't reeman xhie rën guieb ni rëbaman.

<sup>51</sup>Dxel bayejcnëman laa reeman zia reeman Nazaret, graczi xtiidx ree xdadaman ruzoobaman, guiáad xniaaman graczan rgu'chaaw luxdooan. <sup>52</sup>Zi'cri cani's Jesús cayu tēë mazri xquiarguejnman. Rabaanë Dios laaman rabaanë tēë ree bejn laaman.

### Rzuloy Waj rulüüman xtiidx Dios

(Mt. 3:1-12; Mr. 1:1-8; Jn. 1:19-28)

**3** Chi goc chiin ijz rniabee rey Tiberio, abi' Poncio Pilato najman gobernador Judea, Herodes najman gobernador Galilea, bijchaman Filip najman gobernador Iturea në Traconite, guiáad Lisantias najman gobernador Abilinia. <sup>2</sup>Anás në Caifás naj reeman bixhioz rniabee gra ree bixhioz. Lën ree dxej zii gunee Dios Waj, xi'n Zacarías lod naj yujbidx. <sup>3</sup>Dxel gudëd Waj graczi ree guiedx riga' ro' guiw Jordán, rëbaman loj ree bejn din yayüjn reeman xgab por xtol



reeman tiobnijs tëë reeman, din güün Dios xtol reeman perdon. <sup>4</sup>Zian gojc cumplid ni bacaa Isaías bën badëë xtiidx Dios loj ree bejn, lod rëbaman: Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree Dios, gol guxhal tijb nejz nali.

<sup>5</sup>Gra ree la'ch yadxa reen guiáad ree guia' con

ree lom yayajc reen tibloj, në ree nejz volt yayaali yadxa tëë ree lunejz ni ad najt tibloj.

<sup>6</sup>Gra ree bénguidxliuj guguiaa bën guixhiaal Dios gagnë dunuj ree.”

<sup>7</sup>Chi brii zien ree bejn din guroobnijs Waj laa reeman, rëbaman loj reeman:

—ǀXi'n xindxab lëjt! ǀChu bagojn lëjt guial laadi loj castiro' ni zëëd?

<sup>8</sup>Gol gubajn zagdxë din guiguien guial waliqui ma bayijndi xgab por xtolidi, ad guiëb tëë loj lasa'di: “Dunujn zio'p loj xdiaa Abraham”, din naj rni lëjt xt guiaj guie ree zajc yayüjn Dios xdiaa Abraham. <sup>9</sup>Abi' ree bën ad zinalt xnejz Dios zi'c rayal, ma zidyob dxëj ni güünnë Dios laa reeman zi'c rüjnnë bejn tijb yag chi ad rtiatan, rütüügaman laan din che'can.

<sup>10</sup>Dxel gunabdiidx reeman, rëb reeman:

—ǀXhie rayal yaguienan?

<sup>11</sup>Badxi' Wajn rëbaman:

—Bën yu' tio'p xab, rayal gudëëman tijban loj bën achet rajp. Guiáad bën yu' ni raw, rayal gudëëman ta'nan loj bën ryaadxan.

<sup>12</sup>Në tio'p choon ree bën ruquijx im-puest bidxin din tiobnijs reeman. Abi' gunabdiidx reeman loj Waj, rëb reeman:

—Mextr, laadx dunujn, ǀxhie rayal yaguienan?

<sup>13</sup>Badxi' Wajn, rëbaman:

—Ad guquijxidi mazri guial loj ni rayal guquijxidi.

<sup>14</sup>Yu' tëë ree suldad gunabdiidx loj-man rëb reex:

—Laadxza dunujn, ǀxhie rayal yaguienan?

Badxi'man laan rëbaman:

—Ad cwëëxuudi xhie xieen bejn, guial guchejbidi laa reeman o gudxiibidi guijc reeman ni ad beent reeman, gol guziib-nejz tëë ni rajxidi.

<sup>15</sup>Guiáad ree bejn gagbeenezdoo reeman bal Wajn naj Cristo, <sup>16</sup>per rëbaman loj gra reeman:

—Naj curoobnijs lëjt con nijs. Per zëëd tijb bën guroobnijs lëjt con xSprijt Dios në bajl. Laaman rajp mazri gualrni-abee guial lon, ni'qui xgurëchaman ad zajct gaxhiecan. <sup>17</sup>Abi' zi'c raya trigo zian güünnëman bejn. Din bën zinal ree xnejz Dios yayal reeman lod rniabee-man, guiáad ree bën ad zinalt xnejz Dios guixhiaalaman laa reeman loj bajl ni ad yu't dxëj yayü'.

<sup>18</sup>Zian guneenë Waj laa reeman, në ree con diidx ren guneenëman laa reeman rulüüman laa reeman xtiidxza'c Dios. <sup>19</sup>Gudilë tëëman rey Herodes guial cwa'man Herodías xbéngunaa bi-jchaman Filip, në por graczi ni mal ni ma beenman. <sup>20</sup>Per luar nidxga' Herodes xtiidx Waj aal beenman zatijb ni mal: badxe'man Waj ladxguilib.

### Riobnijs Jesús

(Mt. 3:13-17; Mr. 1:9-11)

<sup>21</sup>Chi curoobnijs Waj bejn ree nëgajc Jesús guroobnijs. Abi' la'tgaj cabejdx canabaman Dios, bixal xanyabaa <sup>22</sup>zianz biguiajt xSprijt Dios zi'c tijb palom xt guijcaman. Dxel biguien cha' tijb bejn xanyabaa, rëbaman:

—Lüj naj da xi'nan, rënan lüj rabaanë' tëën lüj.

### Bën goc ree xdiaagulal Jesús

(Mt. 1:1-17)

<sup>23</sup>Cost gajlbichii ijz yu' Jesús chi guzu-loj beenman xchiin Dios. Naladx ree bejn xi'n Xiëb najman, Xiëb guin gojc

xi'n Elí. <sup>24</sup>Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiëb, <sup>25</sup>Xiëb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai, <sup>26</sup>Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiëb, Xiëb gojc xi'n Judá, <sup>27</sup>Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri, <sup>28</sup>Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er, <sup>29</sup>Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat, <sup>30</sup>Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiëb, Xiëb gojc xi'n Jonán, Jonán gojc xi'n Eliaquim, <sup>31</sup>Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán, <sup>32</sup>Natán gojc xi'n Davi, Davi gojc xi'n Isai, Isai gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón, <sup>33</sup>Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá, <sup>34</sup>Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor, <sup>35</sup>Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala, <sup>36</sup>Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec, <sup>37</sup>Lamec gojc xi'n Matusalén, Matusalén gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán, <sup>38</sup>Cainán gojc xi'n Enós, Enós gojc xi'n Set, Set gojc xi'n Adán, guíaad Adán gojc xi'n Dios.

## Been xindxab Jesús prueb

(Mt. 4:1-11; Mr. 1:12-13)

**4** Yu' xSprijt Dios luxdoo Jesús guidiblagaa. Chi bazaman guiwro' Jordán dxel binë xSprijt Dios laaman lod naj yujbidx. <sup>2</sup>Ni guzuman tiuu dxej tiuu guiaal, abi' been xindxab laaman prueb. Achetczi gudawaman dxej zii ree, zianz gulaanman. <sup>3</sup>Dxel rëb xindxab guin lojman:

—Bal wali najl Xi'n Dios, gunabee yayajc guiaj guie guidxtil.

<sup>4</sup>Badxi' Jesús laan rëbaman:

—Loj xtiidx Dios rëb: “Ad ganaxtizi guidxtil guiban bejn, nëgajc gra diidx rníee Dios.”

<sup>5</sup>Dxel binë xindxab guin laaman tijb guijc guia' ya da't, lod balüüx laaman gra ree nacion riga' loj guidxliuj. <sup>6</sup>Abi' rëb xindxab guin lojman:

—Gunen graczi guialrniabee në guialnaza'c ni yu' loj ree nacion guie. Din naj ca' laa reen, zajc gudëdan laa reen loj chutéëz bën rënan. <sup>7</sup>Bal guzuxibil lon abi' guiën da'til naj, graczan gac xieenl.

<sup>8</sup>Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëël laaman, abi' tijbzi laaman been sirv.”

<sup>9</sup>Dxel binë xindxab guin laaman Jerusalén, abi' gulë'pix laaman guijc yadooro' zojb luguiedx guin. Zianz rëbix lojman:

—Bal wali najl Xi'n Dios, gudidya' di-izd guie xt luyuj, <sup>10</sup>din loj xtiidx Dios rëb:

Dios guixhiaal ree xianjlaman din guinia reeman lüj.

<sup>11</sup>Yales reeman lüj con yaa reeman, chitëë quuilguijdx guiaj guia'l.

<sup>12</sup>Badxi' Jesús laan rëbaman:

—Rëb tëë loj xtiidx Dios: “Ad güünl prueb xDadil Dios.”

<sup>13</sup>Chi ad badxeljtri xhienaag güin xindxab guin Jesús prueb, dxel biquiedix tiblädäd.

**Rzuloj Jesús rulüüman  
bejn ree niz Galilea**

(Mt. 4:12-17; Mr. 1:14-15)

<sup>14</sup>Badxin Jesús niz Galilea, yu' xSprijt Dios luxdooan guidiblagaa, abi' guidibczi niz yagaj bire'ch xtiidxaman. <sup>15</sup>Rulüüman bejn ree lën ree yadoo guidib niz yagaj, abi' graczi reeman ruza't laaman zagdx.

**Radxin Jesús Nazaret**

(Mt. 13:53-58; Mr. 6:1-6)

<sup>16</sup>Badxin Jesús Nazaret luguiedx lod guni'saman. Abi' dxej raziiladx ree bejn guyuman lën yadoo zi'c naj xcostumbran. Dxel guzuliman persi biilaman xtiidx Dios. <sup>17</sup>Badëäd reeman gui'ch ni baciaa Isaiás bën badëä xtiidx Dios loj ree bejn. Chi bachijlaman loj gui'ch guin, badxejlaman lod rëb:

<sup>18</sup>XSprijt dux Dad ree Dios za'në naj, din laaman ma beenle' naj din ganen xtiidxza'caman loj ree bënprob. Guxhaalaman naj din gugoynan bejn ree xhienaag laa reeman loj ni rzajc reeman, yaxhal tëen loj ree bénlutia'p.

Gün tëen yudar bën rusagzi reeman, <sup>19</sup>din gugoynan guial ma bidxin dxej za'cdxoon ni güinle' Dios bejn ree.

<sup>20</sup>Dxel batüüb Jesús gui'ch guin bayüman laan loj bën rüjn yudar lën yadoo guin, zianz gurejman. Graczi ree bën riga' yagaj ruguiaadxijch laaman. <sup>21</sup>Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguiejndi.

<sup>22</sup>Graczi reeman cuza't laaman zagdx caydxa tëe loj reeman diidxza'cdxoon ni caneeman. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

<sup>23</sup>Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayüjn lüj gajc”, na tëedi: “Ni ma baguiejnan beenl Capernaum në-gajc guie beenan najn ladxil.”

<sup>24</sup>Rëb tëe Jesús:

—Diidxliczi rmin, ni'czi tijb bën rudëe xtiidx Dios loj ree bejn, ad rënt reeman laaman ladx gajcman. <sup>25</sup>Gol basaaladx dád zien ree bëgunaa bizëjb zojb Israel lën ree dxej guban Eliás bën badëä xtiidx Dios loj ree bejn, chi ad golt guia choon ijz garol, abi' guyu gubijn guidibczi. <sup>26</sup>Per ad guxhaalt Dios Eliás guin loj tijb ree bën bizëjb zojb Israel, guxhaalaman laaman loj tijb bën bizëjb zojb guiedx la Sarepta, gajxh Sidón. <sup>27</sup>Në lën ree dxej guban Eliseo bën badëä xtiidx Dios loj ree bejn, dád zien ree bejn rajc guial-guijdx la lepra, per ni'czi tijb reeman ad bayüjntaman, tijbzi bën Siria bayüjnman laman Naamán.

<sup>28</sup>Chi biguiejn gra ree bën yu' lën yadoo guin ni rëb Jesús, dád balen reeman. <sup>29</sup>Bisu reeman babëä reeman Jesús luguiedx guin, dxel binë reeman laaman ro' tijb bala' ya guial naj guiedx guin guijc tijb guia', din gutedia' reeman laaman. <sup>30</sup>Per gudëd Jesús galay reeman, ziataman.

**Rabëe Jesús xindxab luxdoo tijb bejn**

(Mr. 1:21-28)

<sup>31</sup>Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiladx reeman. <sup>32</sup>Abi' dád badxaloj reeman ni rulüüman guial rnieenëman laa reeman con guialrniabee.

<sup>33</sup>Lën yadoo guin yu' tijb xin yu' xindxab luxdoo, abi' guridxa' xindxab guin rëbix:

<sup>34</sup>—Basa'n dunujn, ¿xhie rënl con dunujn, Jesús bën Nazaret? ¿Zëädil ya

zidganijtil dunujn? Nünbeen lüj, naya nalil najl xi'n Dios.

<sup>35</sup>Dxel gudilë Jesús xindxab guin, rëbaman lojx:

—¡Bacwëz ro'l, barii luxdoo xin guin!

Zianz badxe'bi xindxab guin xin guin luyuj guidib niz loj reeman, bariitix luxdoox achetczi goquix. <sup>36</sup>Graczi reeman badxaløj, rëb loj lasa' reeman:

—¿Xhie ree diidx guin rnieeman? ¡Con guialrniabee ni rajpaman, rniabeeman rarii ree xindxab luxdoo ree bejn!

<sup>37</sup>Abi' guidibczi niz yagaj bire'ch xtiidxaman.

### Rayüjn Jesús xnasuegr Bëd

(Mt. 8:14-15; Mr. 1:29-31)

<sup>38</sup>Dxel barii Jesús lën yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayüjnman laaman. <sup>39</sup>Zianz basajb loj Jesús lod naga'man gunabeeman yarii xliaa guin, abi' bariin. Loj hor ziigajc bixcheman guzuløj cudëëman ni gaw reeman.

### Rayüjn Jesús zien ree bënragxuu

(Mt. 8:16-17; Mr. 1:32-34)

<sup>40</sup>Chi ma wëz gubijdx, graczi ree bën rajp bënragxuu bën rajc ree gadxagayaa guialguijdx binë reeman laa reeman loj Jesús, persi badxiib yaaman guijc tijb gaj reeman, bayüjnman laa reeman. <sup>41</sup>Në zien ree bënragxuu guin rarii xindxab luxdoo, rbidxa' reex rëb reex:

—¡Lüj naj Xi'n Dios!

Per gudilëman xindxab guin ree, ad cwëjbtaman niniee reex, guial ragbee reex laaman naj Cristo.

### Rulüü Jesús xtiidx Dios niz Galilea

(Mr. 1:35-39)

<sup>42</sup>Chi bareguiaal, barii Jesús luguiedx guin zëman lod achut bejn zojb. Per raguiil ree bënguiedx guin laaman, bidxin reeman lod za'man abi' rëb ree-

man lojman din yaya'nnëman laa reeman. <sup>43</sup>Per rëbaman loj reeman:

—Në ree luguiedx ren rayal chinë'n xtiidxza'c Dios guial xhienaag naj xguialrniabeeman, din par zian guxhaalaman naj.

<sup>44</sup>Zian basnuu guneeaman xtiidx Dios lën ree yadoo niz Galilea.

### Rniaaz reeman zien bëjl

(Mt. 4:18-22; Mr. 1:16-20)

**5** Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios. <sup>2</sup>Dxel baguiaa Jesús tio'p barcw ro' nijs guin; ni basa'n ree bën rniaaz bëjl la'tgaj caguiib xguijxh reeman ni rniaaznë reeman bëjl. <sup>3</sup>Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuløj culüüman bejn ree. <sup>4</sup>Chi gulox guneeëman laa reeman, dxel rëbaman loj Simón:

—Binë barcw guin lod mazri naxhit, gol bazaal xguijxhidi din guiniaazidi bëjl.

<sup>5</sup>Badxi' Simón laan rëbaman:

—Mextr, gudëd guiaalczu baguieenan dxiin, achutczi bëjl wanaazan. Per bal lüj na, yazaalan guijxh guin ree.

<sup>6</sup>Chi bazaal reeman guijxh guin ree loj nijs guin, bëjl zien da't gunaaz reeman xt guzuløj cayaxya' ree guijxh guin. <sup>7</sup>Abi' been reeman sen loj ree xcompniar reeman bën yu' ree loj stijb barcw guin, din chiguieen reeman laa reeman yudar. Dxel wej reeman, abi' bacha reeman bëjl guin ree loj grop barcw guin xt ma nizëëb reen xan nijs. <sup>8</sup>Chi baguiaa Simón Bëd ni goc, bazuxibaman loj Jesús rëbaman:

—Biquied lod za'n, Dad, din bëndol naj.

<sup>9</sup>Guial Simón con ree bén za'nëman badxa loj reeman guial dád zien bëjl gu-naaz reeman. <sup>10</sup>Ziangajc badxaloj ree Jacob con Waj, bén naj ree xi'n Zebedeo, naj tëë reeman xcompniar Simón. Per reë Jesús loj Simón:

—Ad rdxebil, din diizd yan guto'pil bejn ree par Dios luar guiniaazil bëjl.

<sup>11</sup>Dxel babëë reeman barcw guin ree loj nijs guin, basa'n reeman laa reen, zinalt reeman Jesús.

### **Rayüjn Jesús tijb bén rajc guialguijdx la lepra**

(Mt. 8:1-4; Mr. 1:40-45)

<sup>12</sup>Chi za' Jesús tijb luguiedx, bidxin tijb bén rajc guialguijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, rëbaman:

—Dad, bal rënl, zajc yayüjnl naj.

<sup>13</sup>Zianz basli yaa Jesús baqui'man laaman, rëbaman:

—Rënan. Bayajc.

Loj hor ziigajc bayajc bén guin. <sup>14</sup>Dxel rëb Jesús lojman:

—Achuczi loj guiëbil guial ma bayajquil. Lojzi bixhioz wej din guguaaman lüj. Binë gon ni rayal chinël zi'c gunabee Moisejs din gagbee gra bejn guial ma bayajquil.

<sup>15</sup>Per guixie guixie mazri bire'ch xtiidx Jesús por gra ree ni zagdxe rüjnman. Abi' dád benzien rdo'p din gucaagdijag reeman ni rnieeman yayüjn tëëman laa reeman guialguijdx ni rajc reeman. <sup>16</sup>Guiáad laaman rejman niz lod achut bejn zojb, persi rbejdx rniabaman Dios.

### **Rayüjn Jesús bén nëjt xcuerp**

(Mt. 9:1-8; Mr. 2:1-12)

<sup>17</sup>Tijb dxex culüü Jesús bejn ree, abi' zojb tio'p choon ree bënfarisew në ree

mextr rajc ley, zëëd reeman guiedxdo ni riga' ree niz Galilea në niz Judea, në Jerusalén. Za'në xguialrniabee Dios laaman persi rayüjnman bënragxuu ree. <sup>18</sup>Dxel bidxin tio'p choon ree bejn, bidxinnë reeman tijb xin nëjt xcuerp, naga'x loj da. Abi' guyën reeman niunë reeman laax lënü guin din niguijxh reeman laax lod za' Jesús. <sup>19</sup>Per ad badxejlt ban niz niunë reeman laax guial bén guixiuj riga' yagaj. Dxel wë'p reeman guijc yu guin, abi' biquied reeman tex dxiib guijcan, zianz gulet reeman xinragxuu guin guidib naga'x loj da guin, gudijxh reeman laax galay ree bén guin lod za' Jesús. <sup>20</sup>Chi baguiaa Jesús guial rliadax reeman laaman; rëbaman loj xinragxuu guin:

—Xi'n, ma benan xtolil perdon.

<sup>21</sup>Per ree mextr rajc ley con ree bënfarisew guzuloj cayüjn reeman xgab: “¿Chu xin guin zeel rüjnx mazri xin zojbloj guial loj Dios? Achutczí rajc rüjn perdon dol, tijbzi Dios.”

<sup>22</sup>Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian?

<sup>23</sup>¿Conin ad nawëëgt gac, guial guiën ya: “Ma naj xtolil perdon”, o guiën: “Bixche guza tëë”? <sup>24</sup>Per yan, gulün lëjt guial Bén guxhaal Dios rajpaman guialrniabee loj guidxliuj guie din güünman perdon dol ree.

Dxel rëb Jesús loj xinragxuu guin:

—¿Bixche, baca' ni go'til loj! Baguiaj lidxil.

<sup>25</sup>Loj hor guin gajc bixchex guidibloj gra ree bén riga' yagaj balesix ni go'tix loj, zianz zia lidxix ruza'tix Dios zagdxe. <sup>26</sup>Graczi reeman badxaloj ruza't tëë reeman Dios zagdxe abi' dád bidxeb reeman, rëb reeman:

—¿Ni'qui tijb ad waguiaat ree zi'ct naj ni cayguiaa ree yan!

### Rbejdx Jesús Leví

(Mt. 9:9-13; Mr. 2:13-17)

<sup>27</sup> Chi gudëd gojc zian, baguiaa Jesús tijb bén ruquijx impuest, laman Leví, zobjaman lod ruquijxaman. Abi' rëbaman lojman:

—Tanal naj.

<sup>28</sup> Dxel bisu Leví, guro'nladxaman gran zinaltaman Jesús.

<sup>29</sup> Abi' been Leví lanijro' lidxaman par Jesús, në zien ree bén ruquijx impuest zobj nëtëë ree ben ren zobjnë reeman xan mex. <sup>30</sup> Per ree bénfarisew ree në ree mextr rajc ley, bén nuchajg gajc ree bénfarisew guin, guzuloj caneguijdx reeman xbejn ree Jesús, rëb reeman:

—¿Chexc zeel rë' rawnëdi bén ruquijx ree impuest në ree bëndol?

<sup>31</sup> Badxi' Jesús laan rëbaman:

—Bënnadaan ree ad riaadxt reeman doctor, bénragxuu ree laa reeman riaadx Doctor. <sup>32</sup> Ad zialtan par ree benza'c, zialan par ree bëndol din yayüjn reeman xgab por xtol reeman.

### Rniabdiidx reeman loj Jesús xcwent guialrba'n

(Mt. 9:14-17; Mr. 2:18-22)

<sup>33</sup> Bénfarisew ree në ree mextr rajc ley, rëb reeman loj Jesús:

—Xbejn Waj, në ree xbejn ree bénfarisew dád zien volt rba'n reeman rbejdx rniab tëë reeman Dios, guiáad ree xbejnl ganax rë' raw reeman.

<sup>34</sup> Badxi' Jesús laan rëbaman:

—¿Wen zajc güündi naguiejn ya guiba'n ree biooz za' loj guialruxhliaa, la'tgaj za'në xin cuxhliaa guin laa reeman? <sup>35</sup> Per guidxin dxej chiquiedix, dxel guiba'n reeman.

<sup>36</sup> Rëb tëëman loj reeman:

—Achut bén rutüüg ta'n lajd cüb din yata'man laan loj lajd yojx. Bal güünman zian, zaguixya' lajd cüb guin lajdyojx guin, nëtëë yan ad zuguaatan za-

gdxe loj lajdyojx guin. <sup>37</sup> Ad rgu' tëët bejn vin cüb lën anfr yojx, din bal güünman zian, zaguixya' vin cüb guin anfr guin, abi' zi'c anfr guin zi'c vin guin zaxin reen. <sup>38</sup> Zeel vin cüb rayal chu'n lën anfr cüb din ni'qui tijb reen ad zaxint. <sup>39</sup> Abi' tijb bén ma gu' vin yu' gocli ad rë'taman vin cüb, din rëbaman: “Vin yu' gocli mazri ni zagdxen.”

### Rgui'ch ree xbejn Jesús trigo dxej raziiladx ree bén Israel

(Mt. 12:1-8; Mr. 2:23-28)

**6** Tijb dxej raziiladx ree bén Israel, la'tgaj cadëd Jesús con ree xbejman loj tijb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman. <sup>2</sup> Abi' yu' ree bénfarisew rëb loj reeman:

—¿Chexc zeel rüjndi ni ad rayalt güündi dxej raziiladx ree bejn?

<sup>3</sup> Badxi' Jesús laan, rëbaman:

—¿Gadidi gool loj xtiidx Dios ya ni been Davi chi gulaanman con ree xcompniaraman? <sup>4</sup> Guyuman lën xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

<sup>5</sup> Rëb tëë Jesús loj reeman:

—Bén guxhaal Dios rajpaman guialrniabee dxej raziiladx ree bejn.

### Rayajc tijb xin naxü'n tiblax yaa

(Mt. 12:9-14; Mr. 3:1-6)

<sup>6</sup> Zatiyb dxej raziiladx reeman, guyu Jesús lën tijb yadoo abi' guzuloj culüüman bejn ree. Yagaj za' tijb xin naxü'n yaa ladbee. <sup>7</sup> Abi' ree mextr rajc ley në ree bénfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús. <sup>8</sup> Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guguli galay guin.

Dxel guzulix, guzujx galay guin. <sup>9</sup>Dxel rëb Jesús loj reeman:

—Ganabdiidxan lëjt: ¿Xhie rayal güün bejn dxej raziiladx reeman, ni zagdxe ya o ni mal? ¿Guslaaman xguialnaban bejn ya o gugüjtaman laaman?

<sup>10</sup>Dxel baguiaa Jesús gra ree bën riga' yagaj, abi' rëbaman loj xin guin:

—Basli yaal.

Dxel beex zi'c rëbaman, abi' bayajc yaax. <sup>11</sup>Per laa reeman dád bidxe'ch reeman, guzuloj rëb loj lasa' reeman xhien-aag güünnë reeman Jesús.

### Rbe Jesús chiptio'p ree apóstoles

(Mt. 10:1-4; Mr. 3:13-19)

<sup>12</sup>Lën ree dxej zii wej Jesús tijb ruguia' persi gurejdx gunabaman Dios, abi' gudëd guiaalczi gurejdx gunabaman Dios yagaj. <sup>13</sup>Chi bareguiaal, gurejdxaman bën nal ree laaman, dxel gulejman chiptio'p reeman loj reeman, abi' guneeman laa reeman apóstoles. <sup>14</sup>La reeman: Simón, bën gulëelajman Bëd, Andrejs bijch Simón, Jacob, Waj, Felip, Tol, <sup>15</sup>Matew, Tumajs, Jacob xi'n Alfeo, Simón, bën bi'ch loj ree bën cananistas, <sup>16</sup>Judas xi'n Jacob, në Judas Iscariote bën bayü Jesús.

### Rulüü Jesús zien ree bejn

(Mt. 4:23-25)

<sup>17</sup>Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman në ree ben ren, bën zëed ree niz Judea në Jerusalén në ree bën zëed Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tëëman laa reeman guialguijdx ni rajc reeman. <sup>18</sup>Në ree bën yu' xinxab luxdoo bayajc. <sup>19</sup>Zeel graczi ree bejn rën guqui' laaman, guial rayüjnman laa reeman con xguialrniabeeman.

### Xiquilbaa ree bejn

(Mt. 5:1-12)

<sup>20</sup>Dxel baguiaa Jesús loj ree xbejnman, abi' rëbaman:

—Xiquilbaadi bënprob, din lëjt rayal loj xguialrniabee Dios.

<sup>21</sup>'Xiquilbaadi bën rliaan ree yan, din Dios gunee ni gawidi xt chigdxinlaxidi. 'Xiquilbaadi bën roon ree yan, din zadxin dxej guxijdxidi.

<sup>22</sup>'Xiquilbaadi chi rdxe'ch bejn lëjt, chi rabëëca reeman lëjt, rnieeguijdx tëë reeman lëjt, naladx reeman najdi bendxuudx guial riladxidi Bën guxhaal Dios. <sup>23</sup>Gol babaa gol badxe' tëë luxdoodi zagdxe chi güünnë reeman lëjt zian, din zro' ni tia'di yu' xanyabaa, din ziangajc beennë xbéngulal reeman bën badëë ree xtiidx Dios loj ree bejn.

<sup>24</sup>'Per probza lëjt benrijcw, din ma guyuxgaj luxdoodi nix.

<sup>25</sup>'Probza lëjt bën raw xt rigdxinlaxidi yan, din zadxin dxej guiliaandi.

'Probza lëjt bën ruxijdx yan, din zadxin dxej goondi guial chu'nayadi.

<sup>26</sup>'Probza lëjt, bën ruladx ree guilies bejn xvalor, din zian beennë ree xbéngulal reeman bën goc ree bën rusquiee, rëb reeman rudëë reeman xtiidx Dios loj ree bejn.

### Guyën bën rdxe'ch lüj

(Mt. 5:38-48; 7:12)

<sup>27</sup>'Per ganin lëjt bën rucaagdiajg ree da diidxan: Gol guyën bën ralen lëjt, gol gojc benza'c con ree bën yu'xyajn lëjt, <sup>28</sup>gol bazaal diidxza'c guiyc ree bën ruzaal diidxmal guijquidi, gol gurejdx gunab Dios por ree bën rnieeguijdx lëjt. <sup>29</sup>Bal chu chëëz tiblax hajguil, badëëd zatibladan, bal chu cwëëxuu xchamar-ril, ad cwexuul chinëman në xmanguil. <sup>30</sup>Chutëëz bën rniab xhienin lojl, badëëdan. Bal chu rquied xhie xieenl, ad bal

yanabilan. <sup>31</sup> Gol beennë ree bejn zi'c rëndi güünnë reeman lëjt.

<sup>32</sup> 'Bal rëndi ganaxzi bën rën lëjt, ¿xhieza ni zagdxen cayüjndi? Din xt bëndol ree rüjn zian, rën reeman bën rën laa reeman. <sup>33</sup> Abi' bal rüjndi wen ganaxzi bën rüjn lëjt wen, ¿xhieza ni zagdxen cayüjndi? Din xt bëndol ree rüjn zian. <sup>34</sup> Ziangajc bal rudëëdidi ni rgui'n ganaxzi bën naladxidi zajc yaguijx lojdi, ¿xhieza ni zagdxen cayüjndi? Din xt në ree bëndol rudëëd rgui'n ree bën naladx reeman zajc yaguijx loj reeman. <sup>35</sup> Per lëjt gol guyën bën ralen lëjt, gol been reeman wen. Gol badëëd qui'n reeman, ad cwëzidi xhie tia'di guijcan. Zian tia'di zro' guialnaza'c ni gunee Dios bën yu' xanyabaa, gac tëëdi xi'nman, din laaman naj benza'c con ree bën ad rudëët quixtëë lojman në con ree benmal. <sup>36</sup> Gol baya bejn zi'c raya dux Dad ree Dios bejn.

### Xcwent guialrula'ch

(Mt. 7:1-5)

<sup>37</sup> 'Ad gula'chidi, ad gudxiib tëëdi ni mal guijc ree bejn chitëë saquidi zian, gol been perdon din gaquidi perdon. <sup>38</sup> Gol badëëd ni riaadx ree bejn, Dios mazri zro' naj ni gunee man zi'c tijb bols guidxadi. Din zi'c rudëëdidi loj ree bejn, ziant gajc naj ni gunee Dios lojdi.

<sup>39</sup> Rëb Jesús loj reeman zatijb diidx:

—¿Wen zajc chinë bën lutia'p zatijb bën lutia'p ya? ¿Nid zayajb grop reeman ro' bala' ya? <sup>40</sup> Tijb bën cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ct-gajc rajc xmextraman.

<sup>41</sup> 'Ad gula'chil ben ren por faltdobëz ni rajpaman, zagdxeli guyu xgab por falt narooob ni rajpil. <sup>42</sup> Abi' bal mazri falt narooob rajpil, ¿xoxo guiëbil loj zatijb bejn: “Ad laat naj ni rüjnl”? ¡Bën rusquiee! yalojxgaj been zi'c rayal, chi ma beenl

zian dxel ma zile' guiëbil loj zatijb bejn: “Ad laat naj ni rüjnl”.

### Por ni rtia loj yag rayünbee bejn xhie yagan

(Mt. 7:17-20; 12:33-35)

<sup>43</sup> 'Ad yu't yag zagdxë rtia ni guijdx loj, ad yu' tëët yag guijdx rtia ni zagdxë loj. <sup>44</sup> Din tijbgaj yag rayünbee bejn xhie yagan por ni rtia lojn. Ad raru't higo loj yaquieëjch, ad raru' tëët uv loj gui'xh. <sup>45</sup> Benza'c rnieeman diidxza'c din laan yu' luxdoooman, guiáad benmal rnieeman diidxmal din laan yu' luxdoooman. Din ni yu' luxdoo bejn laan rnieeman.

### Tio'ploj cimiant

(Mt. 7:24-27)

<sup>46</sup> '¿Chexc zeel rnieedi naj, “Dad, Dad”, abi' adza rüjntidi ni rnin? <sup>47</sup> Ganin lojdi chu naj zi'c bën ri't lon, riguejman ni rën, abi' rüjnman laan: <sup>48</sup> laaman naj zi'c tijb bën been yu, yaloj xgaj gudëenman naxhit xt chi bila loj guiaj, dxel gulesaman xcimiantan guijc guiaj guin. Abi' chi bi't nijsro' majsi gulajn lad yu guin, per ni'quid baniibtan laan guial naj cimiant guin guijc guiaj. <sup>49</sup> Per bën riguejman da diidxan abi' ad rüjntaman laan, najman zi'c tijb bën been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblyaazi base'nan laan.

### Rayajc xmojs tijb suldad rom xin rniabee ree suldad

(Mt. 8:5-13)

**7** Chi gulox gunee në Jesús bejn ree, dxel zëman Capernaum. <sup>2</sup> Yagaj zojib tijb suldad Rom xin rniabee ree suldad. Yu' tijb xmojsix xin rën da'tix, ragxu mojs guin ma rulüüci zi'c guiëtix. <sup>3</sup> Chi biguejman suldad rniabee guin ruza't ree bejn Jesús, guxhaalix tio'p choon ree bën rniabee Israel lojman din chisajc reeman liaadx yayüjnman xmojsix. <sup>4</sup> Abi' bidxin



reeman loj Jesús guzajc reeman liaadx, rëb reeman:

—Gagnësiil suldad rniabee guin, <sup>5</sup> din rën bën duladx ree, në yan por laax gojc dux yadoo ree.

<sup>6</sup> Dxel binë Jesús laa reeman. Per chi ma cadxin reeman gajxh lidxix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lëñü lidxan, <sup>7</sup> zeel ad bayaxtan nial quijb naj nidgadılan lüj. Per con guneë diizd lod za'l din yayajc da mojsan. <sup>8</sup> Din zi'c naj yu' ree bën rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx. Chi rën loj zatijbix: “Guda”, ri'tix. Abi' chi rën loj da mojsan: Been ni guin, rüjngajquixan.

<sup>9</sup> Chi biguiejn Jesús zian, dád badxa lojman ni rëb suldad guin, abi' badxi' lojman loj gra ree bën zinal laaman, rëbaman:

—Diidxiczi rnin, ni'qui Israel ad wadxaaglojtan tijb bën rliadx da't Dios zi'c rliadx xin guin Dios.

<sup>10</sup> Chi badxin ree xin guxhaal suldad rniabee guin lidxix, baguiaa reex ma bayajc mojs guin.

### **Rasban Jesús xi'n tijb béngunaa bizëjb**

<sup>11</sup> Chi gudëd gojc zian, wej Jesús tijb luguiedx la Naín binë ree xbejnman, në zien ree ben ren. <sup>12</sup> Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xniaax, najman bën bizëjb. Zien da't ree bénluguiedx guin zinal laaman. <sup>13</sup> Chi baguiaa Dad Jesús laaman, bayaman laaman, dxel rëbaman lojman:

—Ad roonl.

<sup>14</sup> Abi' bibig Jesús baqui'man xcax xingüt guin, dxel guzudxe ree bën zinë laax. Zianz rëbaman lojx:

—Xi'n, naj rni lojl: ¡Bixche!

<sup>15</sup> Dxel gureli xin guin, guzuloj ca-neex, zianz bayü Jesús laax loj xniaax.

<sup>16</sup> Chi baguiaa reeman zian, graczi reeman bidxeb guzuloj cuza't reeman Dios zagdx, rëb reeman:

—Du loj ree ma gules Dios tijb bën zobjloj, bën rudëë xtiidx Dios loj ree bejn.

Rëb tëë reeman:

—Ma bi't Dios din gagnë ree xbejnman.

<sup>17</sup> Abi' guidib niz Judea në ree guiedx riga' niz yagaj gogbee ree bejn ni been Jesús.

### **Bigneenë ree xbejn Waj Jesús**

(Mt. 11:2-19)

<sup>18</sup> Gogbee Waj gra ree ni cayüjn Jesús, guial bagojn ree xbejnman laaman. Abi' guneeman tio'p reeman, <sup>19</sup> dxel guxhaalaman laa reeman loj Jesús din chignabdiidx reeman bal laacaman naj Cristo bën naj diidx gui't, bën cabëz reeman, o cwëz reeman ben ren ya. <sup>20</sup> Abi' bibig reeman, guneenë reeman laaman, rëb reeman lojman:

—Waj bën ruroobnijs bejn ree guxhaal dunujn lojl zudganabdiidxan bal lüjcan naj Cristo bën naj diidx gui't, bën caylëjzan o yalëjzan ben ren ya.

<sup>21</sup> Hor ziigajc bayüjn Jesús zien da't ree bënragxuu, në ree bën rdoob, nëtëë ree bën yu' xindxab luxdoo, baxhal tëëman loj ree bénlutia'p. <sup>22</sup> Dxel badxi' Jesús xtiidx ree bën guxhaal Waj, rëbaman:

—Gol chej, gol chiguiedx loj Waj ni cuguiaadi në ni caguiejndi. Gol güjdx lojman guial ma ruguiaa ree bénlutia'p, ma rajc rza ree bencoj, ma rayajc tëë ree bën goc guialgujdx la lepra, ma rigujc ree bën nacwa't, guiáad ree bengüt ma baban reeman, abi' ree bénpob ma caguiejn reeman xtiidxza'c Dios. <sup>23</sup> ¡Xiquilbaa ree bën ad zucwëët chililadx naj!

<sup>24</sup> Chi baza ree b́en guxhaal Waj, guzu-  
loj Jeśus caneeman xcwent Waj loj ree  
bejn, ŕebaman:

—¿Chu naladxidi naj b́en biquiaadi  
loj yujbidx? ¿Naladxidi ya najman zi'c  
tijb biqui runiib bi? <sup>25</sup> ¿O chu biquiaadi?  
¿Tijb b́en najcw lajd zagdx ya? Ĺejt rag-  
bee guial b́en rajcw ree lajd zagdx, ńe  
ree b́en naban zagdx, ĺen palas zojb ree-  
man. <sup>26</sup> ¿Chu biquiaadi? ¿Tijb b́en rud́e  
xtiidx Dios loj ree bejn ya? Per diidxliczi  
rnin lojdi, biquiaadi tijb b́en mazri zo-  
jbloj guial loj tijb b́en rud́e xtiidx Dios  
loj ree bejn. <sup>27</sup> Wajn naj b́en ruza't xtiidx  
Dios, lod ŕeb:

Naj rxhial tijb b́en ned lojl,  
b́en gúinchaaw xnejzil.

<sup>28</sup> Rnin ĺejt, loj graczi ree b́enguidxliuj  
ad wayut b́en rud́e xtiidx Dios loj ree  
bejn, b́en mazri zojbloj guial loj Waj. Per  
majsi zian, b́en ad zojblojt loj xguialrni-  
abee Dios, laaman mazri zojbloj guial loj  
Waj.

<sup>29</sup> Gra ree bejn, ńe ree b́en ruquijx im-  
puest b́en baroobnijs Waj, chi biguiejn  
reeman ni ŕeb Jeśus bignia' reeman guial  
ŕijn Dios zi'c rayal. <sup>30</sup> Per ree b́enfarisew  
con ree mextr rajc ley ad cwéjbt ree-  
man nuroobnijs Waj laa reeman, zian  
ad guyént reeman ni ŕen Dios par laa  
reeman.

<sup>31</sup> Ŕeb t́ee Jeśus:

—¿Xhienaag ganin ĺejt naj ree b́en  
riga' loj guidxliuj guie yan? ¿Chu naj  
zi'c laa reeman? <sup>32</sup> Laa reeman naj zi'c  
ree xindoo rguijt niz galay luguiedx,  
abi' rbixdiaj reex ŕeb loj lasa' reex:  
“Bacwejdxan par nuya'di, per ad baya'-  
tidi, badoolan ni naya ree, per ad bi-  
intidi.” <sup>33</sup> Din bi't Waj b́en baroobnijs  
bejn ree, ad rawtaman ad ŕe' t́eétaman  
vin, abi' ŕebidi xindxab yu' luxdooman.  
<sup>34</sup> Yan bi't B́en guxhaal Dios, rawaman  
ŕe' t́eeman vin, abi' ŕebidi guial d́ád nala-  
man ruladxaman guié'man, ruchajg t́eeman  
b́endol ree con ree b́en ruquijx im-

puest. <sup>35</sup> Per xguialrignia' Dios, rguienan  
por ree xbejnman.

### Rej Jeśus lidx tijb b́enfarisew la Simón

<sup>36</sup> Tijb b́enfarisew ŕeb loj Jeśus din  
chitaw Jeśus guin lidxaman. Abi' bidx-  
inman lidxaman gurejman xan mex.  
<sup>37</sup> Dxel tijb b́engunaa dxuudx zojb gajc  
luguiedx guin. Chi gogbeeman cayaw  
Jeśus lidx b́enfarisew guin, bidxinnéman  
tijb lumejt yu' perfum. <sup>38</sup> Dxel roonman  
gurejman lod nuzuj guia' Jeśus, guzu-  
loj caxhie' nijs carii lojman guia' Jeśus.  
Abi' cucwiidxné guidxguijcaman laan,  
cayawaman xid guia'man curoob t́eeman  
laan perfum guin. <sup>39</sup> Chi baguiaa  
b́enfarisew guin zian, beenman xgab:  
“Balgui zian wali b́en guin najman b́en  
rud́e xtiidx Dios loj ree bejn, zagbee-  
man chunin cuqui' laaman xhie t́eeman  
naban b́engunaa guin, najman bendxu-  
udx.” <sup>40</sup> Dxel ŕeb Jeśus loj b́enfarisew  
guin:

—Simón, yu' tijb ni ganin ĺij.

Badxi' b́enfarisew guinan ŕebaman:

—Gunan, mextr.

<sup>41</sup> Abi' ŕeb Jeśus lojman:

—Tijb b́en rud́eéd milia rgui'n ree  
bejn, ral tio'p ree bejn lojman. Tijba-  
man nuzéeb gaaygayuu denario, zatijba-  
man nuzéeb tú'pchiin. <sup>42</sup> Grop reeman  
ad beent gan naguijx lojman, per b́en  
badéed milia guin ŕebaman loj reeman  
guial ad zaguijxt reeman ni nuzéeb ree-  
man. Yan guna, ¿chu loj grop reeman  
mazzt guién laaman?

<sup>43</sup> Badxi' Simón laan, ŕebaman:

—Par naj, b́en bazéeb mazri zro' guin.

Dxel ŕeb Jeśus:

—Waliquíl.

<sup>44</sup> Zianz baguiaa Jeśus loj b́engunaa  
guin, abi' ŕebaman loj Simón:

—¿Ruguaiaal b́engunaa guie ya? Chi  
guyu'n lidxil ad baneetil nijs niéd guia'n.  
Guiáad laaman gudiibaman guia'n con

nijis brii lojman, abi' bacwiidxaman laan con guidxguijcaman. <sup>45</sup>Ad gudawtil naj xid, guiáad laaman diidz chi guyu'n ad rbézt rawaman xid guia'n. <sup>46</sup>Achet sejt badxe'l guican, per laaman ma badxe'-man perfum guia'n. <sup>47</sup>Zeel rnin lüj, gra ree xtolaman ma gojc perdon guial rën da'taman naj. Per bën yu' ta'nz xtol abi' rajcaman perdon, ta'nz rënman naj.

<sup>48</sup>Dxel rëb Jesús loj béngunaa guin:

—Ma naj gra xtolil perdon.

<sup>49</sup>Guiáad ree bën zojbnëman yagaj guzuloj canabdiidx loj lasa' reeman, rëb reeman:

—¿Chu bën guin zeel xt në ree dol rüjnman perdon?

<sup>50</sup>Per rëb Jesús loj béngunaa guin:

—Ma najl perdon guial rililadxil naj, baguiaj zagdx ad rural xgab.

### Béngunaa been ree Jesús yudar

**8** Chi gudëd gojc zian, wej Jesús gra ree guiedx narooob në ree guiedx dobëz bicojnman biglüü tëëman xhien-aag naj xgualrniabee Dios. Në guidx-iptio'p ree apóstoles binëman, <sup>2</sup>nëtëë tio'p choon ree béngunaa, bën babëë-man xindxab luxdoo, në ree bën bayüjnman guialguijdx ni rajc reeman. Loj reeman no'ch María Magdalena, bën babëë Jesús gajdx xindxab luxdoo. <sup>3</sup>Në Xuan, lacheel Cuza, Cuza guin goc bën nulen xchiin Herodes. Në Susan nëtëë zien ree béngunaa ren, been reeman yudar Jesús con ni rajp reeman.

### Xcwent bën rtie'ch bin

(Mt. 13:1-9; Mr. 4:1-9)

<sup>4</sup>Zien ree bejn brii loj ree guiedx ziquiaa reeman Jesús. Chi bido'p ree benzien, beman tijb cwent loj reeman rëbaman:

<sup>5</sup>—Tijb bejn zëman zigtie'chaman bin. Chi catie'chaman laan, ta'nan biajb lunejz abi' balëë ree bejn guijcan gudaw tëë ree biguijn laan. <sup>6</sup>Zata'nan biajb loj

ree guiaj, chi gulejn reen gubidx reen guial ad yu' xcojpt loj ree guiaj guin. <sup>7</sup>Zata'nan biajb loj ree yaquiëjch. Abi' chi guni's reen tijbzi, banidloj yaquiëjch guin laa reen. <sup>8</sup>Zata'nan biajb loj yujza'c abi' dád gojcan, cwa xt tibgayuu bin loj tijbgajn.

Chi gulox gunee Jesús zian, dxel guneeaman rejs rëbaman:

—Bën rën gucaagdiajg, gol bacaagdiajg.

### Chexc zeel rulüü Jesús con cwent ree

(Mt. 13:10-17; Mr. 4:10-12)

<sup>9</sup>Dxel gunabdiidx ree xbejn Jesús lojman, rëb reeman:

—¿Xhie rën guiëb cwent guin?

<sup>10</sup>Badxi' Jesús laan rëbaman:

—Lëjt, Dios ma basa'n lëjt din chignia' di xhienaa naj xgualrniabeeman. Per loj gra reeman rünan zi'c cwent din majsi rani loj reeman, per ad zuguaat reeman, majsi riguejn reeman, per ad zig-nia't reeman.

### Rusignia' Jesús

#### xcwent bën rtie'ch bin

(Mt. 13:18-23; Mr. 4:13-20)

<sup>11</sup>'Ni ne rën guiëb xcwent bën rtie'ch bin: Bin guin naj zi'c xtiidx Dios, <sup>12</sup>guiáad bin biajb runejz naj zi'c ree bën riguejn xtiidx Dios; per rdxin gajc xindxab rquiedix laan luxdoo reeman chitëë chililadx reeman laan abi' gac reeman perdon. <sup>13</sup>Guiáad bin biajb loj ree guiaj, naj zi'c ree bën riguejn xtiidx Dios, abi' dád nix ru luxdoo reeman riguejn reeman laan, per guial naj reeman zi'c cwaan ni ad yu't liuj, rililadx reeman laan tiblädëd abi' chi rzagdiaj reeman laa rusa'n gajc reeman ni rililadx reeman. <sup>14</sup>Guiáadza bin biajb loj ree yaquiëjch, naj zi'c ree bën riguejn xtiidx Dios; per ru reeman xgab por gra ree guialnaza'c riga' loj guidxliuj guie rüjn tëë reeman ni rëntzi reeman, abi' zianz rucwëëz ru-

caagdiajg reeman xtiidx Dios ad rüjn tēēt reeman ni rēnman. <sup>15</sup>Guiáad bin biajb loj yujza'c, laan naj zi'c ree bēn rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tēē reeman loj xnejzaman, zianczi rüjn reeman ni rēnman.

### **Achet ni naguie'ch yu'**

(*Mr. 4:21-25*)

<sup>16</sup>'Achut bēn ruze'c tijb gui j dxel ruta'cwaman laan, ad rudxe' tētaman laan xan lon, ruzujman laan ya din gusnin loj ree bēn chu' lēnü. <sup>17</sup>Achet ni naguie'ch yu' ni ad zaguiet ad yu' tēēt ni ralan ni ad zagbeet bejn, zadxin dxej gagbee bejn laan.

<sup>18</sup>'Zeel gol bacaagdiajg zagdx, bēn ma rignia' gusnuu chignia'man mazri, per bēn ad rignia't, xt ta'n ni naladxaman rignia'man ad zignia'traman.

### **Xniaa Jesús con ree bijchaman**

(*Mt. 12:46-50; Mr. 3:31-35*)

<sup>19</sup>Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'. <sup>20</sup>Abi' yu' bēn bagojn Jesús rēbaman:

—Laa xniaal con ree bijchil za' lule' guin rēn reeman guineenē reeman lüj.

<sup>21</sup>Badxi' Jesús laan rēbaman:

—Bēn rucaagdiajg ree xtiidx Dios rüjn tēē reeman zi'c rēnman, laa reeman naj da nan laa tēē reeman naj da bichan.

### **Racwēēz Jesús bidoxh**

(*Mt. 8:23-27; Mr. 4:35-41*)

<sup>22</sup>Tijb dxej guyu Jesús loj barcw con ree xbejnman, abi' rēbaman loj reeman:

—Yo' ree zatiblad ro' nijs guin.

Zianz zē reeman. <sup>23</sup>La'tgaj cadēd reeman loj nijs guin, goodyēs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazēēbczi

barcw guin xan nijs. <sup>24</sup>Dxel bacwēēn reeman Jesús, rēb reeman:

—¡Mextr! ¡Mextr! ¡Ma cayzēēb ree xan nijs!

Abi' bixche Jesús gunabeeman bacwēēz bidoxh guin nē xtüjp nijs guin, zianz gulējz reen dxel bayajcdxe. <sup>25</sup>Abi' rēbaman loj reeman:

—¿Conza xguiarlrliladxidi?

Per laa reeman dád bidxeb reeman badxa tēē loj reeman, abi' canabdiidx loj lasa' reeman rēb reeman:

—¿Chu bēn guin zeel rniabeeman bi nē nijs, abi' ruzoob reen xtiidxaman?

### **Rayüjn Jesús tijb xin yu' xindxab luxdoo**

(*Mt. 8:28-34; Mr. 5:1-20*)

<sup>26</sup>Dxel badxin Jesús con ree xbejnman xdajn ree bēn Gadara, ni riga' zatiblad ro' nijs Galilea. <sup>27</sup>Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xindxab luxdoo. Ad rajcwt xabix, ad nabantix lēnü, ganaxzi ro' ree baa nabanx. <sup>28</sup>Chi baguiaax Jesús bazuxibix lojman, guneex rejs rēbix:

—¿Xhie rēnl con naj, Jesús, Xi'n Dios yu' xanyabaa? Rniaaban lojl ad gusagzil naj.

<sup>29</sup>Rēbix zian guial ma canabee Jesús din yarii xindxab guin luxdoo. Ma gojc xchej naaz xindxab guin laax. Abi' ma guxhii ree bejn yaax nē guia'x con caden chitēē ban chex, per rutüguia'gajquix caden guin abi' rulaagdx xindxab guin laax niz lod achut bejn zojb.

<sup>30</sup>Gunabdiidx Jesús lojx rēbaman:

—¿Chu lal?

Badxi'xan rēbix:

—Legión lan.

Rēbix zian guial zien da't ree xindxab yu' luxdoo. <sup>31</sup>Rēb ree xindxab guin loj Jesús chitēē guixhiaalaman laa reex gabijl. <sup>32</sup>Dajn guin riga' zien ree cüch cayaw reeb. Zeel rēb ree xindxab guin

lojman din gudëeman mod chu' reex lën ree cüch guin, dxel cwëjbbaman. <sup>33</sup> Zianz barii reex luxdoox bayu reex lën ree cüch guin, abi' guzuloj cuxüün reeb zianz bitidia' reeb ro' bala' xt loj nijs, lod gu' reeb nijs abi' güjt reeb.

<sup>34</sup> Chi baguiaa ree bën cayajp ree cüch guin ni goc, baxüün reeman bicojn reeman bejn ree luguiedx në ree dajn.

<sup>35</sup> Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xindxab guin ree luxdoo, zojbix guia'man ma najcw xabix, ma badëdguienx abi' bidxeb reeman. <sup>36</sup> Guiáad ree bën baguiaa ni goc, be reeman diidx loj reeman xhienaag bayajquix. <sup>37</sup> Graczi ree bën zojb Gadara gunab loj Jesús din yazaman yagaj guial dád rdxeb reeman. Dxel bayë'paman loj tijb barcw, ziataman. <sup>38</sup> Guiáad xin barii xindxab guin ree luxdoo rëbix lojman din chinalix laaman, per ad cwëjbtaman, rëbaman lojx:

<sup>39</sup> —Baguiaj lidxil, biguiedx graczi ni been Dios por lüj.

Dxel ziax luguiedx guin abi' bex diidx loj gra ree bejn ni been Jesús por laax.

**Rayajc xi'n Jairo në  
béngunaa bagaal xab Jesús**

(Mt. 9:18-26; Mr. 5:21-43)

<sup>40</sup> Chi badxin Jesús zatiblad ro' nijs guin, dád rabaa gra ree bën za' yagaj guial badxinman din mal cabëz reeman laaman. <sup>41</sup> Dxel bidxin bën la Jairo, laaman rniabee lën tijb xyadoo ree bën Israel. Bazuxibaman loj Jesús, rëbaman lojman din cheman lidxaman, <sup>42</sup> guial yu' tijb xi'nman biin chiptio'p ijz, ma guiëtczim. Chi zë Jesús dád zien ree bejn zinal laaman xt rixa't reeman laaman.

<sup>43</sup> Abi' tijb béngunaa no'ch loj reeman, ma gojc chiptio'p ijz ragxuuman rya-jbaman rejn. Ma baniytaman graczi ni rajpaman guial wejman loj ree doctor, per ni'qui tijbaman ad gojct nayüjn laa-

man. <sup>44</sup> Bibigaman niz xijch Jesús abi' bagaalaman guia' xabaman. Loj hor zigajc bayajcaman.

<sup>45</sup> Dxel gunabdiidx Jesús rëbaman:

—¿Chu baqui' naj?

Abi' graczi reeman rëb guial ad laat reeman baqui' laaman. Zianz rëb Bëd loj Jesús:

—Mextr, graczi ree bejn xt rixa't reeman lüj cucadxaa tëë reeman lüj, abi' rniabdiidxil chu baqui' lüj.

<sup>46</sup> Per rëb Jesús zatijb:

—Yu' chu baqui' naj din gogbeen yu' tijb bën ma bayajc con da guialrniabeen.

<sup>47</sup> Chi gogbee béngunaa guin guial ma gogbee gajc Jesús ni beenman, guidib rnijman bigzuxibaman loj Jesús. Dxel rëbaman lojman guidibloj ree bën guin chexc zeel baqui'man xabaman abi' loj hor guin gajc bayajcaman. <sup>48</sup> Dxel rëb Jesús lojman:

—Xi'n, ma bayajquil guial bililadxil naj, baguiaj zagdxë.

<sup>49</sup> Sta caneenë Jesús béngunaa guin, chi bidxin tijb bën guza lidx Jairo, bën rniabee lën xyadoo ree bën Israel, rëbaman loj Jairo:

—Mal güjt xi'nl, ad ruslenril Mextr guin.

<sup>50</sup> Per chi biguiejn Jesús zian, rëbaman loj Jairo:

—Ad rdxebil, bililadxzi, zayajcqui xi'nl.

<sup>51</sup> Chi bidxin reeman lidxaman, ad cwëjbt Jesús niu ree ben ren, Bëdzi con Waj, con Jacob, con ree xdad xniaa bindo guin. <sup>52</sup> Graczi ree bën riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëjszim.

<sup>53</sup> Graczi reeman baze' laaman guial ma ragbee reeman güjtim. <sup>54</sup> Dxel gunaaz Jesús yaam, guneeaman rejs, rëbaman:

—Bindoo, bixche.

<sup>55</sup>Loj hor ziigajc babanm, bixchem. Dxel gunabee Jesús badëéd reeman ni gudawim. <sup>56</sup>Dád badxa loj ree xdadim, per rëb Jesús loj reeman achu loj guiëb reeman ni goc.

**Rxhiaal Jesús guidxiptio'p ree xbejnman chiglüü reeman xtiidx Dios**  
(Mt. 10:5-15; Mr. 6:7-13)

**9**Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xinxab luxdoo ree bejn yayüjn tëë reeman bënragxuu ree. <sup>2</sup>Guxhaalaman laa reeman chiglüü reeman xhienaag naj xguialrniabee Dios, yayüjn tëë reeman bënragxuu ree. <sup>3</sup>Rëbaman:

—Ad chinëdi xhienin par runejz: ni'qui yagriadxidi, ni'qui guijxh, ni'qui guialraw, ni'qui milia, ni'qui stibnejz xabidi. <sup>4</sup>Chutëëz lidx guidxindi, tib gol baya'nzi xt chi yazadi luguiedx guin. <sup>5</sup>Bal yu' guiedx lod ad rënt reeman lëjt, gol baza yagaj, gol gudxijp guxyuj guia'di zi'c tijb sen guial ad rënt reeman guzoob reeman xtiidx Dios.

<sup>6</sup>Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tëë reeman bënragxuu ree.

**Riguiejn Herodes ni cayüjn Jesús**  
(Mt. 14:1-12; Mr. 6:14-29)

<sup>7</sup>Chi gogbee rey Herodes graczi ni cayüjn Jesús. Guyunawëëgaman guial yu' ree bejn rëb, Waj bën baroobnijs bejn ree ma baban, <sup>8</sup>yu' tëë reeman rëb Elíasan bën badëë xtiidx Dios loj ree bejn ma balüüloj, yu'za reeman rëb, tijb ree bën badëë xtiidx Dios loj ree bejn gocli ma baban. <sup>9</sup>Per rëb Herodes:

—Naj gajc gunabee biru' yëjn Waj. ¿Chuza bënan rigujejnan ruza't ree bejn xcwent ni cayüjnman?

Zianan zeel rüjn Herodes naguiejn guguiaaman Jesús.

**Ruyaan Jesús gaay mil bejn**

(Mt. 14:13-21; Mr. 6:30-44; Jn.6 :1-14)

<sup>10</sup>Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczí bejn zojb, gajxh guiedx Betsaida. <sup>11</sup>Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tëëman bënragxuu ree.

<sup>12</sup>Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree bën guin din yaguiaj reeman chitiil lod yaya'n reeman luguiedx doo ree në ree ranch, chitiil tëë ni gaw reeman din lod nadxu' ree achetczí yu'.

<sup>13</sup>Dxel rëbaman loj reeman:

—Lëjt gajc gol badëéd ni gaw reeman. Abi' rëb reeman:

—Per gaayzi guiadxtil naca'n con zatio'p bëjl, bajtëë bal yo'n yusiin ni gaw gra reeman.

<sup>14</sup>Abi' cost gaay mil ree xinguaaw riga' yagaj. Per rëb Jesús loj ree xbejnman:

—Gol güjdx loj reeman din cwe tü'pchii gaj reeman.

<sup>15</sup>Abi' bagojn reeman laa reeman persi gurej gra reeman zian. <sup>16</sup>Dxel cwa'man guigaay guiadxtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman din qui's reeman laan loj ree bën guin. <sup>17</sup>Graczi reeman gudaw xt bigdxinladx reeman. Abi' bato'p reeman chiptio'p dxüm nilaay baya'n.

**Rëb Bëd guial Jesús naj Cristo**

(Mt. 16:13-19; Mr. 8:27-29)

<sup>18</sup>Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman:

—¿Chu rëb ree bejn najn?

<sup>19</sup>Badxi' reeman laan rëb reeman:

—Yu' reeman rëb lüj naj Waj bën ba-roobnijs bejn ree, yu'za reeman rëb lüj naj Elías bën badëë xtiidx Dios loj ree bejn, yu' tëë reeman rëb lüj naj tijb ree bën badëë xtiidx Dios loj ree bejn gocli, bën ma baban.

<sup>20</sup>Dxel gunabdiidx Jesús zatijb, rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

### Rugojn Jesús guiëtaman

(Mt. 16:20-28; Mr. 8:30-9:1)

<sup>21</sup>Rëb Jesús loj reeman achuczi loj guiëb reeman zian, <sup>22</sup>rëb tëëman:

—Rayal sagdiaj Bén guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

<sup>23</sup>Dxel rëbaman loj gra reeman:

—Bal chu rën gac da bejnan ad ray-alt güünman zi'c naj xixgabaman, si-ibnejzaman guialzi ni tëdzaman guixie guixie abi' guidnalaman naj. <sup>24</sup>Din bën mazri rën guialnaban ni rajpaman loj guidxliuj guie, zadxin dxej gusëëbaman laan, per bën guiët por naj, zajpaman guialnaban tiblyaa con Dios. <sup>25</sup>¿Xhie gan güün bejn gapaman gra ni yu' loj guidxliuj abi' nitaman loj Dios? <sup>26</sup>Bal chu ratu guza't naj në da diidxan, ziangajc naj najn Bén guxhaal Dios, yatunë'n laaman chi guialan con da guialrniabeen loj xbiani da Dadan nëtëë loj xbiani ree xianjlaman. <sup>27</sup>Per diidxliczi rnin lojdi, yu' ree bën za' guie ad zëjtt xt guguiaa reeman xguialrniabee Dios.

### Bidxaa Jesús loj choon ree xbejnman

(Mt. 17:1-8; Mr. 9:2-8)

<sup>28</sup>Chi gudëd cost xhujn dxej ni gunee Jesús diidx guin ree, wejman persi gurejdx gunabaman Dios tijb guijc guia',

binëman Bëd con Waj con Jacob. <sup>29</sup>La't-gaj cabejdx canabaman Dios, bidxaa lojman guiáad xabaman gojcan naquichbëj bidiin tëën bacha'. <sup>30</sup>Dxejczy gulentie tio'p ree bejn, caneenë reeman laaman. Tijbaman naj Moisejs zatijbaman naj Elías. <sup>31</sup>Yu' reeman galay biani cayü reeman diidx guial guiët Jesús Jerusalén. <sup>32</sup>Majsi yu' baaal loj Bëd në loj ree xcompnaraman, batie'ch xbaaal reeman persi baguiaa reeman xbiani Jesús con zatio'p ree bën za'nëman. <sup>33</sup>Chi ma baza ree bën caneenë Jesús, rëb Bëd lojman:

—Mextr, ¿zagdxen nadxu' ree guie! Zajc yaguieenan choon ranch, tijban par lüj, tijban par Moisejs zatijban par Elías.

Per ad ragbeet Bëd xhienin caneeman. <sup>34</sup>La'tgaj caneeman zian, biguiajt tijb zaj xt guijc reeman, chi ma yu' reeman lën zaj guin dád bidxeb reeman. <sup>35</sup>Dxel loj zaj guin biguien cha' bejn, rëbaman:

—Bën guie naj da Xi'nan bën rën da'tan. Gol bacaagdiajg xtiidxaman.

<sup>36</sup>Chi gulox biguien cha'man loj zaj guin, baguiaa reeman xtijbzi Jesús za'man. Abi' ad gutie'cht reeman diidx. Lën ree dxej zii achutczzi loj rëb reeman ni baguiaa reeman.

### Rayüjn Jesús tijb xin yu' xindxab luxdoo

(Mt. 17:14-21; Mr. 9:14-29)

<sup>37</sup>Bareguiaal, chi baguiajt reeman guijc guia' guin, dád benzien brii bigchaagloj Jesús. <sup>38</sup>Abi' tijb bën no'ch loj reeman guridxa', rëbaman lojman:

—¿Mextr!, been wen baguiaa da xi'nan din tijbzi laax ra'pan. <sup>39</sup>Tijb xindxab ru luxdoox abi' rucwixdiajx laax, rugüjtya'x laax rbëë tëëx bichijn ro'x. Dád rusagdiajx laax ad rëntix guslaax laax. <sup>40</sup>Ma gunaaban loj ree xbejnl din nabëë reeman xindxab guin, per ad gojct reeman.

<sup>41</sup>Badxi' Jesús laan rëbaman:

—¿Benguijdx, bén ad riladxt! ¿Xt goc gazunë'n lëjt gadaan tëën lëjt? Tanë xi'n'l guie.

<sup>42</sup> Chi cabig xin guin basajb xindxab guin laax luyuj, bagüjtya'x laax zatijb. Per gunabee Jesús barii xindxab guin, bayünman laax dxel bayüman laax loj xdadix. <sup>43</sup> Graczi reeman badxaløj guialrniabee ni rajp Dios.

### **Rugojn Jesús zatijb guial guiëtaman**

(Mt. 17:22-23; Mr. 9:30-32)

La'tgaj caydxa loj reeman ni cayüjn Jesús, rëbaman loj ree xbejnman:

<sup>44</sup> —Gol bacaagdiajgchaaw ni ganin lëjt: yayü reeman Bén guxhaal Dios loj ree bejn.

<sup>45</sup> Per laa reeman ad bignia't reeman ni rnieeman guial ad badëëtaman mod nignia' reeman, abi' bidxeb reeman nini-abdiidx reeman lojman xhie rën guiëb ni rëbaman.

### **¿Chu mazri zøjbloj?**

(Mt. 18:1-5; Mr. 9:33-37)

<sup>46</sup> Dxel guzuloj ree xbejnman rëb loj lasa' reeman chu loj gra reeman mazri zøjbloj. <sup>47</sup> Per gogbee Jesús xgab ni cayüjn reeman abi' cwa'man tijb xindoo, bazujman laax cwë'man, <sup>48</sup> dxel rëbaman loj reeman:

—Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man. Din bén rüjn sirv lojdi, laaman mazri zøjbloj lojdi.

### **Bén ad za't contr dunuj ree za'man con dunuj ree**

(Mr. 9:38-40)

<sup>49</sup> Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

<sup>50</sup> Per rëb Jesús lojman:

—Ad rudxoondi, din bén ad za't contr dunuj ree, za'man con dunuj ree.

### **Gudilë Jesús Jacob con Waj**

<sup>51</sup> Chi ma cadxin dxej yayë'p Jesús xanyabaa, dxel beenman xgab guial rüjn naguiejn cheman Jerusalén. <sup>52</sup> Guxhaalaman bén guned ree, wej reeman tijb guiedxdo nulen Samaria bitii reeman lod yaya'n reeman. <sup>53</sup> Per ad cwëjbt ree bén Samaria guin nudëëd reeman lod naya'nman guial gogbee reeman cheman Jerusalén. <sup>54</sup> Chi baguiaa Waj con Jacob zian, rëb reeman lojman:

—Dad, ¿rënl ya yanabeen guiat bajl xanyabaa din gunijtan bén guin ree zi'c been Elías bén badëë xtiidx Dios loj ree bejn?

<sup>55</sup> Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëëd ni rnieedi? <sup>56</sup> Naj, Bén guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

### **Bén rën chinal Jesús**

(Mt. 8:19-22)

<sup>57</sup> Chi zë reeman lunejz, tijb bejn rëb loj Jesús:

—Dad, rënan guidnaalan lüj bantëëz guin chel.

<sup>58</sup> Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

<sup>59</sup> Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabënë' da Dadan xt chi guiëtaman.

<sup>60</sup> Abi' rëb Jesús lojman:

—Basa'n xdadil con ree bén ad rënt guidnal naj, laa reeman guquie'ch laa-



man. Sa'n lüj bigtie'ch diidx xhienaag naj xguialrniabee Dios.

<sup>61</sup> Dxel rëb zatijb bén guin:

—Dad, rënan guidnaalan lüj, per yalojxgaj banee mod chigzadiidxnë' ree da familan.

<sup>62</sup> Per rëb Jesús:

—Bén guiniaaz guia' garad abi' gudxi' lojman niz xijchaman, ad zile't guilia'-man yuj zagdxë. Ziangajc bén rën guidnal naj, bal id zusa'nman graczi tibladd ad zile't chu'man loj xguialrniabee Dios.

### Rxhiaal Jesús gayojnchii bejn

**10** Chi gudëd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch din ned reeman che gaj reeman lod naj cheman. <sup>2</sup>Rëbaman loj reeman:

—Diidxliczi, zien bejn rën gucaagdi-ajg xtiidx Dios, per ad zient bén guliü laa reeman yu'. Zeel gol gurejdx gunab Dios din guixhiaalaman mazri zien bén guliü laa reeman. <sup>3</sup>Gol chej, naj rxhial lëjt zi'c rej ree xiil galay ree cuyojt. <sup>4</sup>Ad chinëdi guijxh, ni'qui milia, ni'qui zatib nejz xgurëchidi, ad sudxedi guinieenëdi bejn ree runejz. <sup>5</sup>Bantëëz lënü chu'di, yalojxgaj gol güjdx: “Dios yabe'cdxe luxdoodi.” <sup>6</sup>Abi' bal lënüzii yu' ree bén rayal guialnaza'c guin, zaya'n nan yagaj. Guiáad bal id rayal reeman laan zayejcan con lëjt. <sup>7</sup>Yagaj gol baya'n, gol gudaw, gol gu' ni gunee reeman. Din bén rüjn dxiin rayal gaxaman. Yagajzi gol baya'n ad bal yaya'ndi lood ren. <sup>8</sup>Chi guidxindi tijb guiedx lod yaca' reeman lëjt, gol gudaw ni gunee reeman. <sup>9</sup>Gol bayüjn ree bënragxuu yu' ree luguiedx guin, gol güjdx tëë loj reeman: “Ma zëëd xguialrniabee Dios gajxh par lëjt.” <sup>10</sup>Per bal guidxindi tijb guiedx lod ad rënt reeman yaca' reeman lëjt, gol brii lunejz, gol güjdx loj reeman: <sup>11</sup>“Xt xgoxyuj ladxidi ni cwa du guia'n, radx-

ijpan zi'c tijb sen guial ad bidxga'tidi dux tiidxan. Per gol gogbee, guial ma zëëd xguialrniabee Dios gajxh par lëjt.”

<sup>12</sup>Naj rni lëjt guial dxej yadëëd ree bejn cwent loj Dios, mazri casti narooob yayal reeman guial loj ree bén gure guiedx Sodoma.

### Bén ad bazoobt ree xtiidx Dios

(Mt. 11:20-24)

<sup>13</sup> Rëb tëë Jesús:

—¡Probza lëjt bén Corazín! ¡Probza lëjt bén Betsaida! Din bal guiedx Tiro në guiedx Sidón niajc gra ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guiyc reeman zi'c tijb sen guial ma bayüjn reeman xgab por xtol reeman. <sup>14</sup>Per rmin lojdi guial dxej yadëëd ree bejn cwent loj Dios, mazri casti narooob yayalidi guial loj ree bén Tiro në ree bén Sidón. <sup>15</sup>Guiáad lëjt, bén Capernaum, ad naladxidi yayalidi xanyabaa, lëjt yayal gabijl.

<sup>16</sup> Dxel rëb Jesús loj ree xbejnman:

—Bén ridxga' lëjt, najn ridxga'man, per bén ad ridxga't lëjt, najn ad ridxga'taman. Guiáad bén ad ridxga't naj, bén guxhaal najn ad ridxga'taman.

### Badxin ree bén gayojnchii guxhaal Jesús

<sup>17</sup> Chi badxin ree bén gayojnchii guxhaal Jesús, dád raba reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

<sup>18</sup> Abi' rëb Jesús loj reeman:

—Waliquidi, naj baguia, zi'czi rë'p nijs basëëb xguialrniabee xindxab. <sup>19</sup>Naj banee lëjt guialrniabee din gulëëdi guiyc ree bëël në guiyc ree nixüb, në par güüнди gan loj xguialrniabee xindxab sin guial güünx lëjt xhienin. <sup>20</sup>Per ad rabaadi guial ruzoob ree xindxab guin

xtiidxidi, gol babaa guial ca lajdi loj libr yu' xanyabaa.

### Rabaa Jesús

(Mt. 11:25-27; 13:16-17)

<sup>21</sup> Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdxe, Dad, lüj rni-abee xanyabaa në loj guidxliuj, din ni baquie'chil loj ree bën rajc në loj ree bën rignia', laan ma balüül loj ree bën ad rajza'ct. Zian gojcan Dad, din zian guyën.

<sup>22</sup> 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tëët nünbee Dios, tijbzi Jesucrist xi'nman con ree bën rënman güünbee Dios.

<sup>23</sup> Dxel baguiaaman loj ree xbejnman, abi' rëbaman lojzi reeman:

—Xiquilbaa ree bën guguaa ni cuguaaadi. <sup>24</sup> Din naj rni lojdi, zien ree bën badëë xtiidx Dios loj ree bejn në ree rey guyën nuguaa ni cuguaaadi, per ad baguiaat reeman laan. Guyën reeman nucaagdiajg reeman ni cucaagdiajguidi, per ad bacaagdiajgt reeman laan.

### Xcwent tijb bën Samaria

<sup>25</sup> Tijb mextr rajc ley guzuliman guneenëman Jesús. Abi' din güünman laaman prueb, gunabdiidxaman lojman rëbaman:

—Mextr, ¿xhie rayal günan din ga'pan guialnaban tiblyaaa con Dios?

<sup>26</sup> Badxi' Jesús laan rëbaman:

—¿Xhie ca loj ley badëë Dios loj Moisejs? ¿Xhienaag rignia'lan?

<sup>27</sup> Abi' rëb mextr guin:

—“Guyën xDadil Dios guidib guiyc guidib ladxil guyën tëë ben ren zi'c rën lüj gajc.”

<sup>28</sup> Badxi' Jesús laan, rëbaman:

—Zagdxequi badxi'lan. Bal güünl zian zajpl guialnaban tiblyaaa con Dios.

<sup>29</sup> Per guyën mextr guin naya'nman zagdxe, gunabdiidxaman loj Jesús, rëbaman:

—¿Chu bënan guiënan zi'c rën naj gajc?

<sup>30</sup> Dxel be Jesús tijb cwent lojman, rëbaman:

—Tijb bën Israel briiman Jerusalén zëman guiedx Jericó. Abi' gunaaz ree xingubaan laaman, gudijn reex laaman gulan tëë reex gra ni ca'man xt në xabaman, basa'n reex laaman ma güjtczaman. <sup>31</sup> Dxel gudëd tijb bixhioz niz yagaj, per chi baguiaaman bën guin, zijt bicaaman volt, zëtaman. <sup>32</sup> Në tijb bën Levita bën rüjn yudar bixhioz ree, gudëd niz yagaj, chi baguiaaman bën guin, zijt bicaaman volt, zëtaman. <sup>33</sup> Per tijb bën Samaria gudëd niz yagaj, chi baguiaaman bën guin, bayaman laaman, <sup>34</sup> dxel gubigaman lod naga'man, badxe'man sejt con vin lod nadxeelguijdxaman dxel guxhiiman laan con lajd. Zianz badxi-ibaman laaman xburaman binëman laaman lënu lod raya'n ree bejn. Yagaj gunajman laaman. <sup>35</sup> Chi bareguiaal, chi ma yaguaiaj bën Samaria guin, gulëëman milia xieen tio'p dxej dxiin badëëman laan loj bën naj lidxan, rëbaman lojman: “Gunaj bën guie, bal gunijtil mazri, naj yaguix laan chi yaye'can.”

<sup>36</sup> Dxel rëb Jesús loj mextr guin:

—Yan, loj guiyon ree bën guin, ¿chu bënan guyën bën gudin ree xingubaan guin?

<sup>37</sup> Badxi' mextr guinan rëbaman:

—Bën baya laaman.

Dxel rëb Jesús lojman:

—Baguiaj, been ziangajc con ben ren.

### Rignaj Jesús Mart në Li

<sup>38</sup> Basnuu Jesús zëman abi' bidxinman tijb guiedxdoo, yagaj wejman lidx tijb biin la Mart. <sup>39</sup> Yu' tijb xbëlim lam Li. Gurej Li guin guia' Jesús cucaagdi-ajguim ni caneeman. <sup>40</sup> Per Mart guin

mazri ruquiejnnë gra xmandadim, abi' biguim loj Jesús rëbim:

—Dad, ¿nid rul xgab ya guial rusa'n da bëlan naj con gra mandad guin? Gújdx lojm din güünm naj yudar.

<sup>41</sup> Badxi' Jesús laan rëbaman:

—Mart, Mart, dád rul xgab guial yu' da't xmandadil. <sup>42</sup> Per tijbzi ni mazri zobjloj yu'. Li gulejm ni mazri zobjloj, abi' achut zajc chiquiedan lojm.

### **Rulüü Jesús xhienaag cwedx guiniab bejn Dios**

(Mt. 6:9-15; 7:7-11)

**11** Tijb dxej cabejdx canab Jesús Dios. Abi' chi gulox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj bën baroobnijs bejn ree.

<sup>2</sup> Abi' rëb Jesús loj reeman:

—Chi cwedx guiniabidi Dios, gol gújdx: Dad, lüj yu' xanyabaa, rayal yaya'p da'tan lajl respejt. Gac zi'c rniabeel.

Gac zi'c rënl loj guidxliuj, zi'c rajc xanyabaa.

<sup>3</sup> Bazaladx ni yadaawan guixie guixie.

<sup>4</sup> Been dunujn perdon gra ree ni mal ma baguieenan, zi'c raguieenan perdon bën rüjn ree dunujn ni mal.

Ad tiëbil güün xinxab dunujn gan yaguieenan dol, babëë dunujn loj gra ni mal.

<sup>5</sup> Abi' rëb Jesús loj reeman:

—Yaguie'ch ree, tijb lëjt yu' xmiw abi' garol guiaal chedi lidix, guiëbidi: “Miw, baneesii choon guidxtil gagui'-nan, <sup>6</sup> din bi't tijb da miwan abi' achet ra'pan gudëdan lojx.” <sup>7</sup> Dxel nax diizd lënü guin: “Ad ruslenl naj. Ma nayaaw ro' da portan. Ma naga'yë'snë' ree da xi'nan. Ad zile't chixchejn gunen laa reen.” <sup>8</sup> Per rmin lëjt, majsi bal id zixchex din guneex ni ryaadxidi guial rajc xmiwidi laax. Per züjnx naguiejn chixchex

din guneex ni ryaadxidi chitëë guslenridi laax. <sup>9</sup> Zeel rmin lëjt: Gol gunab loj Dios, laaman guneë ni rniabidi. Gol bagu'ilaman, zadxejlidi laaman. Gol gurejdx gunabaman, zidxga'man lëjt. <sup>10</sup> Din bën rniab, zaca'man. Abi' bën rguuil, zadxejlanan guíaad bën rbejdx rniab laaman zidxga'man laaman.

<sup>11</sup> ¿Lëjt najdi dad, wen zudëëdi tijb guiaj loj xi'ndi ya chi guiniabix guidahtil?, ¿o zudëëdi tijb bëël ya chi guiniabix bëjl? <sup>12</sup> ¿O zudëëdi nixüb ya chi guiniabix dxij? <sup>13</sup> Nacli lëjt najdi bëndol rajc rudëëdi ni zagdx loj xi'ndi. ¿Didixgui xDadidi bën yu' xanyabaa, nid zudëë xSprijtaman loj ree bën rniab laaman ya!

### **Rëb ree bejn ca' Jesús xguialrniabee Beelzebú**

(Mt. 12:22-30; Mr. 3:19-27)

<sup>14</sup> Caybëë Jesús tijb xinxab basa'n tijb bejn gop. Abi' chi barii xinxab guin guzuloj canee bën guin. Dxel dád badxalaj ree bejn. <sup>15</sup> Per yu' reeman rëb:

—Bën guin rabëë xinxab luxdoo ree bejn por xguialrniabee Beelzebú, xin rniabee ree xinxab.

<sup>16</sup> Yu'za reeman par güün reeman laaman prueb, rëb reeman lojman din güünman milagr zëëd xanyabaa. <sup>17</sup> Per Jesús ragbee gajcaman xgab cayüjn reeman, abi' rëbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman. <sup>18</sup> Ziangajc bal Satanás xin rniabee ree xinxab su contr lasa' xinxab gajquix, nayob nit xguialrniabee. Canin zian guial rëbidi por xguialrniabee Beelzebú rabën xinxab luxdoo ree bejn. <sup>19</sup> Per bal rabën xinxab luxdoo ree bejn por xguialrniabee Beelzebú, ¿chuza rudëëd guialrniabee loj ree xbejndi din yabëë reeman xinxab? Zeel laagajc reeman rulüü

guial ad laat rnieedi. <sup>20</sup>Per por xguialrniabee Dios rabèn xindxab luxdoo ree bejn, laan rèn guiëb guial ma za'në xguialrniabee Dios lëjt.

<sup>21</sup>'Bal tijb béngojl da't ca' xguiibaman, rajp lidxaman. Ad zajct cwan bejn ni rajpaman. <sup>22</sup>Per bal guidxin bèn mazri gojl guial lojman güünman laaman gan abi' chisüdaman guiib ni ca'-man tia' tēeman gra ni rajpaman.

<sup>23</sup>'Bén ad za't con naj, za'man contr naj, guiáad bèn ad ruto'pt bejn par naj rtie'chaman laa reeman.

### **Xindxab rayejc**

*(Mt. 12:43-45)*

<sup>24</sup>'Chi rarii tijb xindxab luxdoo tijb bejn, abi' rza xindxab guin niz loj yujbidx rguuilix lod yaziiladxix. Chi ad rdx-ejlt lod yaziiladxix, dxel rüjnx xgab nal-  
adxix: "Zagdxeli yaye'can lod bariin."

<sup>25</sup>Abi' chi rayejquix ruguiaax luxdoo bèn guin, najn zi'c tijb lënü lod bilioob lod najcchaaw tēë. <sup>26</sup>Dxel rica'x zagajdx ree xindxab naj mazri xinmal guial lojx. Abi' ru gra reex luxdoo bèn guin. Dxel pi-orli raya'nman guial zi'c gocaman yaloj.

### **Xiquilbaa ree bèn ruzoob xtiidx Dios**

<sup>27</sup>La'tgaj canee Jesús diidx guin ree, gurixdiaj tijb béngunaa no'ch loj ree benzien guin, rëbaman:

—¡Xiquilbaa béngunaa bazuj lüj loj guidxliuj, bèn baslaa tēë lüj!

<sup>28</sup>Per badxi' Jesús laan rëbaman:

—¡Mazri xiquilbaa ree bèn rucaag-diaj xtiidx Dios ruzoob tēë reeman xtiidxaman!

### **Rniab ree bejn güün Jesús tijb milagr**

*(Mt. 12:38-42; Mr. 8:12)*

<sup>29</sup>Zi'cri cado'p ree bejn lod za' Jesús, abi' guzuloj rëbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguaaa reeman, tijbzi

zi'c guzac Jonás bèn badëë xtiidx Dios loj ree bejn. <sup>30</sup>Zi'c goc Jonás tijb sen par ree bèn gure guiedx Nínive, zian-gajc Bén guxhaal Dios najman tijb sen par ree bèn naban yan. <sup>31</sup>Abi' bèn goc reina guiedx Sabá, zabanman chi yadëëd ree bejn cwent loj Dios dxel guiëbaman guial ree bèn riga' yan, yayal reeman xcasti Dios. Din laaman dád zijt guzman bicaagdiajgaman xguialrajc rey Salomón. Abi' yan, naj za'në'n lëjt, mazri lasajcan guial loj rey Salomón. <sup>32</sup>Zian-gajc ree bèn guban guiedx Nínive, zaban reeman chi yadëëd ree bejn cwent loj Dios abi' guiëb reeman guial ree bèn riga' yan, yayal reeman xcasti Dios. Din bèn Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'në'n lëjt mazri lasajcan guial loj Jonás.

### **Guiaaloy bejn naj zi'c biani**

*(Mt. 5:15; 6:22-23)*

<sup>33</sup>'Achu rucaaguij tijb guij par sun lod naguie'ch, achu tēët ruta'cw laan lën tijb yagalm. Rayal sun lod guiguienan din gusnin loj bèn chu' lënü. <sup>34</sup>Guiaaloy bejn naj zi'c tijb biani par xcuerpaman. Bal por ni ruguiaal rüjnl ni zagdx, guidib xcuerpil naj biani. Per bal por ni ruguiaal rüjnl ni mal, guidib xcuerpil naj zi'c lod nacay. <sup>35</sup>Gojp cudad chitëë chinë guiaaloyl lüj loj nejz mal luar loj nejz zagdx. <sup>36</sup>Abi' bal ni'qui tibda'n xcuerpil ad rüjnt ni mal, guidibczan gac nayni zi'c chi rusni guij con xbacha'n.

### **Ni rüjn ree mextr rajc ley në ree bënfarisew**

*(Mt. 23:1-36; Mr. 12:38-40; Lc. 20:45-47)*

<sup>37</sup>Chi gulox guneenë Jesús laa reeman, tijb bënfarisew rëb loj Jesús din chitaw Jesús lidxaman. Chi guyuman, zianz gurejman xan mex. <sup>38</sup>Abi' bënfarisew guin badxalojman chi baguiaa-

man ad banaat Jesús chi ma gawaman zi'c naj xcostumbr reeman. <sup>39</sup>Per rëbaman loj reeman:

—Najdi zi'c tijb vajs con pliajt ni naya xijch, rguienti benza'c, per luxdoodi yu' da't guialgubaan në ni mal. <sup>40</sup>¡Bennad! ¿Nid bën been gajc xcuerpidi been luxdoodi ya? <sup>41</sup>Zeel gol been yudar bën achet rajp din guiguien guial najquidi benza'c.

<sup>42</sup>¡Probza lëjt bënfarisew! Rbëecadi ni naj par Dios, rüjndi chii lala' ni rajpidi zi'c bidxtil në rud në graloj ni rxübindi abi' rudëedi tijban loj Dios. Per ad rüjntidi zi'c rayal ad rën tëëtidi Dios. Gol bidxga' Dios ad gucwëez tëë gudëedi ni rudëedi lojman.

<sup>43</sup>¡Probza lëjt, bënfarisew! guial ruladxidi cwedi lod rbej ree bën zobjbloj lën ree yadoo, ruladx tëëdi gugajpdioz ree bejn lëjt zagdxe niz lunejz.

<sup>44</sup>¡Probza lëjt, mextr rajc ley në lëjt bënfarisew, bën rusquiee!, din najdi zi'c baa ni ad rguient, abi' ad ragbeet ree bejn rë'p reeman guijcan.

<sup>45</sup>Dxel gunee tijb mextr rajc ley, rëbaman loj Jesús:

—Mextr, në dunujn canee guijdxil guial rëbil zian.

<sup>46</sup>Badxi' Jesús laan rëbaman:

—¡Ziangajc lëjt mextr rajc ley, probza lëjt!, guial rniabeedi bejn ree güün reeman ni nawëëgda't abi' rniabeezidi güün bejn zian guiáad lëjt ni'qui ta'n ad rüjntidi laa reeman yudar din güün reeman zi'c rëndi.

<sup>47</sup>¡Probza lëjt!, guial rüjnchaawidi xbaa ree bën badëë xtiidx Dios loj ree bejn, bën bagüjt gajc ree xbéngulalidi. <sup>48</sup>Zian ragbee ree bejn guial ruladxidi ni been ree xbéngulalidi. Laa reeman bagüjt ree bën badëë ree xtiidx Dios loj ree bejn, guiáad lëjt rayüjnchaawidi xbaa reeman.

<sup>49</sup>Zeel Dios guial ragbeeman gra ni gac, rëbaman: “Gaxhalan bën rudëë ree

xtiidx Dios loj ree bejn, në ree apóstoles, yu' reeman gugüjtidi yu' tëë reeman sunalidi din güündi laa reeman xhienin.”

<sup>50</sup>Abi' bën naban ree yan, laa reeman yadëed cwent loj Dios por rejn ni guxhie' ree bën badëë xtiidx Dios loj ree bejn, bën güit ree diizd chi go'tchaaw guidxliuj, <sup>51</sup>diizd xrejn Abel xt xrejn Zacarías bën bagüjt reeman ro' yadooro' Jerusalén. Zeel rnin lëjt guial ree bën naban yan, laa reeman quix por gra reeman.

<sup>52</sup>¡Probza lëjt, mextr rajc ley!, guial ad rtiëjbtidi chu' ree bejn loj xnejz Dios, ni'quiza lëjt ad rüjnt nagüiejn chu'di loj xnejz Dios abi' rudxoondi chu' ree bejn loj xnejzaman.

<sup>53</sup>Chi gunee Jesús zian, dád bidxe'ch ree bënfarisew guin në ree mextr rajc ley. Abi' guzuloj zien ree ni rniabdiidx reeman lojman, <sup>54</sup>din guidoon xhie guiëbaman din chile' gutedia' reeman laaman.

### Xlevadur ree bënfarisew

**12** La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaloj loj ree xbejnman:

—Gol gojp cudad con xlevadur ree bënfarisew, rën guiëban gapidi cudad con ni rusquiee reeman. <sup>2</sup>Din achet ni nagüie'ch yu' ni ad zagüient, ad yu' tëët ni ralan ni ad zagbeet bejn. <sup>3</sup>Zeel gra diidx ni ma guneedi lod nacay, zagüiejn ree bejn laan lod nayni. Guiáad ree diidx ni ma guneedi ralan lënü, yu' chi cwidxa' reeman guinee reeman diidx guin ree diizd guijc ree yu.

### Chu rayal guidxeb bejn

(Mt. 10:28-31)

<sup>4</sup>Rnin lëjt, ad ridxebidi bën rën ree gugüjt lëjt din zile' gugüjt reeman xcuerpidi, sa'n xsprijtidi ad zile't gugaal

reeman laan. <sup>5</sup>Ganin lëjt chu rayal guidxebidi: gol bidxeb Dios bën rajp guialrniabee guial chi ma biquiedaman xguialnabandi zajc guzaalaman lëjt gabijl. Zeel gol bidxebaman.

<sup>6</sup>Lëjt ragbee guial biguijndoo ree ad lasajct reeb wayëjx, per Dios ad rayanladxtaman ni'qui tijb reeb. <sup>7</sup>Guiáad lëjt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

### **Bén rëb loj ree bejn guial najman xbejn Jesucrist**

*(Mt. 10:32-33; 12:32; 10:19-20)*

<sup>8</sup>Rnin lëjt, chutëöz bën guiëb loj ree bejn guial najman da bejnan, ziangajc naj najn Bén guxhaal Dios guiën loj ree xianjl Dios guial da bejnan najman. <sup>9</sup>Per bën guiëb loj ree bejn guial ad najtaman da bejnan, ziangajc guiën loj ree xianjl Dios guial ad najtaman da bejnan.

<sup>10</sup>Chutëöz bën guinieeguijdx Bén guxhaal Dios zajcaman perdon, sa'n bën guinieeguijdx xSprijt Dios, ad zajctaman perdon.

<sup>11</sup>Chi chinë reeman lëjt lën ree yadoo o loj ree juejs në loj ree guxtis, ad aal chu'di xgab xhienaag yadxi'di xtiidx reeman. <sup>12</sup>Din chi guidxin hor ni guinieedi, xSprijt Dios gunee diidx guinieedi.

### **Xcwent tijb xinrijcw**

<sup>13</sup>Tijb bën no'ch loj ree benzien guin rëb loj Jesús:

—Mextr, güjdx loj da bichan din gunee ni rayalan.

<sup>14</sup>Per rëb Jesús lojx:

—¿Chu bazuj naj günan guialguxtis o gagui'san ni tia'di?

<sup>15</sup>Rëb tëëman loj reeman:

—Gol gojp cudad; ad sëëbladixidi gapidi ni rajp ree ben ren, din ad ni rajpt bejn runee guialnaban.

<sup>16</sup>Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax. <sup>17</sup>Dxel beenx xgab naladix: “¿Xhienaag günan? Ad ra'ptan lod gagu'chaawan guialnaza'c guin ree.” <sup>18</sup>Abi' gunaladix: “Ma ragbeen xhienaag günan. Guse'nan yu lod rgu'chaawan da guialnaza'can din günan mazri yu narooob ree lod gagu'chaawan laa reen, në graczi ni ra'pan. <sup>19</sup>Dxel guiën, dád zien guialnaza'c ra'pan par zien ijz, yaziiladxan, gawan, guiën yabaa tëën.” <sup>20</sup>Per rëb Dios lojx: “Xin tont, yanguxhin gajc guiëtil, laadx ni nagu'chaawil, ¿chu yaya'nnë laan?”

<sup>21</sup>Zian rzajc bën rgu'chaaw ni za'c par laagajcaman, per loj Dios achet rajpaman.

### **Achetczi rayal chu' bejn xgab**

*(Mt. 6:25-34)*

<sup>22</sup>Dxel rëb Jesús loj ree xbejnman:

—Naj rni lëjt: Ad chu'di xgab por ni gawidi par guibandi ni'qui por lajd ni gacwidi. <sup>23</sup>Guialnaban mazri lasajcan guial loj guialraw, guiáad xcuerp bejn mazri lasajcan guial loj xabaman. <sup>24</sup>¡Gol baguiaa balo ree! Ad rxübint reeb ad rato'p tëët reeb guialnaza'c, ad rajp tëët reeb lod yagu'chaaw reeb guialnaza'c guin, per Dios rudëëd ni raw reeb. ¡Abi' mazri lasajquidi guial loj reeb! <sup>25</sup>¿Wen guial ru da'tidi xgab ma güün lëjt gajc mazri ziool ya? <sup>26</sup>Abi' bal ni'qui zian ad zile't güüüdi, ¿xhieczi gan rudi xgab por ni ren ree?

<sup>27</sup>¡Gol baguiaa xhienaag rini's ree guiaa dajn! Ad rüjnt reen dxiin ad rguib tëët reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman. <sup>28</sup>Abi' bal gui'xh dajn ruzujchaaw Dios yan, majsi guixiezi che'can. ¡Didixgui lëjt, bën ad rililadxza'ct ree laa-

man nid zuneeman ni gacwidi ya! <sup>29</sup> Zeel ad rudi xgab xhie gawidi o xhie guië'di, ad bal tib yu'zidi laan xgab. <sup>30</sup> Din Bén ad nünbeet ree Dios rüjn zian. Laa reeman ru xgab por gra ree ni guin. Per lëjt yu' xDadidi, laaman ragbeechaaw xhienin riaadxidi. <sup>31</sup> Per yalojxgaj gol baguiil güüнди zi'c rniabee Dios, laaman guneec gra ni ryaadxidi.

### **Guialnaza'c yu' xanyabaa**

(Mt. 6:19-21)

<sup>32</sup> 'Lëjt najdi da bejnan, ad rdxe-bidi. Ta'nzi najdi, per xDadidi Dios ma beenman xgab nabeenëdi laaman. <sup>33</sup> Gol bato' ni rajpidi din gudëëdan loj ree Bénprob. Gol been naguiejn güüнди gan guialnaza'c ni ad rarar ni yu' xanyabaa, lod ad zut xingubaan cwan laa reen lod ad zacabe tëët reen. <sup>34</sup> Din lod rajpidi guialnaza'c guin, yagaj za' xquiarguiejndi.

### **Gol guzujsin**

<sup>35</sup> 'Gol guzujsin zi'c Bén ma najcw xab ca' tëë xguijman par griiman. <sup>36</sup> Gol been zi'c ree mojs cabëz yadxin xpatron reex, Bén zë loj guialruxhliaa, din diob guixhial reex ro' port yayuman chi gucaaman. <sup>37</sup> Xiquilbaa ree mojs naga'naa cabëz xpatron reex! Naj rni lëjt, laagajc patron guin cwe'c laa reex xan mex, dxel chicchaa xabaman din gudëëman ni gaw reex. <sup>38</sup> Xiquilbaa reex bal guidxaa-gloj xpatron reex laa reex naga'naa reex, majs yadxinman garol guiaal o chi ma cayreguiaal ya. <sup>39</sup> Gol been xgab, bal tijb bejn ragbeeman xhie hor chu' xingubaan lidxaman cwanx, ad zatiëjbtaman chu'x lidxaman. <sup>40</sup> Zianan zeel gol guzujsin din ad ragbeetidi dxejczy gui't Bén guxhaal Dios.

### **Mojs za'c në mojs guijdx**

(Mt. 24:45-51)

<sup>41</sup> Dxel gunabdiidx Bëd loj Jesús, rëbaman:

—Dad, ¿par dunujzan bel cwent guin ya o par gra ree bejn?

<sup>42</sup> Badxi' Jesús laan, rëbaman:

—¿Chu lëjt naj zi'c tijb mojs za'c, nazobdiidx, rusa'n xpatronx laax lidxaman persi rulenz gra ree mojs rudëë tëëx ni raw reex chi rajl hor? <sup>43</sup> Xiquilbaa mojs cayüjn dxiin zagdx chi yadxin xpatronx. <sup>44</sup> Din diidxliczi rnin lëjt, zusa'n gra xieen patron guin loj mojs guin. <sup>45</sup> Per bal naladx mojs guin: “Zaglaari yaguaaad da patronan”, zianz sulojx gusagzix gra ree Bén rüjn dxiin yagaj, zi'c béngunaa zi'c xinguaaaw, dxel suloj gawix, guië'x südx tëëx, <sup>46</sup> abi' yadxin xpatronx tijb dxej ni ad rbëztix në tijb hor ni ad ragbeetix. Dxel dád casti narooob gudëëd patron guin laax, guixhiaalaman laax lod rayal ree Bén ad ruzoobt diidx.

<sup>47</sup> 'Din tijb mojs ragbee ni rën xpatronx güünx, abi' ad za'tix porvinid ad ruzoob tëëtix diidx, dád casti narooob tëdix. <sup>48</sup> Per mojs ad ragbeet ni rën xpatronx güünx abi' güünx ni rayal casti, ta'nz tëdix casti. Din Bén badëëd Dios quiarguiejn, mazri zien ni rayal güünman por quiarguiejn ni badëëd Dios lojman. Ziangajc Bén badëëd Dios guialrniabee, mazri zien ni rayal güünman por guialrniabee ni badëëd Dios lojman.

### **Por Jesús rlia' lasa' ree bejn**

(Mt. 10:34-36)

<sup>49</sup> 'Zialan loj guidxliuj zi'c tijb Bén zidgacaaguij xhienin, abi' jma rën ne-jzdoon tiaguijn! <sup>50</sup> Gazaagdiajn guiët tëën, abi' jdád yu'nayan diizd yan xt chi gacan cumplid! <sup>51</sup> Ad naladxidi zialan loj guidxliuj par yabecdxen luxdoo bejn, zialan din guial guililadx ree-

man naj chu' wadijl. <sup>52</sup>Din diizd yan, lod naj reeman gaay loj tijb famil, til choonman contr tio'paman, tio'paman contr choonaman. <sup>53</sup>Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

### Sen rguien xanyabaa

(Mt. 16:1-4; Mr. 8:11-13)

<sup>54</sup>Rëb tëë Jesús loj ree benzien guin:

—Chi ruguiaadi ririi zäj niz lod rëez gubijdx, rëbidi: zal guia, abi' rajc gajc zian. <sup>55</sup>Abi' chi ririi bi niz sur, rëbidi: gac nalaa, abi' rajc gajc zian. <sup>56</sup>¡Bén rusquiee! Ragbeedi xhie rën guiëb sen rguien xanyabaa në loj guidxliuj, ¿chexquiza zeel ad ragbeetidi xhie rën guiëb ni cayajc loj guidxliuj yan?

### Babey zagdx con bën rdxe'ch lüj

(Mt. 5:25-26)

<sup>57</sup>¿Chexc ad rüjnt lëjt gajc xgab conin naj ni zagdx? <sup>58</sup>Bal chu bën rudëed lüj loj guxtis, been naguiejn baya'nnëman diidx zagdx la'tgaj yu' tiamp, chitëë yayüman lüj loj guxtis, abi' guxtis guin yayü lüj loj ree bën cu' lüj ladxguiib. <sup>59</sup>Naj rni lüj, ad zariitil ladxguiib guin xtczi quixil gra ni na guxtis guin.

### Gol bayüjn xgab por xtolidi

**13** Lën gajc ree dxejzii wej tio'p choon ree bejn biguie reeman diidx loj Jesús guial bagüjt Pilato tio'p choon ree bën Galilea, abi' bago'chaman xrejn reeman con xrejn ree be bagüjt reeman par gudëed reeman loj Dios zi'c gon. <sup>2</sup>Dxel rëb Jesús:

—Ad bal naladxidi guzajc ree bën Galilea guin zian guial naj reeman mazri bëndol guial loj gra ree bën Galilea. <sup>3</sup>Din naj rni lëjt guial ad ziantan. Abi'

bal id zayüjndi xgab por xtolidi ziangajc saquidi. <sup>4</sup>Ad bal naladxidi bën chiinbichoon güit ree chi guxa't torre ni la Siloé laa reeman, naj reeman mazri bëndol guial loj gra ree bën zojb Jerusalén. <sup>5</sup>Naj rni lëjt guial ad ziantan. Abi' bal id zayüjndi xgab por xtolidi ziangajc saquidi.

### Xcwent yag higo ni ad rtiat

<sup>6</sup>Dxel be Jesús tijb cwent loj reeman, rëbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetczi bidxaaglojman. <sup>7</sup>Dxel rëbaman loj bën rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetczi rdxaaaglojn. Batüügan din nawëëgzi rüjnan loj guidxliuj guie.” <sup>8</sup>Per rëb bën rajp guidxliuj guin: “Dad, basa'nsiin zatib ijz, yabeclaan yuj xanan gagu' tëënan abon. <sup>9</sup>Rupent zian tian, per bal id zacan dxel tügan.”

### Bayüjn Jesús tijb

#### bëngunaa ca bëw xijch

<sup>10</sup>Tijb dxej raziiladx ree bejn, culüü Jesús bejn ree lën tijb yadoo, <sup>11</sup>yagaj za' tijb bëngunaa ma gojc chiinbichoon ijz ragxuuman, tijb xindxab basa'n laaman con tijb bëw xijchaman, ad rilet'czi yaliman. <sup>12</sup>Chi baguiaa Jesús laaman, gurejdxaman laaman, rëbaman:

—Na, ma bayajquil guialguijdx ni goquil.

<sup>13</sup>Dxel badxiib yaaman guiycaman; abi' loj hor guin gajc baliman, zianz guzuloj cuza'taman Dios zagdx. <sup>14</sup>Per bën rniabee lën yadoo guin dád bidxe'chaman guial bayüjn Jesús bën guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladxt bejn.

<sup>15</sup>Badxi' Dad Jesús laan rëbaman:



—Bén rusquiee, ¿nid rxhiec xgo'ndi o xburidi dxej raziiladx ree bejn ya par chiquië'di laa reeb nijs? <sup>16</sup> Béngunaa guie zëédaman loj xdiaa Abraham, ma gojc chiinbichoon ijz naxhii xindxab laaman con guialguijdx guie. ¿Wen id zajc yayajcaman dxej raziiladx ree bejn ya?

<sup>17</sup> Chi rëb Jesús zian, gra ree bén rdx-e'ch laaman baya'n xtu; per graczi ree bejn rabaa guial ruguiaa reeman gra ree ni zagdxe ni rüjnman.

### **Xcwent xhaj moxtajs**

(Mt. 13:31-32; Mr. 4:30-32)

<sup>18</sup> Rëb tëë Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabeeman? <sup>19</sup> Laan naj zi'c xhaj moxtajs ni rxübin bejn loj xguiniaaman, rni'san xt rajcan yag naroo. Abi' guial narooob da't rajcan xt rüjn xguixbitia's ree biguijn xidxan.

### **Xcwent levadur**

(Mt. 13:33)

<sup>20</sup> Rëb Jesús zatijb:

—¿Xhienaag ganin naj xguialrniabee Dios? <sup>21</sup> Laan naj zi'c levadur ni rugo'ch tijb béngunaa choon midid harin persi rusaaguijn gra cob guin.

### **Port nadëë**

(Mt. 7:13-14, 21-23)

<sup>22</sup> Chi zë Jesús Jerusalén, rulüüman bejn ree luguiedx narooob ree në ree luguiedx dobëz niz lod rdëdaman. <sup>23</sup> Abi' tijb bejn gunabdiidx lojman rëbaman:

—Dad, ¿ta'nz ree bén gac perdon ya?

Badxi' Jesús laan rëbaman:

<sup>24</sup> —Gol been naguiejn din chu'di niz ro' port nadëë, din naj rni lëjt, zien ree bén rën chu', per ad zile't chu' reeman. <sup>25</sup> Din chi chisu bén naj lidxan gusiaawaman ro' port guin, lëjt guial yaya'ndi xchu, gucaadi ro' port guin guiëbidi:

“Dad, guxhal.” Per yadxi'man xtiidixidi naman: “Ad ragbeetan ban zadi.” <sup>26</sup> Dxel suloj guiëbidi: “Tijbzi badaaw ree, tijbzi badü' ree, niz lad dux nejzan baliüül dunujn.” <sup>27</sup> Per naman lojdi: “Ma rnin, ad ragbeetan ban guzadi. Gol biquied lon béndol.” <sup>28</sup> Ni goondi gaw tëë layidi chi guguiaadi Abraham, Isaac, Jacob, në gra ree bén badëë xtiidx Dios loj ree bejn, za' reeman lod rniabee Dios, guiáad lëjt yariicadi. <sup>29</sup> Din gui't ree bén sa gra lad guidiblagaa guidxliuj din cwe reeman gaw reeman lod rniabee Dios. <sup>30</sup> Abi' zien ree bén bigra yan, laa reeman gac bén yaløj nadxel. Guiáad ree bén naj bén yaløj yan, laa reeman gac bén bigra.

### **Roon Jesús por Jerusalén**

(Mt. 23:37-39)

<sup>31</sup> Hor guin gajc bidxin tio'p choon ree bénfarisew, abi' rëb reeman loj Jesús:

—Baguij, baza niz guie, din rën rey Herodes gugüjtaman lüj.

<sup>32</sup> Badxi' Jesús laan rëbaman:

—Gol chej gol chiguiedx loj bén rusquiee zii: “Yan, në guixie yabën xindxab yayün tëën bénragxuu ree, abi' widx gulooxan.” <sup>33</sup> Per naj rayal gusnuu da nejzan yan në guixie në widx, din ad najt guial guiët tijb bén rudëë xtiidx Dios loj ree bejn luguiedx ren bal id najn Jerusalén.

<sup>34</sup> ¡Bén Jerusalén, bén Jerusalén, rugüjtidi bén rudëë ree xtiidx Dios loj ree bejn rucaaguij tëëdi gra ree bén rxhial Dios lojdi! ¡Bëlczi volt guyënan nuchagan lasa'di zi'c rüjn tijb guid ruchajg lasa' ree xi'nb lën xhiilib, per ad cwëjbtidi! <sup>35</sup> Zianan zeel yaya'n ladxidi zi'c tijb guiedx lod achut zojb. Abi' rnin lëjt, diidz yan ad zuguaatrudi naj xt chi guidxin dxej guiëbidi: “¡Nüjnle' Dios bén zëëd por laaman!”

### Rayüjn Jesús tijb bén rzaaguij

**14** Tijb dxej raziiladx ree bejn wej Jesús bitawaman lidx tijb bénfarisew rniabee. Yu' ree bénfarisew guin cula'ch laaman xhie güünman, <sup>2</sup> guial za' tijb xinragxuu lojman rzaaguijx. <sup>3</sup> Dxel gunabdiidx Jesús loj ree mextr rajc ley në loj ree bénfarisew guin, rëbaman:

—¿Zajc yayüjn bejn bénragxuu dxej raziiladx ree bejn ya o ad zajctan?

<sup>4</sup> Per laa reeman achetczy rëb reeman. Dxel gunaaz Jesús xinragxuu guin bayüjnman laax, abi' rëbaman lojx din yaguijx. <sup>5</sup> Dxel rëbaman loj ree bénfarisew guin:

—¿Bal tijb xburidi o tijb xgo'ndi yab lën tijb bizë, nid zabëëdi laab ya, majsi naj dxej raziiladx bejn?

<sup>6</sup> Abi' achet gojc nadxi' reeman.

### Bén rej ree loj guialruxhliaa

<sup>7</sup> Chi baguiaa Jesús rbe ree biooz luar lod rbej ree bén mazri zobjloj, rëbaman loj reeman:

<sup>8</sup> —Bal chu guiniee lüj chel loj tijb guialruxhliaa, ad cwel luar rbej ree bén mazri zobjloj. Din zajc guidxin zatijb biooz mazri zobjloj guial lojl, <sup>9</sup> abi' gui't bén guneë gropidi naman lojl: “Badëëd lod zobjil cwe bén guie.” Dxel rayal chel guidib ratul chisobil loj yagxhil bigra. <sup>10</sup> Zeel chi guiniee reeman lüj, zagdxeli bisob loj yagxhil bigra, din chi gui't bén guneë lüj naman lojl: “Miw, badëd loj tijb luar mazri zobjloj.” Zian, gra ree bén zobjnël xan mex guza't lüj zagdxë. <sup>11</sup> Din bén rlies xvalor gajc, yaya'nxtuman. Guiáad bén rüjn naya zajs xvaloraman.

<sup>12</sup> Dxel rëb Jesús loj bén guneë laaman:

—Bal goc cu'l guialraw, ad guiniee xmiwil, ni'qui lasa'l, ni'qui bijchil, ni'qui benrijcw zobjnël gajxh. Din laa reeman yu' dxej guinieë reeman lüj, abi'

zian yanee reeman ni gudaw reeman lidxil. <sup>13</sup> Zagdxeli naj, chi güünl tijb lanij, guneë bénprob ree, në ree bén ad nadaant yaa, në ree bencoj con ree bénlutia'p. <sup>14</sup> Xiquilbaal bal güünl zian, din laa reeman ad zajct yanee ni badëëdil. Per chi guidxin dxej yaban ree bén bazoob xtiidx Dios, Dios yaguijx laan lojl.

### Xcwent bén been tijb lanij

<sup>15</sup> Chi biguiejn tijb bén zobjnë Jesús xan mex ni rëbaman, rëbaman loj Jesús: —¿Xiquilbaa ree bén yayal gaw lod rniabee Dios!

<sup>16</sup> Dxel rëb Jesús lojman:

—Tijb bejn badxe' guialraw par xche, abi' guneeman zien da't ree bejn. <sup>17</sup> Chi ma gojl hor gaw reeman xche, guxhaal xmojsaman din chex chiguiëdix loj ree biooz guin: “Gol guda din graczi ma najcchaaw.” <sup>18</sup> Per graczi reeman guzuloj caynab perdon. Bén yaløj guin, rëbaman: “Yan gajczi guzin tijb guidxliuj, rayal chiquianan; been wen güjdx lojman din güünman naj perdon.” <sup>19</sup> Zatijbaman rëb: “Guzin gaay nejz go'n, yan chiguiënan laa reeb prueb guidoondon rajc rüjn reeb dxiin ya; been wen güjdx lojman din güünman naj perdon.” <sup>20</sup> Zatijbaman rëb: “Yan gajczi baxhlian zeel ad zile't guialan.” <sup>21</sup> Chi badxin mojs guin bagojn xpatronx gra ni rëb ree bén guin, dád balenman, dxel rëbaman lojx: “Baquiejn wej niz galay ni, në niz lad ree nejz, tanë gra ree bénprob në ree bén ad nadaant yaa, në ree bencoj con ree bénlutia'p.” <sup>22</sup> Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.” <sup>23</sup> Dxel rëbaman lojx: “Wej niz loj carreter në niz loj ree nejz la's, been naguiejn ben ren ree din gui't reeman din cha lënü lidxan. <sup>24</sup> Din naj rni lojdi, ni'czi tijb ree bén gunen yaløj ad zajwt guialraw benchaawan par xche.”

**Ni rayal güün ree bën  
rën gac xbejn Jesús**

<sup>25</sup> Dád zien ree bejn zinal Jesús; abi' badxi' lojman loj reeman rëbaman:

<sup>26</sup> —Bal chudi rën guidnal naj, rayal guiëndi naj mazri guial loj xdadidi, guial loj xniaadi, guial loj lacheelidi, në guial loj xi'ndi, o bijchidi o bizandi, rayal tëë guiëndi naj mazri guial loj xguialnabandi, din bal id züjndi zian ad zajct gaquidi da bejnan. <sup>27</sup> Bën ad rënt sagdiaj guidnal tëëman naj, ad zajct gacaman da bejnan.

<sup>28</sup> 'Bal chu rën güün tijb yu narooob, çnid yalojxgaj cweman ya din cwëëman cwent zadaan xmiliaman ya din gulooxaman laan? <sup>29</sup> Din bal sulojman xcimiantan abi' ad zulooxtaman laan, graczi ree bën guguaa laan guze' laaman, <sup>30</sup> guiëb reeman: "Guzuloj cayüjn bën guin yu abi' ad gojct nulooxaman laan."

<sup>31</sup> 'O bal tijb rey güün wadijl contr za-tijb rey, çnid yalojxgaj cweman ya güünman xgab züjn chii mil xsuldadaman gan loj stijb rey zidnë gajl mil suldad ya?

<sup>32</sup> Per bal naladxaman ad züjntaman gan loj rey guin, la'tgaj sta za' rey guin zijt, guixhiaalaman bën chinë ree xrusonman din yaya'n reeman diidx ad zut wadijl. <sup>33</sup> Yan, ziangajc rnin lojdi, chutëëz lëjt bal id zusa'n gra ni rajpidi din guidnalidi naj, ad zajct gaquidi da bejnan.

**Bal id zajcri zëd naxij**

(Mt. 5:13; Mr. 9:50)

<sup>34</sup> Dxel rëb Jesús:

—Ni zagdxë naj zëd. Per bal id zajcran naxij, çxhieza naag yayajcan naxij za-tijb? <sup>35</sup> Ad rüjntan sirv par luyuj ni'qui par loj abon, rzëëbzán. ¡Bën rën ree gucaagdiajg, gol bacaagdiajg!

**Xcwent xiil gunit**

(Mt. 18:10-14)

**15** Gra ree bën ruquijx impuest në gra ree bëndol, bibig reeman lod za' Jesús din gucaagdiajg reeman ni rnieeman. <sup>2</sup> Guiáad ree bënfarisew con ree mextr rajc ley rnieeguijdx reeman laaman, rëb reeman:

—Ruchajg bën guin bëndol ree rawnë tëëman laa reeman.

<sup>3</sup> Dxel rëb Jesús loj reeman:

<sup>4</sup> —Bal tijb bejn rajp tibgayuu xiil abi' rnijt tijbib, çnid rusa'nman zatajpgajlchiinbitapib dajn ya abi' rigdiilaman xiil gunit guin xt lodzi radxejlaman laab?

<sup>5</sup> Abi' chi radxejlaman laab rabaaman, rudxiibaman laab dxidyëjnman. <sup>6</sup> Dxel chi radxin lidxaman, ruto'p ree xmiwaman në ree bën zojbnëman gajxh abi' rëbaman loj reeman: "Gol babaa zi'c rabaan, din ma badxejlan da xiilan be gunit." <sup>7</sup> Yan, rnin lëjt, ziangajc rabaanë Dios tijb bën rayüjn xgab por xtol guial loj tajpgajlchiinbitap benza'c ad ryaadxt yayüjn xgab por xtol.

**Xcwent milia ni bizëëb**

<sup>8</sup> 'O bal tijb bëngunaa rajpaman chii milia plajt abi' rusëëbaman tijban, çnid ruze'caman guij ya ruloob tëëman lëntü abi' raguilaman laan zagdxë da't xt lodzi radxejlan? <sup>9</sup> Abi' chi radxejlaman laan, ruto'p ree xmiwaman në ree bën zojbnëman gajxh, abi' rëbaman loj reeman: "Gol babaa zi'c rabaan din ma badxejlan milia basëëban." <sup>10</sup> Yan, naj rni lojdi, ziangajc rabaa ree xianjl Dios por tijb bëndol rayüjn xgab por xtol.

**Xcwent bën rüjn perdon xi'n**

<sup>11</sup> Rëb tëë Jesús loj reeman:

—Tijb bejn yu' tio'p xi'nman. <sup>12</sup> Abi' xin naj mazri xinguiag, rëb loj xdadix: "Dad, banee ni rayal gaca'n." Dxel badëëman ni rayal tijbgaj reex. <sup>13</sup> Ad

gojct xchej ni cwa' reex ni rayal reex, xin naj xinguiag guin bato'gajquix graczi ni badëëd xdadix lojx, abi' con milia guin wejx zijt bignijt xlia'x graczi xmil-iax guial beenx ni rëntzix. <sup>14</sup> Per chi ma banijtix gran, dxel guyu gubijn niz lod za'x abi' guzuloj biaadx ni gawix. <sup>15</sup> Dxel wejx bignabix dxiin loj tijb bén zojb yagaj, abi' guxhaalaman laax chigajpix cüch ree dajn. <sup>16</sup> Guial tant rliaanx xt guyënx niajwix ni raw ree cüch guin, per achut rudëë laan. <sup>17</sup> Dxel beenx xgab nal-axdix: “;Zien ree xin rüjn dxiin lidx da Dadan xt sobr rüjn ni raw reex, guiáad naj guie ma guiëtan bëjz! <sup>18</sup> Yan, yazaan yaya' lidx da dadan din guiën lojman: Dad, ma benan dol loj Dios në lojl. <sup>19</sup> Ad rayaltri guinieel naj xi'n; been naj cwent zi'c tijb ree xmojsil.” <sup>20</sup> Dxel bayunejzix zia lidx xdadix.

'Per zijtri ziaadix chi baguiaa xdadix laax dxel bayaman laax, zianz ruxüün-man bigchaaglojman laax, abi' gudiidxa-man laax gudaw tëëman laax xid. <sup>21</sup> Dxel rëbix lojman: “Dad, ma benan dol loj Dios në lojl, ad rayaltri guinieel naj xi'n.” <sup>22</sup> Per rëb xdadix loj ree xmojsaman: “Gol baquiejn gol tanë lajd zagdx, gol bascajcwixan, gol badxe' tijb guiibnil yaax gol baslëë tëëx gurëch, <sup>23</sup> gol chica' go'n mazri nadaan, gol bagüjtib din yadaaw ree yaguieen ree lanij. <sup>24</sup> Din par naj ma güjt da xi'n'an abi' yan ma babanx, gunijtix abi' ma badxeljix.” Dxel guzuloj cayüjn reeman lanij.

<sup>25</sup> 'La'tgaj xi'nman xingol guin cayüjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tëë reeman. <sup>26</sup> Dxel gurejdxix tijb xmojs xdadix, gunabdiidix xhienin cayajc lidxix. <sup>27</sup> Badxi' mojs guinan rëbix: “Guial baguiaad bijchil zeel gunabee xdadil güjt tijb go'n mazri nadaan guial nadaanx baguiaadix.” <sup>28</sup> Per dád bidxe'ch xingol guin, abi' ad guyëntix nayux. Zeel wej xdadix

biguiedxaman lojx din yayux. <sup>29</sup> Dxel rëb loj xdadix: “Lüj ragbee ma gojc xchej cayünan xchiinl, zianczi ruzoban xtiidxil; per ni'czi tijb ad waneetil tijb dxibdobëz din günnë' ree da miwan lanij. <sup>30</sup> Guiáad yan baguiaad xi'nl, xin ma bignijt xlia' xmilial con ree béngunaa dxuudx, abi' gunabeel güjt go'n mazri nadaan par laax.”

<sup>31</sup> 'Dxel badxi' xdadix laan rëbaman: “Xi'n, zianczi za'l con naj, graczi ni ra'-pan naj xieenl. <sup>32</sup> Per yan rayal yaguieen ree lanij yabaa tëë ree, din bijchil xin ma güjt par naj, ma babanx, gunijtix abi' ma badxeljix.”

### Xcwent tijb mojs rniabee ree mojs

**16** Rëb tëë Jesús loj ree xbejnman: —Guyu tijb benrijcw, nuzuman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman. <sup>2</sup> Dxel gurejdxaman laax rëbaman lojx: “;Xhie rën guiëb ni riguejnan cayüjn? Banee cwent lon xcwent xchiinl, din achetri dxiin gunen lojl.” <sup>3</sup> Dxel guzuloj beenx xgab gunalaxdix: “;Xhienaag günan yan ma gusa'n da patronan naj sin dxiin? Ad yu'tan gojl günan dxiin dajn, ratu tëën ganaaban carda. <sup>4</sup> Ma ragbeen xhienaag günan din guiën ree bejn naj chi ad züntran dxiin.” <sup>5</sup> Dxel gurejdxix tijb gaj ree bén ral loj xpatronx, rëbix loj bén bidxin yaloj: “;Plac ralil loj da patronan?” <sup>6</sup> Abi' rëbaman: “Ralan tibgayuu barril sejt lojman.” Dxel rëbix: “Cwa' gui'ch guie lod ca ni ralil lojman, been zatijban bacaa lojn ralil tü'pchiizan.” <sup>7</sup> Dxel gunabdiidix loj zatijbaman rëbix: “Laadx lüj, ¿plac ralil?” Abi' rëbaman: “Tib gayuu ingujch trigo.” Zianz rëbix: “Cwa' gui'ch guie lod ca ni ralil lojman, been zatijban bacaa lojn ralil tajpgajlan.” <sup>8</sup> Dád badxaloj patron guin guial nasin mojs mal guin por ni beenx. Din mazri nasin ree bén ad zinalt

xnejz Dios con lasa' reeman guial loj ree b́en zinal xnejz Dios.

<sup>9</sup>Rnin lojdi, gol beenné dxiin ni raj-pidi loj guidxliuj guie par gagnédi bejn din chu' xmiwidi, din chi yaran ma yu' b́en yaca' léjt lod gapidi guialnaban tiblayaa.

<sup>10</sup>Bal chu rüjn zi'c rayal con ta'n ni rudééd bejn lojman, züjnman zi'c rayal con zro'n. Ziangajc b́en ad rüjnt zi'c rayal con ta'n ni rudééd bejn lojman, ad züjn gajctaman zi'c rayal con zro'n. <sup>11</sup>Yan, ziangajc bal id züjndi zi'c rayal con ni za'c yu' loj guidxliuj guie, ¿chu gap léjt confianz con guialnaza'c yu' xanyabaa? <sup>12</sup>Bal id züjndi zi'c rayal con ni ad najt xieendi, ¿chu gunee léjt ni rayalidi?

<sup>13</sup>'Ni'qui tijb mojs ad zajct güünx sirv loj tio'p patron; din zadxe'chix tijbaman abi' zénx zatijbaman; o zajquix xinza'c con tijbaman abi' züjnx tibladd zatijbaman. Zeel ad zajct güündi sirv loj Dios, né loj milia.

<sup>14</sup>Abi' ree b́enfarisew guial mazri rēn reeman milia, chi biguiejn reeman ni rēb Jesús guzuloj cuze' reeman laaman.

<sup>15</sup>Dxel rēb Jesús loj reeman:

—Rüjndi benza'c niz loj ree bejn, per Dios nünbee luxdoodi; abi' majsi loj bejn lasajc da'tidi, per loj Dios achet lasajquidi.

### **Xley Moisejs con xguialrniabee Dios**

<sup>16</sup>Xley Moisejs né ni bacaa ree b́en badéé xtiidx Dios loj ree bejn, naga'loj been reen dxiin xt chi bi't Waj b́en baroobnijs bejn ree. Abi' diizd nadxel guzuloj rire'ch xtiidxza'c Dios xhienaag naj xguialrniabeeman, abi' zien ree bejn rüjn naguiejn chu' loj xguialrniabeeman.

<sup>17</sup>'Adli nawéegt nit xanyabaa né guidxliuj, guial yaya'n tijb diidx zééd loj ley guin guial ad zajctan cumplid.

### **Rulüü Jesús xcwent guial rala' lasa'**

(Mt. 19:1-12; Mr. 10:1-12)

<sup>18</sup>'Bal tijb xinguaaw rala' lacheelix abi' rtia'x ben ren, dolan cayüjnx. Ziangajc xin rtia' tijb b́engunaa bala' lacheel, dolan cayüjnx.

### **Xinrijcw con Lazr**

<sup>19</sup>Basnuu Jesús, rēbaman:

—Guyu tijb xinrijcw, guzujchaawix con ganaxczi lajd zagdxe, abi' guixie guixieczi rüjnx lanijro'. <sup>20</sup>Guyu téé tijb xinprob brii lajx Lazr, rbejx ro' xport xinrijcw guin abi' guidibлагаax ca guiadx. <sup>21</sup>Rēn nejzdoo Lazr guin gawix ni ri-ajb xan xmex xinrijcw guin. Abi' xt ree b́e'cw rbig rlie' reeb loj ree guiadx ni cax.

<sup>22</sup>'Chi bidxin dxej güjt Lazr dxel bigné ree xianjl Dios laax lod naj nix da't, lod za' Abraham. Né xin rijcw guin güjt, abi' biguie'chix. <sup>23</sup>Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwé' Abraham. <sup>24</sup>Dxel gurixdiajx rēbix: “Dad Abraham, baya naj, guxhaal Lazr din gugajdx lupunt xbacwēnx din gui'tix yasiaalyujx lüdxan, din dád cazaagdiajn loj bajl guie.” <sup>25</sup>Per badxi' Abraham xtiidx rēbaman: “Xi'n, basaaladx guial dád nix guyu luxdool chi gubanj loj guidxliuj, guiáad Lazr dád naya gubajnx. Yan, rayalix lod yabaax guiáad lüj rayalil lod sagdiajl. <sup>26</sup>Nétéé yan b́en za' ree guie ad zajct téd reeman yagaj, ni'qui ree b́en za' yagaj ad zajct téd reeman guie, din za' bala'ro' du galay ree.”

<sup>27</sup>'Dxel rēb xinrijcw guin lojman: “Rniaaban lojl dad, been wen guxhaal Lazr lidx da dadan, <sup>28</sup>lod zojb gaay ree da bichan din chicojnx laa reex chitéé né laa reex gui't luar guie, lod yu' zro' casti.” <sup>29</sup>Per rēb Abraham lojx: “Ma rajp reex gui'ch ni bacaa Moisejs con ree b́en badéé xtiidx Dios loj ree bejn, laan rayal guidxga' reex.” <sup>30</sup>Abi' rēb xinri-

jcw guin: “Walil, dad Abraham, per ad zaliladxt reex, sa'n bal yaban tijb bèn ma güjt chigneenëman laa reex, zayüjn reex xgab por xtol reex.”<sup>31</sup> Per rëb Abraham lojx: “Bal id ridxga' reex xtiidx Moisejs nè xtiidx ree bèn badëë xtiidx Dios loj ree bejn, ad zaliladxt reex majsi yaban tijb bèn ma güjt.”

### Bén ruzaalguiiw bejn din güünman dol

(Mt. 18:6-7, 21-22; Mr. 9:42)

**17** Rëb Jesús loj ree xbejnman: —Zianczi yu' ree ni ruzaalguiiw bejn din güünman dol, per jproba naj bèn ruzaalguiiw zatijb bejn guial güünman dol! <sup>2</sup>Par laaman zagdxeli naj guixhii reeman tijb guiaj mulin yëjnman din guzaal reeman laaman loj nijsdoo, luar guzaalguiiwaman tijb bèn qui rliiladxri naj din güünman dol. <sup>3</sup>jGol gojp cudad!

<sup>1</sup>Bal xhie tijb ni mal güün tijb lasa'l, guneenëman. Abi' bal bayüjnman xgab por ni beenman, beenman perdon. <sup>4</sup>Majsi gajdx volt loj tibdxej güünman xhienin contr lüj, abi' bal gui'taman lojl gajdx volt naman: “Been naj perdon ad züntran zian”, rayal güünl laaman perdon.

### Guialrniabee nè guialrliladx

<sup>5</sup>Dxel rëb ree xi apóstoles Jesús lojman:

—Banee dunujn mazri guialrliladx.

<sup>6</sup>Abi' rëb Jesús loj reeman:

—Bal naj xguialrliladxidi majsi zi'czi naj xhaj moxtajs, zile' guiëbidi loj yagro' guin: “Bia'xh guie, bisob loj nijsdoo”, zuzooban xtiidxidi.

### Ni rayal güün tijb mojs

<sup>7</sup>Bal tijb lëjt rajp tijb mojs, abi' chi yaguaaad mojs guin bigla'x yuj o bigajpix begui'xh ree ya, ¿wen zëjbidi lojx ya: “Guyu, gurej din gawil”? <sup>8</sup>Ad zëjb-

tidi zian, guiëblidi: “Bachaa xabil, been ni gawan, guda'n. Chi lox gawan guië' tëen dxel ma zajc gawil guië' tëël.” <sup>9</sup>Abi' wed ni'qui quixtëë ad zudëëtidi lojx din cayüjnizix ni rayal güünx. <sup>10</sup>Ziangajc lëjt chi loox güündi gra ni gunabee Dios dxel guiëbidi: “Nayajcan mojs ni ad rüjnt sirv, din baguieenzan ni rayal yaguieenan.”

### Rayüjn Jesús chii ree bèn rajc guialguijdx la lepra

<sup>11</sup>Chi ma cadxin Jesús Jerusalén, gudëdaman guiedx riga' ree niz Samaria nè niz Galilea. <sup>12</sup>Abi' chi cayuman tijb luguiedx dobëz, bigchaagloj chii ree bèn rajc guialguijdx la lepra laaman. Per zijt guzuj reeman, <sup>13</sup>rbixdiaj reeman, rëb reeman:

—jJesús, Mextr, baya dunujn!

<sup>14</sup>Chi baguiaa Jesús laa reeman, rëbaman loj reeman:

—Gol chej loj ree bixhioz din guguiaa reeman lëjt.

Abi' la'tgaj zë reeman, baya xcuerp reeman guialguijdx ni rajc reeman.

<sup>15</sup>Dxel tijbaman chi gogbeeman ma bayajcaman, bayejcaman, rbixdiajman rudëëman quixtëë loj Dios. <sup>16</sup>Abi' bazuxibaman loj Jesús, basajb lojman xt luyuj persi badëëman quixtëë lojman. Abi' najman bèn Samaria. <sup>17</sup>Dxel rëb Jesús:

—¿Nid chii naj ree bèn bayajc ya? ¿Con zaga reeman? <sup>18</sup>¿Tijbzi benzit guie bayejc ya rudëëman quixtëë loj Dios?

<sup>19</sup>Dxel rëbaman loj bèn guin:

—Bisu. Baguiaj, ma bayajquil guial bililadxil naj.

### Xhienaag gui't xguialrniabee Dios

(Mt. 24:23-28, 36-41)

<sup>20</sup>Gunabdiidx ree bënfarisew loj Jesús goc gui't xguialrniabee Dios, abi' rëbaman:

—Xgualrniabee Dios ad najtan ni guguaa bejn. <sup>21</sup> Abi' achut guiëb: “Laan za' guie”, o “Laan za' ni” ya, din xgualrniabee Dios mal za'n galaydi.

<sup>22</sup> Dxel rëbaman loj ree xbejnman:

—Zadxin dxej guiëndi guguaadi Bén guxhaal Dios majsi tidxejzi, per ad zuguaatidi laaman. <sup>23</sup> Abi' yu' reeman na lëjt: “Laaman za' guie”, o “Laaman za' ni” ya, ad bal chinalidi laa reeman. <sup>24</sup> Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj. <sup>25</sup> Per yaloxgaj sagdiajman abi' ad zënt ree bén riga' yan laaman. <sup>26</sup> Zi'c goc gulal chi guban Noé, zian gac chi gui't Bén guxhaal Dios. <sup>27</sup> Din naxdel gudaw ree bejn, gu' reeman, baxhliaa reeman badëë tëë xi'n reeman baxhliaa xt chi bidxin dxej guyu Noé lën barcwro' ni beenman, abi' guzuloj guiadoxh ni bagüjt gra reeman. <sup>28</sup> Ziangajc gojc chi guban bén brii laj Lot, gudaw ree bejn, gu' reeman, bato' reeman, guzii reeman, guxübin reeman been tëë reeman yu ree. <sup>29</sup> Per chi brii Lot luguiedx Sodoma, guzuloj biyajb guij xanyabaa në azufre, abi' güjt gra reeman. <sup>30</sup> Ziangajc gac dxej ni gui't Bén guxhaal Dios.

<sup>31</sup> 'Dxej ni gac zian, bén yë'p guijc yu ad zaguiajttaman chiglëë ni nagu'man lënu. Abi' bén za' dajn, ad zayejct lidxaman. <sup>32</sup> Gol basaaladx ni guzac lacheel bén brii laj Lot. <sup>33</sup> Bén mazri rën gualnaban rajpaman loj guidxliuj guie, zadxin dxej gunijttaman laan, per bén guiët por naj, zajpaman gualnaban tiblyaaa con Dios.

<sup>34</sup> 'Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n. <sup>35</sup> Guiáad lod cayojt tio'p ree béngunaa, tijbaman sa zatijbaman yaya'n. <sup>36</sup> Abi' lod za' tio'p ree xinguaaw dajn, tijbix sa zatijbix yaya'n.

<sup>37</sup> Chi biguejcn ree xbejnman zian, rëb reeman:

—¿Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüet.

### Xcwent tijb béngunaa bizëjb në tijb juejs

**18** Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtczi reeman. <sup>2</sup> Abi' rëbaman loj reeman:

—Guyu tijb guiedx lod guyu tijb juejs, ad rdxebtaman Dios ad ridxga' tëëtaman bejn ree. <sup>3</sup> Luguiedx ziigajc zojb tijb béngunaa bizëjb, rniabaman loj juejs guin din güünman guialguxtis gagnëman laaman loj bén rdx'e'ch laaman. <sup>4</sup> Xchej ad bidxga't juejs guin béngunaa bizëjb guin, per zianz laagajcaman been xgab naladxaman: “Majsi ad rdxebtan Dios ad ridxga' tëëtan bejn ree, <sup>5</sup> per béngunaa guie ad rucwëëzt ruslenman naj. Zagdxeli naj güünan laaman yudar chitëë ri'traman naga gad da pacensan chigra.”

<sup>6</sup> Dxel rëb Jesús loj reeman:

—Zian gunee juejs mal guin. <sup>7</sup> Didxgui Dios, ¿nid zagnëman bén guleman ya bén rbejdx rniab ree laaman dxej guiaal? ¿Wen zaglaa gagnëman laa reeman ya? <sup>8</sup> Naj rni lëjt guial ad zaglaat gagnëman laa reeman. Per chi gui't Bén guxhaal Dios, ¿chuj ni zadxaaglojraman bén rililadx Dios loj guidxliuj ya?

### Xcwent bénfarisew con bén ruquijx impuest

<sup>9</sup> Be Jesús zatijb cwent par ree bén naladx tijbzi laa reeman naj benza'c guial loj ree ben ren, rëbaman:

<sup>10</sup>—Tio'p ree xinguaaw wej lën yadooro' Jerusalén persi gurejdx gunab reex Dios, tijbix naj xinfarisew, zatijbix naj xin ruquijx impuest. <sup>11</sup> Xin farisew guin, za'lix cabejdx canabix Dios, rëbix:

“Quixtëe runen lojl, Dad, guial ad najtan zi'c ree ben ren, naj reeman bêngubaa, benmal, bën za'në bêngunaa ren, ni'qui zi'c naj bën ruquijx impuest guin. <sup>12</sup> Rba'nän tio'p volt lën xuman, abi' gra ni rünan gan rünanan chii lala' persi runen tijban lojl.” <sup>13</sup> Per xin ruquijx impuest guin, zijt za'x abi' ni'quid rayax-tix guilies lojx, rga'p luxdoox rëbgajx: “¡Dios, baya naj najn tijb xindol!” <sup>14</sup> Naj rni lëjt guial xin ruquijx impuest guin ma been Dios laax perdon chi bayejc lidix, per xin farisew guin ad beentaman laax perdon. Din bën rlies xvalor gajc achet lasajcaman loj Dios, guiáad bën rüjn naya laaman mazri lasajc loj Dios.

### Rüjnle' Jesús xindoo ree

(Mt. 19:13-15; Mr. 10:13-16)

<sup>15</sup> Binë ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadilë reeman bën zinë ree laa reex. <sup>16</sup> Per gurejdx Jesús laa reeman, rëbaman loj reeman:

—Gol badëe mod gui't reex lon, ad bal rudxoondi, din lod rniabee Dios naj par ree bën naj zi'c laa reex. <sup>17</sup> Din naj rni lëjt, bën ad rliladxt xguialrniabee Dios zi'c tijb xindoo, ad zile't chu'man loj xguialrniabee Dios.

### Xcwent tijb xin rijcw

(Mt. 19:16-30; Mr. 10:17-31)

<sup>18</sup> Tijb xin rniabee, gunabdiidx loj Jesús rëbix:

—Mextrza'c, çxhie rayal günan din ga'pan guialnaban tiblyaa con Dios?

<sup>19</sup> Badxi' Jesús laan, rëbaman:

—ÇChexc zeel nal lon benza'c? Achut naj benza'c, tijbzi Dios. <sup>20</sup> Lüy rajc ree mandamient: “Ad sunël bêngunaa ren, ad gugüjtil bejn, ad cwanl, ad cwëel xtiidx bejn, gojp respejt xdad xniaal.”

<sup>21</sup> Dxel rëbix loj Jesús:

—Gra ree ni guin cayünan diidx xindoon.

<sup>22</sup> Chi biguiejn Jesús zian, rëbaman:

—Yu' zatijb ni ryaadx güünl: bigto' gra ni rajpil dxel gudëel milia guin loj ree bënprob. Zian gapil guialnaza'c xanyabaa, dxel gui'til guidnalil naj.

<sup>23</sup> Chi biguiejn xin guin zian, dád guyunayax guial dád xinrijcwan. <sup>24</sup> Chi baguiaa Jesús guial dád yu'nayax, rëbaman:

—¡Dád nawëeg naj chu' benrijcw loj xguialrniabee Dios! <sup>25</sup> Adli nawëegt téd tijb camell xan gagux, guial chu' tijb bën rijcw loj xguialrniabee Dios.

<sup>26</sup> Abi' ree bën biguiejn ni rëb Jesús, rëb reeman:

—ÇChu za zajc laa loj xcasti Dios?

<sup>27</sup> Dxel rëbaman loj reeman:

—Yu' ni ad zajct güün bênguidxliuj, per Dios graczan zajc güünman.

<sup>28</sup> Dxel rëb Bëd lojman:

—Dad, ma basa'nän graczi ni raya'pan persi zudnaalan lüj.

<sup>29</sup> Zianz rëb Jesús:

—Diidxliczi rnin lojdi, chutëez bën rusa'n lidx, lacheel, bijch, o xdad, o xniaa, o xi'n guial rüjnman zi'c rniabee Dios, <sup>30</sup> mazri zien ni tia'man loj guidxliuj guie. Abi' zajpaman guialnaban tiblyaa con Dios.

### Rugojn Jesús zatijb guial guiëtaman

(Mt. 20:17-19; Mr. 10:32-34)

<sup>31</sup> Gurejdx Jesús guidxiptio'p ree xbejnman tiblax, abi' rëbaman loj reeman:

—Yan, ziyoi ree Jerusalén lod gac zi'c bacaa ree bën badëe xtiidx Dios loj ree bejn xcwent Bën guxhaal Dios. <sup>32</sup> Yayü reeman laaman loj ree benzit, guze' reeman laaman, guiniee reeman laaman ni rëntzi reeman, abi' gucojpx xhiejn reeman lojman. <sup>33</sup> Quin reeman laaman dxel gugüjxt reeman laaman, per ni yayon dxej yabanman.



<sup>34</sup>Per laa reeman ad bignia'tczi reeman ni rëbaman, ad ragbee tëët reeman chexc zeel rëbaman zian din ad bile't nignia' reeman xhie rën guiëb ni guneeaman.

### Rayajc guiaaloj tijb bénlutia'p

(Mt. 20:29-34; Mr. 10:46-52)

<sup>35</sup>Chi ma cadxin Jesús gajxh guiedx Jericó, tijb bénlutia'p, zojbaman cwè' nejj rniabaman carda. <sup>36</sup>Chi gogbeeman cadëd zien ree bejn, gunabdiidxaman xhie cayajc. <sup>37</sup>Abi' rëb reeman lojman guial Jesús bën Nazaret cadëd niz yagaj.

<sup>38</sup>Dxel gurixdiajman rëbaman:

—¡Jesús, xdiaa Davi, baya naj!

<sup>39</sup>Bén ned ree rdilë reeman laaman din gucwëez ro'man, per mazri rbixdiajman, rëbaman:

—¡Xdiaa Davi, baya naj!

<sup>40</sup>Dxel guzudxe Jesús abi' gunabee-man bica' reeman laaman. Chi bidxinman gajxh lojman, gunabdiidxaman lojman, rëbaman:

<sup>41</sup>—¿Xhie rënln günan por lüj?

Badxi'man laan rëbaman:

—Dad, rënan yani lon.

<sup>42</sup>Dxel rëb Jesús lojman:

—¡Ma zile' guguaal! Ma bayajquil guial bililadxil naj.

<sup>43</sup>Hor guin gajc bani loj bën guin, abi' binalaman Jesús rudëëman quixtëë loj Dios. Në gra ree bën baguiaa ni goc rudëë quixtëë loj Dios.

### Wej Jesús lidx Zaqueo

**19** Guyu Jesús luguiedx Jericó abi' guzuloj cadëdaman luguiedx guin. <sup>2</sup>Yagaj zojb tijb benrijcw laman Zaqueo. Laaman rniabee ree bën ruquijx impuest. <sup>3</sup>Rën Zaqueo guin güünbeeman Jesús, per ad rile't guguaaman laaman guial dád zien ree bejn abi' laaman najman bendop. <sup>4</sup>Zeel ruxüünman gunedaman, abi' din chile' guguaaman Jesús, wë'paman loj tijb

yagro' zojb gajxh lod tëd Jesús. <sup>5</sup>Chi gudëd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

<sup>6</sup>Dxel cari da't baguiajt Zaqueo, abi' dád rabaaman zignëman Jesús. <sup>7</sup>Chi baguiaa ree bejn zian, gra reeman guzuloj caneeguijdx Jesús rëb reeman zigya'nman lidx tijb bëndol. <sup>8</sup>Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bënprob. Abi' bal yu' bën baquijxan mazri guial loj ni naj quixaman, yayünan tajp volt mazri guial loj ni gulaanan.

<sup>9</sup>Dxel rëb Jesús lojman:

—Yandxej ma been Dios perdon gra ree bën zojb lidx Zaqueo guial rliladxaman Dios zi'cgajc Abraham. <sup>10</sup>Din Bén guxhaal Dios zëëdaman zidgadiilaman bën ad zët ree loj xnejz Dios din laa reeman loj xcasti Dios.

### Xcwent milia

<sup>11</sup>Bén cucaagdiajg ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xguialrniabee Dios. <sup>12</sup>Dxel rëbaman loj reeman:

—Guyu tijb bejn, zëëdaman loj tijb famil zojbloj. Zëman zijt lod tia'man guialrniabee din gacaman rey dxel yayejcaman nabee ladxaman. <sup>13</sup>Chi gadaman grii gurejdxaman chii xmojsaman abi' loj tijbgaj reex badëëman zro' milia, zianz rëbaman loj reex: “Gol beennë milia guin dxiin xt chi guidxin dxej yaguialan.” <sup>14</sup>Per ree bën ladxaman guial rdxe'ch reeman laaman, guxhaal reeman tibcwaa ree bën zinal laaman persi biguiedx reeman guial ad rënt reeman gac bën guin xrey reeman. <sup>15</sup>Per laaman bazuj reeman gacaman rey, abi' bayejc ladxaman. Chi badxinman dxel gunabeeman bignee reeman mojs badëë-

man milia guin din gagbeeman plac ma been tijbgaj reex gan. <sup>16</sup> Mojs bidxin yaloj rëbix: “Dad, milia ni baneel ma beenan gan chii volt mazri.” <sup>17</sup> Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lüj nabeel chii guiedx.” <sup>18</sup> Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.” <sup>19</sup> Ziangajc rëb rey guin loj mojs guin: “Lüj nabee gaay guiedx.” <sup>20</sup> Dxel bidxin zatijb mojs guin abi' rëbix: “Dad, laa xmilial guie, badxe'chaawanan lën tijb baydoo, <sup>21</sup> din bidxeban lüj guial ad rayatil bejn. Raca'l ni ad najt xieenl abi' rato'pil guialnaza'c lod ad guxübintil.” <sup>22</sup> Dxel rëb rey guin: “Mojs guijdx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen guialnaza'c lod ad guxübintan. <sup>23</sup> ¿Chexc ad badëetil da milian nigui'n bejn din chi nagualan naca'nan con guidib xi'nan?” <sup>24</sup> Dxel rëb rey guin loj ree bën za' yagaj: “Gol bacca' milia zii lojx, gol badëedan loj xin ca' mazran.” <sup>25</sup> Abi' rëb reeman loj rey guin: “Dad, per ma ca'x zro'n.” <sup>26</sup> Badxi'man laan rëbaman: “Bën rajp zro', zaca'man mazri, per bën rajp ta'nzi, xt ta'n ni rajpaman chiquied lojman. <sup>27</sup> Abi' ree bën rdxe'ch naj bën ad guyënt ree nijcan rey, gol tanë reeman guie, gol bagüjt reeman lon.”

### Ru Jesús Jerusalén

(Mt. 21:1-11; Mr. 11:1-11; Jn. 12 :12-19)

<sup>28</sup> Chi gulox rëb Jesús zian, dxel basnuu zëman Jerusalén. <sup>29</sup> Chi bidxinman gajxh guiedx Betfagé con Betania, në gajxh guia' la Olivos, dxel guxhaal tio'p ree xbejnman, <sup>30</sup> rëbaman loj reeman:

—Gol chej guiedxdo riga' guin, chi guidxindi guidxaaglojdi tijb burquie'n, caduub, achut wabib laab. Gol gux-

hiequib gol tanëb. <sup>31</sup> Abi' bal chu guini-abdiidx lojdi chexc zeel rxhiequidi laab, gol güjdx Dad Jesús cayaadx laab.

<sup>32</sup> Wej ree bën guxhaalaman bidxaa-gloj gajc reeman zi'cgajczi rëb Jesús loj reeman. <sup>33</sup> Abi' chi caxhiec reeman bur guin, gunabdiidx ree bën naj xbur laab, rëb reeman:

—¿Chexc zeel caxhiequidi bur guin?

<sup>34</sup> Badxi' reeman laan, rëb reeman:

—Din Dad Jesús cayaadx laab.

<sup>35</sup> Dxel binë reeman bur guin lod za' Jesús, zianz badxiib xab reeman xijchib abi' been reeman laaman yudar persi gudxibaman laab. <sup>36</sup> Abi' ree bejn rguijxh xab reeman lunejz lod zë Jesús. <sup>37</sup> Chi ma zë reeman gajxh laguiajt ni naj guia' la Olivos, gra ree bën zinal Jesús guzuloj rbixdiaj reeman guial dád rabaa reeman abi' ruza't reeman Dios zagdxe por gra ree milagr ni ma baguiaa reeman. <sup>38</sup> Rëb reeman:

—¡Nüjnle' Dios bën zëed por laaman! ¡Yu' guialrabaa xanyabaa! ¡Benza'c bendxoon naj Dios bën yu' xanyabaa!

<sup>39</sup> Dxel ree bënfarisew no'ch loj ree bën zinal laaman, rëb reeman lojman:

—Mextr, gudilë ree bën guin chitëe rniece reeman zian.

<sup>40</sup> Per badxi'man laan rëbaman:

—Naj rni lëjt, bal yacwëöz ro' reeman, guiaj ree cwixdiaj zian.

<sup>41</sup> Chi bidxinman gajxh Jerusalén, dxel baguiaaman guiedx guin, zianz biinman por laan. <sup>42</sup> Rëbaman:

—¡Bën Jerusalén, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan. <sup>43</sup> Din guidxin dxej ni güün ree bën rdxe'ch lëjt tijb ze' gadëd ladxidi, abi' gra lad gusiaaw reeman lëjt, <sup>44</sup> gugüjt reeman lëjt. Dxel gunijt reeman ladxidi, ni'qui tijb guiaj ad zaya'nt guije stijb guiaj, din ad bidxga'tidi hor ni bidganaj Dios lëjt.

**Rabëë Jesús bén ruto' ree ro'  
yadooro' Jerusalén**

(Mt. 21:12-17;

Mr. 11:15-19; Jn. 2 :13-22)

<sup>45</sup>Chi bidxin Jesús ro' yadooro' Jerusalén, guzuloj caybëeman bén cuto' ree në ree bén cazii, <sup>46</sup>rëbaman loj reeman:

—Løj xtiidx Dios rëb: “Lidxan naj yu lod rbejdx rniab bejn Dios.” Per lëjt nünjdan zi'c lidx ree xingubaan.

<sup>47</sup>Guixie guixie rülüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguiedx guin raguiil reeman mod din gugüjt reeman laaman.

<sup>48</sup>Per ad radxejlt xhienaag güün reeman, din graczi ree bejn rucaagdiajg chaaw ni rülüüman laa reeman.

**Xgualrniabee Jesús**

(Mt. 21:23-27; Mr. 11:27-33)

**20** Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel, <sup>2</sup>abi' rëb reeman lojman:

—Guna, ¿chu na güünl ni guin ree? ¿Chu banee gualrniabee lojl?

<sup>3</sup>Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n: <sup>4</sup>¿chu guxhaal Waj bidgaroobnijsaman bejn ree, Dios ya o bénguidxliuj?

<sup>5</sup>Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “¿Chexquiza zeel ad bililadxtidi laaman?” <sup>6</sup>Abi'za bal yaguie'ch ree bénguidxliuj guxhaal laaman, zugüjt ree bejn dunuj ree con guiaj din gra reeman rliladx gual Waj gojc bén badëë xtiidx Dios loj ree bejn.

<sup>7</sup>Abi' badxi' reeman laan rëb reeman gual ad ragbeet reeman chu guxhaal

Waj bidgaroobnijsaman bejn ree. <sup>8</sup>Dxel rëb Jesús loj reeman:

—Ni'qui naj ad zanitan lojdi chu banee gualrniabee güünan ni guin ree.

**Xcwent ree mojs guiidx**

(Mt. 21:33-44; Mr. 12:1-11)

<sup>9</sup>Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree bén güün dxiin lojn, zëta-man zijt. <sup>10</sup>Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree bén rüjn dxiin loj guiniaa guin gudijn reeman mojs guin abi' badxi' reeman laax zezi.

<sup>11</sup>Dxel guxhaalaman mojs ren, per në-gajc mojs guin gunee reeman ni rëntzi reeman, gudijn reeman laax abi' badxi' reeman laax zezi. <sup>12</sup>Zianz guxhaalaman zatijbix, per gudiilguiidx reeman laax abi' babëë reeman laax loj guiniaa guin.

<sup>13</sup>Dxel rëb bén naj xguidxliuj laan: “¿Xhienaag güünan yan? Gaxhal da xi'-nan xin rën da'tan, wed zajp reeman laax respejt.” <sup>14</sup>Per chi baguiaa ree bén guin laax, rëb loj lasa' reeman: “Xin guinan naj xin yaya'nnë guidxliuj guin. Yagüjt reex din gacan du xieen ree.” <sup>15</sup>Dxel babëë reeman laax loj guidxliuj guin, bagüjt reeman laax.

Zianz gunabdiidx Jesús loj ree bén ca-nenëman, rëbaman:

—Yan, ¿xhie naladxidi güünnë bén naj xguidxliuj laan bén guin ree? <sup>16</sup>Naj rni lojdi gual zi'taman din gugüjtaman bén guin ree dxel gudëëman guidxliuj guin loj ree ben ren.

Chi biguiejn reeman zian dxel rëb reeman:

—¿Gagnë Dios ad zajct zian!

<sup>17</sup>Per Jesús baguiaaman loj reeman, abi' rëbaman:

—Bal id zajc zian ¿xhieza rën guiëb ni ca loj xtiidx Dios? Lod rëb:

Guiaj ni gulëëgo'n ree bën rüjn yu, laan naj ni mazri been sirv gojcnë yu guin.

<sup>18</sup> Chutëëz bën yab guiyc guiay guin, gacaman zi'c tijb ni riroox, guiáad bal yab guiay guin guiycaman, gacaman zi'c tijb ni ryüüdëj.

### Xcwent impuest

(Mt. 21:45-46; 22:15-22; Mr. 12:12-17)

<sup>19</sup> Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree. <sup>20</sup> Abi' guxhaal reeman bën zigla'ch ree laaman din güünzi reeman guial guliüü naj reeman benza'c, din yaguiil reeman mod guiniee Jesús diidx ni gudxiib reeman guiyc, din chile' yayü reeman laaman loj gobernador Rom. <sup>21</sup> Dxel gunabdiidx reeman lojman, rëb reeman:

—Mextr, dunujn rayagbee guial rnieel ruliüü tëel zi'c rayal, din par lüj tiblojzi naj bejn, abi' walil ruliüü guial xhien-aag rën Dios guiban bejn. <sup>22</sup> ¿Zagdxen ya radijxan impuest loj rey César, o ad zagdxetan?

<sup>23</sup> Per gogbee gajc Jesús xgab mal ni cayüjn reeman abi' rëbaman loj reeman:

<sup>24</sup> —Gol balüü tijb cintabl lon. ¿Chu loj ca lojn chu tëë laj ca lojn?

Badxi' reeman laan, rëb reeman:

—Loj rey César ca lojn në lajman.

<sup>25</sup> Dxel rëbaman loj reeman:

—Gol badëëcliza loj rey César ni naj xieen César, guiáad loj Dios gol badëë ni naj xieen Dios.

<sup>26</sup> Abi' gra ni guneeman niz loj ree bejn, achetri badxejl nudxiib reeman guiyc din niniaaz reeman laaman. Badxali loj reeman ni guneeman abi' achetri rëb reeman.

### Xcwent guial yaban ree bengüt

(Mt. 22:23-33; Mr. 12:18-27)

<sup>27</sup> Tio'p choon ree bénsaducew bignaj Jesús, bénsadusew guin ree ad riladxt reeman guial yaban ree bengüt, zeel rëb reeman loj Jesús:

<sup>28</sup> —Mextr, loj xley Moisejs rëb guial bal guiët tijb xinguiiaaw abi' achut xi'n x guyu con lacheelix, bijch xingüt guin guxhliaanë béngunaa bizëjb guin din chu' xi'n reex zi'c guliüü xi'n xin güt guinan. <sup>29</sup> Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix. <sup>30</sup> Dxel bijch barojpix baxhliaanë béngunaa guin, per güjtigajquix ad guyu gajct xi'n reex. <sup>31</sup> Zianz baxhliaanë xin bayon guin béngunaa bizëjb guin, zianz baxhliaanëman guigajdx reex abi' gra reex güjt achut xi'n reex guyu con laaman. <sup>32</sup> Ni bigratë në béngunaa guin güjt. <sup>33</sup> Yan, chi yaban ree bengüt, ¿chu loj guigajdx reex gac xbéngunaa laaman guial gra reex baxhliaanë laaman?

<sup>34</sup> Dxel rëb Jesús loj reeman:

—Loj guidxliuj guie ruxhliaa ree bejn abi' rudëed xi'n reeman ruxhliaa. <sup>35</sup> Per ree bën yaban zatijb, bën rayal ree gap guialnaban tiblyaa con Dios, ad zuxhliatri reeman ad zudëë tëëtri xi'n reeman guxhliaa, <sup>36</sup> din ad zëjttri reeman, gac reeman zi'c ree xianjl Dios. Gac tëë reeman xi'n Dios guial ma baban reeman. <sup>37</sup> Abi' xcwent ni yaban ree bengüt, xt Moisejs rëb zian tiblyajt loj xtiidx Dios lod rëbaman guial baguiaaman yag ni caye'c. Yagaj rëb Dios lojman guial Dios naj xDios Abraham, xDios Isaac, në xDios Jacob. <sup>38</sup> Din Dios ad najtaman xDios ree bengüt, najman xDios ree bën naban, din par laaman gra ree bejn naban.

<sup>39</sup> Dxel yu' ree mextr rajc ley, rëb lojman:

—Mextr, zagdxequi guneel.

<sup>40</sup> Abi' achetri bayax reeman niniabdi-idx reeman lojman.

### Chu loj xdiaa zëed Cristo

(Mt. 22:41-46; Mr. 12:35-37)

<sup>41</sup> Rëb Jesús loj ree bejn:

—¿Chexc zeel rëb ree bejn guial zëed Cristo loj xdiaa rey Davi? <sup>42</sup> Awa Davi guin gajc guneë loj libr Salmos, rëbaman:

Dios rëb loj dux Dad ree:

“Gurej da ladbeen,

<sup>43</sup> xt gabecan xin rdxe'ch ree lüj guia'l.”

<sup>44</sup> Yan, bal xi'n Davi naj Cristo. ¿Chexquiza zeel rëb Davi guin lojman Dad?

### Ni rüjn ree mextr rajc ley

(Mt. 23:1-36; Mr. 12:38-40;

Lc. 11:37-54)

<sup>45</sup> La'tgaj cucaagdiajg gra ree bejn ni rëb Jesús, rëb loj ree xbejnman:

<sup>46</sup> —Gol gojp cudad con ree mextr rajc ley. Din ruladx reeman sa reeman gacw reeman lajd zagdxe ruladx tëë reeman gugajpdioz ree bejn laa reeman con re-pejnt niz lunejz, abi' lën ree yadoo ruladx reeman cwe reeman lod rbej ree bën zojbloj, ziangajc rüjn reeman lod ritaw reeman. <sup>47</sup> Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

### Gon badëed tijb béngunaa bizëjb

(Mr. 12:41-44)

**21** Chi culüü Jesús bejn ree lën yadooro' Jerusalén, dxel gules lojman baguiaaman cagu' ree benrixcw gon lën alcancia. <sup>2</sup> Baguiaa tëëman tijb béngunaa bizëjb prob, cagu'man tio'p cintablodoo lën alcancia guin. <sup>3</sup> Dxel rëb Jesús loj ree xbejnman:

—Diidxli rmin lojdi guial bën bizëjb prob guin mazri lasajc gon badxe'man

guial loj gon badxe' gra ree bën guin.

<sup>4</sup> Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

### Rëb Jesús guial yaze'n yadooro' Jerusalén

(Mt. 24:1-2; Mr. 13:1-2)

<sup>5</sup> Tio'p choon ree xbejn Jesús cayü reeman diidx xcwent ree guiaj zagdxe najcchaawnë yadooro' Jerusalén, nè ree ni lasajc ni rudëed ree bejn par suchaaw yadoo guin. Dxel rëb Jesús loj reeman:

<sup>6</sup> —Gra ni cuguaaadi yan, zadxin dxej ni'qui tijb guiaj ad zaya'nt guijc stijban, gran yaze'n.

### Ni gac chi gad guidxliuj nit

(Mt. 24:3-28; Mr. 13:3-23)

<sup>7</sup> Dxel gunabdiidx reeman lojman rëb reeman:

—Mextr, ¿goc gac zian? ¿Xhie ree sen gac chi ma zidyob gac zian?

<sup>8</sup> Zianz rëb Jesús loj reeman:

—Gol gojp cudad achu gusquiee lëjt. Din zien ree bën gui't guiëb reeman guial por naj zëed reeman guiëb tëë reeman: “Naj naj Cristo”; o “Ma zidyob dxej gui'taman.” Per ad chililadxidi laa reeman. <sup>9</sup> Abi' chi guiguiejndi cayajc wadijl o chas ree bejn contr xguxtis reeman, ad guidxebidi din yaløj gac zian. Per ad por laatan ma bidxin dxej nit guidxliuj.

<sup>10</sup> Rëb tëë Jesús loj reeman:

—Til nacion con stijb nacion, til tëë bën rajp guialrniabee con stijb bën rajp guialrniabee, <sup>11</sup> gui't tëë xudoxh, nè guibijn, nè guialguijdxdoxh niz ni niz guie abi' xanyabaa guiguien ree ni nadxeb.

<sup>12</sup> Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëed reeman lëjt casti, cu' reeman lëjt ladxguib chinë tëë reeman lëjt loj ree rey nè loj ree gobernador guial na-

judi da bejnan. <sup>13</sup>Zian gac din chile' güdi da diidxan loj reeman. <sup>14</sup>Ad aal chu'di xgab xhie guiëbidi loj reeman. <sup>15</sup>Din naj gune diidx ni guineedi gune tëen quiar-guiejn. Abi' ni'qui tijb Bén rdx'e'ch lëjt ad züjnt gan loj xtiidxidi ad zanee tëët reeman contr lëjt. <sup>16</sup>Per lëjt xt xdadidi o xniaadi, o bijchidi o xfamilidi o xmi-widi yayü reeman lëjt, abi' yu'di gugüjt reeman. <sup>17</sup>Gra bénguidxliuj guidxe'ch lëjt guial najdi da bejnan. <sup>18</sup>Per ni'qui tijb guidxguijquidi ad zanijt por zian. <sup>19</sup>Abi' bal sudxi'chidi loj xnejz Dios, zäjpidi guialnaban tiblyaa con Dios.

<sup>20</sup>'Chi guguaaadi nayaw ree suldad Jerusalén, ma qui nit guiedx guin. <sup>21</sup>Dx-ejzii ree, Bén za' ree niz Judea, gol bigxüün niz dajn ree, abi' ree Bén za' guiedx Jerusalén gol brii luguiedx guin, guiáad ree Bén za' dajn ad bal yayudi luguiedx guin. <sup>22</sup>Din dxej guin ree gudëed Dios bejn ree casti din gac cumplid zi'c ca loj xtiidxaman. <sup>23</sup>¡Probza ree béngunaa nüü xi'n o bén-gunaa ca' ree xindobëz lën ree dxe-jzii! Din dád sagdiaj ree bejn abi' dád casti narooob yayal ree bénluguiedx guin. <sup>24</sup>Yu' ree Bén guiët loj wadijl yu' tëë reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaloj dxej ni tiëb Dios nabee reeman yagaj.

### Gui't Bén guxhaal Dios zatijb

(Mt. 24:29-35, 42-44; Mr. 13:24-37)

<sup>25</sup>'Dxel gac sen loj gubijdx, con loj bëëw, con loj ree bajl xanyabaa. Abi' loj guidxliuj gagdxa ree bejn guidxeb tëë reeman guial gac naquie' loj nijsdoo gac tëë naquie' por xtüjp nijs. <sup>26</sup>Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiáad ree ni rguien xanyabaa guiniib reen. <sup>27</sup>Abi' guguaa reeman Bén guxhaal Dios, rdiinman bacha' zëë-

daman loj zäj con xguialrniabeeman. <sup>28</sup>Chi suloj gac ree ni guin, gol bagu' lux-doodi zagdxe gol gules tëë lojdi din ma zidyob dxej ni laadi loj casti.

<sup>29</sup>Rëb tëë Jesús loj reeman:

—Gol baguaa yag higo o xhietëez zatijb yagan. <sup>30</sup>Chi ma caydxib ree xbalagan, lëjt ragbee guial ma zëëd tiamp nalaa. <sup>31</sup>Ziangajc chi guguaaadi ma cayajc ree ni guin, zagbeedi guial ma zëëd xguialrniabee Dios gajxh.

<sup>32</sup>'Diidxli rmin lojdi guial gra ree ni guin gac chi gad gra ree Bén naban yan guiët. <sup>33</sup>Guidxliuj në xanyabaa zanijt reen, per da diidxan ad zadëdt gacan cumplid.

<sup>34</sup>'Gol gojp cudad ad güün graloj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi guialan zatijb, ad gac dxej guin par lëjt <sup>35</sup>zi'c tijb tramp. Din zian gac dxej guin par gra ree Bén-guidxliuj. <sup>36</sup>Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tëë sudi loj Bén guxhaal Dios.

<sup>37</sup>Radxe ruliüü Jesús bejn ree lën yadooro' Jerusalén guiáad guxhin raya'nman ruguia' la Olivos. <sup>38</sup>Abi' rsildoo rej gra ree bejn lën yadoo guin ricaagdiajg reeman ni rnieeman.

### Baya'n reeman diidx xhienaag guiniaaz reeman Jesús

(Mt. 26:1-5, 14-16; Mr. 14:1-2, 10-11; Jn. 11 :45-53)

**22** Chi ma zidyob lanij pascw, chi levadur. <sup>2</sup>Bixhioz rniabee ree bixhioz con ree mextr rajc ley, raguiil reeman mod xhienaag gugüjt reeman Jesús guial rdxeb reeman bejn ree.

<sup>3</sup>Dxel guyu xindxab luxdoo tijb ree xi apóstoles Jesús, Bén la Judas Iscariote. <sup>4</sup>Judas guin bigneenë bixhioz rniabee ree bixhioz con ree Bén rniabee Bén

rajp ree yadooro' Jerusalén, abi' benëman laa reeman diidx xhienaag yayüman Jesús loj reeman. <sup>5</sup>Dád babaa reeman abi' rëb reeman guial gudëed reeman milia lojman. <sup>6</sup>Zianz cwëjbaman, dxel guzuloj raguiilaman mod xhienaag yayüman Jesús, guial ad zagbeet ree bejn.

### Gudawnë ree xbejn Jesús xche

(Mt. 26:17-29; Mr. 14:12-25;  
Jn. 13 :21-30; 1Co. 11 :23-26)

<sup>7</sup>Chi bidxin lanij pascw, tijbgaj yu raw ree bejn guiadxtil ni ad yu't levadur rugüjt tëe reeman tijb xiil, <sup>8</sup>dxel guxhaal Jesús Bëd con Waj, rëbaman loj reeman:

—Gol biguieen ni yadaaw ree guxhin pascw.

<sup>9</sup>Abi' gunabdiidx reeman lojman rëb reeman:

—¿Ban guin rën l yuguieenan laan?

<sup>10</sup>Zianz rëb Jesús loj reeman:

—Chi chu'di luguiedx guin, guguaadi tijb xinguaaw ca'x tijb re yu' nijs. Gol chinalix xt lod yayux, <sup>11</sup>gol güjdx loj bën naj lidxan: “Na mextr: ¿Con lënu gawnë ree xbejnman guxhin pascw?” <sup>12</sup>Dxel gulüüman lëjt tijb lënu ni rarojp pijs, ma najcchaaw lënu guin. Yagaj gol been ni yadaaw ree xche.

<sup>13</sup>Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman guialraw guin ni gaw reeman guxhin pascw.

<sup>14</sup>Chi bidxin hor, Jesús con ree bën naj apóstoles gurej reeman xan mex. <sup>15</sup>Dxel rëbaman loj reeman:

—¿Diizd gocli rënan gawnë'n lëjt pascw guie, chi gad dxej guidxin gaza-gdiajn abi' guiëtan! <sup>16</sup>Din naj rni lëjt guial ad yu'tri dxej gawnë'n lëjt, xt chi ma canabee Dios guidiblagaa.

<sup>17</sup>Dxel cwa'man tijb cojp yu' vin, chi gulox badëeman quixtëe loj Dios, rëbaman loj reeman:

—Gol cwa' vin guie, gol gudi'san loj gradi. <sup>18</sup>Din diidxli rmin lëjt, ad yu'tri dxej guië'n vin xt chi ma canabee Dios guidiblagaa.

<sup>19</sup>Dxel cwa'man guiadxtil badëeman quixtëe loj Dios, zianz gula'man laan, gudi'saman laan loj reeman, rëbgajman:

—Guiadxtil guie naj da cuerpan ni ma bayün din guiëtan por lëjt. Chi güüdi zian, gol been zian guial rusaaladixidi naj.

<sup>20</sup>Abi' ziangajc beenman con cojp ni yu' vin guin, chi gulox gudawaman xche, rëbaman:

—Vin guie naj da rejnman ni gaxhie'n chi guiëtan din guixal tijb nejz cüb xhienaag gap ree bejn perdon loj Dios.

<sup>21</sup>'Per yan bën yayü naj, laa yaa-man xoob loj mex lod xoob gajc yan.

<sup>22</sup>Per Bën guxhaal Dios, naj sagdiajman abi' guiëtaman. Per ¿probza bën yayü laaman!

<sup>23</sup>Dxel guzuloj rniabdiidx loj lasa' reeman chu reeman yayü laaman.

### Chu mazri zojbloj

<sup>24</sup>Dxel guzuloj reeman cadildiidx reeman chu loj gra reeman naj mazri bën zojbloj. <sup>25</sup>Per rëb Jesús loj reeman:

—Bën naj ree rey loj guidxliuj guie rniabee reeman bën ladx reeman zi'ctzi rën reeman, abi' ree bën rniabee, rëb reeman guial rüjn reeman ni zagdxe. <sup>26</sup>Per lëjt ad rayalt güüdi zian, bën mazri zojbloj lojdi rayal güün laagajcaman zi'c tijb bën ad zojblojt. Guiáad bën rniabee lojdi rayal güün laagajcaman zi'c tijb mojs. <sup>27</sup>¿Chu naj mazri bën zojbloj loj guidxliuj guie? ¿Bën rbej xan mex par gaw ya o bën rbe'c guialraw? ¿Nid bën rbej xan mex guin naj mazri bën zojbloj ya? Guiáad naj za'n lojdi zi'c tijb bën rbe'c guialraw.

<sup>28</sup>'Lëjt czi za'në naj loj ree dxej caza-gdiajn. <sup>29</sup>Zeel gunen guialrniabee lojdi zi'c banee da Dadanan lon, <sup>30</sup>abi' gawidi

loj da mexan lod ganabeen cwe tëëdi loj ree yagxhil lod güündi guialguxtis loj gra ree bën za loj guidxiptio'p xdiaa Israel.

**Rëb Jesús guial guiëb Bëd  
ad nünbeetaman laaman**

(Mt. 26:31-35;

Mr. 14:27-31; Jn. 13 :36-38)

<sup>31</sup> Rëb tëë Jesús:

—Simón, Simón, ma gunab xindxab lëjt din güünx lëjt prueb zi'c rbijb bejn trigo. <sup>32</sup> Per naj ma guredx gunaaban Dios por lüj chitëë cwëz chililadxil naj. Guíaad lüj chi yazudxi'chil loj ni rliladxil naj zatijb, gognë ree lasa'l din sudxi'ch reeman loj ni rliladx reeman naj. <sup>33</sup> Dxel rëb Bëd lojman:

—Dad, ad zaro'nladxtan lüj majsi gayu'në'n lüj ladxguib o xt guiëtnë'n lüj.

<sup>34</sup> Abi' rëb Jesús:

—Naj rni lüj Bëd, yan guxhin gajc chi gad guïd cwidxa', choon volt mal rëbil ad nünbeetil naj.

**Zidyob dxej sagdiaj Jesús**

<sup>35</sup> Dxel gunabdiidx Jesús loj ree xbejnman rëbaman:

—Chi guxhalan lëjt sin bols, sin milia, në sin gurëch, çyu' ni biaadxidi ya?

Badxi' reeman laan rëb reeman:

—Achet.

<sup>36</sup> Dxel rëbaman loj reeman:

—Sa'n yan bën rajp milia në bols, gol cwa'n. Guíaad bën ad rajpt espad, gol bato' xabidi din siidi tijban. <sup>37</sup> Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

<sup>38</sup> Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

**Rbejdx rniab Jesús  
Dios lod la Getsemani**

(Mt. 26:36-46; Mr. 14:32-42)

<sup>39</sup> Dxel brii Jesús zi'c naj xcostumbra-man zëman ruguia' Olivos, abi' binal ree xbejnman laaman. <sup>40</sup> Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

<sup>41</sup> Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios, <sup>42</sup> rëbaman:

—Dad, bal tiëbil, babëë naj loj ni gaza-agdiajn per ad gac zi'c rënan, rayal gac zi'c rënl.

<sup>43</sup> Dxel balüüloj tijb anjl guza xanyabaa lojman persi badëëman laaman gojl. <sup>44</sup> Abi' chi cazagdiaj da'taman, mazri con gan cabejdx canabaman Dios ryajb tëë ree xnijs ragneeyaman luyuj zi'c rejn.

<sup>45</sup> Chi bisuman lod cabejdx canabaman Dios, bignaj ree xbejnman abi' chi badxinman cwë' reeman laa reeman naga'yëjs, guial yu'naya reeman. <sup>46</sup> Zianz rëbaman loj reeman:

—çChexc zeel naga'yëjsidi? Gol bixche, gol gurejdx gunab Dios chitëë güün xindxab lëjt gan.

**Gunaaz reeman Jesús**

(Mt. 26:47-56;

Mr. 14:43-50; Jn. 18 :2-11)

<sup>47</sup> Sta caneenë Jesús bën naj ree xbejnman chi bidxin ree benzien. Në bën brii laj Judas, bën goc tijb ree xbejn Jesús, nedaman loj ree bën guin abi' bibigaman loj Jesús gudawaman laaman xid.

<sup>48</sup> Dxel rëb Jesús lojman:

—Judas, çwen con tijb xid rayül Bén guxhaal Dios ya?

<sup>49</sup> Chi baguiaa ree bën za'në Jesús ni cayajc, rëb reeman lojman:

—Dad, çzalëë dux espadan ya?



<sup>50</sup> Abi' tijb xbejnman gudiilguijdxaman xmojs bixhioz rniabee gra ree bixhioz, gutü'man guidiajg ladbeeman.  
<sup>51</sup> Per rëb Jesús loj reeman:

—Guzujr ree bénan. Ma gojczy.

Dxel baqui' Jesús guidiajg mojs guin abi' bayüjnman laan. <sup>52</sup> Zianz rëb Jesús loj ree bixhioz rniabee ree bixhioz, con ree bén rniabee ree bén rajp yadooro' Jerusalén con xguxtis ree bén Israel, bén bidxin ree par chinë laaman:

—¿Chexc zeel zëedidi con espad con yag dinc chinëdi naj zi'c tijb xingubaan? <sup>53</sup> Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

### **Rëb Bëd ad nünbeetaman Jesús**

(Mt. 26:57-58, 69-75; Mr. 14:53-54, 66-72; Jn.18 :12-18, 25-27)

<sup>54</sup> Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt. <sup>55</sup> Yagaj gule'c ree bén guin guij galay lule', abi' gurej reeman rudëj guin. Në Bëd gurejnë laa reeman. <sup>56</sup> Per tijb béngunaa rüjn dxiin yagaj, chi baguiaaman Bëd zobjaman rudëj guin, baguiaaman lojman, abi' rëbaman:

—Në bén guin za'në Jesús.

<sup>57</sup> Per gurexuu Bëd, abi' rëbaman loj bén guin:

—Ad nünbeetan laax.

<sup>58</sup> Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bëdan rëbaman:

—Yajqui dad, ad xbejntix naj.

<sup>59</sup> Gudëd cost tib hor, dxel rëb zatijb bejn:

—Nëczy bén guie za'në laaman din nëman naj Bén Galilea.

<sup>60</sup> Zianz rëb Bëd:

—Ad ragbeetan xhienin rnieel.

Hor ni canee gajc Bëd zian guridxa' tijb guid. <sup>61</sup> Dxel badxi' loj Jesús baguiaaman loj Bëd, abi' basaaladx Bëd guial rëb Jesús lojman: “Yan guxhin gajc chi gad guid cwidxa', choon volt mal rëbil ad nünbeetil naj.” <sup>62</sup> Dxel barri Bëd yagaj, abi' dád naya biinman.

### **Baze' reeman Jesús gudijn tëë reeman laaman**

(Mt. 26:67-68; Mr. 14:65)

<sup>63</sup> Bén cayajp ree Jesús, baze' reeman laaman gudijn tëë reeman laaman.

<sup>64</sup> Guxhii reeman lojman abi' gudijn reeman laaman, dxel rëb reeman lojman:

—¿Guneeya' chu gudin lüj!

<sup>65</sup> Abi' zien ree diidxguijdx rëb reeman lojman.

### **Za' Jesús loj ree guxtis Israel**

(Mt. 26:59-66;

Mr. 14:55-64; Jn.18 :19-24)

<sup>66</sup> Chi bareguiaal, badxajg lasa' ree guxtis Israel, në ree bixhioz rniabee ree bixhioz con ree mextr rajc ley, abi' binë reeman Jesús lod radxaag lasa' gra ree xguxtis reeman, dxel rëb reeman lojman:

<sup>67</sup> —Guna du lojn, ¿lüj naj Cristo ya?

Badxi'man laan rëbaman:

—Bal ganinan ad zaliladxtidi. <sup>68</sup> Abi' bal xhie ganabdiidxan lojdi, ad zadxi'tidan. <sup>69</sup> Per diidz yan, Bén guxhaal Dios cweman xladbee Dios, bén ca' gra guialrniabee.

<sup>70</sup> Dxel rëb gra reeman lojman:

—¿Lüjn naj Xi'n Dios ya?

Badxi'man laan, rëbaman:

—Waliquidi najcan.

<sup>71</sup> Zianz rëb reeman:

—¿Xhie mazri rüjn naguiejn yadiil ree testiw? Dunuj gajc ree ma baguiejn ni nax con quijb xtiidix.

### Binë reeman Jesús loj Pilato

(Mt. 27:1-2, 11-14;

Mr. 15:1-5; Jn. 18 :28-38)

**23** Dxel wajs gra reeman binë reeman Jesús loj Pilato. <sup>2</sup>Yagaj guzuloj cutedia' reeman Jesús lojman, rëb reeman:

—Badxaaglojn xin guie cusquieex bën du ladx ree, rëbix guial ad rayalt yadijx ree impuest loj rey César, rëb tëëx guial laax naj Cristo, naj tëëx rey.

<sup>3</sup>Dxel gunabdiidx Pilato lojman rëbaman:

—¿Lüjn naj xrey ree bën Israel ya?

Badxi' Jesús laan, rëbaman:

—Waliquil, najcan.

<sup>4</sup>Dxel rëb Pilato loj ree bixhioz rniabee ree bixhioz në loj gra ree bën riga' yagaj:

—Achet xfalt xin guie radxejlan.

<sup>5</sup>Per laa reeman naguiejnczi rüjn reeman, rëb reeman:

—Cusquieex bejn ree guidib niz Judea con ree ni ruliüix laa reeman. Guzulojx niz Galilea abi' yan cayüjnx zian niz guie.

### Binë reeman Jesús loj Herodes

<sup>6</sup>Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús. <sup>7</sup>Abi' chi rëb reeman guial najman bën Galilea, guxhaalaman laaman loj Herodes bën rniabee Galilea, guial lën ree dxej guin në Herodes za' Jerusalén. <sup>8</sup>Chi baguiaa Herodes Jesús dád babaaman guial diizd gocli rënman guguaaman laaman guial bacaagdiajgaman ruza't ree bejn laaman, abi' rbëzaman guguaaman güünman tijb milagr. <sup>9</sup>Zien ree ni gunabdiidxaman lojman, per Jesús achetczi badxi'man. <sup>10</sup>Në ree bixhioz rniabee ree bixhioz za' yagaj con ree mextr rajc ley, ad rucwëëzt rutedia' reeman laaman. <sup>11</sup>Dxel Herodes con ree xsul-

dadaman xhiernarajc beennë reeman laaman, baze' reeman laaman, bascajcw reeman laaman lajd zagdxe lasa' ni rajcw ree rey. Zianz baxhaal Herodes guin laaman loj Pilato zatijb. <sup>12</sup>Abi' dxejzii bazuloj baneenë Herodes Pilato zagdxe, din gocli rdxe'ch lasa' reeman.

### Gunabee reeman guiët Jesús

(Mt. 27:15-26; Mr. 15:6-15;

Jn. 18 :39-19 :16)

<sup>13</sup>Dxel bachajg Pilato lasa' ree bixhioz rniabee ree bixhioz con ree guxtis, con ree bën luguiedx guin, <sup>14</sup>abi' rëbaman loj reeman:

—Bidnëdi xin guie nadi cusquieex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi. <sup>15</sup>Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beenx din guiëtix. <sup>16</sup>Yan, gudëdan laax casti dxel guslaan laax.

<sup>17</sup>Lën ree dxej lanij guin ruslaa Pilato tijb bën yu' ladxguiib zi'c goc xcostumbr reeman. <sup>18</sup>Per graczi reeman guzuloj rbixdiaj, rëb reeman:

—¡Bagüjt xin guin! ¡Baslaa Barrabás!

<sup>19</sup>Badxe' reeman Barrabás guin ladxguiib guial beenman tijb wadijl Jerusalén, guial guzujman contr ree suldad rom, në guial bagüjtaman bejn. <sup>20</sup>Guneenë Pilato laa reeman zatijb guial guyënman nuslaaman Jesús, <sup>21</sup>per laa reeman gurixdiaj reeman mazri rejs, rëb reeman:

—¡Bacaax loj crüjz! ¡Bacaax loj crüjz!

<sup>22</sup>Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiëtix. Gudëdan laax casti dxel guslaan laax.

<sup>23</sup>Per laa reeman mazri rbixdiaj reeman, rëb reeman loj Pilato din gucaaman laaman loj crüjz. Abi' guial tant rbixdiaj reeman con ree bixhioz rniabee ree bixhioz, been reeman gan

gojc zi'c rën reeman. <sup>24</sup>Dxel cwëjb Pilato beenman zi'c rën reeman. <sup>25</sup>Abi' baslaaman Barrabás bën guyu ladxguiib por wadijl nê guial bagüjtaman bejn, guiáad Jesús bayüman laaman loj reeman persi beennê reeman laaman zi'ctzi rën reeman.

### Bacaa reeman Jesús loj crüjz

(Mt. 27:32-44;

Mr. 15:21-32; Jn. 19 :17-27)

<sup>26</sup>Chi zinê reeman Jesús din gucaa reeman laaman loj crüjz, gunaaaz reeman tijb bën za Cirene laaman Simón. Ziaadaman bazaman dajn, gunabee reeman laaman güüman xcrüjz Jesús din chinalaman laaman.

<sup>27</sup>Zien da't bejn zinal laaman, abi' zien ree béngunaa roon rbixdiaj guial raya reeman laaman. <sup>28</sup>Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lëjt gajc nê por xi'ndi. <sup>29</sup>Din zadxin dxej guiëbidi: “Xiquilbaa ree béngunaa ad rajct ru xi'n, nê ree béngunaa ad gojlt xi'n con ree béngunaa ad ca't bindobëz.” <sup>30</sup>Dxel suloj guiëb ree bejn loj ree guia': “Gol guxa't du guijcan”, guiáad loj ree lom guiëb reeman: “Gol baquie'ch dunujn.” <sup>31</sup>Yan, nacli naj rüjnnê reeman zian, diidxgui lëjt, wed xhieczinin güünnê reeman lëjt.

<sup>32</sup>Abi' nê tio'p ree xingubaan zinê reeman din tia reex loj crüjz con Jesús. <sup>33</sup>Chi bidxin reeman lod la Calaver, bacaa reeman Jesús loj crüjz, con grop ree xingubaan guin: tijbix cwa ladbee zati-jbix cwa ladruvejs. <sup>34</sup>Abi' chi cucaa reeman Jesús loj crüjz, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guijc xabaman din yala' reex laan. <sup>35</sup>Zien ree bejn riga' yagaj cuguaa reeman, abi' xt ree guxtis ruze' laaman, rëb reeman:

—Baslaax ben ren ree, yan guslaa laa-gajquix bal walix laax naj Cristo.

<sup>36</sup>Nê ree xin suldad ruze' laaman, rbig reex rudëed reex vinagr guië'man, <sup>37</sup>rëb reex lojman:

—Bal lüj naj xrey ree bën Israel, baslaa lüj gajc.

<sup>38</sup>Abi' guijc crüjz guin bacaa reex lëjtr con diidx grieg, diidx latin, nê diidx hebreo, rëban: “Bën guie naj xrey ree bën Israel.”

<sup>39</sup>Tijb xingubaan ni ca loj crüjz guin guneez diidxguijdx loj Jesús, rëbix:

—Bal lüj naj Cristo, baslaa lüj gajc, baslaa tëë dunujn.

<sup>40</sup>Per zatijbix gudilê xcompniarix, rëbix lojx:

—¿Staczi ad rdxehtil Dios ya majsi lasa'gajc casti guin cadëdil? <sup>41</sup>Dunuj rayalczi cayzaagdiaj din zian caydijx ni baguieen. Per bën guie achetctzi ni mal wayüjnman.

<sup>42</sup>Dxel rëbix loj Jesús:

—Basaaladx naj chi ma canabeel.

<sup>43</sup>Abi' rëb Jesús lojx:

—Diidxli rmin lojl guial yandxej gajc sunël naj lod naj nix, lod gan.

### Güjt Jesús

(Mt. 27:45-56;

Mr. 15:33-41; Jn. 19 :28-30)

<sup>44</sup>Chi gol garol dxej, bicajy guidibczi guidxliuj xt raca choon wadxe. <sup>45</sup>Bicajy logbijdx guiáad lajd nal lën yadooro' Jerusalén goxya'n, gojcan tio'p lala'.

<sup>46</sup>Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeaman zian, dxel güjtaman.

<sup>47</sup>Chi baguiaa suldad rniabee ree suldad ni goc, baza'tix Dios zagdxe, rëbix:

—Walican achet xtol bën guin yu'.

<sup>48</sup>Chi baguiaa gra ree bën za' yagaj ni goc, dád guyunaya reeman zia reeman riga'pgaj luxdoo reeman. <sup>49</sup>Per gra ree bën nünbee Jesús, con ree béngunaa nal

laaman diidz Galilea, zijt guzuj reeman baguiaa reeman gra ree ni goc.

### Biguie'ch Jesús

(Mt. 27:57-61;

Mr. 15:42-47; Jn.19 :38-42)

<sup>50</sup> Guyu tijb bejn, brie lajman Xiëb, goj-caman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc tëëman tijb xguxtis ree bën Israel. <sup>51</sup> Nëman rbëz nabee Dios, abi' ad nëtaman bachajg xixgab ree bën bagüjt Jesús. <sup>52</sup> Wejman loj Pilato bignabaman xcuerp Jesús. <sup>53</sup> Chi gulox baletaman xcuerp Jesús loj crüjz guin, cwa'man laaman batüübaman tijb lajd, dxel biquie'chaman laaman lën tijb baa ni bidëën lën guiaj lod achutzzi waguie'ch. <sup>54</sup> Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

<sup>55</sup> Abi' ree béngunaa zidnë Jesús diidz Galilea, në reeman binal abi' baguiaa reeman xbaa Jesús baguiaa tëë reeman xhienaag gudijxh reeman xcuerpaman. <sup>56</sup> Chi bayejc reeman, zianz beenchaaw reeman perfum në zaj ni rliaa nejxh ni guidëëbaman. Dxel baziiladx reeman dxej raziiladx ree bejn zi'c rniabee ley.

### Raban Jesús

(Mt. 28:1-10; Mr. 16:1-8; Jn.20 :1-10)

**24** Chi dumingw rsildoo, wej ree béngunaa guin ro' xbaa Jesús binë reeman perfum ni beenchaaw reeman. <sup>2</sup> Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran. <sup>3</sup> Abi' guyu reeman, per ad bidxaaglojtri reeman xcuerp Dad Jesús. <sup>4</sup> La'tzi cadxeb reeman ni'quid radxejlt xhie güün reeman, dxejzci baguiaa reeman tio'p ree bejn za'li reeman gajxh lod za' reeman, najcw reeman lajd bacha'. <sup>5</sup> Abi' guial tant bidxeb ree-

man, basajb loj reeman xt luyuj, dxel rëb ree bën guin loj reeman;

—¿Chexc zeel raguilidi tijb bën naban loj ree bengüt? <sup>6</sup> Achutri laaman guie din ma babanman. Gol basaaladx ni naman lojdi chi guzuman niz Galilea. <sup>7</sup> Naman lojdi guial yayü reeman Bën guxhaal Dios loj ree bëndol din gucaa reeman laaman loj crüjz, abi' ni yayon dxej yabanman.

<sup>8</sup> Dxel basaaladx reeman diidz ni rëb Jesús loj reeman, <sup>9</sup> abi' chi baza reeman ro' baa guin, bicojn reeman guidxiptib ree xi apóstoles Jesús në los demazri ree xcompniar reeman gra ni baguiaa reeman. <sup>10</sup> María Magdalena, con Xuan, con Li xniaa Jacob con ree béngunaa ren, laa reeman bignë ruson guin loj ree xi apóstoles Jesús. <sup>11</sup> Per laa reeman ad bililadxt reeman ni rëb ree béngunaa guin, gunaladx reeman wed rëbzi reeman.

<sup>12</sup> Per Bëd baxüünman biquiaaman lën baa guin, abi' chi baguiaaman lën baa guin, lajd ni bidüübzi Jesús baguiaaman, zianz ziaman dád radxalojman por ni goc.

### Balüüloj Jesús loj tio'p ree xbejnman

(Mr. 16:12-13)

<sup>13</sup> Dxej guin gajc, tio'p ree xbejn Jesús zë tijb guiedx la Emaús, raya'nän zi'ct chiptib kilometro par Jerusalén. <sup>14</sup> Chi zë reeman lunejz cayü reeman diidz xcwent gra ree ni goc. <sup>15</sup> La'tgaj cayü reeman diidz, gubig Jesús cwë' reeman abi' guzuloj cazanëman laa reeman. <sup>16</sup> Per majsi cuguaa reeman laaman, yu' ni badxoon nayünbee reeman laaman. <sup>17</sup> Dxel gunabdiidz Jesús loj reeman, rëbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

<sup>18</sup> Badxi' tijb bën la Cleofas laan, rëbaman:

—Gra ree bejn ragbee ni goc Jerusalén lèn ree dxej guie. ¿Wen tijbzi lüj naj Bén guzu Jerusalén ad gogbeetil ni goc ya?

<sup>19</sup> Dxel rëbaman loj reeman:

—¿Xhie goc?

Abi' rëb reeman:

—Ni beennë reeman Jesús Bén Nazaret, laaman goc tijb Bén badëë xtiidx Dios loj ree bejn, Bén gop guialrniabee zi'c ni beenman në ree diidx ni guneeman niz loj Dios në niz loj ree bejn. <sup>20</sup> Në guial bayü ree bixhioz rniabee ree bixhioz laaman në ree dux guxtis ree din guiëtaman, abi' bacaa reeman laaman loj crüjz. <sup>21</sup> Par dunujn laaman naj Bén yabëë ree Bén Israel loj ree Bén rom, per yan gojc choon dxej ni goc ree ni guin. <sup>22</sup> Majsí tio'p choon ree béngunaa no'ch du lojn bachejb reeman dunujn, guial rsildoo wej reeman ro' baa guin, <sup>23</sup> abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús. <sup>24</sup> Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczi rëb ree béngunaa guin, per ad baguiaat reeman Jesús.

<sup>25</sup> Dxel rëb Jesús loj reeman:

—¿Xi nawëëg naj chignia'di abi' xi raglaa par chililadxidi gra ni guneë ree Bén badëë xtiidx Dios loj ree bejn! <sup>26</sup> ¿Wen id naj ya guial sagdiaj Cristo, dx-elri yayë'paman xanyabaa?

<sup>27</sup> Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzulojman con ree xlibr Moisejs abi' basnuuman con gra ree libri ni bacaa ree Bén badëë xtiidx Dios loj ree bejn.

<sup>28</sup> Chi bidxin reeman guiedx lod zë reeman, been Jesús zi'c Bén che mazri zijt. <sup>29</sup> Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman. <sup>30</sup> Abi' chi zojbnëman laa reeman xan mex, cwa'man guidaxtil abi' chi gulox badëëman quixtëë loj Dios, gula'man laan persi badëëman laan loj reeman. <sup>31</sup> Hor guin gajc guzajc reeman zi'c Bén baxal guiaaloj, abi' bayünbee reeman laaman. Per laa gunidloj gajcman, <sup>32</sup> zianz rëb loj lasa' reeman:

—¿Ze'cliza dád nix yu' du luxdoo chi zudnë'man lunejz, chi cusignia'man dunuj ni rëb loj xtiidx Dios!

<sup>33</sup> Abi' ni'quid gulëjzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman. <sup>34</sup> Rëb reeman loj grop ree Bén guin:

—Walican ma baban Dad Jesús, ma balüülojman loj Simón.

<sup>35</sup> Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guidaxtil.

### Balüüloj Jesús loj ree xbejnman

(Mt. 28:16-20;

Mr. 16:14-18; Jn. 20:19-23)

<sup>36</sup> Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

<sup>37</sup> Dád badxaloj reeman abi' bidxeb reeman guial gunaladx reeman anman cuguiaa reeman. <sup>38</sup> Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi? <sup>39</sup> Gol baguiaa yan në guia'n. Naj gajcan, gol baqui' naj gol baguiaa tëë naj, din tijb anm ad yu'taman dxijt ad ca tëëtaman bëël zi'c ruguiaadi naj.

<sup>40</sup> Chi rëbaman zian, balüü yaaman në guia'man. <sup>41</sup> Per laa reeman staczi ad

rliladxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

<sup>42</sup>Dxel badëë reeman tibia' bëjl biguie', <sup>43</sup>abi' cwa'man laab gudawaman niz loj reeman. <sup>44</sup>Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj libr salmos.

<sup>45</sup>Dxel guxhalaman xquiarguejn reeman persi bignia' reeman ni ca loj xtiidx Dios, <sup>46</sup>abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman. <sup>47</sup>Abi' diizd Jerusalén sulloj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtol guililadx tëë

reeman naj. <sup>48</sup>Lëjt naj testiw xcwent gra ree ni guin. <sup>49</sup>Naj gaxhal par lëjt ni ma na da Dadan. Per gol guzujsii luguiedx Jerusalén xt tia'di guialrniabee ni gui't diizd xanyabaa.

### **Bayë'p Jesús xanyabaa**

*(Mr. 16:19-20)*

<sup>50</sup>Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman. <sup>51</sup>Abi' la'tgaj cayüjnle'man laa reeman, wajsaman ziaman xanyabaa. <sup>52</sup>Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman. <sup>53</sup>Abi' guixie guixie yu' reeman lën yadooro' Jerusalén ruza't reeman Dios zagdxe rudëëd tëë reeman quixtëë lojman.

## Xtiidxa'c Jesucrist ni bacaa San Juan

### Bi't Xi'n Dios loj guidxliuj

**1** Diisd guida'xchej chi gad guidxliuj gacchaaw, mal yu' bèn naj xtiidx Dios. Laaman za'nè Dios abi' laagajcaman naj Dios. <sup>2</sup>Laaman mal za'nè Dios diisd guida'xchej. <sup>3</sup>Laaman been graczi ni yu'. Achetczi ni yu' ni ajc bal id laaman. <sup>4</sup>Laaman rajp guialnaban, guiáad guialnaban guin naj bajl par gra bèn-guidxliuj. <sup>5</sup>Bajl guin rusni bèn nacay xquiarguejn, abi' ad rajct rutëë guialnacay guin loj bajl guin.

<sup>6</sup>Guyu tijb bèn brii laj Waj, Dios guxhaal laaman, <sup>7</sup>bidgaguieman diidx xcwent bèn naj xbajl Dios, din gac chililadx gra ree bejn laaman. <sup>8</sup>Per ad Wajt goc bajl guin, bi'tzaman bidgaguieman diidx xcwent bajl guin. <sup>9</sup>Din bèn naj quijb bajl guin, laaman rusni xquiarguejn gra bèn-guidxliuj, abi' ma bi'taman loj guidxliuj.

<sup>10</sup>Laaman guzu loj guidxliuj, abi' majsi laaman been guidxliuj, per ree bèn-guidxliuj ad bayagbeet reeman laaman. <sup>11</sup>Bi'taman loj ree bèn Israel, abi' majsi gojcaman bèn Israel, per ad bidxga't reeman laaman. <sup>12</sup>Per, gra ree bèn bidxga' laaman bililadx tëë reeman laaman, beenman laa reeman xi'n Dios. <sup>13</sup>Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial rën bejn chu' xi'nman, por guial rliladx reeman ma naj reeman xi'n Dios.

<sup>14</sup>Jesús, bèn naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyënman bejn ree gunee tëëman ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios. <sup>15</sup>Chi be Waj xtiidxaman loj ree bejn, guneeman rejs, rëbaman:

—Jesús guie naj bèn ruzatan, chi rmin guial bèn zëëd xichan mazri lasajcaman guial lon, din diisd gocli mal yu'man guial lon.

<sup>16</sup>Dád rënman dunuj ree, gra dxejczy raca' dugra ree xguialnaza'caman. <sup>17</sup>Por Moisejs banee Dios xleyaman duloj ree, per por Jesucrist bayagbee ree xhien-aag rën Dios dunuj ree xhie tëë naag naj xtiidxliaman. <sup>18</sup>Ad yu't dxej waguiaa bejn Dios. Bèn naj tijbzi xi'nman. Bèn nannè laaman baliüü duloj ree xhien-aag naj Dios.

### Waj bèn baroobnijs rëbaman chu naj Jesús

(Mt. 3:11-12; Mr. 1:7-8; Lc. 3:15-17)

<sup>19</sup>Diisd Jerusalén guxhaal ree xguxtis ree bèn Israel bixhioz ree con ree bèn naj ree levitas persi bignabdiidx reeman loj Waj chu najman.

<sup>20</sup>Dxel be Waj diidxli loj reeman, rëbaman:

—Ad najtan naj Cristo.

<sup>21</sup>Abi' gunabdiidx reeman lojman stijb rëb reeman:

—¿Chuza najl? ¿Lüjn naj Elías ya, bèn badëë xtiidx Dios loj ree bejn?

Badxi' Wajn rëbaman:

—Ad najtan.

Dxel gunabdiidx reeman stijb rëb reeman:

—O, ¿lüjn naj bèn naj diidx gui't ya, bèn gudëë xtiidx Dios loj ree bejn?

Badxi'man laan rëbaman:

—Ad najtan.

<sup>22</sup>Abi' rëb reeman:

—¿Chuza najl? Din rayal yugnë'n ruson loj ree bèn guxhaal dunujn. Guna chu najl.

<sup>23</sup>Dxel rëb Waj loj reeman:

—Naj naj tijb bèn rbidxa' loj yujbidx: “Gol guxhal tijb nejz nali par bèn ca' guialrniabee” —zi'c rëb Isafas bèn badëë xtiidx Dios loj ree bejn.

<sup>24</sup> Abi' ree b́en guxhaal ree b́enfarisew din guinieeně reeman Waj, <sup>25</sup> gunabdi-idx reeman lojman, rěb reeman:

—Bal id lűjn naj Cristo, ni'qui Elías, ni'qui b́en naj diidx gui't, b́en guděě xti-idx Dios loj ree bejn, ¿chexquiza zeel ruurobnijzil bejn?

<sup>26</sup> Badxi' Waj laan rěbaman:

—Naj rurobnijs con nijs, per lojdi no'ch tijb b́en ad wayűnbeetidi.

<sup>27</sup> Laaman naj b́en zěəd xichan, ni'qui xgurěchaman ad rayalt gaxhiecan guial najman b́en mazri lasajc guial lon.

<sup>28</sup> Gra niguie gojc lod la Betábara, ni naj stiblad ro' guiw Jordán, lod baroobnijs Waj bejn ree.

### Jesús naj Xi'n Dios

<sup>29</sup> Chi bareguiaal, baguiaa Waj zibig Jesús lod za'man, dxel rěbaman:

—Gol baguiaa, b́en guin naj b́en ba-caabee Dios din guiětaman zi'c xiildoo por xtol ree b́enguidxliuj. <sup>30</sup> Laaman bazatan lojdi chi rnin: “Xichan zidnal b́en mazri lasajc guial lon, din laaman mal yu' diidx gocli guial lon.” <sup>31</sup> Ni'qui naj ad gogbeetan guial laaman naj b́en gui't, per naj zialan din gurobnijsan bejn ree con nijs din chile' gűnbee ree b́en Israel laaman.

<sup>32</sup> Rěb těě Waj loj reeman:

—Naj baguia biguiajt xSprijt Dios dizd xanyabaa zi'c tijb palom xt guijcaman. <sup>33</sup> Majsi ad nűnbeetan laaman, per b́en guxhaal naj barobnijsan con nijs, laaman na lon: “Chi guguiaal guiat xSprijt Dios xt guijc tijb bejn, laaman naj b́en runeexSprijt Dios.” <sup>34</sup> Naj ma baguia laaman, abi' ragbeechaawan guial laaman naj Xi'n Dios.

### B́en binal ree Jesús yaloj

<sup>35</sup> Chi bareguiaal, za' Waj yagaj stijb, za'ně tio'p ree xbejnman. <sup>36</sup> Abi' chi baguiaaman caděd Jesús, dxel rěbaman loj reeman:

—Gol baguiaa, b́en guinan naj zi'c xi xiildoo Dios din guiětaman por xtol b́enguidxliuj.

<sup>37</sup> Chi biguiejn reeman rěb Waj zian, dxel binal reeman Jesús. <sup>38</sup> Chi badxi' lojman, baguiaaman zinal reeman laaman, abi' rěbaman loj reeman:

—¿Xhie rguilidi?

Badxi' reeman laan rěb reeman:

—Mextr, ¿ban zojbil?

<sup>39</sup> Dxel rěb Jesús loj reeman:

—Gol guda din guguiaadi.

Dxel wej reeman biquiaa reeman lod zojbaman, abi' baya'nně reeman laaman dxej guin, guial ma gojl cost raca tajp wadx.

<sup>40</sup> Tijb ree xbejn Waj b́en binal Jesús, b́en bacaagdiajg ni rěb Waj, laaman brii laj Andrejs, bijch Simón Běd. <sup>41</sup> Andrejs guin, yaloxgaj bijchaman Simón bigdilaman, abi' rěbaman lojman:

—Ma badxaaglojn b́en naj Mesías —rěn guiėban Cristo.

<sup>42</sup> Dxel bině Andrejs Simón lod za' Jesús, chi baguiaa Jesús laaman, rěbaman:

—Lűj naj Simón, xi'n Jonás, per yan grii laj Cefas —rěn guiėban Běd.

### Gurejdx Jesús Felip ně Natanael

<sup>43</sup> Chi bareguiaal been Jesús xgab che-man niz Galilea, abi' badxaagaman Felip, zianz rěbaman:

—Tanal naj.

<sup>44</sup> Ladx Felip guin naj guiedx Bet-saida, ni gajc naj ladx Andrejs con Běd.

<sup>45</sup> Dxel bigdiil Felip Natanael, abi' rěbaman lojman:

—Ma badxaaglojn b́en ruza't Moisejs loj xlibr xleyaman, b́en ruza't ree b́en baděě xtiidx Dios loj ree bejn loj ni bacia reeman. Laaman naj Jesús, xi'n Xiėb, b́en Nazaret.

<sup>46</sup> Dxel rěb Natanael lojman:

—¿Wen yu' benza'c Nazaret ya?

Badxi' Felipan rěbaman:



—Yo' din guguaal.

<sup>47</sup> Chi baguaia Jesús zëed Natanael, rëbaman:

—Guie zëed tijb bén naj quijb bén Israel, abi' ad rusquieetaman.

<sup>48</sup> Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lüj, chi za'l xan yag higo, dxel baguian lüj.

<sup>49</sup> Zianz rëb Natanael lojman:

—Mextr, lüj naj Xi'n Dios, lüj naj rey Israel.

<sup>50</sup> Badxi' Jesús laan rëbaman:

—¿Rililadxil naj ya guialzi rnin baguian lüj xan yag higo? Per mazri naj ree ni guguaal guial loj ni ma baguaial.

<sup>51</sup> Rëb tëëman:

—Naj ragbeechaaw, zuguaadi zojbyal xanyabaa, abi' zuguaadi xianjl ree Dios yayë'p reeman xanyabaa yaguiajt tëë reeman xt guijc Bén guxhaal Dios loj guidxliuj.

### Wej Jesús loj tijb guialruxhliia

**2** Ni goc choon dxej guyu tijb guialruxhliia luguiedx Caná, ni riga' niz Galilea. Dxel në xniaa Jesús za' yagaj, <sup>2</sup>abi' në Jesús con ree xbejnman guneë reeman persi wej reeman loj lanij guin. <sup>3</sup>Chi babidx vin, dxel rëb xniaa Jesús lojman:

—Achetri vin rajp reeman.

<sup>4</sup>Badxi' Jesúsán rëbaman:

—Na, ¿chexquiza zeel nal lon zian? Ad wadxint da horan günan ni rayal günan.

<sup>5</sup>Per xniaaman rëb gajcaman loj ree bén cayüjn mandad yagaj:

—Gol been gra ni naman.

<sup>6</sup>Yagaj za' xho'p ree guiajs guiaj, ni ru nijs ni rüjnnë ree bén Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr. <sup>7</sup>Abi' rëb Jesús loj ree bén rüjn mandad guin:

—Gol bacha ree guiajs guie nijs.

Dxel bachadi reeman laa reen, <sup>8</sup>abi' rëbaman loj reeman:

—Yan gol gulëë ta'nán, gol bigdëen loj bén canabee loj lanij guie.

Dxel bigdëë reeman laan lojman, <sup>9</sup>abi' bén canabee loj lanij guin beenman prueb nijs bayajc vin guin, sin guial ni-agbeeman ban guzan, bén cayüjnz ree mandad guin ragbee, din laa reeman bica' nijs guin. Dxel gurejdxaman xin cuxhliia guin, <sup>10</sup>rëbaman lojx:

—Graczi bejn rgui's yaloj vin zagdxe, abi' chi ma gu' reeman zilan, dxel rgui'saman vin corrient. Per lüj badxe'chaawil vin zagdxe guin persi cagui'silan yan.

<sup>11</sup>Ni guin naj milagr yaloj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

<sup>12</sup>Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxej.

### Babëë Jesús bén ruto' ree ro' yadooro'

(Mt. 21:12-13;

Mr. 11:15-18; Lc. 19:45-46)

<sup>13</sup>Chi ma zidyob pascw xlanij ree bén Israel, wej Jesús Jerusalén. <sup>14</sup>Abi' ro' yadooro' bidxaaglojman bén cuto' ree go'n, con ree xiil con ree palom, në ree bén zojb xan mex ruchaa reeman xmilia ree bén ziaad lood ren. <sup>15</sup>Chi baguaia Jesús zian, dxel beenchaawaman tijb duu persi babëëman gra reeman, con gra ree xgo'n reeman në ree xiil. Gutie'chaman xmilia ree bén ruchaa milia guin barexguiat tëëman xmex reeman. <sup>16</sup>Dxel rëbaman loj ree bén cuto' palom:

—¡Gol babëë reeb guie! ¡Ad rüjnnëdi lidx da Dadan zi'c luguia'!

<sup>17</sup> Dxel basaaladx ree xbejnman ni ca loj xtiidx Dios lod rëb: “Dád ralenan ruguan ni rüjn reeman lidxil.”

<sup>18</sup> Zianz rëb ree bën Israel lojman:

—¿Xhie milagr guliüül du lojn din yayagbeen guial rajpil guialrniabee giüün zian?

<sup>19</sup> Badxi' Jesús laan rëbaman:

—Gol base'n yadoo guie, naj yayün laan loj choon dxejzi.

<sup>20</sup> Dxel rëb ree bën Israel guin lojman:

—Tiuubixho'p ijz goglaa reeman been reeman yadoo guie, ¿guiáad lüj ya yayüjnlan choon dxejzi?

<sup>21</sup> Per Jesús xcuerp gajcaman ruza'taman chi ruza'taman yadoo guin. <sup>22</sup> Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx tëë reeman ni ca loj xtiidx Dios.

### Jesús nünbee xixgab gra bejn

<sup>23</sup> Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman.

<sup>24</sup> Per laaman ad rëbtaman loj reeman chu najman, din laaman nünbeechaaw xhienaag naj xixgab reeman. <sup>25</sup> Ad bi-aadxtaman chu niëjb lojman xhienaag naj bejn, din laaman ragbeechaaw xhienaag naj xixgab tijbgaj bejn.

### Bigdeenë Nicodemo Jesús

**3** Guyu tijb bënfarisew brii lajman Nicodemo, gojcaman tijb guxtis loj ree bën Israel. <sup>2</sup> Abi' wejman bignajman Jesús tijb guxhin, dxel rëbaman lojman:

—Mextr, rayagbeen guial Dios guxhaal lüj din guliüül dunujn, din achutezci zajc giüün lasa' ree milagr ni rüjn bal id za'në Dios laaman.

<sup>3</sup> Dxel rëb Jesús:

—Diidxliczi rnin lüj, bën ad zajlt stijb, ad zajet guguaaman xguialrniabee Dios.

<sup>4</sup> Abi' rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xni-aaman ya abi' galaman stijb?

<sup>5</sup> Badxi' Jesús laan rëbaman:

—Diidxliczi rnin, bën ad rirobnijst ad nabannë tëëtaman xSprijt Dios ad zile't yayuman loj xguialrniabee Dios. <sup>6</sup> Bën naban zi'c naj xixgabaman, lojzi guidxliuj guie rajpaman guialnaban, per bën nabannë xSprijt Dios, por Sprijt guin rajpaman stijb guialnaban. <sup>7</sup> Ad bal radxa lojl guial rnin: “Rüjn naguiejn gal bejn stijb.” <sup>8</sup> Din zi'c rbi' bi gralad abi' majsi rigujejnl chi rbi'n, per ni'quid ragbeetil ban zëëdan o ban zën. Ziangajc naj xSprijt Dios con gra ree bën nabannë laaman.

<sup>9</sup> Dxel rëb Nicodemo lojman:

—¿Xhienaag rajc zian?

<sup>10</sup> Badxi' Jesúsán rëbaman:

—¿Lüj, naj mextr loj ree bën Israel, ad rignia'til gra ree ni guin ya? <sup>11</sup> Diidxliczi rnin lojl, raneen ni rayagbeen ni baguiaa tëën, per lëjt ad rliladxtidi ni ranan. <sup>12</sup> Bal id rliladxidi chi rnin xcwent ree ni loj guidxliuj guie, ¿xhienaag chililadxidi bal ganin xcwent ree ni xanyabaa?

<sup>13</sup> Achut wayej xanyabaa, tijbzi bën biguiat diizd xanyabaa, Bën guxhaal Dios loj guidxliuj. <sup>14</sup> Abi' zi'c bacaa Moisejs bëël guiib loj yag niz loj yujbidx, ziangajc Bën guxhaal Dios loj guidxliuj, gucaa reeman laaman loj crüjz, <sup>15</sup> din gra bën chililadx laaman ad zanijt reeman loj Dios, gap reeman guialnaban tiblayaa con laaman.

### Rën Dios bejn

<sup>16</sup> Guial tant rën Dios bénguidxliuj, majsi tijbzi xi'nman, per guxhaalaman laaman loj guidxliuj, din graczi bën chililadx laaman ad zanijt reeman loj Dios, gap reeman guialnaban tiblayaa con laaman. <sup>17</sup> Din Dios ad guxhaal xi'nman loj guidxliuj din gudëëdaman bejn

casti, guxhaalaman laaman din gap ree bejn perdon loj Dios.

<sup>18</sup> Bén rililadx Xi'n Dios ad rayaltaman xcasti Dios. Per bén ad rililadxt, laaman ma rayal casti guial ad rililadxtaman Xi'n Dios, bén naj tijbzi xi'nman. <sup>19</sup> Bén ad rililadxt ree rayal reeman casti, din yan ni bi't bén naj xbajl Dios, mazri bayuladx reeman nejz mal, guial rüjn reeman ganax ni mal. <sup>20</sup> Graczi ree bén rüjn ni mal ad ruladxtczi reeman bajl guin, ad rbigt reeman lojn, chitëë guiguien ni mal cayüjn reeman. <sup>21</sup> Per ree bén naban zi'c rayal loj Dios, laa reeman rbig loj xbajlaman din guiguien guial graczi ni cayüjn reeman naj ni rën Dios.

### Waj bén baroobnijs ruza'taman Jesús stijb

<sup>22</sup> Chi gudëd gojc zian, Jesús con ree xbejnman wej reeman niz Judea, lod guzunëman laa reeman tio'p choon dxej, ni baroobnijs reeman bejn ree. <sup>23</sup> Në-gajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi rirobnijs reeman. <sup>24</sup> Laan goc chi gad Waj chu' ladxguuib.

<sup>25</sup> Per bëlzi ree xbejn Waj, con za tio'p choon gajc ree bén Israel guzuloj cadildi-idx reeman por xcostumbr reeman guial xhienaag gac reeman naya. <sup>26</sup> Dxel biguiedx reeman loj Waj:

—Mextr, bén guzunël stiblad ro' guiiw Jordán, bén bel xtiidx du lojn, në laaman curoobnijs bejn ree abi' gra reeman zinal laaman.

<sup>27</sup> Badxi' Waj laan rëbaman:

—Achut zajc gap guialrniabee bal id Dios gudëë laan. <sup>28</sup> Lëjt ragbee guial biguejndi rën guial ad najtan naj Cristo, naj guneed lojman zidgagojnan por laaman. <sup>29</sup> Dunuj ree rayagbee guial loj guialruxhliaa, xin za'në biingunaa guin, laaxan cuxhliaa, guiáad xmiwix xin za' con laax rabaanë da'tix laax chi rigu-

iejnx rnieex. Ziangajc naj dád rabaanë'n laaman. <sup>30</sup> Abi' laaman gusnuu gacaman mazri bén zojbloj, guiáad naj gusnuu gacan bén ad lasajct guial lojman.

### Bén zëed xanyabaa

<sup>31</sup> 'Din bén zëed diizd xanyabaa, laaman naj bén rniabee loj gra. Per bén-guidxliuj, bénguidxliujzi najman abi' ganax ni yu' loj guidxliuj ruza'taman. Per Bén zëed diizd xanyabaa laaman rniabee gra, <sup>32</sup> abi' rüman ni ma baguiaaman ni ma bigueijn tëëman, per achut rililadx ni rnieeman. <sup>33</sup> Bal yu' bén rililadx xtiidxaman, zian rguien guial ni diidxli naj xtiidx Dios. <sup>34</sup> Abi' bén zëed por Dios, laaman rü xtiidx Dios guial guidiblagaa badëëd Dios xSprijtaman lojman. <sup>35</sup> Dios rën Xi'nman abi' basa'nman gra lojman. <sup>36</sup> Abi' chutëëz bén rililadx Xi'nman, laaman rajp guialnaban tiblayaa loj Dios. Per bén ad rtiëjbt chililadx, ad rajptaman guialnaban guin, laaman rayal xcasti Dios.

### Jesús con béngunaa Samaria

**4** Gogbee ree bénfarisew guial mazri zien bejn ma zinal Dad Jesús mazri zien tëë bejn ruroobnijsaman guial loj Waj, <sup>2</sup> majsi diidxliczi ad Jesús-tan ruroobnijs bejn ree, bén naj ree xbejnman ruroobnijs. <sup>3</sup> Chi gogbeeman zian dxel briiman niz Judea zëman niz Galilea stijb.

<sup>4</sup> Per chi zëman niz Galilea been naguiejn gudëdaman niz Samaria. <sup>5</sup> Abi' bidxinman tijb guiedx la Sicar, ni nulen Samaria, gajxh lod naga' yuj ni badëë Jacob loj xi'nman Xiëb. <sup>6</sup> Yagaj naj tijb bizëduu rniee reeman laan xbizë Jacob. Abi' guial ma badxag Jesús cazaman, dxel gurejman ro' bizë guin. Ma zidyob garol dxej. <sup>7-8</sup> Guiáad ree xbejnman zë reeman luguiedx guin zisii ni gaw reeman. Hor guin bidxin tijb bén-

gunaa Samaria ro' bizë guin din tia'man nijs, dxel rëb Jesús lojman:

—Bazaladx ta'n xnijsil guië'n.

<sup>9</sup>Per guial ad rnieenët lasa' ree bën Israel zagdx con ree bën Samaria, badxi' béngunaa guinan rëbaman:

—¿Chexquiza zeel rniabil nijs lon najl bën Israel awa bën Samaria naj?

(Din bën Israel ree ad rnieenët reeman bën Samaria ree zagdx.) <sup>10</sup>Badxi' Jesús laan rëbaman:

—Bal zian ragbeel ni rën Dios gunee-man lüj, chutëë bënan canab nijs lojl, zanabil nijs lon abi' naj zunen nijs runee guialnaban.

<sup>11</sup>Dxel rëb béngunaa guin loj Jesús:

—Dad, ni'quid ca'til ni cwëenël nijs, abi' bizë guin dád naxhitan. ¿Ban chica'l nijs runee guialnaban? <sup>12</sup>Dux béngulalan Jacob basa'nnë dunuj bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

<sup>13</sup>Badxi' Jesús laan rëbaman:

—Graczi ree bën rë' nijs guie re'c ree-man nijs stijb. <sup>14</sup>Per bën guië' nijs gudëdan, ad yu'tri dxej che'caman nijs. Din nijs gudëdan gacan luxdooan zi'c lod ad rbëzt rajch nijs, abi' nijs guin gudëë guialnaban tiblyaaa.

<sup>15</sup>Dxel rëb béngunaa guin lojman:

—Dad, banee nijs guin lon, chitëë che'cran nijs ad zial tëëtran guidca'n nijs guie.

<sup>16</sup>Rëb Jesús lojman:

—Bignee lacheelil, dxel yaguiaadil guie.

<sup>17</sup>Badxi' béngunaa guinan rëbaman:

—Achut da bénguiaawan yu'.

Dxel rëb Jesús:

—Waliquil achut lacheelil yu', <sup>18</sup>din ma gojc gaay xinguiaw rtia' lüj, abi' yan xin zojbnël ad lacheeltilan. Zeel waliqui ni nal.

<sup>19</sup>Chi bigueijnman ni rëb Jesús, dxel rëbaman:

—Dad, ma ragbeen guial lüj naj bën rudëë xtiidx Dios loj ree bejn. <sup>20</sup>Dux béngulalan gunajchi' reeman Dios ruguia' guie, per lëjt najdi bën Israel rëbidi guial Jerusalén naj lod guinajchi' bejn laaman.

<sup>21</sup>Badxi' Jesús an rëbaman:

—Na, zagdx min guial guidxin dxej guinajchi'di dux Dad ree Dios, ad zi'ttridi ruguia' guie ad zej tëëtridi Jerusalén. <sup>22</sup>Lëjt ni'quid ragbeetidi chunin rniajchi'di, per dunuj rayagbeen chunin ranajchi'n, din loj ree bën Israel grii bën güün bejn ree perdon. <sup>23</sup>Abi' ma bidxin dxej ni gra ree bën diidxli rniajchi' Dios, guinajchi' reeman laaman zi'c rayal por xSprijtaman. Din zian rën dux Dad ree Dios güün ree bën rniajchi' laaman. <sup>24</sup>Dios naj Sprijt, abi' bën rniajchi' ree laaman rayal guinajchi' reeman laaman con guidib luxdoo reeman por xSprijtaman.

<sup>25</sup>Dxel rëb béngunaa guin lojman:

—Naj ragbee gui't bën naj Mesías, bën la gajc, Cristo. Abi' chi gui'taman, laaman gusignia' dunuj ree gran.

<sup>26</sup>Abi' rëb Jesús:

—Najn naj bën zii, laaman caneenë lüj.

<sup>27</sup>Loj hor guin badxin ree xbejn Jesús, abi' dád badxaloj reeman guial cayünë-man tijb béngunaa diidx. Per ni'qui tijb reeman ad gunabdiidx lojman xhie rënman o xhie diidxan cayü reeman. <sup>28</sup>Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

<sup>29</sup>—Gol taquiaa tijb bën ma na graczi ni ma benan. ¿Nid laaman naj Cristo ya?

<sup>30</sup>Dxel brii reeman luguiedx guin zë reeman lod za' Jesús. <sup>31</sup>Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

<sup>32</sup>Per rëbaman loj reeman:

—Laa da guialrawan yu', ni ad nünbeetidi.

<sup>33</sup>Dxel guzuloj canabdiidx loj lasa' reeman rëb reeman:

—¿Ni yu' chu bidnë ni gudawaman ya'n?

<sup>34</sup>Dxel rëb Jesús loj reeman:

—Da guialrawan naj gūnan zi'c rën Dios, bën guxhaal naj abi' guloox gūnan ni naman. <sup>35</sup>Lëjt rëb: “Ryaadx zatajp bëew din gac ni yu' loj guiniaa.” Per naj rni lëjt: Gol gules lojdi, gol baguiaa loj ree guiniaa, ma naj reen din yado'p reen.

<sup>36</sup>Abi' bën rato'p loj guiniaa guin, rti-a'man ni rayalaman por dxiin ni rüjnman. Guiáad ni rato'paman naj par lod yu' guialnaban tiblyaa. Dxel zi'c bën rxübin zi'c bën rato'p, rabaa reeman tiblojzi. <sup>37</sup>Waliqui ni rëb ree bejn: “Ben ren rxübin, ben ren rato'p guialnaza'c.”

<sup>38</sup>Naj guxhal lëjt din chigto'pidi guialnaza'c lod ad beentidi dxiin. Ben ren ree been dxiin, guiáad lëjt gaz bigto'pidi guialnaza'c lod ad beentidi dxiin.

<sup>39</sup>Zien ree bën Samaria bililadx Jesús guial be bēngunaa guin diidx loj reeman rëbaman: “Ma gunaman graczi ni benan.” <sup>40</sup>Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'n-nëman laa reeman tio'p dxej. <sup>41</sup>Abi' mazri zien reeman bililadx laaman chi biguiejn reeman ni rnieeman, <sup>42</sup>dxel rëb reeman loj bēngunaa guin:

—Bajy yan ad por ni natzil raliduladxan laaman, nēgajc dunujn ma baguiejn ni rnieeman, abi' rayagbeen walican laaman naj Cristo, bën yabëe bēnguidxliuj loj dol.

### Bayüjn Jesús xi'n xbejn tijb rey

<sup>43</sup>Chi goc tio'p dxej guin, baza Jesús niz Samaria abi' zëman niz Galilea, <sup>44</sup>majsi laagajcaman rëb guial ni'qui tijb bën rudëe xtiidx Dios loj ree bejn ad rajpt reeman laaman respejt ladx gajcaman.

<sup>45</sup>Per chi badxinman niz Galilea, bën niz ni ree baca' reeman laaman zagdxe. Din nē laa reeman wej lanij pascw Jerusalén, abi' baguiaa reeman gra ni beenman ni.

<sup>46</sup>Chi za'man niz ni wejman Caná stijb, lod bayüjnman nijs vin. Abi' luguiedx Capernaum guyu tijb xbejn rey ragxuu xi'nman. <sup>47</sup>Chi gogbee bën guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayüjnman xi'nman guial zamer guiëtix. <sup>48</sup>Abi' rëb Jesús lojman:

—Lëjt, bal id zuguaadi xhie ree sen o milagr ree, ad zaliladxtidi.

<sup>49</sup>Per rëb bën guin:

—Dad, yo' yan gajc, naga gad da xi'n nan guiët.

<sup>50</sup>Dxel rëb Jesús lojman:

—Baguiaj lidxil, ma bayajc xi'nl.

Bililadx bën guin ni rëb Jesús, abi' zia lidxaman. <sup>51</sup>La'tgaj ziaman, bigchaagloj ree xmojsaman laaman, abi' rëb reeman:

—Ma bayajc xi'nl.

<sup>52</sup>Dxel gunabdiidxaman loj reeman, rëbaman:

—¿Xhie hor guzuloj banaa da xi'n nan? Abi' rëb reeman lojman:

—Nieey cost raca tijb wadxe bariix xliaa.

<sup>53</sup>Dxel basaaladx bën guin guial hor ziin rëb Jesús lojman: “Ma bayajc xi'nl.” Abi' laaman nē gra bën zojb lidxaman bililadx reeman Jesús. <sup>54</sup>Ni ne naj milagr baroyp ni been Jesús niz Galilea chi bazaman niz Judea.

### Bayüjn Jesús tijb bën ad rajct rza

**5** Chi gudëd gojc zian, guyu tijb xlanij ree bën Israel, abi' wej Jesús Jerusalén. <sup>2</sup>Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. <sup>3</sup>Yagaj riga' zien ree bēnragxuu, zi'c ree bēnlutia'p, nē ree bencoj con ree bën ad rajctczi rza, cabëz reeman guiniib nijs

yu' lèn tanc guin. <sup>4</sup>Din gocli goc rguiajt tijb xianjl Dios runiibaman nijs guin, abi' bèn ru lojnijs guin yaloj chi caniiban, rayajcaman xhietëez guialguijdxan rajcaman. <sup>5</sup>Dxel loj ree bèn guin no'ch tijb bejn, ma gojc zi'ctiubichoon ijz ragxuman. <sup>6</sup>Chi baguiaa Jesús laaman na-ga'man yagaj, abi' gogbeeman guial gocli ragxuman dxel gunabdiidxaman lojman rëbaman:

—¿Rènl ya yayajquil?

<sup>7</sup>Badxi' bènragxuu guinan rëbaman:

—Dad, achut ra'pan gudxe' naj loj nijs guin chi riniiban. Beegaj chi rënan gayu'n, yalojl ben ren ru.

<sup>8</sup>Dxel rëb Jesús lojman:

—Bixche, baca' ni naal loj, baguiaj.

<sup>9</sup>Loj hor guin gajc bayajc bèn guin, baca' ni naaman loj abi' guzuloj cazaman. Per guial dxej zii naj dxej raziiladx ree bèn Israel, <sup>10</sup>zianz bèn Israel zinal ree ley rëb reeman loj bèn bayajc guin:

—Yandxej naj dxej raziiladx bejn, ad zajct yaca' ni go'til loj.

<sup>11</sup>Badxi' bèn guinan rëbaman:

—Bén bayüjn naj naman: “Baca' ni naal loj, baguiaj.”

<sup>12</sup>Dxel gunabdiidx reeman lojman rëb reeman:

—¿Chu na lojl: “Baca' ni naal loj, baguiaj”?

<sup>13</sup>Per bèn guin ad ragbeetaman chunin bayüjn laaman guial bi'ch Jesús loj ree benzien riga' yagaj. <sup>14</sup>Chi badxaag Jesús laaman lèn yadooro' Jerusalén, abi' rëbaman lojman:

—Baguiaa ma bayajquil, ad güünril dol chitëë gaquil mazri guial loj ni goquil.

<sup>15</sup>Dxel zia bèn guin abi' biguiedxaman loj ree bèn Israel guial Jesús naj bèn bayüjn laaman. <sup>16</sup>Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn. <sup>17</sup>Per rëb Jesús loj reeman:

—Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

<sup>18</sup>Zianan zeel mazri rejs guzuj reeman din gugüjt reeman laaman, ad guialzi rüjntaman ni ad najt gac dxej raziiladx bejn, nè guial rüjn laagajcaman zi'c Dios chi rnieeman guial quijb xDadaman naj Dios.

### **Xguialrniabee Xi'n Dios**

<sup>19</sup>Rëb Jesús loj reeman:

—Diidxliczi rnin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman. <sup>20</sup>Din Dios rën xi'nman abi' ruluüman laaman gra ree ni rüjnman. Abi' mazri naj ni guluü loj xi'nman ni yadxa da't lojdi.

<sup>21</sup>Din zi'c rasban Dios bengüt ree rudëë tëëman guialnaban loj reeman, zian-gajc rudëë xi'nman guialnaban loj ree bèn nünman xgab. <sup>22</sup>Abi' ad Diost rüjn guialguxtis, bazuj xi'nman din güünman guialguxtis, <sup>23</sup>din gap gra ree bejn xi'nman respejt zi'cgajc rajp reeman laaman respejt. Bén ad rajpt Xi'n Dios respejt, ad rajp gajctaman respejt xDadaman Dios, bèn guxhaal laaman.

<sup>24</sup>'Diidxliczi rnin: Bén ruzoob da didxan riladx tëëman Dios, bèn guxhaal naj, laaman ma rajp guialnaban tiblayaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman. <sup>25</sup>Diidxliczi rnin ma bidxin hor, abi' yandxej gajcan, bèn naj ree zi'c bengüt loj Dios gucaag-diajg reeman cha' xi'nman. Abi' ree bèn guzoob xtiidxaman zajp reeman guialnaban tiblayaa con Dios. <sup>26</sup>Din zi'c rajp Dios guialnaban, lasa'gajc guialnaban guin ma badëë loj xi'nman, <sup>27</sup>abi' badëëman guialrniabee lojman din güünman guialguxtis, din laaman naj Bén guxhaal Dios loj guidxliuj. <sup>28</sup>Ad bal radxa lojdi ni rnin, din zadxin dxej guien gra ree

bengüt cha' Xi'n Dios, <sup>29</sup>abi' yarii reeman lén baa. Dxel Bén been ree ni ruladx Dios, yaban reeman, din gap reeman guialnaban tiblyaa con laaman. Guíaad ree Bén been ni mal, yaban reeman din yayal reeman casti ni royal reeman.

### Ni rulüü guialrniabee rajp Jesús

<sup>30</sup>'Achet zajc günan por da xgabzan, rünan guialguxtis zi'c rniabee da Dadan. Abi' rünan guialguxtis zi'c rayal, din ad rüntanan zi'c naj da xgaban, rünanan zi'c rën da Dadan Bén guxhaal naj. <sup>31</sup>Bal gü da diidx gajcan, achet lasajcan. <sup>32</sup>Per yu' ben ren rü da diidxan, abi' ragbeechaawan guial diidxlin. <sup>33</sup>Léjt guxhaal Bén bignabdiidx ree loj Waj, abi' laaman ganax ni diidxli gunaman. <sup>34</sup>Majsi ad ryaadxt yadxi'n ni gunee ree bejn por naj, per canin lojdi ni guna Waj din chililadxidi gap tēēdi perdon. <sup>35</sup>Waj goc zi'cgajczi tijb bajl ni re'c abi' rusnin, guíaad léjt dád babaadi bidxga'di tijb tiamp ni balüüman léjt. <sup>36</sup>Per naj mazri naj ni gulün léjt guial loj ni balüü Waj léjt por naj. Din ni na da Dadan Dios günan, laanan cayünan yan din guiguien guial diidxli laaman guxhaal naj. <sup>37</sup>Në da Dadan Bén guxhaal naj, laagajcaman be da diidxan, majsi ad waguiejntidi cha'man ad waguiaa tēētidi laaman. <sup>38</sup>Ad yu'guijc tēētidi xtiidxaman zeel ad rliladxtidi Bén guxhaalaman. <sup>39</sup>Léjt con cudad da't roolidi loj xtiidx Dios, guial ragbeedi con laan gapidi guialnaban tiblyaa con Dios. Abi' majsi loj xtiidx gajcaman ruza't naj, <sup>40</sup>per ad rëntidi chililadxidi naj din gapidi guialnaban guin.

<sup>41</sup>'Naj ad raguiltan guilies ree bejn da valoran. <sup>42</sup>Abi' ragbeechaawan guial ad walit rëndi Dios. <sup>43</sup>Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di. <sup>44</sup>¿Xoza chililadxidi naj? Awa mazri naguiejn rüjndi guilies

ree bejn xvaloridi luar yaya'ndi zagdxe loj Bén naj tijbzi Dios. <sup>45</sup>Ad bal naladxidi naj gabec xguialquiadi loj Dios, din Bén cwe'c xguialquiadi naj Moisejs, Bén rbézidi güün léjt yudar. <sup>46</sup>Bal bililadxidi ni rëb Moisejs, në naj zaliladxidi, din Moisejs bacaa loj xtiidx Dios lod ruza't naj. <sup>47</sup>Per bal id rliladxidi ni bacamaan, ¿xoza chililadxidi ni rnin léjt?

### Bayaan Jesús gaay mil bejn

(Mt. 14:13-21; Mr. 6:30-44; Lc. 9:10-17)

**6** Chi gudëd gojc zian, dxel zë Jesús stiblad ro'nijsdoo riga' niz Galilea, nijsdoo la gajc Tiberias. <sup>2</sup>Bénguixiuj binal laaman, guial ruguiaa reeman milagr ree ni rüjnman rayüjnman Bénragxuu ree. <sup>3</sup>Dxel wë'paman tijb ruguia' abi' gurenë ree xbejnman. <sup>4</sup>Dxejzii ree ma zidyob pascw, xlanij ree Bén Israel. <sup>5</sup>Chi gules loj Jesús, abi' baguiaaman zëed ree bénguixiuj lod za'man, dxel rëbaman loj Felip:

—¿Ban yusii ree ni gaw gra ree Bén guin?

<sup>6</sup>Per rëbzaman zian din guidoon xhie guiëb Felip, din Jesús mal ragbeeman xhie güünman. <sup>7</sup>Dxel badxi' Felipan rëbaman:

—Ni'qui ni rüjn bejn gan loj xhujn bëëw ad zadaant yo' guiadxtil din gaw tijbgaj reeman majsi tibli'a'dogajzan.

<sup>8</sup>Dxel gunee stijb xbejn Jesús, Bén la Andrejs bijch Simón Bëd, rëbaman:

<sup>9</sup>—Laa tijb xindo ca' gaay guiadxtil con zatio'p bëjl za' guie. Per, ¿të'czi taan ni guin par gra Bén guin?

<sup>10</sup>Dxel rëb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw. <sup>11</sup>Dxel cwa' Jesús guiadxtil guin ree. Chi gulox badëëman quixtëë loj Dios, badëëman laa reen loj ree xbejnman persi gudi's reeman laa reen loj

gra ree b́en zojb yagaj. Ziangajc beenman con ree b́ejl guin, bad́eeman laa reen zi'ctzi guyen reeman. <sup>12</sup> Chi ma bixienladx reeman, dxel ŕebaman loj ree xbejnman:

—Gol bato'p gra ree ni laay baya'n, chit́eē xhie guiźeēb.

<sup>13</sup> Zianz bato'p reeman laa reen, abi' bacha reeman chiptio'p dxim nilaay baya'n ree loj gaay guiadxtil guin. <sup>14</sup> Chi baguiaa ree bejn milagr narooob ni been Jesús, ŕeb reeman:

—Walican b́en guin naj b́en rud́eē xtiidx Dios loj ree bejn, b́en naj gui't loj guidxliuj.

<sup>15</sup> Per gogbee Jesús guial ŕen reeman chiné naguiejn reeman laaman din güün reeman laaman rey, dxel bazaman yagaj, ẃe'paman mazri ladya guijc guia' guin, lod su xtjibaman.

### Rza Jesús lonijsdoo

(Mt. 14:22-27; Mr. 6:45-52)

<sup>16</sup> Chi ma cabej guiaal, biguiajt ree xbejn Jesús ro'nijsdoo, <sup>17</sup> guyu reeman loj tijb barcw, abi' cadéd reeman loj nijs guin din guidxin reeman Capernaum. Ma bicajy, guíaad Jesús gadaman yadxin. <sup>18</sup> Dxel guzuloj cabi' bidoxh abi' wajs xtújp nijs guin. <sup>19</sup> Chi ma gojc zi'c gaay o xho'p kilometro zé reeman, baguiaa reeman caza Jesús lonijs guin cabigaman lod zé barcw guin, dád bidxeb reeman. <sup>20</sup> Per ŕebaman loj reeman:

—jNajn, ad rdxebidi!

<sup>21</sup> Dxel guyen reeman niuman loj barcw guin, per hor guin gajc bidxin reeman lod zé reeman.

### Bigdiil ree b́en bayaan Jesús laaman

<sup>22</sup> Chi bareguiaal, b́en riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zé ree xbejn Jesús per ad nēt laaman. <sup>23</sup> Loj hor zii bidxin ree barcw ren

za guiedx Tiberias, gajxh lod gudaw reeman guiadxtil chi gulox bad́eēd Jesús quixt́eē loj Dios. <sup>24</sup> Chi baguiaa reeman achutri Jesús za' yagaj ni'qui ree xbejnman, dxel ẃe'p reeman loj ree barcw guin, zé reeman Capernaum zigdiil reeman laaman.

### Jesús naj b́en rud́eēd guialnaban

<sup>25</sup> Chi bidxin reeman Capernaum, badxejl reeman Jesús, abi' gunabdiidx reeman lojman, ŕeb reeman:

—Mextr, ¿goc bi'til guie?

<sup>26</sup> Badxi' Jesúsán ŕebaman:

—Ragbeechaawan, raguuilidi naj guial gudawidi xt bigdxinladxidi, ad guial baguiaatidi milagr ree ni ŕunan. <sup>27</sup> Ad chu'di xgab guialraw rara, gol guyu xgab guialraw runee guialnaban tiblayaa con Dios. Din laan naj ni runee B́en guxhaal Dios loj guidxliuj guial ma bacaabee Dios laaman.

<sup>28</sup> Dxel gunabdiidx reeman lojman ŕeb reeman:

—¿Xhie rayal yaguieenan din chile' yaguieenan ni ŕen Dios?

<sup>29</sup> Badxi' Jesús laan ŕebaman:

—Ni ŕen Dios güündi naj guial chililadxidi b́en guxhaalaman loj guidxliuj.

<sup>30</sup> Dxel ŕeb reeman lojman:

—¿Xhie gulüül dunujn din yaliduladxan lüj? ¿Xhiet́eē ree milagr ŕijnl?

<sup>31</sup> Dux b́engulal ree gudaw reeman mana chi guzu reeman niz loj yujbidx, zi'c ŕeb loj xtiidx Dios: “Bad́eeman guiadxtil biabj xanyabaa loj reeman gudaw reeman.”

<sup>32</sup> Badxi' Jesús laan ŕebaman:

—Naj rni lojdi: Ad Moisejst bad́eēd guiadxtil guin, da Dadan naj b́en runee quijb guiadxtil za xanyabaa. <sup>33</sup> Guiadxtil runee Dios, laan bi't diizd xanyabaa abi' runeen guialnaban loj b́enguidxliuj.

<sup>34</sup> Abi' ŕeb reeman lojman:



—Dad, banee guiadxtil guin du lojn zianczi.

<sup>35</sup> Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guiliaanman, ziangajc bén chililadx naj, ad yu't dxej che'caman nijs. <sup>36</sup> Per zi'c rnin lojdi, majsi ma baguiaadi naj, ad rililadxtidi naj. <sup>37</sup> Gra ree bén ma banee da Dadan lon, gui't reeman lon, abi' bén gui't lon, ad zasjejctan laaman. <sup>38</sup> Din naj zial dizd xanyabaa, zidgaguienan zi'c rën da Dadan bén guxhaal naj, ad par güntan zi'c rënan. <sup>39</sup> Da Dadan bén guxhaal naj, ni rënman naj guial gra ree bén baneeman lon ni'qui tijb reeman ad zunijctan, rënman yasbanan laa reeman chi nit guidxliuj. <sup>40</sup> Din rënman guial gra ree bén yayagbee Xi'nman chililadx tää reeman laaman, gap reeman guialnaban tiblyyaa con laaman, guiáad naj yasban laa reeman chi nit guidxliuj.

<sup>41</sup> Dxel guzuloj ree bén Israel caneeeguijdx reeman Jesús, guial rëbaman: “Naj naj guiadxtil ni biguiajct diizd xanyabaa.” <sup>42</sup> Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xni-aax. Yan, ¿chexc zeel nax xanyabaa biguiajctix?

<sup>43</sup> Dxel rëb Jesús:

—Gol bacwëöz rnieeguijdxidi naj loj lasa'di. <sup>44</sup> Dios naj bén guxhaal naj. Achut zile' gui't lon bal id zëëdaman por da Dadan, abi' naj yasban laaman chi nit guidxliuj. <sup>45</sup> Loj ree libr ni bacaa ree bén badëë xtiidx Dios loj ree bejn, rëb: “Dios gulüü gra ree bejn.” Zeel gra ree bén rucaagdiajg xtiidxaman, rusiid tää reeman ni rulüüman laa reeman, laa reeman zëed lon.

<sup>46</sup> Achutctzi waguiaa da Dadan Dios, tijbzi bén guxhaalaman loj guidxliuj ma baguiaa laaman. <sup>47</sup> Diidxliczi rnin, bén rililadx naj rajpaman guialnaban tiblyyaa con Dios. <sup>48</sup> Naj naj guiadxtil

ni runee guialnaban. <sup>49</sup> Xbéngulalidi gudaw mana loj yujbidx, per ni'czi zian güjct gajc reeman. <sup>50</sup> Per naj canin lojdi xcwent guiadxtil za xanyabaa, bén gaw laan gapaman guialnaban tiblyyaa con Dios. <sup>51</sup> Naj naj guiadxtil naban ni biyajb diizd xanyabaa. Bén gaw guiadxtil guie zajpaman guialnaban tiblyyaa con Dios. Guiadxtil ni rudëdan, laan naj quijb da cuerpan, gudëdanan din gap ree bën-guidxliuj guialnaban.

<sup>52</sup> Dxel guzuloj ree bén Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

<sup>53</sup> Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' täädi xrejman, ad zajptidi guialnaban. <sup>54</sup> Per bén gaw da cuerpan guië' tääman da rejnman, zajpaman guialnaban tiblyyaa con Dios, abi' naj yasban laaman chi nit guidxliuj. <sup>55</sup> Din da cuerpan naj quijb guialraw, guiáad da rejnman naj quijb ni guië' bejn. <sup>56</sup> Abi' bén raw da cuerpan rë' tääman da rejnman, laaman nabannë naj, guiáad naj nabannë' laaman. <sup>57</sup> Da Dadan bén guxhaal naj, rajpaman guialnaban, abi' naj naban por laaman. Ziangajc bén gaw da cuerpan, zajpaman guialnaban tiblyyaa con Dios por naj. <sup>58</sup> Naj cani xcwent guiadxtil ni biguiajct xanyabaa. Abi' guiadxtil guie ad najtan zi'c naj mana ni gudaw xbéngulalidi, din laa reeman majsi gudaw reeman mana guin, per güjct gajc reeman. Guiáad bén gaw guiadxtil guie zajpaman guialnaban tiblyyaa con Dios.

<sup>59</sup> Zian balüü Jesús bejn ree lën yadoo Capernaum.

### Diidx runee guialnaban tiblyyaa

<sup>60</sup> Chi gulox bacaagdiajg reeman ni balüü Jesús laa reeman, zien ree bén zinal laaman rëb:

—Nawëëg da't naj yayignia' ree ni naman. ¿Chu zajc guidxga' laaman?

<sup>61</sup> Chi gogbee Jesús ni canee reeman, gunabdiidxaman loj reeman, rëbaman:

—¿Rüjnnaa ni rnin lëjt ya? <sup>62</sup> ¿Xhieza giüündi bal guguaaadi Bén guxhaal Dios yayë'paman lod guzuman gocli? <sup>63</sup> Tíjzbi por xSprijt Dios rajp bejn guialnaban tiblyaaa, bejn ad zile't giüün laazaman xhienin. Abi' naj por xSprijt Dios zëëd ree diidx ni gunen lojdi, por ree diidx guin rajp bejn guialnaban. <sup>64</sup> Per lëjt yu'di ad waliladxt.

Rëb Jesús zian guial ragbeechaawaman diisd yaløj chu ree ad rliadxt laaman chu tëë yayü laaman. <sup>65</sup> Rëb tëëman loj reeman:

—Zeel ma rnin lojdi guial achut zile' guit' lon bal id zëëdaman por da Dadan Dios.

<sup>66</sup> Diisd nadxel, zien ree bén zinal Jesús guro'nladx laaman, abi' ad guzanëtri reeman laaman. <sup>67</sup> Dxel rëb Jesús loj guidxiptio'p ree xbejnman:

—¿Në lëjt rën yaguiaj ya?

<sup>68</sup> Per badxi' Simón Bëd laan, rëbaman:

—Dad, ¿chu loj yo'n? Awa xtiidxil zidnë guialnaban tiblyaaa con Dios. <sup>69</sup> Dunujn ma baliduladx rayagbee tëën guial lüj naj Cristo, Xi'n Dios naban.

<sup>70</sup> Dxel rëb Jesús loj reeman:

—¿Nid naj gule guidxiptio'pidi ya? Abi' yan tíjb gajqui lëjt naj zi'c xindxab.

<sup>71</sup> Rëb Jesús zian por Judas Iscariote, xi'n Simón, din Judas guin naj Bén bayü laaman, majsi tíjb gajc xbejnman najman.

### Ad rliadxt ree bijch Jesús laaman

**7** Chi gudëd gojc zian, wej Jesús loj ree guiedx riga' niz Galilea. Ad guyëntaman nejman niz Judea, guial cayguüil ree Bén Judea guin laaman din gugüjt reeman laaman. <sup>2</sup> Per guial ma zidyob lanij ni rüjn ree Bén Israel, chi rbej

reeman lën ranch, <sup>3</sup> rëb ree bijch Jesús lojman:

—Brii, wej niz Judea, din në ree xbejn ben riga' ree niz ni guguaa milagr rüjnl. <sup>4</sup> Din chi chu rën gagbee bejn ni rüjnman, ad rayalt giüünman laan ralan. Yan zi'c rüjnl milagr ree, beenan loj gra ree bejn.

<sup>5</sup> Gunee ree bijch Jesús zian, guial ni'qui laa reeman ad rliadxt laaman. <sup>6</sup> Dxel rëb Jesús loj reeman:

—Ad wadxint da horan, per par lëjt xhietëëz horan naj zagdx. <sup>7</sup> Ad zajct guidxe'ch bénguidxliuj lëjt, sa'n naj rdx-e'ch reeman naj guial rën loj reeman ad laat naj ni rüjn reeman. <sup>8</sup> Gol wej lanij guin, sa'n naj ad zazaagajtan, din ad wadxint hor ni gazaan.

<sup>9</sup> Chi gulox rëbaman loj reeman zian, baya'nman Galilea.

### Wej Jesús xlanij ree Bén Israel

<sup>10</sup> Chi ma zë ree bijch Jesús, dxel nëman zë lanij guin, per ralanzi zëman chitëë chu gagbee. <sup>11</sup> Per yu' ree Bén Israel raguüil laaman loj lanij guin, rëb reeman:

—¿Con Bén guin ya'n?

<sup>12</sup> Loj gra ree benzien we lanij guin, zienloj ni rniee reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

<sup>13</sup> Per achutczi ruza't laaman loj gra bejn, guial rdxeb reeman guxtis Israel ree.

<sup>14</sup> Chi gurol xuman ni cayajc lanij guin, guyu Jesús lën yadooro' Jerusalén, abi' guzuløj culüüman bejn ree. <sup>15</sup> Guiáad ree Bén Israel badxaløj reeman, rëb reeman:

—¿Chexc ya'n contzi gra ragbeex, awa ni'quid basiidxtix?

<sup>16-17</sup> Dxel rëb Jesús loj reeman:

—Ad guictan carii ni culün lëjt, zëëdan por Dios, Bén guxhaal naj. Bal chu rën giüün zi'c rënman, zignia'man bal ni carii

guicanan culün lëjt o zëëdan por Dios ya.<sup>18</sup> Bén ruliüü ganaxzi ni rbëëgujicaman, rüjnman laan din guilies ree bejn xvaloraman. Per bén rüjn mazri din guilies bejn xvalor Dios, bén guxhaal laaman, laaman nree ni diidxli, ad rusquieetaman bejn.

<sup>19</sup> Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

<sup>20</sup> Badxi' ree bén guinan, rëb reeman:

—Xindxab yu' luxdool. ¿Chuczi rën gugüjt lüj?

<sup>21</sup> Abi' rëb Jesús loj reeman:

—Por tijbzi milagr ni benan radxalodji.<sup>22</sup> Abi' lëjt gunabee Moisejs lëjt guial gra ree xinguaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn.<sup>23</sup> Yan, bal chitëë gusaglodji ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bënragxuu dxej raziiladx bejn?<sup>24</sup> Ad rüjndi xgabmal por ni ruguiaazidi rüjn bejn, yaloj xgaj gol gogbee zagdxe xhie cayüjnman.

### Rëb Jesús ban zaman

<sup>25</sup> Yu' ree bén Jerusalén guzuloj rniabdiidx loj lasa' reeman, rëb reeman:

—¿Nid bén guinan cayguiil reeman ya din gugüjt reeman laaman?<sup>26</sup> Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo?<sup>27</sup> Per dunuj ree rayagbeechaaw ban zaman, guíaad chi gui't Cristo, achut gagbee ban saman.

<sup>28</sup> Chi biguiejn Jesús zian, la'tgaj culüüman bejn ree lën yadooro' Jerusalén, dxel guneeaman rejs rëbaman:

—¿Lëjt rëb nünbeedi naj abi' ragbeedi ban guzaan! Per ad zialtan por naj gajc,

zialan por quijb Bén rniabee Bén ad nünbeetidi.<sup>29</sup> Per naj nünbee laaman guial zialan diidz lod za'man, laa tëëman guxhaal naj.

<sup>30</sup> Chi biguiejn reeman zian, guyën reeman niniaaz reeman laaman, per achut gunaaz laaman, guial gad hor gal guiniaazaman.<sup>31</sup> Loj ree bénguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj Bén guin ya?

### Guyën reeman niniaaz reeman Jesús

<sup>32</sup> Biguiejn ree bënfarisew ni nree ree bejn Jesús. Abi' laa reeman con ree bixhioz rniabee, guxhaal reeman Bén rajp ree ro' yadooro' Jerusalén din guiniaaz reeman Jesús.<sup>33</sup> Dxel rëb Jesús:

—Ad xchejtri gazunë'n lëjt, dxel yaya'n lod za' Bén guxhaal naj.<sup>34</sup> Yaguiilidi naj, per ad zadxejltidi naj, din ad zile't gui'tidi lod gazun.

<sup>35</sup> Abi' ree Bén Israel guin guzuloj rniabdiidx loj lasa' reeman, rëb reeman:

—¿Banczi zajc che Bén guin din ad zadxejltaman? ¿Ni zejman lod zobj ree Bén Israel loj ree benzit ya, chiglüüman laa reeman në ree Bén ad najt Bén Israel?<sup>36</sup> ¿Xhie rën guiëb guial naman: “Yaguiilidi naj per ad zadxejlтан, din ad zile't gui'tidi lod gazun”?

### Nijs runee guialnaban

<sup>37</sup> Dxej rliox lanij guin naj mazri dxej zobjloj, dxejzii guzuli Jesús guneeaman rejs, rëbaman:

—Bal chu lëjt re'c nijs, gol guda lon din guië'dan.<sup>38</sup> Din Bén rililadx naj zi'c ca loj xtiidx Dios, lën luxdoooman gach nijs runee guialnaban.

<sup>39</sup> Chi gunee Jesús zian, rën guiëb xtiidxaman guial gra ree Bén chililadx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

### Gula' lasa' ree bejn

<sup>40</sup> Yu' ree b́en no'ch loj ree benzien guin, chi bacaagdiajg reeman ni gunees Jesús, rēb reeman:

—Walican, b́en guin naj gui'tt guidgadēē xtiidx Dios loj ree bejn.

<sup>41</sup> Yu'za reeman rēb:

—B́en guin naj b́en bacaabee Dios.

Per yu' reeman rēb:

—Ad laataman naj Cristo, din ad niz Galileat naj griiman. <sup>42</sup> Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

<sup>43</sup> Zian gojc dxel gula' lasa' reeman por Jesús. <sup>44</sup> Zien reeman guyēn niniaaz laaman, per achut bayax niniaaz laaman.

### Ad bililadxt ree guxtis Jesús

<sup>45</sup> Chi bayejc ree b́en rajp ro' yadoo guin lod za' ree b́enfarisew guin con ree bixhioz rniabee guin. Rēb reeman loj reeman:

—¿Chexc zeel ad bidnētidi laax?

<sup>46</sup> Dxel rēb ree b́en rajp ro' yadoo guin:

—¡Ad goct wayu b́en guinee zi'c mieex!

<sup>47</sup> Abi' rēb ree b́enfarisew guin:

—¿Nē lējt ma cwējb basquieex lējt ya?

<sup>48</sup> ¿Wen yu' ree dux guxtis ree, o b́enfarisew ree ma bililadx laax ya? <sup>49</sup> ¿Nid ragbeedi ya guial zien ree b́en guin banjtt loj Dios guial ad núnbeet reeman ley?

<sup>50</sup> Per b́enfarisew la Nicodemo b́en bignaj Jesús tijb guxhin, rēbaman loj reeman:

<sup>51</sup> —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

<sup>52</sup> Badxi' reeman laan rēb reeman:

—¿Wen nē lūj za'nē ree b́en Galilea ya? Basiid zagdxe loj xtiidx Dios din gagbeel ad goct warii b́en rudēē xtiidx Dios loj ree bejn niz Galilea.

<sup>53</sup> Dxel bare'ch reeman zia lidx lidx reeman.

### Béngunaa banaaznē xinguaaaw ren

**8** Per Jesús zēman ruguia' Olivos. <sup>2</sup> Chi bareguiaal, rsil badxinman lēn yadooro' Jerusalén stijb. Zien ree bejn bido'p lod za'man, dxel gurejman guzuloj culiüüman laa reeman. <sup>3</sup> Abi' mextr ruliüü ree ley con ree b́enfarisew bidxinnē tijb béngunaa banaaznē tijb xinguaaaw, dxel bazuj reeman laaman galay ree b́en guin, <sup>4</sup> zianz rēb reeman loj Jesús:

—Mextr, banaaz béngunaa guie loj mer hor ni yu'nēman xinguaaaw ren. <sup>5</sup> Abi' loj ley basa'nnē Moisejs dunuj ree ca guial lasa' béngunaa guie rayal guiētaman con guiaj. ¿Laadx lūj xhie nal?

<sup>6</sup> Gunabdiidx reeman zian din guidoon xhie guiēbaman din gac gutedia' reeman laaman. Per con basajb lojman abi' guzulojman cucaaman luyuj con xbacwēnman. <sup>7</sup> Per guial laa reeman canabdiidxzi canabdiidx reeman lojman, abi' babejliman, rēbaman loj reeman:

—Chutēēz b́en ad wayüjnt dol, yaloj laaman gucaaguaiaj béngunaa guie.

<sup>8</sup> Dxel basajb lojman stijb, basnuu caaman luyuj guin. <sup>9</sup> Chi biguiejn reeman ni guneeman, guzuloj cayza tijbgaj reeman, diizd mazri bengol xt bara reeman baza. Tijbzi béngunaa guin baya'n con Jesús loj ree b́en riga' yagaj. <sup>10</sup> Dxel babejliman, rēbaman loj béngunaa guin:

—¿Con ree b́en bidnē lūj? ¿Ni'qui tijb reeman achut xhie been lūj ya?

<sup>11</sup> Dxel rēb béngunaa guin:

—Dad, ni'qui tijbaman.

Abi' rēb Jesús:

—Ni'qui naj achet günan lūj. Baguiaj yan, ad güünril dol.

### Jesús naj bajl par bénguidxliuj

<sup>12</sup> Dxel gunees Jesús stijb, rēbaman loj ree b́en riga' yagaj:

—Naj naj bajl rusni bénguidxliuj. Abi' bén guzoob da diidxan, zani xquiar-gueijnman xhienaag gapaman guialnaban tiblayaa con Dios, ad yu' tēēt dxej guicajy xquiar-gueijnman.

<sup>13</sup> Abi' ree bēnfarisew rēb reeman lojman:

—Lij gajc ruza't luj, abi' achet lasajc xtiidxil.

<sup>14</sup> Dxel rēb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tēē gan, sa'n lējt ad ragbeetidi ban zialan ban tēē gan. <sup>15</sup> Lējt rnieedi bejn zi'ctizi naj xixgabidi, sa'n naj achut ruzatan. <sup>16</sup> Abi' bal guzatan bejn, ganen diidxli, din ad zanetan zi'c naj da xgaban, nē da Dadan bēn guxhaal naj ragbee guial diidxli naj ni ganen. <sup>17</sup> Abi' loj xleydi ca guial chi yu' tio'p bēn rniee tiblojzi, diidxliqui naj ni rniee reeman. <sup>18</sup> Yan, naj gajc naj tijb bēn rniee por naj, abi' da Dadan bēn guxhaal naj, naj stijb bēn rniee por naj.

<sup>19</sup> Gunabdiidx reeman lojman rēb reeman:

—¿Con xdadil?

Badxi'man laan rēbaman:

—Lējt ad nūnbeetidi naj, ad nūnbee tēētidi da Dadan, din bal nūjnbeedi naj, ziangajc nūjnbeedi da Dadan.

<sup>20</sup> Zian gunee Jesús la'tgaj rulūūman bejn ree lēn yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guiniaazaman.

### Lod gan ad zile't gui'tidi

<sup>21</sup> Gunee Jesús stijb, rēbaman:

—Chi ma gan, zaguiilidi naj, per zējtnē xtolidi, din lod gan ad zile't gui'tidi.

<sup>22</sup> Dxel rēb ree bēn Israel guin:

—¿Wen ni laagajcaman gugijt laaman ya, zeel naman guial ad zajet yo' ree lod cheman?

<sup>23</sup> Abi' rēb Jesús loj reeman:

—Lējt naj bēn ladguiajt guie, sa'n naj ladya ni zialan. Lējt naj bénguidxliuj, sa'n naj ad bénguidxliujt naj. <sup>24</sup> Zeel rnin, zējtnē xtolidi. Din bal id zaliladxiidi guial naj naj bēn najn, zējtnē xtolidi.

<sup>25</sup> Dxel gunabdiidx reeman lojman, rēb reeman:

—¿Chuzal luj?

Badxi'man laan rēbaman:

—Ma rnin lojdi diidz yaloj. <sup>26</sup> Zien ni ra'pan gulūn lējt ni ganenē' tēēn lējt. Per naj, ni canen loj bénguidxliuj naj ni rucagdiagan rniee bēn guxhaal naj, abi' ni rnieeman naj diidxli.

<sup>27</sup> Per laa reeman ad gogbeet guial Diosan ruza'taman. <sup>28</sup> Zeel rēbaman loj reeman:

—Chi ma beendi zi'ctizi rēndi con Bēn guxhaal Dios, dxel gagbeedi najcan, gagbee tēēdi guial achetzi rūnan por da xgabzan, naj rnie ni ma balūū da Dadan naj. <sup>29</sup> Din laaman guxhaal naj, laaman za' con naj, abi' ad yu't dxej cwēlādaxaman naj, guial zianczi rūnan ni rayulādaxaman.

<sup>30</sup> Chi rēb Jesús zian, zien ree bejn bililadx laaman.

### Bēn wali naj xbejn Dios

<sup>31</sup> Rēb Jesús loj ree bēn Israel bililadx laaman:

—Bal gusnuu guzoobidi da diidxan, waliqui najdi da bejnan, <sup>32</sup> abi' zūjnbeedi conin naj diidxli, abi' por diidxli guin zalaadi.

<sup>33</sup> Badxi' reeman laan rēb reeman:

—Dunujn zio'p loj xdiaa Abraham, abi' ad yu't dxej wayajcan zi'c bēn nado'. ¿Chexquiza zeel nal du lojn, guial por diidxli zalaan?

<sup>34</sup> Dxel rēbaman loj reeman:

—Diidxli rnin lojdi, guial graczi bēn rūjn ganaxzi dol, laa reeman naj zi'c bēn nado' loj dol. <sup>35</sup> Abi' tijb bēn nado' loj bejn, ad zile't guiēbaman xfamilaman naj xpatronman, sa'n xi'n patron

guin zile' guiëbix xfamilixan. <sup>36</sup> Zeel bal Xi'nman guslaa lëjt, ad najtridi zi'c bën nado'. <sup>37</sup> Ma qui ragbeen guial loj xdiaa Abraham zëedidi, per lëjt rën gugüjt naj guial ad rayuladxtidi da diidxan. <sup>38</sup> Naj rni ni ma balüü da Dadan naj, sa'n lëjt rüjndi zi'c na xDadidi güüdi.

<sup>39</sup> Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, züjndi zi'c beenman. <sup>40</sup> Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¡Abi' Abraham ad yu't dxej nüjnman zian! <sup>41</sup> Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunujn achut mazri xi'n nayajcan. Tijbzi Dios naj dux Dadan.

<sup>42</sup> Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bën guxhaal naj. <sup>43</sup> Abi' ad rignia'tidi ni rnin, guial ad rëntidi gucaagdiajguidi da diidxan. <sup>44</sup> XDadidi naj xindxab, abi' rüjndi zi'c rënx güüdi, din diizd yaloj ruladx xindxab guin gugüjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tëex xdad guialrusquiee. <sup>45</sup> Per guial naj rni lëjt ganax diidxli, ad rliadxtidi naj. <sup>46</sup> ¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliadxtidi naj? <sup>47</sup> Bén naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

### Mal yu' Jesús chi gad Abraham gal

<sup>48</sup> Dxel rëb ree bën Israel guin loj Jesús:

—Waliqui ni ranan guial xindxab yu' luxdool naj tëel bën Samaria.

<sup>49</sup> Badxi'man laan rëbaman:

—Achut xindxab yu' luxdon, naj cu-zob xtiidx da Dadan, per lëjt ganax diidxguijdx rnieedi naj. <sup>50</sup> Naj ad raguiltan guilies ree bejn da valoran, majsi yu' bën rën güün bejn zian, abi' laaman rüjn xguialguxtis. <sup>51</sup> Diidxli rnin lëjt, bën guzoob da diidxan, ad yu't dxej guiëtan.

<sup>52</sup> Dxel rëb ree bën Israel guin lojman:

—Yanri ma rayagbeechaawan guial xindxabqui yu' luxdool. Abraham në gra ree bën badëë xtiidx Dios loj ree bejn, güjt reeman, guiáad lüj nal: “Bén guzoob da diidxan, ad yu't dxej guiëtan.” <sup>53</sup> ¿Wen mazri lasajquil ya guial loj dux bëngulal ree Abraham? Güjtan, güjt tëë ree bën badëë xtiidx Dios loj ree bejn. ¿Laadx lüj chu naladxil najl?

<sup>54</sup> Abi' rëb Jesús loj reeman:

—Bal naj gajc gales da valoran, achet lasajc ni ganen por naj. Per bën rlies da valoran naj da Dadan, bën nagajquidi naj xDiosidi. <sup>55</sup> Lëjt ad nünbeetidi laaman, sa'n naj nünbeen laaman. Abi' bal ganin ad nünbeetan laaman, nëgajc naj ma naj bën rusquiee zi'cgajc lëjt. Per nünbeen laaman abi' ruzoban xtiidxaman. <sup>56</sup> Xbëngulalidi Abraham, babaaman guial guguaaman dxej ni guialan. Abi' chi baguaaman dxej guin, mazri babaaman.

<sup>57</sup> Dxel rëb ree bën Israel guin lojman:

—Ni'qui gadil chu' tü'pchii ijz, ¿guiáad lüj ya nal baguaal Abraham?

<sup>58</sup> Abi' gunee Jesús rëbaman:

—Diidxli rnin lojdi, mal nabanani chi gad Abraham chu'.

<sup>59</sup> Dxel gules reeman guiaj din nucaa reeman laan Jesús. Per laa guzëëb gajcaman galay ree bejn, abi' gudëdaman galay reeman bariiman lën yadoo guin, laa zia gajcaman.

### Rayüjn Jesús tijb xin ad ranit loj

**9** Chi cadëd Jesús tiblajt, baguaaman tijb xin ad ranit loj diizd chi golix.

<sup>2</sup>Dxel gunabdiidx ree xbejnman lojman, rëb reeman:

—Mextr, ¿chexc zeel ad ranit loj bën guin diizd chi golaman? ¿Por xtol ree xDadaman ya, o por xtol gajcaman?

<sup>3</sup>Badxi' Jesúsán, rëbaman:

—Najman zian ad por xtoltaman ad por xtol tëët ree xDadaman. Gojlaman zian din chi yayajcaman, guguaa ree bejn xguialrniabee narooob Dios. <sup>4</sup>Yan, la'tgaj yu' tiamp, rijn naguiejn yaguieen ree ni na bën guxhaal naj, din ma yayaalox tiamp ni achetri zajc gac. <sup>5</sup>Abi' la'tgaj za'n loj guidxliuj guie, naj naj bajl rusni bénguidxliuj.

<sup>6</sup>Chi gulox guneeman zian, guxhie' xhiejnman luyuj, abi' beennëman laan bajn, persi gudëëbaman laan guiaalox xin guin. <sup>7</sup>Abi' rëbaman lojx:

—Bitiib lojl ro' tanc Siloé —Siloé rën guieë ni guxhaalaman.

Dxel bitiib lojx, abi' chi bayejquix, ma rani lojx. <sup>8</sup>Dxel bën zojb ree gajxh lod zojbix con ree bën ragbee guial laax rniab carda, rëb reeman:

—¿Nid xin guinan rbej rniab carda ya?

<sup>9</sup>Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

<sup>10</sup>Dxel gunabdiidx reeman lojx, rëb reeman:

—¿Xhieza naag gojc bani lojl?

<sup>11</sup>Badxi'xan, rëbix:

—Bën la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

<sup>12</sup>Abi' rëb reeman lojx:

—¿Conzaman yan?

Zeel rëbix:

—Ad ragbeetan.

### Gunabdiidx ree bënfarisew loj xin guin xhienaag guzulox rani lojx

<sup>13</sup>Loj hor zii binë reeman xin bayajc guiaalox guin loj ree bënfarisew, <sup>14</sup>din dxej been Jesús bajn persi bayüjnman guiaalox xin guin, dxej guin raziiladx ree bejn. <sup>15</sup>Dxel gunabdiidx ree bënfarisew guin lojx xhienaag guzulox rani lojx. Abi' rëbix loj reeman:

—Jesús gudëë bajn guiaalon, dxel bitiib lon, yan ma ranin.

<sup>16</sup>Yu' ree bënfarisew guin rëb:

—Bën bayüjn guiaalox ad xbejnt Diosan, din ad rajptaman respejt dxej raziiladx bejn.

Per yu'za reeman rëb:

—¿Xhienaag güünman milagr guie ree, bal najman bëndol?

Garent garen rëb reeman. <sup>17</sup>Abi' gunabdiidx reeman loj xin bayajc guin za-tijb, rëb reeman:

—¿Laadx lüj xhie nal chu naj bën bayüjn guiaalox?

Badxi'xan rëbix:

—Naj rni guial laaman naj bën rudëë xtiidx Dios loj ree bejn.

<sup>18</sup>Per bën Israel guin ree ad riladxt reeman, din ad banit lojx abi' yan ma ranin, dxel gurejdx reeman xdadix con xniaax, <sup>19</sup>abi' gunabdiidx reeman loj reeman, rëb reeman:

—¿Xin guien naj xi'ndi ya, xin rëbidi ad ranit loj diizd gojlix? Yan, ¿xhienaag gojc zeel ma ruguiaax?

<sup>20</sup>Badxi' reeman laan rëb reeman:

—Dunujn rayagbee guial du xi'nanan, rayagbee tëen guial diizd chi golix ad ranit lojx. <sup>21</sup>Per ad rayagbeetan xhienaag gojc zeel rani lojx, ad rayagbee tëetan chu bayüjn guiaalox. Gol gunabdiidx lojx, ma najx xingol, ma zajc na laa-gajquix lojdi xhienaag gojc.

<sup>22</sup>Rëb ree xdadix zian guial rdxeb reeman xguxtis ree bën Israel, din ma baya'n reeman diidx, chutëez bën guieëb

guial Jesús naj Cristo, ad zatiëjbtri reeman chu'man lën yadoo. <sup>23</sup> Zianan zeel rëb reeman: “Gol gunabdiidx lojx, ma najx xingol.”

<sup>24</sup> Dxel gurejdx reeman laax zatijb, abi' rëb reeman:

—Laa Dios ruguiaa, guna diidxli, din dunujn rayagbee guial bëndol naj bën bayüjn lüj.

<sup>25</sup> Badxi'xan rëbix:

—Ad ragbeetan bal bëndolan o ad bëndoltan ya. Tijbzi ni ragbeen naj guial ad banit lon, abi' yan ma ruguian.

<sup>26</sup> Dxel gunabdiidx reeman lojx stijb, rëb reeman:

—¿Xhienaag beennëman lüj? ¿Xhien-aag beenman persi rani lojl?

<sup>27</sup> Badxi'xan rëbix:

—Ma rnin lojdi, abi' lëjt ad rliadxtidi naj. ¿Chexc zeel rëndi ganin zatijb xhien-aag beenman? ¿Wen në lëjt rën gac xbejnman ya?

<sup>28</sup> Dxel gudilë reeman laax rëb reeman:

—Lüj bal najl xbejnman, sa'n dunujn xbejn Moisejs nayajcan. <sup>29</sup> Din dunujn rayagbee Dios gunee Moisejs, per bën guin ni'quid rayagbeetan ban zaman.

<sup>30</sup> Badxi'xan rëbix:

—¿Xhiechalnin zeel ad ragbeetidi ban zaman! Guiáad naj por laaman ma rani lon. <sup>31</sup> Dunuj ree rayagbeechaaw guial ad ridxga't Dios xtiidx ree bëndol, ridxga'man xtiidx ree bën ruzoob xtiidxaman rüjn tëë reeman zi'c rënman. <sup>32</sup> Ad goct wacaagdiajg ree guial chu' bën yayüjn loj bën ad ranit loj diizd gojlan. <sup>33</sup> Yan, bal id por Dios zëed bën guin, achetzi nile! nüjnman.

<sup>34</sup> Dxel rëb reeman lojx:

—Lüj gojl con dol, ¿wed lüj guliüü dunujn?

Abi' babëë reeman laax yagaj.

### Bililadx xin bayajc guin Jesús

<sup>35</sup> Gogbee Jesús ni guzac xin bayüjnman, dxel chi badxaagaman laax, rëbaman lojx:

—¿Rliladxil bën guxhaal Dios loj guidxliuj ya?

<sup>36</sup> Badxi'xan rëbix:

—Dad, guna chunin, din chililadxan laaman.

<sup>37</sup> Dxel rëbaman lojx:

—Ma baguiaal laaman, laaman naj bën caneenël.

<sup>38</sup> Abi' bazuxib xin guin lojman, rëbix:

—Rliladxan lüj, Dad.

<sup>39</sup> Zianz rëb Jesús:

—Bialan loj guidxliuj guie din günan guialguxtis, din por naj yani loj ree bën ad ranit loj, guiáad ree bën rani loj, ad zanit loj reeman.

<sup>40</sup> Yu' ree bënfarisew za'në laaman. Chi biguiejn reeman rëbaman zian, rëb reeman:

—¿Wen në dunujn ad ranit duloj ya?

<sup>41</sup> Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

### Bën rnijax xiil

**10** Rëb tëë Jesús:  
—Diidxliczi rnin lojdi, bën ad rut niz ro' xgurajl ree xiil, bën ru niz lood ren, laaman naj bëngubaan. <sup>2</sup> Per bën ru niz ro' xgurajl reeb, laaman naj bën rnijax laa reeb. <sup>3</sup> Abi' rxhial bën rajp ro' xgurajl reeb persi ru bën rnijax laa reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb lën gurajl guin. <sup>4</sup> Abi' chi ma brii gra reeb, dxel rniedaman loj reeb, guiáad laa reeb rnal laaman, guial nünbee reeb cha'man. <sup>5</sup> Per ad rnalt reeb tijb bën ad nünbeet reeb, ruxüünl reeb lojman, guial ad nünbeet reeb cha'man.



<sup>6</sup> Chi gulox gunee Jesús zian, ad bigni-a't ree b́en riga' yagaj xhie ŕen guiéb ni guneeaman.

### Jesús naj zi'c b́en rniaj xiil ree zagdx

<sup>7</sup> Réb Jesús loj reeman zatijb:

—Diidxliczi rnin, naj naj zi'c ro' xgu-rajl ree xiil, lod ru reeb. <sup>8</sup> Gra ree b́en bi't chi gad naj guial naj reeman zi'c b́engubaan, rban reeman rusagzi t́eé ree-man. Per ree b́en naj da bejnan ad bidx-ga't reeman laa reeman. <sup>9</sup> Naj naj ro' port, abi' b́en ru ro' port guie zajpaman perdon, dxel ma zile' chu'man yarii t́eé-man zi'cgajczi tijb xiil abi' zian rdxejl ni rawib.

<sup>10</sup> 'B́engubaan ri'tzaman din cwan-man, gugújtaman gunijt t́eéman, sa'n naj zialan din gapidi guialnaban, gap t́eédi zro' da'tan. <sup>11</sup> Naj naj zi'c tijb b́en rniaj xiil ree zagdx. Abi' b́en rniaj xiil ree zagdx x́t xguialnabanman rud́eé-man por laa reeb. <sup>12</sup> Per b́en rniaj laa reeb por milia, chi ruguiaaman źeéd cuyojt, laa ruxüün gajcaman, rb́eéladxaman xiil guin ree guial ad najt reeb xi xiilaman ńe guial ad najtaman b́en rniaj ree xiil, dxel rniaaz cuyojt guin laa reeb abi' rtie'chib laa reeb. <sup>13</sup> Laaman rb́eéladx laa reeb, din por miliazi rniajman laa reeb abi' achet naladxaman por laa reeb.

<sup>14-15</sup> 'Naj naj zi'c b́en rniaj xiil ree zagdx. Abi' zi'c núnbee da Dadan naj, zian núnbeen laaman, ziangajc núnbee ree da xiilan, guíaad laa reeb núnbee naj. Abi' x́t da guialnabanan gud́edan por laa reeb. <sup>16</sup> Ra'p t́eén stibcwaa ree xiil ad yu't ĺen gurajl guie. Ńe laa reeb ryaadx chigxin, laa reeb guzoob da didxan, yadxaag grop cwaa reeb gac reeb tijbzi, abi' tijbzi bejn gap laa reeb.

<sup>17</sup> 'Da Dadan Dios ŕenman naj guial naj gajc rud́e naj guiétan par yabanan stjib. <sup>18</sup> Achut zajc gugújt naj bal id naj gatiééb. Naj ra'p guialrniabee par gatiééban guiétan ńe par yabanan stjib,

din laan naj guialrniabee ni banee da Dadan lon.

<sup>19</sup> Chi biguiejn ree b́en Israel guin ni ŕebaman, gojc reeman tio'p lala' stjib. <sup>20</sup> Zien reeman ŕeb:

—¿Chexc zeel ridxga'di laaman? Awa xindxab yu' luxdooman rajc t́eé guijcaman.

<sup>21</sup> Per yu' reeman ŕeb:

—Ni'qui tijb b́en yu' xindxab luxdoo ad rnieet zian. ¿Wen zajc yaxhal xindxab guiaaloj ree b́en ad ranit loj ya?

### Jesús con xDadaman Dios naj reeman tijbzi

<sup>22</sup> Tiamp nayaag, chi cayüjn ree b́en Israel lanij ni ŕijn reeman gazobijz par yadooro' Jerusalén. <sup>23</sup> Wej Jesús ĺen yadoo guin. Chi cazaman niz ro' curdur ni rniee reeman xcurdur Salomón. <sup>24</sup> Dxel biyaw ree b́en Israel laaman, ŕeb reeman lojman:

—¿X́t goc naga'loj cu'nawééguil dunujn? Guna du lojn bal ĺij naj Cristo.

<sup>25</sup> Badxi' Jesúsán ŕebaman:

—Ma rnin lojdi, per ĺejt ad riladxtidi naj. Abi' ree ni ŕunan con xguialrniabee da Dadan Dios, laa reen rulüü chu najn. <sup>26</sup> Per ad riladxtidi, guial ad najtidi da bejnan. <sup>27</sup> B́en naj ree da bejnan, núnbee reeman cha'n, guíaad naj núnbeen laa reeman, abi' laa reeman rzanal naj. <sup>28</sup> Naj rud́e guialnaban tiblyaa loj reeman, ad yu't dxej nit reeman. Abi' achut zajc chiquied laa reeman lon. <sup>29</sup> Din da Dadan, b́en banee laa reeman lon, rajpaman mazri guialrniabee guial loj gra. Achut zajc chiquied laa reeman lojman. <sup>30</sup> Da Dadan con naj, nayajcan tijbzi.

<sup>31</sup> Dxel cwa' ree b́en Israel guin guiaj din gucaaguaiaj reeman Jesús. <sup>32</sup> Per ŕebaman loj reeman:

—Por xguialrniabee da Dadan, zien ni zagdx ma benan niz lojdi. ¿Con pornin gucaaguaiajdi naj?

<sup>33</sup> Badxi' reeman laan ŕeb reeman:

—Ad por ree ni zagdxe ni beentilan ya-caaguiajn lüj, yacaaguiajn lüj guial ad rajptil Dios respejt, din bénguidxliujzi lüj, abi' rüjn lüj gajc zi'c Dios.

<sup>34</sup>Dxel rëb Jesús:

—Loj xleydi rëb: “Naj rni guial lëjt naj dios.” <sup>35</sup>Dunuj ree rayagbee guial ad ni rusquieet naj ni ca loj xtiidx Dios. Abi' laaman gulëëlaaj dios bën basa'nnë ree xtiidxaman, bën gojp ree guialrniabee loj ree bën Israel. <sup>36</sup>Yan, bal da Dadan Dios gulëëca naj persi guxhaalaman naj loj guidxliuj, ¿chexquiza zeel nadi ad ra'ptan laaman respejt guial rnin, xi'n-man naj? <sup>37</sup>Bal id cayünan zi'c na da Dadan, ad chililadxidi naj. <sup>38</sup>Per bal cayünan zi'c naman, majsi ad zaliladxtidi naj, per gol bililadx guial por laaman zëäd ni rünan din gagbeedi guial da Dadan za'në naj, guiáad naj za'në'n laaman.

<sup>39</sup>Dxel guyën reeman niniaaz reeman Jesús, per gulaaman loj reeman.

<sup>40</sup>Abi' zëman zatiblad ro' guiiw Jordán, lod baroobnijs Waj bejn ree yaloj, yagaj baya'nman. <sup>41</sup>Abi' zien ree bën bidxin yagaj rëb:

—Walín, majsi achet milagr been Waj, per gra ni guneeman xcwent bën guie naj diidxli.

<sup>42</sup>Dád zien reeman bililadx Jesús yagaj.

### Güjt Lazr

**11** Guyu tijb bënragxuu, bñi lajman Lazr. Laaman con re bizanman Li con Mart, naj ladx reeman Betania. <sup>2</sup>Abi' Li bizan Lazr, laam baroob perfum guia' Jesús abi' bacwiidximin con guidxguijquim. <sup>3</sup>Dxel grop bël reem guxhaal rusion loj Jesús, rëb reem:

—Dad, ragxuu xmiwil Lazr.

<sup>4</sup>Chi biguiejn Jesús zian, rëbaman:

—Guialguijdx guin ad zëädtan par gugüjtan, zëädan din gac guguaia bejn

xguialrniabee Dios në par guguaia reeman xguialrniabee Xi'n Dios.

<sup>5</sup>Majsi rën da't Jesús Mart con Li në Lazr, <sup>6</sup>per chi cwa'man rusion ragxuu Lazr, sta goglaaman zatio'p dxej lod za'man. <sup>7</sup>Dxel rëbaman loj ree xbejnman:

—Yo' ree niz Judea zatijb.

<sup>8</sup>Abi' rëb reeman lojman:

—Mextr, ad wayajct xchej guyën ree bën zojb niz ni nucaaguiaj reeman lüj. ¿Abi' chel ni zatijb ya?

<sup>9</sup>Dxel rëb Jesús:

—Lëjt ragbee guial chiptio'p hor yu' tibdxej. Abi' bën rza radxe, achet rirejl guia'man, din yu' bajl rusni loj guidxliuj guie. <sup>10</sup>Per bën rza guxhin, yu' ni rirejl guia'man, din achet bajl guin rajpaman.

<sup>11</sup>Rëb tëë Jesús loj reeman:

—Ma naga'yëjs dux miw ree Lazr, per chicwëënan laax.

<sup>12</sup>Dxel rëb ree xbejnman:

—Dad, bal naayëjsix, rën guiëban yayajquix.

<sup>13</sup>Per ni rëb Jesús rën guiëban guial ma güjt Lazr, guiáad ree xbejnman gunaladx reeman rëbaman naga'yëjsizix. <sup>14</sup>Dxel bagojn Jesús laa reeman, rëbaman:

—Ma güjt Lazr. <sup>15</sup>Rabaan por lëjt guial ad guzutan ni din chililadxidi naj. Yan, yo' ree yugnaj reex.

<sup>16</sup>Dxel Tumajs, bën rniece reeman cwa-jch, rëbaman loj los demazri xbejn Jesús:

—Yo' ree yunë' reeman, din lod guiëtaman, yayëjtnë' reeman.

### Jesús naj bën rusban bejn runee tëëman guialnaban

<sup>17</sup>Chi bidxin Jesús Betania, ma gojc tajp dxej biguie'ch Lazr. <sup>18</sup>Betania guin raya'nán gajxh Jerusalén, zi'ct choon kilometro. <sup>19</sup>Abi' zien ree bën Israel bignaj Mart con Li din yagu' reeman luxdoo reem guial güjt bizan reem.

<sup>20</sup>Chi gogbee Mart ma zëäd Jesús gajxh,

briim bigchaaglojm laaman, guiáad Li baya'nm lénü. <sup>21</sup> Dxel rëb Mart loj Jesús:

—Dad, bal nizujl guie, ad ziant niëjt da zanan. <sup>22</sup> Per naj ragbee guial ni'qui yan zunee Dios ni guiniabil lojman.

<sup>23</sup> Dxel rëb Jesús:

—Naj rni yaban bizanl.

<sup>24</sup> Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialguxtis Dios.

<sup>25</sup> Abi' rëb Jesús:

—Naj naj bën rusban ree bengüt rudë tëen guialnaban loj ree bejn. Bén chililadx naj, majsi guiëtaman, per zajpaman guialnaban loj Dios. <sup>26</sup> Guiáad gra bën naban rliladx tëe naj, zajpaman guialnaban loj Dios. ¿Rliladxil ni canin lüj ya?

<sup>27</sup> Dxel rëbim lojman:

—Rliladxanan Dad. Rliladxan lüj naj Cristo, Xi'n Dios, bën naj gui't loj guidxliuj.

### **Biin Jesús ro' xbaa Lazr**

<sup>28</sup> Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

<sup>29</sup> Biguiejnzi Li zian, laa bisugajquim bigchaaglojm Jesús. <sup>30</sup> Abi' Jesús gadzaman chu' luguiedx guin, sta za'man lod bigchaagloj Mart laaman. <sup>31</sup> Guiáad ree bën Israel zojbnë Li ragu' reeman luxdoom, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguaanm.

<sup>32</sup> Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

<sup>33</sup> Chi baguiaaman roon Li con ree bën Israel nal laam, dád gognaa luxdooman guyu naya tëëman. <sup>34</sup> Dxel gunabdiidxa-man rëbaman:

—¿Ban biquie'chidi laax?

Abi' rëb reeman:

—Dad, guda nial din guguaal.

<sup>35</sup> Dxel biinman. <sup>36</sup> Abi' rëb ree bën Israel guin:

—Gol baguiaa nial dád guyënman laax.

<sup>37</sup> Per yu' reeman rëb:

—Bën guinan baxhal guiaaloj tijb bën ad ranit loj. Yan, ¿niche niacj nünman ya'n chitëë niëjt Lazr?

### **Basban Jesús Lazr**

<sup>38</sup> Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n.

<sup>39</sup> Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni güitim.

<sup>40</sup> Badxi' Jesúsán rëbaman:

—¿Nid rnin ya, bal rliladxil, guguaal xguialrniabee Dios?

<sup>41</sup> Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëë lüj guial ma bacaagdi-ajguil ni rnin. <sup>42</sup> Naj ragbeechaaw guial zianczi rucaagdiajguil ni rnin. Per rnin zian por ree bën riga' guie, din chililadx reeman guial lüj guxhaal naj.

<sup>43</sup> Chi gulox rëbaman zian, dxel guridxa'man rëbaman:

—¿Lazr, barii yagaj!

<sup>44</sup> Dxel barii Lazr lën baa guin nalüüb vend yaax con guia'x, guiáad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguiajx.

### **Baya'n reeman diidx xhienaag guiniaaz Jesús**

(Mt. 26:1-5; Mr. 14:1-2; Lc. 22:1-2)

<sup>45</sup> Dád zien ree bën binal Li bililadx Jesús, guial baguiaa reeman milagr beenman. <sup>46</sup> Per yu' reeman bicojn bën-farisew ree ni been Jesús. <sup>47</sup> Dxel bën-farisew ree në ree bixhioz rniabee,

bachajg lasa' reeman con los demazri ree guxtis, rëb reeman:

—¿Xhienaag yaguieen ree ya'n, din dád zien milagr caytijn xin guin? <sup>48</sup>Bal yadëed ree mod, graczi bejn guililadx laax, dxel guxtis Rom ree guidganijt reeman dux yadoo ree në dux nacion ree.

<sup>49</sup>Per loj reeman yu' bën la Caifás, bixhioz zobjloj rniabee loj ijzsi, rëbaman loj reeman:

—¿Nid ragbeedi ya, <sup>50</sup>nid rignia' tëedi ya, zagdxë naj guiët tijbzi bejn por gra bën Israel, luar nit dux nacion ree?

<sup>51</sup>Per Caifás guin ad ni naladxtzaman rëbaman. Guial najman bixhioz zobjloj rniabee loj ijzsi, zeel badëed Dios ni guneeman, guial guiët Jesús por gra ree bën Israel. <sup>52</sup>Abi' ad por laatzí reeman, par gac reeman tijbzi con gra ree xbejn Dios, bën riga' ree guidib guidxliuj. <sup>53</sup>Zeel diidz dxejzii baya'n reeman diidx gugüjt reeman Jesús.

<sup>54</sup>Zianan zeel ad contzi rulüülojtraman loj ree bën Israel, bazaman yagaj ziaman guiedx la Efraín, najn gajxh yujbidx, yagaj guzunë ree xbejnman.

<sup>55</sup>Dxejzii ree ma zidyob pascw, lanij rüjn ree bën Israel, dád zien ree bën guiedx ree zë Jerusalén din güün reeman zi'c naj xcostumbr reeman par gac reeman naya loj Dios chi gad pascw gal. <sup>56</sup>Dxel raguiil reeman Jesús, abi' rniabdiidx loj lasa' reeman lën yadooro' Jerusalén, rëb reeman:

—¿Xhie nadi? ¿Zi'taman lanij ya o ad zi'ttaman?

<sup>57</sup>Bénfarisew ree con ree bixhioz rniabee, gunabee reeman bal chutëez bën ragbee ban za' Jesús, gugojnman din chile' guiniaaz reeman laaman.

### Baroob Li perfum guia' Jesús

(Mt. 26:6-13; Mr. 14:3-9)

**12** Za xho'p dxej riaadx gal pascw, chi we Jesús Betania, lod zobj Lazr, xin basbanman. <sup>2</sup>Ni been reeman

tijb guialraw par xche ni gudawnë reeman Jesús. Mart gule'c guialraw guin, guiáad Lazr naj tijb bën gurenë laa reeman xan mex. <sup>3</sup>Dxel cwa' Li cost garol lijtr perfum ni lasajc wayëjx, najchawnen ganax nardo, baroobimin guia' Jesús abi' bacwiidxnë guidxgüjquimin. Guidibczi lënu guin baree nejxh. <sup>4</sup>Dxel Judas Iscariote, xin naj tijb ree xbejn Jesús, xin bayü laaman, rëbix:

<sup>5</sup>—¿Chexc ad gudo't perfum guin? Zagdxeli nido'n zi'ct rüjn tijb bejn gan tib ijz, din nüjnan yudar bënprob ree.

<sup>6</sup>Ad guial yu'tix xgab bënprob guin ree zeel rëbix zian, rëbix zian guial najx xin gubaan. Abi' guial laax naaz bols yu' milia, rbanx ni rudëe reeman rgu'chaawix. <sup>7</sup>Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan. <sup>8</sup>Din bënprob guin ree zianczi za'në reeman lëjt, per naj ad ziantczi gazunë'n lëjt.

### Baya'n reeman diidx gugüjt reeman Lazr

<sup>9</sup>Bën guixiuj bën Israel gogbee za' Jesús Betania, abi' wej reeman yagaj, ad par guguiaatzí reeman Jesús, në par guguiaa reeman Lazr, xin basbanman. <sup>10</sup>Zeel baya'n ree bixhioz rniabee diidx guial në Lazr gugüjt reeman. <sup>11</sup>Din por laax dád zien ree bejn cayrii loj reeman, abi' caliladx reeman Jesús.

### Bagajpdioz ree bejn Jesús zi'c rey

(Mt. 21:1-11; Mr. 11:1-11; Lc. 19:28-40)

<sup>12</sup>Chi bareguiaal, zien da't ree bën zë lanij pascw Jerusalén gogbee guidxin Jesús yagaj, <sup>13</sup>dxel cwa' reeman zijn, brii reeman bigchaagloj reeman laaman, rbidxa' reeman rëb reeman:

—¿Benza'c bendxoon naj Dios! ¡Nüjnle'man Bén guxhaalaman! ¡Nüjnle'man bën naj rey Israel!

<sup>14</sup> Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

<sup>15</sup> Bén Sión, ad rdxebidi.

Gol baguiaa, laa xreydi zëed, dxiibaman tijb burdoo.

<sup>16</sup> Yaloj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

<sup>17</sup> Bén guzu ree con Jesús chi guredxaman Lazr din yariix lën baa, basban tëeman laax loj ree bengüt, rusnuu rü reeman diidx loj ree bejn ni baguiaa reeman. <sup>18</sup> Zeel zien ree bejn brii bigchaa-gloj laaman, guial gogbee reeman milagr beenman. <sup>19</sup> Dxel rëb loj lasa' ree bënfarisew:

—Gol baguiaa nial graczi bejn zinal laax, achetri zajc yaguieen ree.

### **Yu' ree bén grieg raguuil Jesús**

<sup>20</sup> Loj gra ree bén we lanij bignajchi' reeman Dios Jerusalén, no'ch bëlzi ree bén grieg, <sup>21</sup> gubig reeman loj Filip, bén za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

<sup>22</sup> Abi' wej Filip biguiedxaman loj Andrejs, dxel wej grop reeman bicojn reeman Jesús. <sup>23</sup> Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman. <sup>24</sup> Diidxliczi rnin, zi'c tijb xob bal idan chu' luyuj najz najn tijbzi, per bal chu'n luyuj zajxhiejn. <sup>25</sup> Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per bén ru mazri xgab güünman zi'c rën Dios, xhietëez sacaman, zajpaman guialnaban tiblyaa con laaman. <sup>26</sup> Bal chu rën güün ni rënan guidnalaman naj, lod gazun, nëgajcaman su. Bén güün ni rënan, guiën da Dadan laaman.

### **Rugojn Jesús guial guiëtaman**

<sup>27</sup> Rëb tëë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”? Per ad zëtan zian, din par zian zialan.

<sup>28</sup> Dad, balüü xguialrniabeel.

Dxel biguien cha' bejn xanyabaa rëbaman:

—¡Ma balü da guialrniabeen, per gulünan stijb!

<sup>29</sup> Rigujejn ree bén riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gunee laaman.

<sup>30</sup> Dxel rëb Jesús:

—Ad por najtan biguien cha' bejn, por lëjtan. <sup>31</sup> Ma bidxin dxej gac guialguxtis loj guidxliuj, yan yarii bén rniabee lojn. <sup>32</sup> Per chi guilies reeman naj ya loj guidxliuj guie, dxel gui't graloj bejn lon.

<sup>33</sup> Zian basignia'man xhienaag guiëtaman. <sup>34</sup> Badxi' ree bén guinan rëb reeman:

—Dunujn rayagbee rëb loj ley, Cristo guiban tiblyaa. ¿Chexc zeel nal, rayal guilies reeman Bén zëed xanyabaa? ¿Chunin naj Bén zëed xanyabaa?

<sup>35</sup> Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guiaal lëjt. Din bén rza loj xcaj, ad ragbeetaman ban cheman. <sup>36</sup> Gol bililadx bajl guie, la'tgaj za'nëdan, din gaquidi xbejnan.

Chi gulox gunee Jesús zian, dxel baquie'chlojman loj reeman.

### **Ad bililadxt ree bejn Jesús**

<sup>37</sup> Majsi been Jesús zien da't milagr baguiaa reeman, ad bililadxt reeman.

<sup>38</sup> Zian gojc cumplid ni bacaa Isaías bén badëë xtiidx Dios loj ree bejn, rëban:

Dad, ¿chu ma bililadx ruson radëëdan?

¿Chu loj ma balüü Dios xguialrniabeeman?

<sup>39</sup> Zianan zeel ad gojct nililadx reeman, din nē ze bacaa Isaías:

<sup>40</sup> Dios basiaaw guiaaloj reeman, bascajy tēeman xquiarguejñ reeman, chitēē guguaa reeman chignia' tēē reeman, chitēē yadxi' loj reeman lon, abi' ad za-yüntan laa reeman.

<sup>41</sup> Rēb Isaías zian guial baguiaaman xbiani Jesús, zeel baza'taman laaman.

<sup>42</sup> Per ni'czi zian, dád zien ree bēn zobjbloj bililadx Jesús. Per ad rēbt reeman loj ree bejn zian, guial rdxeb reeman yabēē ree bēnfarisew laa reeman lod ricaagdiajg reeman xtiidx Dios, <sup>43</sup> din mazri rēn reeman guiēn ree bejn laa reeman, guial guiēn Dios laa reeman.

#### Rniee Jesús zi'c rniabee xDadaman

<sup>44</sup> Gunee Jesús rejs rēbaman:

—Bēn rliladx naj, ad najtzan rliladxaman, nē da Dadan bēn guxhaal naj.

<sup>45</sup> Bēn ruguaa naj, nē bēn guxhaal naj ruguaaman. <sup>46</sup> Naj naj bajl, bialan loj guidxliuj guie, chitēē yaya'n ree bēn rliladx naj loj xcay. <sup>47</sup> Bal chu guien da diidxan abi' ad zuzoobtaman laan, ad najt gudēd laaman casti, din ad bialtan din gudēdan casti, bialan din yabēn laa reeman loj dol. <sup>48</sup> Bēn ad rēnt naj ad rucaagdiajg tēētaman da diidxan, mal yu' ni gudēd laaman casti: diidx ni rēn, laan gudēd laaman casti chi guidxin dxej. <sup>49</sup> Din ad ni rbēguictan rnien. Da Dadan, Bēn guxhaal naj rniabee ni ganen ni gulü tēēn, <sup>50</sup> zeel ragbeen, ni rniabee da Dadan runee guialnaban tiblayaa. Zianan zeel ni rnin rulūnan zi'c rniabeeman.

#### Gudiib Jesús guia' ree xbejnman

**13** Guixiezi gal lanij pascw. Ma rag-bee Jesús guial ma bidxin hor gusa'nman guidxliuj guie din yaguiaj

loj xDadaman. Zianczi guyēn ree xbejnman, bēn riga' ree loj guidxliuj, rēnman laa reeman goctēēz. <sup>2-4</sup> Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree bēn gugüjt laaman. Ragbee Jesús guial badēēd xDadaman gra guialrniabee lojman, laa tēeman guxhaal laaman, zeel yaguiajman lod za'man. La'tgaj cayaw reeman, bisuman xan mex, gulēeman tijb lajd najcwaman luya, dxel cwa'man tijb tuay guxhii xizaman. <sup>5</sup> Abi' badxe'man nijs loj tijb xijg, guzulojman caguiibaman guia' ree xbejnman, cucwiidx tēeman laan con tuay naxii xizaman. <sup>6</sup> Chi bayal quiibaman guia' Simón, bēn rniee reeman Bēd, rēbaman loj Jesús:

—Dad, ¿luj quiib guia'n ya?

<sup>7</sup> Badxi'man laan rēbaman:

—Ad rignia'til ni cayūnan yan, per qui chignia'rilan.

<sup>8</sup> Zeel rēb Bēd lojman:

—Ad zatiēēbtan quiibil guia'n.

Abi' rēb Jesús:

—Bal id zaguiiban guia'l, ad zile'tri gaquil da bejnan.

<sup>9</sup> Zeel rēb Bēd lojman:

—Dad, ad bal guia'zan quiibil, gudiib nē yan con guican.

<sup>10</sup> Badxi'man laan rēbaman:

Bēn goznejz guia'zaman riaadx chēd, din guidibaman naya. Abi' lējt ma nayadi, majsi ad gratidi.

<sup>11</sup> Ma ragbeeman chu yayü laaman, zeel rēbaman: “Ad gratidi naya.”

<sup>12</sup> Chi gulox gudiibaman guia' reeman, bayajcw xabaman, gurejman xan mex guin zatijb, dxel rēbaman:

—¿Bignia'di ni benan ya? <sup>13</sup> Rnieedi naj Mextr nē Dad, waliquidi najn. <sup>14</sup> Bal najn Mextr nē Dad, gudiiban guia'di, ziangajc quiib guia' lasa'di. <sup>15</sup> Ma balūn lējt, din güündi zi'c benan. <sup>16</sup> Diidxliczi ganin, achut mojs naj mazri guial loj bēn rniabee laaman, achut bēn ri't naj mazri

guial loj bén rxhiaal laaman. <sup>17</sup>Bal rigni-a'di nine güün tēedan, yabaanē Dios lējt.

<sup>18</sup>Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rēban: “Bén rawnē'n tijbzi, bayejcaman contr naj.” <sup>19</sup>Ma rugojnan lējt din gagbeedi chi gac zian, din chililadxidi chu najn. <sup>20</sup>Diidxliczi ganin, bén rucaagdiajg ni rēb Bén rxhialan, najn rucaagdiajgaman, guiáad Bén rucaagdiajg da diidxan, xtiidx Bén guxhaal najn rucaagdiajgaman.

### **Bagojn Jesús chu yayü laaman**

*(Mt. 26:20-25;*

*Mr. 14:17-21; Lc. 22:21-23)*

<sup>21</sup>Chi gulox gunee Jesús zian, dád guyunayaman, dxel rēbaman loj reeman zagdxe:

—Diidxliczi ganin, tijb lējt yayü naj loj ree Bén gugüjt naj.

<sup>22</sup>Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. <sup>23</sup>Tijb Bén guyën da'taman zojb cwē'man, hor zii chi cayaw reeman xche, <sup>24</sup>dxel been Béd sen lojman din guiniabdiidxaman chunin ruza't Jesús. <sup>25</sup>Zeel mazri gubigaman cwē' Jesús gunabdiidxaman, rēbaman:

—Dad, ¿chunin?

<sup>26</sup>Badxi' Jesúsán rēbaman:

—Gugajdxan ta'n guiadxtil, din loj xin gudēdanan, laaxan yayü naj.

Dxel bagajdxaman ta'n guiadxtil badēeman laan loj Judas, xi'n Simón Iscariote. <sup>27</sup>Chi gudawixan, laa guyu gajc xindxab luxdoox. Zeel rēb Jesús lojx:

—Ni güünl, cari beenan.

<sup>28</sup>Per achutzzi ree Bén zojb xan mex guin bignia' chexc zeel rēbaman zian. <sup>29</sup>Guial ca' Judas bols ni yu' milia, zeel naladx garol reeman rēb Jesús lojx din chisiix ni gaw reeman lanij guin o gudēdix ta'n nan loj ree Bén rzagdiaj ya.

<sup>30</sup>Chi ma gudawix guiadxtil guin, dxel briix, ma guxhin.

### **Gunabee Jesús tijb nicüb**

<sup>31</sup>Chi ma brii Judas, rēb Jesús loj ree xbejnman:

—Yan guien xguialrniabee Bén guxhaal Dios din gagbee ree bejn xhien-aag naj guialrniabee gudēē Dios lojman. <sup>32</sup>Din bal guliüü Bén guxhaal Dios xguialrniabee Dios, ziangajc guliüü Dios xguialrniabeeman, zeel ma gudēēdaman laan. <sup>33</sup>Xi'n, ad zien dxejtri gazunē'n lējt, yaguilidi naj, per zi'cgajc rēn loj ree bejn, ziangajc ganin lojdi yan: Ad zajct chedi lod gan. <sup>34</sup>Ganin tijb nicüb ganabeen: Gol guyën lasa'di zi'c rēnan lējt. <sup>35</sup>Bal guiën lasa'di, zian gagbee gra bejn guial najdi da bejnman.

### **Guiëb Béd ad nünbeetaman Jesús**

*(Mt. 26:31-35;*

*Mr. 14:27-31; Lc. 22:31-34)*

<sup>36</sup>Gunabdiidx Béd loj Jesús rēbaman:

—Dad, ¿ban chel?

Zeel rēb Jesús:

—Ad zajct guidnalil naj lod gan yan, per zadxin dxej guidnalil naj.

<sup>37</sup>Zeel rēb Béd:

—Dad, ¿chexc zeel ad zajct guidaalan lüj yan? Xt zajc guiëtan por lüj.

<sup>38</sup>Badxi' Jesúsán rēbaman:

—¿Walil ya rēnl guiëtil por naj? Diidxliczi ganin, chi gad guid cwidxa', mal rēbil choon volt, ad nünbeetil naj.

### **Jesús naj nejz guidxinnē bejn loj Dios**

**14** Rēb tēē Jesús:  
—Ad rudi xgab. Gol bililadx Dios, gol bililadx tēē naj. <sup>2</sup>Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. <sup>3</sup>Chi ma benchaawan luar guin, dxel yaguialan guidgaxin lējt din sudi lod gazun. <sup>4</sup>Ma nünbeedi nejz zē lod gan.

<sup>5</sup> Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

<sup>6</sup> Badxi'man laan rëbaman:

—Naj naj nejz, najn diidxli, naj tëën guialnaban. Tijbzi naj zajc chinë' bejn ree loj da Dadan. <sup>7</sup> Bal nünbeedi naj, në da Dadan güünbeedi. Per ma nünbeedi laaman diidz yan, din ma baguiaadi laaman.

<sup>8</sup> Dxel rëb Felip:

—Dad, baneer mod majsi yaguiaazan bën naj xDadil.

<sup>9</sup> Badxi'man laan rëbaman:

—Felip, ma gojc xchej za'në'n lëjt. ¿Nid wayünbeel naj ya? Din bën ruguiaa naj, da Dadanan ruguiaaman. ¿Chexc zeel nal gunen mod guguiaal da Dadan? <sup>10</sup> ¿Nid rililadxil ya, naj za'në' da Dadan, guiáad laaman za'në' naj? Ni rnin lojdi, ad rbëguictanan. Da Dadan, bën nabannë'n, laaman rüjn dxiin guin. <sup>11</sup> Gol bililadx naj za'në' da Dadan, guiáad laaman za'në' naj. Balgui majsi ni rünzan gol bililadx. <sup>12</sup> Diidxliczi ganin: Bén rililadx naj, nëgajcaman güün ni rünan, güünman ni mazri narooob, din naj yaya' lod za' da Dadan. <sup>13</sup> Graczi ni guiniabidi lojman por naj, güünanan din gulün xguialrniabeeman. <sup>14</sup> Günan xhietëez ni guiniabidi.

### Guixhiaal Jesús xSprijtaman

<sup>15</sup> 'Bal rëndi naj, gucaagdiajguidi ni balün. <sup>16</sup> Din guië loj da Dadan guixhiaalaman Sprijt sunë lëjt, <sup>17</sup> Sprijt gulüü diidxli, din zianczi sunëman lëjt. Bén ad rililadxt ree Dios ad zajct tia' reeman Sprijt guin, din ad ruguiaat reeman ad nünbee tëet reeman laaman. Per lëjt nünbee laaman, din sunëman lëjt yaya'n tëëman luxdoodi tiblayaa. <sup>18</sup> Ad zusa'n-tan xtijbidi, yaguialan stijb guidganan lëjt. <sup>19</sup> Sta'nz riaadx ad zuguiaatri ree bénguidxliuj naj, per lëjt guguiaadi naj, guibandí din nabanán. <sup>20</sup> Dxej zii ree,

gagbeedi za'në' da Dadan, lëjt za'në' naj, guiáad naj za'në'n lëjt zianczi. <sup>21</sup> Bén rucaagdiajg ni rniabeen rüjn tëëman laan, walicaman rënman naj. Guiën da Dadan bën rën naj, në naj guiën laaman din güünbeeman naj.

<sup>22</sup> Gunabdiidx Judas (ad bën bayüt Jesús) rëbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

<sup>23</sup> Badxi' Jesúsán rëbaman:

—Bén guiën naj guzoobaman da diidxan, guiën da Dadan laaman, guiáad naj guidnë' da Dadan din yabajnnë'n laaman. <sup>24</sup> Bén ad zënt naj ad zuzoobtanman da diidxan, din diidx cucaagdiajguidi yan ad da diidxtanán, xtiidx da Dadanan bën guxhaal naj.

<sup>25</sup> 'Canin lojdi gra nine, la'tgaj za'në'n lëjt. <sup>26</sup> Per xSprijt Dios, bën sunë lëjt zianczi, bën guixhiaal da Dadan por naj, graczi gulüüman lëjt din gusaaladxidi ni canin.

<sup>27</sup> 'Chi yaya'n, yabecdxen luxdoodi, gunen guialnaza'c lojdi, ad zi'c runeet ree bénguidxliuj, ad bal ru nayadi ad rdxebe tëëdi. <sup>28</sup> Ma rnin lojdi, yaya'n, dxel yaguialan zatijb. Bal walidi rëndi naj, chu' luxdoodi zagdxé, guial gagbeedi yaya' loj da Dadan, din mazri zobjlojman guial lon. <sup>29</sup> Ma rugojnan lëjt, din chi gac zian, chililadxidi.

<sup>30</sup> 'Ad zro'tri ganenë'n lëjt, din ma zëed xin rniabee guidxliuj, majsi ad nët naj rniabeex. <sup>31</sup> Per zian gac din gagbee ree bénguidxliuj, rënan da Dadan, zeel rünan ni rniabeeman. Gol bisu, yo' ree yan.

### Rën Jesús yadxu'në' reeman zianczi

**15** Basnuu rëb Jesús:  
—Naj naj zi'c yag rtia ni nejx zagdxé, guiáad da Dadan naj zi'c bën rxübin laan. <sup>2</sup> Da bejn reen naj zi'c ree xidx yag guin. Bal id rtia reen gutüüg da



Dadan laa reen. Per bal rtia reen, gusia-man laa reen din tia reen mazri. <sup>3</sup>Lëjt ma nayadi, guial basia diidx rnin lëjt. <sup>4</sup>Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güüindi ni rën Dios bal id za'nëdi naj.

<sup>5</sup>Naj naj zi'c yag rtia ni nejxh, guiáad lëjt naj zi'c xidxn. Bén sunë naj zianczi nuchajgaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güüindi. <sup>6</sup>Bén ad zazujnët naj guizëebaman zi'c yagbidx ruto'p reeman, din che'can.

Rëb tää Jesús:

<sup>7</sup>—Bal za'nëdi naj tijbzi ruzoob täädi da diidxan, gol gunab ni rëntzidi, din tia'dan. <sup>8</sup>Bal güüindi ni rën da Dadan, gaquidi quijb da bejnan, din guza't ree bejn laaman zagdxe. <sup>9</sup>Rënan lëjt zi'c rën da Dadan naj, gol basaaladx rënan lëjt. <sup>10</sup>Bal guzoobidi da diidxan, gusaaladxidi rënan lëjt, zi'cgajc ruzoban xtiidx da Dadan, ragbeen rënman naj.

<sup>11</sup>'Rnin lojdi zian din chu' luxdoodi zagdxe zi'c yu' luxdon zagdxe, zagdxe da't chu' luxdoodi. <sup>12</sup>Gol guyën lasa'di zi'c rënan lëjt, laan rniabeen güüindi. <sup>13</sup>Achut rën xmiw mazri guial loj Bén rëjt por laa reeman. <sup>14</sup>Lëjt naj da miwan bal güüindi ni rënan. <sup>15</sup>Ad zanetran lëjt mojs, din mojs ad ragbeetaman xhie rüjn Bén rniabee laaman. Ganen lëjt miw, din balün lëjt graczi ni na da Dadan lon. <sup>16</sup>Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeman graczi ni guini-abidi por naj. <sup>17</sup>Rniabeen: Guiën lasa'di.

### Ralen ree bejn Jesús con ree xbejnman

<sup>18</sup>Rëb tää Jesús:

—Bal ralen ree bénguidxliuj lëjt, gol basaaladx, yaloj naj balen reeman. <sup>19</sup>Bal najquidi bénguidxliuj, niën reeman lëjt

zi'c rën lasa' reeman. Per naj gule lëjt loj reeman, zeel ralen reeman guial ad najtidi bénguidxliuj. <sup>20</sup>Gol basaaladx ni rnin: “Achut mojs naj mazri guial loj Bén rniabee laaman.” Bal basagzi reeman naj, ziangajc gusagzi reeman lëjt, bal bazoob reeman da diidxan, ziangajc guzoob reeman xtiidxidi. <sup>21</sup>Graczi nine güünnë reeman lëjt por naj, din ad nünbeet reeman Bén guxhaal naj.

<sup>22</sup>'Achet xtol reeman niu, bal idan nial ninienë'n laa reeman, per yan yu' xtol reeman. <sup>23</sup>Bén ralen naj, nëgajc da Dadan ralenman. <sup>24</sup>Achet xtol reeman niu, bal idan nün ree ni benan loj reeman ni achutzzi wayüjn, per ma baguiaa reeman laa reen, majsi zian ralen gajc reeman naj në da Dadan. <sup>25</sup>Per rajc zian din gac cumplid ni ca loj xley reeman, rëban: “Achet rünan ralen reeman naj.”

<sup>26</sup>'Per chi gui't Sprijt gaxhalan din sunëman lëjt gülüü tääman diidxli, Sprijt zëed loj da Dadan, laaman gü da diidxan. <sup>27</sup>Nëgajc lëjt gü laan, din diizd yaloj za'nëdi naj.

**16**'Rnin zian, din ad zabëjzt chililadxidi naj. <sup>2</sup>Yabëë reeman lëjt lod ricaagdiajg reeman xtiidx Dios, zadxin dxej, chutëëz Bén gugüjt lëjt naladx reeman Dios cayüjn reeman wen. <sup>3</sup>Güün reeman zian din ad nünbeet reeman naj ni'qui da Dadan. <sup>4</sup>Per ma rnin lëjt, din chi guidxin dxej guin gusaaladxidi guial ma bagojnan lëjt.

### Ni rüjn xSprijt Dios

'Ad rnitán lojdi zian diizd yaloj, din naj guzunë'l lëjt. <sup>5</sup>Per yan yaya'n loj Bén guxhaal naj. Achutzzidi rniabdiidx ban gan, <sup>6</sup>aal yu'nayadi guial canin zian. <sup>7</sup>Per diidxliczi rnin: zagdxe najn yaya'n. Din bal idan yaya', ad zi'tt xSprijt Dios sunë lëjt, per bal yaya'n, naj gaxhal laaman. <sup>8</sup>Chi gui'taman, laaman gülüü ree bénguidxliuj ni naj dol, ni naj ni za-

gdxe, në xguialguxtis Dios. <sup>9</sup> Gagbee reeman yu' xtol reeman, guial ad rliadxt reeman naj. <sup>10</sup> Ni zagdxé guin naj guial yaya' loj da Dadan din ad zuguaatrídi naj. <sup>11</sup> Guiáad Dios ma been xguialguxti-saman con xindxab rniabee guidxliuj.

<sup>12</sup> Yu'ri ni rēnan ganin, per dád zien gacan par lējt. <sup>13</sup> Chi gui't Sprijt guluü lējt diidxli, din ad züt xtiidx gajcaman, guinieeman graczi ni guienman, laaman guluü lējt ni gac. <sup>14</sup> Guza'taman naj zagdxé, din naj gudēd ni guluüman lējt. <sup>15</sup> Graczi ni rajp da Dadan naj par naj, zeel rnin, Sprijt guin tia' ni gudēdan din guluüman laan lējt.

### Guguaa ree xbejn Jesús laaman zatijb

<sup>16</sup> Ma guidxin dxej ad zuguaatrídi naj, per ad zajct xchej, guguaadi naj stijb.

<sup>17</sup> Chi rēb Jesús zian, dxel guzuloj ree xbejnman canabdiidx loj lasa' reeman, rēb reeman:

—¿Chexc zeel naman, ma guidxin dxej ad zuguaatri reeman, per ad zajct xchej, yaguaa reeman stijb, din yaguaiaj loj xDadaman? <sup>18</sup> ¿Chexc zeel naman: “Ad zajct xchej”? Ad rayignia't ree ni caneeman.

<sup>19</sup> Gogbee Jesús guial rēn reeman guiniabdiidx reeman, zeel rēbaman:

—Ma rnin lojdi, ma guidxin dxej ad zuguaatrídi naj, per ad zajct xchej, guguaadi naj stijb. ¿Ni nen canabdiidx-idi ya? <sup>20</sup> Diidxli ganin, goondi chu' tēē luxdoodi naya, guiáad ree bénguidxliuj yabaa reeman. Per majsi chu' luxdoodi naya, guidxin dxej yabaadi. <sup>21</sup> Chi gal xi'n béngunaa, rdēdaman tarbajw, din ma bidxin hor guin. Per chi ma gojl xi'n-man, dxel rayanladxaman tarbajw guin, ru luxdoooman zagdxé, guial ma gojl xi'n-man. <sup>22</sup> Ziangajc lējt cadēdidi tarbajw yan, per chi guguaian lējt zatijb, chu' lux-

doodi zagdxé, achutczi zajc yabēē laan luxdoodi.

<sup>23</sup> Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeman. <sup>24</sup> Guiáad yan achet wanabidi por naj, gol gunaban din tia'dan, din chu' luxdoodi zagdxé tiblayaa.

### Yaguaiaj Jesús lod guzaman

<sup>25</sup> Rēb tēē Jesús:

—Rnin nine ree zi'c cwent, per zadxin dxej ad zulütran zian, gusignia'n lējt zagdxé xcwent da Dadan. <sup>26</sup> Dxej zii ree guiniabidi loj da Dadan por naj, ad rüjnt naguiejn ganaaban por lējt lojman, <sup>27</sup> din rēnman lējt, rēnman lējt guial rēndi naj rliadxt tēēdi guial laaman guxhaal naj. <sup>28</sup> Briin lod za' da Dadan persi bialan loj guidxliuj guie, yan gusa'n'an laan din yaya'n lojman.

<sup>29</sup> Dxel rēb ree xbejnman:

—Yanri ma cusignia'l zagdxé. <sup>30</sup> Rayagbeen rajquil graczi, ad rüjnt naguiejn chu guiniabdiidx lojl. Zianan zeel raliduladxan guxhaal Dios lüj.

<sup>31</sup> Badxi' Jesús laan rēbaman:

—¿Ma rliadxidi yan ya? <sup>32</sup> Gol gogbee, ma bidxin hor yare'chidi, tijb gajdi yaguaiaj lidx, gusa'ndi da xtijban. Per ad za't da xtijban, da Dadan za'nē naj. <sup>33</sup> Rnin gra nine din cwedi zagdxé guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

### Gurejdx gunab Jesús xDadaman por ree xbejnman

**17** Chi gulox rēb Jesús zian loj ree xbejnman, dxel baguaaaman xanyabaa rēbaman:

—Dad, ma bidxin hor, balüü da guialrniabeen din gulün xguialrniabeel. <sup>2</sup> Baneel guialrniabee lon din ganabeen gra bejn gudēd tēēn guialnaban tiblayaa loj gra bēn baneel. <sup>3</sup> Guiban reeman

tiblayaa bal güünbee reeman lüj, tijbzi lüj naj quijb Dios, güünbee tää reeman najn guxhaalil.

<sup>4</sup>Naj bazat lüj zagdxe loj guidxliuj; yan ma gulox benan ni nal. <sup>5</sup>Yan, Dad, yaguialan lojl, din yaneel gualrniabee ca'n gocli, diizd chi gad guidxliuj gacchaaw.

<sup>6</sup>Rëb tää Jesús:

—Bén gulel loj guidxliuj baneel lon, ma balün laa reeman chu lüj. Gojc reeman xbejnl, per baneel laa reeman lon, ma bazoob reeman xtiidxil. <sup>7</sup>Yan ma gogbee reeman guial gra ni benan gra tää ni balün naj xieenl. <sup>8</sup>Gunen xtiidxil ni baneel, zeel bacaagdiajg reeman laan, gogbee reeman, walican lojl guzaan, bililadx tää reeman lüj guxhaal naj.

<sup>9</sup>Rbedx rniaaban lüj por laa reeman, guial naj reeman xbejnl baneel tää laa reeman lon, ad rbedx rniaabtan por ree bénguidxliuj. <sup>10</sup>Gra ni ca'n naj xieenl, guíaad gra ni ca'l naj da xieenan, ma rguien da gualrniabeen por ree bén baneel.

<sup>11</sup>Ad zazutran loj guidxliuj, per laa reeman suri reeman guie, guíaad naj yazaan din yaguialan lod za'l. Dad, lüj naj bén naya nali, gunaj reeman con gra gualrniabee ca'l ni baneel tää lon, din gac reeman tijbzi zi'c nayajc. <sup>12</sup>Chi guzunë'n laa reeman loj guidxliuj, gunan laa reeman con xgualrniabeel ni baneel. Achut reeman bizëeb, tijbzi xin ma naj diidx bizëeb, din gac cumplid ni ca loj xtiidxil.

<sup>13</sup>Yan yaguialan lod za'l, per canen zian la'tgaj za'n loj guidxliuj guie, din chu' luxdoo reeman zagdxe, zi'c yu' luxdon zagdxe. <sup>14</sup>Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj. <sup>15</sup>Ad rniaabtan yabëel laa reeman loj guidxliuj, rënan guinal laa

reeman, chitëe güün reeman ni mal. <sup>16</sup>Ad najt reeman bénguidxliuj, zi'cgajc naj. <sup>17</sup>Basia reeman con xtiidxil, din laan naj ni diidxli. <sup>18</sup>Zi'c guxhaalil naj loj ree bénguidxliuj, ziangajc rixhial ree da bejnan loj reeman. <sup>19</sup>Por laa reeman rudëd da gualnabanan din gac reeman xbejnl diidxliczi.

<sup>20</sup>Basnuu Jesús, rëbaman:

—Ad por laatzij reeman rbedx rniaaban lüj, në por ree bén chililadx chi gucaagdiajg reeman ni guinee reeman. <sup>21</sup>Rniaaban lojl din guchajg lasa' reeman din yayajcnë' reeman tijbzi, Dad, zi'c za'në'l naj ziangajc za'në'n lüj, ziangajc sunë lasa' reeman. Din chililadx ree bejn lüj guxhaal naj. <sup>22</sup>Badëdan gualrniabee baneel loj reeman, din gac reeman tijbzi zi'c nayajc, <sup>23</sup>naj za'në' laa reeman, guíaad lüj za'në'l naj. Zeel gac reeman tijbzi din gagbee ree bejn, lüj guxhaal naj rën tää laa reeman zi'c rën naj.

<sup>24</sup>Dad, lüj baneel laa reeman lon, zeel rënan su reeman lod gazun din guguiaa reeman biani baneel lon, din guyën naj diizd chi gad guidxliuj gacchaaw. <sup>25</sup>Dad, lüj rüjn gualguxtis zagdxe. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj. <sup>26</sup>Balün laa reeman chu najl, gulüran laa reeman mazri, din gagbee reeman rën laa reeman zi'c rën naj, gazunë' tään laa reeman.

### Bayü Judas Jesús

(Mt. 26:47-56;

Mr. 14:43-50; Lc. 22:47-53)

**18** Chi gulox gunee Jesús zian, dxel briinë ree xbejnmán, zë reeman stiblad ro' guiiw la Cedrón, bidxin reeman lod yu' ree yag. <sup>2</sup>Në Judas, xin yayü laaman, nünbee yagaj, guial zien volt binëman laa reeman ni. <sup>3</sup>Zeel bidxinnëx tibcwaa ree suldad në ree bén rajp ro' yadoo, guxhaal quijb ree bixhioz laa ree-

man në ree bénfarisew, ca' reeman bajl rusni ree, në ree espad con ree lans. <sup>4</sup> Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguiilidi?

<sup>5</sup> Badxi' reeman laan rëb reeman:

—Jesús bën Nazaret.

Abi' rëbaman loj reeman:

—Najn.

Judas xin bayü laaman bidxinnë laa reeman. <sup>6</sup> Chi rëbaman loj reeman: “Najn”, dxel baguiadruxan reeman biajb reeman luyuj. <sup>7</sup> Gunabdiidxaman zatijb rëbaman:

—¿Chu raguiilidi?

Rëb reeman:

—Jesús bën Nazaret.

<sup>8</sup> Zeel rëbaman:

—Ma rnin, najn. Bal naj raguiilidi, gol baslaa ree bën guie yaguiaj reeman.

<sup>9</sup> Zian gojc cumplid ni rëb loj xDadaman: “Achut ree bën baneel lon bizëëb.” <sup>10</sup> Dxel gulëë Bëd espad, gutü'man guidiajg ladbee xin la Malco, najx xmojs quijb bixhioz zobjloj. <sup>11</sup> Dxel rëb Jesús loj Bëd:

—Bagu'chaaw espad zii. Bal rën da Dadan gazaagdiajn zian, gaza'canan.

### Biniaaz Jesús

(Mt. 26:57-58; Mr. 14:53-54; Lc. 22:54)

<sup>12</sup> Suldad guin ree con xin rniabee laa reex con ree bën rajp ro' yadoo gunaaz reeman Jesús, guxhii reeman laaman. <sup>13</sup> Dxel binë reeman laaman yaloj lidx bën la Anás, din laaman naj xdadsuegr Caifás quijb bixhioz zobjloj loj ijz zii. <sup>14</sup> Laagajcaman rëb loj gabilt, mazri zagdxe guiët tijbzi bejn por gra ree bën Israel.

### Rëb Bëd ad najtaman xbejn Jesús

(Mt. 26:69-70;

Mr. 14:66-68; Lc. 22:55-57)

<sup>15</sup> Tio'p ree xbejn Jesús binal laaman. Tijbaman la Simón, bën rniee reeman

Bëd, stijbaman naj bën nünbee quijb bixhioz zobjloj, zeel guyunëman Jesús lënü guin, <sup>16</sup> guiáad Bëd baya'nman lule'. Zeel barii bën nünbee bën rniabee ree bixhioz, guneenëman biin rajp ro' port guin, persi guyu Bëd lënü. <sup>17</sup> Gunabdiidxim lojman rëbim:

—¿Nid lüjn naj tijb xbejn bën guin ya?

Badxi'man laan rëbaman:

—Ad najtan.

<sup>18</sup> Per guial dád nayaag, zeel bën naj ree mojs con ree bën rajp ro' yadoo nabe'c reeman guij rucha' reeman. Në-gajc Bëd cucha'në reeman rudëj guin.

### Gunabdiidx Anás loj Jesús

(Mt. 26:59-66;

Mr. 14:55-64; Lc. 22:66-71)

<sup>19</sup> Guzuloj bën la Anás canabdiidxaman loj Jesús xcwent ree xbejnman në xcwent ni rulüüman. <sup>20</sup> Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lën dux yadooro' ree, lod rado'p dugra ree. Achet ni gunen ralan. <sup>21</sup> ¿Chexc zeel rniabdiidxil lon? Gunabdiidx loj ree bën bacaagdiajg ni rën, laa reeman na xhie gunen, laa reeman ragbee.

<sup>22</sup> Chi rëbaman zian, tijb bën rajp ro' yadoo guin wëëz ro'man, rëbaman:

—¿Zian yadxi'l xtiidx bën rniabee guin ya?

<sup>23</sup> Badxi' Jesús laan rëbaman:

—Bal xhie ni mal rën, guna xhienin. Per bal gunen zagdxe, ¿chexc zeel rguinl naj?

<sup>24</sup> Dxel guidib naxiiman guxhaal Anás laaman loj Caifás, bën naj quijb bixhioz zobjloj.

### Rëb Bëd stijb ad nünbeetaman Jesús

(Mt. 26:71-75;

Mr. 14:69-72; Lc. 22:58-62)

<sup>25</sup> Per Bëd sta za'man cucha'man rudëj guin. Abi' gunabdiidx reeman lojman, rëb reeman:

—¿Nid në lüj naj tijb ree xbejn bén guin ya?

Badxi' Béd laan rëbaman:

—A'n, ad xbejtaman naj.

<sup>26</sup> Dxel tijb xmojs bixhioz zojbloj guin, bén naj lasa' bén gutü' Béd guidaiajg, rëbaman loj Béd:

—¿Nid lüjn baguian ya za'nël laaman guia' ree yag olivos?

<sup>27</sup> Rëb Béd stijb guial ad nünbeetaman Jesús, loj hor zii gajc guridxa' tijb guj.

### Binë reeman Jesús loj Pilato

(Mt. 27:1-2, 11-14;

Mr. 15:1-5; Lc. 23:1-5)

<sup>28</sup> Chi bani luyuj, bazanë reeman Jesús lidx Caifás, zinë reeman laaman lën xpalas gobernador Pilato. Per ree bén Israel guin ad guyut reeman lën palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw. <sup>29</sup> Zeel brii Pilato persi guneenëman laa reeman, rëbaman:

—¿Xhie been xin guie zeel zidnëdi laax guie?

<sup>30</sup> Badxi' reeman laan rëb reeman:

—Bal najman benza'c, ad ziant nudnë'n laaman lojl.

<sup>31</sup> Dxel rëb Pilato:

—Gol bignëx, gol been guialguxtis zi'c naj xleydi.

Abi' rëb reeman:

—Per ad naca'tan guialrniabee yanabeen guiët bejn.

<sup>32</sup> Zian gojc cumplid xtiidx Jesús chi bagojnman xhienaag guiëtaman. <sup>33</sup> Bayu Pilato lën palas guin, dxel gurejdxaman Jesús, gunabdiidxaman lojman rëbaman:

—¿Lüj naj xrey ree bén Israel ya?

<sup>34</sup> Badxi' Jesúsán rëbaman:

—¿Lüjczri rniabdiidx lon ya o yu' ree ben ren na lojl zian?

<sup>35</sup> Badxi' Pilato laan, rëbaman:

—¿Wen bén Israel naj ya? Bén ladx gajc reel con ree bixhioz rniabee bidnë lüj lon. ¿Xhie beenl?

<sup>36</sup> Badxi' Jesúsán rëbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan bén nidijl ree chitëë niniaaz ree ben Israel naj. Per yan ad lojt guidxliuj guie za da guialrniabeen.

<sup>37</sup> Dxel rëb Pilato lojman:

—¿Zë loj diidxan ya rey najl?

Badxi' Jesús laan rëbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bén zinal ni diidxli rucaagdiajg reeman ni rnien.

<sup>38</sup> Dxel rëb Pilato:

—¿Xhiezanin naj diidxli?

### Gunabee reeman guiët Jesús

(Mt. 27:15-31;

Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman bén Israel ree stijb, rëbaman:

—Achet xguialquia xin guin radxejlan.

<sup>39</sup> Per lëjt, xcostumbridi naj guial loj lanij pascw laa tijb bén yu' ladxguiib. Yan, ¿rëndi ya guslaan xreydi?

<sup>40</sup> Dxel gurixdiaj ree bén Israel guin, rëb reeman:

—¡Ad laataman guslaal! ¡Zagdxeli baslaa Barrabás!

Abi'za Barrabás guin béngubanaan.

**19** Dxel gunabee Pilato gudijn ree suldad Jesús. <sup>2</sup> Abi' beenchaaw reeman coron guiëjch, badxe' reeman laan guijcaman, bascajcw reeman laaman tijb lajd xniaya's. <sup>3</sup> Dxel gubig reeman lojman, rëbgaj reeman:

—¡Guibanri xrey ree bén Israel!

Dxel rëëzgaj reeman lojman.

<sup>4</sup> Brii Pilato stijb, abi' rëbaman loj ree bén Israel guin:

—Gol baguiaa, gabën laax din gag-beedi, achet xguialquiaux radxejlan.

<sup>5</sup>Dxel brii Jesús, yu' coron guiëjch guin guijcaman, najcw tëëman lajd xnia guin. Abi' rëb Pilato:

—Laax guie.

<sup>6</sup>Dxel bixhioz rniabee ree në ree bën rajp ro' yadooro' Jerusalén, chi baguiaa reeman laaman, guzuloj rbixdiaj reeman, rëb reeman:

—¡Bacaax loj crüjz! ¡Bacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtolix radxejlan.

<sup>7</sup>Badxi' reeman laan rëb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

<sup>8</sup>Chi biguienman ni rëb reeman, mazri bidxebaman. <sup>9</sup>Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan. <sup>10</sup>Zeel rëb Pilato:

—¿Nid zadxi'l ni rnin ya? ¿Nid rag-beel ya ca'n guialrniabee din gucan lüj loj crüjz o guslaan lüj ya?

<sup>11</sup>Dxel rëb Jesús:

—Achetczi guialrniabee nitia'l bal id Dios nunee laan. Zianan zeel mazri zien xtol bën bidnë naj guie yu' guial lojl.

<sup>12</sup>Diizd hor zii gajc raguuil Pilato mod, xhienaag guslaaman Jesús, per rbidxa' ree bën riga' yagaj, rëb reeman:

—¡Bal guslaal laax, ad najtil xmiw bën naj César! ¡Din chutëëz bën rajc rey rzuj contr César!

<sup>13</sup>Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën guiëban Lod yu' ree guiaj. <sup>14</sup>Chi guixiez gal lanij pascw, cost garol dxej rëb Pilato loj ree bën Israel:

—¡Laa xreydi guie!

<sup>15</sup>Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

<sup>16</sup>Dxel bayü Pilato leesan Jesús loj ree suldad din gucaa reex laaman loj crüjz, dxel zinë reex laaman.

### Cwa Jesús loj crüjz

(Mt. 27:32-44;

Mr. 15:21-32; Lc. 23:26-43)

<sup>17</sup>Briinë reex Jesús, nüüman crüjz, binë reex laaman lod la Calaver, diidx hebreo lan Gólgota. <sup>18</sup>Ni bacaa reex laaman loj crüjz con zatio'p ree bejn, tijb gaj reeman ca cwë'man. <sup>19</sup>Gunabee Pilato cwa lejtr guijc crüjz guin, rëban: “Jesús bën Nazaret, xrey ree bën Israel.” <sup>20</sup>Dád zien ree bën Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg. <sup>21</sup>Rëb ree bixhioz rniabee ree bixhioz loj Pilato:

—Ad rucaal: “Xrey ree bën Israel”, bacaa: “Bën rëb naj xrey ree bën Israel.”

<sup>22</sup>Badxi' Pilato laan rëbaman:

—Ni ma bacan yaya'n'an zian.

<sup>23</sup>Chi gulox bacaa ree suldad guin Jesús loj crüjz, baca' reex xabaman, gudixya' reexan tajp la', dxel cwa' reex tib la' gajn. Në stijb xabaman cwa' reex, ad nadiibtan, najcchaaw diizd yëjnan xt guia'n, najn tijbzi lajd. <sup>24</sup>Zeel rëb loj lasa' reex:

—Ad zarooxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: “Bala' reeman da xaban, gudxijt tëë reeman suert guijcan.” Zeel been ree xinsuldad guin zian.

<sup>25</sup>Gajxh cwë' crüjz ca Jesús za' xniaaman con xbël xniaaman con Li xbëngunaa Cleofas con Li bën gunee reeman Magdalena. <sup>26</sup>Chi baguiaa Jesús xniaa-

man, za' tijb ree xbejnman cwë'man, bën rën da'taman, rëb loj xniaaman:

—Na, laa xi'nl yagaj.

<sup>27</sup> Dxel rëb loj xbejnman:

—Laa xniaal yagaj.

Diisd dxej zii bignëman xniaa Jesús lidxaman.

### Güjt Jesús

(Mt. 27:45-56;

Mr. 15:33-41; Lc. 23:44-49)

<sup>28</sup> Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

<sup>29</sup> Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man. <sup>30</sup> Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

### Guliiz tijb suldad guiib cwë'lën Jesús

<sup>31</sup> Ma cayüjn ree bën Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüjz dxej raziiladx reeman, din dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bën ca loj crüjz din guiët reeman yalet tëë reex laa reeman. <sup>32</sup> Zeel wej reex. Yaloj gudi'ch reex xdxijt bën ca cwë' Jesús, dxel gudi'ch reex xdxijt bën ca stiblad cwë'man. <sup>33</sup> Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

<sup>34</sup> Per tijb suldad guin guxhal ladaman con guiib ca'x, dxel briin rejn con nijs. <sup>35</sup> Bën rü diidx guie baguiaaman, zeel ragbeeman najn diidxli, rüman laan din në lëjt chililadx. <sup>36</sup> Gra nine gojc din gac cumplid ni ca loj xtiidx Dios, rëban: “Ad rayalt gach xdxijt xiildoo.” <sup>37</sup> Stibljajt

rëb: “Guguaiaa reeman bën guxhálnë reeman guiib lad.”

### Biguie'ch Jesús

(Mt. 27:57-61;

Mr. 15:42-47; Lc. 23:50-56)

<sup>38</sup> Chi gulox gojc zian, wej Xiëb, bën zëëd guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Në bën la Xiëb bililadx Jesús, per ralanzi, guial bidxebaman bejn ree. Badëëd Pilato diidxbee, zeel wej Xiëb bigxiiman xcuerp Jesús. <sup>39</sup> Në Nicodemo wej, bën bigneenë Jesús tijb guxhin, bidxinnëman cost gajlbichii quil ni la mirra, no'chan aloe, rureen nejxh. <sup>40</sup> Bagajdxnë reeman laan lajd batüüb reeman laaman, zi'c rüjn ree bën Israel chi ruquie'ch reeman bengüt. <sup>41</sup> Lod cwa Jesús loj crüjz naga' tijb guidxliuj lod yu' ree yag. Yagaj naj tijb baa cüb lod achutczi waguie'ch. <sup>42</sup> Yagaj gudixh reeman xcuerpaman, guial najn gajxh, guial ma suloj tëë dxej raziiladx reeman.

### Achetri xcuerp Jesús badxejl

(Mt. 28:1-10; Mr. 16:1-8; Lc. 24:1-12)

**20** Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin. <sup>2</sup> Dxel ruxüünman wejman lod za' Simón Bëd con zatijb xbejn Jesús, bën rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

<sup>3</sup> Abi' brii Bëd con bën guin, zë reeman ro' baa guin. <sup>4</sup> Grop reeman ruxüün zë reeman. Per bën guin mazri ruxüünman guial loj Bëd, abi' yaloj laaman bidxin ro' baa guin. <sup>5</sup> Dxel gudixlojman baguiaaman vend bidüüb Jesús, per ad guyutaman. <sup>6</sup> Dxelri bidxin Simón Bëd, abi' guyuman lën baa guin. Nëgajca-

man baguiaa vend guin <sup>7</sup>Baguiaa tääman lajd bidüüb guijc Jesús, nadiüban naga'n lood ren, ad naga'tan tijbzi con vend guin. <sup>8</sup>Dxel guyu bén bidxin ro' baa guin yaløj, baguiaaman ni goc, zianz bililadxaman, <sup>9</sup>guial gocli ad bignia't reeman ni ca loj xtiidx Dios guial yaban Jesús loj ree bengüt. <sup>10</sup>Dxel zia ree xbejn Jesús lidx reeman.

### Balüüloj Jesús loj María Magdalena

(Mr. 16:9-11)

<sup>11</sup>Per Li baya'nman ro' baa guin cayoonman. La'tgaj cayoonman gudixlojman lën baa guin, <sup>12</sup>abi' baguiaaman tio'p ree anjl, najcw reeman lajd naquich, zojb reeman lod go't xcuerp Jesús, tijbaman lod go't guijcaman, zatijbaman lod go't guia'man. <sup>13</sup>Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

<sup>14</sup>Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. <sup>15</sup>Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguiilil?

Gunaladx Li, bén rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'n laaman din chigxin laaman.

<sup>16</sup>Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo:

¡Rabuni! —rën guiëban Mextr.

<sup>17</sup>Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan bén

naj gajc xDadidi, loj da Diosan bén naj gajc xDiosidi.

<sup>18</sup>Dxel wej María Magdalena bicojman xbejn ree Dad Jesús guial baguiaaman laaman, bagojn tääman laa reeman gra ni rëbaman lojman.

### Balüüloj Jesús loj ree xbejnman

(Mt. 28:16-20;

Mr. 16:14-18; Lc. 24:36-49)

<sup>19</sup>Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rëbaman loj reeman:

—Yabe'cdxe Dios luxdoodi.

<sup>20</sup>Chi ma gulox rëbaman zian, balüü yaaman loj reeman në cwë'lënman, abi' laa reeman dád babaa reeman baguiaa reeman Dad Jesús. <sup>21</sup>Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

<sup>22</sup>Dxel balüjbaman guijc reeman, rëbaman:

—Gol gubajnnë xSprijt Dios. <sup>23</sup>Bén güüindi perdon xtol, chiquied xtol reeman, guíaad bén ad züjntidi perdon xtol, yaya'nnë xtol reeman.

### Baguiaa Tumajs Jesús

<sup>24</sup>Tumajs, bén nree reeman Cwajch, achut laaman za' chi balüüloj Jesús loj ree xbejnman. <sup>25</sup>Chi rëb reeman loj Tumajs:

—Ma baguiaan Dad Jesús.

Dxel rëbaman:

—Bal id zuguiian yaaman lod wëöz clav, abi' bal id zagu' da bacwënan lod wëöz clav guin, bal id zagu' tää yan cwë'lënman lod bidxeelguijdx, ad zaliladxtan.

<sup>26</sup>Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyü yu' ree-



man. Per baliüloj Jesús galay reeman, rëbaman loj reeman:

—Yabe'cdxe Dios luxdoodi.

<sup>27</sup> Dxel rëbaman loj Tumajs:

—Badxe' xbacwën'l guie, baguiaa ree yan, banee yaal guie badxe'n cwë' lënan. Ad runawëëgril, bililadx.

<sup>28</sup> Dxel rëb Tumajs lojman:

—¡Da Dadan, da Diosan!

<sup>29</sup> Abi' rëb Jesús lojman:

—Rliladxil guial ma baguiaal naj. Xiquilbaa ree bën rliladx, majs ad waguiaat reeman naj.

### Chexc zeel cwa gui'ch guie

<sup>30</sup> Zienri ree milagr been Jesús loj ree xbejnman, ni ad cwat ree loj gui'ch guie.

<sup>31</sup> Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblayaa con Dios.

### Baliüloj Jesús loj ree xbejnman ro' nijs

**21** Chi gudëd gojc zian, baliüloj Jesús loj ree xbejnman zatijb, ro' nijs naj gajxh guiedx Tiberias. Ze baliülojman: <sup>2</sup> Chi nadxag lasa' ree Simón Bëd con Tumajs bën rniee reeman Cwajch, në Natanael bën za Caná guiedx riga' niz Galilea, con ree xi'n Zebedeo, nëtëë zatio'p xbejn Jesús, <sup>3</sup> dxel rëb Bëd loj reeman:

—Gan chignaazan bëjl.

Badxi' reeman laan rëb reeman:

—Në dunujn yadsoo.

Abi' wë'p reeman loj barcw zë reeman, per guxhin zii achutczii bëjl gunaaz reeman. <sup>4</sup> Chi ma cayreguiaal, bidxin Jesús ro' nijs guin, per ad bayünbeet reeman laaman. <sup>5</sup> Dxel gunabdiidxaman loj reeman rëbaman:

—Xi'n, ¿nid chu bëjl wanaazidi ya?

Badxi' reeman laan rëb reeman:

—Achutczii.

<sup>6</sup> Abi' rëb Jesús loj reeman:

—Gol bazaal xguijxhidi xladbee barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn. <sup>7</sup> Dxel xbejn Jesús, bën rën da'-taman, rëbaman loj Bëd:

—¡Dad Jesúsán!

Bigueijnzi Simón Bëd zian, laa got gajc xabaman ni gulëëman, abi' guti-ajsaman lojnijs guin. <sup>8</sup> Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin. <sup>9</sup> Chi baguiajt reeman, baguiaa reeman laa guij ma riga', dxiib tijb bëjl lojn, në guiadxtil riga' yagaj. <sup>10</sup> Dxel rëb Jesús loj reeman:

—Gol tanë tio'p choon bëjl gunaaz nejzidi.

<sup>11</sup> Dxel wë'p Bëd loj barcw guin, gux-oobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan. <sup>12</sup> Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guini-abdiidx chu bënan, guial ragbee reeman Dad Jesúsán. <sup>13</sup> Dxel gubigaman cwa'-man guiadxtil badëëman loj reeman, ziangajc beenman con bëjl guin. <sup>14</sup> Ni ne bayon volt baliüloj Jesús loj ree xbejnman chi babanman loj ree bengüt.

### Guneenë Jesús Bëd

<sup>15</sup> Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rënl naj mazri guial loj ree bën guie?

Badxi' Bëdan rëbaman:

—Dad, ragbeequil rënan liij.

Zeel rëb Jesús:

—Gunaj ree da xiildoon.

<sup>16</sup> Abi' rëb Jesús zatijb:

—Simón, xi'n Waj, ¿walil ya rēnl naj?

Badxi' Bēdan rēbaman:

—Dad, ragbeequil rēnan lūj.

Zeel rēb Jesús:

—Gunaj ree da xiilan.

<sup>17</sup> Bayon volt gunabdiidx Jesús rēbaman:

—Simón, xi'n Waj, ¿rēnl naj ya?

Dád guyunaya Bēd, guial ma gojc choon volt gunabdiidx Jesús bal rēnman laaman. Zianz rēb Bēd:

—Dad, lūj ragbee graczi, ragbeel rēnan lūj.

Zeel rēb Jesús:

—Gunaj ree da xiilan. <sup>18</sup> Diidxliczi ganin, chi goquil xinguiag, rajcw xabil persi rejł lod rēnl. Per chi ma najł ben-gol, gusli xu'quil din guscajcw ben ren xabil din chinē reeman lūj lod ad rēntil chel.

<sup>19</sup> Rēb Jesús zian guial basignia'man xhienaag guiēt Bēd, din güünbee ree bejn Dios. Dxel rēb Jesús:

—Tanal naj.

### Ni ne bacaa xbejn Jesús bén guyēn da'taman

<sup>20</sup> Chi badxi' loj Bēd, baguiaaman laa bēn rēn da't Jesús zinal laa reeman. Laaman gure cwē' Jesús chi gudaw reeman xche, gunabdiidx tēēman loj Jesús rēbaman: “Dad, ¿chu yayü lūj?” <sup>21</sup> Chi baguiaa Bēd laaman, gunabdiidxaman loj Jesús rēbaman:

—Dad, laadxza xin guin, ¿xhie saquix?

<sup>22</sup> Badxi' Jesúsán rēbaman:

—Bal rēnan guibanx xt yaguialan, ¿xhie güünł? Lūj tanal naj.

<sup>23</sup> Zianan zeel bire'ch diidx loj ree xbejnman guial ad zējtł bēn guin. Per ad ziantan rēb Jesús, rēbaman: “Bal rēnan guibanx xt yaguialan, ¿xhie güünł?”

<sup>24</sup> Bén guin gajcan rü diidx xcwent ree nine, laa tēēman bacaa laan, rayagbee tēē ree rüman diidxli. <sup>25</sup> Dád zien ree ni been Jesús, bal nitia tıjł gajł, wed ad zadaant loj guidxliuj niu ree libr ni nıajł.

## Ni been ree xi Apóstoles Jesucrist

**1** Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēeman chi guzuloj xchinman <sup>2</sup>xt chi ziaman xanyabaa. Chi gadaman yaguiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman. <sup>3</sup>Chi mal guzagdiaj da'taman loj xguialgüjtaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabancaman. Dxej zii ree guneenēman laa reeman xcwent xguialrniabee Dios.

<sup>4</sup>Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi. <sup>5</sup>Walican barobnijs Waj con nijs, per ma zidyob dxej gui't xSprijt Dios guibannē lējt, laan gac zi'c guialrirobnis par lējt.

### Zia Jesús xanyabaa

<sup>6</sup>Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül guialrniabee loj ree bēn Israel ya?

<sup>7</sup>Badxi' Jesúsán rēbaman:

—Ad lējtít rayal gagbee xhie dxejn o xhie horan gac zian. Tijbzi da Dadan ragbee laan din laaman ca' guialrniabee. <sup>8</sup>Per chi ma nabannēdi xSprijt Dios, tia'di guialrniabee. Dxel griidi chiguedi diidx loj ree bēn Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zijt da't.

<sup>9</sup>Gulox guneeaman, ruguiaa reeman laaman dxejlczi wajsaman ziaman xanyabaa, abi' biguiajt tijb bēj

bata'cwan laaman, dxel ad baguiaatri reeman laaman. <sup>10</sup>La'tgaj ruguiaa reeman ziaman xanyabaa, gulentie tio'p ree bēn najcw lajd naquich lod za' reeman, <sup>11</sup>abi' rēb reeman loj ree apóstoles guin:

—Bēn Galilea, ¿chexc zeel sta ruguiaadi xanyabaa? Jesús, bēn baguiaadi zia xanyabaa, laagajcaman yaguiaad stibj, zi'cgajc baguiaadi ziaman.

<sup>12</sup>Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén. <sup>13</sup>Chi badxin reeman, wē'p reeman lēnü ladya lod zojb reeman. Brii laj reeman Bēd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bēn guzunē ree bēn cananistas), nē Judas xi'n Jacob. <sup>14</sup>Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree bēngunaa ren.

### Gulej reeman bēn baya'n xluar Judas

<sup>15</sup>Lēn ree dxej zii bado'p ree bēn rliladx Jesús, naj reeman cost tibgayuu gajl bejn, dxel guzuli Bēd galay reeman, rēbaman loj reeman:

<sup>16</sup>—Compniar raliduladx ree Jesucrist, ganin lojdi, gojc cumplid ni bacao rey Davi loj xtiidx Dios por xSprijtaman xcwent Judas, xin balüü Jesús loj ree bēn gunaaz laaman, <sup>17</sup>gojqquix tijb dux compniaran, nē laax been lasa' dxiin raguieenan. <sup>18</sup>Per con milia ni gudix reeman laax por ni mal beenx, bio' guidxliuj lod gudidya'x, bazuj guijquix, goxya'x abi' brii gra xziix. <sup>19</sup>Chi gogbee gra ree bēn Jerusalén ni goc, gunee reeman guidxliuj zii Acéldama, rēn guiēban guidxliuj rejn. <sup>20</sup>Din rēb loj libr la Salmos:

Yaya'n dējch lidix,  
achutziri cwe lēnan.

Rëb tëë lojn:

Yayu ben ren guia'x.

<sup>21</sup> Zeel loj gra ree bén za'në dunuj ree guidib tiamp ni guzunë Jesús dunuj ree, <sup>22</sup> diizd chi baroobnijs Waj laaman xt chi ziaman xanyabaa. Loj gra reeman rayal grii tijbaman din giünman dunuj ree yudar yague'ch ree loj ree bejn guial walican babanman loj ree bengüt.

<sup>23</sup> Dxel gulej reeman tio'p reeman: tijb bén la Xiëb (rniece reeman laaman Barsabás, rniece tëë reeman laaman Justo), gulej tëë reeman bén la Matías. <sup>24</sup> Dxel gurejdx gunab reeman Dios, rëb reeman:

—Dad, lüj nünbee luxdoo gra ree bejn. Balüü chu loj grop reeman gulejl <sup>25</sup> din gacaman apóstol luar Judas, din banijtxix delant lojl por dol ni beenx abi' ziax luar ni rayalix.

<sup>26</sup> Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

### Biguiajt xSprijt Dios diizd xanyabaa

**2** Chi bidxin dxej gojl lanij la Pente-costés, gra ree bén rliladx Jesucrist bado'p tijbzi luar. <sup>2</sup> Dxejlczi gojc naquie' xanyabaa zi'c bidoxh xt bayu bi lënü lod riga' reeman, <sup>3</sup> abi' gulentie zi'c bajl dobëz ree, biguiajt reen guijc tijb gaj reeman. <sup>4</sup> Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

<sup>5</sup> Lën ree dxej zii za' zien ree bén Israel Jerusalén, baza reeman gra ladczi din cwedx guiniab reeman Dios. <sup>6</sup> Chi bigueijn reeman cayajc naquie', bado'p reeman persi biquiaa reeman. Dxel chi bigueijn reeman rniece gra ree bén rliladx Jesús xtiidx tijb gaj reeman, ad badxejlt xgab nüjn reeman. <sup>7</sup> Dád badxa loj reeman xt ni'quid badxejlt xhie nüjn ree-

man, abi' gunabdiidx loj lasa' reeman rëb reeman:

—¿Nid bén Galilea gra ree bén canee guin ya? <sup>8</sup> ¿Chexc zeel raguiejn ree rniece reeman dux tiidx ree? <sup>9</sup> Du loj ree no'ch ree bén zëed guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, <sup>10</sup> bén zëed tëë ree guiedx riga' ree niz Frigia, Panfilia, Egipto, në ree guiedx nulen Libia ni riga' ree gajxh Cirene, në ree bén zëed Rom, yu' reeman gojl Israel per naban reeman Rom, yu' tëë reeman naj quijb ben Rom per rliladx reeman ni rliladx ree bén Israel. <sup>11</sup> Në ree bén zëed niz Creta nëtëë ree bén zëed guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidx ree niza'cdxoon rüjn Dios!

<sup>12</sup> Graczi reeman badxa da't loj xt ni'quid badxejlt xgab nüjn reeman, abi' guzuloj canabdiidx loj lasa' reeman rëb reeman:

—¿Xhie rën guiëb gra ni guie?

<sup>13</sup> Per garol reeman baze' laa reeman, rëb reeman:

—Rë' reeman.

### Ni rëb Bëd loj ree bejn

<sup>14</sup> Dxel guzuli Bëd con zachibtib ree apóstoles guin, guneeman rejs rëbaman:

—Lëjt bén Judea në graczi ree bén zojb Jerusalén, gol bacaagdiajg gol bignia' tëë ni ganin. <sup>15</sup> Ad rë't ree bén guin zi'c naladxidi, din qui gojlri raca gaa rsil. <sup>16</sup> Guie cayajc cumplid ni gunee bén brii laj Joel, bén badëë xtiidx Dios loj ree bejn, chi rëbaman:

<sup>17</sup> Na Dios,

guidxin dxej gaxhal da Sprijtan luxdoo gra ree bejn, abi' xi'ndi xinguaaw con biingunaa gudëed reex da diidxan, zien ree ni guluüloj loj ree xinguiag, guiaád ree bengol zien ree ni guinie'x-chaal reeman.

<sup>18</sup> Dxej zii ree gaxhal da Sprijtan luxdoo ree b́en rýjn da dxiinan, xinguaaw ree nê ree b́engunaa, abi' gudêed reeman da diidxan.

<sup>19</sup> Gulýn sen ree xanyabaa ni yadxa lojdi, guiaád loj guidxliuj gulýn sen ree zi'c rejn nê bajl nêtêê go'xh.

<sup>20</sup> Guicajy loj gubijdx, guiaád bêew yayajcan zi'c rejn.

Chi ma gojc zian, dxel guidxin quijb dxej guin,

dxej za'gdxoon gui't Dios b́en rniabee, dxej guiguien guidib xbianiman.

<sup>21</sup> Abi' graczi ree b́en cwedx guiniab laaman

gýinman laa reeman perdon.

<sup>22</sup> Rêb têê Bêd loj reeman:

—Yan, gol bacaagdiajg ni ganin lëjt b́en Israel: Lëjt ragbee guial Jesús b́en Nazaret najman b́en guxhaal Dios, been têeman milagr ree nê ree ni radxa loj ree bejn zi'c sen din gagbeedi guial Dios guxhaal laaman. <sup>23</sup> Diizd gocli mal nýjn Dios xgab guial zian güünnêdi Jesús, gunaazidi laaman bayüdi laaman loj ree benmal, din gugüjt reeman laaman loj crüjz. <sup>24</sup> Per basban Dios laaman stijb, babêeman laaman loj gualgüjt, din ad gojct nutêê gualgüjt guin laaman. <sup>25</sup> Chi gunee rey Davi xcwent Jesús, rêbaman: Zianczi baguian dux Dad ree Dios za'nêman naj.

Za'man da ladbeen, achetczy zajc guchejb naj.

<sup>26</sup> Zeel yu' luxdon nix, ruzat têen Dios zagdxe.

majsi guiétan ad rdxebtan,

<sup>27</sup> din ad zusa'n'til naj lèn baa,

ad zatiëjbtíl xhin xcuerp xi'nl b́en naya nali.

<sup>28</sup> Balüüil naj nejz runee gualnaban, chu' têê luxdon zagdxe guial guibannël naj.

<sup>29</sup> Basnuu gunee Bêd, rêbaman:

—Ganin loj gradi compniar, diidxiczi dux b́engulal ree Davi güjtaman bigu-

ie'ch têeman, abi' laa xbaaman sta raguaa ree yan. <sup>30</sup> Per gojcaman b́en badêê xtiidx Dios loj ree bejn, abi' gogbeeman been Dios promejs guial loj xdi-aaman grii Cristo b́en nabee. <sup>31</sup> Rulüü ma cuguiaaman gra ni gac, rêbaman guial yaban Cristo loj ree bengüt, ad za-ya'ntaman lèn baa ad zaxin têet xcuerpaman. <sup>32</sup> Yan ma basban Dios Jesús, dugran nayajc testiw guial walican babanman. <sup>33</sup> Zia têeman xanyabaa zisobaman xladbee Dios, persi badêê xSprijt Dios lojman zi'c ma rêbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi caguiejn têedi. <sup>34</sup> Ad Davitan zia xanyabaa, din laagajcaman rêb:

Rêb dux Dad ree Dios loj b́en rniabee naj: “Gurej da ladbeen,

<sup>35</sup> xt gabecan xin rdxe'ch ree lüj guia'l.”

<sup>36</sup> 'Gradi b́en Israel gol gogbee guial Jesús b́en bacaadi loj crüjz, Dios bacaabee laaman din gacaman Dad, b́en nabee dunuj ree.

### Bachajg zien ree bejn b́en rliladx ree Jesús

<sup>37</sup> Chi biguiejn ree b́en riga' yagaj ni rêb Bêd, dád guyu naya luxdoo reeman. Abi' gunabdiidx reeman lojman nê loj los demazri ree apóstoles guin, rêb reeman: —Dad, gol guna, ¿xhie rayal yaguieenan?

<sup>38</sup> Dxel rêb Bêd loj reeman:

—Gol bayagbee xtolidi, gol badxi' têê lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi. <sup>39</sup> Din promejs guin naj par lëjt nê par ree xi'ndi nê par gra ree b́en riga' zijt, par gra ree b́en cwe Dios par laaman.

<sup>40</sup> Con ree diidx guie nê mazri ree diidx ren guneenê Bêd laa reeman, rêbaman:

—¡Gol bariica loj ree b́en rýjn ni mal!

<sup>41</sup>Zian gojc, graczi b́en bazoob di-idx ni ŕebaman gurobnijs. Dxej zii gajc bachajc cost choon mil bejn b́en rililadx ree Jesús. <sup>42</sup>Graczi reeman binal ni balíüü ree xi apóstoles Jesús laa reeman, gubajnnë lasa' reeman zagdx, gurejdx gunab reeman Dios abi' rado'p reeman persi raw reeman guiadxtil tijbzi zi'c gunabee Jesucrist giüün reeman.

### Ze gubajn ree b́en bililadx Jesús yaloj

<sup>43</sup>Graczi ree bejn radxa da't loj milagr në los demazri ree ni been ree apóstoles guin. <sup>44</sup>Graczi ree b́en bililadx Jesucrist gubajnnë lasa' zagdx, rgui's t́ëë ni rajp reeman loj lasa' reeman. <sup>45</sup>Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman. <sup>46</sup>Guixie guixie rado'p reeman lën yadooro' Jerusalén, dxel raguiaj reeman lidx xcompniar reeman rtaw reeman, dád nix yu' luxdoo reeman rën t́ëë lasa' reeman, <sup>47</sup>ruza't reeman Dios zagdx, guiáad gra bejn guyën laa reeman. Guixie guixie ragnë Dios din gacxhiey mazri b́en rililadx Jesucrist, persi gojc xtol reeman perdon.

### Bayajc tijb b́en ad rajct rza

**3** Tijb dxej zë ree Béd con Waj lën yadooro' Jerusalén raca choon wadxe, hor zii naj hor ni rbejdx rniab reeman Dios. <sup>2</sup>Ro' xport yadoo guin zojb tijb b́en ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree b́en ru lën yadoo guin. <sup>3</sup>Chi baguiaaman Béd con Waj ma chu' reeman lën yadoo guin, gunabaman carda loj reeman. <sup>4</sup>Baguiaa reeman lojman, dxel rëb Béd lojman:

—Baguiaa du lojn.

<sup>5</sup>Chi biguiejnman rëb Béd zian, dxel baguiaaman loj reeman, naladxaman

milia nudëëd reeman lojman. <sup>6</sup>Per rëb Béd:

—Ad ra'ptan plajt ni'qui or par gunen lojl, per ni zajc günan por lüj günanan: Por xgualrniabee Jesucrist b́en Nazaret, guzuli, guza.

<sup>7</sup>Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl, <sup>8</sup>abi' guti-ajsaman, guzuliman guzuluj cazaman. Dxel gyunëman laa reeman lën yadoo guin, cazaman, catiajsaman cuza't t́ëëman Dios zagdx. <sup>9</sup>Graczi ree b́en cuguiaa laaman cazaman cuza't t́ëëman Dios zagdx, <sup>10</sup>dád badxa loj reeman bidxeb t́ëë reeman guial gojc zian guial nünbee reeman b́en guin, ragbee t́ëë reeman laaman rbej ro' xport yadoo guin ni la Port Za'cdxoon, rniabaman carda.

### Gunee Béd loj ree bejn lod la xcurdur Salomón

<sup>11</sup>Ad riro'nladxt b́en bayajc guin Béd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Béd con Waj. <sup>12</sup>Chi baguiaa Béd zian, ŕebaman loj reeman:

—B́en Israel, ¿chexc zeel radxa lojdi ni goc? Ad naladxidi por dunujn rza b́en guie guial naca'n gualrniabee o guial nayajcan naya delant loj Dios ya. <sup>13</sup>XDios dux b́engulal ree Abraham, Isaac në Jacob, laaman badëë gualrniabee loj Jesús, b́en bayüdi loj guxtis. Abi' chi guyën Pilato nuslaaman laaman, ad cwëjbtidi. <sup>14</sup>Luar niniabidi nuslaa Pilato b́en naya nali, b́en rüjn zi'c rayal, gunabidi baslaaman tijb xin bagüjt bejn. <sup>15</sup>Zian bagüjtdi b́en runee gualnaban. Per basban Dios laaman stijb, abi' dunujn nayajc testiw guial babanman. <sup>16</sup>B́en guie, b́en ruguiaadi nünbee t́ëëdi, guyu gojl guia'man por xgualrniabee Jesucrist, bayajcaman guial baliduladxan, zi'c ruguiaa graczidi.

<sup>17</sup> Ganin lëjt compniar, ragbeen guial lëjt con ree bën rniabee lëjt ni'quid gogbeetidi xhienin beendi chi bagüjtidi Jesús. <sup>18</sup> Per zian been Dios persi gojc cumplid ni rëbaman loj ree bën badëë xtiidxaman loj ree bejn diizd gocli guial sagdiaj Cristo. <sup>19</sup> Zeel gol bayagbee xtolidi gol badxi' tëë lojdi loj Dios din güünman xtolidi perdon. Dxel yayaalyuj luxdoodi, <sup>20</sup> guixhiaal tëëman Jesús stijb, bën naj Cristo diizd gocli par lëjt, <sup>21</sup> majsi yan ryalri suman xanyabaa, xt ma bazuxnejz Dios gra, zi'c rëbaman loj ree bën badëë xtiidxaman loj ree bejn diizd gocli, bën gubajn ree naya delant lojman. <sup>22</sup> Abi' rëb Moisejs loj ree dux bëngulal ree: “Loj xdiaadi cwëë Dios tijb bën gudëë xtiidxaman loj ree bejn zi'c naj, gol bazoob xtiidxaman graczi ni naman lojdi, <sup>23</sup> din graczi ree bën ad zuzoob xtiidxaman nit reeman, ad zajc tëttri reeman cwent zi'c xbejn Dios.”

<sup>24</sup> Gra ree bën badëëd xtiidx Dios loj ree bejn, diizd Samuel con los demazri ree bën badëë xtiidx Dios diizd gulal, mal bagojn reeman ni cayajc ree lën ree dxej guie. <sup>25</sup> Lëjt naj xdiaa reeman, lojdi gac cumplid ni cwëb Dios loj ree dux bëngulal ree chi rëbaman loj Abraham: “Por xdiaal günle'n gra ree bënguidxliuj.” <sup>26</sup> Abi' chi basban Dios xi'nman Jesucrist, yaloj lojdi guxhaalaman laaman din güünle'man lëjt din yabëëcaman gradi loj ni mal rüjndi.

### Bazuj reeman Bëd con Waj loj ree guxtis

**4** Sta canee ree Bëd con Waj loj ree bejn, chi bidxin ree xbixhioz ree bën Israel në suldad rniabee suldad rniay ree ro' yadooro' Jerusalén, nëtëë ree bénsaducew. <sup>2</sup> Dád ralen reeman guial culüü ree Bëd con Waj bejn ree, rëb reeman guial yaban ree bejn loj ree bengüt, din laan ma baguiaa reeman chi baban Jesucrist. <sup>3</sup> Zeel gunaaz reeman laa reeman,

per guial ma gudxe, zeel badxe' reeman laa reeman ladxguiib la'tgaj rareguiaal. <sup>4</sup> Per dád zien ree bën bacaagdiajg ni rëb ree Bëd con Waj bililadx xtiidx Dios, gojc reeman cost gaay mil xinguaaaw xcwentqui ree bëngunaa.

<sup>5</sup> Chi bareguiaal, guxtis Jerusalén në ree bengol në ree mextr rülüü ley, bado'p reeman loj ciuda guin. <sup>6</sup> Në Anás bidxin yagaj, bën naj bixhioz mazri zojbloj rniabee graczi ree bixhioz, bidxin tëë bixhioz la Caifás në Waj në Lejandr, nëtëë gra ree bën naj lasa' ree bixhioz rniabee guin. <sup>7</sup> Gunabee reeman bica' reeman Bëd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rëb reeman: —¿Chu banee diidxbee o chu por rüjndi ni guin?

<sup>8</sup> Per guial yu' xSprijt Dios luxdoo Bëd dád gognëman laaman, zeel rëbaman:

—Gol bacaagdiajg ni ganin lëjt bengol në lëjt guxtis, <sup>9</sup> rniabdiidxidi dunuj xhienaag baguieenan bëngogxuu guin yudar, xhie tëë naag gojc zeel bayajcaman. <sup>10</sup> Yanan lojdi din gagbeedi gagbee tëë gra bën Israel xhienaag bayajc bën za' lojdi. Bayajcaman por xguialrniabee Jesucrist bën Nazaret, bën bacaadi loj crüjz abi' basban Dios laaman stijb. <sup>11</sup> Beennëdi laaman zi'c rüjn ree bën rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacné yu guin. <sup>12</sup> Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din güünman dunuj ree perdon.

<sup>13</sup> Chi baguiaa ree guxtis guin ad rdxebt ree Bëd con Waj guial rniee reeman, abi' gogbee reeman ad bën basidit ree mazran achu tëët naj reeman, badxa loj reeman bayünbee tëë reeman laa reeman guial bën binal ree Jesús. <sup>14</sup> Abi' yagaj gajc za' bën bayajc guin, zeel ad bile'tri xhie niëjb reeman contr

laa reeman. <sup>15</sup>Dxel gunabee ree guxtis guin barii ree Béd con Waj din yaya'n laaz reeman din gü reeman diidx. <sup>16</sup>Rëb reeman:

—¿Xhienaag yaguieenné' ree xin guin ree? Graczi ree bën Jerusalén ma ragbee milagr been reex. Abi' ad zajct yarexuu ree. <sup>17</sup>Per chitéë guire'ch xtiidx Jesús, yachejb reex din diizd yan achutcziri loj guza't reex laax.

<sup>18</sup>Dxel gurejdx reeman laa reeman gunabee reeman chitéë churi loj guza't reeman Jesús, ad gulüü tēeri reeman xtiidxaman. <sup>19</sup>Per badxi' Béd con Waj laan, rëb reeman:

—Lëjt gajc gol been xgab: ¿Zagdxé naj yazooban xtiidxidi luar yazooban xtiidx Dios ya? <sup>20</sup>Per ad zajct yacwëëz yaguie'chan gra ni baguiaa baguiejn tēen.

<sup>21</sup>Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaaag nudëd reeman laa reeman casti, din graczi ree bejn ruza't Dios zagdxé por ni goc. <sup>22</sup>Nadëd tiuu ijz yu' bën bayajc guin.

### Rbejdx ree bën riladx Jesús Dios

<sup>23</sup>Chi baslaa ree guxtis guin Béd con Waj, baguiaj reeman lod riga' xcompniar reeman bën riladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee. <sup>24</sup>Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bën been xanyabaa në guidxliuj nētëë nijsdoo con gra ni yu' loj reen. <sup>25</sup>Por xSprijt tēel gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

<sup>26</sup>Bado'p ree rey në gra ree guxtis din su reeman contr dux Dad ree Dios në contr Cristo.

<sup>27</sup>'Abi' zian ma gojc, Herodes con Poncio Pilato con ree bën Israel nētëë ree bën ad najt bën Israel, badxajg lasa' reeman luguedx guie persi guzuj reeman contr xi'n'l Jesús, bën naya nali, bën bacaabeel. <sup>28</sup>Zian gojc, been reeman zi'c ma beenl xgab diizd gocli. <sup>29</sup>Abi' yan Dad, baguiaa yan ruchejb reeman dunujn. Gognë dunujn nayajcan xbejnl din gac yatie'chan xtiidxil sin guialrdxeb, <sup>30</sup>në con xguialrniabeel yasiajcan bënragxuu ree, yaguieen tēen milagr ree por xguialrniabee xi'n'l Jesús, bën naya nali.

<sup>31</sup>Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin guialrdxeb.

### Ragnë lasa' ree bën riladx Jesús

<sup>32</sup>Graczi ree bën riladx Jesucrist bidxajg gubajn reeman, rüjn reeman tijbzi xgab, ni'qui tijb reeman ad rëbt guial xieenzi reeman naj ni rajp reeman, din najn par gra reeman. <sup>33</sup>Gognë Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. <sup>34</sup>Ni'czi tijb reeman ad biaadxt xhienin, din graczi ree bën rajp guidxliuj o bën rajp yu ya ruto' reeman laan, abi' milia guin <sup>35</sup>rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadxt tijb gaj reeman. <sup>36</sup>Loj reeman no'ch tijb bën brii laj Xiëb, najman xdiaa bën brii laj Leví, zëedaman yuj la Chipre ni riga' loj nijsdoo. Gunee ree apóstoles guin laaman Bernabé, rën guiëban Bén ragu' luxdoo ree bejn zagdxé. <sup>37</sup>Gojpaman tijb guidxliuj, abi' bato'man laan persi badëëman milia



guin loj ree apóstoles guin din qui's ree-man laan.

### Dol ni been ree Ananías con Safira

**5** Per guyu stijb bèn brii laj Ananías, xbéngunaaman brii laj Safira. Bato' tijb xguidxliuj reeman, <sup>2</sup>per baya'nnē xbéngunaaman diidx persi baya'nnēman ta'n milia guin. Sta'nan badēēman loj ree apóstoles guin, rēbaman laan naj gran. <sup>3</sup>Abi' rēb Béd lojman:

—Ananías, ¿chexc zeel cwējbil gunabee xindxab lūj? ¿Chexc zeel guyēnl nusquieel loj xSprijt Dios, din naya'n-nēl ta'n milia ni bato' xguidxliujl? <sup>4</sup>¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balabladxil beenl zian? Loj Diosan nuyēnl nusquieel, ad lojt bejnan.

<sup>5</sup>Chi biguiejn Ananías ni rēbaman, bi-ajbaman abi' güjtaman. Graczi ree bèn gogbee ni guzacaman dád bidxeb ree-man. <sup>6</sup>Dxel bibig bēlzi ree xinguiag, batüüb reex laaman lajd persi biquie'ch reex laaman.

<sup>7</sup>Chi gudēd cost choon hor, dxel bidxin xbéngunaa Ananías, ad ragbeeta-man ni goc. <sup>8</sup>Dxel gunabdiidx Béd loj-man rēbaman:

—Guna, ¿bato' xguidxliujdi zi'c na lacheelil ya?

Abi' rēbaman:

—An, zianqui bato'nan.

<sup>9</sup>Dxel rēb Béd lojman:

—¿Chexc zeel baya'ndi diidx persi nuyēndi nusquieedi xSprijt Dios? Laa ree xin biquie'ch lacheelil ziaad ni, yan nē-gajc lūj chiquie'ch reex.

<sup>10</sup>Loj hor zii gajc biajb Safira lod za' Béd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwēl lacheelaman. <sup>11</sup>Graczi ree bèn rliadx Jesucrist nē gra ree bèn gogbee ni goc, dád bidxeb reeman.

### Zien ree milagr been ree apóstoles

<sup>12</sup>Zien ree milagr narooB been ree apóstoles guin loj ree bejn. Graczi ree bèn rliadx Jesucrist radxajg lasa' ro' curdur lod nriee reeman xcurdur Salomón. <sup>13</sup>Zagdxē ruza't ree bèn luguiēdx guin laa reeman, per ad rayaxt ree-man guchajg reeman laa reeman. <sup>14</sup>Abi' guixie guixie cayajcxhieje ree bèn rliadx Dad Jesús, zi'c xinguiāaw zi'c béngunaa. <sup>15</sup>Xt rbēē reeman bēnragxuu ree lunejz, rguixh reeman laa reeman loj ree loon nē loj ree da, din chi tēd Béd, majsi xbalazaman tēd guijc reeman. <sup>16</sup>Nē ree bèn zojb guiedx riga' ree gajxh Jerusalén, zien reeman bidxin Jerusalén, bidxinnē reeman bēnragxuu ree nē ree bèn yu' xindxab luxdoo, abi' graczi ree-man bayajc.

### Gunaaz ree guxtis Béd con Waj

<sup>17</sup>Bixhioz mazri zojbloj rniabee graczi ree bixhioz nē ree bēnsaduēw za'nē laaman, guyu guialnadēdloj luxdoo ree-man, <sup>18</sup>abi' gunabee reeman biniaaz ree apóstoles guin persi badxe' reeman laa reeman ladxguuib. <sup>19</sup>Per guxhin zii tijb xi anjl Dios guxhal ro' ree xport ladxguuib guin, abi' babēēman laa ree-man, rēbaman:

<sup>20</sup>—Gol chej lēn yadooro', gol biguiedx loj ree bejn xhie naag gap reeman guialnaban tiblayaa con Dios.

<sup>21</sup>Chi biguiejn reeman ni rēb anjl guin, bareguiaal rsildoo wej reeman lēn yadoo guin, guzuloj culüü reeman bejn ree xtiidx Dios.

Guiāad bixhioz zojbloj guin con ree bèn za'nē laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lēn ladxguuib guin. <sup>22</sup>Per chi bidxin reex ro' ladxguuib guin, achutri ree apóstoles guin ree yu'. Dxel bicojn reex guxtis guin ree, <sup>23</sup>rēb reex:

—Chi badxinan, baguiaa nayaaw ro' ladxguuib guin zagdxe, laa ree suldad rajp ro' ladxguuib guin za', per chi baxhalan, achutczi yu' lënan.

<sup>24</sup>Dxel bixhioz zobjloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rëb loj lasa' reeman, ζban xt guin chigdi-blagaa ree ni guie?

<sup>25</sup>Loj hor zii gajc bidxin tijb xin rëb loj reeman:

—Laa ree bën badxe'di ladxguuib yu' lën yadoo cultüü reeman bejn ree.

<sup>26</sup>Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguiaj ree bejn laa reex. <sup>27</sup>Chi badxinnë reex laa reeman, bayü reex laa reeman loj guxtis. Dxel rëb bixhioz zobjloj guin loj reeman:

<sup>28</sup>—¿Nid ranan ya guial ad zajc-tri gulüüdi bejn ree xtiidx Jesús? Abi' yan graczi loj ree bën Jerusalén ma gutie'chidi xtiidxix, nëtëë yan rëndi gudxiibidi du guijcan guial dunujn bagüjt laax.

<sup>29</sup>Abi' badxi' Bëdan në gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj. <sup>30</sup>XDios dux béngulal ree basban Jesús, bën baaadi loj crüzj. <sup>31</sup>Abi' nüjn Dios laaman bën zobjloj, nabe'caman laaman xlad-beeman, laaman naj bën rniabee rabëë tëëman bejn ree loj xtol reeman, abi' zian guxhalaman nejz par ree bën Israel din cwëeladx xtol reeman yadxi' tëë loj reeman loj Dios din güünman laa reeman perdon. <sup>32</sup>Dunujn në xSprijt Dios bën rudëëman loj ree bën ruzoob xtiidxaman, rayagbeen guial gra ree ni guin naj diidxli.

<sup>33</sup>Chi biguiejn ree guxtis guin ni rëb reeman, dád balen reeman abi' guyën reeman nugüjt reeman laa ree-

man. <sup>34</sup>Per loj ree guxtis guin no'ch tijb bënfarisew laman Gamaliel, najman mextr ruluü ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. <sup>35</sup>Dxel rëbaman loj ree guxtis guin:

—Bën Israel, gol been xgab xhienin güünnëdi bën guin ree. <sup>36</sup>Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bën binal laax, yagaj gulox gra ni beenx. <sup>37</sup>Abi' tëë lën ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per chi bagüjt ree bejn laax, gra ree bën binal laax bire'ch. <sup>38</sup>Zeel rnin lojdi, ad bal chu'ridi con ree bën guin, gol baslaa reeman. Din bal bénguidxliuj rniabee ni rüjn reeman, zadxin dxej loxan. <sup>39</sup>Per bal por Dios cayüjn reeman ni guin ree, ad zajct gutëëdi loj ni cayüjn reeman. Gol gojp cudad ad niad chi gagbeedi contr Diosan za'di.

<sup>40</sup>Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad gutie'chri reeman xtiidx Jesús, dxel baslaa reeman laa reeman zia reeman. <sup>41</sup>Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. <sup>42</sup>Abi' ad rucwëëzt ruluü reeman rniece tëë reeman xtiidx Jesús, gra dxejczzi ruluü reeman lën yadooro' Jerusalén nëtëë lidx lidx ree bejn.

### Bibee gajdx ree bën güün yudar

**6**Lën ree dxej zii chi canuu caya-jcxhiey ree bën rililadx Jesús, guzuloj cabe'c ree bën rniece diidx grieg xguialquia ree bën rniece diidx hebreo, rëb reeman guial gra dxejczzi chi rië's ni

raw ree búngunaa bizéjb, ta'ndoon rtia' ree bén rníee diidx grieg guial loj ree bén rníee diidx hebreo.

<sup>2</sup>Dxel guidxibtio'p ree apóstoles guin bato'p reeman graczi ree bén rliiladx Jesucrist, abi' rëb reeman:

—Ad zagdxtet naj guial yacwëëz yaliün xtiidx Dios par yadi'san ni gaw ree bejn. <sup>3</sup>Zeel yanan lëjt compniar raliiduladx ree Jesucrist, gol gudiil entr lojdi gajdx ree bén ragbeedi nabán zi'c rayal, bén yu' xSprijt Dios luxdoo, bén yu' tée ree xquiarguejn, din yazuj reeman güün reeman dxiin guin. <sup>4</sup>Guiáad dunujn yasnuu yarejdx yanaaban Dios, yaliü téeen xtiidxaman.

<sup>5</sup>Graczi reeman cwëjb ni rëb reeman, abi' gulej reeman bén la Esteban, laaman rliiladx Jesucrist guidib luxdoo, rniabee tée xSprijt Dios luxdoo guidiblagaa. Gulej tée reeman Felip, Prócoro, Nicanor, Timón, Parmenas né Nicolás bén zëed Antioquía, neman bililadx ni rliiladx ree bén Israel chi gadaman chililadx Jesucrist. <sup>6</sup>Dxel biné reeman laa reeman loj ree apóstoles guin, persi gurejdx gunab reeman Dios por laa reeman badxiil tée yaa reeman guijc reeman.

<sup>7</sup>Canuu care'ch xtiidx Dios, abi' Jerusalén cayajcxhiey ree bén rliiladx Jesucrist, né zien ree bixhioz Israel bililadx laaman.

### Biniaaz Esteban

<sup>8</sup>Dád gogné Dios Esteban badë tée-man guialrniabee persi rünman zien loj milagr delant loj ree bejn. <sup>9</sup>Abi' bëlzi ree bén yadoo ni la Libertados né ree bén Cirene con ree bén Alejandría con ree bén niz Cilicia nëtëe ree bén zëed niz Asia, guzuloj cadildiidxné reeman Esteban, <sup>10</sup>per ad gojct nadxi' reeman xtiidxaman guial cayagné xSprijt Dios laaman. <sup>11</sup>Dxel gudijx reeman bëlzi ree bejn din guiëb reeman, bacaagdiajg ree-

man rníee Esteban contr Dios né contr Moisejs. <sup>12</sup>Zian been reeman persi bidxe'ch ree bén luguiedx guin, né ree bengol né ree mextr ruliü ley. Dxel gunaaaz reeman Esteban, biné reeman laaman loj guxtis. <sup>13</sup>Gudiil tée reeman bén basquiee ree persi rëb reeman loj ree guxtis guin:

—Ad rucwëëzt rnieeguijdx xin guie xley Moisejs né xyadoo Dios. <sup>14</sup>Dunujn ma bacaagdiajg rëbix guial Jesús xin Nazaret guse'nx dux yadooro' ree, guchaa tée costumbr basa'n Moisejs du loj ree.

<sup>15</sup>Abi' guxtis guin ree né gra ree bén riga' yagaj, chi baguiaa reeman loj Esteban, baguiaa reeman najn zi'c tijb loj anjl.

### Ni rëb Esteban loj ree guxtis

**7** Dxel bixhioz mazri zojbloj rniabee graczi ree bixhioz, gunabdiidxaman loj Esteban, rëbaman:

—¿Walin ya rëbil zian?

<sup>2</sup>Badxi' Esteban laan, rëbaman:

—Dad guxtis, né lëjt compniar, gol bacaagdiajg ni ganin. Dios bén yu' xanyabaa balüüloj loj dux búngulal ree Abraham, chi gureman niz Mesopotamia chi gadaman chisob guiedx Harán. <sup>3</sup>Abi' rëb Dios lojman: “Basa'n ladxil né gra ree lasa'l, wej loj yuj ni gultin liij.”

<sup>4</sup>Dxel brii Abraham ladx ree bén Caldea bisobaman Harán. Chi güit xDadaman, dxel bidné Dios Abraham loj guidxliuj guie lod nadxu' ree yan. <sup>5</sup>Per chi bi't Abraham guie, achetczi guidxliuj badëed Dios lojman, ni'czi tibda'nán ad badëetaman. Per beenman promeys loj Abraham guial gudëeman guidxliuj guie lojman, dxel chi guiëtaman tia' ree xdi-aaman laan, majsi chi rëb Dios zian, ad wayut xi'n Abraham. <sup>6</sup>Rëb tée Dios lojman guial xdi-aaman chisob zi'c ree ben-zit nacion ren, lod gugüjn da't reeman laa reeman dxiin gusagzi tée reeman

laa reeman loj tajp gayuu ijz. <sup>7</sup> Per rëb tēē Dios lojman: “Gudëdan gra ree bën gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” <sup>8</sup> Chi guneenë Dios Abraham, baya'n reeman diidx guial rayal chu' gra ree xinguaaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidxiptio'p ree xi'nman, bën goc ree dux béngulal ree.

<sup>9</sup> Bën goc ree dux béngulal ree gudëd-loj reeman Xiëb bën naj bijch reeman, abi' bato' reeman laaman loj ree bën zë Egipto, per ad guro'nladxt Dios laaman, <sup>10</sup> gognëman laaman loj ni guzagdiajman badëë tēëman xquiarguejman, gognë tēëman laaman persi biajb rey guin laaman zagdxe, abi' beenman laaman gobernador Egipto, bazuj tēëman laaman din nabeeman gra ni rajp rey guin.

<sup>11</sup> Chi guyu gubijn guidibczi Egipto në niz Canaán, dxel guzagdiaj da't ree dux béngulal ree guial achet ni gaw reeman. <sup>12</sup> Per chi gogbee Jacob guial yu' trigo Egipto, guxhaal ree xi'nman bën naj dux béngulal ree, dxel wej reeman Egipto. <sup>13</sup> Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëëdaman. <sup>14</sup> Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn. <sup>15</sup> Zianan zeel bisob Jacob Egipto, ni gü-taman ni gajc güit ree xi'nman, dux béngulal ree. <sup>16</sup> Gojc xchej dxel bignë reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

<sup>17</sup> Chi ma zidyob tiamp gac ni rëb Dios loj Abraham, zien ree bën Israel ma gojcxhiey Egipto. <sup>18</sup> Abi' guzuloj gunabee rey ren Egipto, bën ad beenbeet Xiëb.

<sup>19</sup> Rey zii basagzi bën du ladx ree, gunabeeman chigsëëb reeman xindo niguiaaw golnejz ree din guiët reex. <sup>20</sup> Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw. <sup>21</sup> Chi bidxin dxej bigsa'n reeman laax lod bigsëëb reeman laax, xi'n gajc rey guin baca' laax, persi baslaaman laax zi'c xi'nman. <sup>22</sup> Basiid Moisejs gra ni rajc ree bën Egipto, abi' lasajc ni guneex ni been tēëx.

<sup>23</sup> Chi guyu Moisejs tiuu ijz, bidyajb guijcaman bignaj lasa' bën Israelaman. <sup>24</sup> Abi' chi baguiaaman caguin tijb bën Egipto tijb bën Israel, balajman laaman, bagüjtaman bën Egipto guin. <sup>25</sup> Naladx Moisejs niagbee ree bën Israel guial por laaman yabëë Dios laa reeman loj ree bën Egipto, per ad gogbeet reeman. <sup>26</sup> Chi bareguiaal, bidxaagloj Moisejs tio'p ree bën Israel caga'p reeman, abi' guyënman nabe'cdxeman laa reeman, rëbaman: “¿Chexc zeel rdilidi? Awa bën Israel naj gropidi.” <sup>27</sup> Abi' bën caguin bën zatijb guin bacadxaaman Moisejs, rëbaman: “¿Chu bazuj lüj din nabeel dunujn, din na tēël ni rayal yaguieenan? <sup>28</sup> ¿Wen rënl ya gugüjtil naj zi'c bagüjtil bën Egipto ni nieey?” <sup>29</sup> Chi biguiejn Moisejs ni rëb bën guin, baxüünman wejman niz Madián. Ni gureman zi'c benzit, abi' cwa'man béngunaa, zianz guyu tio'p ree xi'ngaanman.

<sup>30</sup> Chi gudëd tiuu ijz, dxel balüüloj tijb xi anjl Dios loj Moisejs loj xbajl tijb yag ni cayazbajl lod naj yujbidx, gajxh guia' la Sinaí. <sup>31</sup> Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxe, biguiejnman cha' Dios rëbaman lojman: <sup>32</sup> “Naj naj xDios xbéngulal reel, Abraham, Isaac në Jacob.” Dxel guzuloj canij Moisejs guial bidxebaman, ad bayaxtaman nuguaaaman bajl guin. <sup>33</sup> Dxel rëb Dios lojman: “Gulëë xgurëchil, din nagle' lod za'l. <sup>34</sup> Naj cuguia xhienaag caza-

gdiáj ree da bejnan Egipto, rigúiejnan roon reeman zeel bigúia'tan din yabën laa reeman. Yan, guda din gaxhalan lüj Egipto.”

<sup>35</sup> 'Abi' majsi ad guyënt ree bën Israel nuzoob reeman xtiidx Moisejs yaloj, rëb reeman lojman: “¿Chu bazuj lüj din nabeel dunujn na tëël ni yaguieenan?” Per por anjl balüüloj loj bajl guin, badëed Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c.

<sup>36</sup> Moisejs guin naj bën babëë dux búngulal ree Egipto, been tëëman milagr ree niz Egipto, në niz ro' nijsdoo ni la Nijs Xnia, në loj yujbidx lod guzu reeman tiuu ijz. <sup>37</sup> Laagajc tëëman rëb loj ree bën Israel: “Loj gajquidi cwe Dios tijb bën gudëed xtiidxaman loj ree bejn zi'c guleman naj. Gol bazoob xtiidxaman.”

<sup>38</sup> Dxel chi guzunë Moisejs dux búngulal ree niz loj yujbidx, laaman naj bën guneenë xi anjl Dios rugúia' la Sinaí, persi badëëman xtiidx Dios loj reeman, abi' diidx guin ree naj ni basa'n reeman duloj ree yan.

<sup>39</sup> Per dux búngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijczí reeman nayejc reeman Egipto. <sup>40</sup> Dxel rëb reeman loj Aarón: “Been dios ree, din ned reeman du loj ree, din ad rayagbeet ree gonczí Moisejs bën babëë dunuj ree Egipto.”

<sup>41</sup> Dxel been reeman tijb go'ndobëz din gaquib xdios reeman. Bagújt reeman be ree persi badëed reeman laa reeb zi'c gon loj ni been reeman, been reeman lanij guial babaanë reeman ni been gajc reeman. <sup>42</sup> Dxel guro'nladx Dios laa reeman, baslaaman guyën reeman gubijdx con bëëw con bajl yu' ree xanyabaa. Din zian ca loj xtiidx Dios ni bacaa ree bën badëed xtiidxaman loj ree bejn, lod rëb:

Bén Israel, loj tiuu ijz ni guzudi loj yujbidx,  
¿wen bagújtidi be ree ya din guneedi laa reeb lon zi'c gon?

<sup>43</sup> Per mazri guyëndi xdxandi Moloc bíaa tëëdi lidxan,  
në xbajl dxan Refán, dxan been gajquidi din guzuxibidi loj reen.

Zeel gaxhalan lëjt mazri zijt guial Babilonia.

<sup>44</sup> 'Abi' chi guzu ree dux búngulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rëbaman lojman guial güünman laan zi'c ma bagúiaaman. <sup>45</sup> Chi güit Moisejs, baya'nnë ree dux búngulal ree yadoo guin. Chi baya'n Josué xluar Moisejs, dxel bidnë reeman yadoo guin chi gudil reeman guijc guidxliuj con ree bën ren, abi' gognë Dios laa reeman persi been reeman gan baya'nnë reeman guidxliuj guin ree. Zian guzunë reeman yadoo guin xt bidxin dxej guzuloj gunabee rey Davi. <sup>46</sup> Guyën Dios rey Davi, abi' laaman guyënman nüjnman tijb yadoo par Dios, bën naj dux Dios ree nayajc ree bën Israel. <sup>47</sup> Per rey Salomón naj bën been laan, <sup>48</sup> majsi Dios bën yu' xanyabaa ad rbejtaman lën yadoo ni rüjn ree bejn, zi'c rëb bën badëed xtiidx Dios loj ree bejn diizd gocli, chi rëbaman:

<sup>49-50</sup> Xanyabaa naj lod zooban par ganabeen,

guíaad loj guidxliuj naj lod ruzu guia'n.

¿Xhienaag gac yu güündi par naj?

¿O xhienaag naj lod yaziiladxan?

¿Id naj ben graczi ree ni guie ya?, rëb Dios.

<sup>51</sup> 'Per lëjt —rëb Esteban —dád nadi, ad rëntidi guzoobidi xtiidx Dios, ad rën tëëtidi chignia'di, zianczí za'di contr xSprijt Dios, zi'cgajc been ree xbúngulalidi. <sup>52</sup> ¿Chu bën badëed xtiidx Dios loj ree bejn ad beennaat ree xbúngulalidi?

Xt bagüjt reeman bën badëed ree xtiidx Dios bën rëb ree guial gui't tijb bën naya nali. Abi' yan ma bi'taman, bayüdi laaman loj ree bën rniabee, gunabee tēdi güjtaman. <sup>53</sup>Majsi cwa'di xley Dios loj ree xi anjlanan, per ad rüjntidi zi'c rëb loj ley guin.

### Bagüjt reeman Esteban

<sup>54</sup>Chi biguiejn reeman ni rëb Esteban, xt raw lay reeman tant balen reeman laaman. <sup>55</sup>Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tēman Jesús za'man xladbee Dios. <sup>56</sup>Dxel rëb Esteban:

—¡Gol baguiaa! Ruguian naxal xanyabaa, ruguia tēen Bén guxhaal Dios za'man xladbee Dios.

<sup>57</sup>Per chi biguiejn reeman zian, bata'cw guidiajg reeman, dxel gurixdiaj reeman zignaaz reeman Esteban, <sup>58</sup>babëë reeman laaman loj ciuda guin, bicüjt reeman laaman con guiaj, guíaad xab reeman basa'nsii reeman loj xinguiag la Saulo persi canajxan. <sup>59</sup>La'tgaj cucaaguiaj reeman Esteban, rëbaman:

—Dad Jesús, baca' da sprijtan.

<sup>60</sup>Dxel bazuxibaman guridxa'man rejs, rëbaman:

—Dad Jesús, ad güüncwentil dol cayüjn ree bën guin yan.

Naabczi gulox rëbaman zian, laa güit gajcaman.

### Guzunal Saulo bën rliiladx ree Jesucrist

**8** Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman bën Jerusalén ree bën rliiladx ree Jesucrist, dxel bire'ch reeman guidib niz Judea nē niz Samaria, bën najzi ree apóstoles baya'n. <sup>2</sup>Guyu bëlzi ree xinza'c, laa reex biquie'ch Esteban, abi' dád biin reex guijcaman.

<sup>3</sup>Guíaad Saulo rzunalaman bën rliiladx ree Jesucrist, ruman yu yu din cwëë naguiejnman laa reeman, zi'c xinguiáaw zi'c béngunaa, persi rgu'man laa reeman ladxguib.

### Bacaagdiajg ree bën Samaria xtiidx Dios

<sup>4</sup>Per bën brii ree Jerusalén, lod zëtzi reeman rtie'ch reeman xtiidx Dios. <sup>5</sup>Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. <sup>6</sup>Dád zien ree bejn rdo'p, graczi reeman rucaagdiajg chaaw ni rëb Felip, ruguiaa tēë reeman milagr ree ni rüjnman. <sup>7</sup>Zien ree bën nējt tib lajt xcuerp bayüjn Felip, nē ree bën ad rzat zagdxe, bayüjn tēëman bën yu' ree xinxab luxdoo abi' rbixdiaj reex rarii reex. <sup>8</sup>Zianan zeel babaa da't ree bën luguiedx zii.

<sup>9</sup>Per luguiedx zii guyu tijb bën brii laj Simón, diizd gocli rüjnman guialbidxaa persi rusquieeman bën Samaria ree, rüjnman bën lasajc. <sup>10</sup>Graczi reeman rucaagdiajg chaaw ni rëbaman, diizd mazri ree xinguiag xt mazri ree bengol, abi' rëb reeman:

—Naroob naj xguialrniabee Dios ni rajp bën guie.

<sup>11</sup>Bidxga' reeman laaman guial ma gojc xchej cusquieeman laa reeman con guialbidxaa ni rüjnman. <sup>12</sup>Per chi bililadx reeman ni rëb Felip xcwent xguialrniabee Dios nē xcwent Jesucrist, zi'c ree xinguiáaw zi'c ree béngunaa gurobnijs reeman. <sup>13</sup>Xt nē Simón bililadx gurobnijs tēëman, abi' ad riro'n-ladxtaman Felip radxa tēë lojman graloj ree milagr ruguiaaman rüjn Felip.

<sup>14</sup>Chi gogbee ree apóstoles riga' Jerusalén guial ma bililadx ree bën Samaria xtiidx Dios, dxel guxhaal reeman Béd con Waj ni. <sup>15</sup>Chi bidxin reeman, gurejdx gunab reeman Dios por ree bën Samaria bën ma rliiladx ree xtiidx Dios din chu' xSprijt Dios luxdoo ree-

man, <sup>16</sup> din ni'qui tijb reeman ad wayut Sprijt guin luxdoo, gurobnijsi reeman por Dad Jesús. <sup>17</sup> Dxel guxhoob yaa ree Béd con Waj guiyc reeman, abi' guyu xSprijt Dios luxdoo reeman.

<sup>18</sup> Chi baguiaa Simón cayu xSprijt Dios luxdoo ree bèn guin guial caxhoob yaa ree apóstoles guin guiyc reeman, dxel guyénman nudëëman milia loj reeman, <sup>19</sup> rëbaman:

—Në lon gol baneë guialrniabee guin din chi gaxhob yan chutëëz guiyc bënan, në luxdooan chu' xSprijt Dios.

<sup>20</sup> Dxel badxi' Béd xtiidxaman rëbaman:

—Nitol con guidib xmilial, din rüjnl xgab guial zajc siil guialrniabee razal-  
adx Dios. <sup>21</sup> Ad rayalt ad zajc tëët güünl  
zi'c raguieenan, din ni'quid zinaltit xnejz  
Dios. <sup>22</sup> Bayüjn xgab por ni mal beenl,  
gurejdx gunab tëë Dios, rupent güünman  
lüy perdon por ree xixgabmalil, <sup>23</sup> din  
ragbeen ganax guialralen yu' luxdool,  
abi' dol guin naj ni rniabee lüy.

<sup>24</sup> Dxel badxi' Simón xtiidxaman,  
rëbaman:

—Gol gurejdx gunab Dios por naj,  
chitëë gaza'can ni'qui tijb ni ma nadi.

<sup>25</sup> Chi gulox gunee ree apóstoles guin  
xtiidx Dios loj ree bèn guin, dxel badxin  
reeman Jerusalén, abi' graczi ree guiedx  
riga' niz Samaria lod gudëd reeman  
gutie'ch reeman xtiidxza'c Jesucrist.

### Felip con bèn Etiopía

<sup>26</sup> Chi ma gudëd gojc zian, gunee tijb  
xi anjl Dios Felip rëbaman:

—Wej niz sur nejj ni zë Jerusalén xt  
lod la Gaza, niz lod naj ganax yujbidx.

<sup>27</sup> Dxel brii Felip zëman. Runejj guin  
banaazaman tijb bèn Etiopía, najman  
bèn zobjloj guial laaman rgu'chaaw  
xmilia Candace, bèn naj reina Etiopía.  
Wejman Jerusalén bignajchi'man Dios,  
<sup>28</sup> abi' ma bayunejjzaman zia ladxaman,  
zobj lën xcarrejt zagdxeman, roolaman

loj gui'ch ni bacaa Isaías, bèn badëëd xti-  
idx Dios loj ree bejn. <sup>29</sup> Dxel rëb xSprijt  
Dios loj Felip:

—Bibig gajxh cwë' carrejt guin.

<sup>30</sup> Chi bibigaman, biguiejnman cayool  
bèn guin loj gui'ch bacaa Isaías. Dxel  
gunabdiidxaman lojman rëbaman:

—Dad, ¿rignia'l ni cayoolil ya?

<sup>31</sup> Badxi' bèn guinan rëbaman:

—¿Xoza chignia'nan? Awa achut  
gusignia' naj.

Dxel rëbaman loj Felip din chë'paman  
loj carrejt guin, cweman cwë'man.

<sup>32</sup> Loj xtiidx Dios lod cayool bèn guin  
rëban:

Zi'c rinë reeman tijb xiil,  
binë reeman laaman lod gugüjt reeman  
laaman.

Abi' achet rëbaman,  
zi'c tijb xiil ma za' loj ree bèn gugaj  
guidxladib.

<sup>33</sup> Chi beennë reeman laaman zi'ctzi rën  
reeman,

achut been guialguxtis por laaman.

Yan achut guza't xdiaaman,  
din ma bisüd reeman laaman loj  
guidxliuj.

<sup>34</sup> Rëb bèn guin loj Felip:

—Guna sii, ¿chu xcwent rníee bèn ba-  
caa diidx guie ree? ¿Xcwent gajcaman ya  
o xcwent ben renan?

<sup>35</sup> Dxel guzuloj Felip cusignia'man laa-  
man xtiidx Dios ni cayoolaman, zian be-  
man xtiidxza'c Jesucrist lojman. <sup>36</sup> Abi'  
chi gudëd reeman lod yu' nijs, dxel rëb  
bèn guin loj Felip:

—Guie yu' nijs. ¿Nid zajc garobnijsan  
guie ya?

<sup>37</sup> Zeel rëb Felip lojman:

—Bal rliadxil guidib luxdool, zajcan.

Badxi' bèn guinan rëbaman:

—Rliadxan guial Jesucrist naj Xi'n  
Dios.

<sup>38</sup> Dxel gunabeeman guzudxe xcar-  
rejtaman. Abi' baguiajt grop reeman,  
dxel guyu reeman lojnijs guin persi

baroobnijs Felip laaman. <sup>39</sup>Chi barii reeman lojnijs guin, loj hor zii gajc gunidloj Felip binè xSprijt Dios laaman, abi' ad baguiaatri bèn guin laaman, per dád rabaaman zinal xnejzaman. <sup>40</sup>Chi gogbee Felip, ma za'man xt guiedx Azoto, dxel zëman guiedx guiedx zigtie'chaman xtiidxza'c Jesucrist xt bidxinman Cesarea.

### Bililadx Saulo Dad Jesucrist

(Hch. 22:6-16; 26:12-18)

**9** Guiáad Saulo ad rucwëëzt rdx-e'chaman bèn rliiladx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zobjbloj rniabee graczi ree bixhioz, <sup>2</sup>din gac tijb gui'ch din gac cheman lën ree yadoo Damasco chigdiilaman bèn rliiladx ree Jesucrist, zi'c ree xinguaaaw zi'c ree béngunaa, din chignëman laa reeman ladxguiib Jerusalén. <sup>3</sup>Per chi ma cadxinman gajxh guiedx Damasco, dxejlci brii tijb guij xanyabaa balaan bacha' lod zëman. <sup>4</sup>Abi' bireeyujman, chi naga'man luyuj guin bigueijnman cha' bèn rëb:

—Saulo, Saulo, ¿chexc zeel rzunalil naj?

<sup>5</sup>Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bèn rzunalil. Per ganin lüj, lüj gajc rguuil xguialnaal zi'c rüjn tijb go'n rudxeguaia' loj yag ni rulaagnë reeman laab.

<sup>6</sup>Rnij Saulo guial tant bidxebaman, abi' rëbaman:

—Dad, ¿xhie rënl günan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

<sup>7</sup>Abi' ree bèn në Saulo dád bidxeb reeman guial bigueijn reeman cha' bejn, per achutzzi baguiaa reeman. <sup>8</sup>Chi bixcherman luyuj guin, baxhal lojman, ad ra-

jctri ruguiaaman. Dxel gunaaz reeman yaaman bignë reeman laaman Damasco. <sup>9</sup>Ni guzuman choon dxej, ad rajct ruguiaaman, achetzzi rawaman ache tëëtzi rë'man.

<sup>10</sup>Damasco gure tijb bèn rliiladx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

<sup>11</sup>Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëëd Tarso, lax Saulo. Din laax cabejdx canab naj, <sup>12</sup>abi' zi'c rülüü cane'xhchaalix, baguiaax guyu tijb bèn la Ananías guxhoob yaaman guijquix persi baguiaax stijb.

<sup>13</sup>Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bèn rliiladx ree lüj Jerusalén. <sup>14</sup>Yan zëëdix guie con xguialrniabee ree bixhioz rniabee ree bixhioz, din guiniaazix gra ree bèn rliiladx lüj.

<sup>15</sup>Dxel rëb Jesucrist lojman:

—Wej, din naj gule laax din chiguiex da diidxan loj ree bèn ad najt bèn Israel, në loj ree rey, con nëgajc loj ree bèn Israel. <sup>16</sup>Guiën lojx guial sagdiaj da'tix guial najx da bejnan.

<sup>17</sup>Dxel zë Ananías lënu lod za' Saulo. Chi guyuman, guxhoob yaaman guijcaman, rëbaman:

—Bijch Saulo, Dad Jesús bèn balüüloj lojl runejz lod zëëdil, laaman guxhaal naj din yaguaial, chu' tëë xSprijt Dios luxdool.

<sup>18</sup>Loj hor gajc zi'c rülüü yu' xhie biquied guiaalojman abi' baguiaaman stijb. Dxel guzuliman gurobnijsaman, <sup>19</sup>gudaw tëëman persi bayuman gojl. Dxel guzujman Damasco tio'p choon dxej con ree bèn rliiladx Jesucrist.



### Gunee Saulo xtiidx Dios Damasco

<sup>20</sup> Dxel guzuloj gunee Saulo xtiidx Dios lèn ree yadoo, rëbaman guial Jesucrist naj Xi'n Dios. <sup>21</sup> Graczi ree bën biguien ni rëbaman badxa loj reeman abi' rëb reeman:

—¿Nid bën guien rzunal bën riladx ree Jesucrist Jerusalén ya? ¿Nid laagajcaman zëëd guie ya, din guiniaazaman bën riladx ree Jesucrist chignë tëëman laa reeman loj ree bixhioz rniabee ree bixhioz?

<sup>22</sup> Per Saulo guixie guixie mazri cariman guialrdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree bën Israel zojb ree Damasco chi rucaagdiajg reeman ni rëbaman.

### Baxüün Saulo guiedx Damasco

<sup>23</sup> Ad xchejt gojc, baya'n ree bën Israel diidx din nugüjt reeman Saulo, <sup>24</sup> per laa gogbee gajcaman ni rën reeman güün reeman. Dxej guial rbëz reeman laaman ro' ree port ni rarii ro' ciuda guin din nugüjt reeman laaman. <sup>25</sup> Per ree bën riladx Jesucrist, guxhin badxe' reeman laaman lèn dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

### Badxin Saulo Jerusalén

<sup>26</sup> Chi badxin Saulo Jerusalén, guyënman nuchajgaman bën riladx ree Jesucrist, per graczi reeman bidxeb laaman guial ad riladxt reeman nëman ma riladx Jesucrist. <sup>27</sup> Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneenë tëëman laaman chi zëman Damasco, bagojn tëëman guial Damasco gunee Saulo xtiidx Jesucrist sin guialrdxeb. <sup>28</sup> Zian baya'n Saulo Jerusalén abi' nayuman laa reeman. <sup>29</sup> Ad rdxebtaman ruza'taman Dad

Jesús, abi' xt gudijldiidxnëman bën Israel rníee ree diidx grieg, per guyën reeman nugüjt reeman laaman. <sup>30</sup> Chi gogbee ree bën riladx Jesucrist zian, binë reeman laaman guiedx Cesarea. Yagaj baxhaal reeman laaman guiedx Tarso.

<sup>31</sup> Dxel babedxe luxdoo ree bën riladx Jesucrist, bën zojb ree niz Judea në niz Galilea nëtëë niz Samaria, chigagaj beenbee reeman mazri xhienaag naj xnejz Dios, bazoob tëë reeman xtiidxaman, abi' cayagnë xSprijt Dios cayajcxhieje reeman.

### Bayajc Eneas

<sup>32</sup> Chi biza Bëd bitixlojman bën riladx ree Jesucrist, dxel wej gajcaman bitixlojman bën riladx ree Jesucrist guiedx Lida. <sup>33</sup> Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajct rzax. <sup>34</sup> Abi' rëb Bëd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex. <sup>35</sup> Chi baguiaa gra ree bën zojb guiedx Lida në ree bën zojb niz Sarón guial ma bayajc Eneas, dxel në reeman bililadx Jesucrist.

### Baban Dorcas

<sup>36</sup> Loj tiamp zii guyu tijb béngunaa riladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tëëman yudar bënprob ree. <sup>37</sup> Lèn ree dxej zii gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lënu ladya. <sup>38</sup> Abi' gajxh guiedx Jope raya'n guiedx Lida lod za' Bëd. Chi gogbee ree bën riladx Jesucrist guial za'man ni, guxhaal reeman tio'p ree xinguaaw bisajc reex Bëd liaadx, rëb reex:

—Been wen yo' ree Jope yan gajczi.

<sup>39</sup> Laa zinë gajcaman laa reex. Chi bidxinman, binë reeman laaman lënu lod naga' xcuerp Dorcas. Ni riga' zien ree béngunaa bizëjb roon reeman, abi'

bibig reeman loj Béd culiüü reeman gra lajd ni been Dorcas chi sta nabanman. <sup>40</sup>Dxel gunabee Béd barii gra reeman, abi' bazuxibaman gurejdx gunabaman Dios. Dxel baguiaaman bengiüt guin, rëbaman:

—¡Tabita, bixche!

Laa guxhal gajc lojman. Chi baguiaaman Béd, gureliman, <sup>41</sup>dxel gunaaz Béd yaaman persi guzuliman. Abi' gurejdxaman bën rliiladx ree Jesucrist con ree bën bizëjb guin, persi baguiaa reeman guial ma baban Dorcas. <sup>42</sup>Guidibczi guiedx Jope gogbee reeman ni goc, abi' zien da't reeman bililadx Jesucrist por zian. <sup>43</sup>Guiáad Béd baya'nman mazri dxej luguiedx guin, lidx Simón bën rüjnchaaw guid.

### Wej Béd lidx Cornel

**10** Luguiedx Cesarea gurej tijb bën brii laj Cornel. Laaman goc suldad gunabee tibcwaa ree suldad brii laj Italiano. <sup>2</sup>Gojcaman benza'c, laaman në gra ree bën zojb lidxaman guyën reeman Dios, abi' dád beenman yudar bën Israel ree, bën naj ree bënprob, në zianczi rbejdx rniabaman Dios. <sup>3</sup>Tijb dxej cost raca choon wadxe, guzajcaman zi'c ruliüü cane'xhchaalaman. Zagdxeczi baguiaaman guyu tijb xi anjl Dios lënü lod za'man, abi' rëb anjl guin lojman:

—¡Cornel!

<sup>4</sup>Baguiaaman loj anjl guin, abi' dád bidxebaman, rëbaman:

—¿Xhienin, Dad?

Abi' rëb anjl guin:

—Ma biguiejn Dios xtiidxil ma baguiaa tëeman xhienaag rüjnl yudar bënprob ree. <sup>5</sup>Guxhaal ree bën che luguiedx Jope din chica' reeman Simón, bën la gajc Béd. <sup>6</sup>Zojbaman lidx tijb bën la gajc Simón, bën rüjnchaaw guid, bën zojb gajxh ro' nijsdoo. Béd guin na ni rayal güünl.

<sup>7</sup>Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians rliiladx tëeman Dios. <sup>8</sup>Gulox beman diidx loj reeman ni guzacamán, dxel guxhaalaman laa reeman Jope.

<sup>9</sup>Chi bareguiaal, la'tgaj cadxin reeman gajxh Jope, cost garol dxej wë'p Béd guijc yu lod zojbaman din cwedx guiniabaman Dios. <sup>10</sup>Dád gulaanman, guyënman niajwaman, per la'tgaj cayüjn reeman ni gawaman guzajcaman zi'c ruliüü cane'xhchaalaman. <sup>11</sup>Baguiaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan. <sup>12</sup>Loj lajd guin yu' gra loj ree be yu' tajp guia', në ree bëël, nëtëë ree be rzuj. <sup>13</sup>Dxel biguiejnman cha' bën rëb:

—Béd, bisu, bagüjt be gawil.

<sup>14</sup>Per badxi' Béd laan rëbaman:

—Yajqui, Dad. Ad wayawtczan nidxuudx ni ad rayalt gaw bejn.

<sup>15</sup>Abi' rëb cha' bën guin zatijb:

—Ni ma basia Dios ad rnieelan nidxuudx.

<sup>16</sup>Choon volt gojc zian, dxel bayë'p lajd guin xanyabaa stijb. <sup>17</sup>La'tgaj cayüjn Béd xgab xhie rën guiëb ni baguiaaman, loj hor zii gajc bidxin ree bën guxhaal Cornel rulidx Simón, guial ma gunabdiidx reeman banguin naj lidxaman. <sup>18</sup>Chi bidxin reeman, gunabdiidx reeman bal ni zojb Simón bën la gajc Béd.

<sup>19</sup>Guiáad Béd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguiiaaw raguiil lüj.

<sup>20</sup>Bisu, biguiajt binë reex, ad chu' luxdool tio'p, din naj guxhal laa reex.

<sup>21</sup>Dxel baguiajt Béd lod za' ree bën guxhaal Cornel, abi' rëbaman loj reeman:

—Naj naj bën raguiilidi, ¿chexquiza zeel raguiilidi naj?

<sup>22</sup>Dxel badxi' reeman laan rëb reeman:

—Guxhaal bén la Cornel dunujn, bén rniabee tibcwaa ree suldad, najman benza'c, rdxebaman Dios, abi' graczi ree bén Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiajgaman ni rayal guiëbil.

<sup>23</sup> Dxel badxe' Bëd laa reeman lënü, ni gudëd reeman guiaal. Chi bareguiaal, binëman laa reeman. Në bëlzi ree bén zoj Joje bén rliladx ree Jesucrist binë laaman.

<sup>24</sup> Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man në ree xmiwaman, din cwëz reeman guidxin reeman. <sup>25</sup> Chi bidxin Bëd lidx Cornel, laa brii gajc Cornel bigchaaglojman laaman, dxel bazuxibaman loj Bëd persi gojpaman laaman respejt. <sup>26</sup> Per bazuli Bëd laaman, rëbaman:

—Guzuli, din lasa' bejn gajcan lüj.

<sup>27</sup> La'tgaj cadxin reeman ruyu guin cayü reeman diidx. Abi' chi guyu reeman, baguiaa Bëd zien da't ree bejn riga' ni. <sup>28</sup> Dxel rëb Bëd loj reeman:

—Ma qui ragbeedi xhienaag naj xley ree bén Israel, guial ad zajct go'ch reeman loj ree bén ad najt bén Israel o chu' reeman lidx reeman. Per ma balüü Dios naj guial achutczí rayal gannen bendxuudx, bén nabixhladx. <sup>29</sup> Zeel chi bidca' reeman naj, laa bial gajcan achet guijc badxiban. Yan rënan gagbeen, ¿chexquiza zeel gurejdxidi naj?

<sup>30</sup> Badxi' Cornelan rëbaman:

—Ma gojc tajp dxej cost hor guie gajc, chi zoob lidxan, raca choon wadxe, cabedx canaaban Dios, loj hor zii balüüloj tijb bejn lon najcwaman lajd nayni. <sup>31</sup> Abi' naman lon: “Cornel, ma biguiejn Dios xtiidxil, yu'guijc tëeman xhienaag rüjnl yudar bënprob ree. <sup>32</sup> Zeel guxhaal ree xin che luguiedx la Joje din chica' reex Simón, bén la gajc Bëd. Zojbaman lidx tijb bén la gajc

Simón, bén rüjnchaaw guid, bén zoj b gajxh ro'nijsdoo. Bëd guin na ni rayal güünl.” <sup>33</sup> Zianan zeel laa guxhal gajcan xin bidgadiil ree lüj. Zagdxee beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

### Ni gunee Bëd lidx Cornel

<sup>34</sup> Dxel guzuloj canee Bëd, rëbaman:

—Ma ragbeen yan guial tiblojzi ruguiaa Dios bejn. <sup>35</sup> Din Dios, chutëez bënguidxliuj ridxga' laaman rüjn tëeman zi'c rayal, nëgajc Dios ridxga' laaman. <sup>36</sup> Dios ma gunee bén Israel ree, ma bagojnman guial por Jesucrist rabadxe luxdoo bejn, bén naj Dad par gra ree bënguidxliuj. <sup>37</sup> Lëjt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobnijs. <sup>38</sup> Ragbee tëedi guial ma badëë Dios xSprijtaman con xguialrniabeeman loj Jesús bén Nazaret, abi' bizaman biguieenman ni zagdxee, bayüjnman gra ree bén cazagdiaj por xindxab. Gojc beenman zian guial za'në Dios laaman. <sup>39</sup> Abi' dunujn baguiaa gra ni been Jesús guidib niz Judea, në niz Jerusalén. Dxelri bagüjt reeman laaman, bacaa reeman laaman loj crüjz. <sup>40</sup> Per Dios basban laaman ni bayon dxej, abi' cwëjb Dios bidgalüülojman du lojn. <sup>41</sup> Ad balüülojtaman loj gra ree bejn, tijbzi du lojn nayajcan bén gule Dios diizd yaloj din yaguiaan graczi ni beenman. Abi' dunujn badaawnë' laaman badü'në' tëen laaman chi babanman stijb. <sup>42</sup> Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxej yadëed gra ree bejn cwent loj Dios, zi'c ree bén naban zi'c ree bén ma güjt. <sup>43</sup> Nëtëë diizd gocli graczi ree bén badëed xtiidx Dios loj ree bejn, gunee

reeman xcwent Jesús, rëb reeman guial graczi ree bën chililadx laaman, gac xtol reeman perdon.

### Guyu xSprijt Dios luxdoo ree bën ad najt bën Israel

<sup>44</sup>Sta canee Bëd, chi guyu xSprijt Dios luxdoo gra ree bën cucaagdiajg ni cayëbaman. <sup>45</sup>Dxel bën Israel rliiladx ree Jesucrist, bën binë ree Bëd, dád badxa loj reeman guial në ree bën ad najt ree bën Israel guyu xSprijt Dios luxdoo, <sup>46</sup>guial riguijgn reeman ma rniee ree bën guin graloj ree diidx, abi' ruza't reeman Dios zagdx. <sup>47</sup>Dxel rëb Bëd loj reeman:

—¿Chu zajc gudxoon tiobnijs ree bën guie, bal ma yu' xSprijt Dios luxdoo reeman zi'cgajc dunuj ree?

<sup>48</sup>Abi' gunabeeman tiobnijs reeman por Jesucrist. Dxelri guzajc reeman li-aadx loj Bëd din sunëman laa reeman za tio'p choon dxej mazri.

### Guyu xSprijt Dios luxdoo ree bën ad najt bën Israel

**11** Bën naj ree xi apóstoles Jesús con ree bën Judea, bën rliiladx ree laaman, gogbee reeman guial në ree bën ad najt bën Israel bililadx xtiidx Dios. <sup>2</sup>Abi' chi badxin Bëd Jerusalén, bën Israel ma rliiladx ree Jesucrist, bën sta zinal ree ley, gudilë reeman Bëd. <sup>3</sup>Rëb reeman lojman:

—¿Chexc zeel bichu'l lidx ree bën ad najt bën Israel abi' gudawnël laa reeman?

<sup>4</sup>Dxel guzuloj cayü Bëd diidx diidx guia'xchej xhienaag gojc zeel wejman lidx ree bën guin abi' rëbaman loj reeman:

<sup>5</sup>—Chi za'n luguiedx Jope, la'tgaj cabedx canaaban Dios, guza'can zi'c ruliüü cane'xhchalan. Baguian zi'c tijb lajd narooob naxii guidap xquinan caguijtan diidx xanyabaa xt lod za'n.

<sup>6</sup>Chi baguian zagdx xhie yu' loj lajd guin, baguian bedoxh ree në ree be yu' tajp guia' në ree bëël con ree be rzuju.

<sup>7</sup>Dxel biguiejn cha' bejn, naman: “Bëd, guzuli, bagüjt be gawil.” <sup>8</sup>Per badxi'nan rën: “Yajqui, Dad, din ad goctzi wayawan nidxuudx, ni ad rayalt gay bejn.” <sup>9</sup>Abi' guneeman diidx xanyabaa stijb, naman: “Ni ma basia Dios, ad rnieelan nidxuudx.”

<sup>10</sup>Choon volt gojc zian, dxel bayë'p gra ni guin xanyabaa. <sup>11</sup>Loj hor zii gajc bi't choon ree xinguiiaaw lod guren, zëëd reex diidx Cesarea, cayguil reex naj. <sup>12</sup>Abi' na xSprijt Dios lon guial chinë'n laa reex, ad chu' luxdon tio'p. Në guixo'p ree bën guie bën naj dux compniar ree binë'n. Abi' dugraczan badxu' lidx bën guin. <sup>13</sup>Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bën che luguiedx Jope din chica' reeman Simón, bën la gajc Bëd, <sup>14</sup>laaman na xhienaag gac ree xtolil perdon, con gra ree bën zojb lidxil.” <sup>15</sup>Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. <sup>16</sup>Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.” <sup>17</sup>Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

<sup>18</sup>Chi biguiejn ree bën guin ni rëb Bëd, dxel achetri rëb reeman lojman abi' baza't reeman Dios zagdx, rëb reeman:

—¿Ma rayagbee ree yan guial në ree bën ad najt bën Israel ma balüü Dios guial rayal yayüjn xgab por xtol reeman yadxi' tëë loj reeman lojman din gap reeman guialnaban tiblayaa delant lojman!

### Bililadx ree b́en Antioquía Jesucrist

<sup>19</sup> Chi mal bagújt ree bejn Esteban, dxel guzuloj rzunal reeman b́en rlliladx ree Jesucrist persi bire'ch gra ree b́en rlliladx guin niz Fenicia, niz Chipre nē Antioquía. Abi' gutie'ch reeman xti-idxza'c Jesucrist, per ganaxzi loj ree b́en Israel. <sup>20</sup> Per loj reeman no'ch b́elzi ree b́en Chipre nē ree b́en Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree b́en ad najt b́en Israel. <sup>21</sup> Gognē Dios laa reeman, dád zien ree bejn bililadx ni rēb reeman abi' bililadx reeman Jesucrist.

<sup>22</sup> Chi gogbee ree b́en Jerusalén rlliladx Jesucrist ni goc, guxhaal reeman Bernabé xt guiedx Antioquía. <sup>23</sup> Chi bidxinman ni, dád babaaman chi baguiaaman xhienaag cayagnē Dios b́en guin ree. Dxel guneenēman gra reeman dín con guidib luxdoo reeman gusnuu chinal reeman xtiidx Jesucrist. <sup>24</sup> Benza'c gojc Bernabé, dád gognē xSprijt Dios laaman abi' bililadxaman Jesucrist con guidib luxdoo. Zeel dád zien ree bejn bililadx Jesucrist.

<sup>25</sup> Dxelri wej Bernabé guiedx Tarso bigdiilaman Saulo. <sup>26</sup> Chi badxejlaman laaman, dxel binēman laaman xt Antioquía. Ni guzunē reeman b́en rlliladx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulēlaj reeman b́en rlliladx ree Jesucrist, cristian.

<sup>27</sup> Lēn ree dxej zii b́elzi ree b́en badēē xtiidx Dios loj ree bejn, guza Jerusalén wej reeman Antioquía. <sup>28</sup> Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. <sup>29</sup> Abi' ree b́en rlliladx Jesucrist luguiedx Antioquía, baya'n reeman diidx dín guido'p reeman zi'ctzi ni galguzuj gudēēd tijb gaj reeman, dín gagnē lasa' reeman, b́en

rlliladx ree Jesucrist, b́en zojb ree niz Judea. <sup>30</sup> Abi' zian been reeman. Dxel guxhaalnē reeman laan Saulo con Bernabé dín gudēēd reeman laan loj ree b́en rniabee ree b́en rlliladx Jesucrist niz Judea.

### Guyu Béd ladxguuib

**12** Lēn ree dxej zii guzuloj rey Herodes cusagziman b́elzi ree b́en rlliladx Jesucrist. <sup>2</sup> Abi' gunabeeman bagújt reeman Jacob bijch Waj, con espad. <sup>3</sup> Chi baguiaaman bayuladx ree b́en Israel ni beenman, dxel gunabeeman gunaaz reeman Béd. Ni ne goc lēn ree dxej lanij pascw chi raw reeman guiadxtil ad yu't lewadur. <sup>4</sup> Chi gunaaz reeman Béd, badxe' reeman laaman ladxguuib abi' gunabee rey Herodes tajp cwaa ree suldad dín guinia reeman ro' ladxguuib guin, tib cwaa gaj reeman naj tajp suldad. Dín beenman xgab nuzujman Béd loj ree b́en guiedx guin chi nidēd pascw. <sup>5</sup> Zian guyu Béd ladxguuib, gojp da't reeman laaman. Per gra ree b́en rlliladx Jesucrist ad rucwēēzt rbejdx rniab reeman Dios por laaman.

### Babēē Dios Béd ladxguuib

<sup>6</sup> Guxhin zii gajc chi yareguiaal cwēē Herodes Béd loj ree b́en guiedx guin, naga'yējs Béd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguuib guin. <sup>7</sup> Dxejczí bidxin tijb xi anjl Dios abi' basni tijb guij lēn ladxguuib guin, dxel baqui' anjl guin cwē'lēn Béd persi bacwēēnman laaman, rēbaman lojman:

—;Cari bixche!

Loj hor zii gajc biajb ree caden naxii yaa Béd, <sup>8</sup> abi' rēb anjl guin lojman:

—Guxhiidxi'ch lēnl balēē tēē xgurēchil.

Chi ma been Béd zian dxel rēb anjl guin:

—¡Gojt xcajpil, tanal naj!

<sup>9</sup>Laa barii gajc Béd nalaman anjl guin, per ad ragbeetaman bal diidxli naj ni cayüjn anjl guin, gunaladxaman cane'x-hchaalzaman. <sup>10</sup>Abi' gudéd reeman loj tibcwaa ree suldad guin, dxel gudéd reeman loj stibcwaa reeman. Chi bidxin reeman ro' portguiib ni rarii runejz guin, dxel xtijbzan bixal abi' barii reeman. Abi' chi bidxin reeman tijb xquin, yagaj basa'n anjl guin Béd. <sup>11</sup>Dxel gogbee Béd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëeman naj loj Herodes, con loj gra ni nüjnnë ree bën Israel naj.

<sup>12</sup>Chi bayagbee Béd ni guzacaman, dxel baguijman lidx Li, xniaa Waj, bën la gajc Marcw, lod riga' zien ree bejn cabejdx canab reeman Dios. <sup>13</sup>Chi gulajw Béd ro' port, dxel barii tijb biin la Rode ziquiaam chunin. <sup>14</sup>Per chi bayünbeem cha' Béd, dád babaam, dxel luar nixhialim ro' port guin, baxüünm bicojnm guial za' Béd ro' port guin. <sup>15</sup>Abi' rëb reeman lojm:

—¡Rajc guijquill!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

<sup>16</sup>Per Béd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. <sup>17</sup>Abi' been Béd sen loj reeman din yacwëez ro' reeman, dxel beman diidx xhienaag babë Dios laaman ladxguiib. Abi' rëbaman loj reeman:

—Gol be ni guie loj Jacob në loj gra ree bën rliadx Jesucrist.

Dxelri briiman yagaj zëman lood ren.

<sup>18</sup>Chi bareguiaal, ad radxejlt xhie giün ree suldad guin guial ad ragbeet reeman xhienaag barii Béd ladxguiib guin. <sup>19</sup>Dxel gunabee Herodes chigdiil reeman Béd, per ad badxejlt reeman laa-

man. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel barii Herodes Judea abi' bisobaman luguiedx Cesarea.

### Güjt rey Herodes

<sup>20</sup>Balen Herodes bën Tiro në ree bën Sidón, per baya'n ree bën guin diidx din chigneenë reeman laaman. Chi been reeman gan guneeñ reeman bën barii laj Blasto zagdxë, tijb bën naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zëed ni raw reeman. <sup>21</sup>Bazuj Herodes xhie dxej guinieenëman laa reeman abi' dxej zii gojt xab zagdxëman, gurej loj xyagxhilaman lod rniabeeman, zianz guzuloj guneeñman laa reeman. <sup>22</sup>Dxel guzuloj gurixdiaj ree bën guin, rëb reeman:

—¡Ad bejntan canee, tijb diosan!

<sup>23</sup>Loj hor zii gajc badëë tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxë luar nuzat' reeman Dios zagdxë.

<sup>24</sup>Per xtiidx Dios care'chzi care'chan gra ladczi abi' gra ladczi cayajcxhie ree bën rliadx laaman.

<sup>25</sup>Chi ma badëed ree Bernabé con Saulo ni guxhaal ree bën Antioquía, dxel baza reeman Jerusalén, binë reeman Waj, bën la gajc Marcw.

### Guzuloj Bernabé con Saulo bigtie'ch reeman xtiidx Dios

**13** Loj ree bën rliadx Jesucrist, bën zojb ree Antioquía, no'ch ree bën rudëed xtiidx Dios loj ree bejn në ree bën rülüü xtiidxaman. La reeman Bernabé, Simón bën rníee reeman Benya's, Lucio bën Cirene, Saulo con Manaén bën guni'snë Herodes tijbzi, bën gunabee Galilea. <sup>2</sup>Tijb dxej chi naba'n reeman, la'tgaj cabejdx canab reeman cuza't tëë

reeman Dios zagdx, rëb xSprijt Dios loj reeman:

—Gol bacaabee Bernabé në Saulo din giüün reeman dxiin rënan giüün reeman.

<sup>3</sup>Chi gulox guba'n reeman gurejdx tëë reeman Dios, dxel guxhoob yaa reeman guijc Bernabé con Saulo din gagnë Dios laa reeman abi' bazaadiidxnë reeman laa reeman.

### **Bernabé con Saulo wej reeman Chipre**

<sup>4</sup>XSprijt Dios naj bën guxhaal Bernabé con Saulo, zë reeman Seleucia, ni guyu reeman loj barcw, zë reeman yuj la Chipre, ni riga' loj nijsdoo. <sup>5</sup>Chi bidxin reeman niz Chipre, dxel luguedx Salamina guzuloj gutie'ch reeman xtiidx Dios lën ree xyadoo ree bën Israel. Në Waj binë reeman din giüünman laa reeman yudar. <sup>6</sup>Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bën Israel laman Barjesús, rajcaman guialbidxaa, rusquieeman bejn ree, rëbaman guial laaman naj bën rudëed xtiidx Dios loj ree bejn. <sup>7</sup>Barjesús guin rnieenëman Sergio Paulo zagdx, bën naj gobernador Chipre, rignia' da'taman. Gurejdx gobernador guin Bernabé con Saulo guial rënman gucaagdiajgaman xtiidx Dios. <sup>8</sup>Per bënbidxaa guin (con diidx grieg laman Elimas) guyënman nudxoonman guial nililadx Sergio Paulo xtiidx Dios. <sup>9</sup>Abi' Saulo, bën la gajc Pab, rniabee xSprijt Dios luxdooman guidiblagaa, baguiaadxijchaman loj bënbidxaa guin, <sup>10</sup>rëbaman:

—jXi'n xindxab lüj, ganax rusquieel, ganax niguijdx rüjnl, ad rëntczil ni zagdx! ¿Xt goc gudëel mod chinal ree bejn xnejz nali Dios? <sup>11</sup>Yan gudëed Dios lüj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexajc Elimas abi' ad gojctri nuguaaman, dxel raguuilaman chu guiniaaz yaaman guial ad rajctri

ruguaaman. <sup>12</sup>Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

### **Bidxin Pab con Bernabé niz Pisidia**

<sup>13</sup>Chi ma gudëd gojc zian, guyu Pab con ree xcompniaraman loj barcw luguedx Pafos abi' zë reeman luguedx Perge ni riga' niz Panfilia. Ni basa'n Waj laa reeman bayejcaman Jerusalén. <sup>14</sup>Dxel barii reeman guiedx Perge, zë reeman luguedx Antioquia ni riga' niz Pisidia. Abi' dxej raziiladx ree bën Israel, guyu reeman lën xyadoo ree bën Israel zianz gurej reeman. <sup>15</sup>Dxel chi gulox biil bën biil tib lajt loj libr bacaa Moisejs në loj libr bacaa ree bën badëë xtiidx Dios loj ree bejn, gunee ree bën rniabee lën yadoo guin, rëb reeman loj Pab con Bernabé:

—Bal xhie guiëbidi loj ree bën riga' guie din gudëedi consejw loj reeman, zajc guiëbidan yan.

<sup>16</sup>Dxel guzuli Pab, beenman sen loj reeman din yacwëez ro' reeman, dxel rëbaman:

—Bën Israel, në gra ree bën rdxeb Dios, gol bacaagdiajg: <sup>17</sup>Dux Dios ree, nayajc ree bën Israel, gulejman dux bëngulal ree abi' laaman been persi gojcxhie reeman, chi sta zojb reeman zi'c benzit niz Egipto. Dxel con xguialrniabeeman babëëman laa reeman Egipto. <sup>18</sup>Abi' baslejnguijcaman laa reeman loj tiuu ijz ni guzu reeman niz lod naj ganax yujbidx, <sup>19</sup>banijt tëëman gajdx ree nacion ni gure Canaán persi badëëman guidxliuj guin ree loj dux bëngulal ree. <sup>20</sup>Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel bën badëëd xtiidx Dios loj ree bejn gojc xjuejs bigra reeman. <sup>21</sup>Dxel gunab reeman din chu' tijb rey nabee laa reeman, abi' bazuj Dios rey Saül xi'n Cis, bën zëed

loj xdiaa Benjamín persi gunabeeman laa reeman tiuu ijz. <sup>22</sup> Chi bisüd Dios rey Saúl, dxel bazujman rey Davi. Abi' rëbaman: “Ma baguian guial Davi xi'n Isái, nabanx zi'c rënan, güün tēēx cumplid da diidxan guial güünx gra zi'c rënan.” <sup>23</sup> Abi' yan zi'c gajczi rëb Dios, loj gajc xdiaa rey Davi, bñii Jesús bën guxhaalaman din yabëeman bën Israel ree loj dol. <sup>24</sup> Chi gad Jesús gui't, Waj bën baroobnijs bejn ree, bagojnman gra ree bën Israel guial rayal yayüjn reeman xgab por xtol reeman tiobnijs tēē reeman. <sup>25</sup> Chi ma zidyob yadiblagaa xguialnaban Waj, dxel rëbaman: “Ad najtan bën naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

<sup>26</sup> Yan, dugra ree nayajc ree xdiaa Abraham nē gra los demazri ree bën rdxeb Dios, par dunuj ree naj xtiidxaman ni rugojn reeman dunuj ree, xhien-aag rabëë Jesucrist dunuj ree loj dol. <sup>27</sup> Per ree bën Jerusalén con ree xguxtis reeman ad bayagbeet reeman Jesús. Ad gogbee tēēt reeman xhie rën guiëb xtiidx Dios ni bacaa ree bën badëed ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios. <sup>28</sup> Abi' majsi achetczi xtol Jesús guyu, per ni'czi zian rëb gajc reeman loj Pilato guial nabeeman guiëtaman. <sup>29</sup> Chi gulox been reeman gra zi'c ca loj xtiidx Dios xcwent Jesús, balet reeman laaman loj crüjz abi' baquie'ch reeman laaman. <sup>30</sup> Per Dios basban laaman, <sup>31</sup> dxel loj zien dxej balüülojman loj ree bën binë laaman chi briiman niz Galilea zëman Jerusalén, abi' yan laa reeman naj bën rniee por laaman loj ree bejn.

<sup>32</sup> Zeel caygojnman lëjt diidxza'c guin ree, guial promejs been Dios loj ree dux bëngulal ree, <sup>33</sup> ma beenman laan cumplid con dunuj ree guial zio'p ree

loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'nan abi' diizd yan ma rajpil guialrniabee zi'cgajc naj.” <sup>34</sup> Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: “Naj günle' lëjt zi'c benan promejs loj Davi.” <sup>35</sup> Abi' rëb tēē stib lajt loj xtiidxaman: “Ad zatiëjbtill xhin xcuerp xi'nl, bën naya nali.” <sup>36</sup> Yan diidxliczi diidx guin ree ad miet ree xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman. <sup>37</sup> Per xcuerp Jesús bën basban Dios, ad guxintan. <sup>38</sup> Zeel caygojnman lëjt compniar din gagbeedi guial por laaman ma yu' perdon par dux tol ree. <sup>39</sup> Graczi bën rililadx Jesucrist ma gojc perdon gra xtol reeman ni ad gojct ni ajc perdon por ley badëë Dios loj Moisejs. <sup>40</sup> Zeel gol gojp cudad chitëë saquidi zi'c bacaa ree bën badëë xtiidx Dios loj ree bejn, lod rëb:

<sup>41</sup> Gol bacaagdiajg, lëjt bën ruze' ree da diidxan,  
gol badxalojdi gol gunidloj tēē.  
Din loj ree dxej nabandi gün reen ni xt ni'quid zaliladxtidi,  
majsi chu na laa reen lojdi.

<sup>42</sup> Chi barii Pab con Bernabé lën xyadoo ree bën Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii. <sup>43</sup> Chi barii ree bën guin lën yadoo guin, zien da't reeman binal Pab con Bernabé, zi'c ree bën Israel zi'c ree bën ad najt bën Israel, bën rën ree Dios zi'cgajc ree bën Israel. Abi' rëb Pab con Bernabé loj reeman din sudxi'ch reeman loj nejz zagdxe guredx Dios laa reeman guial rënman laa reeman.

<sup>44</sup> Chi bidxin dxej ni raziiladx ree bejn, gra bën luguiedx guin bado'p din gu-



caagdiajg reeman xtiidx Dios. <sup>45</sup>Per chi baguiaa ree b́en Israel zien da't ree bejn riga' yagaj, dxel guyu guialnadédloj luxdoo reeman abi' guzuloj caneeGUIJDX reeman canee tée reeman diidxGUIJDX loj Pab. <sup>46</sup>Dxel sin guialrdxeb badxi' Paban con Bernabé loj reeman, rēb reeman:

—Yaloj lējt rayal yagojnan xtiidxza'c Dios, lējt najdi b́en Israel, per yan ad rēntidi gucaagdiajgudi laan, dxel lējt gajc culiüü guial ad zajct yayalidi guialnaban tiblyaa con Dios. Yan ma yugtie'chan diidxza'c guin ree loj ree b́en ad najt b́en Israel. <sup>47</sup>Din zian gunabee dux Dad ree Dios dunujn, chi rēbaman tib lajt loj xtiidxaman:

Nuzun lūj zi'c GUIJ par gra ree nacion, din chel guidibchicniaa loj GUIDXLIUJ chicojnl xhienaag gac ree bejn perdon.

<sup>48</sup>Chi bigueijn ree b́en ad najt b́en Israel zian, dxel babaa reeman, guzuloj rēb reeman guial zagdxē naj xtiidx Dios, abi' graczi b́en ma naj yayal guialnaban tiblyaa con Dios, bililadx reeman xtiidxaman. <sup>49</sup>Zianan zeel bire'ch xtiidxza'c Dios guidib niz ni. <sup>50</sup>Per ree b́en Israel batiaalGUIIW reeman b́engunaa rej ree laydoo zianczi naj tēē reeman b́en zobjloj luguiedx zii, nē ree xinguaaw naj gajc xin zobjloj, din sunal reeman Pab con Bernabé xt yabēē reeman laa reeman ni. <sup>51</sup>Dxel Pab con Bernabé gudxiJP guxyuj guia' reeman zi'c tījb sen guial ad bazooBT ree b́en guin diidx, dxel zē reeman Iconio. <sup>52</sup>Per ree b́en bililadx Jesús niz ni, ma rniabee xSpriJT Dios luxdoo reeman guidiblagaa abi' dád rabaa reeman.

### Bidxin Pab con Bernabé Iconio

**14** Luguiedx Iconio, Pab con Bernabé guyu reeman lēn xyadoo ree b́en Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree b́en Israel zi'c ree b́en

ad najt b́en Israel. <sup>2</sup>Per ree b́en Israel ad bililadx batiaalGUIIW reeman b́en ad najt ree b́en Israel persi guzuloj been reeman xgab mal por ree b́en rliladx Jesucrist. <sup>3</sup>Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rliladx reeman Jesucrist, laaman badēēd guialrniabee loj reeman persi been reeman zien da't ree milagr nē mazri ree ni ren, persi balüü Jesucrist guial diidxli naj ni rēb reeman xcwent Dios. <sup>4</sup>Per ree b́en luguiedx zii gojC reeman tio'p lala', garol reeman guzunē ree b́en Israel zagarol reeman guzunē apóstoles guin ree. <sup>5</sup>Dxel zi'c ree b́en Israel zi'c ree b́en ad najt b́en Israel, baya'n reeman diidx con ree guxtis din tilē reeman Pab con Bernabé gucaaguiaj tēē reeman laa reeman. <sup>6</sup>Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, nē gra ree guiedx riga' niz ni, <sup>7</sup>gunee reeman xtiidxza'c Jesucrist.

### Bacaaguiaj reeman Pab Listra

<sup>8</sup>Luguiedx Listra guyu tījb xinguaaw ad rajct rza, ad guzatczix guial naxin guia'x diizd chi golix abi' zobjix <sup>9</sup>cucaagdiajguix ni rēb Pab. Chi baguiaa Pab laax, gogbeeman guial rliladxix par yayajquix. <sup>10</sup>Abi' guneeMan rejs, rēbaman:

—jBisu, guzuli zagdxē!

Loj hor zii gajc gutiajs xin guin, guzulix abi' guzuloj cazax. <sup>11</sup>Chi baguiaa ree bejn ni been Pab, guzuloj canee reeman rejs diidx Licaonia, rēb reeman:

—Dios naj ree zi'c bejn ma biguiajt lod nadxu' ree.

<sup>12</sup>Abi' rēb reeman guial Bernabé naj dios Júpiter, guiáad Pab naj dios Mercurio guial laaman naj b́en rniee loj reeman. <sup>13</sup>Abi' ro' guiedx guin niz lod ru bejn naj xyadoo Júpiter, dxel bixhioz yu'

lën yadoo guin binëman go'n ree con ree guiaa, abi' laaman con ree bén guin guyën reeman nugüjt reeman go'n guin ree din niën reeman apóstoles guin ree zi'c xdios reeman. <sup>14</sup>Per chi gogbee Pab con Bernabé zian, gudixya' xab reeman, guzëb reeman lad ree bén guin, rbixdiaj reeman rëb reeman:

<sup>15</sup>—Gol bacaagdiajg, ¿chexquiza zeel rüjndi zian, awa bejn gajc dunujn zi'c-gajc lëjt? Awa par zianclan zio'pan din yanan lojdi din yasa'ndi ni rüjndi, din achetdzi lasajc reen. Mejorli gol binal xnejz Dios naban, bén been xanyabaa në guidxliuj nëtëë nijsdoo con gra ni yu' loj reen. <sup>16</sup>Tiamp gulal Dios baslaa been ree bejn ni guyëntzi reeman. <sup>17</sup>Per ni'czi zian, zianczi balüüman chu najman por ree ni zagdxë ni rüjnman. Din laaman naj bén razaladx guia con guialnaza'c abi' razaladxaman ni radaaw ree din chu' du luxdoo ree zagdxë. <sup>18</sup>Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bén guin go'n guin ree din niën reeman laa reeman zi'c xdios reeman.

<sup>19</sup>Per bëlzi ree bén Israel zojb Antioquía në Iconio, chi bidxin reeman luguiedx Listra been reeman gan bati-aalguüiw reeman bén luguiedx guin ree. Dxel bacaaguij reeman Pab abi' gunaladx reeman ma güjtaman abi' guxoobyuj reeman laaman, babëë reeman laaman luguiedx guin. <sup>20</sup>Per chi bido'p ree bén rliladx Jesucrist gadëd lod naga'man, dxel bixchëman, bayuman luguiedx guin stjib. Chi bareguiaal briinëman Bernabé zë reeman luguiedx Derbe.

<sup>21</sup>Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Listra në Iconio nëtëë Antioquía. <sup>22</sup>Luguiedx zii ree badxe' reeman luxdoo ree bén rliladx Jesucrist. Rëb reeman loj reeman

din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. <sup>23</sup>Abi' tëë loj tijb gaj ree guiedx guin bacaabee reeman bengol nabee ree loj ree bén rliladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bén ma bililadx reeman.

### **Badxin ree Pab con Bernabé Antioquía ni riga' niz Siria**

<sup>24</sup>Chi baza ree Pab con Bernabé niz Pisidia, bidxin reeman niz Panfilia. <sup>25</sup>Abi' gunee reeman xtiidx Dios luguiedx Perge, dxel zë reeman guiedx Atalia. <sup>26</sup>Ni guyu reeman loj barcw zë reeman Antioquía, luguiedx lod basa'n ree los demazri ree bén rliladx Jesucrist laa reeman con Dios din gagnëman Pab con Bernabé din gutie'ch reeman xtiidxaman. Abi' dxiin guin naj ni ma baloox reeman. <sup>27</sup>Dxel chi bidxin reeman Antioquía, bato'p reeman bén rliladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejz din chililadx ree bén ad najt bén Israel Jesucrist. <sup>28</sup>Ni guzu Pab con Bernabé xchej, guzunë reeman bén Antioquía rliladx ree Jesucrist.

### **Guyu gabilt Jerusalén**

**15** Lën ree dxëj zii bidxin bëlzi ree bén Judea luguiedx Antioquía. Abi' guzuloj rëb reeman loj ree bén rliladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon. <sup>2</sup>Dxel Pab con Bernabé dád zro' gudijldiidx reeman con ree bén guin. Dxel bacaabee ree bén rliladx Jesús Pab në Bernabé, në ree ben ren din che reeman Jerusalén chigneenë reeman apóstoles guin ree, con ree bengol rniabee loj ree bén rliladx Jesucrist

din guguaa reeman xhienaag güün reeman xcwent sen guin.

<sup>3</sup>Abi' badxe'nejz ree bën Antioquía rililadx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bën rililadx ree Jesucrist, bën zobj ree niz ni guial ma rililadx ree bën ad najt ree bën Israel xtiidx Dios. Abi' graczi bën ma rililadx Jesucrist niz ni, dád babaa reeman chi biguiejn reeman zian.

<sup>4</sup>Chi bidxin Pab con Bernabé Jerusalén, dxel baca' ree bën rililadx Jesucrist laa reeman, con ree apóstoles, con ree bengol rniabee loj ree bën rililadx Jesucrist. Abi' be ree Pab diidx con Bernabé gra ni been Dios con laa reeman. <sup>5</sup>Per yu' ree bënfarisew ma rililadx Jesucrist, guzuli reeman abi' rëb reeman:

—Bën ad najt ree bën Israel abi' ma rililadx reeman Jesucrist, rüjn naguiejn chu' reeman sen ru ree bën Israel, gag-bee tëë reeman guial rayal chinal reeman xley Moisejs.

<sup>6</sup>Dxel bado'p ree xi apóstoles Jesús con ree bengol rniabee loj ree bën rililadx Jesucrist din guidoon xhienaag güün reeman. <sup>7</sup>Guial tant canee reeman por zian, dxel guzuli Bëd, rëbaman loj reeman:

—Gradi compniar raliduladx ree Jesucrist, lëjt ragbee guial diizd gocli gulej Dios naj lojdi din chignen xtiidxza'c Jesucrist loj ree bën ad najt bën Israel din chililadx reeman laaman. <sup>8</sup>Abi' Dios bën nünbee luxdoo graczi ree bejn, balüüman guial naj reeman xbejnman guial ma badëed xSprijtaman loj reeman zi'cgajc baneeman du loj ree. <sup>9</sup>Zi'c ruguaa Dios dunuj ree ziangajc ruguaaman laa reeman, din zi'c basiaman du luxdoo ree ziangajc basiaman luxdoo reeman guial ma rililadx reeman Jesucrist. <sup>10</sup>Yan, çchexc zeel ad ridxga'tidi

ni ma been Dios abi'za rniabeedi chinal ree bën rililadx Jesucrist ley ni ni'qui dunuj ree ni'qui dux bëngulal ree ad gojct naguieen ree zi'c rniabee ley guin?

<sup>11</sup>Dunuj ree rayagbee guial por ni zagdx ni been Dad Jesucrist, been Dios dux tol ree perdon zi'cgajc laa reeman.

<sup>12</sup>Dxel bacwëëz ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree bën ad najt bën Israel. <sup>13</sup>Chi gulox gunee reeman, dxel në-gajc Jacob rëb:

—Gradi compniar raliduladx ree Jesucrist, gol bacaagdiajg: <sup>14</sup>Simón Bëd be diidx duloj ree xhienaag guzuloj gulej Dios bën ad najt ree bën Israel din gac reeman xbejnman. <sup>15</sup>Gra ni ma gojc naj zi'c ni bacaa ree bën badëë xtiidx Dios loj ree bejn loj xtiidxaman lod rëb:

<sup>16</sup>Chi ma gojc zian,

yayünxhiey ree da bejnan mazri zi'c goc chi naban Davi, gacxhiey reeman por ree bën sta naban, zi'c guban ree bejn xtiamp Davi abi' por laa reeman yayajcxhiey ree da bejnan.

<sup>17</sup>Din yaguiil ree los demazri ree bejn guial guiën reeman naj, gra ree bën nacion ren, yaguiil guial guiën reeman naj,

bën ma gule reen din gac reeman da bejnan,

bën guiguiejn ree guza't ree bejn naj.

<sup>18</sup>Zian na Dios, bën cugojn bejn ree gra ree nine diizd tiamp gulal.

<sup>19</sup>'Zeel naladxan ad rayalt chu güün naguiejn bën ad najt ree bën Israel par chinal reeman ley, laa reeman guial ma basa'n xcostumbr reeman par chinal reeman xnejz Dios. <sup>20</sup>Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tëët sunë reeman ben ren bën ad najt lacheel reeman, ad rayalt gaw reeman bëël rberejn ni'qui rejn. <sup>21</sup>Zian

yaguie'ch ree loj reeman, din diizd tiamp gualal tijb gaj guiedx yu' b́en ruluü laa reeman xhie ŕen guieb xley Moisejs ni rool reeman ĺen ree yadoo dxej raziiladx ree bejn.

<sup>22</sup> Dxel apóstoles guin ree con ree bengol rniabee loj ree b́en rliiladx Jesucrist, con los demazri ree b́en rliiladx Jesucrist, ŕeb reeman gucaabee reeman b́en guixhiaalńe reeman Pab con Bernab́e din che reeman Antioquía. Abi' bacaabee reeman Judas, b́en la gajc Barsabás, ńe Silas, laa reeman rajp guialrniabee loj ree b́en rliiladx Jesucrist. <sup>23</sup> Abi' guxhaalńe reeman laa reeman tijb gui'ch ni ŕeb:

“Dunujn nayajcan xi apóstoles Jesús, con ree bengol rniabee loj ree b́en rliiladx laaman, ńe los demazri ree b́en rliiladx laaman. Ragajp diozan ĺejt b́en ad najt ree b́en Israel, per nayajc ree compniar raliduladx ree Jesucrist, ĺejt zojbidi Antioquía, ńe los demazri ree b́en zojb ree niz Siria ńet́e ńiz Cilicia. <sup>24</sup> Ma bayagbeen guial yu' ree b́en duladxan brii sin dux tiidxbeen, abi' cagu'nawéeg reeman ĺejt con xtiidx reeman persi ad radxeljt xhie güündi guial na reeman lojdi rayal chu'di sen ni ru ree b́en Israel güün t́eedi zi'c rniabee xley Moisejs, per ad dunujtan baxhaal laa reeman. <sup>25</sup> Zeel bado'pan abi' raguie'chan guial zagdxenaj yacaabee b́elzi dux compniaran din guidganaj reeman ĺejt, guidńe t́e reeman tio'p dux compniaran, Bernab́e con Pab, b́en rayen da'tan. <sup>26</sup> Zien ree ni guijdx cuhaagloj reeman guial cayüjn reeman sirv loj Dad Jesucrist. <sup>27</sup> Dxel cayxhaalńe'n laa reeman Judas con Silas, laa reeman na lojdi gra con quijb xtiidx reeman. <sup>28</sup> Abi' zi'c naj xgab bazaladx xSprijt Dios du lojn, dxel achetri naguiejn ŕijn yanabeen ĺejt ni güündi, ni rayalzi cu'guijquidi naj guial, <sup>29</sup> ad gawidi xbéel ree be ni rbe'c ree bejn loj ni naj xdios reeman, ad gaw t́eedi béel rberejn,

ni'qui rejn, ad sunédi ben ren b́en ad najt lacheelidi. Bal gapidi cudad ad zijjntidi gra ree nine, zagdxequi güündi. Gagńe Dios ĺejt.”

<sup>30</sup> Zian gojcan, gui'ch guin naj ni guxhaalńe reeman guidap ree b́en guin par luguiedx Antioquía. Ni bato'p reeman b́en rliiladx ree Jesucrist abi' bayü reeman gui'ch guin loj reeman. <sup>31</sup> Chi biil reeman laan, dád nix guyu luxdoo reeman por ree diidx zagdxen ni zéed lojn. <sup>32</sup> Abi' Judas con Silas guial ńegajc reeman rajp quiarguejn par gudéed reeman xtiidx Dios, dxel zien naj ni guneené reeman b́en rliiladx ree Jesucrist, bagu' reeman luxdoo reeman con xtiidx reeman. <sup>33</sup> Chi ma gudéd zien dxej za' ree Judas con Silas ni, bazaadiidxńe ree b́en rliiladx Jesucrist laa reeman din yaguiaj reeman lod za' ree b́en guxhaal laa reeman, ŕeb reeman loj reeman: “Chigńe Dios ĺejt zagdxen.” <sup>34</sup> Per Silas beenman xgab baya'nman ni mazri. <sup>35</sup> Abi' Pab con Bernab́e baya'n reeman Antioquía mazri, laa reeman con ree ben ren basnuu balüü reeman gutie'ch t́e reeman xtiidxza'c Jesucrist loj ree bejn ni.

### Ni barojp volt brii Pab biglüüman xtiidx Dios guiedx ren ree

<sup>36</sup> Chi gudéd tio'p choon dxej, dxel ŕeb Pab loj Bernab́e:

—Yo' stijb yugnaj dux compniar ree b́en rliiladx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

<sup>37</sup> Bernab́e guyen niné reeman Waj, b́en la gajc Marcw. <sup>38</sup> Per Pab ad cwéjbt niné reeman laaman, din chi we reeman niz Panfilia guro'nladxaman laa reeman, ad binétraman laa reeman. <sup>39</sup> Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel biné Bernab́e Marcw, guyu reeman loj barcw zé reeman yuj la Chipre ni riga' loj nijsdoo, <sup>40</sup> dxel gulej Pab Silas din chiné-

man laaman abi' rëb los demazri ree bën rlliladx Jesucrist loj reeman guial chinë Dios laa reeman zagdx. <sup>41</sup>Zianz gudëd reeman niz Siria në niz Cilicia, ragu' reeman luxdoo ree bën rlliladx Jesucrist niz ni.

### Bine ree Pab con Silas Timoteo

**16** Chi bidxin Pab con Silas guiedx Derbe në guiedx Listra abi' Listra bidxaagloj reeman tijb bën rlliladx Jesucrist, laman Timoteo, xniaaman naj bën Israel, nëman rlliladx Jesucrist guiaad xdadaman naj bën grieg. <sup>2</sup>Graczi ree bën rlliladx Jesucrist, bën zobj ree guiedx Listra në Iconio ruza't laaman zagdx. <sup>3</sup>Dxel rëb Pab chinëman Timoteo, per yaløj badxe'man laaman sen ni ru ree bën Israel, chitëë xhie guiëb ree bën Israel riga' niz ni, din gra reeman ragbee guial naj xDadaman bën grieg. <sup>4</sup>Graczi ree guiedx ni gudëd reeman bagojn reeman bën rlliladx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree bën rlliladx laaman Jerusalén. <sup>5</sup>Zianan zeel guzudxi'ch ree bën niz ni loj guialrlliladx reeman Jesucrist, abi' guixie guixie gojcx-hiej mazri ree bën rlliladx laaman.

### Balüüloj tijb bën Macedonia loj Pab

<sup>6</sup>Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudëdzinejz reeman niz Frigia në niz Galacia <sup>7</sup>abi' bidxin reeman niz Misia. Ni been reeman xgab niej reeman niz Bitinia, per ad cwëjb gajct xSprijt Dios niej reeman niz ni. <sup>8</sup>Dxelri gudëdzinejz reeman niz Misia, bidxin reeman guiedx Troas. <sup>9</sup>Yagaj, guxhinzii guzajc Pab zi'c rülüü cane'xhchaalaman. Baguaaman tijb xinguaaw zëëd niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

<sup>10</sup>Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bën cabejdx dunujn niz ni par yatie'chan xtiidxza'c Jesucrist.

### Bidxin ree Pab con Silas Filipos

<sup>11</sup>Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis. <sup>12</sup>Yagaj badxoon bio'n Filipos, guiedx mazri zobjloj niz Macedonia, per Rom rniabee guiedx zii, ni badxu'n bëlzi ree dxej. <sup>13</sup>Abi' tijb dxej raziiladx ree bejn, bariin luguiedx guin bio'n tijb ruguiiwro', lod rayagbeen rado'p ree bën Israel par cwedx reeman Dios. Abi' badxu'n baneen xtiidxza'c Jesucrist loj ree bëgunaa bado'p yagaj. <sup>14</sup>Tijb ree bëgunaa guin la Lidia, najman bën Tiatira, ruto'man lajd zagdx ni culor murad. Diidxli rdxebaman Dios abi' cucaagdiajgaman. Dios guxhal xquiarguejnman din gucaagdiajgaman zagdx gra ni rëb Pab. <sup>15</sup>Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rlliladxidi guial ma rlliladxan Jesucrist, gol baya'n lidxan.

Dxel beenman naguiejn baya'nan lidxaman.

<sup>16</sup>Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xinxab luxdoo, abi' por xguialrniabee xinxab guin rnieeya'm guiaad ree bën guzii laam dád zro' milia rüjn reeman gan por dxiin guin. <sup>17</sup>Dxel bidnalim Pab con dunujn, rbidxa'm rëbim:

—Bën guie ree rüjn xchiin Dios yu' xanyabaa, laa reeman gugojn lëjt xhien-aag gaquidi perdon.

<sup>18</sup>Zien dxej da't beenm zian, xt chi balenya' Pab, dxel bayejcaman rëbaman loj xinxab yu' luxdoo:

—Por xguialrniabee Jesucrist, rni-abeen lüj din yariil luxdoo biin guie.

Loj hor zii gajc barii xindxab guin luxdoo.

<sup>19</sup> Per chi gogbee ree bén guzii laam guial ad zajctri güünm gan milia par laa reeman, dxel gunaaz reeman Pab con Silas, binë reeman laa reeman roylay loj guxtis. <sup>20</sup> Chi bayü reeman laa reeman loj ree guxtis guin, rëb reeman:

—Xin Israel guie ree rbëë reex wadijl du ladx ree, <sup>21</sup> abi' rulüü reex costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

<sup>22</sup> Dxel wajs gra ree bén guin contr laa reeman, abi' gunabee ree guxtis guin gulëë xab Pab con Silas din quin reeman laa reeman con var. <sup>23</sup> Chi gulox gudijn da't reeman laa reeman, dxel bilu' reeman laa reeman ladxguuib abi' gunabee reeman bén rajp ro' ladxguuib guin din gapdxi'chaman laa reeman. <sup>24</sup> Chi biguiejn bén rajp ro' ladxguuib guin zian, dxel bilu'man laa reeman xt lën cuart bigra yu' lën ladxguuib guin, guxhiiman guial reeman loj tabl naal con caden.

<sup>25</sup> Per garol guiaal, la'tgaj cabejdx canab Pab con Silas Dios, cayool tëë reeman cant par laaman, dxel cucaagdiajg los demazri ree bén yu' ladxguuib guin. <sup>26</sup> Dxel tijbzi golp guzuloj xudoxh, niz ni niz guie rurlia xcimiant ladxguuib guin. Loj hor zii gajc bixal gra ree xpörtan abi' baxiec ree caden naxii gra ree bén yu' lënan. <sup>27</sup> Chi baban bén rajp ro' ladxguuib guin abi' baguiaaman zojbyal gra ree xpörtan, gulëë xi espadaman din nugüjt laagajcaman guial gunaladxaman gra ree bén yu' ladxguuib guin ma baxüün. <sup>28</sup> Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

<sup>29</sup> Laa gunab gajc bén guin tijb guij, dxel ruxüünman guyuman, rnij-

man guial rdxebaman, bigzuxibaman loj Pab në loj Silas. <sup>30</sup> Dxel babëëman laa reeman, gunabdiidxaman loj reeman, rëbaman:

—Dad, gol guna, ¿xhie rayal günan din güün Dios naj perdon?

<sup>31</sup> Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

<sup>32</sup> Abi' be reeman xtiidx Dios lojman con loj gra ree bén zoj b lidxaman.

<sup>33</sup> Zianz guxhin zii gajc gudiiibaman lod nadxeelguijdx reeman, dxel gurobnijsaman con gra xfamilaman. <sup>34</sup> Abi' bignëman laa reeman lidxaman, dxel badëëman ni gudaw reeman. Guiaad laaman dád nix yu' luxdoo man con gra xfamilaman Guial ma rililadx reeman Dios.

<sup>35</sup> Chi bareguiaal, guxhaal ree guxtis guin suldad ree persi biguiedx reeman loj bén rajp ro' ladxguuib guin guial guslaaman Pab con Silas. <sup>36</sup> Abi' rëb bén rajp ro' ladxguuib guin loj Pab:

—Ma na ree guxtis guial guslaan lëjt. Yan ma zajc yaguiajdi ad chu'di xgab.

<sup>37</sup> Per rëb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bén guiedx, ni'quid baneet reeman mod nadëëdan cwent loj reeman con badxe' reeman dunujn ladxguuib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalëë reeman dunujn.

<sup>38</sup> Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas. <sup>39</sup> Dxel wej reeman bignab reeman perdon loj Pab con Silas babëë tëë reeman laa reeman, rëb reeman loj reeman din yaza reeman luguiedx guin.

<sup>40</sup> Chi barii reeman ladxguuib, wej reeman lidx Lidia. Zianz chi gulox guneenë reeman los demazri ree bén rililadx ree Jesucrist din chu' luxdoo reeman sudx-

i'ch reeman loj ni rililadx reeman, dxel baza reeman.

### Bidxin ree Pab con Silas Tesalónica

**17** Chi zë Pab con Silas, gudëd reeman niz Anfípolis në niz Apolonia zianz bidxin reeman luguiedx Tesalónica lod yu' tijb xyadoo ree bën Israel. <sup>2</sup> Abi' zi'c goc xcostumbr Pab, wejman lën yadoo guin, choon dxej raziladx ree bejn. Wejman bigneenëman laa reeman xtiidx Dios. <sup>3</sup> Bagojnman balüü tēëman laa reeman loj xtiidx Dios lod rëb guial naj sagdiaj Cristo, abi' chi ma gūjtaman yabanman stijb. Rëbaman loj reeman:

—Jesús ruzat gajcan lojdi, laagajcaman naj Cristo din yabëëman dunuj ree loj dol.

<sup>4</sup> Yu' ree bën Israel guin bililadx abi' bachajg reeman Pab con Silas. Në zien ree bën grieg rën Dios bililadx, nētëë zien ree bēngunaa zobjloj bililadx Jesús. <sup>5</sup> Per ree bën Israel ad bililadxt Jesucrist, gudëdloj reeman abi' bato'p reeman benmal ziza ree lunejz persi gulëë reeman wadijl luguiedx guin, abi' guyu reeman lidx Jasón, raguiil reeman Pab con Silas din cwëë reeman laa reeman guzuj reeman laa reeman loj ree bën guiedx guin. <sup>6</sup> Per guial ad badxejlt reeman laa reeman yagaj, dxel guxoobyuj reeman Jasón në ree ben ren bën rililadx Jesucrist, binë reeman laa reeman loj guxtis, rbixdiaj reeman, rëb reeman:

—Tio'p ree xin cabëë wadijl guidib guidxliuj, ma bi't reex guie, <sup>7</sup> abi' lidx Jasón zobj reex. Laa reex con gra ree bën nuchajg laa reex, ad cayūjnt reex zi'c rniabee xley rey César, din rëb reex guial yu' zatijb rey la Jesús.

<sup>8</sup> Chi biguiejn ree guxtis guin zian con ree bejn, gra loj xgab been reeman. <sup>9</sup> Per Jasón con los demazri ree bën guyu ladxguuib guin gudijx reeman loj

ree guxtis guin, dxel baslaa reeman laa reeman.

### Bidxin Pab con Silas Berea

<sup>10</sup> Guxhinzii gajc, guxhaal ree bën rililadx Jesucrist Pab con Silas luguiedx Berea. Chi bidxin reeman ni, wejman lën xyadoo ree bën Israel. <sup>11</sup> Mazri benza'c naj ree bën Israel guin guial loj ree bën Israel zobj Tesalónica. Con gan bacaagdiajg reeman ni rëb Pab. Abi' guixie guixie rusiid reeman xtiidx Dios, din gagbee reeman waliqui ni rëb Pab ya. <sup>12</sup> Zeel dád zien reeman bililadx Jesucrist, nētëë zien bën grieg bililadx laaman zi'c ree xinguaaw zi'c ree bēngunaa zobjloj niz ni. <sup>13</sup> Chi gogbee ree bën Israel zobj Tesalónica guial catie'ch Pab xtiidx Dios luguiedx Berea, dxel wejman ni bigtiaalguiiw reeman bejn ree din guidxe'ch reeman Pab. <sup>14</sup> Per ree bën rililadx Jesucrist ad goglaat reeman, laa guxhaal gajc reeman Pab niz ro' nijsdoo. Guíaad Silas con Timoteo baya'n reeman mazri Berea. <sup>15</sup> Abi' ree bën biglu'nejz Pab, xt Atenas binë reeman laaman. Chi baza reeman ni, bignë reeman xruson Pab din diob che Silas con Timoteo chinal reeman laaman.

### Bidxin Pab Atenas

<sup>16</sup> La'tgaj cabëz Pab guidxin Silas con Timoteo luguiedx Atenas, guyunayaman guial baguiaaman zien da't ni rajp ree bejn niz ni zi'c dios. <sup>17</sup> Zeel wejman lën xyadoo ree bën Israel bigneenëman laa reeman në los demazri ree bën rën Dios zi'c ree bën Israel, guixie guixie rnieenëman chutëëz bën rdxaaaglojman niz galay guiedx guin. <sup>18</sup> Guneenë tēëman garol ree bën zinal ni balüü bën brii laj epicultureo, në za garol ree bën estoicos. Abi' yu' reeman rëb:

—¿Xhienin rniece xin guin zeel rniece da'tix?

Yu' tēë reeman rëb:

—Rulüü xtiidx dios ren ree bén ad naguieenbeet ree catie'chix.

Rëb reeman zian guial caneenë Pab laa reeman xtiidxza'c Jesucrist në xcwent guial babanman tijb. <sup>19</sup>Dxel binë reeman Pab tijb luar la Areópago, lod rado'p reeman. Abi' guilunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie? <sup>20</sup>Din rül diidx du lojn ni ad rayagbeetan, zeel rayënan yayagbeen xhie rën guiéban.

<sup>21</sup>Graczi ree bén Atenas, con los demazri ree benzit zojb ni, zianczi za' reeman zian. Ruladx reeman téd reeman dxej, gucaagdiajg reeman o gü reeman ni naj ree nicüb.

<sup>22</sup>Dxel guzuli Pab galay reeman lod la Areópago, rëbaman:

—Bén Atenas, por graczi ni ma baguian, ma gogbeen guial dád zien ree xdiosidi. <sup>23</sup>Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

<sup>24</sup>Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lën yadoo ni rüjn ree bejn. <sup>25</sup>Ad riaadx tëëtaman chu güün xhienin par laaman, din laaman naj Bén razaladx bi nabajnnë' ree, laaman razaladx guialnaban duloj ree në ree ni rayaadx ree.

<sup>26</sup>Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tée cwe reeman. <sup>27</sup>Din yagüül reeman Dios majsi zi'c chi rgan bejn chi ragüülaman xhienin, zian güün reeman din yadxejlamán. Majsi diidxliczi ad zijtt za'man par gra bejn. <sup>28</sup>Din por Dios nabajnnë' ree, por laaman raniib ree radxoo tée ree, por laaman nadxu' ree loj guidxliuj.

Zi'c rëb tée ree xbénrignia'di, chi rëb reeman: “Dunuj ree nayajc xi'n Dios.”

<sup>29</sup>Zeel bal nayajc ree xi'n Dios, ad rayalt yaguieen ree xgab guial Dios najné or, o plajt, o guiaj ya zi'c naj ni rüjn ree bejn zi'c naj xixgab reeman. <sup>30</sup>Tiamp gulal cwëjb Dios been ree bejn zi'c naladx reeman guial achetctzi rabgee reeman, per yan gra ladczi canabeeman gra ree bejn din yayüjn reeman xgab por xtol reeman. <sup>31</sup>Din Dios ma gulej tijb dxej ni yadëéd ree bejn cwent lojman, dxej ni güün xguialguxtisaman. Ma gulej tée-man Jesucrist din güünman guialguxtis guin, abi' din guiguien guial gulejman laaman par zian, basbanman laaman chi güütaman.

<sup>32</sup>Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tée reeman rëb:

—¿Zatijb dxej yasnuu yacaagdiajgan ni canal!

<sup>33</sup>Dxel baza Pab lod za' reeman. <sup>34</sup>Per yu' reeman bachajg laaman, abi' bililadx reeman xtiidx Dios. Loj reeman no'ch tijb Bén zojbloj lën Areópago laman Dionisio, në stijb béngunaa la Dámaris në ree ben ren.

### Bidxin Pab Corinto

**18** Dxel brii Pab Atenas zëman Corinto. <sup>2</sup>Yagaj bidxaaglojman tijb Bén Ponto laman Aquila, zëédaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree Bén Israel Rom. Dxel wej Pab bitixlojman laa reeman. <sup>3</sup>Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnë-man laa reeman persi been reeman dxiin guin. <sup>4</sup>Abi' beegaj dxej raziiladx ree Bén Israel, rej Pab rigneeman xtiidx Dios lën xyadoo ree Bén Israel, zi'c ree Bén naj ree Bén Israel zi'c ree Bén ad najt Bén Israel



raguuilaman mod din chililadx reeman ni rëbaman.

<sup>5</sup> Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios gunee man loj ree bejn, balüü tēeman bën Israel ree guial Jesús naj Cristo bën cabëz reeman. <sup>6</sup> Per guzuloj bidxe'ch reeman Pab abi' gunee reeman diidxgujdx contr laaman. Dxel gudxijp xabaman zi'c tijb sen guial ad ruzoobt reeman diidx, abi' rëbaman loj reeman:

—Lëjt gajc rajp dol guial guizëebidi delant loj Dios, ad najt ra'p dol. Diizd yan chiguien xtiidx Dios loj ree bën ad najt bën Israel.

<sup>7</sup> Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman.

<sup>8</sup> Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Në zien ree bën Corinto bililadx chi biguiejn reeman xtiidx Jesucrist abi' gurobnijs reeman. <sup>9</sup> Tijb guxhin balüüloj Dios loj Pab, rëbaman lojman:

—Ad rdxebil, basnuu gunee da diidxan, ad gucwëëzil, <sup>10</sup> naj za'në' lüj, achutzzi zajc güün lüj xhienin, din luguiedx guie zien da't bejn naj par naj.

<sup>11</sup> Zianan zeel baya'n Pab Corinto tibijz garol, balüüman bën guin ree xtiidx Dios.

<sup>12</sup> Per chi goc Galión gobernador Acaya, bën Israel ree bachajg lasa' reeman persi gunaaz reeman Pab binë reeman laaman loj gobernador guin, <sup>13</sup> rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

<sup>14</sup> Ma niniee Pab, chi gunee Galión rëbaman loj ree bën Israel guin:

—Bal niajcan tijb falt o tijb guialquia narooob beenman zeel zidnëdi laaman, züncwentan lëjt. <sup>15</sup> Per najn por ree di-

idx në por laj ree bejn nëtëë por xleydi, zeel lëjt gajc gol gunaj xhienaag güüнди, ad rëntan günan guialguxtis xcwent ree ni guin.

<sup>16</sup> Abi' laa babëë gajcaman laa reeman roylay guin. <sup>17</sup> Dxel yagaj gajc gunaaz gra reeman Sóstenes, bën rniabee lën xyadoo ree bën Israel abi' gudijn reeman laaman, per ni'quid beencwëntt gobernador guin laa reeman.

### Badxin Pab Antioquía

<sup>18</sup> Zienri ree dxej baya'n Pab Corinto. Dxel bazaadiidx nëman los demazri ree bën rililadx Jesucrist, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Cencrea bagaj guijc Pab, por tijb promejs ni beenman. <sup>19</sup> Chi bidxin reeman Éfeso, ni basa'n Pab Priscila con Aquila, abi' wejman lën xyadoo ree bën Israel zojb ree ni, bigneenëman bën Israel rado'p ree lën yadoo guin. <sup>20</sup> Abi' guyën reeman niaglaa Pab ni mazri, per ad cwëjbtaman. <sup>21</sup> Rëbaman loj reeman:

—Ma yaya'n, bal gagnë Dios naj, guidganan lëjt stjib.

Dxel guyuman loj barcw bazaman Éfeso. <sup>22</sup> Chi bidxinman Cesarea, dxel wejman Jerusalén bicajpdiozaman bën rililadx ree Jesucrist, dxelri zëman Antioquía. <sup>23</sup> Chi ma gojc xchej za'man Antioquía, dxel briiman zatijb. Wejman tijb gaj ree guiedx riga' niz Galacia në niz Frigia, ragu'man luxdoo gra ree bën rililadx Jesucrist.

### Gutie'ch Apolos xtiidx Dios Éfeso

<sup>24</sup> Tiamp zii bidxin tijb bën Israel luguiedx Éfeso, laman Apolos, gojlanman Alejandría. Dád radxejlaman diidx par guinieeman abi' dád rajcaman xtiidx Dios. <sup>25</sup> Basiidaman xtiidx Dios, dxel con gan balüüman bejn ree, zagdxë tēë rüman xtiidx Jesús loj reeman, majsi ad ragbeetaman par xhieri mazri rirob-

nijis bejn, tijbzi xcwent xguial waroobnijijs Waj ragbeeman. <sup>26</sup> Abi' Apolos, sin guialrdxeb guzuloj caneeman xtiidx Dios loj ree b́en Israel lén xyadoo reeman, zianz chi biguiejn Priscila con Aquila ni rēbaman, dxel bignē reeman laaman lidx reeman. Ni balüü reeman laaman persi basnuu basiidaman mazri xtiidx Dios. <sup>27</sup> Chi been Apolos xgab cheman niz Acaya, gra ree b́en rliiladx Jesucrist b́en za'nē laaman, badxe' reeman luxdooan din cheman, abi' guxhaal reeman tijb gui'ch loj ree b́en rliiladx Jesucrist b́en zojb ree niz Acaya din yaca' reeman laaman zagdx chi guidxinman niz ni. Chi bidxinman niz Acaya dád beenman yudar b́en ma rliiladx ree Jesucrist guial gognē Dios laa reeman. <sup>28</sup> Din delant loj gra ree bejn rēbaman guial ad laat zē ree b́en Israel, abi' achutczu gojc nadxi' xtiidxaman guial graczi ni rēbaman naj diidxli, balüü tēēman loj xtiidx Dios gra luar lod rēb guial Jesús naj Cristo b́en gulēz reeman.

### Bidxin Pab Éfeso

**19** La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidxaaglojman bēlzi ree b́en rliiladx Jesucrist. <sup>2</sup> Abi' gunabdiidxaman loj reeman rēbaman:

—¿Guyu xSprijt Dios luxdoodi ya chi bililadxidi?

Badxi' reeman laan rēb reeman:

—Ni'quid waguiejntan guial yu' xSprijt Dios.

<sup>3</sup> Dxel rēb Pab loj reeman:

—¿Xhieza naag gurobnijisidi?

Badxi' reeman laan rēb reeman:

—Barobnijisan zi'c balüü Waj bejn ree.

<sup>4</sup> Dxel rēb Pab loj reeman:

—Walican baroobnijijs Waj bejn, b́en bayüjn ree xgab por xtol reeman. Per rēbaman guial rayal chililadx reeman b́en zēēd xijchaman abi' laaman naj Jesús, b́en naj gajc Cristo.

<sup>5</sup> Chi biguiejn reeman zian, dxel gurobnijijs reeman por Dad Jesús. <sup>6</sup> Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudēēd reeman xtiidx Dios loj ree bejn. <sup>7</sup> Loj gra reeman naj cost chiptio'p xinguiaw.

<sup>8</sup> Choon bēēw wej Pab lén xyadoo ree b́en Israel zojb ni. Sin guialrdxeb guneenēman laa reeman xtiidx Dios, guneenēman laa reeman abi' beenman naguiejn din güünman gan chililadx reeman xhienaag naj xguialrniabee Dios. <sup>9</sup> Per garol reeman gojc nad ad guyēt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree b́en ma rliiladx Jesucrist, binēman laa reeman lén tijb xzcuel b́en la Tiranno. Ni balüüman laa reeman guixie guixie, <sup>10</sup> loj tio'p ijz beenman zian. Abi' graczi ree b́en zojb niz Asia, zi'c ree b́en Israel zi'c ree b́en ad najt b́en Israel, bacaagdiajg reeman xtiidx Dad Jesucrist. <sup>11</sup> Abi' por xguialrniabee Dios been Pab milagr narooob ree, <sup>12</sup> xt ree xbay Pab nē ree lajd rtia lojman zi'c lantar rignē reeman loj ree b́enragxuu, abi' rayajc reeman guialguijdx ni rajc reeman, rarii tēē ree xindxab yu' luxdoo reeman.

<sup>13</sup> Per guyu bēlzi ree b́en Israel ziza rabēē reeman xindxab luxdoo ree bejn, abi' guyēn reeman nüjnnē reeman dxiin laj Dad Jesucrist dxel rēb reeman loj ree xindxab guin:

—¡Por Jesús b́en ruza't Pab, rniabeen lējt, gol barii!

<sup>14</sup> Zian naj ni been gajdx ree xi'ngaan tijb b́en Israel la Esceva, b́en goc tijb bixhioz rniabee ree bixhioz. <sup>15</sup> Per tib volt tijb ree xindxab guin badxi' xtiidx reeman rēbaman:

—Nünbeen Jesús ragbee tēēn chunin naj Pab, per lējt ni'quid nünbeetan lējt.

<sup>16</sup> Abi' b́en yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lëñü guin, ziladzi reeman nadxeelguijdx tēē reeman. <sup>17</sup> Graczi ree b́en zojb Éfeso, zi'c ree b́en Israel zi'c ree b́en ad najt b́en Israel, gogbee reeman gojc zian, dxel dád bidxeb reeman abi' baza't reeman Dad Jesús zagdx.

<sup>18</sup> Nē zien ree b́en rlladx Jesucrist bidxin abi' delant loj gra ree bejn banero' reeman gra ni mal ma been reeman. <sup>19</sup> Nētēē zien ree b́en been guialbidxaa bidxinnē xlibr reeman abi' baze'c reeman laa reen delant loj gra ree bejn. Chi babēē reeman cwent plac lasajc ree libr guin dxel cost tü'pchii mil milia plajt lasajc reen. <sup>20</sup> Abi' zian bire'ch xtiidx Jesucrist biguien tēē xguialrniabeeman.

<sup>21</sup> Chi ma gudēd gojc zian, been Pab xgab cheman niz Macedonia nē niz Acaya xt yadxinman Jerusalén. Rēb tēēman guial chi ma wejman Jerusalén dxelri cheman nē Rom. <sup>22</sup> Abi' guxhaalaman tio'p b́en rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

### Gojc nadxeb Éfeso

<sup>23</sup> Lēn ree dxej zii been ree b́en Éfeso nadxeb por xtiidx Jesús. <sup>24</sup> Din Demetrio, b́en rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree b́en rüjnnēman dxiin. <sup>25</sup> Dxel bato'paman laa reeman con ree ben ren b́en rüjn gajc ree lasa' dxiin guin, abi' rēbaman loj reeman:

—Gol bacaagdiajg, lējt ragbee guial loj dxiin guie raguieen ree gan milia ro'. <sup>26</sup> Per yan lējt ruguiaa riguijejn tēēdi, Pab ziza cayēbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi

luguiedx guie, nē guidib niz Asia. <sup>27</sup> Dxel nadxeb yasēēb dux chiin ree, abi' ad tijbtizi dux chiin ree, nē xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xguialrniabee dios Diana, b́en rēn ree bejn guidib niz Asia nē guidib loj guidxliuj.

<sup>28</sup> Chi biguijejn reeman zian, bidxe'ch reeman abi' gurixdiaj reeman rēb reeman:

—¡B́en zojbloj naj Diana, xdios ree b́en Éfeso!

<sup>29</sup> Abi' gurixdiaj ree b́en guiedx guin wajs reeman, gunaaz reeman tio'p ree b́en Macedonia, Gayo nē Aristarco, b́en rzanē ree Pab. Dxel guxoobyuj reeman laa reeman, binē reeman laa reeman lod rajc xgabilr ree b́en guiedx. <sup>30</sup> Guyēn Pab niuman yagaj din ninieenēman bejn ree, per ad cwējbt ree xcompniaraman, b́en ma rlladx ree Jesucrist. <sup>31</sup> Nētēē loj ree guxtis Asia guin no'ch bēlzi ree xmiw Pab, laa reeman guxhaal ruson lojman guial mejorli ad chu'man ni. <sup>32</sup> Zianz gurixdiaj ree b́en guin rēb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. <sup>33</sup> Dxel galay ben zien guin babēē ree b́en Israel tijb xcompniar reeman b́en la Lejandr din guinieenēman b́en guin ree. Dxel beenman sen loj ree b́en guin din yacwēēz ro' reeman dín guinieeman por ree b́en Israel delant loj ree b́en guiedx guin. <sup>34</sup> Per chi gogbee reeman guial najman b́en Israel, tiblazuzji gurixdiaj reeman cost tio'p hor, rēb reeman:

—¡B́en zojbloj naj Diana, xdios ree b́en Éfeso!

<sup>35</sup> Dxel chi been squiarban luguiedx guin gan bacwēēz ro' reeman, dxel rēbaman:

—B́en Éfeso, gra b́enguidxliuj ragbee guial luguiedx guie zianczi rnij ree bejn xyadoo dios Diana abi' rēn tēē ree bejn

dios Diana biajb xanyabaa. <sup>36</sup>Lëjt ragbee guial laan naj ni diidxli, zeel ad rayalt güüнди zian, ad gontzi güüнди xhienin sin xgab. <sup>37</sup>Din bën bidnëdi achet ni mal been reeman yadoo guin, ad wanee tëët reeman diidxguijdx dux dios ree. <sup>38</sup>Bal Demetrio con ree xcompniaraman bën rüjnnëman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman. <sup>39</sup>Per bal xhieri mazri rëndi, chi gac xgabilt bën guiedx dxel gacan reglad. <sup>40</sup>Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, çabi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

<sup>41</sup>Chi gulox rëbaman zian, dxel bare'ch reeman.

### Wej Pab Macedonia në Grecia

**20** Chi babedxe ree bën Éfeso, gurejdx Pab bën rliladx ree Jesucrist persi bagu'man luxdoo reeman. Dxelri bazaadiidxnëman laa reeman abi' zëman niz Macedonia. <sup>2</sup>Bitixlojman bën rliladx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia <sup>3</sup>lod guzuman choon bëëw. Ma niuman loj barcw din niejman Siria, chi gogbeeman guial nuyën ree bën Israel nüjn reeman laaman xhienin. Dxel mejorli beenman xgab bayejcaman niz Macedonia. <sup>4</sup>Binëman Sópater, bën Berea, xi'ngaan Pirro, në Aristarco con Segundo, bën Tesalónica ree, nëtëë Gayo, bën Derbe, con Timoteo, në Tíquico con Trófimo, bën niz Asia ree. <sup>5</sup>Gra reeman guned abi' gulëjz reeman Pab con naj Lujc guiedx Troas. <sup>6</sup>Guiáad dunujn chi gudëd lanij ni raw ree bën Israel guidxtil ni ad yu't lewadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

### Basban Pab Eutico

<sup>7</sup>Chi bidxin chidumingw, badxajg du lasa'n din yadaawan guidxtil tijbzi, abi' guial mal been Pab xgab guial yareguiaal griiman, chi bidxin garol guiaal sta ca-nëenëman bejn ree, <sup>8</sup>guiáad lëni la-dya lod rado'pan dád zien ree guij re'c. <sup>9</sup>Tijb xinguiag zobj ro' ventan lax Eutico. Guial xchej da't gunëenë Pab laa reeman, dxel xt garej gunaaz baa-cal xin guin, abi' gudidya'x diidz yu bayon guin xt luyuj, ma güjtix chi bales reeman laax. <sup>10</sup>Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

<sup>11</sup>Dxel bayë'p Pab zatijb, gula'man guidxtil abi' gudaw reeman, dxel basnuu gunëenëman laa reeman xt bareguiaal. Chi bareguiaal bayunejzaman ziaman. <sup>12</sup>Abi' xin gudidya' ro' ventan guin, nabanx zignë reeman laax, dxel dád nix yu' luxdoo reeman.

### Wej Pab Mileto

<sup>13</sup>Dxel dunujn badxu'n loj barcw ba-needan bio'n par luguiedx Asón, lod baya'nan diidx yaca'n Pab, din beenman xgab niej guia'man ni. <sup>14</sup>Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene. <sup>15</sup>Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio. <sup>16</sup>Been Pab xgab ad zejtaman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

### Bazaadiidxnë Pab bejn ree Mileto

<sup>17</sup> Chi nadxu'n Mileto, gunabee Pab bi't ree bën rniabee loj ree bën rliiladx Jesucrist, bën zojb ree Éfeso. <sup>18</sup> Chi bidxin reeman dxel rëbaman loj reeman:

—Diizd dxej xaloy ni bialan niz Asia xt yan, lëjt ragbee xhienaag cayünan. <sup>19</sup> Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj guialzi ma gudeëdan por ni rën ree bën Israel güünnë reeman naj. <sup>20</sup> Per majsi zian ad bacwëëzt rnin lojdi ni naj ni zagdxe par lëjt, tant delant loj ree bejn në lidixidi balün lëjt. <sup>21</sup> Abi' zi'c ree bën Israel në ree bën ad najt bën Israel, ma rën loj reeman din yayüjn reeman xgab por xtol reeman yadxi' tõe loj reeman loj Dios chililadx tõe reeman Dad Jesucrist. <sup>22</sup> Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni. <sup>23</sup> Tijbzi ni ragbeen naj guial guidib lod ran rugojn xSprijt Dios naj guial ladxguuib në zro' da't guialzi naj ni cabëz naj. <sup>24</sup> Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, gün tõe mandad ni banee Dad Jesús naj guial gatiechan xtiidzxa'caman xhienaag rën Dios dunuj ree.

<sup>25</sup> Yan naj ragbee guial ni'qui tijbidi bën ma ben diidx loj xhienaag naj xguial-rniabee Dios, ad zuguaatridi naj. <sup>26</sup> Zeel ganin lojdi yan guial ad achetri dol ra'pan bal id nabandi xnejz. <sup>27</sup> Din ma bagojnan lëjt gra xhienaag naj xixgab Dios achetzi baquiechan. <sup>28</sup> Yan, gol gojp lëjt gajc, gol gojp tõe ree bën rliiladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejman ma gudijxaman por xtol reeman. <sup>29</sup> Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliiladx ree Jesucrist. <sup>30</sup> Loj gajquidi

grii ree bën gülüü ganax ni rusquiee, din güün reeman gan güüncwent ree bën rliiladx Jesucrist xtiidx reeman luar güüncwent reeman xtiidx Dios. <sup>31</sup> Zeel gol guzujsin, gol gojp cudad, gol basaal-adx, loj choon ijz ad bacwëëzt gunenë'n lëjt xt ronan banen lëjt consejw.

<sup>32</sup> Yan, compniar raliduladx ree Jesucrist, gusa'nan lëjt con Dios con xtiidzxa'caman. Laan rajp guialrniabee par gagenë'n lëjt, din gusunoo gagbeedi xhienaag rënman guiband gunee tõe man lojdi ni ma rëbaman gudeëdaman loj ree bën ma naj xbejnman. <sup>33</sup> Achut xmilia achu tõe xab rzëëbladxan. <sup>34</sup> Lëjt ragbee zagdxe guial con quijb yan benan dxiin persi gudawnë'n bën guzu ree con naj. <sup>35</sup> Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rëbaman: “Mazri nix yu' luxdoo bën razaladx guial loj bën rtia'.”

<sup>36</sup> Chi gulox rëb Pab zian, dxel bazux-ibaman gurejdx gunabaman Dios con gra reeman. <sup>37</sup> Gra reeman biin, gudiidx reeman Pab abi' gudaw reeman laaman xid. <sup>38</sup> Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

### Wej Pab Jerusalén

**21** Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara. <sup>2</sup> Ni badxaaglojn tijb barcw ni ma che niz Fenicia zianz badxu'n lojn. <sup>3</sup> Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. <sup>4</sup> Ni badxaaglojn bën rliiladx ree Jesucrist abi' badxu'në'n laa reeman gajdx dxej. Bën guin ree por xSprijt Dios rëb reeman

loj Pab guial ad bal cheman Jerusalén. <sup>5</sup>Per chi baza' gajdx dxej guin, dxel badxoon luguiedx guin, dxel gra reeman con xbéngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios. <sup>6</sup>Dxel bazaadiidxné'n laa reeman abi' badxé'pan loj barcw guiáad laa reeman zia lidx reeman.

<sup>7</sup>Chi badxoon luguiedx Tiro bio'n luguiedx Tolemaida, ni gulox dux vi-ajñ loj barcw, bio' tēen bugneenē'n bēn zojb ree ni, bēn rliadx ree Jesucrist abi' baya'nān con laa reeman tib dxej. <sup>8</sup>Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bēn rtie'ch xtiidx Jesucrist. Felip guin naj tijb ree bēn gajdx cwabee din qui's reeman ni rayal tia' ree bēnprob abi' baya'nān lidxaman. <sup>9</sup>Yu' tajp xi'ndxa'paman biinxtijb ree abi' laa reem rudēēd xtiidx Dios loj ree bejn. <sup>10</sup>Ma gojc zien dxej nadxu'n lidx Felip, chi bi't tijb bēn la Agabo nēgajcāman rudēēd xtiidx Dios loj ree bejn, zēēdaman niz Judea. <sup>11</sup>Chi bi'taman cwa'-'man xcinch Pab guxhii guia' gajcāman con yaaman, abi' naman:

—XSprijt Dios na guial Jerusalén ze guixhii ree bēn Israel bēn naj xcinch ni guie, abi' yayü reeman laaman loj ree bēn ad najt bēn Israel.

<sup>12</sup>Chi baguiejnan zian, dunujn con ree bēn rliadx Jesucrist luguiedx guin baguieenan naguiejn loj Pab ad cheman Jerusalén. <sup>13</sup>Per badxi'mān laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiētan Jerusalén por Dad Jesús.

<sup>14</sup>Chi bayagbeen guial ad zaguieentan gan yadxoonan laaman chitēē cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

<sup>15</sup>Chi gudēd ree dxej guin dxel baguieenan purvinid bio'n Jerusalén.

<sup>16</sup>Bunē'n bēlzi ree bēn Cesarea rliadx ree Jesucrist, laa reeman binē dunujn lod baya'nān lidx tijb bēn Chipre, ma gojc xchej rliadxaman Jesucrist, laman Mnasón.

### Bignaj Pab Jacob

<sup>17</sup>Abi' ree bēn Jerusalén rliadx Jesucrist dād nix guyu luxdoo reeman bacā' reeman dunujn. <sup>18</sup>Chi bareguiaal bunē'n Pab bugnajn Jacob, ni riga' gra ree bēn rniabee loj ree bēn rliadx Jesucrist. <sup>19</sup>Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bēn ad najt bēn Israel. <sup>20</sup>Chi biguiejn reeman zian, baza't reeman Dios zagdxē, zianz rēb reeman loj Pab:

—Lüj ragbee guial entr loj ree bēn Israel zien da't reeman ma bililadx Jesucrist, abi' gra reeman rēb guial rüjn naguiejn güün bejn zi'c rniabee xley Moisejs. <sup>21</sup>Ma biguiejn tēē reeman guial lüj culüü bēn Israel ree, bēn ad zojbt ree loj nacion Israel guial ad züjncwentt reeman xley Moisejs, rēb tēēl loj reeman guial ad rüjnt naguiejn chu' xi'n reeman sen ru ree bēn Israel ad zinal tēēt reeman dux costumbr ree. <sup>22</sup>Yan, ¿xhienaag gac? Laa reeman guchajgczi lasa' reeman chi gagbee reeman guial ma bi'til. <sup>23</sup>Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwēb reex loj Dios. <sup>24</sup>Binē reex, gol been zi'c rēb loj ley din gaquidi naya, gudijx tēē por laa reex din gac ya guiyc reex. Zian gagbee gra bejn guial rüjnquil zi'c rniabee ley, guial ad wali tēēt ni biguiejn reeman xcwentil. <sup>25</sup>Abi' por ree bēn ad najt bēn Israel, bēn ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab

por xley Moisejs. Per ad rayalt gaw reeman ni rbej loj ni naj ree xdios reeman, ad gaw tēē reeman rejn ni'qui bēēl rberejn, ad sunē tēē reeman ben ren bēn ad najt lacheel reeman.

### Gunaaz ree bēn Israel Pab

<sup>26</sup> Dxel binē Pab guidap ree bēn guin, abi' chi bareguiaal been reeman zi'c rniabee ley par gac reeman naya. Dxel guyu reeman lēn yadooro' Jerusalén din gugojn reeman goc yayaalox dxej güün reeman zi'c rniabee ley, dxej rayal chinē tijb gaj reeman tijb be guiēt zi'c tijb gon par Dios.

<sup>27</sup> Chi ma yayaalox gajdx dxej ni naj güün reeman zi'c rniabee ley, yu' ree bēn Israel zēēd niz Asia, baguiaa reeman Pab lēn yadooro' Jerusalén abi' gurixdiaj reeman wajs reeman, gunaaz reeman laaman, <sup>28</sup> rēb reeman:

—¡Bēn Israel, gol been yudar! Xin guie naj xin ziza gra lad caneeguijdxix bēn Israel ree nē dux yadoo ree, rēb tēēx loj ree bejn guial ad güün reeman zi'c rniabee dux ley ree. Abi' ad tijbtzi laan, nē ma badxe'x bēn ad najt ree bēn Israel lēn dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.

<sup>29</sup> Rēb reeman zian guial baguiaa reeman Pab zizaman ni con tijb bēn Éfeso bēn la Trófimo, zeel gunaladx reeman binē Pab laaman lēn yadooro' Jerusalén.

<sup>30</sup> Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babēē reeman laaman lēn yadoo guin laa basiaaw gajc reeman port guin ree. <sup>31</sup> Za mer nugüjt reeman laaman, chi bidxin ruson guin loj suldad rniabee ree suldad guial gra ree bēn Jerusalén cayüjn nadxeb. <sup>32</sup> Laa bato'p gajc suldad rniabee guin xsuldadix nē za tio'p choon ree suldad rniabee, baxüün reex wej reex lod riga'

ree bēn guin. Chi baguiaa ree bēn guin bidxin suldad rniabee guin con ree xsuldadix, dxel bacwēēz gudijn reeman Pab. <sup>33</sup> Dxel gubig suldad rniabee guin, gunaaazix Pab gunabeex guxhii reex laaman con tio'p caden. Abi' gunabdiidxix chu laaman xhie tēē beenman. <sup>34</sup> Per gurixdiaj reeman rēb reeman garent garen, guial rbixdiaj da't reeman agetet gojc ni-agbeex, dxel gunabeex bignē reex Pab lod yu' ree suldad. <sup>35</sup> Chi bidxin reex loj ree scliar lod yu' ree suldad guin, gulejn reex Pab guial dád nadoxh rüjn ree bēn zien nal laa reex, <sup>36</sup> abi' gra reeman rbixdiaj, rēb reeman:

—¡Gol bagüjtix!

### Gunee Pab loj ree bejn

<sup>37</sup> Chi ma chu'nē reex Pab lod yu' ree suldad guin, gunabdiidxaman loj suldad rniabee guin, rēbaman:

—¿Zajc ganenē'n lüj ya?

Badxi' suldad guinan rēbix:

—¿Rajc rnieel diidx grieg ya? <sup>38</sup> ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, bēn bagüjt ree bejn?

<sup>39</sup> Dxel rēb Pab lojx:

—Bēn Israel naj. Goolan luguiedx Tarso tijb ree guiedx zobjloj ni riga' niz Cilicia. Baneesii mod ganenē'n bēn guie ree.

<sup>40</sup> Dxel cwējb suldad guin, abi' guzuli Pab loj ree scliar guin beenman sen loj ree bēn guin con yaaman din yacwēēz ro' reeman. Chi bacwēēz reeman, dxel guneenēman laa reeman diidx hebreo, rēbaman:

**22** —Lējt bengol nē los demazridi, gol bacaagdiajg ni ganin por naj.

<sup>2</sup> Chi biguiejn reeman caneenēman laa reeman diidx hebreo, mazri bacwēēz reeman. Abi' basnuuman rēbaman loj reeman:

<sup>3</sup>—Bén Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux Bén gulal ree. Guiáad naj guidib luxdon benan xgab güünan sirv Dios zi'cgajc lëjt yan. <sup>4</sup>Dxel guzunaalan Bén riladx ree Jesucrist, xt bagüjtan laa reeman abi' zi'c ree béngunaa zi'c ree xinguiáaw gunaazan badxe'n ladxguiib. <sup>5</sup>Bixhioz mazri zobjloj rniabee graczi ree bixhioz në gra ree ruxtis Israel ragbee guial najn ni wali. Din laa reeman baneer tijb gui'ch par gulün loj du lasa' Bén Israel ree, Bén zobj ree luguiedx Damasco din chile' yaguilan Bén riladx ree Jesucrist luguiedx guin, ganaaz tēen laa reeman guidnē'n laa reeman Jerusalén din tēd reeman casti.

### **Be Pab diidx xhienaa bililadxaman Jesucrist**

(Hch. 9:1-19; 26:12-18)

<sup>6</sup>Per chi za'n lunejz par Damasco, chi ma cadxinan ni cost garol dxej, dxejczy brii tijb guij xanyabaa balaan bacha' guidibczy lod cazaan, <sup>7</sup>abi' breeyujn. Dxel biguiejnan cha' Bén na: “Saulo, Saulo, ¿chexquiza zeel rzunalil naj?” <sup>8</sup>Abi' gunabdiidxan rēn: “¿Chu lüj Dad?” badxi'man laan naman: “Naj naj Jesús, Bén Nazaret, Bén rzunalil.” <sup>9</sup>Bén zinē' reen baguiaa reeman bacha' guin abi' bidxeb reeman, per ad bignia't reeman ni na cha' Bén gunee naj. <sup>10</sup>Dxel gunabdiidxan rēn: “¿Xhie rayal günan Dad?” Abi' na Dad Jesucrist lon: “Bixche, basnuu xnejzil wej Damasco. Ni na reeman gra ni rayal güünl.” <sup>11</sup>Abi' guial bascajy bacha' guin lon, dxel Bén zinē' reen ganaaz reeman yan, binē reeman naj luguiedx Damasco.

<sup>12</sup>Ni zobj tijb Bén la Ananías, rüjnman cumplid gra zi'c rniabee xley Moisejs. Abi' gra ree Bén Israel zobj luguiedx Damasco nünbee laaman guial naban-

man xnejz. <sup>13</sup>Ananías guin bidganaj naj, chi bi'taman naman lon: “Saulo, ma zajc yaguiaal stijb.” Loj hor guin gajc baguian stijb abi' baguian laaman. <sup>14</sup>Dxel naman lon: “XDios dux béngulal ree ma bacaabee lüj din gagbeel xhie rēnman güünl, abi' guguiaal Jesucrist guien tēel cha'man, Bén rüjn zi'c rayal. <sup>15</sup>Din chigneel xtiidxaman loj gra ree bénguidxliuj, gü tēel diidx loj reeman ni baguiaal ni biguiejn tēel. <sup>16</sup>Yan, ad rbēzil mazri, guzuli gurobnijs tēē gurejdx gaj Dad Jesucrist din chisüdaman xtolil.”

### **Be Pab diidx xhienaaq wejman loj ree Bén ad najt Bén Israel**

<sup>17</sup>'Chi baguialan Jerusalén, wan lēn yadooro' persi guredx gunaaban Dios, abi' guza'can zi'c rulüü cane'xhchalan. <sup>18</sup>Baguian Dad Jesús naman: “Baquiejn. Cari barii Jerusalén, din ad züjncwentt reeman ni guiēbil por naj.” <sup>19</sup>Abi' rēn lojman: “Dad, laa reeman ragbee guial naj wa gra lēn ree yadoo gunaazan Bén riladx ree lüj, badxe'n laa reeman ladxguiib gudin tēen laa reeman. <sup>20</sup>Nē chi bagüjt reeman Esteban, Bén gunee xtiidxil, laagajc naj za' ni rēn zagdxe naj guiētaman abi' xt gunan xab ree Bén bagüjt laaman.” <sup>21</sup>Per na Dad Jesús lon: “Wej, naj gaxhal lüj zijt loj ree Bén ad najt Bén Israel.”

### **Badxe' reeman Pab lod yu' ree suldad**

<sup>22</sup>Xt guintzi naga'loj bacaagdiajz reeman ni rēb Pab dxel guzuloj gurixdiaj reeman rēb reeman:

—¡Ad rayalt guiban xin guin! ¡Gol bagüjtix!

<sup>23</sup>Abi' guial cabixdiajz cabixdiaj reeman, ruzaal xab reeman niz ladia ruzaal tēē reeman yuj niz ladia. <sup>24</sup>Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel



rbixdiaj ree bén guin zian contr laaman.  
<sup>25</sup> Per chi guxhii reex Pab din quin reex laaman, rëbaman loj tijb ree suldad rniabee za' ni:

—¿Zajc quindi tijb bén Rom ya, chi gadi di gagbee xhie beenman?

<sup>26</sup> Chi biguiejn suldad rniabee guin zian, dxel bicojnx suldad rniabee ree suldad guin, rëbix lojx:

—Gojp cudad ni güünnël xin guin, din xin Roman.

<sup>27</sup> Dxel wej suldad rniabee guin lod za' Pab, abi' gunabdiidx lojman rëbix:

—¿Walin ya xin Rom lüj?

Badxi' Paban rëbaman:

—Walican.

<sup>28</sup> Abi' rëb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rëbaman:

—Per naj diizd goolan najn bén Rom.

<sup>29</sup> Chi biguiejn ree suldad niguin Pab, guial bén Rom najman, laa bisüd gajc reex. Xt në suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

### Bazuj reeman Pab loj ree guxtis

<sup>30</sup> Chi bareguiaa, guyën suldad rniabee guin niagbeecheawix chexc zeel za' ree bén Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz në ree guxtis. Abi' babëex Pab bazujx laaman loj gra reeman.

**23** Baguiaa Pab loj ree guxtis guin, abi' rëbaman:

—Compniar Israel, loj guidib ni nabanen xt yan, achet naladxan delant loj Dios din naj ragbee xhienaag nabanen.

<sup>2</sup> Dxel Ananías, bixhioz mazri zojbloj rniabee graczi ree bixhioz, gunabeeman bén za' ree gajxh cwë' Pab din ca'p reeman ro'man. <sup>3</sup> Per badxi' Paban rëbaman loj bixhioz guin:

—¿Ziangajc ca'p Dios ro'l, bén rusquiee! ¿Id zojbil yagaj ya par güünl guialguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

<sup>4</sup> Abi' ree bén za' yagaj rëb reeman lojman:

—¿Zian rusaglojl xbixhioz zojbloj Dios ya?

<sup>5</sup> Dxel rëb Pab:

—Gol been perdon, ad gogbeetan guial laaman naj bixhioz mazri zojbloj. Din loj xtiidx Dios rëb: “Ad gusaglojl Bén rniabee ladxil.”

<sup>6</sup> Chi gogbee Pab guial garol reeman naj bénsaducew za garol reeman naj bénfarisew, dxel guneeman rejs rëbaman:

—Naj naj bénfarisew, xi'n bénfarisew naj. Abi' guial rliladxan yaban ree bengüt zeel za' ree bejn contr naj.

<sup>7</sup> Chi rëbaman zian, guzuloj cadildiidx ree bénfarisew con ree bénsaducew abi' gojc reeman tio'p lala'. <sup>8</sup> Din bénsaducew ree ad rliladxt reeman guial yaban ree bengüt, ad rliladx tëët reeman guial yu' ree anjl në ree sprijt, per ree bénfarisew rliladx reeman gra ree ni guin. <sup>9</sup> Abi' been reeman naquie' yagaj. Dxel guzuli bëlzi ree bénfarisew naj mextr rülüü ley, rëb reeman:

—Achet ni mal wayüjn bén guie. Wed tijb sprijt o tijb anjl gune laaman, gol gojp cudad ad niad contr Diosan nadxu' ree.

<sup>10</sup> Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëe reex laaman galay ree bén guin, chinë tëe reex laaman lod yu' ree suldad stjib.

<sup>11</sup> Chi gure guiaa stjib, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

**Been reeman xgab gugüjt reeman Pab**

<sup>12</sup>Chi bareguiaal, garol ree bën Israel baya'n reeman diidx din gugüjt reeman Pab, rëb tää reeman guial achet gaw reeman achet tää't guië' reeman xt gugüjt reeman laaman. <sup>13</sup>Nadëd tiuu naj ree bën rëb zian. <sup>14</sup>Abi' wej reeman bigneenë reeman bixhioz ree bën rniabee ree bixhioz në ree xbengol ree bën Israel, rëb reeman loj reeman:

—Dunujn ma raguie'ch guial achetdzi yadaawan xt chi ma bagüjtan Pab. <sup>15</sup>Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guiyc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagüjtan laax chi gadix gui't guie.

<sup>16</sup>Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. <sup>17</sup>Zianz gunee Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëëx tijb ruson lojman.

<sup>18</sup>Binë xin suldad guin laax loj suldad rniabee guin, rëbix lojx:

—Pab, xin yu' ladxguiib guredx naj abi' gunabix guidnë'n xin guie lojl din guneex tijb ruson lojl.

<sup>19</sup>Abi' suldad rniabee guin gunaazix yaa xin guin, binëx laax tiblax, gunabdiidxix lojx rëbix:

—¿Xhie rën'l nal lon?

<sup>20</sup>Abi' rëb xin guin lojx:

—Bën Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guiyc guial rën reeman gagbeechaaw reeman xhienaag naj xcwentaman. <sup>21</sup>Per ad bal chililadxil laa reeman, din nadëd tiuu naj ree bën cwëz laaman guquie'chloj reeman lunejz, abi' ma rëb reeman guial achet gaw reeman ache tää't guië' reeman xt gugüjt reeman

laaman. Yan za'sin reeman cabëz reeman ni guiëbil.

<sup>22</sup>Dxel rëb suldad guin loj xin guin:

—Baguijaj. Achu loj guiëbil ni ma nal lon.

**Guxhaal reeman Pab loj gobernador Félix**

<sup>23</sup>Dxel gunee suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', në za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxhin. <sup>24</sup>Abi' gunabee tääx güün reex porvinid way cwib Pab, rëbix loj reex guial guinia reex Pab din guidxinman zagdxel loj gobernador Félix. <sup>25</sup>Abi' guxhaalnëx laa reex tijb gui'ch ni rëb:

<sup>26</sup>“Naj Claudio Lisias, rugajpdiozan lüj gobernador Félix, lüj guial najl bën zobjloj. <sup>27</sup>Bën Israel ree gunaaz xin guie ma nugüjt reeman laax. Per chi gogbeen guial xin Roman, dxel wan con ree da suldadan buglëen laax loj reeman. <sup>28</sup>Abi' guial rënan gagbeen xhie rüjnx zeel rdxe'ch reeman laax, dxel bazun laax loj ree guxtis Israel. <sup>29</sup>Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiëtix ni'qui guial chu'x ladxguiib. <sup>30</sup>Në guial ma gogbeen guial xixgab ree bën Israel naj gugüjt reeman laax, zeel cayxhalan laax lojl. Abi' ma rën loj ree bën rdxe'ch laax guial con lüj güün reeman reglad ni rajp reeman contr laax. Laanan rugojnan lüj.”

<sup>31</sup>Been ree suldad guin zi'c gunabee suldad rniabee guin abi' guxhin binë reex Pab luguiedx Antípatris. <sup>32</sup>Chi bareguiaal suldad zë ree guia' bayejc reex lod yu' ree suldad, guiáad ree suldad dxiib way zinë reex laaman luguiedx Cesarea. <sup>33</sup>Chi bidxin reex Cesarea, badëed reex gui'ch guin loj gobernador guin, bayü tää reex Pab lojman.

<sup>34</sup> Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zëedaman, <sup>35</sup> dxel rëbaman lojman:

—Chi gui't ree bën za' ree contr lüj, dxel gucagdiagan ni nal.

Abi' gunabeeman gap reex Pab lën xpalas Herodes.

### Ni gunee Pab loj gobernador Félix

**24** Chi goc gaay dxej, Ananías, bixhioz mazri zojbloj rniabee graczi ree bixhioz, bidxinman Cesarea con tio'p choon ree guxtis Israel në tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. <sup>2</sup> Chi bidxinnë reex Pab, guzuloj Tértulo caneeman contr laaman, rëbaman loj gobernador guin:

—Quixtëë lüj dad gobernador, por lüj nadxu'dxen, në por xguialrajquil zien ree ni rüjn sirv cayajc du ladxan. <sup>3</sup> Gra ladczi za' ree bejn conform por gra ni cayüjn dad gobernador Félix, lüj naj bën zojbloj, quixtëëczi lüj. <sup>4</sup> Per chitëë giinlaan lüj mazri, rniaaban lojl din gucaagdiaguil ni yanan lojl tibrajtoczi. <sup>5</sup> Dunujn bayagbeen xin guie naj zi'c tijb guialguijdx loj ree bën Israel, guidibczi guidxliuj zizax rustijlix laa reeman abi' laax rniabee loj tib cwaa ree bën miee reeman nazaren. <sup>6</sup> Abi' guyën tëëx nüjnx dux yadooro'n zi'c tijb luar ad rüjnt sirv, zeel banaazan laax bayënan naguieenan guialguxtis zi'c naj dux leyan. <sup>7</sup> Per laa bi't gajc suldad Lisias con ree xsuldadix, babëëxuu reex laax du lojn. <sup>8</sup> Abi' rëb suldad rniabee guin guial lojl gui't ree bën rbe'c xguialquia Pab, yan lüj gajc zajc guiniabdiidx lojx din gagbeel zagdx guial walican ni ranan xcwentix.

<sup>9</sup> Abi' ree bën Israel za' ni rëb reeman guial waliqui gra ni guin. <sup>10</sup> Dxel been gobernador guin sen loj Pab din guinieeman, abi' rëb Pab:

—Guial ragbeen diidz gocli rniabeel nacion Israel, zeel ad yu'nawëëgtan yadxi'n ni rudxiib reeman guican. <sup>11</sup> Abi' lüj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios. <sup>12</sup> Abi' achut banaaznë reeman naj cadildi-idxnë'n, ni'qui guie gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguiedx guin. <sup>13</sup> Bën guie ree ad zajct na reeman lojl guial ni diidxli naj ni rudxiib reeman guican. <sup>14</sup> Per ni naj diidxli naj guial rililadxan Jesucrist, nejzctüb guin naj ni zinaalan, cayünan sirv loj xDios dux bëngulalan, abi' na ree bën guie guial ad xnejzt Diosan, per cayünan zian guial rililadxan gra ni zëëd loj ley në ni bacaa ree bën badëëd xtiidx Dios loj ree bejn. <sup>15</sup> Abi' zi'cgajc rililadx ree bën guie Dios, ziangajc rililadxan laaman guial yaban ree bengüt stijb, zi'c ree bën goc benza'c në ree bën goc benmal. <sup>16</sup> Zeel rünan naguiejn gabajnan zagdx chitëë xhie ganaladxan delant loj Dios ni'qui delant loj ree bejn.

<sup>17</sup> Ma gojc zien ijz nariin, xt yan baye'c ladxan bidganë'n ni baxhaal ree bejn par ree bënprob, bidganë' tëën gon ni rayal gudëdan loj Dios. <sup>18</sup> Laan naj ni cayünan lën yadooro' Jerusalén chi bi't ree bën Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëëtan wadijl. <sup>19</sup> Yan, bën gunaa ree naj, laa reeman naj bën rayal su guie din na reeman xhie rünan xhie pornin rdxe'ch reeman naj. <sup>20</sup> O balguiza, bën za' ree guie na reeman xhie da dolan badxejl reeman chi guzun loj gra ree guxtis Israel. <sup>21</sup> Tijbzi ni benan chi za'n galay reeman gurixdiajn rën: “Guial rililadxan yaban ree bengüt, zeel za' ree bejn contr naj yan.”

<sup>22</sup> Chi biguiejn gobernador Félix zian, abi' guial ragbeeman xhienaag naj xnejz

cüb Jesucrist, dxel basa'nman guialquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxe xhienaag naj xcwentidi.

<sup>23</sup>Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tëë reex chignaj ree xmiwaman laaman.

<sup>24</sup>Chi goc tio'p choon dxej, bidxin gobernador Félix stijb con lacheelaman Drusila, laaman naj bën Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliladx bejn Jesucrist. <sup>25</sup>Per chi guzuloj cayëbaman guial rayal guiban ree bejn xnejz, gucwëëz tëë xixgab mal reeman, guial guidxin tëë dxej yadëëd ree bejn cwent loj Dios, dxel dád bidxeb gobernador guin abi' rëbaman loj Pab:

—Baguiaj. Ganetan lüj chi chu'n luar stijb.

<sup>26</sup>Per Félix në milian rbëzaman gudëëd Pab lojman din guslaaman laaman, zeel gurejdxaman laaman zien volt din guinieenëman laaman.

<sup>27</sup>Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree bën Israel, zeel basa'nman Pab ladxguuib.

### Gunee Pab loj Festo

**25** Chi goc choon dxej ni bidxin Festo Cesarea par chu'man guial gobernador, dxel wejman Jerusalén.

<sup>2</sup>Yagaj, bixhioz rniabee ree bixhioz con ree bën Israel mazri zojbloj, wej reeman lojman bile'c reeman xguialquia Pab, <sup>3</sup>abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz. <sup>4</sup>Per badxi' Festo xtiidx reeman rëbaman guial Cesarea nayaaw Pab guiáad laaman

nayob yaguijman ni, <sup>5</sup>abi' rëbaman loj reeman:

—Bén rajp ree guialrniabee lojdi, laa reeman xa Cesarea, abi' bal xhie ni mal been sin guin, ni na reeman xhienin beenx.

<sup>6</sup>Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab. <sup>7</sup>Chi bidxinnë reex laaman, bën Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. <sup>8</sup>Dxel badxi' Pab xtiidx reeman, rëbaman:

—Naj, achet ni mal wayünan xley ree bën Israel, ni'qui yadooro' Jerusalén, ni'qui rey César.

<sup>9</sup>Per Festo guyënman naya'nman zagdxe loj ree bën Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

<sup>10</sup>Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüj ragbee zagdxe guial achet ni mal wayünan bën Israel ree. <sup>11</sup>Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

<sup>12</sup>Dxel chi gulox guneenë Festo bën naj ree xbejnman, bën rëb ree ni rayal gac, rëbaman loj Pab:

—Lüj na tëdil loj rey César, yan lojman tëdil.

### Za' Pab loj rey Agripa

<sup>13</sup>Chi gudëd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo. <sup>14</sup>Abi' guial zien dxej

da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguiib. <sup>15</sup>Chi wan Jerusalén, bixhioz rniabee ree bixhioz con ree bén rniabee loj ree bén Israel gule'c reeman xguialquiaux, gunab reeman ganabeen guiëtix. <sup>16</sup>Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bén cabe'c xguialquiaman din guiëbaman walin ya o ad walitan ni rudxiib reeman guijcaman. <sup>17</sup>Zeel chi bi't ree bén Israel guin guie, achet guial niaglaan, bareguiaal gajc gure loj da yaxghilan, abi' gunabeen bidnë reex xin guin. <sup>18</sup>Per ree bén bi't gule'c xguialquiaux, achet ni nadxeb na reeman zi'c gunaladxan ninia reeman por laax. <sup>19</sup>Tijbzi xguialquiaux ni gule'c reeman naj por xcostumbr reeman në por tijb bén la Jesús, bén ma güjt, per Pab rëb naban Jesús guin. <sup>20</sup>Abi' guial ad ragbeetan xhie günan por zian, dxel gunabdiidxan loj Pab bal rënch chex Jerusalén din gac reglad ni guin ree ni. <sup>21</sup>Per laax gunab téd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

<sup>22</sup>Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiaguil laax.

<sup>23</sup>Chi bareguiaal, dád zagdxe ca' xab rey Agripa con Berenice bidxin reeman con ree bén rniabee suldad con los demazri ree bén zobjloj luguiedx guin, bidxin reeman guyu reeman lëñü lod gucaagdiag reeman ni guiëb Pab. Dxel gunabee Festo bica' reex Pab. <sup>24</sup>Abi' rëb Festo:

—Rey Agripa në los demazridi dad za'nëdi dunujn guie. Bén ruguiaadi guie, gra bén Israel, zi'c Jerusalén zi'cgajc

guie ma bi't reeman bidganaj reeman naj rniab reeman guiëtix. <sup>25</sup>Naj, achet xfaltix radxejlan guial rayal guiëtix. Guiáad laax gunab téd loj César Augusto lod gac reglad xcwentix, abi' ma benan xgab yaxhalan laax. <sup>26</sup>Per ad radxejltan ni gucan por laax loj gui'ch ni gaxhalan loj rey César, bén rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. <sup>27</sup>Din naj rulüü ad xnejzt naj yaxhalan tijb bén yu' ladxguiib loj rey César abi' ad zëtan xhie beenman.

### Ni gunee Pab loj rey Agripa

**26** Dxel rëb rey Agripa loj Pab:

—Ma zajc guineeel por lüj.

Abi' gules yaa Pab guzuloj rëbaman:

<sup>2</sup>—Dád nix yu' luxdon guial bile' za'n lojl yan rey Agripa, par ganen lojl yadxi' tëen gra ni rudxiib ree bén Israel guican. <sup>3</sup>Din lüj ragbee zagdxe gra xcostumbr ree bén Israel, në conin rüjn persi rdildiidx reeman. Zeel rniaaban lojl gapil pasens gucaagdiaguil ni ganin.

### Zi'c guban Pab gocli

<sup>4</sup>Gra ree bén Israel ragbee xhienaag gubajnan con laa reeman zi'c ladxan zi'c Jerusalén, diizd xindoon. <sup>5</sup>Ragbee tëe reeman abi' zajc na reeman laan bal rën reeman, guial diizd xindoon najn bénfarisew, abi' ree bénfarisew naj bén mazri zinal xley ree bén Israel. <sup>6</sup>Abi' yan za'n guie, badëed reeman naj loj ree guxtis guial rliladxan yasban Dios bengüt ree zi'c beenman promejs loj ree dux bégulal ree. <sup>7</sup>Gra guidxiptio'p cwa' ree bén Israel cabëz dxej güün Dios zian, zeel rën reeman laaman rüjn tëe reeman sirv lojman dxej guiaal. Abi' yan guial rliladxan laan zeel rbe'c ree bén Israel da guialquian, rey Agripa. <sup>8</sup>¿O naladxidi ya nawëeg yasban Dios bengüt ree?

### Be Pab diidx xhienaag guzunalaman bén rililadx ree Jesucrist

<sup>9</sup>Guia'xchej benan xgab rayal günan xhienin bén rililadx ree Jesús, bén Nazaret, <sup>10</sup>abi' zian benan Jerusalén. Con xtiidx ree bixhioz rniabee ree bixhioz, zien ree bén rililadx Jesucrist badxe'n ladxguiib. Abi' chi rugüjt reeman laa reeman, në naj rë guiëtri reeman. <sup>11</sup>Zien volt benan laa reeman xhienin din günan naguiejn gusa'n reeman guialrililadx reeman Jesucrist. Zian benan lën gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

### Be Pab diidx stijb xhienaag bililadxaman Jesucrist

(Hch. 9:1-19; 22:6-16)

<sup>12</sup>'Abi' par zian za'n Damasco, con quijb xtiidx ree bixhioz rniabee ree bixhioz. <sup>13</sup>Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bén ziné'n. <sup>14</sup>Abi' dugraczan bareeyuj, dxel biguiejnan cha' Bén gunee naj con diidx hebreo, naman: "Saulo, Saulo, ¿chexc zeel rzunalil naj? Lüj gajc rguuil xguialnaal zi'c go'n rudxegua' loj yag rulaagnë reeman laab." <sup>15</sup>Dxel rën: "¿Chu lüj Dad?" Badxi'man laan naman: "Naj naj Jesús Bén rzunalil. <sup>16</sup>Per bixche, guzuli, din balülon lojl par güünl naj sirv gü tēel diidx ni baguiaal yan në ni gulün lojl. <sup>17</sup>Naj gaxhal lüj loj ree Bén Israel në loj ree Bén ad najt Bén Israel, abi' naj gagnë' lüj chitëë xhie güün reeman lüj. <sup>18</sup>Gaxhalan lüj loj reeman din guixhialil loj reeman gusa'n reeman nejz mal, chinal reeman nejz zagdx. Ad tiëbri reeman nabee xindxab laa reeman, chinal tēë reeman xnejz Dios. Abi' chililadx reeman naj din gac xtol reeman perdon yayal tēë reeman ni rayal

gra ree xbejn Dios, Bén ma naya ree delant lojman."

### BazooB Pab diidx ni balüüloj lojman

<sup>19</sup>'Zian gojc, rey Agripa, bazoban diidx benan ni na Jesucrist lon chi guneeman naj diidx xanyabaa. <sup>20</sup>Yaloj luguiedx Damasco gutiechan xtiidxaman, dxelri Jerusalén në guidib niz Judea në loj ree Bén ad najt Bén Israel. Rën loj reeman din yayüjn reeman xgab por xtol reeman, yadxi' loj reeman loj Dios güün tēë reeman ni rayal güün reeman din guiguien guial ma bidxaa mod naban reeman. <sup>21</sup>Abi' por zian, gunaaz ree Bén Israel naj lën yadooro' Jerusalén, guyën reeman nugüjt reeman naj. <sup>22</sup>Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree Bén zojbloj zi'c ree Bén ad zojblojt. Abi' gra ni rën loj reeman naj ganax ni bacaa ree Bén badëë xtiidx Dios loj ree bejn në ni bacaa Moisejs xhienaag naj ni gac, <sup>23</sup>guial Cristo naj guial tédaman guialzi, guiëtaman. Per chi ma güjtaman yaloj laaman naj Bén yaban loj ree bengüt, abi' gugojnman Bén Israel ree në ree Bén ad najt Bén Israel xhienaag gap reeman perdon.

### Nuyën Pab nililadx Agripa Jesucrist

<sup>24</sup>Chi cayëb Pab zian, dxel gudidxa' Festo rëbaman:

—¡Rajcguijquil Pab! guial tant rusiidil ma rajc guijquil.

<sup>25</sup>Per badxi' Pab laan rëbaman:

—Ad guictan rajc, gobernador Festo. Ni canin najn xnejz në diidxli. <sup>26</sup>Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbeechaaw guial laaman ragbee gra ni canin, din ad canitan ni goc ralan lod achut zajc gagbee laan. <sup>27</sup>¿Rililadxil ni rëb ree Bén badëëd xtiidx Dios loj ree bejn ya, rey Agripa? Naj ragbee guial rililadxil.

<sup>28</sup>Dxel badxi' rey Agripa laan rëbaman:

—Sta'nczi nüjnl naj gan nililadxan Jesús.

<sup>29</sup>Abi' rëb Pab:

—Majsi sta'nz o majsi ryaadxri, na Dios guial ad tijbtzi lüj, në gra ree bën cucaagdiajg ni canin yan, guidxin dxej chililadxiđi Jesús zi'c naj, majsi ad nët ree caden guie.

<sup>30</sup>Dxel bisu rey Agripa con gobernador Festo con Berenice në gra ree bën zojbnë laa reeman ni. <sup>31</sup>Chi bariica reeman tiblاد guzuloj cayünë lasa' reeman diidx, rëb reeman:

—Achet wayüjn xin guie ni rayal guietix, o chu'x ladxguib.

<sup>32</sup>Dxel rëb rey Agripa loj Festo:

—Zile' naslaa reex, balidix niniab tëđix loj rey César.

### Baxhaal reeman Pab Rom

**27** Chi rëb reeman ma yaxhaal reeman dunujn Italia, dxel bayü reeman Pab con sta'n ree bën yu' ladxguib loj tijb suldad rniabee la Julio, laax rniabee tib cwaa ree suldad la Augusto. <sup>2</sup>Abi' Cesarea badxu'n loj tijb xbarcw ree bën Adramitio, barcw ni ma grii chen guiedx riga' ree niz Asia. Në Aristarco bunë'n, bën Tesalónica, guiedx riga' niz Macedonia. <sup>3</sup>Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëëđ reeman ni ryaadxaman. <sup>4</sup>Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitëë yachaaglojn zro' bi, din niz du lojn rliaj bi guin. <sup>5</sup>Badüüđan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

<sup>6</sup>Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn. <sup>7</sup>Loj zien dxej bio'n chaawlax, con guidib tarbajw badxinan niz lod la Gnido. Abi' guial sta rliaj bi

niz du lojn, dxel zagdxeli badüüđan niz Salmón, badiaawan lod la Creta yuj riga' loj nijsdoo. <sup>8</sup>Gadëđ ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

<sup>9</sup>Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab, <sup>10</sup>rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

<sup>11</sup>Per suldad rniabee guin mazri beencwentix bën rusa barcw guin në bën naj xbarcw laan, guial loj ni rëb Pab. <sup>12</sup>Abi' guial ad zagdxë tëët naj yagaj par yadüüđan tiamp nayaag, dxel mazri zien reeman been xgab zagdxeli naj yariin yagaj, yaguieenan naguiejn yadxinan Fenice, tijb guiedx nulen Creta lod ad rbi' tëët bi, ni yadüüđan tiamp nayaag.

### Gubi' tijb bidoxh loj nijsdoo

<sup>13</sup>Dxel guzuloj cabi' tijb bi chaawlax ni zëëđ lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëđ ro' yuj Creta. <sup>14</sup>Per ad wayajct xchej zio'n chi birii tijb bidoxh la Euroclidón loj nijs guin. <sup>15</sup>Abi' guzuloj bi guin culadxaan barcw guin. Në guial niz du lojn zëëđ bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunujn niz lod cucadxaa bi guin laan. <sup>16</sup>Dxel badüüđan xijch tijb yujđobëz la Clauda riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin. <sup>17</sup>Dxel chi gulox balë'pan canu guin loj barcw guin, batiejl reeman duu lad barcw guin chitëë yaze'nan. Abi' guial rdxeb reeman chëëztiej barcw guin lën üx la Sirte, dxel

gulet reeman xlon ree barcw guin din cwentzi chinë barcw guin dunujn niz lod rucadxa bi guin laan. <sup>18</sup> Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. <sup>19</sup> Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin. <sup>20</sup> Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad naguieentri du luxdoon yalaan loj nijs guin.

<sup>21</sup> Abi' guial ma gojc zien dxej ni achetctzi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëët nasëeb ree. <sup>22</sup> Per achet güünan, ad rdxe-bidi din ni'qui tijbidi ad zëjtt, tijbzi barcw guin yaze'n. <sup>23</sup> Din Dios rniabee naj, bën cayünan sirv guxhaal tijb xi anjlaman balüüloj lon yan guiaal. <sup>24</sup> Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zëed loj barcw guie ad zuslaat Dios guiët reeman.” <sup>25</sup> Zeel yan dad, gol badxe' luxdoodi zagdx, din naj rriladxan Dios, ragbee tëen zagdx guial gac zi'c na anjl guin lon. <sup>26</sup> Per gag barcw guie niz ro' tijb yuj riga' loj nijsdoo.

<sup>27</sup> Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree bën nulen barcw guin, guxhinzii zi'ct garol guiaal gogbee reeman guial zamer yadxinan loj yuj. <sup>28</sup> Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit. <sup>29</sup> Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guuib loj nijs guin din chile' sudxe barcw guin, abi' ma rën nejzdoo ree-

man yareguiaal. <sup>30</sup> Bén nulen ree barcw guin, been reeman bën sta cuzaal ree ganch guuib guin loj nijs guin niz loj barcw guin, naabzi par calet reeman canu chu' reeman par guxüün reeman. <sup>31</sup> Per bagojn Pab suldad rniabee con ree xsuldadix, rëbaman loj reex:

—Bal id ree bën guin yaya'n loj barcw guie, ad zalaatridi.

<sup>32</sup> Dxel batüüg ree suldad guin ni naxii canu guin persi zinë nijs canu guin. <sup>33</sup> Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëjs-tidi achet tëët wayawidi. <sup>34</sup> Naj rni lëjt, gol gudaw din guibandi, din gradi ni'qui tijb guidxguijquidi ad zusëebtidi.

<sup>35</sup> Chi rëb Pab zian, cwa'man tijb guiadxtil, abi' badëëman quixtëë loj Dios niz loj gra reeman, dxel gula'man guiadxtil guin guzuloj cayawaman.

<sup>36</sup> Dxel bayu luxdoo gra reeman, guzuloj nëgajc laa reeman cayaw. <sup>37</sup> Tio'pgayuu gayojnchiibixho'p nayajc dugran zio'pan loj barcw guin. <sup>38</sup> Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

### Bize'n barcw loj nijsdoo

<sup>39</sup> Chi bareguiaal, bën nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx gadëed ro'n, abi' been reeman xgab badxig reeman barcw guin yagaj. <sup>40</sup> Dxel batüüg reeman ni naxiinë ree ganch guuib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiee reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayrica barcw guin niz ro' nijs guin. <sup>41</sup> Per wëëztiejn loj üx zien lod bigagan. Niz guijcan wëëz lën üx abi' ni'quid rniib-



tan, guiáad niz xan guin guzuloj cayze'-nan con gojl rliaj nijs guin ladan. <sup>42</sup>Dxel nuyén ree suldad guin nugýjt reex b́en prejs guin ree, chit́eé nixoobnijs reeman abi' nuxíin reeman. <sup>43</sup>Per suldad rniabee guin ad cwéjbtix niajc zian guial ad réntix niéjt Pab, dxel gunabeex guial b́en rajc rxoobnijs ree, yalój laa reeman chu' loj nijs guin güün reeman naguiejn yarii reeman ro' nijs guin. <sup>44</sup>Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

### Bidxin Pab Malta

**28** Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. <sup>2</sup>B́en naj ree b́en ni, dád benza'c gojc reeman con dunujn. Been reeman tijb bajl guial nayaag ńet́eé guial cayal guia, abi' na reeman du lojn din yubiigan cwél bajl guin. <sup>3</sup>Dxel bato'p Pab ta'n yagbidx, zianz chi cudxe'man laan loj bajl guin briyaal tijb béel lén yag guin por xi xliaa bajl guin, abi' gudawya'b yaa Pab nalbéztib yaaman. <sup>4</sup>Chi baguiaa ree b́en Malta guin nalbéz béel guin yaa Pab, dxel réb loj lasa' reeman:

—Xin guie bejn bagýjtix, zeel majsi gulaax loj nijsdoo, per guiétczix por ni beenx.

<sup>5</sup>Per gudxijp yaa Pab abi' biajb béel guin loj bajl guin, guiáad laaman achet gocaman. <sup>6</sup>Gra reeman cabéz saaguij yaaman, o dxejlczi yabaman guiétaman. Per chi gojc xchej, chi baguiaa reeman achet gocaman, bachaa xixgab reeman abi' guzuloj réb reeman guial tijb dios najman.

<sup>7</sup>Gajxh lod badxu'n naga' ree xguidxliuj tijb b́en zobjloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c téé gojcaman con dunujn. <sup>8</sup>Nadxel naga' xdadaman,

ragxuuman, yu'man xliaa rajc téeman yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman. <sup>9</sup>Chi gogbee ree b́enragxuu zojb ni ni goc, bi't reeman lod za' Pab persi bayínman laa reeman. <sup>10</sup>Dxel dád zien ni bazaladx reeman du lojn por zian. Abi' chi badxu'n loj barcw par yadsoon yagaj, baneé reeman gra ni rayaadxan lunejz.

### Bidxin Pab Rom

<sup>11</sup>Choon béew badxu'n loj yuj zii, dxelri badxu'n loj tijb barcw Alejandría, ni bitéd ni tiamp nayaag. Niz lucwaj barcw guin ca tio'p ree dxan b́en la ree Cástor né Pólux. <sup>12</sup>Dxel badxinan tijb guiedx la Siracusa, yagaj badxu'n choon dxej. <sup>13</sup>Abi' yagaj badxoon bio'n gadéd ro' nijsdoo xt badxinan guiedx la Regio. Chi bareguiaal, chi badxoon yagaj, brii tijb bi lad sur dxel ni barojp dxej badxinan luguiedx la Puteoli. <sup>14</sup>Yagaj badxaagan tio'p choon ree b́en naj ree b́en ni né reeman rliladx Jesucrist, dxel na reeman du lojn yaya'nné'n laa reeman abi' baya'n-né'n laa reeman toxman. Zian gojc, dxelri zio'n Rom. <sup>15</sup>Guiáad ree dux compnaran b́en rliladx ree Jesucrist, b́en zojb ree Rom, ma ragbee reeman guial yadxinan yagaj. Dxel brii reeman bidgachaa-gloj reeman dunujn xt lod la Foro de Apio né luguiedx la Tres Tabernas. Chi baguiaa Pab laa reeman, babaaman abi' badéeman quixtéé loj Dios. <sup>16</sup>Chi badxinan Rom, dxel bayü suldad rniabee guin b́en prejs guin ree loj tijb ree suldad rniabee ni. Per cwéjb reeman gurej Pab stijb yu ren lod gojp tijb suldad laaman.

### Gunee Pab xtiidx Jesucrist Rom

<sup>17</sup>Chi goc choon dxej badxinan Rom, gurejdx Pab b́en Israel zobjloj ree ni. Chi badxajg lasa' reeman, dxel rébaman loj reeman:

—Compniar Israel, achet wayünan contr ree bën Israel ni'qui contr xcostumbr ree dux búngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom. <sup>18</sup> Abi' ree bën Rom guin chi gulox badëdan cwent loj reeman, dxel nuyën reeman nuslaa reeman naj, guial gogbee reeman achet benan par guiëtan. <sup>19</sup> Per ree bën Israel guin badxoon reeman abi' zagdxeli gunaaban gadëëdan loj rey César, per ad guial ra'ptan xhienin contr ree bën Israel. <sup>20</sup> Zeel guredxan lëjt, din guidganajdi naj din ganin lojdi guial por ni riladxan guial yaban ree bengüt zi'c-gajc riladx gra ree du lasa' bën Israel ree, zeel naxiin con ree caden guie.

<sup>21</sup> Dxel rëb reeman lojman:

—Dunuyn ni'qui tijb xtiidx ree bën Judea ad waca'tan lod na reeman xcwentil, në ni'qui tijb bën duladx ree bën raza ree Judea achet wana reeman du lojn contr lüj. <sup>22</sup> Per rayënan yaguiejn xhienaag naj xixgabil, din dunuyn rayagbee guial gra ladczi rniece reeman contr religion cüb guin.

<sup>23</sup> Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadx guneenëman laa reeman xhienaag naj xguialrniabee Dios. Beenman naguiejn chililadx reeman Jesús, baza't tëëman lod rniece xcwent Jesús loj xlibr ley Moisejs në ni bacaa ree bën badëë xtiidx Dios loj

ree bejn. <sup>24</sup> Yu' reeman bililadx ni rëb Pab, per yu' reeman ad bililadx. <sup>25</sup> Abi' guial ad rdxaagt gü reeman diidx, guzuloj bare'ch reeman. Dxel rëb Pab loj reeman:

—Waliqui ni rëb Isaías bën badëëd xtiidx Dios loj ree dux búngulal ree guial rëb xSprijt Dios:

<sup>26</sup> Wej, güjdx loj ree bën guin:

Majsi rigueijn reeman, per achetczi chignia' reeman,

abi' majsi ruguiaa reeman, per rulüü ad ruguiaat reeman.

<sup>27</sup> Din been luxdoo reeman gojl,

abi' rüjn reeman zi'c rulüü ad ruguiaat reeman,

ad rigueijn tëët reeman, chitëë guguiaa reeman,

abi' guien reeman chignia' tëë reeman.

Din ad rënt reeman gui't reeman con naj, abi' günan laa reeman perdon.

<sup>28</sup> Zeel gol gogbee guial diizd yan, loj ree bën ad najt bën Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

<sup>29</sup> Chi gulox rëb Pab zian, dxel zia ree bën Israel guin, cadildiidxnë lasa' reeman.

<sup>30</sup> Tio'p ijz gurej Pab ni, yu lod gudixaman. Ni rnieenëman gra ree bën rtixloj laaman. <sup>31</sup> Sin guialrdxeb rëbaman loj reeman xhienaag naj xguialrniabee Dios, abi' guneeman xtiidx Dad Jesucrist loj reeman sin guial chu nudxoon.

## Gui'ch ni guxhaal San Pabl loj ree bèn Rom rliiladx Jesucrist

### Rxhiaal San Pabl xtiidx Dios

**1** Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

<sup>2</sup>Diizd gocli mal rëb Dios diidxza'c guin ree, ni zëed loj xtiidxaman zi'c baa ree bèn badëe xtiidx Dios loj ree bejn, <sup>3</sup>diidx guin ree ruza't, dux Dad ree Jesucrist guial zi'c bi'taman loj guidxliuj zi'c bénguidxliuj, loj xdiaa rey Davi zaman. <sup>4</sup>Per por xSprijt Dios laaman naj Xi'n Dios guial babanman loj ree bengüt, abi' guidiblagaa rajpaman guialrniabee. <sup>5</sup>Abi' par yaza't reeman, zeel bacaabee-man naj din gacan apóstol din guidiblagaa guidxliuj chu' bèn chililadx laaman, bèn guzoob tëe xtiidxaman. <sup>6</sup>Abi' në lëjt ma nayab loj ree bèn gule Dios din gaquidi xbejn Jesucrist.

<sup>7</sup>Zeel caxhalan gui'ch guie lojdi bèn rën ree Dios, bèn zojb ree Rom, lëjt ma gulej Dios din gaquidi xbejnman. Dux Dad ree Dios në Dad Jesucrist güünle' lëjt yabe'cdxe tëe reeman luxdoodi.

### Rën Pab cheman Rom

<sup>8</sup>Yalojxgaj por Jesucrist rudën quix-tëe loj Dios por gradi, guial guidibczi ruza't reeman lëjt xhienaag rliiladxidi Jesucrist. <sup>9</sup>Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëézt rbedx rniaaban laaman por lëjt. <sup>10</sup>Ad rucwëéz tëët rbedx rniaaban Dios din guneeman mod guidganan lëjt, zi'c naj da xgaban diizd gocli. <sup>11</sup>Din yu'czan gan guidganan lëjt din günan lëjt yudar con xtiidx Dios din sudxi'chidi lojn. <sup>12</sup>Din güün tëedi naj yudar zian yaguieen du lasa' ree yudar

loj guialrliladx ni raya'p ree, din chile' yalu' du luxdoo du lasa' ree.

<sup>13</sup>Compniar raliduladx ree Jesucrist, rënan gagbeedi guial zien volti da't ma benan xgab guidganan lëjt, din gacxhiey ree bèn chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan lëjt. <sup>14</sup>Par naj naladxan da cwentan naj guial gulün chutëéz benan xtiidx Dios, bal najman bèn ciuda o najman bèn guiedx-doo ya, bal rignia'man o ad rignia'taman. <sup>15</sup>Zeel rënnejzdoon guidganan lëjt din gatiechan xtiidx Dios Rom.

### Xguialrniabee xtiidxza'c Dios

<sup>16</sup>Ad ratunë'tan xtiidxza'c Jesucrist. Din por diidxza'c guin ree zëed xguialrniabee Dios, din gra ree bèn chililadx laan laa reeman loj dol, zi'c ree bèn Israel zi'c ree bèn ad najt bèn Israel. <sup>17</sup>Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod rëb: "Bën naban zi'c rën Dios, guidib tiamp ni nabanman rliiladxaman laaman."

### Dol ni rajp bejn

<sup>18</sup>Dunuj ree rayagbee guial diizd xanyabaa zëed xcastiro' Dios par ree bèn ad ridxga't laaman, bèn ad rüjnt ree zi'c rayal, abi' zi'c naban reeman ruquie'ch reeman xtiidxli Dios. <sup>19</sup>Din ragbeechaaw reeman guial yu' Dios, abi' laagajcaman balüü bejn ree guial yu'caman. <sup>20</sup>Majsi ad ruguiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xguialrniabeeman abi' laa tëëman naj Dios. Zeel ad zajct xhie gudxiib bejn guijc guial achet ragbeeman xcwent Dios. <sup>21</sup>Din majsi yu' ree bejn ragbee guial yu' Dios, per ad rajpt reeman laa-

man respejt zi'c rayal, ad rudëë tëët ree-man quixtëë lojman, aal xgab ren ree rüjn reeman ni ad rüjnt sirv abi' gaz ragdxa reeman. <sup>22</sup>Rëb reeman guial rajc da't reeman abi' mazri na tont reeman. <sup>23</sup>Din luar guiën reeman Dios ni ad yu't dxej guiët, rën reeman ni nit ree yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' në ree bëël.

<sup>24</sup>Zeel ma gulëëladx Dios laa reeman loj xixgab mal reeman, abi' rüjn reeman ni natu ree con ree ben ren. <sup>25</sup>Luar chinal reeman xdiidxli Dios, zinal reeman ni rusquiee ree. Abi' rën reeman rajp tëë reeman respejt ni been Dios, luar guiën reeman laaman guial beenman laa reen, abi' laaman rayal gap ree bejn respejt zianczi. Amén.

<sup>26</sup>Zeel gulëëladx Dios laa reeman loj ree ni dxuudx rüjn reeman. Abi' zien ree béngunaa ad nabantri ree xnejz, rën lasa' béngunaa gajc reeman. <sup>27</sup>Ziangajc zien ree xinguaaaw ad nabantri xnejz, rën gajc lasa' xinguaaaw reex, xinguaaaw con xinguaaaw rüjn reex ni dxuudx, ni natu. Abi' laagajc reex rguuil xcasti reex.

<sup>28</sup>Abi' guial ad ridxga't reeman Dios, zeel gulëëladx Dios laa reeman loj xixgab mal reeman, din güün reeman ganax ni ad rayalt güün reeman. <sup>29</sup>Ganax ni ad rayalt güün reeman rüjn reeman, za'në reeman xinguaaaw ren o béngunaa ren, zien ree ni mal rüjn reeman, rzëëbladx reeman gap reeman ni rajp ree ben ren. Dád nadëdloj reeman, rugüjt reeman bejn, rguuil reeman wadijl, rusquiee ree-man bejn, ganaxczi ni mal yu'guijc ree-man abi' rbëë reeman xtiidxguijdx bejn. <sup>30</sup>Rnieeguijdx tëë reeman bejn, ralen reeman Dios, ad rajpt reeman bejn respejt, rlies xvalor gajc reeman, rüjn ree-man benro'. Abi' rbëëguijc reeman ni mal ree, ad ruzoob tëët xtiidx xdad xniaa reeman. <sup>31</sup>Dád nad reeman, ad rüjnt cumplid xtiidx reeman, ad rënt lasa' ree-

man, ad raya tëët lasa' reeman. <sup>32</sup>Rag-beechaaw reeman rëb Dios guial chi guiët ree bejn, dxel gra ree bén rüjn gra ree ni guin yayal casti. Per majsi zian, rusnuu gajc rüjn reeman ni mal guin ree abi' xt rabaa reeman chi rüjn ree ben ren zian.

### Xguialguxtis Dios

**2** Zeel chutëëz lüj guial rëbil xhie casti rayal bejn, ad rajptil derejch guiëbil zian, din lüj gajc rayal casti guin guial cayüjnl zi'cgajc rüjn reeman. <sup>2</sup>Per dunuj ree rayagbee guial Dios rüjn guialguxtis zi'c rayal, chi rudëëdaman casti bén rüjn ree ni mal guin. <sup>3</sup>Abi' lüj guial rëbil xhie casti rayal bejn abi' nëgajquiza lüj rüjn zi'c rüjn reeman, ad naladxil laal loj xcasti Dios. <sup>4</sup>Ad rëntil guialnaza'c Dios con lüj, ad rëntil guial rdaanman lüj rajp tëëman lüj pacens, ni'quid ragbeetil guial pacens guin rüjn lüj yudar din gapil tiamp par yayüjnl xgab por xtolil. <sup>5</sup>Per guial dád nadil, ad rëntil yayejuil loj Dios, zeel lüj gajc cayüjnxhiejl xtolil par dxej ni gudëëd Dios casti, dxej ni güünman guialguxtis zi'c rayal. <sup>6</sup>Par gudëëman ni rayal tijbgaj bejn bal gonin beenman. <sup>7</sup>Gudëëdaman guialnaban tiblyaa loj ree bén ad radxagt rüjn naguiejn guiban zagdxe guial rüjn ree-man naguiejn yayal reeman guialnaza'c yu' xanyabaa, rüjn tëë reeman naguiejn yaya'n reeman zagdxe loj Dios din gap reeman cuerp ni ad yu't dxej nit. <sup>8</sup>Per ree bén ad ruzoobt diidx, rdx'e'ch Dios laa reeman abi' gudëëdaman laa ree-man casti, din luar chinal reeman xtiidxliman, zinal reeman nejz mal. <sup>9</sup>Gra ree bén zinal nejz mal, naya sac ree-man sagdiaj reeman, yaloj ree bén Israel dxel bén ad najt ree bén Israel. <sup>10</sup>Guiáad ree bén zë loj nejz zagdxe, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj

xgaj ree bén Israel dxelri bén ad najt ree bén Israel.

<sup>11</sup> Din Dios tiblojzi rüjnman guialguxtis con gra bejn. <sup>12</sup> Gra ree bén cayüjn dol sin guial ad nünbeet reeman ley badëäd Dios loj Moisejs, täd reeman casti sin ley guin. Guiáad ree bén cayüjn dol majsi ragbee reeman ley guin, laa reeman täd casti zi'c rniabee ley guin. <sup>13</sup> Din ad guial guientzi bejn ley guin ma nayaman loj Dios, bén rüjn ree zi'c rniabee ley guin laa reeman naj bén naya loj Dios. <sup>14</sup> Per chi ad najt bejn bén Israel, abi' cayüjnman ni zagdxe sin guial güünbeeman ley guin, dxel ma cayüjnman zi'c rniabee ley guin majsi ad nünbeetaman laan, guialzi nünbeeman conin naj ni zagdxe con tää nin naj ni mal, abi' guijc gajc reeman zëäd xley reeman. <sup>15</sup> Din zi'c naban reeman, rguien guial guijc reeman zëäd conin rayal güün reeman con tää nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdxe o chi ma been reeman ni mal. <sup>16</sup> Zian gac chi güün Dios guialguxtis por gra ree ni naguie'ch ni rüjn bénguidxliuj. Abi' zi'c culün bejn ree guidibczi, laaman güün guialguxtis por Jesucrist.

### Bén Israel ree në xley Moisejs

<sup>17</sup> Yan, lüj guial najl bén Israel yu'guijquil guial rajquil ley badëä Dios loj Moisejs, abi' rüjnl nabë guial najl xbejn Dios, <sup>18</sup> rëbil guial ragbeel xhienaag rën Dios guibanl, abi' por xleyaman ragbeel conin naj zagdxe güünl. <sup>19</sup> Abi' naladxil zile' guzuxnejzil bén ad nünbeet ree ley guin në ree bén ad nünbeet xnejz Dios, <sup>20</sup> naladxil zile' gulüül bén ad rajct ree në ree bén rajc ta'nzi, guial por ley guin ragbeel gra, ragbee tää conin naj diidxli. <sup>21</sup> Per zi'c nabanl, ¿chexc zeel ad rulüüt lüj gajc luar gulüül ben ren? Din lüj rëb guial ad laat cwan bejn, abi', ¿chexquiza zeel rbanl? <sup>22</sup> Rëbil guial ad laat sunë

bejn bén ad najt lacheelaman, abi' lüj, ¿chexquiza zeel rüjnl zian? Rëb tää guial rdxe'chil ni naladx bejn naj dios, abi', ¿chexquiza zeel rbanl lën yadoo lod yu' ree Dios guin? <sup>23</sup> Dád nabë rüjnl guial nünbeel ley, per rusa'nxtul Dios guial ad rüjntil ni rniabee ley guin. <sup>24</sup> Ze'cli rëb loj xtiidx Dios: “Bén ad najt ree bén Israel nree reeman Dios diidxguijdx por lëjt.”

<sup>25</sup> Diidxli rüjnqui sirv guial ru xcuerp bejn sen ni ru ree bén Israel, bal rüjnman zi'c rniabee xley Dios. Per bal id rüjnman zi'c rniabee ley guin, achet sirvan guial yu'man sen guin. <sup>26</sup> Per bal tijb bén ad yu't sen guin nabanman zi'cgajc tijb bén rajc xley Dios majsi ad nünbeetaman laan, dxel ma nayabaman zi'c tijb bén yu' sen, majsi ad yu'taman sen guin. <sup>27</sup> Bén rüjn zi'c naj xley Dios, majsi ad nünbeetaman ley ad yu' täätaman sen, gusa'nxtu'man lüj guial nünbeel ley guin yu' tää sen guin, abi' ad rüjntil zi'c rniabee ley guin. <sup>28</sup> Din ad guial rajlt bejn loj nacion Israel, ad guial yu' täätaman sen ni ru ree bén Israel ma najman bén Israel loj Dios, <sup>29</sup> bén wali naj bén Israel loj Dios, guidib luxdooman zinalaman xnejz Dios, ad por guial yu'taman sen ru ree bén Israel, ad por xcostumbr tää reeman, por guial naban reeman con xSprijt Dios. Abi' bén naban zian, Dios rliës xvaloraman sa'n ad bénguidxliujt.

**3** Zeel zanadi lon xhieczy gan naj bejn bén Israel o xhieczy gan chu'man sen ru ree bén Israel. <sup>2</sup> Per naj gani lojdi guial gadxagayaa mod lasajc guial naj bejn bén Israel, din yalojxgaj loj ree bén Israel badëäd Dios xtiidxaman. <sup>3</sup> Yan ad naladxidi por guial yu' ree bén ad zinalt xnejz Dios, ad züntraman cumplid ni rëbaman din xo güün Dios ni rëbaman güünman con ree bén zinal xnejzaman. <sup>4</sup> Din laaman ad yu't dxej guchaa xtiidxaman, majsi gra bénguidxliuj naj bén

rusquiee, per Dios ad nētaman rusquiee, zi'c rēb tiblajt loj xtiidxaman lod rēb: Gra bejn gūinbee lūj guial rūjn cumplid xtiidxil, abi' achet zajc gudxiib reeman guijquil.

<sup>5</sup> (Per yu' bejn rūjn xgab) guial bal por dol ni cayguieen ree ruluū guial benza'c nāj Dios, ¿chexquiza zeel najman benmal rudēēdaman bejn casti? <sup>6</sup> Per naj rni lojdi guial ad najt Dios benmal, din bal najman benmal xoza gūin xguialguxtisaman con bēnguidxliuj.

<sup>7</sup> Din bal yaguie'ch ree guial ad rucaagdiajgt xtiidx Dios, laan naj ni rūjn yudar xtiidxli Dios din gap bejn laaman mazri respejt, dxel ad zajctri guiēb Dios nāj bejn bēndol. <sup>8</sup> Abi' mazri ma yaguieen ree ni mal din gui't ni zagdxe, zi'c rēb ree bejn culūn bejn ree, per Dios gudēēd casti bēn rēb ree zian.

### Graczi bejn ma been dol

<sup>9</sup> Zeel zi'c ma rmin por ree bēn Israel, nē por ree bēn ad najt bēn Israel, abi' ma ragbeedi guial ad zajct guiēbidi guial mazri benza'c nāj ree bēn Israel guial loj ree bēn ad najt bēn Israel, din tiblojzi nayajc ree bēndol. <sup>10</sup> Zi'c ca tiblajt loj xtiidx Dios lod rēb:

Achutczi nāj benza'c, per ni'qui tijb bejn.

<sup>11</sup> Achutczi rignia'.

Achutczi raguuil Dios.

<sup>12</sup> Gra reeman ma basa'n xnejz Dios.

Gra reeman ma zinal nejz mal.

Achutczi cayūjn ni zagdxe, per ni'czi tijb bejn.

<sup>13</sup> Zi'cgajczi tijb baa ni zojbyal, zian ganax ni dxuudx ririi ro' reeman.

Ganax diidx rusquiee rniece reeman.

Abi' xtiidx reeman nāj zi'c xvenen bēl.

<sup>14</sup> Ganax diidx mal ririi ro' reeman, diidxgujdx ni rūjnnaa lasa' reeman.

<sup>15</sup> Za'sin reeman din gugūjt reeman bejn.

<sup>16</sup> Bantēēz guin zē reeman, rūjn reeman ni dxuudx ree.

Abi' rusagzi reeman bejn ree.

<sup>17</sup> Ad nūnbee tēēt reeman xhienaag nāj guialrbajn bejn zagdxe.

<sup>18</sup> Ad yu'guijct reeman guial rayal guidxeb reeman Dios.

<sup>19</sup> Dunuj ree rayagbee guial gra ni zēēd loj xley Dios, nāj par ree bēn zinal ley guin, chitēē chu guiēb guial achut abee xhienin nāj dol, laan nāj par gagbee bejn guial najman bēndol loj Dios. <sup>20</sup> Din ad guial gūiūt bejn gra ni rniabee ley guin ma nayaman loj Dios, ley guin ruluū din gagbee bejn guial najman bēndol.

### Por guialrliladx ma naya bejn loj Dios

<sup>21</sup> Per yan Dios ma balūū dunuj ree tijb nejz guial xhienaag yayajc ree naya lojman. Ad guial yaguieentzi ree zi'c rniabee ley guin, por ley guin nē por ni bacaa ree bēn badēē xtiidx Dios loj ree bejn. <sup>22</sup> Rayagbee ree guial rūjn Dios bejn cwent zi'c bēn ad yu't xtol por guialrliladxaman Jesucrist, din par Dios tiblojzi nāj bejn. <sup>23</sup> Din gra bejn ma been dol, achutczi naya niz loj Dios. <sup>24</sup> Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bēn gudix por dux tol ree chi gūitaman loj crūjz. <sup>25</sup> Dios guxhaal Jesucrist, din por xrejman chu' perdon par bēnguidxliuj. Abi' perdon guin nāj par ree bēn rliladx Jesucrist. Zian rguien guial graczi rūjn Dios xnejz, abi' bal guia'xchej ad beent xguialguxtisaman por dol ni been ree bejn, laan nāj por pacens ni rajpaman con bejn, <sup>26</sup> guial ma ragbeeman goc gūin xguialguxtisaman. Zian rusnuu ruluūman guial graczi rūjnman xnejz, zeel rūjnman perdon xtol ree bēn rliladx Jesucrist.

<sup>27</sup> Yan, ¿xhienaag yaguieen ree nabē? Achet yaguieennē' ree nabē, din ad guial yaguieent ree ley guin cumplid ma nayajc ree perdon, yayajc ree perdon

por guial yaliduladx ree Jesucrist. <sup>28</sup> Zeel rayagbeechaaw ree guial Dios r jn perdon xtol ree bejn guial rliladx reeman Jesucrist, ad guial r jnt bejn naguiejn g  nman gra ni rniabee ley guin.

<sup>29</sup>  Wen xDiosi ree b n Israel naj Dios ya, ad n t ree b n ad najt b n Israel naj xDios laaman ya? Naj rni lojdi guial Dios naj par gra bejn, <sup>30</sup> din tijbzi Dios yu', laaman r jn perdon xtol ree b n rliladx Jesucrist, yu'man o ad yu'taman sen ni rniabee ley chu' ree b n Israel. <sup>31</sup> Ad naladxidi cayguieen ree ley guin tiblax guial raliduladx ree Jesucrist, din ad ziantan, guial raliduladx ree laaman rguien guial nadxu'guicj ree ley guin.

### Xguialrliladx Abraham

**4** Yan,  xhie zajc yaguie'ch ree xcwent dux b ngulal ree Abraham? <sup>2</sup> Bal niyab Abraham zi'c tijb b n gad g  n dol por ree ni beenman, guyu mod n jnman nab  loj ree bejn, per ad lojt Dios. <sup>3</sup> Din r b loj xtiidx Dios: "Guial bililadx Abraham Dios, zeel been Dios laaman cwent zi'c tijb b n ad beent dol." <sup>4</sup> Chi r jn bejn dxiin, milia ni rajxaman ad ni razaladxt reeman, rtia'man laan por dxiin ni r jnman. <sup>5</sup> Per guial gac bejn perdon loj Dios, ad zajct gui b bejn guial rayalaman perdon guin por ni beenman, din achut naya loj Dios. Perdon guin z  dan guial rliladx bejn Jesucrist, zeel r jn Dios bejn cwent zi'c b n ad yu't xtol. <sup>6</sup> Zi'c gunee rey Davi guial xiquilbaa ree b n been Dios cwent sin dol sin guial g  n reeman xhienin par yayal reeman perdon guin. <sup>7</sup> R baman: Xiquilbaa ree b n been Dios perdon xtol, b n ma badxi'caman xtol. <sup>8</sup> Xiquilbaa ree b n ma been Dios cwent sin dol.

<sup>9</sup> Ad gunee Davi diidx guie ree naabzi par b n yu' ree sen ni ru ree b n Israel, gunee man diidx guin ree par gra ree bejn. Din zi'c ma raguie'ch ree, Dios

been Abraham cwent zi'c b n ad yu't xtol guial bililadxaman laaman. <sup>10</sup> Abi' chi biyabaman zi'c b n ad yu't xtol, ni'qui gadaman chu' sen ni ru ree b n Israel, chi gad Abraham chu' sen guin mal n jn Dios laaman cwent zi'c b n ad yu't xtol. <sup>11</sup> Chi biabaman zi'c b n ad yu't xtol, dxel guyuman sen guin din sen guin naj guial ma n jn Dios laaman cwent zi'c b n ad yu't xtol guial bililadxaman laaman. Zeel naj Abraham dad par ree b n rliladx Dios, majsi ad yu't reeman sen ni ru ree b n Israel, per por guialrliladx guin n jn Dios laa reeman cwent zi'c b n ad yu't xtol. <sup>12</sup> Naj t   Abraham dad par ree b n majsi yu' sen guin per rliladx reeman zi'c bililadx Abraham Dios diidx chi gadaman chu' sen guin.

### Promejs ni been Dios loj Abraham

<sup>13</sup> Chi been Dios promejs loj Abraham n  loj ree xdiaaman, guial gud  daman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb b n ad yu't xtol. <sup>14</sup> Yan bal ganaxzi ree b n zinal ley guin tia' ni gud   Dios, achet cwent naj guialrliladx ree bejn laaman, ache t  t cwent naj promejs ni been Dios loj Abraham. <sup>15</sup> Din ley guin najn par castizi, per lod ad yu't ley, ad yu't mod chu gui b guial ad cay jnt bejn ley guin cumplid.

<sup>16</sup> Zeel chi been Dios promejs loj Abraham guial gud  daman ni r baman par gra ree xdiaaman, beenman promejs guin lojman guial bililadx Abraham guin laaman, din guiguien guial najman benza'c abi' ad parzi ree b n zinalt ley guin naj promejs guin, n gajc par ree b n rliladx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. <sup>17</sup> Zi'c ca loj xtiidx Dios lod r baman loj Abraham: "L j

gac dad par zien ree bénguidxliuj.” Zian naj promeys ni been Dios loj Abraham, Dios bén rusban ree bengüt abi' nrieman xcwent ree ni gad chu' loj guidxliuj guie zi'c ruluü ma yu' reen.

<sup>18</sup>Majsi ragbeechaaw Abraham guial ad zajctaman famil, per chi rëb Dios lojman zian, bililadxaman ni rëb Dios, bililadxaman guial gac gra ni rëbaman lojman. Zianan zeel najman dad par gra ree bén riladx Dios zi'cgajc laaman. Zi'c rëb Dios lojman, chi rëbaman: “Zian gaquil famil, dád famil narooob gaquil.” <sup>19</sup>Cost tibgayuu ijz ma yu' Abraham nadxel, ragbeeman guial ma naj reeman bengol në xbéngunaaman Sara guial chu' xi'n reeman, per ad guyunawëegtaman, bililadxaman ni rëb Dios lojman. <sup>20</sup>Ad yu't dxej ad bililadxtaman ni rëb Dios. Diidxli bililadxaman laaman abi' rudëëman quixtëë lojman, <sup>21</sup>din guidiblagaa bililadxaman guial rajp Dios guialrniabee güünman zi'c ma rëbaman. <sup>22</sup>Zeel been Dios cwent Abraham zi'c tijb bén ad yu't xtol.

<sup>23</sup>Abi' lod rëb guial been Dios laaman cwent zi'c bén ad yu't xtol guial bililadxaman laaman, ad tijbtzi Abraham ruza't yagaj, <sup>24</sup>nëgajc dunuj ree din ma raliduladx ree Dios. Abi' në dunuj ree ma nüjnman cwent zi'c bén ad yu't xtol, Dios bén basban Dad Jesucrist loj guialgüjt, <sup>25</sup>Dad Jesucrist bén güit por dux tol ree, dxel babanman abi' por laaman ma naya ree loj Dios.

### Chi ma naya bejn loj Dios

**5** Ma nüjn Dios dunuj ree cwent zi'c bén ad yu't xtol guial raliduladx ree laaman, zeel ma nadxu' ree zagdxe con laaman por xguialgüjt Dad Jesucrist. <sup>2</sup>Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dád nix yu' du luxdoo ree din ralëëz ree yayal ree xanyabaa lod za'man. <sup>3</sup>Abi'

ad ziantzi, në guial yu' du luxdoo ree zagdxe por guialrzagdiaj ni radüüd ree, din rayagbee ree por guialrzagdiaj guin yasiid ree yaya'p ree pasens. <sup>4</sup>Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios. <sup>5</sup>Ni ralëëz ree por Dios, ad zasa'nxtutan dunuj ree, din rayagbee ree guial rën da'taman dunuj ree por xSprijtaman bén ma baneeman duloj ree.

<sup>6</sup>Gocli babajn ree ad bile't naguieen ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree bëndol. <sup>7</sup>Dunuj ree rayagbee guial nawëëg naj chu' bén tiëb guiët por zatijb bejn. Ni'czi por tijb bén naban xnejz, o wed yu' bén tiëb guiët por tijb benza'c da't. <sup>8</sup>Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree bëndol. <sup>9</sup>Per yan ma naya ree loj Dios por xguialgüjt Jesucrist, abi' ad ziantzi, në ad zayaltri ree xcasti Dios chi guidxin dxej. <sup>10</sup>Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxgui yan ad züjntaman dunuj ree perdon ya, guial ma nabajnnë' ree Jesucrist, bén guxhal nejz par loj Dios. <sup>11</sup>Abi' ad laatzan, në guial yu' du luxdoo ree nix radëëd ree quixtëë loj Dios por Dad Jesucrist, din por laaman ma nadxu' ree zagdxe con Dios.

### Adán në Cristo

<sup>12</sup>Por tijb xinguaaw guzuloj guyu dol loj guidxliuj, abi' por dol guin guzuloj guyu guialgüjt, gra ree bejn bayal guialgüjt guin guial been reeman dol. <sup>13</sup>Diizd chi gad ley ni badëëd Dios loj Moisejs chu' mal yu' dol, per guial achet ley guyu nadxel, achut zajc guiëb guial cayüjn bejn dol. <sup>14</sup>Per majsi zian, bidxinczi dxej ni güit reeman, diizd xtiamp Adán xt xtiamp Moisejs, majsi ad beent reeman



lasa' dol ni been Adán. Abi' tiampzii Adán gojc tijb sen par tijb bén naj gui't.

<sup>15</sup> Din garen naj dol ni been Adán guial loj perdon ni zëed por Dios. Por xtol tijb bejn guzuloj guyu guialgüjt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rüjn Dios dunuj ree perdon, abi' ni been Jesucrist naj ni mazri lasajc, në ni mazri zagdxe par zien ree bejn. <sup>16</sup> Din garen naj dol ni been Adán guial loj perdon ni runee Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. <sup>17</sup> Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree bén rililadx guial por Cristo ma naj bejn naya guidiblagaa loj Dios, abi' gap reeman guialnaban tiblyaaa con laaman.

<sup>18</sup> Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon në guialnaban loj Dios. <sup>19</sup> Din por tijb bén ad bazoobt diidx gra bejn naj bëndol. Per ziangajc por tijb bén bazoob diidx ma zajc gap bejn perdon loj Dios.

<sup>20</sup> Abi' Dios badëë ley loj Moisejs, din por ley guin gagbee ree bejn guial cayüjn reeman dol. Abi' chi ragbee bejn guial cayüjnman zien dol loj Dios, ziangajc mazri benza'c naj Dios par güünman laaman perdon. <sup>21</sup> Guia'xchej gunabee dol bejn ree, abi' por dol guin guzuloj guyu guialgüjt. Per yan mazri nadxu'guijc ree guial rën Dios dunuj ree, din guial rënman dunuj ree nünman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

### Ma bayëjt ree par dol per nabajnnë' ree Jesucrist

**6** Ad naladxidi canin lojdi guial yaguieen ree dol mazri din guiën Dios dunuj ree mazri. <sup>2</sup> Din ad ziantan,

ma bayëjt ree par dol ad rayaltri yaguieenz yaguieen ree dol. <sup>3</sup> Din gol bignia' guial chi barobnijs ree por Jesucrist, laan naj zi'c rülüü guial në dunuj ree ma bayëjt con laaman. <sup>4</sup> Chi barobnijs ree rën guiëban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rën Dios.

<sup>5</sup> Abi' bal chi barobnijs ree ma nayajc ree tijbzi con Jesucrist loj xguialgüjtaman, zi'c babanman ziangajc yaban ree. <sup>6</sup> Din dunuj ree rayagbee guial chi güit Jesucrist loj crüjz, güjtaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj nawëëg güün dol dunuj ree gan din ad rniabeetri dol guin dunuj ree. <sup>7</sup> Din bén ma güjt por dol, ad rniabeetri dol guin laaman. <sup>8</sup> Abi' guial güjt Jesucrist por dux tol ree, zeel ma bayëjt ree par dol guin, yabajn tëë ree con laaman. <sup>9</sup> Din dunuj ree rayagbee guial chi baban Jesucrist ad yu'tri dxej guiëtaman din ad rniabeet guialgüjt laaman. <sup>10</sup> Con tivoltizi güjt Jesucrist por xtol ree bejn, yan ma nabanman par Dios. <sup>11</sup> Ziangajc lëjt gol been cwent guial ma güjtidi par dol, abi' ma nabandi par Dios guial ma najdi tijbzi con Dad Jesucrist.

<sup>12</sup> Zeel la'tgaj nabandi loj guidxliuj guie ad tiëbidi nabee dol lëjt, ad tiëb tëëdi güün ree xgabdxuudx lëjt gan. <sup>13</sup> Ad cwëeladx lëjt gajc loj dol par güüнди ni mal, zagdxeli gol cwëjb nabee Dios lëjt, zi'c tijb bén ma güjt, abi' yabandi par laaman. Gol cwëjb nabeeman lëjt par güüнди ni zagdxe. <sup>14</sup> Zian ad zanabeetri dol lëjt, per ad por guial yu'guijctidi ni rëb ley ad güüнди, ad zanabeetri dol guin lëjt por guial zinalidi guial rën Dios lëjt.

### Ma gulaa ree loj dol

<sup>15</sup> Ad canitan por guial ma zunaal ree guial rën Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan. <sup>16</sup> Lëjt ragbee bal yu' chu rniabee dunuj ree, yazoob ree xtiidx bén rniabee dunuj ree. Yan bal dol guin rniabee lëjt yayalidi casti, per bal ruzoobidi xtiidx Dios dxel ma rayalidi perdon. <sup>17</sup> Per quixtëe Dios guial majsi guia'xchej gunabee dol lëjt, per yan con guidib luxdoodi ma zinalidi xtiidx Dios zi'c ma basiididi. <sup>18</sup> Abi' yan guial ad rniabeetri dol lëjt, ma nabandi din güündi zi'c rën Dios. <sup>19</sup> (Canenë'n lëjt con ganax diidx ni zajc chignia'di xhie rën guiëb ni canin, din ragbeen guial nawëëg naj chignia'di ni guin ree.) Zi'c gunabee dol lëjt guia'xchej persi beendi ni dxuudx ree në graloj ree ni mal, ziangajc yan guidiblagaa gol cwëjb nabee Dios lëjt din gac güündi ni zagdxë guiban tëedi zi'c rënman.

<sup>20</sup> Chi gunabee dol lëjt ni'quid guyutidi xgab nibajndi zi'c rën Dios. <sup>21</sup> Per, çhieza gan beendi por ni mal ni beendi nadxel, ni mal ni ratunëdi yan guial ma ragbeedi por laan zëed xcasti Dios? <sup>22</sup> Per yan guial ad rniabeetri dol lëjt ma zinalidi xnejz Dios, abi' laan naj ni zagdxë din por zian ma zajc guibandi zi'c rën Dios gap tëedi guialnaban tiblyaaa con laaman. <sup>23</sup> Din ni rüjn bejn gan por dol laan naj casti, per ni razaladx Dios naj guialnaban tiblyaaa par ree bén ma naj tijbzi con dux Dad ree Jesucrist.

### Ni naj zi'c guialruxhliaa

**7** Compniar raliduladx ree Jesucrist, lëjt ragbee xhienaag naj tijb ley. Ley guin naj ni rniabee bejn la'tgaj nabanman. <sup>2</sup> Laan naj zi'c chi ruxhliaa bejn, ad zajct guxhliaanëman ben ren la'tgaj naban lacheelaman. Per bal guiët lacheelaman dxel ad yu't ley ni gudxoon

guial guxhliaanëman ben ren. <sup>3</sup> Zeel bal naban lacheelaman abi' guchajgaman ben ren, dolan cayünman. Per bal ma güjt lacheelaman dxel achet ley gudxoon guial guxhliaanëman ben ren ad cayün tëetaman dol.

<sup>4</sup> Ziangajcan lëjt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bén baban zatijb, abi' zian ma zajc yaguieen ree zi'c rën Dios yaguieen ree. <sup>5</sup> Din chi babajn ree zi'ctzi bayën ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti. <sup>6</sup> Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tëe mod ni nabajn ree, ma zajc yaguieen ree zi'c rën Dios por xSprijtaman bén nabajnnë' ree, ad guial nadxu'guijct ree ley guin.

### Ley con dol

<sup>7</sup> Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee tëetan guial dol naj guialrzëëbladx, bal id rëb loj ley guin: "Ad sëëbladxil." <sup>8</sup> Per chi gogbeen guial ni mal naj guialrzëëbladx, mazri gojcxhiey da dolan por gra ni guzëëbladxan. Bal id yu' ley, ad zagbeet bejn xhienin naj dol. <sup>9</sup> Chi gadan günbee ley guin, par naj zagdxë naban. Per chi benbeen ley guin, gogbeen guial cayünan dol abi' por dol guin rayalan casti. <sup>10</sup> Bi't ley guin din gagbee bejn xhienaag guibanman, per par naj bi'tzan par gudëëdan naj casti. <sup>11</sup> Din basquiee dol guin naj guial zile' günan gra ni rniabee ley, per por ley guin gajc gogbeen guial castizi rayalan.

<sup>12</sup> Zeel ad ni malt naj ley guin din loj Dios zëëdan abi' gra ni zëed loj ley guin loj Dios zëëdan, abi' zagdxë xnejz tëe naj ni rëb loj ley guin. <sup>13</sup> Ad ley guint rajp dol guial rayalan casti, dol guinan naj

ni basquiee naj din gūnan ni rayal casti. Abi' por ley guin gogbeen guial ni dxu-udx da't naj guial gūūn bejn dol.

<sup>14</sup>Dunuj ree rayagbee guial por Dios zēēd ley guin, per guial najn bēnguidxliuj zeel zianczi rūjn dol guin naj gan. <sup>15</sup>Ad rignia'tan xhienin rajcan, din ad rūntan ni rēnan, aal ni ad rēntan rūnan. <sup>16</sup>Abi' chi rūnan ni ad rēntan gūnan, zian ragbeen guial ni zagdxequi naj ley guin, din por ley guin ragbeen xhienin cayūnan. <sup>17</sup>Zeel ad najtzi rūn guial rūnan ni ad rēntan, rūnan laan guial najn bēndol, abi' zianczi rūjn dol guin naj gan. <sup>18</sup>Din guial najn bēnguidxliuj, ragbeen guial ni'czi ta'n ad najtan benza'c, majsi rēnan gūnan ganax ni zagdxē, per ad rajctan. <sup>19</sup>Ad rūntan ganax ni zagdxē ni rēnan gūnan, aal ganax ni mal rūnan ni ad rēntan gūnan. <sup>20</sup>Yan bal rūnan ni ad rēntan gūnan, ad najtzi rūn par gūnan laan, rūnan laan guial najn bēndol abi' zianczi rūjn dol naj gan.

<sup>21</sup>Ragbeen guial majsi rēnan gūnan ganax ni zagdxē, per laa za' gajc dol guin par gūūnan naj gan. <sup>22</sup>Dád ruladxan gra zi'c rniabee Dios gūnan, <sup>23</sup>per yu' ni rudxoon gūnan laan, abi' ni rudxoon guin naj dol, guial sta naban dol guin luxdon abi' zianczi rūjnan naj gan.

<sup>24</sup>¡Prob naj! ¿Chu zajc yabēē naj loj casti rayalan por dol ni rūnan guial naj naj bēnguidxliuj? <sup>25</sup>Per quixtēē Dios guial por dux Dad ree Jesucrist ma gulaan loj casti guin. Diidxliczi da xgaban naj guial gūnan ganax ni rniabee Dios, per guial najn bēnguidxliuj zeel zianczi rūjn dol guin naj gan.

### Guialnaban runee xSprijt Dios

**8** Gra ree bén riladx Jesucrist ad rayaltri reeman xcasti Dios, bén ad nabantri ree zi'ctzi rēn reeman, laa reeman ma rūjn reeman naguiejn naban reeman zi'c rniabee xSprijt Dios. <sup>2</sup>Din por

xgualrniabee xSprijt Dios, bén runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal tēētri ree xcasti Dios. <sup>3</sup>Guial nayajc ree bēnguidxliuj ad bile't nūjn ley dunuj ree yudar, ley ni badēēd Dios loj Moisejs. Per yan ma been Dios ni ad bile't nūjn ley guin. Laaman guxhaal Xi'n loj guidxliuj zi'cgajczi tijb bēnguidxliuj persi gūjtaman por dux tol ree chitēē nabeeri dol dunuj ree. <sup>4</sup>Laaman been zian, din yaguieen ree zi'c rēnman zi'cgajc tijb bēn cayūjn zi'c rniabee ley guial ad nabantri ree zi'ctzi rayēn ree, ma nabajn ree zi'c rniabee xSprijt Dios.

<sup>5</sup>Bén naban ree zi'ctzi naj xixgab reeman, mazri yu'guijc reeman gūūn reeman zi'ctzi rēn reeman. Per ree bén naban zi'c rniabee xSprijt Dios, mazri yu'guijc reeman gūūn reeman zi'c rniabee Sprijt guin. <sup>6</sup>Guial yu'guijc bejn gūūnman zi'ctzi naj xixgabaman zeel zēēd casti. Per bén yu'guijc gūūn zi'c rniabee xSprijt Dios, zajpaman guialnaban con Dios yabe'cdxē tēē Dios luxdooman. <sup>7</sup>Bén yu'guijc ree guiban zi'ctzi naj xixgab reeman, rdxē'ch Dios laa reeman din ad rēnt reeman guzoob reeman xtiidxaman ad rīle' tēēt gūūn reeman zi'c rēnman. <sup>8</sup>Zeel bén naban ree zi'ctzi naj xixgab reeman, ad ruladxt Dios ni rūjn reeman.

<sup>9</sup>Per lējt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabannēdi xSprijt Dios. Din bén ad nabannēt xSprijt Dios, ad najtaman xbejn Cristo. <sup>10</sup>Per bal ma nabannēdi Cristo, rēn guiēban guial ma gūjtidi par dol, ma nabannēdi xSprijt Dios din ma nūjn Dios lējt cwent sin dol. <sup>11</sup>Abi' bal ma nabannēdi xSprijt Dios, bén basban Jesucrist loj ree bengūt. Majsi guiētidi per zasban Dios lējt din tia'di zatijb guialnaban por xSprijt Dios bén nabannēdi.

<sup>12</sup> Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree. <sup>13</sup> Din bal nabandi zi'ctzi naj xixgabidi, dxel yayalidi casti, per bal por xSprijt Dios bén nabannédi ma basa'ndi dol tiblax dxel ma gapidi guialnaban tiblyaa con Dios.

<sup>14</sup> Gra ree bén rtiëjb niabee xSprijt Dios laa reeman, laa reeman naj xi'n Dios. <sup>15</sup> Din ad nabannët reeman xSprijt Dios par guidxeb reeman, zi'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: “iDad!” <sup>16</sup> Din xSprijt Dios rusni dunuj ree persi rayagbee ree guial ma nayajc ree xi'n Dios. <sup>17</sup> Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree guialzi zi'c laaman din yayal ree xanyabaa lod zojbaman.

<sup>18</sup> Ma benan xgab guial achet lasajc guialrzagdiaj ni caydüüd ree yan guial loj guialnaza'c ni yaca' ree xanyabaa. <sup>19</sup> Abi' xt gra ree ni badxe' Dios loj guidxliuj, ma rën nejzdoo reen guidxin dxej guiguien chu ree nin naj xi'n Dios. <sup>20</sup> Din guidxliuj ma guxinan, per ad laatan rajp dol, Dios basa'n gac zian. Yan cabësi guidxliuj guin <sup>21</sup> yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie. <sup>22</sup> Per la'tgaj cabëz guidxliuj guin guidxin dxej guin, dunuj ree rayagbee guial dád naya cazagdiajn zi'c rzagdiaj tijb béngunaa chi ma gal xi'nman. <sup>23</sup> Abi' ad tijbtizi guidxliuj guin cazajc zian, në-gajc dunuj ree guial nabajnnë' ree xSprijt Dios zi'c tijb sen por ni guneee Dios duloj ree. Abi' cayzaagdiaj ree la'tgaj caylëjz ree guidxin dxej ni guiguien guial nayajc ree xi'n Dios, dxej ni guidxaa dux cuerp ree chi yaya'p ree cuerp cüb. <sup>24</sup> Dunuj ree rayagbee guial gac zian, laan naj ni ralëjz ree guialraliduladx ree ma nayajc ree perdon. Lëjt ragbee bal ni ralëjz ree

ma gojcan, ad zalëztri reen din ad zajc-tri cwëz bejn ni ma gojc. <sup>25</sup> Per bal gad ni caylëjz ree gac, ad rayalt yadxag ree yalëz ree gacan.

<sup>26</sup> Abi' xSprijt Dios ragnë dunuj ree chi ad rayagbee ree xhie yaguieen ree, din yu' dxej loj hor guin ad rilet' yarejdx yanaab ree Dios zi'c rayal. Abi' chi ad rayagbee ree xhienaag yaguie'ch ree loj Dios, xSprijt Dios mal ragbee dux quiar-guiejn ree, dxel laaman rbejdx rniab Dios por dunuj ree. <sup>27</sup> Abi' Dios, bén nünbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c rën Dios.

#### Achet zajc güün dunuj ree gan

<sup>28</sup> Dunuj ree rayagbee guial gra ni cayza'c ree loj guidxliuj guie naj ni güün sirv par dunuj ree guial rayën ree Dios, dunuj ree guial bazoob ree xtiidxaman par yaguieen ree zi'c rënman. <sup>29</sup> Abi' di-izd guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj Bén nabee loj gra ree Bén naj Xi'n Dios. <sup>30</sup> Gra ree Bén ragbee Dios guial chililadx reeman laaman, rbejdxaman laa reeman din gac reeman xbejnman, rüjnman laa reeman cwent sin dol abi' rudëëman xanyabaa loj reeman lod zojbaman.

<sup>31</sup> Yan, guial ma rayagbee ree gra ree ni guie, achet güünan chutëz güün xcontr dunuj ree, dunuj ree rayagbee guial Dios gagnë dunuj ree. <sup>32</sup> Ad gurex-ut Dios nudëë Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, ¿diidxgui ree ni ren ree nid zuneeman duloj ree ya? <sup>33</sup> ¿Chu zajc cwe'c dux guialquia ree nayajc ree Bén ma gulej Dios? Din Dios ma nüjn dunuj ree cwent sin dol. <sup>34</sup> Achut zajc na guial rayal ree

casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. <sup>35</sup> Zi'c rën Cristo dunuj ree, achut zajc yala' dunuj ree con laaman. Ni'qui por gualyu'naya, o por gualzi, o por ni rüjn bejn dunuj ree, o por gualrliaan, o por gual ryaadx du xab ree, o por tijb ni nadxeb, o gual yayëjt ree, achet zajc yala' dunuj ree con laaman. <sup>36</sup> Zi'c rëb loj xtiidx Dios:

Guial nayajcan xbejnl, zianczi nadxu'n loj gualgüjt.

Rüjnnë reeman dunujn zi'c ree xiil ma naj guiët.

<sup>37</sup> Per ni'qui tijb ni guin ad züjnt dunuj ree gan guial ragnë Cristo dunuj ree, bén rën dunuj ree. <sup>38</sup> Ragbeechaawan guial ni'qui gualgüjt, ni'qui gualnaban, ni'qui ree anjl, o xindxab ree, o gra ree ni rajp gualrniabee, o ni cayajc, o ni zëéd gac, <sup>39</sup> o ni zëéd xanyabaa, o lën liuj, ni'qui tijb ni been Dios, achetdzi achut tëët zajc chiquied gualrën Dios dunuj ree por dux Dad ree Jesucrist.

### Dios gulej bén Israel ree

**9** Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, <sup>2</sup> guial guixie guixie dád yu'naya luxdoon, xt ni'quid radxejlt xhie günan. <sup>3</sup> Balzianclaa majsi ad zayaltan perdon, majsi güün Cristo naj tiblax, per bal zian chile' günan yudar bén ladx reen chitëë yayal reeman casti. <sup>4</sup> Laa reeman naj bén Israel, abi' laa reeman naj bén gule Dios din gac reeman xbejnman. Abi' guzujman con laa reeman zi'c form tijb zaj, baya'nnëman laa reeman diidx conin güünman con tëënin güün reeman, badëë tëë xleyaman loj reeman. Rëbaman loj reeman xhienaag guiën reeman laaman, been tëëman promejs loj reeman. <sup>5</sup> Zëéd reeman loj xdiaa ree bén

been ree sirv loj Dios gual, loj gajc ree bén zëéd Cristo chi bi'taman loj guidxliuj, laaman naj bén nagle' zianczi rajp tëëman gualrniabee loj gra ni yu'. Amén.

<sup>6</sup> Ad canitan guial ad züjntri Dios xpromejsaman cumplid, ni canin naj guial ad grat ree bén Israel naj xbejn Dios. <sup>7</sup> Ad guial zëédrt reeman loj xdiaa Abraham din gac reeman xdiaaman, din rëb Dios loj Abraham: “Diizd xi'n! Isaac suloj xdiaal.” <sup>8</sup> Laan rulüü dunuj ree guial ad por guial najt bejn bén Israel, ma najman xbejn Dios, xbejn Dios naj ree bén naj cwent loj xdiaa Abraham guial rliladx reeman xtiidx Dios zi'c Abraham. <sup>9</sup> Din Abraham bililadxaman Dios chi rëb Dios lojman: “Zatib ijz tiamp guie gajc gualan abi' dxej zii ree ma ca' Sar tijb xindobëz.”

<sup>10</sup> Abi' ad laatzan. Grop ree xi'n Rebeca gojc xdad reex Isaac, bén goc dux bégulal ree, <sup>11-13</sup> per chi gad reex gal, chi ad wayüjn tëët reex ni zagdx ni'qui ni mal, rëb Dios loj Rebeca: “Xin yaløj guin laax güün sirv loj xinguiag guin.” Zi'c rëb loj xtiidx Dios lod rëb: “Guyënan Jacob, per bidxe'chan Esaú.” Zian rguien guial ma ragbee Dios chu rbeman ad por ni rüjnt bejn, laaman ma ragbee chu rucaabeeman.

<sup>14</sup> Yan, ¿por zian yaguie'ch ree ya, ad rüjnt xguialguxtis Dios zi'c rayal? ¿Per ad ziantan! <sup>15</sup> Din Dios rëb loj Moisejs: “Yayan bén rënan yayan abi' bén rayal ree casti, bal rënan ad zudëédrtan laa reeman casti.” <sup>16</sup> Zeel ad zile't yaya Dios bejn por xixgabzaman o por ni rüjnman, laaman mal ragbee chu rënan yayanman. <sup>17</sup> Loj xtiidx Dios rëb guial rëbaman loj rey Egipto: “Naj ben lüj rey din guiguien da gualrniabeen din güünbee gra béguidxliuj naj.” <sup>18</sup> Zeel rnin lojdi guial ma ragbee Dios chu yayaman chu tëë güünman luxdoo gojl.

<sup>19</sup> Per wed por zian nadi: “Bal zianan, ¿chexquiza zeel rdx'e'ch Dios guial nayajc ree zi'c nayajc ree awa ad zajct yadxoan ree zi'c naj xixgabaman?” <sup>20</sup> Per, ¿chu naj benguixliuj din guinieeman Dios zian? Wen zajc guiëb tijb guiajs loj bèn been laan ya: “¿Chexc zeel beenl naj zian?” <sup>21</sup> ¿Nid bèn rüjn guiajs guin rüjnnë bajn guin zi'ctzi rënman ya? Laaman ruguiaa xhie güünnëman bajn guin, bal güünman guiajs güün dxiin guixie guixie o güünman guiajs güün dxiin dxej zobblojzi ree.

<sup>22</sup> Yan, ziangajc Dios ma ragbeeman chu rayal casti, abi' xt zajc laa nudëëd gajcaman casti din guiguien xguialrniabeeman. Per gudaanman gojp tëëman pacens bèn ad ruzoobt ree diidx, bèn rayal ree nit. <sup>23</sup> Gudaanman laa reeman din guiguien guial laaman guinia xhienaaag güünman, guial laaman naj bèn ca' gualrniabee abi' bayaman bèn ragbeeman diizd guia'xchej guial yayal reeman xanyabaa. <sup>24</sup> Abi' laa reeman naj dunuj ree bèn ma gurejdx Dios, loj ree bèn Israel në loj ree bèn ad najt bèn Israel. <sup>25</sup> Zi'c ca loj libr ni bacaa Oseas bèn badëë xtiidx Dios loj ree bejn, lod rëb: Bèn ad najt ree da bejnan, guiën loj reeman guial naj reeman da bejnan,

abi' ree bèn ad yu't bèn rën laa reeman, naj guiën laa reeman.

<sup>26</sup> Abi' lod rëb Dios loj ree bejn: “Ad da bejntan lëjt”.

Yagaj gac reeman xbejnman, laaman guial najman bèn naban.

<sup>27</sup> Guiáad Isaías bèn badëë xtiidx Dios loj ree bejn, rëbaman por ree bèn Israel: “Majsi zien da't naj ree bèn Israel zi'c üx riga' ro' nijsdoo, per ta'nz naj ree bèn laa loj casti, <sup>28</sup> din Dios nayob güün cumplid xtiidxaman loj guidxliuj guie zi'c ma rëbaman.” <sup>29</sup> Abi' diizd gocli rëb Isaías loj ree bejn:

Bal nitiëjb dux Dad ree Dios

bèn rajp gra gualrniabee ninijt gra ree dux búngulal ree, diizd gocli mal gunijjt dux diaa ree zi'c gunit ree bèn Sodoma në ree bèn Gomorra.

### Bèn ad najt ree bèn Israel ma naj reeman perdon loj Dios

<sup>30</sup> Yan, ¿xhie yaguie'ch ree? Bèn ad najt ree bèn Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rliiladx reeman Jesucrist. <sup>31</sup> Abi' ree bèn Israel majsi dád been reeman naguiejn guiban reeman zi'c rniabee ley din gac reeman perdon loj Dios, per ad gojctan. <sup>32</sup> ¿Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb “guiaj ni rliadx guia' bejn” <sup>33</sup> zi'c ca loj xtiidx Dios lod rëb:

Ma gulen tijb bejn luguiedx Sión, bèn gac zi'c tijb guiaj ni ladx guia' ree bejn abi' gusajban laa reeman.

Abi' bèn chililadx laaman ad yu't dxej yaya'nxtuman.

**10** Compniar raliduladx ree Jesucrist, ni rënan miaab tëen loj Dios naj guial gac ree bèn Israel perdon. <sup>2</sup> Din naj ragbee guial dád cayüjn reeman naguiejn cayüjn reeman sirv loj Dios, per diidxli ad rignia't reeman zagdx xhienaag rën Dios güün reeman. <sup>3</sup> Din ad rtiëjbt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rën Dios din gac reeman perdon. <sup>4</sup> Din por Jesucrist bayaaloj zi'c rniabee ley güün bejn, yan bèn rliiladx ree laaman, ma naya reeman loj Dios.

<sup>5</sup>Bén rën gac naya loj Dios guial zinalaman ley, rëb Moisejs guial bèn güün zi'c tal rëb ley, zajpaman guialnaban la'tgaj cayünman zi'c rniabee ley guin. <sup>6</sup>Per guial rajc bejn naya loj Dios por guial rliiladxaman Jesucrist, naj guial ad züjntaman xgab: “¿Chuczi zajc chë'p xanyabaa?” (Din rën guieëban guial ad rliiladxtaman, abi' rënman guguiaaman guiat Cristo loj guidxliuj.) <sup>7</sup>Ad guieëb tēeman: “¿Chu zajc che lod za' ree bengüt?” (Din rën guieëban guial ad rliiladxtaman, abi' rënman guguiaaman yaban Cristo loj ree bengüt.) <sup>8</sup>Per loj xtiidx Dios rëb: “Gajxh za' xtiidx Dios con lüj, ryaadxzi güünl xgab guieëb tēel bal chililadxil laan.” Din guialrliiladx ni ratie'ch ree naj ze. <sup>9</sup>Bal yaneero'l guial Jesús naj Dad par lüj abi' guidib luxdool chililadxil guial basban Dios laaman loj ree bengüt, dxel ma najl perdon. <sup>10</sup>Din chi chililadx bejn Jesucrist con guidib luxdoolman, dizd loj hor zii ma najman cwent sin dol. Abi' chi yaneero'man guial Jesucrist naj Dad par laaman, dxel ma najman perdon.

<sup>11</sup>Abi' loj xtiidx Dios rëb: “Gra ree bèn chililadx laaman ad yu't dxej yaya'nxtu reeman.” <sup>12</sup>Laan rën guieëb guial loj Dios tiblojzi naj bejn, achet güünan chutēëz najman, bal najman bèn Israel o ad najtaman bèn Israel. Din tijbzi Dios naj Dad par dugra ree, abi' dád benza'can con gra ree bèn rbejdx rniab laaman. <sup>13</sup>Din loj xtiidx Dios rëb: “Gra bèn yanab perdon loj Dios, gacaman perdon.” <sup>14</sup>Per, ¿xhieza naag cwedx guiniab reeman laaman awa ad waliladxt reeman laaman? ¿Abi' xhieza naag chililadx reeman laaman awa ad wacaagdiajgt reeman xcwentaman? ¿Xhienaag guiguiejn reeman xcwentaman awa achut bèn guinee xtiidxaman loj reeman? <sup>15</sup>¿Xhienaag chu' bèn gutie'ch xtiidxaman awa achut guixhiaal laa reeman?

Loj xtiidx Dios rëb: “¿Ni za'cdxoon naj chi rdxin bèn zinë ruson zagdxe!”

<sup>16</sup>Per ad grat bejn ridxga' xtiidxza'c Dios. Zi'c rëb Isaías: “Dad, ¿chu ma rliiladx ni ranen por lüj?” <sup>17</sup>Zeel guialrliiladx zëed por ni rigueijn bejn, abi' ni rigueijn bejn naj xtiidxza'c Jesucrist.

<sup>18</sup>¿Wen nid wagueijn ree bejn laan ya? ¿Per naj rni guial ma bacaagdiajg reeman laan! Din loj xtiidx Dios rëb: Guidib guidxliuj ma bire'ch xtiidx Dios abi' xt luar bigra lod nagueie'ch ma bigueijn reeman xtiidxaman.

<sup>19</sup>Yan rünan xgab: ¿Wen id rignia' ree bèn Israel xtiidx Dios ya? Per diidx guial'xchej bacaa Moisejs ni rëb Dios por laa reeman chi rëbaman:

Naj güün din tédlojdi por ni güünan con ree bèn ad najt bèn Israel.

Në por ni güünan con laa reeman, majsi ad ragbeet reeman, abi' zadxe'chidi.

<sup>20</sup>Abi' sin guialrdxeb bacaa Isaías ni rëb Dios por ree bèn Israel, chi rëbaman: Bén naj ree bèn Israel, majsi ad baguiilt reeman naj, per badxejl reeman naj.

Abi' ma balülon loj reeman, majsi ad gunabdiidxt reeman por naj.

<sup>21</sup>Bacaa tēë Isaías ni rëb Dios por ree bèn Israel, chi rëbaman: “Dëchej za'n rbedxan bejn ree abi' ad rënt reeman guzoob reeman diidx al rusagloj reeman naj.”

### Xixgab Dios

**11** Ad canitan lojdi guial ma gulëeladx Dios bèn Israel ree, din ad ziantan. Lëjt ragbee guial bèn Israel naj abi' loj xdiaa Abraham zialan, guial zialan loj xdiaa Benjamín. <sup>2</sup>Diidx guial'xchej, gulej Dios bèn Israel ree din gac reeman xbejnman, zeel ad rbëeladxtaman laa reeman. ¿Nid rusaaladxidi tiblajt loj xtiidx Dios ya lod zëed chi gule'c Elías bèn badëë xtiidx

Dios loj ree bejn xguialquia ree b n Israel loj Dios? Chi r baman: <sup>3</sup>“Dad, ma bag jt reeman gra ree b n bad e xtiidxil loj ree bejn ma bachijl t e reeman xialtar reel, najzi baya'n abi' n gajc naj r n reeman gug jt reeman.”  
<sup>4</sup>Per badxi' Dios xtiidxaman r baman: “Ma gul can gajdx mil bejn par naj, b n ad wazuxibtci ree loj dios la Baal.”  
<sup>5</sup>Yan ziangajc yu' ta'n b n Israel, por guial rayaman laa reeman gulejman laa reeman par laaman. <sup>6</sup>Abi' bal guial rayaman laa reeman gulejman laa reeman, ad por ni cay jnt reeman, din bal nibejman laa reeman por ni cay jn reeman dxel ad por guial rayatraman laa reeman.

<sup>7</sup>Zian gojc, b n Israel b n gule Dios, badxejl reeman laaman guial rliladx reeman laaman. Per ree b n Israel ren gad reeman yadxelj laaman, din raguiil reeman laaman zi'c naladx reeman, ad raguiilt reeman laaman zi'c r nman zeel beenman luxdoo reeman gojl, <sup>8</sup>zi'c r b loj xtiidx Dios lod r b: “Basiaaw Dios xquiarguejn reeman, abi' naj reeman zian xt yandxej, majsi ruguiaa reeman per ruli  ad ruguiaat reeman, abi' majsi riguejn reeman per ruli  ad riguejnt reeman.” <sup>9</sup>R b t e Davi:

Xguialraw zagdxe reeman con gra xguialnaza'c reeman  
 laan gusquiee laa reeman guial z qui reeman zagdxe.

Laan gusquiee laa reeman din t d reeman casti ni rayal reeman.

<sup>10</sup>Yaya'n reeman zi'c tijb b n ad ruguiaat,  
 abi' sac reeman zi'c tijb b n ca b w xijch.

### Gac ree b n ad najt b n Israel perdon

<sup>11</sup>Ad canitan lojdi por guial ad rti jbt ree b n Israel g  n reeman zi'c r n Dios zeel ma gunijt reeman loj Dios, din ad ziantan. Guzajc reeman zian din chu' mod gac ree b n ad najt ree b n Israel

perdon, din chile' s ebladx ree b n Israel gap reeman perdon guin. <sup>12</sup>Yan bal guial ad bazoobt ree b n Israel diidx, beenan sirv par din yayal los demazri ree b nguidxliuj xguialnaza'c Dios, b n ad najt ree b n Israel. Yan,  r jndi xgab ya xhienaag g  nle' Dios bejn ree chi ti b ree b n Israel g  n reeman zi'c r n Dios?

<sup>13</sup>Yu' ni r nan ganin l jt b n ad najt ree b n Israel, l jt ragbee guial Dios guhaal naj din g n xtiidxaman lojdi abi' d d cay nan naguiejn g nan zi'c rayal. <sup>14</sup>R nan guial ree b n ladx reen b n Israel ree s ebladx zi'c r njdi din g  n reeman zian din chile' gac reeman perdon. <sup>15</sup>Walican guial chi ad bazoobt ree b n Israel xtiidx Dios, guyu mod gojc los demazri ree bejn perdon.  Per xi nix chi chililadx reeman xtiidx Dios! Laan naj zi'c chi yaban tijb beng t zatijb. <sup>16</sup>Abi' zi'c chi beenle' Dios b n Israel ree gulal laan naj tijb sen guial g  nle'man los demazri ree b n Israel, ziangajc bal g  nle' Dios xliuj tijb yag guidib yag guin ma nagle'.

<sup>17</sup>B n Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' l j guial ad najtil b n Israel najl zi'c tijb xidx yag olivo ni yu' dajn ni rguiid lod biru' xidx yag olivo guin, zeel rajpil guialnaban por xliuj yag guin. <sup>18</sup>Zeel ad naladxil guial mazri zagdxe najl guial loj yag oliv ni rnin naj ree b n Israel. Per bal r jnl xgab zian, basaaladx guial ad l jt cud e guialnaban loj xliuj yag guin, xliuj yag guin cunee guialnaban lojl.

<sup>19</sup>Wed zanal: “Walican, per gurug xidx yag olivo guin persi guyu'n xluaran din gacan tijbzi con yag olivo guin.”

<sup>20</sup>Waliquil, per xidx yag olivo ni canin naj ree b n Israel, gurug reen guial ad bililadxt reen abi' l j guyul xluar reen guial rliladxil. Zeel ad r jnl nab , zagdxe eli gojp cudad. <sup>21</sup>Din bal b n Israel ni canin naj ree xidx yag guin, ad bayat



Dios laa reeman, ziangajc zajc saquil.  
<sup>22</sup>Gogbee guial benza'c naj Dios, per ziangajc diidxli rüjn xguialguxtisaman. Ma been xguialguxtisaman con ree bén ad bazoobt xtiidxaman, abi' ma beenman ni zagdx con lüj. Per rayal guibanl zi'c rënman, bal id züjnl zian züjn xguialguxtisaman con lüj.  
<sup>23</sup>Abi' bal yayejc ree bén Israel con Dios, abi' chililadx reeman perdon ni zëäd por laaman, züjnman laa reeman cwent con los demazri ree bén Israel rililadx. Din laaman rajp guialrniabee par yayüjnman laa reeman tijbzi con los demazri ree bén Israel.  
<sup>24</sup>Din lüj guial ad najtil bén Israel, lüj guial canin najl zi'c tijb yag olivo ni yu' dajnl, zile' niajqul tijbzi con yag olivo zagdx ni rnin naj ree bén Israel, ÿdiixgui ree bén Israel ni ad ruzoobt ree xtiidx Dios, nid zayajc reeman tijbzi ya con los demazri ree bén Israel bal guzoob reeman xtiidx Dios!

### Gac ree bén Israel perdon

<sup>25</sup>Compniar raliduladx ree Jesucrist, yu' ni ad ragbeetidi abi' rënan gagbeedan, chitëë güüindi nabë. Bén Israel rüjn ree nad par guzoob reeman xtiidx Dios, cayajc zian xt chi ma bayaaloj bililadx ree bén ad najt ree bén Israel, bén ma naj ree par chililadx xtiidx Dios.  
<sup>26</sup>Chi ma gojc zian, dxel graczi ree bén Israel ma güüncwent xtiidx Dios. Zian gac reeman perdon, zi'c rëb loj xtiidx Dios lod rëb:  
 Luguiedx Siön za bén gagnë ree bén zëäd loj xdiaa Jacob.  
 Din yariica reeman loj nejz mal zinal reeman.  
<sup>27</sup>Dxel gac cumplid da diidxan, Zi'c ma rën loj reeman guial günan perdon xtol reeman.  
<sup>28</sup>Per yan guial däd nad ree bén Israel par chililadx reeman xtiidxza'c Jesucrist, zian yu' mod persi rililaxidi guial ad najtidi bén Israel. Abi' majsi zian, rën gajc

Dios laa reeman zi'c beenman promejs loj ree xbéngulal reeman.  
<sup>29</sup>Din Dios ad ruchaat xixgabaman, ni ma bazaladxaman loj bejn, ad rquiedtaman laan, ad rbëäladx tëëtaman bén ma gulejman par laaman.  
<sup>30</sup>Gocli ad binaltidi xnejz Dios, per yan por ree bén Israel ad ruzoobt xtiidx Dios, ma balüüman lëjt guial rayaman lëjt.  
<sup>31</sup>Abi' bal yan ad ruzoobt ree bén Israel xtiidx Dios, cayajc zian din yayaman lëjt, per chi guidxin dxej ziangajc yayaman laa reeman.  
<sup>32</sup>Cwëjb Dios guial zi'c ree bén Israel në ree bén ad najt bén Israel ad zuzoobt reeman xtiidxaman, din gac yayaman gra reeman tiblojzi.

<sup>33</sup>ÿDäd zro' naj xguialrignia' Dios, në xguialrajcaman con xguialnaza'caman! Achut zajc gagbeechaaw xhienaag naj xixgab Dios o ni cayüjnman.  
<sup>34</sup>Zi'c ca loj xtiidxaman lod rëb: “ÿChu zajc gagbeechaaw xhienaag naj xixgab dux Dad ree Dios? ÿChu mazri rajc din guiëb lojman xhienaag güünman?”  
<sup>35</sup>ÿO chu ma badëë xhienin lojman din cwëzaman quixaman laaman?”  
<sup>36</sup>Xienman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Amén.

### Guialnaban cüb

**12** Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n lëjt loj Dios zi'c tijb gon ni ma nagle' ni yayuladx tëëman, din guibandi zi'c rënman, abi' zian guiëndi laaman.  
<sup>2</sup>Ad guibanridi zi'c naban los demazri ree bén yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag rën Dios guibandi. Zian gagbeedi conin naj zagdx conin ruladxaman, con tëënin naj xnejz.

<sup>3</sup>Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad

rayalt güün nabë guial mazri lasajquidi loj ree bejn. Zagdxeli gol been xgab por lëjt zi'c rayal, segun naj quiargueijn ni baneë Dios loj tijbgajdi. <sup>4</sup>Din zi'c xcuerp bejn zien la' najn, per ad tijbtzi ni rüjnan. <sup>5</sup>Ziangajc dunuj ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

<sup>6</sup>Din tijbgaj dunuj ree garent garen naj quiargueijn ni baca' ree, zi'c naj ni guyën Dios baneeman dunuj ree. Zeel bal ma baneeman quiargueijn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. <sup>7</sup>O bal baneeman quiargueijn par yaguieen ree sirv ben ren ree, rayal yaguieen reen zi'c rayal. Bén cwa' quiargueijn par gulüüman bejn ree xtiidx Dios, rayal gulüüman bejn ree. <sup>8</sup>O bén cwa' quiargueijn par gudëëman consejw loj ree bejn, rayal gudëëman consejw. Guiáad bén cwa' quiargueijn par yazaladxaman xhienin loj ree bejn, rayal yazaladxaman con guidib luxdooan. Abi' bén cwa' quiargueijn par nabeeman, rayal gapaman cudad nabeeman zi'c rayal, o bén cwa' quiargueijn par güünman yudar bén cazagdiaj ree, rayal chu' luxdooan zagdxë güünman laa reeman yudar.

### Ni rayal güün ree bén rliladx Jesús

<sup>9</sup>Gol guyën lasa'di con guidib luxdoodi, gol basa'n ree ni mal tiblax, gol binal ni zagdxë. <sup>10</sup>Gol guyën gra ree bejn zi'c tijb bijchidi, ad rüjn lëjt gajc benro', gol gojp respejt lasa'di.

<sup>11</sup>Ad gaquidi bén ploj par güündi ni rayal güündi, con guidib luxdoodi gol been sirv loj Dios.

<sup>12</sup>Gol badxë' luxdoodi zagdxë por ni cabëzidi tia'di, gol gudaan tëë loj ni rza-

gdiajdi, ad gucwëëz cwedx guiniabidi Dios.

<sup>13</sup>Chi xhie ryaadx xcompniaridi, bén rliladx ree Jesucrist, gol been reeman yudar. Gol gojc benza'c con ree bén ri't lidxidi.

<sup>14</sup>Gol gurejdx Dios por ree bén rzunal lëjt par güün reeman lëjt ni mal, ad guzalidi diidxmal guijc reeman, gol gurejdx Dios guial gagnëman laa reeman.

<sup>15</sup>Gol badxë' luxdoodi nix con ree bén yu' luxdoo nix, per con ree bén yu' luxdoo naya, gol been naguieijn din gagbee reeman guial za'quidi con laa reeman.

<sup>16</sup>Gol gubajn zagdxë con ree lasa'di, ad güündi nabë, gol gojc bén naxanladx. Ad naladxidi mazri rajquidi guial loj ree ben ren.

<sup>17</sup>Ad güündi ni mal bén rüjn lëjt ni mal, gol been naguieijn güündi ni zagdxë loj gra ree bejn. <sup>18</sup>Gol been naguieijn da't din cwenëdi bejn ree zagdxë. <sup>19</sup>Compniar raliduladx ree Jesucrist, ad rgu' guialxyajn luxdoodi con ree bén rüjn lëjt xhienin, gol basa'n loj Dios, laaman güün xguialguxtis, zi'c rëb loj xtiidxaman, lod rëb: "Naj naj bén rayal güün xguialguxtis, gudë tëën ni rayal bejn. Zian rëb dux Dad ree Dios." <sup>20</sup>Rëb tëëman: "Bal rliian bén rdxë'ch lüj, badëëd ni gawaman, o bal re'caman nijs, badëëd ni guië'man, zian guguiaal yatuman." <sup>21</sup>Ad bal tiëbil güün ni mal lüj gan, been ni zagdxë din güünl ni mal guin gan.

### Royal yaya'p ree guxtis respejt

**13** Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëëd guialrniabee ni rajp reeman. <sup>2</sup>Zeel bén ad ruzoobt xtiidx ree bén rniabee guin, rën guiëban guial ad rënt reeman güün reeman zi'c rniabee Dios. Abi' ree bén rüjn zian laagajc reeman rguuil xcasti, <sup>3</sup>din bén rajp ree guialrniabee ad za't ree-

man par guchejb reeman bén rüjn ree ni zagdxe, za' reeman par guchejb reeman bén rüjn ree ni mal. Yan bal rën'l guibanl guial ad zadxebtil bén ca' ree guialrniabee, gubajn zagdxe din yaya'n'l zagdxe loj reeman. <sup>4</sup>Din laa reeman cayüjn reeman sirv loj Dios din yalaj reeman lüj. Per bal cayüjnl ni mal, zadxebil bén ca' ree guialrniabee, din ad ca' xlia'tzi reeman guialrniabee guin, laa reeman cayüjn sirv loj Dios din gudëed reeman casti bén rüjn ree ni mal. <sup>5</sup>Zeel rayal guzoobidi xtiidx ree bén ca' ree guialrniabee, ad güündi zian naabzi par ad zayaltidi casti, gol been zian guial ragbeedi zian rayal güündi. <sup>6</sup>Gol gudijx tää impuest, din gusnuu nabee ree bén ca' ree guialrniabee, din laan naj mandad bayal reeman par güün reeman sirv loj Dios.

<sup>7</sup>Zeel gol badëed ni rayal gudëedidi, bal rayal cwe'quidi milia, gol gule'can o bal rayal quixidi impuest, gol gudi-jxan. Gol bazoob xtiidx bén rayal guzoobidi xtiidx, gol gojp respejt bén rayal respejt. <sup>8</sup>Gol been naguiejn gol baguijx ni ralidi loj ree bejn, abi' ad rayalt gucwëez guiëndi bejn ree. Din bén rën bejn ree, ma cayüjnman cumplid gra ni rniabee xley Dios. <sup>9</sup>Xmandamient Dios rëban: “Ad sunël bén ren bén ad najt lacheelil, ad gugüjtil bejn, ad cwanel, ad sëëbladxil ni rajp ben ren”, per mandamient guie ree, con ree xmandamient ren Dios rajc cumplid con tijb mandamient rëb: “Guyën ben ren ree zi'c rën lüj gajc.” <sup>10</sup>Din bén rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaal loj rüjnman gra ni rëb loj xley Dios.

<sup>11</sup>Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuloj qui baliduladxri ree xtiidxza'caman. <sup>12</sup>Mazri caydop tiamp guin, abi' mazri

cabig dxej gui'taman, zeel rayal yasa'n ree ni rinë dunuj ree loj nejz mal, abi' yaguieen ree naguiejn yaguieen ree ganax ni zagdxe din yunaal ree nejz zagdxe. <sup>13</sup>Rayal yabajn ree zagdxe zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunë bejn ben ren bén ad najt lacheelaman, o guial gapaman graloj vijs, o guialrdil o guialrdëdloj. <sup>14</sup>Gol basa'n lëjt gajc loj dux Dad ree Jesucrist, ad rayalt guibandi zi'ctzi rëndi.

### Ad gusa'nxtudi bén qui rliadxri xtiidx Dios

**14** Zagdxe gol guneenë bén qui rliadxri Jesucrist ad gusa'nxtudi laaman guial mazri rajquidi guial lojman. <sup>2</sup>Din yu' ree bén rliadx Jesucrist naladx reeman zajc gaw reeman xhietëez nin, per yu' ree bén qui rliadxri naladx reeman guial zagdxeli naj ad zajwt reeman bëel. <sup>3</sup>Bén rüjn xgab guial zajc gawaman xhietëez nin, ad rayalt güünman tiblad bén naladx yu' ni ad zajct gaw bejn. Guiáad bén rüjn xgab guial yu' ni ad zajct gaw bejn, ad rayalt guze'man bén naladx zajc gaw bejn xhietëez nin. Din niz loj Dios tiblojzi ma naj reeman xbejnman. <sup>4</sup>Zeel, ¿chu naj bejn din guze' xcompniaraman bén rliadx Jesucrist por niguinzi ree? Diosqui ragbee bal cayüjnman ni zagdxe o cayüjnman ni mal. Abi' bal ad wayignia'taman xhien-aag güünman, dxel dux Dad ree Jesucrist rajp guialrniabee par gagnëman laaman güünman zi'c rayal.

<sup>5</sup>Ziangajc yu' ree dux compniar ree bén raliduladxnë' ree Jesucrist naladx reeman guial yu' dxej zobjloj, yu'za ree bén naladx guial tiblojzi naj gra dxej, per achet güünan, tijbgaj bejn con ni naladxaman naj zagdxe par laaman. <sup>6</sup>Din bén rüjn xgab guial yu' dxej zobjloj, rüjn-

man zian persi r nman Dios. Gui ad b n naladx guial tiblojzi naj gra dxej, r jnman zian persi r nman Dios. Abi' b n raw graloy, rawaman guial yu'guijcaman guial por Dios z edan abi' rud eman quixt e lojman. Gui ad b n naladx guial yu' ni ad zajct gaw bejn, r jnman zian guial naladxaman zian cayajpaman Dios respejt abi' rud eman quixt e lojman.

<sup>7</sup>Ni'qui du tijb ree ad nabant ree por dux xgabzi ree, o ad zay jt ree por dux xgabzi ree. <sup>8</sup>Bal nabajn ree por dux Dad ree Jesucrist par laa t eman nabajn ree. Abi' bal yay jt ree por laaman par laa t eman yay jt ree. Zeel bal nabajn ree o yay jt ree, par dux Dad ree Jesucrist ma nayajc ree. <sup>9</sup>Din par zian g jtaman abi' babanman, din gacaman Dad loj ree b n naban n  loj ree b n ma g jt.

<sup>10</sup> Chexquiza din guze' lasa'l b n rliladx Jesucrist o g  n lasa'l tibladya? Awa dugra ree rayal yadxu' loj Dios din yad ed ree cwent lojman. <sup>11</sup>Zi'c ca loj xtiidxaman lod r b:

Naj naj Dios naban,  
abi' diidxli rmin lojdi guial gra ree bejn  
guzuxib lon.

Abi' gra ree bejn gui b guial naj naj Dios.

<sup>12</sup>Abi' tijbgaj dunuj ree rayal yad ed ree cwent loj Dios, per por dunuj gajc ree.

### Ad gusajbidi bejn loj dol

<sup>13</sup>Zeel ad rayalt yaneeguijdx du lasa' ree b n rliladx ree Jesucrist, zagdxeli yaguieen ree naguiejn yaya'p ree cudad chit e por dunuj ree g  n reeman dol.

<sup>14</sup>Naj najn xbejn Jes s, ragbeen guial ad dolt naj gaw bejn xhiet eznin. Per par b n naladx guial ad zajct gawaman xhiet eznin, par laaman dolan cay jnman bal gawaman xhiet eznin. <sup>15</sup>Yan bal por ni rawil naladx tijb xcompniaril b n rliladx Jesucrist guial dolan cay jnl, abi' bal id ridxga'l laaman r n gui ban guial ad r ntil laaman. Gojp cudad chit e por ni rawzil g  n xcomp-

niaril dol, din n gajc por laaman g jt Jesucrist loj cr jz. <sup>16</sup>Ad g  n tijb ni guinieeguijdx ree xcompniaril l j, majsi l j ragbee guial ad ni malt naj ni cay jnl. <sup>17</sup>Niz loj Dios ad ni rawt bejn o ad ni r taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' t e luxdooan nix por xSprijt Dios. <sup>18</sup>Abi' b n naban zian guial zinalaman Jesucrist, cay jnman zi'c r n Dios, zi'c ruladx t e bejn.

<sup>19</sup>Zeel rayal yaguieen ree naguiejn yabajnn  du lasa' ree zagdxe yabedxe t e du luxdoo ree, din yasnuu yayagbee ree xhienaag yunaal ree xnejz Dios.

<sup>20</sup>Gol gojp cudad chit e por ni rawzidi gunijtidi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cay jnl.

<sup>21</sup>Zeel zagdxeli naj guial ad zajwtil b el ad z  t etil vin o xhie stijb nin bal por laan g  n xcompniaril dol. <sup>22</sup>Majsi l j ragbee guial achet g  nan gaw bejn xhiet eznin, per zagdxeli l jzi con Dios. Naj rni guial,  xiquilbaa b n ad yu'naw egt luxdoo rawaman xhiet eznin!

<sup>23</sup>Per b n yu'naw eg luxdoo par gawaman xhienin, abi' gawaman laan laagajcaman ma cay jn dol guial ad cayawtraman guidib ladxaman. Bal naladx bejn ad laat naj ni cay jnman, dxel laagajcaman cay jn dol.

### Royal yaguieen ree ni naladx bejn naj zagdxe

**15** Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar b n ad wazudxi'cht loj guialrliladx Jesucrist luar yaguieen ree ni rayentzi ree, <sup>2</sup>dugra ree rayal yaguieen ree naguiejn din chu' luxdoo dux compniar ree zagdxe con dunuj ree. Abi' rayal yaguieen ree ni naladx reeman naj zagdxe, din chile' gusnuu g  nbee reeman xnejz Dios. <sup>3</sup>Din ni'qui Jesucrist ad beent zi'c naj xixgaba-

man, gojc zi'c ca loj xtiidx Dios lod rëb: "Naj bayal gra ree diidx mal ni ninia ree-man lojl." <sup>4</sup> Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëed pacens në guial-ragnë chitëë yalenya' ree yalëjz ree ni ralëjz ree yaca' ree. <sup>5</sup> Dios, bèn razaladx pacens në guialragnë chitëë yalenya' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist. <sup>6</sup> Din tiblojzi guilies reeman xvalor Dios, xdad dux Dad ree Jesucrist.

### **Bire'ch xtiidx Dios loj ree bèn ad najt bèn Israel.**

<sup>7</sup> Zeel, zi'c baca' Jesucrist lëjt par gaquidi xbejnman, ziangajc gol guneenë ree xcompniaridi zagdxë, bèn rliladx ree laaman par guiliesidi xvalor Dios. <sup>8</sup> Gol basaaladx guial bi't Cristo loj guidxliuj par guliüüman bèn Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbéngulal reeman, abi' zian bigu-ien guial rijnqui Dios cumplid xtiidxaman. <sup>9</sup> Bi't tëë Cristo loj guidxliuj din por laaman, bèn ad najt ree bèn Israel guilies reeman xvalor Dios guial rayaman laa reeman, zi'c ca loj xtiidxaman lod rëb: Xt loj ree bèn ad najt bèn Israel guzatan lüj

guial najl benza'c.

Gol tëen cant ree par lüj.

<sup>10</sup> Ziangajc rëb zatiblajt loj xtiidx Dios:

Lëjt bèn ad najt ree bèn Israel,

gol babaa zi'c rabaa ree bèn Israel.

<sup>11</sup> Zatiblajt loj xtiidx Dios rëb:

Gra ree bèn ad najt bèn Israel.

Në los demazri ree bejn, gol gules xvalor Dios.

<sup>12</sup> Rëb tëë Isaías:

Loj xdiaa Isaí, grii tijb bèn nabee bèn-guidxliuj ree,

xt ree bèn ad najt bèn Israel, chililadx laaman.

<sup>13</sup> Dios bèn ragnë dunuj ree ralëjz ree ni caylëjz ree, laaman yagu' luxdoodi zagdxë yabe'cdxë tëëman luxdoodi guial rliladxidi laaman, din cwëz da'tidi ni guneeaman por xSprijt Dios.

<sup>14</sup> Compniar raliduladx ree Jesucrist, naj ragbeechaaw guial zagdxë nabandi con ree xcompniaridi, ma ragbee tëëdi zagdxë xhienaag chinalidi xnejz Dios, xt rajc rudëëdidi consejw ruluü tëë xcompniaridi. <sup>15</sup> Per majsi zian, tio'p choon lajt loj gui'ch guie bacan diidx naa, din yasaaladxidi xhienaag guibandi. Rünan zian por guialrniabee ni ma banee Dios naj, <sup>16</sup> din günan sirv loj Jesucrist. Din da dxiinan naj guliün bèn ad najt ree bèn Israel xtiidxza'c Dios din guiban ree-man zi'c rën Dios, din gac reeman naya niz lojman por xSprijtaman. <sup>17</sup> Ra'pan xhie günnë'n nabë, guial ragnë Jesucrist naj por ree dxiin cayünan por Dios.

<sup>18</sup> Per achetczi zajc guiën bal id zën guial por Cristo cayünan laan, din laaman cayagnë naj persi cayünan yudar bèn ad najt ree bèn Israel din gac chililadx reeman guzoob tëë reeman xtiidx Dios. Yan ma rliladx reeman laaman por ni rën loj reeman në por guial ruguiaa ree-man xhienaag nabanen, <sup>19</sup> në guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibczi, diizd Jerusalén xt guidib niz Ilírico. <sup>20</sup> Din zian naj da xgaban günan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejntczi reeman xcwent Cristo, <sup>21</sup> zi'c ca loj xtiidx Dios lod rëb:

Bèn ad waguiejnt ree xcwentaman, güünbee reeman laaman.

Guiáad ree bèn ad wayagbeet xcwentaman, gagbee reeman laan.

### Rüjn Pab xgab cheman Roma

<sup>22</sup> Abi' guial wan guidibczi lod ma rnin lojdi, zeel ad wayajct gan guidganan lëjt, majsi zianczi guyënan nidganan lëjt.

<sup>23</sup> Per yan guial ma gulox gutiechan xtiidx Dios guidib niz guie, abi' guial ma gojc zien iyz ni rënan guidganan lëjt,

<sup>24</sup> zeel rünan xgab guidganan lëjt chi gan España. Abi' chi gadëëdan guguian lëjt, chi ma gojc tio'p choon dxej yu' luxdoon zagdx guial za'n con lëjt, dxel ma güündi naj yudar din gan España.

<sup>25</sup> Per yan yaløj gan Jerusalén chigsa'n nan tijb yudar par ree dux compniar ree bèn rliadx ree Jesucrist. <sup>26</sup> Din bèn Macedonia ree con ree bèn Acaya bèn rliadx gajc ree Jesucrist, been reeman xgab guto'p reeman yudar guin par ree bënprob zojb ree Jerusalén, bèn rliadx ree Jesucrist.

<sup>27</sup> Abi' por xixgab reeman guixhiaal reeman yudar guin, per zagdx naj ni cayüjn reeman din mal nuzëëb reeman loj reeman. Din por ree bèn Israel bidxin xtiidx Dios loj reeman, dxel yan laa reeman guial ad najt reeman bèn Israel, zagdxen guial güün reeman yudar bèn Israel ree zi'ctzi gac reeman.

<sup>28</sup> Zeel chi ma balooxan dxiin guie, chi ma bayün yudar guin, dxel gan España, abi' chi gadëëdan ladxidi dxel guidganan lëjt. <sup>29</sup> Naj ragbee guial chi guidganan lëjt, zien da't ni guneë Dad Jesucrist par ganin lëjt.

<sup>30</sup> Yan por dux Dad ree Jesucrist në guial rën xSprijt Dios dunuj ree, mniaaban lojdi din güündi naj yudar yarejdx yanaab ree Dios por naj. <sup>31</sup> Gol gurejdx gunab Dios din gagnëman naj loj ree bèn Judea, bèn ad rliadx ree Jesucrist, gol gurejdx tëë Dios por dux compniar ree bèn rliadx ree Jesucrist, bèn zojb ree Jerusalén din tiëb reeman tia' reeman yudar ni chigsa'n nan par laa reeman.

<sup>32</sup> Dxel bal gagnë Dios ma chu' luxdon zagdx guidganan lëjt dxel ma zajc yazi-

iladxan la'tgaj za'n con lëjt. <sup>33</sup> Dux Dad ree Dios bèn rabe'cdxe du luxdoo ree, laaman gagnë gradi. Amén.

### Rugajpdioz Pab bejn ree

**16** Yan ni gui't Febe ladxidi, béngunaana ni naj dux compniar ree guial raliduladx ree Jesucrist, bèn cayüjn tëë sirv lën yadoo ni zojb guiedx Cencrea. <sup>2</sup> Gol baca'man zagdx por Dad Jesucrist, zi'c rayal yaguieennë' ree dux compniar ree bèn rliadx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nëgajc naj ma beenman yudar.

<sup>3</sup> Gol bagajpdioz Aquila con xbéngunaaman Priscila, bèn cayüjn ree naj yudar cayguieenan sirv loj Jesucrist. <sup>4</sup> Abi' laa reeman xt guzuj reeman loj guialgüjct por naj, zeel rudën quixtëë loj reeman. Abi' ad najtzi rudë quixtëë loj reeman në ree dux compniar ree bèn rliadx ree Jesucrist bèn ad najt ree bèn Israel rudëë quixtëë loj reeman. <sup>5</sup> Gol bagajpdioz ree bèn rliadx Jesucrist, bèn rado'p ree lidx Priscila con Aquila. Gol bagajpdioz da miwan Epeneto, bèn goc bèn yaløj bililadx xtiidx Jesucrist niz Acaya.

<sup>6</sup> Gol bagajpdioz Li, bèn ma been da't lëjt yudar. <sup>7</sup> Gol bagajpdioz ree bèn ladxan Adrónico con Junias, bèn guyu'në' reen ladxguuib. Abi' ree xi apóstoles Jesús dád rën reeman laa reeman, abi' yaløj laa reeman bililadx Jesucrist guial lon.

<sup>8</sup> Gol bagajpdioz Amplias, da miwan bèn rën da'tan guial nayajcan xbejn Jesucrist. <sup>9</sup> Gol bagajpdioz Urbano, bèn cayüjn naj yudar cayguieenan sirv loj Jesucrist. Gol bagajpdioz tëë da miwan Estaquis. <sup>10</sup> Gol bagajpdioz Apeles, bèn ma balüü guial diidxliczi rliadxaman Jesucrist, gol bagajpdioz tëë xfamil Aristóbulo. <sup>11</sup> Gol bagajpdioz tëë Herodiön ben ladxan, në ree xfamil Narciso, bèn ma rliadx Jesucrist. <sup>12</sup> Gol bagajpdioz Trifena në Trifosa, bèn

cayüjn ree sirv loj Jesucrist. Gol bagajpdioz tëë Pérsida, bén naguieenbee ree guial dád cayüjnman sirv loj Jesucrist. <sup>13</sup> Gol bagajpdioz Rufo, bén diidxliczi zinal xnejz Dios, gol bagajpdioz tëë xniaaman, bén rēnan zi'c da nan. <sup>14</sup> Gol bagajpdioz Asíncrito, Flegonte, Hermas, Patrobas, Hermes në gra ree bén za' con laa reeman, bén ma rliiladx ree Jesucrist. <sup>15</sup> Gol bagajpdioz Filólogo, Julia, në Nereo con bizanman, në Olimpas con gra ree bén rliiladx Jesucrist bén za' ree con laa reeman.

<sup>16</sup> Gol bagajpdioz lasa'di zi'c rayal. Dux compniar ree bén raliduladx ree Jesucrist bén za' ree guie, rugajpdioz reeman lējt.

<sup>17</sup> Compniar raliduladx ree Jesucrist, rniaaban lojdi din gapidi cudad con ree bén rlia' lasa' ree bejn, bén rusquiee ree bejn guial rulüü reeman ni ren ree guial loj ni ma basiididi. Ad guidxga'di laa reeman, <sup>18</sup> din ad lojt Jesucrist cayüjn reeman sirv, rüjn reeman ni rēntzi reeman, abi' con diidxnagüüdx ne con diidxza'c rüjn reeman gan bén ad ragbeetczi ree o bén ad ragbeeza'ct ree xtiidx Dios. <sup>19</sup> Per lējt, guidibczi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rēnan susindi par güündi ni zagdx ad par güüntidi ni mal. <sup>20</sup> Dios, bén rabe'cdxe luxdoo bejn, laaman gagnē lējt nayob chitēë güünri xindxab lējt gan. Dux Dad ree Jesucrist gagnē lējt.

<sup>21</sup> Rugajpdioz Timoteo lējt, bén cayüjn naj yudar con xchiin Dios ni cayünan, në ree bén ladxan bén la ree Lucio, Jasón, në Sosípater, rugajpdioz reeman lējt.

<sup>22</sup> Nē Tercio, bén cayüjn gui'ch guie rugajpdioz lējt por dux Dad ree Jesucrist.

<sup>23</sup> Nētēë Gayo rugajpdioz lējt, lidxaman za'n, runee tëë lidxaman rado'p ree dux compniar ree bén rliiladx ree Jesucrist. Nē Erasto, bén naj tesorer luguiedx guie në bén la Cuarto ben rliiladx Jesucrist, rugajpdioz reeman lējt.

<sup>24</sup> Dux Dad ree Jesucrist güünle' gradi. Amén.

### Diidx bigra bacaa Pab loj gui'ch guie

<sup>25</sup> Radēen quixtēë loj Dios din laaman zile' gagnē lējt din gusnuu gagbeedi sudxi'ch tëëdi loj xtiidxza'c Jesucrist, zi'c ma balüün lējt xhienaag din gaquidi perdon. Din zian naj xixgab Dios diidz chi gad guidxliuj gacchaaw, xgab ni ad gogbeet ree bejn diidz guia'xchej. <sup>26</sup> Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bén badēë xtiidx Dios loj ree bejn zi'c gunabee Dios laa reeman, bén naban goctēëz. Abi' guidibczi care'ch xtiidx Dios din chililadx ree bejn Jesucrist guzoob tëë reeman xtiidxaman.

<sup>27</sup> ;Tijbzi Dios, bén rajc gradooczi, rayal yaya'p reeman respejt zianczi por Dad Jesucrist! Amén.

## Gui'ch yaloj ni guxhaal San Pabl loj ree b n Corinto rliladx Jesucrist

### Rxhiaal Pab xtiidx Dios

**1** Naj Pab, Dios bacaabee naj gacan tijb xi ap stol Jesucrist. Za' S stenes guie con naj, b n rliladx Jesucrist. <sup>2</sup> Cax-halan gui'ch guie par l jt najdi b n rliladx xtiidx Dios luguiedx Corinto, l jt guial ma nayadi delant loj Dios por Jesucrist, abi' ma bacaabee Dios l jt gaquidi xbejnman bacaabee t eman gra ree b n gra lad b n rliladx ree Jesucrist, b n naj Dad par dunuj ree n  par laa reeman. <sup>3</sup> Dux Dad ree Dios n  Dad Jesucrist g unle' l jt, yabe'cdxe t e reeman luxdoodi.

### Rud ed Pab quixt e loj Dios

<sup>4</sup> Gra dxejzci rud dan quixt e loj Dios por l jt zi'c ma gogn man l jt guial rliladxidi Jesucrist. <sup>5</sup> N  guial najdi tijbzi con Jesucrist d d ma gogn  Dios l jt, baneeman l jt quiarguejn din guinieedi chignia' t edi xtiidxaman. <sup>6</sup> Zian rguien guial diidxli naj ni ma biguejndi por Cristo diizd chi guzuloj bililadxidi laaman. <sup>7</sup> Abi' zianczi rajpidi xyudar Dios la'tgaj rb zidi dxej ni gui't Jesucrist zatijb. <sup>8</sup> Abi' Dios gagn  l jt din sudxi'chidi guidiblagaa loj ni rliladxidi laaman, chit e xhie xtolidi chu' dxej ni gui't dux Dad ree Jesucrist zatijb. <sup>9</sup> Din Dios diidxli r jn xtiidxaman cumplid, abi' laaman naj b n gule l jt din gaquidi tijbzi con dux Dad ree Jesucrist.

### Ad rayalt la' lasa' ree xbejn Jesucrist

<sup>10</sup> Compniar raliduladx ree Jesucrist, mniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been. <sup>11</sup> Rnin lojdi zian compniar raliduladx ree Jesucrist,

din ma gogbeen guial yu' wadijl entr l jt, zian bagojn ree xfamil Clo  naj. <sup>12</sup> Guial garent garen r b ree bejn, yu' reeman r b: "Naj naj xbejn Pab", yu' t e reeman r b: "Naj naj xbejn Apolos", yu' reeman r b: "Naj naj xbejn B d", yu' t e reeman r b: "Naj naj xbejn Cristo." <sup>13</sup> Per naj rni lojdi guial Cristo tijbzi najman, din ad najt g t loj cr jz por l jt, ad gurobnijs t etidi par gaquidi da bejnan. <sup>14</sup> Quixt e Dios chi wan ladxidi achut mazri barobnijsan, Crispozi n  Gayo. <sup>15</sup> Chit e gui bidi guial gurobnijsidi par gaquidi da bejnan. <sup>16</sup> Barobnijs t en xfamil Est fanas, per ad rusaaladxtran chu mazri barobnijsan. <sup>17</sup> Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane t etan con diidx ni yadxaloj ree bejn naj luar cu'guijc reeman par xhie g jt Cristo loj cr jz.

### Xguialrniabee Dios n  xquiarguejnman

<sup>18</sup> Gra ni raguie'ch ree guial por xhie g jt Cristo loj cr jz, achet lasajcan par ree b n z  loj nejz mal. Per par dunuj ree guial ma raya'p ree perdon, d d lasajc xguialg jtaman din zian rayagbee ree xhienaag naj xguialrniabee Dios. <sup>19</sup> Abi' loj xtiidx Dios r b:

Gunijtan xquiarguejn ree b n ni r b guial rajc da't reeman, abi' guscajyan xquiarguejn ree b n ni r b guial rignia' da't reeman.

<sup>20</sup> Yan,  con ree b n r b guial rajc da't reeman?  Con ree mextr rajc ley?  Con ree b n r b guial rajc da't reeman xcwent ree ni yu' loj guidxliuj? Par Dios achet lasajc xquiarguejn b nguidxliuj. <sup>21</sup> Abi' por xquiarguejn Dios ragbeechaawaman guial ad zay nbeet b nguidxliuj laaman por xquiarguejn reeman, zeel beenman xgab yab eman bejn loj casti por xtiidxaman ni cayl un



bejn ree. Abi' ree b n yarii loj casti guin laa reeman naj b n rliiladx laaman, majsi par ree ben ren achet lasajc ni canin por Cristo.

<sup>22</sup>Din b n Israel ree r n reeman guguaa reeman milagr din chililadx reeman, abi' ree b n ad najt b n Israel r n reeman guien reeman ni mazri naw eg din chililadx reeman. <sup>23</sup>Per dunujn ni cayli n bejn ree naj par xhie gi t Cristo loj cr jz, abi' ree b n Israel rdxe'ch reeman, gui ad par ree b n ad najt b n Israel achet sirv r jn ni cayli n. <sup>24</sup>Per par ree b n ma bacaabee Dios, zi'c ree b n Israel zi'c ree b n ad najt b n Israel, por Cristo rguien xguialrniabee Dios n  xquiarguejnman. <sup>25</sup>Din ni ruli u achet lasajc guial ni r jn Dios, laan naj ni mazri lasajc loj xguialrajc b nguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee b nguidxliuj. <sup>26</sup>Gol gogbee compniar raliduladx ree Jesucrist guial ta'nzi ree b n rliiladx laaman naj b n rignia' zi'c naladx ree b nguidxliuj, ta'nzi ree b n rliiladx laaman rajp guialrniabee loj guidxliuj guie, abi' ta'nzi ree b n rliiladx laaman naj ree b n za loj ree famil ni naj b n zobjloj. <sup>27</sup>Abi' Dios gulej ree b n ni naladx ree bejn ad rajza'ct din yaya'nxtu ree b n rajc da't, gulej t eman b n ad ca't ree guialrniabee din yaya'nxtu ree b n ca' guialrniabee. <sup>28</sup>Dios gule ree b n ni naladx ree bejn guial achet sirv laa reeman, b n ni naladx ree bejn guial achet lasajc reeman, b n ni achut naj loj guidxliuj guie din chiquiedaman xguialdxal ree b n naj ree chunin loj guidxliuj guie. <sup>29</sup>Zianan zeel achut zajc gi n benro' delant loj Dios. <sup>30</sup>Yan por Dios ma najdi tijbzi con Jesucrist, dxel por laaman rtia'di xguialrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc t e ree par laaman abi' ma raya'p ree perdon loj Dios. <sup>31</sup>Zianan

din gac zi'c r b loj xtiidx Dios lod r b: "Bal yu' b n r n guilies xvalor gajc, luar gi ndi zian gol gules xvalor dux Dad ree Jesucrist."

### Xtiidx Jesucrist b n cwa loj cr jz

**2** Compniar raliduladx ree Jesucrist l jt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx naw eg par chignia'di. <sup>2</sup>La'tgaj guzun con l jt ad gunetan diidx ren ree lojdi, tijbzi xcwent Jesucrist b n cwa loj cr jz. <sup>3</sup>Abi' chi wan ladxidi zi'c tijb b n ni ad yu't gojl, rnijczan guial rdxeban bialan lojdi. <sup>4</sup>N  chi gunen n l jt, chi gunen xtiidx Dios lojdi, ad gunen tan l jt con ree diidx ni g nan l jt gan por da didxan, benan gan rliiladxidi Jesucrist por xyudar xSprijt Dios n  xguialrniabee man. <sup>5</sup>Din guiguien guial ni rliiladxidi Jesucrist z edan por xguialrniabee Dios ad por xguialrajc b nguidxliuj.

### Por xSprijt Dios n nbee bejn laaman

<sup>6</sup>Majsi chi rali n b n ni ma rajc ree mazri xtiidx Dios, rali n laa reeman por guialrajc. Per ad por guialrajc ni yu' loj guidxliuj guie, lasa' guialrajc ni rajp ree b n rniabee, guialrajc ni yu' dxej nit. <sup>7</sup>Rali n laa reeman por guialrajc ni z ed por Dios, din yanee ree zi'c naj xixgab Dios, xgab ni goc ni naguie'ch par ree b nguidxliuj, abi' xgab guin naj guial chililadx reeman Jesucrist, diizd chi gad guidxliuj gacchaaw been Dios xgab guin din gac yayal ree xanyabaa. <sup>8</sup>Laan naj tijb ni ad gogbeet ree b n rniabee loj guidxliuj guie, din bal niagbee reeman dxel ad nucaat reeman dux Dad ree Jesucrist loj cr jz, b n ca' guialrniabee. <sup>9</sup>Per loj xtiidx Dios r b:

Achut waguiaa, achu t et waguiejn abi' ni'quid way jnt b nguidxliuj xgab por ni nagu'chaaw Dios par ree b n r n laaman.

<sup>10</sup>Per dunuj ree ma balüü Diosan du-  
loj ree por xSprijtaman bèn naban con  
dunuj ree, din xSprijt Dios gran ragbee-  
man, xt ni mazri naguie'ch ni zëed por  
Dios.

<sup>11</sup>Achut ragbee xhie xgab cayüjn tijb  
bejn. Xsprijtsaman ragbee xhie xgab  
cayüjnman. Ziangajc xSprijt Dios tijbzi  
laaman ragbee xhienaag naj xixgab Dios.

<sup>12</sup>Abi' dunuj ree guial ma zunaal  
xeejz Dios, ad nabajnt ree con tijb sprijt  
ni zëed loj guidxliuj guie, ma nabajn ree  
con Sprijt zëed loj Dios, din por xSprijt  
Dios yayagbee ree gra ni ma bazaladx  
Dios duloj ree guial najman benza'c.

<sup>13</sup>Abi' laa reen naj ni caylüün bejn ree,  
per ad por dux quiarguejntan, xSprijt  
Dios culüü dunujn xhienaag yanen. Zian  
ralüün xcwent Dios bèn ma nabannë  
xSprijtaman.

<sup>14</sup>Per bèn ad nabannët xSprijt Dios  
ad rliladxtaman ni zëed ree por Dios ni  
rulüü xSprijt Dios dunuj ree, din par laa-  
man najn tijb ni ad rüjnt sirv. Zeel ad  
zajct chignia'man xcwent Dios din con  
xSprijtzi Dios zajc chignia' bejn ni rën  
guiëban. <sup>15</sup>Per bèn ma nabannë xSprijt  
Dios por Sprijt guin rignia'man ni naj  
xcwent Dios, abi' ni'qui tijb ree bèn ad  
nabannët xSprijt Dios ad rignia't chexc  
zeel rignia'man ni guin ree. <sup>16</sup>Loj xtiidx  
Dios rëb: “¿Chu ma bignia' xixgab Dios?  
¿Chu zajc gulüü Dios ni güünman?” Per  
dunuj ree, naj dux xgab ree zi'c xixgab  
Cristo.

### Compniar rüjn ree sirv loj Dios

**3** Compniar raliduladx ree Jesucrist,  
chi guzun con lëjt ad gunenë'tan lëjt  
zi'c ree bèn ma nabannë xSprijt Dios,  
gunenë'n lëjt zi'c ree bèn ad nabannët  
xSprijt Dios, zi'c ree bèn qui guzuløjri  
rliladx Jesucrist. <sup>2</sup>Diidx ad nawëegt ree  
gunenë'n lëjt zi'c rudëë bejn lejch loj  
tijb xindobëz guial xo gawix ni raw ben-  
gol, zian gunenë'n lëjt diidx ad nawëegt

ree. Abi' ni'qui yan ad zile't ganenë'n  
lëjt zi'c ree bèn ma rignia' mazri xtiidx  
Dios. <sup>3</sup>Din sta nabandi zi'c naban gra ree  
bénguidxliuj. Nadëdloj lasa'di rdil tëëdi,  
zian rguien guial sta nabandi zi'c gra  
ree bénguidxliuj bèn ad zinalt ree xnejz  
Dios. <sup>4</sup>Din chi rëbidi: “Naj naj xbejn  
Pab”, o chi rëbidi ya: “Naj naj xbejn Apo-  
los”, zian rguien guial sta cayüjndi zi'c-  
gajc chutëëz bénguidxliuj.

<sup>5</sup>Per naj rni lëjt: ¿Chu naj Pab o  
chu naj Apolos? Gol gogbee guial naya-  
jczan tio'p ree bèn cayüjn sirv loj Dios  
persi bile' bililadxidi tijb gajc dunujn  
cayguieen dxiin ni banee Dios dunujn.

<sup>6</sup>Yaguie'ch ree guial naj naj zi'c bèn  
rxübin abi' Apolos naj bèn rguuil, per  
por Dios cayagbeedi mazri xtiidxaman  
zi'c rusni'saman tijb cwaandoo. <sup>7</sup>Abi'  
zi'c bèn rxübin zi'c bèn caguuil mandadzi  
cayüjn reeman, Diosan naj bèn ni rus-  
ni's ni rxübin reeman. <sup>8</sup>Yan ziangajc naj  
con Apolos tijbzi mandad cayguieenan,  
rayagbeen guial zunee Dios dunujn ni  
rayalan bal xhienaag yaguieenan man-  
dad ni baneeman yaguieen tijb gaj  
dunujn. <sup>9</sup>Zeel naj con Apolos nayajcan  
compniar cayguieenan xmandad Dios.

Yaguie'ch ree lëjt naj xguiniaa Dios  
lod cayguieenan dxiin o lëjt naj zi'c  
tijb yu ni cayüjn Dios. <sup>10</sup>Abi' naj guial  
catiechan xtiidxaman najn zi'c tijb al-  
banil bèn ni rajp da't cudad din grii xchi-  
inman zagdxë guial bacaabeeman naj  
günan xcimiant yu guin. Abi' ree bèn ni  
cusnuu culüü xtiidx Dios, laa reeman naj  
zi'c bèn cusnuu cayüjn yu guin. Per rayal  
gap reeman cudad xhienaag cales ree-  
man yu guin, <sup>11</sup>din achut zajc guchaa  
cimiant ni ma benan, abi' cimiant guin  
naj guial rliladx Jesucrist. <sup>12</sup>Abi' ree bèn  
ni cayguie'ch ree naj ree bèn ni cusnuu  
cales yu loj cimiant ni cayguie'ch ree  
naj guialrliladx Jesucrist, bal cayüjn ree-  
man laan con or o con plajt o con ree  
guiaj zagdxë o con yag o con biqui o

con balagya'. <sup>13</sup> Per chi guidxin dxej ni güün Dios xguialguxtisaman, dxel guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gaj bejn. <sup>14</sup> Abi' bal rüjn sirv ni beenman zi'c tijb bèn ni ruzoob tijb yu ni ad re'ct, zaca'man ni rayalaman por ni beenman. <sup>15</sup> Per bal che'c ni beenman, sacaman zi'c tijb bèn ni re'c lidx abi' penz rliaaman loj bajl, din zajcaman perdon per gusëebaman gra.

<sup>16</sup> Zeel gol gogbee guial lëjt naj zi'c tijb xyadoo Dios guial nabandi con xSprijt Dios. <sup>17</sup> Abi' bal chu bèn guitie'chdojn bèn rililadx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

<sup>18</sup> Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bënrajc da't. <sup>19</sup> Din delant loj Dios achet lasajc guialrajc bénguidxliuj, tib lajt loj xtiidxaman rëb: "Ad rudëet Dios mod grii zagdxé ni naj xixgab ree bèn naladx guial dád nasin reeman par güün reeman tijb ni ad najt xnejz." <sup>20</sup> Rëb tëe loj xtiidxaman: "Dios ragbeechaaw guial xixgab ree bèn rajc da't achet lasajcan."

<sup>21</sup> Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra. <sup>22</sup> Ma nulendi dunujn, naj Pab, Apolos në Bëd. Xieendi naj guidxliuj, guialnaban, guialgüjt, ni yu', në ni qui chu'ri, xieendi naj gra. <sup>23</sup> Abi' lëjt ma najdi xbejn Cristo abi' Cristo naj Xi'n Dios.

### Dxiin ni been ree bèn naj ree xi apóstoles Jesús

**4** Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni naguie'ch par bejn. <sup>2</sup> Per lëjt ragbee guial tijb mojs naj par güünman gra ni rayal güünman

din gap reeman laaman confianz. <sup>3</sup> Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn. <sup>4</sup> Din majsi bal naladxan guial achet ni mal wayünan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cayünan. <sup>5</sup> Zeel ad rayalt yadxa lojdi chu cayüjn zagdxé o chu ad cayüjnt zagdxé, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidxza'c guinee Dios por tijb gaj dunuj ree.

<sup>6</sup> Compniar raliduladx ree Jesucrist, gra ree ni canin lëjt wen par lëjtan. Abi' Apolos con naj nayajcan tijb ejempl par lëjt, din por dunujn gusiididi ad téd-laj guiliesidi xvalor bejn chitëe por zian gusa'ndi trajs stijb bejn. <sup>7</sup> Din ni'qui tijb bejn ad lasajct mazri loj stijb bejn. ¿O xhie rajpidi ni ad baneet Dios lojdi? Abi' bal por laaman rajpidi ni rajpidi, ¿chexc zeel rlies xvalorgajquidi zi'c rülüü ad por Diost rajpidi laan?

<sup>8</sup> Lëjt naladxidi achet ryaadxidi, guial ma bayaaloj rignia'di abi' ad ryaadxtridi dunujn. Abi' naladxidi najdi zi'c ree rey. ¡Per xinix niajquidi rey din nanabeen con lëjt! <sup>9</sup> Yu' dxej naladxan guial dunujn nayajcan xi apóstoles Jesús, Dios basial dunujn yayajcan zi'c ree bèn ad lasajct, zi'c ree benmal ni rayal guialgüjt, abi' radxaloj ree anjl në ree bénguidxliuj dunujn. <sup>10</sup> Abi' la'tgaj nayajcan zi'c ree bèn ad yu't xquiarguejn par bénguidxliuj guial ratie'chan xtiidxza'c Cristo, lëjt rlies xvaloridi guial rignia'da'tidi guial rililadxidi laaman. Dunujn nayajc zi'c bèn ad yu't gojl guiáad lëjt naladxidi yu' da'tidi gojl abi' rajp ree bejn lëjt respejt guiáad dunujn ad rënt reeman dunujn. <sup>11</sup> Xt yandxej sta cayza-

agdiajn por gualrlian, gual re'c nijs nē gual ryaadx du xaban. Zienloj ni rüjnnē ree bejn dunujn, achet du lidxan. <sup>12</sup>Abi' dád radxagan raguieenan dxiin din guidxel ni yadaawan. Chi ruzaal ree bejn diidxmal du guiĵcan radxi'nan con diidxza'c, abi' radaanan ni rüjnnētzi reeman dunujn. <sup>13</sup>Abi' chi rnieeguiĵdx reeman dunujn, raneeza'cnē'n laa reeman. Xt yan nayajcan zic'c tijb guix par bēn-guidxliuj, nayajcan zic'c tijb ni ad rüjnt sirv par laa reeman. <sup>14</sup>Ad cucatan gui'ch guie par gusa'nxtun lējt, cucan laan din gunen lējt consejw zic'cgajc da xi'n reen gual rēnan lējt. <sup>15</sup>Din majsi gapidi zic'c chii mil ree bēn gusiid lējt, per najzi naj zic'c tijb Dad par lējt. Din por naj guzuløj rliadixidi Jesucrist chi basidan lējt xti-idixza'caman. <sup>16</sup>Zeel mriaaban lojdi din guibandi zic'c naban.

<sup>17</sup>Din par zian rxhialan Timoteo gutixlojman lējt, bēn rēnan zic'c da xi'nan laaman diidxli rliadixaman Jesucrist. Laaman gusaaladx lējt xhienaag naban gual rliadixan Jesucrist, din zic'c naban naj ni cusidan bēn rliadix ree Jesucrist gra lod ran. <sup>18</sup>Yu' ree xcompniaridi naladx gual ad zitixlotran lējt abi' rlies xvalor reeman gual naban reeman zagdx. <sup>19</sup>Per Dios guneee permis din diob gutixlon lējt dxel gag-been wali reeman ya naban reeman zic'c rniee reeman o rnieez reeman. <sup>20</sup>Din gual guiban zic'c rniabee Dios ad najtan diidxzi, rayal güün bejn zic'c rniabee Dios con xgualrniabeeman. <sup>21</sup>Yan, ꞥconin rēndi gūnan chi gutixlon lējt, gadilē'n lējt ya o guiēnan lējt ganenē'n lējt diidxza'c?

### Xhienaag gac con bēn rüjn tijb dol

**5** Ma bacagdiagan gual tijb lējt bēn rliadix ree Jesucrist nabannē xnarojpidi zic'c lacheelidi, ni'quiza ree bēn ad nūnbeet Dios ad rüjnt lasa' dol guin. <sup>2</sup>Abi' lējt rüjndi benro', luar rüjndi ben-

ro' gol gyunaya gol babēē tēē bēn guin lojdi. <sup>3</sup>Majsi ad za'tan con lējt, per rūnan xgab por lējt zic'cgajc rülüü za'n con lējt, abi' ma benchaawan xgab xhie rayal bēn rüjn dol guin. <sup>4</sup>Zic'c gualrniabee ni baneee Jesucrist naj, naj rni lējt: “Gol bachajg lasa'di.” Dxel gol gunaladx gual za'n con lējt abi' por xgualrniabee Dad Jesucrist, <sup>5</sup>gol been bēn guin tiblax, gol basa'nman loj xindxab din gagnaaman o sagdiajman por ni cayüjman din gacaman perdon dxej ni gui't dux Dad ree Jesucrist.

<sup>6</sup>Ad nixtan gual rlies xvalorgajquidi abi' rtiējbidi rajc lasa' ree dol guin. Gol gogbee gual zic'c rüjn levadur cob par guiadxtil ziangajc con tijb bēn güün dol ma zē gajcan zian con gra ree lasa'di. <sup>7</sup>Zeel gol been naguiejn din gaquidi naya zic'c cob harin ni ad yu't levadur guiĵc. Din zic'c bagüjt ree bejn tijb xiil lanij pascw din yaya xtol reeman, ziangajc dunuj ree por xgualgüjt Jesucrist ma naya ree loj Dios. <sup>8</sup>Abi' gual yabaa ree por zian naj gual yabajn ree guidib du luxdoo ree zic'c rayal, zic'c guiadxtil ni ad no'cht levadur, luar yabajn ree con ree ni mal nē ree dol zic'c babajn ree yaløj.

<sup>9</sup>Abi' zic'c ma rnin lojdi loj stijb gui'ch ni ma guxhalan lojdi, ad guchajquidi bēn naban ree nadxuudx. <sup>10</sup>Ad canenē'tan lējt zian por ree bēn ad rliadix Dios, bēn naban ree nadxuudx o rzēēbladx reeman ni ruguiaa'tzi reeman o naj reeman gubaan o rēn reeman ni ren luar guiēn reeman Dios, din bal zianan dxel ryaadx yariidi loj guidxliuj guie. <sup>11</sup>Bēn ni canin lējt naj ree bēn ni rēb naj ree xcompniaridi, bēn rliadix ree Jesucrist abi' naban reeman nadxuudx, o rzēēbladx reeman ni ruguiaatzi reeman, o rēn reeman ni ren ree luar guiēn reeman Dios, o rbēē reeman xtiidix bejn, o naj reeman bengu', o bēngubaan. Xcompniaridi bēn naban ree zian ni'quid rayalt gawnēdi laa

reeman. <sup>12-13</sup> Ad da cwenttan naj ganen por ree bèn ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj bèn güün guialguxtis con laa reeman, per dux cwent ree naj guial yazuxnejz ree bèn naj ree dux compniar ree bèn rliladx ree Jesucrist. Zeel gol babëë bèn cayüjn dol entr lojdi.

### Chi yu' wadijl entr ree bèn rliladx Jesucrist

**6** Zi'c chi xhie rzajcnë tijb xcompniaridi bèn rliladx Jesucrist, ¿chexc zeel rëjdi loj guxtis din yabëëxnejzaman ni rzajquidi luar chedi loj ree xcompniaridi bèn rliladx ree Jesucrist? <sup>2</sup> ¿Id rliladxidi ya guial yu' dxej bèn rliladx ree Jesucrist laa reeman naj bèn güün xguialguxtis loj ree bënguidxliuj? Abi' bal yu' dxej güün xguialguxtis reeman loj bënguidxliuj, ¿chexquiza zeel ni ad nawëëgt ni rzajc ree xcompniaridi ad rajct rabëëxnejzidi? <sup>3</sup> ¿Id ragbeedi ya guial xt loj ree xianjl Dios yu' dxej yaya'p ree guialrniabee? ¡Abi' xt mazri zile' yalëëxnejz ree ni cayza'c ree loj guidxliuj guie! <sup>4</sup> Zeel zi'c chi xhie rzajcnë lasa'di, ¿chexc zeel zëdi loj ree bèn ad najt xbejn Cristo din yabëëxnejz reeman ni rzajquidi? <sup>5</sup> Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya? <sup>6</sup> Per lëjt luar güündi zian aal rudëëd lasa'di loj ree bèn ni ad rliladxt Dios.

<sup>7</sup> Abi' natun guial gudëëd xcompniaridi loj guxtis guial cadilidi, mejorli gol gudaan ni rüjnnë reeman lëjt. Mejorli tiëbidi cuan reeman xieendi. <sup>8</sup> Per luar güündi zian, lëjtli cayüjn ree ni mal guin con ree xcompniaridi bèn rliladx ree Jesucrist. Rtia'di xieen reeman abi' rüjnnëdi laa reeman ni ad rayalt güünnëdi laa reeman.

<sup>9</sup> ¿Id ragbeedi ya guial bèn naj ree benmal ad zut reeman loj xguialrniabee

Dios? Gol gogbee guial loj xguialrniabee Dios ad zut ree bèn ni naban ree nadxuudx, në ree bèn rën ree ni ad najt ree Dios, në ree bèn za'në bèn ad najt lacheel reeman, në ree xinguaaw rüjn zi'c bëngunaa në ree xin rën lasa' xinguaaw zi'c bëngunaa. <sup>10</sup> Në ree bëngubaan, në ree bèn rzëëbladx ni ruguiaatzi reeman, në ree bengu' con ree bèn mieeguidx bejn, në ree bèn raguuil xhienaag chiquied reeman xieen bejn, ad zut reeman loj xguialrniabee Dios. <sup>11</sup> Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb bèn ni ad wayüjnt dol por xguialrniabee Dad Jesucrist në por xSprijt Dios bèn ma nabannëdi.

### Dux cuerp ree naj par Dios

<sup>12</sup> Walican zajc yaguieen ree zi'ctzi rayën ree, per ad gratan naj zagdxe par güün bejn. Zajc günan zi'ctzi rënan, per ad zatiëëbtan xhie nabee naj. <sup>13</sup> Yu' ree bejn rëb: “Guialraw naj par lën bejn, abi' lën bejn naj par guialraw.” Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bèn ad najt lacheelaman. Din dux cuerp ree naj par Dios, abi' laaman rniabee dux cuerp ree. <sup>14</sup> Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

<sup>15</sup> Gol gogbee guial ma najdi tijbzi con Cristo, guial dux cuerp ree ma naj tiblia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunë' ree tijb bëngunaa dxuudx? ¡Ad rayalt gac zian! <sup>16</sup> ¿Nid ragbeedi ya guial chi runë bejn tijb bèn ni ad najt lacheelaman, dxel ma najman tijbzi con bendxuudx guin? Lëjt ragbee guial loj xtiidx Dios rëb: “Grop reeman ma naj tijbzi.” <sup>17</sup> Per bèn ni ma naj tijbzi con dux Dad ree Jesucrist, najman tijbzi con laaman por xSprijt Dios.

<sup>18</sup> Gol gojp da't cudad ad g  ndi ni dxuudx ree con b n ad najt lacheelidi. Xhiet  z dol ren ad ruxhiintan xcuerp bejn zi'c rxin xcuerpaman chi r jnman ni dxuudx con b n ad najt lacheelaman. <sup>19</sup> Din gol gogbee guial l jt naj xyadoo xSprijt Dios b n ma baneeman lojdi, dxel zian zi'c ma nabandi con xSprijt Dios ad rniabeetri l jt gajc. <sup>20</sup> Din par zian gudijx Jesucrist por dunuj ree chi g taman loj cr jz. Zeel gol beenn  xcuerpidi dxiin par g  ndi Dios b n zøjbloj, din laaman naj b n rniabee l jt.

### Consejw xcwent gualruxhliaa

**7** Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdex naj guial ad zuxhliaat bejn. <sup>2</sup> Per chit   g  n bejn dol con stijb bejn, zagdxen guial tijb gaj xinguaaw chu' lacheel o tijb gaj b ngunaa chu' lacheel, <sup>3</sup> din gud   xinguaaw guin gust lacheelix abi' b ngunaa guin gud  zaman gust lacheelaman. <sup>4</sup> Din chi ma baxhliaa tijb b ngunaa ad laatraman rniabee xcuerp, xinguaaw guin naj xin rniabee laan. Ziangajc chi ma baxhliaa xinguaaw, ad rniabeetri xcuerpix, b ngunaa guin ma rniabee laan. <sup>5</sup> Zeel xinguaaw n  b ngunaa ad rayalt gudxon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guinibidi Dios, zagdxen. Per chi ma gud d ree dxej guin, gol bachajg lasa'di stijb chit   g  n xindxab l jt gan con ree xixgabidi.

<sup>6</sup> Ad canitan lojdi guial najczi guxhliaa bejn, per ad ni maltan guial guxhliadi. <sup>7</sup> Da xgaben naj guial xi nix gra ree bejn gac zi'c naj, per tijb gaj bejn ma bazaladx Dios xquiarguejnman guial xhienaaag guibanman, bal guxhliamaan o bal id zuxhliamaan.

<sup>8</sup> Par ree b n xtijb n  par ree b ngunaa biz jb, naj rni guial zagdxeli yaya'n ree-

man zi'c naj. <sup>9</sup> Per bal id zadaan reeman guial ad zuxhliaat reeman, dxel zagdxeli guxhliaa reeman luar gud  d xcuerp reeman casti guial taan reeman.

<sup>10</sup> Gui ad ree b n ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt b ngunaa lacheelaman. <sup>11</sup> Per bal tio'n lacheelaman ad rayalt guxhliaan man xin ren, zagdxeli naj yachajg lasa' reeman stijb. Ziangajc xinguaaw ad najt yala' lacheelix.

<sup>12</sup> Yan, ni ganin ad ni guneeet dux Dad ree Jesucristan, per naj rni lojdi: Bal yu' xinguaaw rliladx Jesucrist abi' lacheelix ad rliladxt, abi' bal par b ngunaa guin achet g  nan, dxel ad najt yala' lasa' reex. <sup>13</sup> Ziangajc bal rliladx b ngunaa guin abi' lacheelaman ad rliladxt, abi' bal par xinguaaw guin achet g  nan, dxel ziangajc ad rayalt yala' reeman. <sup>14</sup> Din xinguaaw ni ad rliladxt Jesucrist, z jnle' Dios laax guial rliladx lacheelix. Gui ad b ngunaa ni ad rliladxt Jesucrist z jnle' Dios laaman guial rliladx lacheelaman, zian g  nle' Dios xi'n reex. Din bal id naj zian, ad nayabt xi'n reex loj Dios zi'c tijb b n ni ad way jnt dol. <sup>15</sup> Per bal xinguaaw o b ngunaa ni ad rliladxt Jesucrist r nman yala' lacheelaman guial rliladx lacheelaman Jesucrist, yala'ri reeman. B n rliladx ad zajct g  nman naguiejn guibann  lacheelaman laaman din ad gurejdx Dios dunuj ree par yabajn ree con wadijl. <sup>16</sup> Din b ngunaa guin ad ragbeetaman bal g  nman gan chililadx lacheelaman, o bal xinguaaw guin ma rliladx dxel ni'qui laax ad ragbeet bal g  nx gan chililadx lacheelix.

<sup>17</sup> Naj rni guial tijbgaj ree b n ni ma rliladx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuloj rliladx reeman Jesucrist. Zianan naj ni cay n loj ree dux

compniar ree bèn rliadx ree Jesucrist giiin reeman. <sup>18</sup>Bal tijb bejn chi guzuløj rliadxaman Jesucrist mal yu'man sen ni ru ree bèn Israel, yaya'nraman zian. O bal id yu'man sen guin chi guzuløj bililadxaman Jesucrist, ad najt chu'man sen guin. <sup>19</sup>Din achet giiinan bal yu' bejn sen guin o ad yu'taman sen guin, ni mazri lasajc naj guial giiinman zi'c rniabee Dios. <sup>20</sup>Zeel guial baya'n zi'c najdi chi guzuløj bililadxidi Jesucrist. <sup>21</sup>Bal najl zi'c bèn nado' chi guzuløj bililadxil laaman, ad najtan ni chu'l xgab xhienaaag giiinl. Per bal zile' ad zajc tril zi'c bèn nado', mazri zagdxe barii loj ni najl zi'c bèn nado' guin. <sup>22</sup>Bèn ni naj zi'c bèn nado' chi guzuløj bililadxaman Cristo ma najman zi'cgajc bèn ni ad najt zi'c bèn nado' par giiinman sirv loj Cristo. Abi' bèn ni ad najt zi'c bèn nado' chi guzuløj bililadxaman Cristo, dxel Cristo ma rniabee laaman. <sup>23</sup>Lëjt ragbee guial ma gudijx Jesucrist zro' por lëjt, yan ma najdi par Dios. Ad rayalt tiëbidi nabee ree bénguidxliuj lëjt con ree ni rusquiee. <sup>24</sup>Zeel rnin lojdi compniar raliduladx ree Jesucrist, gol baya'n zi'c najdi chi guzuløj bililadxidi Jesucrist.

<sup>25</sup>Yan lëjt bèn ad waxhliaat ree, dux Dad ree Jesucrist achet rëbaman por zian. Per naj zajc gunen lëjt consejw xhienaaag giiindi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan. <sup>26</sup>Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliaatidi. <sup>27</sup>Bèn ni ma baxhliaa ad najt gusa'n lacheelaman. Guiáad bèn ni ad waxhliaat ad rayalt giiinman naguiejn guxhliaaman. <sup>28</sup>Per bal rijnl xgab guxhliaal, ad dolt naj guxhliaal. Ziangajc ree biinxdüb ni rën guxhliaa, ad dolt naj guxhliaa reem. Per rugojnan lëjt guial zienloj naj ni rzajc bèn ruxhliaa, abi' laan ad rëntan saquidi.

<sup>29</sup>Ni rënan gagbeedi naj guial ma caydop ree dxej ni zio'p ree loj guidxliuj guie par yaguieen ree xmandad Dios. Zeel bèn ni ma baxhliaa ree gol been sirv Dios xt lod guneeztan lëjt zi'cgajc ree bèn ni ad waxhliaat. <sup>30</sup>Ni'qui guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxonon guial giiin bejn xmandad Dios. <sup>31</sup>Bèn ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdëd.

<sup>32</sup>Ni rënan naj guial ad zutidi xgab por ree ni yu' loj guidxliuj guie. Tijb xinguaaw xtijb mazri rijnx xgab por xmandad Dios, mazri rijnx naguiejn giiinx zi'c ruladx Dios. <sup>33</sup>Per tijb xinguaaw ni ma baxhliaa mazri rijnx xgab por ree ni yu' loj guidxliuj guie, par laax mazri rijn naguiejn yabaanë lacheelix laax. <sup>34</sup>Dxel tio'p ma naj xixgabix, por Cristo në por xbéngunaax. Ziangajc tijb béngunaa ni ad waxhliaat mazri rijnman xgab por ree xmandad Dios guidiblagaa rijnman sirv loj Dios par giiinman zi'c ruladxaman. Per tijb béngunaa ni ma baxhliaa mazri rijnman xgab por ree ni yu' loj guidxliuj guie, mazri rijnman naguiejn yabaanë lacheelaman laaman.

<sup>35</sup>Gra ni canin lojdi, canin laan par giiinan lëjt yudar ad par gudxontan guxhliaadi, caninan din guibandidi zi'c rayal xnejz dxel gol been gol gubajn tëë zi'c rën dux Dad ree Jesucrist sin guial gudxonon xhienin lëjt.

<sup>36</sup>Chutëëz xinguaaw rijn xgab guxhliaanë biin rnieenëx abi' bal ma yu' biingunaa guin ijz par guxhliaam, giiinri reex ni naladx reex naj zagdxe par laa reex. Bal guxhliaa reex, guxhliaari reex. Ad doltan guial guxhliaa bejn. <sup>37</sup>Ziangajc chutëëz bèn ni ad rijnnt xgab guxhliaa, ad rayalt giiinman xgab guial rijn naguiejn guxhliaaman bal ma beenman xgab zagdxe guial ad zuxhliaataman.

Din zagdxē gajcan bal id zuxhliāa bejn. <sup>38</sup>Zeel rmin lojdi zagdxen guial chu guxhliāa, per mazri zagdxē bal id zuxhliāa bejn.

<sup>39</sup>Tijb bēngunaa chi ma baxhliāaman, ad rayalt sunēman xinguiāaw ren chi nabannē lacheelaman. Per bal guiēt lacheelaman ma zajc tia' xin ren laaman per con tijb ree xcompniaraman xin rliładx Jesucrist. <sup>40</sup>Per naladxan guial mazri zagdxē guibanman bal id zuxhliāaman stijb. Zian rünan xgab guial nabannē'n xSprijt Dios zi'cgajc lējt.

### **Guialraw ni rbe'c ree bejn loj ni naladx reeman naj Dios**

**8** Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por guialrignia' rlies bejn xvalor gajcaman. Per guialrēn lasa' bejn lasajc mazri din por guial rēn lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree. <sup>2</sup>Bal yu' bēn naladx guial ma bayaaloj rignia'man gra, cusquiee laagajcaman din ryaadx da'tri chignia'man. <sup>3</sup>Per bēn ni rēn Dios, Dios nünbee laaman.

<sup>4</sup>Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'. <sup>5</sup>Majsi yu' ree bejn naladx guial yu' zien ree dios bēn rniabee xanyabaa nē loj guidxliuj, <sup>6</sup>per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tēēman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tēē raya'p ree guialnaban.

<sup>7</sup>Per ad grat ree bejn rüjn xgab zian. Din yu' ree bēn ni guyēn graloj ni nal-

adx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin. <sup>8</sup>Dunuj ree rayagbee guial ad ni rawt bejn rüjn guiban bejn mazri zagdxē loj Dios, lasa'gajcanaan bal yadaaw ree o ad zadaaw ree lasa' ree guialraw guin. <sup>9</sup>Per majsi lējt ragbee guial zajc gawidi xhietēēznin, rayal gapidi cudad ad güündi guial ree bēn qui rliładxri Jesucrist güün reeman dol. <sup>10</sup>Din bal lüj guial achet naladxil rawil xhietēēznin, zojbil cayawil guialraw ni ma gurej loj ree ni ad najt dios. Dxel guguiāa tijb ree bēn qui rliładxri Jesucrist lüj abi' nēgajcaman sēēbladx gaw guialraw guin majsi lēn luxdooman naladxaman guial ad zagdxet naj ni cayüjnman. <sup>11</sup>Dxel por xguialrajquil cayüjnl guial güünman dol guial ad nixt yu' luxdooman cayawaman ni guin ree, per badxe'guijc guial nē por laaman güjt Jesucrist loj crüjz. <sup>12</sup>Zeel bal rüjnl tijb ni naj ni mal par ree bēn qui rliładxri ree Jesucrist abi' rüjn reeman dol por lüj, dolan cayüjnl delant loj Cristo. <sup>13</sup>Bal por tijb ni rawan rüjn ree da compniaran dol, mejorli ad zawtran laan chitēē güünman dol por naj.

### **Ni zajc güün tijb apóstol**

**9** Lējt ragbee guial zajc güünan ni rēnan por guialrniabee ni ra'pan guial najn apóstol. Ma baguiaan dux Dad ree Jesucrist abi' lējt naj ree bēn ni ma benangan par laaman guial ma bililadxidi laaman. <sup>2</sup>Bal yu' ree bēn ni ad nünbeet naj zi'c apóstol, per lējt ragbee guial apóstol najn. Din zi'c ma rliładxidi Jesucrist dxel ma rguien guial diidxli najn apóstol.

<sup>3</sup>Abi' par ree bēn ad rliładxt guial najn apóstol, ze naj ni rēn loj reeman: <sup>4</sup>Ra'pan derejch gunee reeman ni gawan nē ni guiē'n. <sup>5</sup>Abi' zajc tēē guxhlian con tijb bēngunaa naj dulasa' raliduladx ree Jesucrist din chinē'n laaman



bantëez guin gan, zi'c rüjn los demazri ree apóstoles con ree bijch Dad Jesucrist në Bëd. <sup>6</sup> ¿O najzi con Bernabé bayal yaguieenan xmandad Dios dux cwentan ya? <sup>7</sup> Per ni'qui tijb suldad ad rejt loj wadjil xcwentaman, yu'czi bèn rguijx xgaxtaman. Ziangajc bèn rxübin uv, ¿wen id zajc gawaman laan ya? Laadx bèn ni rajp vag ree, ¿wen id zajc guië'man xlejch reeb ya? <sup>8</sup> Abi' ad xix-gabtzi bénguidxliujn canin lojdi, në loj ley ni badëë Dios loj Moisejs rëb zian. <sup>9</sup> Din loj ley guin rëb: "Ad gudxe'di guijxh ro' ree be gui'xh la'tgaj cayüjn reeb dxin." Ad rëbt Dios zian guialzi yu'-man laa reeb xgab, <sup>10</sup> rëbaman zian por dunuj ree. Din zi'c bèn rlia' yuj zi'c bèn rusia trigo, grop reeman yu'guijc guial yu' ni yaca' reeman. <sup>11</sup> Yan ma balün lëjt xhienaag chinalidi xnejz Dios, ¿wen zro' da't yanaaban lojdi ya bal güüнди dunujn yudar din gusnuu dux guialnabanan? <sup>12</sup> Bal stijb ree bèn ni rusiid lëjt rila' rtia' reeman ni rayal gudëëdidi loj reeman, dxel ziangajc dunujn raya'pan mazri derejch güüнди dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitëë xhie cwib guijc guial ad zucaagdiajgtri ree bejn xtiidxza'c Jesucrist. <sup>13</sup> Lëjt ragbee guial gra ree bixhioz ni rüjn sirv lën xyadoo Dios, rtia' reeman tibda'n ni rinë ree bèn Israel loj Dios persi rila' rbajn reeman. Ziangajc gra ree bixhioz ni rüjn ree sirv lule' yadoo guin lod rinë ree bejn be ree par Dios, në reeman rtia' ta'n ni rinë ree bejn persi rila' rbajn reeman. <sup>14</sup> Yan laagajcan rëb dux Dad ree Jesucrist por ree bèn ni ruluü xtiidxza'caman, guial por ree bèn ni ruluü reeman rayal guiban reeman. <sup>15</sup> Per naj achet caca'n, ad caxhal tëëtan gui'ch guie lojdi din guneedi xhienin. Din par naj zagdxeli naj guiëtan luar chu' bèn chiquied guialrabaa guin

luxdon guial cusidan bejn ree xtiidxza'c Jesucrist.

<sup>16</sup> Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bayalan. ¡Prob naj bal idan gusid bejn ree diidxza'c guin! <sup>17</sup> Zeel bal cayünan mandad guin guial ruladxan günan laan, dxel yu' ni gaca'n. Per ni'qui bal id ruladxan günan mandad guin, laan bayal günan. <sup>18</sup> Abi' ni rünan gan naj guialrabaa ni yu' luxdon majsi ad naxtan, majsi ad caca'tan ni rayal tia' bèn ni ruluü xtiidxza'c Jesucrist, per cusnuu culün diidxza'c guin ree bejn ree.

<sup>19</sup> Abi' majsi ad yu't bèn rniabee naj por mandad guin, per laa naj guie par gra ree bejn din gac günan sirv xbejn Cristo. <sup>20</sup> Abi' chi za'n con ree bèn Israel, rünan naguiejn persi yu'guijc reeman guial nayajcan bèn Israel din günan gan gac reeman xbejn Cristo. Chi za'n con ree bèn Israel bèn rüjn ree naguiejn chinal xley Moisejs dxel rünan zi'c bèn zinal ley guin, din günan gan gac reeman xbejn Cristo, majsi ragbeen guial ad rniabeet ley guin naj. <sup>21</sup> Abi' chi za'n con ree bèn ad najt bèn Israel, bèn ad zinalt ree ley guin dxel majsi ragbeen guial Dios naj bèn rniabee naj guial nabanan zi'c rniabee Cristo, per rünan naguiejn din guguaa reeman naj zi'cgajc tijb lasa' reeman din gac günan gan gac reeman xbejn Cristo. <sup>22</sup> Chi za'n con ree bèn yu'nawëëg par güün reeman o gaw reeman xhienin, dxel rünan naguiejn din su reeman zagdxë con naj din günan laa reeman yudar gac reeman xbejn Cristo. Bantëez lod ran rünan naguiejn din guguaa reeman naj zi'cgajc tijb lasa' reeman, din günczan gan majsi ta'nzi reeman günan gan gap reeman perdon por Cristo.

<sup>23</sup> Gra ree ni guie cayünan guial rënan xtiidxza'c Jesucrist, din tiblojzi güünle' Dios naj con gra ree bèn rililadx diidxza'c guin ree.

<sup>24</sup>Lëjt ragbee guial chi yu' tijb car-  
rer zien bejn ruxüün, per tijbzaman naj  
bèn rtia' prem. Ziangajc lëjt gol been  
naguiejn tia'di ni gunee Dios. <sup>25</sup>Bén ni  
ruxüün ree rajp laagajc reeman cudad  
chitëë xhie gudxoon guxüün reeman.  
Rüjn reeman zian din güün reeman gan,  
abi' ni rüjn reeman gan naj tijbzi coron  
balag ni rigool cari. Per dunuj ree ni  
cayguieen ree naguiejn cayca' ree najn  
tijb prem ni ad yu't dxej nit. <sup>26</sup>Abi' rag-  
beechaawan xhienin cayünan, ad cayün-  
tan zi'c tijb bèn ni ruxüün sin guial gag-  
been chexc, ad rüntan zi'c tijb bèn ni  
rga'p sin guial gagbeeman ban ca'pa-  
man. <sup>27</sup>Zeel cusagdiaj naj gajc din gac  
ganabee naj gajc günan zi'c rayal günan,  
chitëë guial culün bejn ree xtiidxza'c Je-  
sucrist achet yayalan delant loj Dios.

### Guial rën ni ad najt ree Dios

**10** Compniar raliduladx ree Jesu-  
crist, gol basaaladx guial dux  
bengol gulal ree bèn binal ree Moisejs,  
gra reeman guza xan zaj ni guxhaal  
Dios abi' gra reeman gudëd loj nijsdoo  
ni la nijsdoo xnia. <sup>2</sup>Zian biguien guial  
xbejn Moisejs naj reeman din gra ree-  
man gusanë laaman xan zaj guin, abi'  
gudëd reeman con laaman loj nijsdoo  
guin. Zian gurobnijs reeman loj zaj guin  
në loj nijsdoo guin. <sup>3</sup>Gra tëë reeman  
gudaw guialraw ni bi't diizd xanyabaa.  
<sup>4</sup>Gra tëë reeman gu' nijs ni bazaladx  
Dios loj reeman, nijs brii lad tijb guiaj.  
Rën guiëban guial diizd nadxel mal na-  
ban Cristo con laa reeman lod zëtzi ree-  
man. <sup>5</sup>Per zien reeman ad beent zi'c ru-  
ladx Dios, abi' güjt reeman niz loj yu-  
jbidx niz lod guza reeman.

<sup>6</sup>Gra nine gojc din yayagbee ree guial  
ad laat yaguieen ree lasa' ree ni mal ni  
been reeman. <sup>7</sup>Ad rayalt yayën ree ni  
rëb ree bejn naj ree Dios zi'c been zien  
ree dux bengol gulal ree, din rëb loj xti-  
idx Dios xcwent reeman: “Gurej reeman,

gudaw reeman dxel bisu reeman been  
reeman ni dxuudx ree.” <sup>8</sup>Ad rayal tëët  
güün bejn ni dxuudx con bèn ad najt  
lacheelaman, zi'c been zien ree dux ben-  
gol gulal ree abi' tijb dxej güjt gajlbi-  
choon mil reeman. <sup>9</sup>Ad zaneeguijdx tëët  
ree Dios zi'c been zien ree bèn guin, abi'  
gudaw bëël laa reeman persi güjt ree-  
man. <sup>10</sup>Ad rayal tëët yaguie'ch ree guial  
ad cayüjnt Dios zi'c rayal, din zian been  
zien ree dux bengol gulal ree abi' gux-  
haal Dios tijb anjl bagüjt laa reeman.

<sup>11</sup>Gra ni guzax reeman cwan loj xti-  
idx Dios din yayagbee ree guial ad laat  
yaguieen ree zi'c been reeman, dunuj  
ree guial nabajn ree yan guial ma cay-  
dop dxej ni yadëed ree bejn cwent loj  
Dios. <sup>12</sup>Zeel bèn ni naladx za'dxi'ch  
loj xnejz Dios, mejorli gapaman cudad  
chitëë güün dol laaman gan. <sup>13</sup>Gra ni  
cazajquidi ad najtan ni ad rzajct bejn,  
din Dios ad zaro'nladxtaman lëjt. Ad zus-  
laat Dios saquidi tijb ni ad zadaantidi,  
abi' laaman güün lëjt yudar din gagbeedi  
xhienaag laadi loj ni cayajc.

<sup>14</sup>Zeel compniar raliduladx ree Jesu-  
crist, zi'c rënan lëjt rnin lojdi gapidi cu-  
dad ad goc guiëndi ni naladx ree bejn naj  
dios. <sup>15</sup>Naj ragbee guial najdi ganax bèn  
rignia', zeel lëjt gajc gol been xgab bal  
zagdxe naj ni canin lojdi. <sup>16</sup>Chi raguieen  
ree zi'c been dux Dad ree Jesucrist chi  
gudaw reeman guxhin bigra, dxel chi  
radü' ree vin ni ma gogle' rasaaduladx  
ree rejn ni ma guxhie'man chi gütaman  
por dux tol ree. Abi' chi radaaw ree  
guiadxtil zi'c beenman, laan naj tijb sen  
guial ma nayajc ree tijbzi con laaman.  
<sup>17</sup>Din majsi zien nayajc ree, per zi'c rlia'  
tijbzi guiadxtil par dugra ree, zian rguien  
guial ma nayajc ree tijbzi con Cristo.

<sup>18</sup>Lëjt ragbee xhienaag rüjn ree bèn Is-  
rael chi rinë reeman tijb gon par Dios,  
abi' zi'c raw reeman tiblia' gon guin  
yu'guijc reeman guial ma naj reeman ti-  
jbzi con Dios. <sup>19</sup>Ad canitan lojdi por ree

ni naladx ree bejn naj dios guial lasajc reen o guial lasajc guialraw ni gurej loj ree dios guin. <sup>20</sup> Din bèn rüjn ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' ad rëntan gaquidi tijbzi con ree xindxab guin. <sup>21</sup> Ad zacjt güüнди zian par guiguien guial ma najdi tijbzi con ree xindxab guin, abi' gaw tēdi guiadx-til con vin din guiguien guial ma najdi tijbzi con Cristo. <sup>22</sup> ¿O rēndi ya yache'ch ree Dios? ¿Wen mazn raya'p ree guialr-niabee guial lojman ya?

### **Xhie zajc güün ree xbejn Dios**

<sup>23</sup> Graczi zajc güün bejn, per ad gratan naj zagdxе guial güünman. Majsı gra zile' güün bejn, per ad gratan rüjn sirv par güün lasa'man yudar chinalaman xnejz Dios. <sup>24</sup> Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

<sup>25</sup> Zi'c chi rziidi bēel luguia', ad guini-abdiidxidi bal ma gurejn loj xdios reeman, chitēē xhie guinialadxidi chi gawidi laan. <sup>26</sup> Din xieen dux Dad ree Dios naj guidxliuj con gra ni yu' lojn.

<sup>27</sup> Bal tijb bèn ad waliladxt xtiidx Dios na lojdi guial chitawidi lidxaman, abi' bal rēndi chedi gol chej. Gol gudaw gra ni gunee reeman lojdi ad xhie guiniab-diidxidi chitēē xhie naladxidi. <sup>28</sup> Per bal yu' xcompniaridi na guial ni cunee bèn guin cayawidi ma gurejn loj xdiosaman, ad gawidi laan por bèn bagojn lējt chitēē güünman xgab mal guial ad laat cayüjndi, majsı lējt ragbee guial xieen dux Dad ree Dios naj guidxliuj nē ni yu' loj guidxliuj guin. <sup>29</sup> Ad canitan lējt xcwent guial xhie naladxidi, ni canin lējt naj por ree xgab ni zajc güün stijb xcompniaridi por lējt.

Per wed yu'di rüjn xgab: “Per, ¿chexc zeel ad züntan gra ni ragbeen ad najt ni mal por xixgabzi stijb bejn? <sup>30</sup> Wed rēb tēdi: Naj ragbee guial rudēn quixtēē loj

Dios por gra ni rawan, ¿chexquiza zeel güün reeman xgab mal por naj?” <sup>31</sup> Per naj rni lojdi gra ree ni guin rayal gudxe'guijquidi din zi'c ni rawidi zi'c ni rē'di nē gra ree ni rüjndi rayal güüнди laan par güüнди Dios bèn zojbloj. <sup>32</sup> Gol gojp cudad xhienaag nabandi din zi'c ree bèn Israel zi'c ree bèn ni ad najt bèn Israel con ree xcompniaridi bèn riladx ree Jesucrist ad züjnt reeman xgab mal por lējt. <sup>33</sup> Din zian rünan, rünan naguiejn chitēē xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gap reeman perdon loj Dios.

**11** Zeel gol binal zi'c rünan, zi'c zinaalan zi'c been Cristo.

### **Xhie rayal güün ree bejn chi rbejdx rniab reeman Dios**

<sup>2</sup> Naj dád rabaanē'n lējt guial rusaal-adxidi naj, guial yu'guijquidi rüjn tēdi zi'c balün lējt. <sup>3</sup> Rēn tēen gusaaladxidi guial Dios rniabee Cristo abi' Cristo rniabee xinguaaw abi' xinguaaw rniabee bēngunaa. <sup>4</sup> Tijb xinguaaw chi rgu' xhienin guijquix par cwedx guiniabix Dios o gülüüx xtiidx Dios, natu naj ni cayüjnx. <sup>5</sup> Ziangajc chutēēz bēngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman cwent guial najman zi'c tijb bēngunaa ni biaj guijc xt garej. <sup>6</sup> Zeel bal tijb bēngunaa ad rëntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman. <sup>7</sup> Per xinguaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpix Dios. Abi' bēngunaa guial rxhioob xhienin guijcaman, zian rulüüman respejt ni rajpaman xinguaaw. <sup>8</sup> Din ad gojct xinguaaw con guxtıl lad bēngunaa, bēngunaa guin gojc con gux-

til lad xinguaaw. <sup>9</sup>Ad gojct xinguaaw par búngunaa, búngunaa guin gojc par xinguaaw. <sup>10</sup>Zeel búngunaa rayal guixhioob xhienin guijcaman din guiguien guial xinguaaw rniabee laaman zi'c ruliüü ree anjl chu rniabee laa reeman. <sup>11</sup>Majsi delant loj Dios tiblojzi naj bejn, din bal id búngunaa niu achut xinguaaw niu, abi' bal id chu xinguaaw niu achut búngunaa niu. <sup>12</sup>Walican, guial con guxtil lad xinguaaw gojc búngunaa, per yan por búngunaa ri't xinguaaw loj guidxliuj, zeel zi'c xinguaaw con búngunaa por Dios yu' reeman loj guidxliuj. <sup>13</sup>Naj rni læjt, læjt gajc gol been xgab bal zagdxen cwedx guiniab tijb búngunaa Dios abi' achet naxhoob guijcaman. <sup>14</sup>Bejn gajc ragbee guial natun bal id zugaj guijc xinguaaw. <sup>15</sup>Per par búngunaa mazri zagdxe rguienman bal guyool guidxguijcaman, din rajpaman laan par gusiaawan guijcaman. <sup>16</sup>Bal chu ad za't conform por ni canin lojdi, per naj rugojn læjt guial achet stijb costumbr raya'p ree, zian naj dux costumbr ree con los demazri ree bèn rililadx xtiidx Dios.

### Ruxhiin reeman zi'c basa'n Dad Jesucrist gac

<sup>17</sup>Yan xcwent ni ma ganin læjt, ad zile't ganin guial zagdxe naj ni cayüjndi din chi radxaag lasa'di par cwedx guiniabidi Dios, al ni ad rayalt güüнди rüjndi. <sup>18</sup>Yaløj rnin lojdi biguiejnan guial chi radxaag lasa'di par cwedx guiniabidi Dios ad raya'ntidi diidx, abi' tibladrililadxanan. <sup>19</sup>Din nawëëg najn guial ad zajct zian, abi' zian rguien chu diidxli zinal xnejz Dios. <sup>20</sup>Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist. <sup>21</sup>Din tijbgajdi rüjn naguiejn diob gawidi, ad rbëjzt xcompniaridi. Abi' la'tgaj yu' ree bejn rliiaan, yu'di raw da't abi' xt rzüdxidi guial rë'di zi'ctzi rëndi. <sup>22</sup>¿Id yu' lidxidi ya lod gawidi guièl

tëedi zi'ctzi rëndi?, ¿o ad rëntidi xcompniaridi bèn rililadx ree xtiidx Dios ya, zeel rusa'nxtudi bènprob ree bèn achet rajp? Yan, ¿rëndi ya chu' luxdon zagdxe con læjt por zian? ¿Per zian zi'c cayüjndi, ad zajct ganin lojdi guial zagdxe naj ni cayüjndi!

### Ni bigra gudaw Jesucrist xche

(Mt. 26:26-29;

Mr. 14:22-25; Lc. 22:14-20)

<sup>23</sup>Abi' ni balün læjt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guiadxtil. <sup>24</sup>Abi' chi gulox badëëman quixtëë loj Dios dxel gula'man guiadxtil guin, rëb gajman: “Guiadxtil guie naj da cuerpan ni ma bayün par guiëtan por læjt. Abi' chi güüнди zian, gol beenan guial gusaaladxidi naj.” <sup>25</sup>Ziangajc beennëman cojp ni yu' vin chi gulox gudaw reeman xche, dxel rëbaman: “Vin guie naj da rejnan ni gaxhie'n chi guiëtan par gaxhalan tijb nejz cüb guial xhienaag gac ree bejn perdon loj Dios. Abi' chi güüнди zian, gol been zian guial rusaaladxidi naj.” <sup>26</sup>Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guiadxtil rë'l tëëdi vin, zian ruliüüdi guial güjtaman por læjt, gol been zian xt chi gui'taman loj guidxliuj guie zatijb.

### Xhienaag rayal gac xche

<sup>27</sup>Yan bal yu' bèn raw guiadxtil rë'l tëëman vin xche guin, abi' ad yu' guijctaman ni rën guiëb ni cayüjnman, dolan cayüjnman guial ad yu'guijctaman ni rën guiëb xcuerp në xrejndux Dad ree Jesucrist. <sup>28</sup>Zeel rayal güün bejn xgab xhienaag nabanman delant loj Dios dxel ma zajc gawaman guiadxtil guiè'l tëëman vin xche guin. <sup>29</sup>Din bèn raw guiadxtil guin con vin guin abi' ad yu'guijctaman ni rën guiëb xcuerp Jesucrist. Laa-

gajcaman caguiil xcasti. <sup>30</sup>Din guial rüjn ree bejn zian zeel dád ziendi ragxuu, zien tēdi ad yu't gojl abi' zien reeman ma güjt. <sup>31</sup>Per bal yaløjxgaj yaguiéen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree. <sup>32</sup>Per zian-gajc bal yu' xcasti Dios ni yayal ree, laan naj par guzuxnejzaman dunuj ree chitēē yaguiéen ree dol, chitēē yayal ree casti ni rayal ree bèn ad rliadxt xtiidxaman.

<sup>33</sup>Zeel compniar raliduladx ree Jesucrist, chi radxaag lasa'di par gawidi, gol gulēz ree xcompniaridi din gawidi tijbzi. <sup>34</sup>Per bal yu'di ad zajct cwēz guial ma rliaandi, zagdxeli gaw lidxidi chitēē yayalidi xcasti Dios guial ad züjntidi zi'c rayal. Gra ni rayal ganin lojdi, chi guialan guidganan lējt dxel yanee ree.

### Quiarguejn ni runee xSprijt Dios

**12** Yan ganin lējt, quiarguejn ni runee Dios loj tijb gaj bejn por xyudar xSprijt Dios, din ad rēntan guibandī sin guial gagbeedi ni guin ree.

<sup>2</sup>Lējt ragbee guial chi gadidi güün-bee Dios dxel gogdxadi, bidxga'di ni na ree bejn lojdi naj ree dios abi'za ni'quid rnieet reen. <sup>3</sup>Zeel gol gogbee, chutēēz bèn rnieeguijdx Jesucrist, rēn guiēban guial ad nabannētaman xSprijt Dios. Achu tēēt bejn zajc guiēb: “;Jesucrist naj bèn rniabee naj!”, bal id nabanman con xSprijt Dios.

<sup>4</sup>Quiarguejn rent quiarguejn ren runee Dios dunuj ree, per Sprijt guin gajc naj bèn ragnē dugra ree. <sup>5</sup>Majsi ni rent ni ren naj xmandad Dios ni cayguieen ree, per laagajcaman naj bèn ni cayguieen ree sirv. <sup>6</sup>Abi' majsi garent garen cayüjn tijbgaj bejn, Dios gajc naj bèn ni cayüjn yudar tiblojzi. <sup>7</sup>Tijbgaj dunuj ree rulüü Dios ni rayal yaguiéen ree con xyudar xSprijt Dios din yaguiéen ree yudar dux compniar ree. <sup>8</sup>Din con xyudar xSprijt Dios yu' ree bèn ma ca'

quiarguejn par guinee reeman, yu' tēē ree bèn ma ca' quiarguejn par chignia' reeman diidxli xcwent Dios. <sup>9</sup>Abi' por xyudar xSprijt Dios yu' ree bèn ma cwa' guialrliladx ni guidiblagaa. Yu' tēē ree bèn ma cwa' guialrniabee par yayüjn reeman bēnragxuu ree. <sup>10</sup>Yu' tēē ree bèn ma cwa' guialrniabee par güiün reeman gadxagayaa ree milagr. Yu' ree bèn ma ca' quiarguejn par gudēēd reeman xtiidx Dios loj ree bejn. Yu' tēē ree bèn ma cwa' ree quiarguejn par gagbee reeman bal wali o ad walit ni canee bèn rēb guial caneeman xtiidx Dios. Yu' tēē reeman ma ca' quiarguejn par guinee reeman gadxagayaa ree diidx, abi' yu' reeman ma ca' quiarguejn par yadēēd reeman tijb diidx par stijb diidx. <sup>11</sup>Per por xyudar gajc xSprijt Dios rüjn bejn ni guin ree, laaman ma ragbee conin rudēēman güiün tijb gaj bejn ni naladxaman naj zagdxē.

### Tijbzi cuerp nayajc dugra ree

<sup>12</sup>Din zi'c dux cuerp ree majsi zien la' najn, per tijbzi nayajc ree. Ziangajc dunuj ree guial raliduladx ree Jesucrist majsi zien nayajc ree per tijbzi nayajc ree con laaman. <sup>13</sup>Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree bèn Israel o ad nayajct ree bèn Israel, bal nayajc ree zi'c bèn nado' o ad nayajct ree zi'c bèn nado', per tijbzi ma nayajc ree din dugra ree tiblojzi nabajn ree con xSprijt Dios.

<sup>14</sup>Lējt ragbee guial ad tibliatzi naj xcuerp bejn, zien la' naj xcuerp bejn. <sup>15</sup>Yan bal guiēb guia' bejn: “Ad najtan tibia' xcuerp bejn din ad najtan yaa bejn.” Per ad por ziant ad najt guia' bejn tibia'man. <sup>16</sup>Ziangajc majsi guiēb guidi-ajg bejn: “Ad najtan tibia' xcuerp bejn din ad najtan guiaaløjman”, ad por ziant ad najtri guidiajgaman tibia' xcuerpaman. <sup>17</sup>Din bal guidib xcuerp bejn ni-

ajc guiaaloyman,  xhieza naag niguiejn-man?, o bal guidib xcuerp bejn niajc guidiajgaman,  xhieza naag niuxi'man?<sup>18</sup> Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c r nman.<sup>19</sup> Din bal ni-ajc xcuerp bejn tiblojzi, dxel ad najtran cuerp.<sup>20</sup> Per zi'c ma rnin l jt majsi zien la' naj xcuerp tijb bejn per tijbzi naj guidiban.

<sup>21</sup> Ad zajct gui b guiaaloy bejn loj yaaman: "Ad ryaadxtan l j." Ad zajct t  t gui b guijc bejn loj guia'man: "Ad ryaadxtan l jt."<sup>22</sup> Din luar lod rul   ad r jnza'ct sirv, laa reen naj ni mazri r jn sirv.<sup>23</sup> Abi' ree luar lod ad rguient zagdx, raguieen ree naguiejn din guiguieen reen zagdx. Gui ad ree luar naguie'ch, mazri raya'p ree cudad luar guin ree rata'cw reen din guiguieen reen zagdx.<sup>24</sup> Ad zro't radxu' ree xgab por ree luar ni rguien, mazri raya'p ree cudad luar naguie'ch ree zeel radojt ree xhienin din guiguieen zagdx dux cuerp ree. Zianan been Dios xcuerp bejn<sup>25</sup> din chit   yaguieen ree xgab guial yu' lod ad r jnt sirv, guidib dux cuerp ree r jn yudar lasa'.<sup>26</sup> Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

<sup>27</sup> Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin.<sup>28</sup> Abi' entr gra dux compniar ree b n riladx Jesucrist. Dios yaloy bacaabeeman b n naj ree xi ap stoles Jes s, ni barojp bacaabeeman b n gud  d ree xtiidxaman loj ree bejn, bayon bacaabeeman b n guli   ree xtiidxaman bejn ree, dxel bacaabeeman b n gap ree guialrniabee par yay jn reeman b nragxuu ree. Bacaabee t  man b n g  n ree gadxagayaa milagr. Bacaabee t  man b n ni g  n ree yudar bejn ree. Bacaabee t  man b n ni

nabee ree loj ree b n riladx xtiidxaman abi' bacaabeeman b n ni nree ree zien ree diidx.<sup>29</sup> Ad grat ree bejn naj ap stoles ad gra t  t ree bejn zajc gud  d xtiidx Dios loj ree bejn, ad grat ree bejn zajc guli   xtiidx Dios bejn ree. Ad grat ree bejn zajc g  n milagr,<sup>30</sup> ad gra t  t ree bejn zajc yay jn ree b nragxuu, abi' ad grat bejn zajc guinee zienloj diidx ad gra t  t bejn zajc yay jn tijb diidx zatijb diidx.<sup>31</sup> Per gol been naguiejn din gunee Dios l jt quiarguiejn zagdx ree, abi' naj ganin l jt conin naj nejz mazri zagdx chinalidi.

### Xcwent guial r n bejn ree

**13** Din bal rajc rnien zienloj diidx ni nree b nguidxliuj n  xtiidx ree anjl yu' xanyabaa, per bal id r nan bejn najzan zi'c tijb guiib rzijdx o zi'c tijb plati ni yu' cha'.<sup>2</sup> O bal nayalan nud dan xtiidx Dios loj ree bejn, o nia'pan quiarguiejn par niagbeen gra ni z  d por Dios ni gad gagbee bejn, o nia'pan zienloj guialrignia' o nia'pan tijb guialrliladx Dios ni xt zile' guchan xliajt ree guia', per bal id r nan bejn ree achet lasajcan.<sup>3</sup> Ziangajc majsi gagui'san gra ni ra'pan loj ree b n ni ryaadx laan abi' yay  da cuerpan din che'can, per bal id r nan bejn ree achet lasajc ni cay nan.

<sup>4</sup> Guial r n lasa' naj gap pacens lasa' bejn, gac bejn benza'c con lasa'man, ad zad dlojt lasa' bejn, ad z jnt bejn nab , ad z jnt bejn benro' loj lasa'man.<sup>5</sup> Guial r n lasa' naj gap respejt lasa' bejn, ad gac bejn naxhien, ad yalenyaman, ad chu'xyajn t   lasa' bejn,<sup>6</sup> ad rayalt yabaa bejn por ni mal ni cay jn bejn o ni cazajcaman, rayal yabaaman chi z  bejn xnejz.<sup>7</sup> Guial r n lasa' naj g  n bejn perdon lasa'man ni g  n n tzi reeman laaman, abi' chililadx lasa'man, ad zadxag t  taman cw zaman ni cab zaman, taan t  man ni r jnn tzi reeman laaman.<sup>8</sup> Guial r n lasa' ad yu't

dxej loxan, per gualrajc yu' dxej loxan, ad zu tëetri bèn ni rudëed ree xtiidx Dios loj ree bejn ni'qui ree bèn rniece zienloj diidx. <sup>9</sup>Din yan bal rayignia' ree, tilda'nzi naj ni rayignia' ree abi' bal radëed ree xtiidx Dios loj ree bejn, tilda'nzi rayagbee ree xcwentaman. <sup>10</sup>Per chi guidxin dxej yayignia' ree gran, dxel achetri lasajc ni rayagbee ree yan.

<sup>11</sup>Chi gocan xindoo gunen zi'c xindoo, benan xgab zi'c xindoo, go'pan xquiargueijn xindoo. Per chi bidxin dxej gojcan bengol basa'nan gra guial xindoo tiblax. <sup>12</sup>Ziangajc yan ad rayignia't ree gra zi'cgajc chi ad rguient zagdxe loj tijb guiaawajñ, per chi guidxin dxej yadxin ree lod zøjb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zøjb Dios dxel günbeen gra zi'c nünbeeman naj.

<sup>13</sup>Choon naj ree ni ad yu't dxej lox, gualrliladx Dios, gualrbëz ni gunece Dios, në guial rën Dios dunuj ree. Per loj guiyon ree ni guin mazri lasajc guial rën Dios dunuj ree.

### Guialrniece stijb diidx

**14** Gol been naguiejn gol guyën ree bejn, gol gurejdx gunab tëë Dios din guneeman xquiarguejndi din güüñdi xmandadaman, per mazri rüjn naguiejn gapidi quiarguejn par gudëedi xtiidx Dios loj ree bejn. <sup>2</sup>Bèn rniece tijb diidx ni ad rignia't gra bejn, güünman cwent guial achut caneenëman. Tijbzi Dios caneenëman guial achut rignia' xtiidxaman, tijbzi laaman ragbee ni canee-man per bejn ree ad ragbeet reeman ni rën guiëb ni canee-man. <sup>3</sup>Per tijb bèn rülüü xtiidx Dios bejn ree cayünman yudar xhienaag chinal bejn xtiidx Dios, cudëedaman consejw loj ree bejn ragu' tëëman luxdoo reeman. <sup>4</sup>Abi' bèn rniece tijb diidx ni ad rignia't gra ree bejn, par tijbzi laaman naj ni canee-man, per bèn rniece xtiidx Dios cayünman yudar gra

ree xbejn Dios din gusnuu chinal reeman xnejzaman.

<sup>5</sup>Bal zianclaa gradi niajc niniece zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guinee bejn xtiidx Dios guial loj guial guinee-man zienloj ree diidx, o bajtëë bal zile' guiëbaman loj ree bejn xhie rën guiëb ni rniece-man din güün sirv ni rniece-man gra ree bejn. <sup>6</sup>Din zi'c naj bal guitixlon lëjt compniar raliiduladx ree Jesucrist, abi' ganen lojdi tijb diidx ni ad zignia'tidi, çxhieza sirv güünan lëjt bal id canin lojdi zagdxe ni balüü Dios naj o ni ragbeen o bal id canen xtiidx Dios lojdi zagdxe o xhietëez zatijb ni rayal gusiididi?

<sup>7</sup>Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdxe ad zignia't ree bejn xhienin cucwejdxaman. <sup>8</sup>Ziangajc bal id zucwejdx reeman zagdxe trompejt loj wadijl, çxhieza naag chignia' reeman guial ma rayal suchaaw reeman par til reeman con ree bèn rayal tilnë reeman? <sup>9</sup>Yan ziangajc bal guinee-edi bejn ree con tijb diidx ni ad rignia't reeman, çxhieza naag chignia' reeman ni rëbidi! Xlia'zi caneedi achut rignia' ni rniece-di. <sup>10</sup>Lëjt ragbee guial zienloj diidx yu' loj guidxliuj guie, per graczan yu' ni rëban par bèn rignia' laan. <sup>11</sup>Per bal chu guinee-edi naj con tijb diidx ni ad rignia'tan dxel benzit najman par naj abi' za naj benzit najman par laaman. <sup>12</sup>Zeel zi'c rëndi gapidi quiarguejn por xyudar xSprijt Dios par güüñdi xhietëez ni naj xchiin Dios, gol gunab loj Dios din yazaladxaman quiarguejn lojdi din gac güüñdi ni rüjn sirv par gra ree xbejn Cristo.

<sup>13</sup>Zeel bèn ni rniece tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman. <sup>14</sup>Din zi'c naj bal gabledx ganaaban Dios con tijb diidx ni ad rignia'tan dxel ti-

jbzi da sprijtan ragbee ni canen, per naj ni'quid ragbeetan xhienin canen. <sup>15</sup> Zeel ni rayal gūnan naj, gabedx ganaaban loj Dios con da sprijtan abi' gagbeen xhie rēn guiēb ni canen. Ziangajc chi rolan cant ree par Dios rayal gagbeen chignia' tēen xhie rēn guiēb ni cayolan. <sup>16</sup> Din bal nrieel diidx zagdxe ree loj Dios con diidx ni ad rignia't ni'qui lūj. Dxel bèn za' con lūj, ad zajt guiēbaman “Amén” chi ma gulox badēēdil quixtēē loj Dios guial ad rignia'taman ni nrieel. <sup>17</sup> Majsi nix da't badēēdil quixtēē loj Dios, per achetzi yudar beenl bèn za' con lūj par gagbeeman xhienaag chinalaman xnejz Dios guial ad bignia'taman ni rēbil. <sup>18</sup> Quixtēē Dios naj mazri rajc zien loj diidx guial loj gradi. <sup>19</sup> Per majsi zian chi za'n lod rado'p ree dux compniar ree bèn rliladx ree Jesucrist par ganenē'n laa reeman, par naj mejorli naj ganenē'n laa reeman con gaay diidx per diidx ni chignia' reeman nē ni gūūn laa reeman sirv din guluū reeman ben ren ree luar ganenē'n laa reeman con chiimil diidx ni ad rignia't reeman.

<sup>20</sup> Compniar raliduladx ree Jesucrist, ad bal rijnridi xgab zi'c xindobēz. Gol gojc zi'c xindobēz per guial ad zūjntidi ni mal, per par gūūndi xgab gol been xgab zi'c bengol. <sup>21</sup> Loj xtiidx Dios rēb: “Gaxhalan bèn nrieē ree diidx ren, bèn ad najt ree bèn niz guie din guinieenē reeman bèn guie ree. Per ni'qui zian ad zuzoobt reeman da diidxan, rēb dux Dad ree Dios.” <sup>22</sup> Zeel guial nrieē zienloj diidx, najn tijb sen par ree bèn ad rliladx xtiidx Dios din chililadx reeman. Per guial ruluū bejn ree ni rēn Dios gagbee reeman, laan naj ni gūūn sirv par ree bèn ma rliladx ad par bèn ad rliladx. <sup>23</sup> Per ni'qui zian chi radxaag lasa'di par gucaagdiajguidi xtiidx Dios, abi' bal suloj guinieē tijb gajdi gadxagayaa diidx ni achut rignia' abi' chu' ree bèn qui bililadxri xtiidx Dios o bèn ad waliladx

ree xtiidxaman, ¿wen id zanaladx reeman ya guial guijquidi rajc? <sup>24</sup> Per bal chu' bèn qui bililadxri o bèn ad waliladx abi' caneedi xtiidx Dios, dxel chi guiguiejnman ni caneedi, gagbeeman xhie dol cayūjn reeman, laagajcaman gagbee chu najman. <sup>25</sup> Zian gagbeeman xhienaag nabanman dxel guzuxibaman cwedx guiniabaman Dios, abi' guiēbaman guial diidxli za' Dios con lējt.

### Gol been gra xnejz

<sup>26</sup> Gra ni canin lojdi compniar raliduladx ree Jesucrist, caninan din gagbeedi guial chi rado'pιδi par gucaagdiajguidi xtiidx Dios, gradi zajc gūūn ni chile' gūūndi, bèn ni gool cant par Dios, bèn ni guluū ree bejn, bèn gugojn bejn ree conin balūū Dios lojman, bèn guinieē diidx ren ni ad rignia't gra bejn nē bèn gudēēd xtiidxaman loj ree bejn. Per gra ni gūūndi gūūn sirv par gūūnan yudar los demazri ree xcompniaridi din gusnuu sudxi'ch reeman loj ni rliladx reeman xtiidx Dios. <sup>27</sup> Bal yu' bèn nrieē tijb diidx ni ad nrieet gra bejn, tio'pzaman o choonzaman guinieē diidx ni rajcaman, abi' tijb gaj tijb gaj reeman guinieē, chu' tēē bèn ni guiēb loj ree bejn xhie rēn guiēb ni rēb reeman. <sup>28</sup> Per bal id yu' bèn zajc gugojn bejn ree xhienin rēb reeman con diidx ni rajc reeman, mejorli achet guiēb reeman delant loj ree bejn. Zagdxeli laazi reeman cwedx Dios lēn luxdoo reeman. <sup>29</sup> Abi' ree bèn gugojn delant loj gra ree bejn conin balūū Dios laa reeman, tio'pzi reeman o choon reeman guinieē. Abi' los demazri reeman gucaagdiajg bal zagdxequi naj ni canee reeman. <sup>30</sup> Per bal tijb bèn zojb cucaagdiajg loj hor guin guluū Dios laaman xhienin, rayal yacwēēz bèn canee din gac gugojn bèn guin bejn ree xhie nin balūū Dios lojman loj hor guin. <sup>31</sup> Gra ree bèn ni bayal gudēēd xtiidx Dios loj ree bejn, gradi zajc gugojn bejn ree xhienin balūū Dios



lějt, per tijb gajdi chi yayalidi din gra ree bèn cucaagdiajg gusiid reeman chu' tēē luxdoo reeman. <sup>32</sup> Gol badxe'guijg guial ree bèn rudēē xtiidx Dios loj ree bejn laagajc reeman rniabee laa reeman din guiniee reeman chi rayal guiniee reeman. <sup>33</sup> Din Dios ad rēntaman tijb ni ad najt xnejz, rēnman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo, <sup>34</sup> loj hor ni ma cucaagdiajg reeman xtiidx Dios ad yu't permis guiniee ree bēngunaa rayal guzoob reeman xtiidx xixinguiiaaw reeman zi'c rēb Dios gūūn reeman diidz gulal. <sup>35</sup> Bal xhie rēn reeman gagbee reeman, mejorli lidz reeman guiniabdiidx loj lacheel reeman, din natun guiniee tijb bēngunaa loj hor ni cucaagdiajg reeman xtiidx Dios.

<sup>36</sup> Gol basaaladx guial ad lějtij naj bèn yaløj cwa' xtiidx Dios ad tijb tēētzi lějt ragbee xtiidx Dios din gūūndi zi'c naj xixgabidi. <sup>37</sup> Bal chu bèn naladx guial ma cwa'man quiarguejñ par gudēēman xtiidx Dios loj ree bejn o por xSprijt Dios ma cwa'man xhie stijb quiarguejñ, dxel laa gagbee gajcaman guial ni cucan loj gui'ch guie najñ zi'c rniabee dux Dad ree Dios. <sup>38</sup> Per bal id rliiladxaman ni canin lojdi loj gui'ch guie, ziangajc ad chililadxidi xtiidxaman.

<sup>39</sup> Yan zi'c ma rnin lojdi compniar raliduladx ree Jesucrist, gol been naguiejñ din gapidi quiarguejñ din gudēēdi xtiidxaman loj ree bejn, ad bal gudxoondi guiniee tijb ree xcompniaridi bèn rniece tijb diidz ni ad rignia'tidi. <sup>40</sup> Per gra ni rījndi gol beenan xnejz, gol beenan zi'c rayal.

### Baban Jesucrist loj ree bengüt

**15** Compniar raliduladx ree Jesucrist, rēn tēēn gusaaladxidi xtiidxza'c Jesucrist ni ma rnin lojdi, diidxza'c ni ma bililadxidi loj ni za'dx-ichidi. <sup>2</sup> Gol basaaladx guial por ree di-

idxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

<sup>3</sup> Yaløjxgaj balūn lějt ni basidan yaløj. Rnin lojdi guial Cristo güt por dux tol ree zi'c rēb loj xtiidx Dios. <sup>4</sup> Abi' biguie'chaman dxel ni goc choon dxej babanman zi'cgajc rēb loj xtiidx Dios. <sup>5</sup> Chi ma babanman, dxel balūūlojman loj Bēd dxel loj los demazri ree apóstoles. <sup>6</sup> Zianz balūūlojman nē loj ree tijb cwa ree bèn rliiladx laaman, gojc reeman mazri de gaay gayuu bejn. Yu' reeman ma gūjñ, per mazri zien reeman sta naban. <sup>7</sup> Balūū loj tēēman loj Santiaaw dxelri loj ree apóstoles. <sup>8</sup> Ni bigra balūūlojman lon, naj najñ zi'c tijb xindo ni rajl chi ma gudēd tiamp ni rayal galix. <sup>9</sup> Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bèn rliiladx ree Jesucrist. <sup>10</sup> Per guial naj Dios benza'c zeel najñ ni najñ, abi' ad bayaxlia'tzaman najñ din naj mazri ma benan xmandadaman guial loj los demazri ree xbejn Jesús, majsi diidxliczi ad da xtijbt naj cayūnan ni cayūnan, nē con xyudar Dios cayūnan laan. <sup>11</sup> Zeel achet gūūnan bal por chunin biguiejñdi xtiidx Dios bal por naj o por stijb ree xbejn Jesús, ni mazri lasajc naj guial ma biguiejñdan abi' ma bililadxidan.

### Yaban ree bengüt

<sup>12</sup> Yan zi'c ma balūūn lějt xtiidx Dios guial baban Cristo, ¿chexquiza zeel yu'di rēb ad zabant ree bengüt? <sup>13</sup> Bal id zaban ree bengüt, rēn guiēban guial ad babant Cristo. <sup>14</sup> Abi' bal id baban Cristo dxel achet sirv ni caylūūn lějt, ache tēēt sirv ni rliiladxidi laaman. <sup>15</sup> Dxel bal zianan, ganax diidz rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist. <sup>16</sup> Din bal id zaban ree bengüt, dxel ni'qui Je-

sucrist ad babantri. <sup>17</sup> Abi' bal id babanman, achet sirv guial rliadixidi laaman ache tëët perdon yu' por xtolidi. <sup>18</sup> Bal naj zian, xt ree bèn ma güjt achet xperdon reeman majsi bililadx reeman Jesucrist. <sup>19</sup> Bal lojzi guidxliuj guie güün sirv ni baliladx ree Jesucrist dxel dunujzi ree nayajc ree bèn naban mazri naya guial loj chutëöz bėnan.

<sup>20</sup> Per diidxliczi Jesucrist naj bèn baban, abi' laaman naj quijb bèn yaløj baban. <sup>21</sup> Abi' zi'c bidoonloj guialgüjt loj guidxliuj guie por tijb bejn, ziangajc por tijb bejn yaban ree bengüt. <sup>22</sup> Zi'c bidoonloj guialgüjt par gra ree bejn por Adán, ziangajc yan por Jesucrist ma yu' stijb guialnaban par ree bèn rliadix laaman. <sup>23</sup> Per gra gac zi'c rayal: Yaløj Jesucrist naj bèn baban, dxel chi gui'taman stijb dxel ma yaban ree bengüt bèn bililadx ree laaman. <sup>24</sup> Abi' chi ma beenman gan gunabeeman gra ree bèn rdx-e'ch laaman, zi'c ree bèn rajp guialguxtis nē ree bèn rajp graløj guial rniabee, dxel ma yayü xguialrniabeeman loj dux Dad ree Dios. <sup>25</sup> Din rayal nabee Cristo xt chi ma beeman gan canabeeman gra ree bèn rdx-e'ch laaman. <sup>26</sup> Abi' ni chigra gunidlojman naj guialgüjt. <sup>27</sup> Loj xtiidx Dios rēb guial Dios badēē guialrniabee loj Jesucrist din nabeeman gra, per ad rēnt guiēban guial nē Dios rniabeeman dīn Dios badēēd guialrniabee lojman. <sup>28</sup> Abi' dxej ni ma rniabee Jesucrist loj gra dxel yayüman guialrniabee ni badēēd Dios lojman din ma nabee tijbzi Dios gra.

<sup>29</sup> Yan bal id zaban ree bengüt, ¿chexquiza zeel yu' ree bèn rirobnijs xcwent ree bèn ma güjt, abi'za bal id zaban ree bengüt?

<sup>30</sup> Achet sirv guial nadxu'n loj ni nadxeb gra hor. <sup>31</sup> Din rugojnan lējt, gra dxej za'n loj guialgüjt, laan naj ni didxli ni rnin lējt zi'cgajc walīn guial dad nix yu' luxdon con lējt guial najdi xbejn Cristo. <sup>32</sup> Yan bal naabzi loj guidxliuj

guie güün sirv ni cayünan dxel achet sirv ni basajc ree bèn Ēfeso naj, naj reeman bendoxh zi'c ree bedoxh. Din bal id zaban ree bengüt mejorli yaguieen ree zi'c rēb ree bèn rēb: “Yadaaw ree yadü' tēē ree dīn guixie ma bayējt ree.”

<sup>33</sup> Per naj rni lējt ad tiēbidi gusquiee reeman lējt. Din guial ridxga' xtiidx ree bèn ni ad zēt xnejz, najzan par guxhinan zi'c nabandi. <sup>34</sup> Zeel gol been xgab zi'c rayal ad bal rüjn tēēridi dol dīn yu'di ni'quid nünbeetidi Dios, zeel canin lojdi zian dīn yaya'nxtudi.

### Xhienaag yaban ree bengüt

<sup>35</sup> Per wed yu'di rüjn xgab: “¿Xhieza naag yaban ree bengüt? ¿Xhienaag naj cuerp ni gap reeman?” <sup>36</sup> Per xgab guin xgab tontzan. Din lējt ragbee guial chi rxübin bejn tijb xhaj xhienin, chi rliejnan dxel rnijt xhaj ni guxübinman. <sup>37</sup> Ad cwaan ni rliejn guint rxübin bejn, xhajan rxübinman, zi'c rüjn bejn con trigo o xhietēöz stijb xhaj nin. <sup>38</sup> Per chi rliejnan ma najn cwaandoo zi'c rniabee Dios gacan, xhietēöz xhaj nin ni rxübin bejn ma yu' cwaando ni guilianan. <sup>39</sup> Zi'c nadxaa xcuerp bejn con xcuerp ree be, nadxaa tēē bëjl con xcuerp ree biguijn. <sup>40</sup> Nadxaa tēē ree ni yu' xanyabaa con ree ni yu' guidxliuj, nadxaa naj guialza'cdxoon ree ni yu' xanyabaa con ree ni yu' loj guidxliuj. <sup>41</sup> Nadxaa xbacha' gubijdx guial loj bëw nadxaa tēē xbacha' ree bajl xanyabaa, xt ree bajl xanyabaa garent garen naj xbacha' reen.

<sup>42</sup> Yan ziangajc gac con guial yaban ree bengüt. Cuerp ni rguie'ch rodخان, per cuerp ni gap bejn stijb ad yu't dxej godخان. <sup>43</sup> Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl. <sup>44</sup> Rguie'ch cuerp ni rajp bejn loj guidxliuj guie, per chi yaban bejn

stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

<sup>45</sup> Loj xtiidx Dios rëb guial yaløj Adán gojpp guialnaban loj guidxliuj guie. Dxel bi't Jesucrist, bèn razaladx guialnaban loj ree bejn. <sup>46</sup> Ad yalojt rajp bejn guialnaban ni gapaman xanyabaa, yaløjxgaj rajpaman guialnaban loj guidxliuj guie dxel guialnaban xanyabaa. <sup>47</sup> Adán gojcaman con yuj zeel najman bèn-guidxliuj, per Jesucrist xanyabaa zëë-daman. <sup>48</sup> Gra ree bênguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa. <sup>49</sup> Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

<sup>50</sup> Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodx ad zajct chu'n lod yu' ni ad rodx. <sup>51</sup> Per rënan gagbeedi tijb ni achutctzi wayagbee xt yan guial ad dugrat ree yayëjt, per dugra ree guidxaa zi'c nayajc ree, yaya'p ree cuerp ren. <sup>52</sup> Laan gac chi yaguiejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxel tibrajctzi zi'ctzi chi ruchip guiaaloj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan. <sup>53</sup> Din rüjn naguiejn guidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët. <sup>54</sup> Abi' chi ma bidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: "Xt guin ma bayaaloj gojc gan loj guialgüjt."

<sup>55</sup> Nadxel tëë ma gojc cumplid zi'c rëb loj xtiidx Dios lod rëb: "Guialgüjt, ¿conza guial rüjnl gan? ¿Conza guial rusagzil bejn?" <sup>56</sup> Guialrusagzi guialgüjt naj por dol, abi' por ley ragbee bejn guial dol guin naj ni rniabee laaman. <sup>57</sup> Per quix-tëë dux Dad ree Dios, bèn rüjn dunuj ree yudar par yaguieen ree gan por xguialgüjt Dad Jesucrist.

<sup>58</sup> Zeel compniar raliduladx ree Jesucrist zi'c rënan lëjt min lojdi, gol guzudxi'ch ad chu' tëë luxdoodi tio'p. Guixie guixie gol been naguiejn güüнди mazri xmandad Dios, din lëjt ragbee guial ad ni xlia'tzi gra ni cayüjndi par Dad Jesucrist.

### Milia ni rdo'p par ree xbejn Dios

**16** Yan por milia ni naj guto'pιδi par güüнди yudar stijb ree dux compniar ree bèn raliduladx ree Jesucrist, gol been zi'c gunabeen güün ree bèn rililadx ree Jesucrist niz Galacia. <sup>2</sup> Gazob dumingw tijb gajdi gol gule'c cintabl zi'ctzi beendi gan lën toxman, din chi guialan ad rüjntri naguiejn guido'pιδi milia guin. <sup>3</sup> Abi' chi guialan, bèn ni gucaabeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman. <sup>4</sup> Abi' bal guguian guial rüjn naguiejn gan dxel chinë'n laa reeman.

### Xhienaag naj xixgab Pab

<sup>5</sup> Yaløj gadëëdan niz Macedonia dxel guialan Corinto guidganan lëjt. <sup>6</sup> Wed xchej gazun con lëjt. Wed guidib tiamp nayaag gazun con lëjt, dxel güüнди naj yudar din gan lod naj gan. <sup>7</sup> Ad rëntan gadëëdzi nejzan gaguixlon lëjt, rënan gaglaan con lëjt bal gunee Dios permis. <sup>8</sup> Per yan naj yaya'n nan Éfeso xt lanij pentecostés, <sup>9</sup> din guie merczi yan catiëjb ree bejn cucaagdiajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

<sup>10</sup> Chi gui't Timoteo, gol been naguiejn din suman zagdxé con lèjt, din lasa'gajc xmandad Dios ni cayünan cayüjnman.

<sup>11</sup> Zeel achu lèjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabëëzan laaman con los demazri ree dux compniar ree.

<sup>12</sup> Abi' Apolos, naj guza'c laaman li-aadx din nidnëman laa reeman nitixloj reeman lèjt, per ad guyëntaman ni'taman yan, per zi'tcaman guitixlojman lèjt chi guneen laaman tiamp.

### **Diidx bigra ni bacaa Pab loj gui'ch guie**

<sup>13</sup> Gol guzujsin gol guzujdxi'ch tëë loj ni rliladxidi Jesucrist. Gol gudaan ni gui'tzi gol guzujdxi'ch tëë. <sup>14</sup> Gra ni güüнди gol beenan guial rëndi bejn ree.

<sup>15</sup> Compniar raliduladx ree Jesucrist, lèjt ragbee guial Estéfanos con xfamilaman laa reeman naj bèn yaløj bililadx Jesucrist niz Acaya, ragbee tëëdi xhienaag cayüjn reeman yudar dux compniar ree bèn rliladx ree Jesucrist. Zeel rnin lojdi:

<sup>16</sup> Lasa' ree bèn guin gol bazoob xtiidx

reeman con gra ree bèn cayüjn xmandad Dios në ree bèn cayüjn yudar cayajc mandad guin.

<sup>17</sup> Dád nix guyu luxdon chi baguiaad Estéfanos guie, në Fortunato në Acaico. Din por laa reeman guza'can zi'cgajc chi za'n con gradi. <sup>18</sup> Laa reeman bagu' luxdon niz guie zi'c ragu' reeman luxdoodi, abi' lasa' ree bèn guin gol gojþ reeman respejt.

<sup>19</sup> Gra ree compniar rliladx Jesucrist niz Asia guie rugajpdioz reeman lèjt. Abi' Aquila con lacheelaman Priscila con gra ree xbejn Cristo bèn rado'p ree lidz reeman, rugajpdioz reeman lèjt, nayajc ree xbejn Cristo. <sup>20</sup> Gra ree dux compniar ree bèn rliladx ree Cristo rugajpdioz reeman lèjt, gol bagajpdioz tëë lasa'di zi'c rayal.

<sup>21</sup> Naj Pab, quijb naj cuca lèjtr guie ree par gugajpdiozan lèjt.

<sup>22</sup> Bal yu' bèn ad rënt dux Dad ree Jesucrist, laaman ma rayal xcasti Dios. ;Dux Dad ree Jesucrist nayob gui'taman!

<sup>23</sup> Abi' dux Dad ree Jesucrist güünle' gradi. <sup>24</sup> Zi'c nayajc ree xbejn Cristo tiblojzi rënan gradi. Amén.

## Gui'ch barojp ni guxhaal San Pabl loj ree b n Corinto rliladx Jesucrist

### Rugajpdioz Pab b n Corinto rliladx ree Jesucrist

**1** Naj Pab, Dios bacaabee naj gacan xi ap stol Jesucrist, n  dux compniar ree Timoteo za' con naj. Naj cuca gui'ch guie par l jt guial ma rliladxidi xtiidx Dios luguiedx Corinto n  los demazri ree b n riga' niz Acaya. <sup>2</sup>Dux Dad ree Dios con Dad Jesucrist g inle' l jt yabe'cdxe t e reeman luxdoodi.

### Tarbajw ni gud d Pab

<sup>3</sup>Quixt e Dios xDad Dad Jesucrist, b n naj Dad b n raya dunuj ree naj t eman Dios b n ragu' du luxdoo ree. <sup>4</sup>Laaman ragu' du luxdoo ree loj xhi-et ez guialrzagdiaj ni rad  d ree din gac yalu' ree luxdoo ree b n cad d xhi-et ez guialzi, yalu' ree luxdoo reeman zi'c ragu' Dios du luxdoo ree. <sup>5</sup>Din majsi cayzaagdiaj da't ree guial nayajc ree xbejn Cristo, ziangajc d d ragu'man du luxdoo ree. <sup>6</sup>Abi' bal cayzaagdiajn, cayzaagdiajn din yaguieenan l jt yudar din chu' luxdoodi din laa t edi loj dol. Abi' bal cu'man du luxdoon, rgu'man du luxdoon din chu' luxdoodi din gac taandi lasa' ree guialzi ni cayd  dan. <sup>7</sup>Ad yu' naw egt du luxdoon con l jt, din zi'c-gajc cazagdiajdi ziangajc cayzaagdiajn dxel ziangajc yagu' Dios luxdoodi zi'c-gajc ragu'man du luxdoon.

<sup>8</sup>Compniar raliduladx ree Jesucrist, ray nan gagbeedi guial d d zro' naj ni baza'can niz Asia. Naya baza'can niz ni, par dunuj ad zadaantran, ad naguieentran nejz guial yabajn-ran mazri, <sup>9</sup>baguieenan xgab guial ma bay jtan. Per baza'can zian din yadx-e'guijcan guial achet zajc yaguieen

dunujzan sin xyudar Dios, b n rasban ree beng t. <sup>10</sup>Laaman bab e dunujn loj guialg jt guin abi' gagn man dunujn loj lasa' ree ni nadxeb guin. Dunuj ree rayagbee guial gusnuu g inman dunujn yudar, <sup>11</sup>mazri bal g  ndi yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxel zien gajc reeman gud ed quixt e lojman zi'c cayagn man dunujn.

### Chexc ad wejt Pab Corinto

<sup>12</sup>Abi' ni rabaan rnin lojdi guial achetczi naduladxan guial rayagbeen nabajnan naya delant lojdi n  delant loj ree b nguidxliuj, abi' diidxli cayguieenan ni rayal yaguieenan. Per ad cayguieentan zian por dux quiarguiejn-zan, cayguieenan zian por xyudar Dios. <sup>13</sup>Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di gra ni canin lojdi. <sup>14</sup>Zi'cgajc ta'ngaj cayagbeedi guial chi gui't Dad Jesucrist zatijb l jt yabaadi con dunujn gui ad dunujn yabaan con l jt.

<sup>15</sup>Laan naj ni yu'guican, zeel yaloj benan xgab nidganan l jt din nabaadi guial ma barojp volt bidganan l jt. <sup>16</sup>Benan xgab nidganan l jt chi nialan niz Macedonia, abi' chi nazaan Macedonia nialan nidganan l jt stijb, dxel nagu'nezidi naj par Judea. <sup>17</sup>Ad g  ndi xgab guial chi rnin guidganan l jt rnizan zian. Ad g  ndi xgab guial r nan zi'c r jn gra ree b nguidxliuj, ganin guialan abi' ragbeen guial ad zialtan. <sup>18</sup>Dios ragbee guial ad raguie'chtan yaguieenan ni rayagbeen ad zaguieentan. <sup>19</sup>Din Jesucrist Xi'n Dios, b n ni ma baguien xtiidx lojdi, naj con Silvano con Timoteo, ad najt Jesucrist b n na g  nman ni ragbeeman ad zijntaman, laaman ganax diidxli rnieeman. <sup>20</sup>Din por laaman rajc cumplid gra ree xpromejs Dios. Zeel por laaman raguie'ch ree "Am n" chi rad ed ree quixt e loj Dios. <sup>21</sup>Abi' Dios laa-

man cay jn dunuj ree yudar con l jt din yadxu'dxi'ch ree loj ni nayajc ree tijbzi con Cristo, Dios bacaabee dunuj ree din yayajc ree par laaman. <sup>22</sup>Laaman gule dunuj ree par laaman, abi' guxhaal xSprijtaman b n nabajnn ' ree zi'c tijb sen guial yaca' ree ni yaca' ree.

<sup>23</sup>Yan bal gadan ga Corinto zi'c benan xgab, Dios ragbee guial gadan ga guial ad r ntan gadil n l jt, abi' Dios gud ed naj casti bal id wali ni canin. <sup>24</sup>Ad cayguieentan naguiejn yanabeen l jt xhienaag chililadxidi Jesucrist, din dunujn rayagbee guial diidxli za'dxi'chidi loj ni rliadxidi Jesucrist, ni cayguieenan naj guial yaguieenan l jt yudar din chu' luxdoodi nix guibandi.

**2** Zeel benan xgab ad zidganatan l jt yan, chit e chu'naya luxdoodi. <sup>2</sup>Din bal gagu'nayan luxdoodi,  chuza cu' luxdon nix bal ma badxe'nayan luxdoodi l jt ragu' luxdon? <sup>3</sup>Zeel bacan zi'c bacan loj gui'ch ni guxhalan lojdi, din chi guialan ad cu'di luxdon naya luar cu'di luxdon nix. Abi' naj ragbee bal yu' luxdon zagdxegradu' luxdoo zagdxegradu' zian. <sup>4</sup>Chi bacan gui'ch guie d d guyun xgab abi' guyunayan xt ronan bacan diidxnaa ni bacan loj gui'ch guie, per ad bacatan gui'ch guin par gagu'nayan l jt, bacanan par gagbeedi guial r n da'tan l jt.

### **Yu' perdon par b n badxe' falt**

<sup>5</sup>Bal yu' tijbidi ma badxe'naya naj, per ad najtzi guyunaya n gajc l jt guyunaya. Rnin n  l jt chit e gad edlajn guial ganin graczi di guyunaya por zian. <sup>6</sup>Per naj rni lojdi compniar raliduladx ree Jesucrist, ma gojczy yan con casti ni ma bad edidi loj b n guin. <sup>7</sup>Yan gol beenman perdon gol bagu' t e luxdoooman chit e chu'naya luxdoooman xt ad zadxejlt xhie g  nman. <sup>8</sup>Zeel rniaaban lojdi, gol been naguiejn din gagbee-

man guial r ndi laaman zi'cgajc guy ndi laaman guia'xchej. <sup>9</sup>Gui'ch ni guxhalan lojdi gocli, guxhalanan din gagbeen bal ruzoobidi da diidxan guial g  ndi gra ni ganin lojdi. <sup>10</sup>Yan chut ez b n g  ndi perdon, n gajc naj g n laaman perdon. Abi' b n ma benan perdon, bal yu' ni g nan perdon, benan laaman perdon delant loj Cristo por l jt <sup>11</sup>chit e g  n xindxab dunuj ree gan, din dunuj ree rayagbee xhienaag naj xguialrusquiee xindxab.

### **Ad nixt guyu luxdoo Pab guzujman Troas**

<sup>12</sup>Chi bidxinan guiedx Troas par ganen xtiidxza'c Jesucrist, d d gogn  Dios naj par g nan mandad guin ni. <sup>13</sup>Per ad nixt guza'can guial ad bidxaaglojtan dux compniar ree Tito. Zeel basa'nan b n guin ree abi' wan Macedonia.

### **Ragn  Jesucrist dunujn zianczi**

<sup>14</sup>Per quixt e Dios guial por Jesucrist guixie guixie cayagn man dunujn chit e xhie g  n dunujn gan abi' por dunujn cayagbee ree bejn xtiidxza'c Jesucrist, diidxza'c guin ree naj zi'c tijb ni rliaa nejxh ni rire'ch cha' guidibczi. <sup>15</sup>Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree b n rliadx Jesucrist n  loj ree b n ad rliadx. <sup>16</sup>Par ree b n ad rliadx laaman, dunujn nayajc zi'c tijb go'xh ni rug jt, per par ree b n rliadx laaman dunujn nayajc zi'c tijb go'xh ni runee guialnaban. Per,  chu zajc g  n ree ni guin sin xyudar Dios? <sup>17</sup>Dunujn ad cayguieentan negojs con xtiidx Dios zi'c r jn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxaman.

**Nejz c b ni yu' par yadxin ree loj Dios**

**3** Chi ranan zian, ad naladxidi guial dunuj gajcan cayles dux valoran. L jt ragbee guial ad r jnt naguiejn yali  n tijb gui'ch lojdi par gagbeedi chu dunujn o yanaaban gui'ch lojdi ni g  n dunujn yudar par gagbee ree bejn chu nayajcan zi'c r jn ree ben ren. <sup>2</sup> Din l jt gajc naj tijb gui'ch par dunujn, gui'ch ni yu' du luxdoon ni rool ree bejn ni n nbee t   reeman. <sup>3</sup> Zi'c rulu  yaguie'ch ree l jt naj tijb xtiidx Cristo ni bacaan, per ad baaatanan con tint, bacaanan con xSprijt Dios b n naban, tijb ni ad cwat loj tijb guiaj nata', cwan luxdoo ree bejn.

<sup>4</sup> Dunujn raya'p Dios confianz por Jesucrist, <sup>5</sup> abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios. <sup>6</sup> Dios naj b n razaladx dunujn quiarguejn par yagojnan bejn ree xcwent nejz c b ni ma yu' par yadxin ree loj Dios, nejz c b ni ad ryaadxt chinal bejn tijb ley ni z  d loj gui'ch, per r jn naguiejn chinalaman ni z  d por xSprijt Dios. Din ley castizi naj ni zidn n, per xSprijt Dios guialnaban naj ni rud eman loj ree bejn.

<sup>7</sup> Abi' majsi castizi naj ni zidn  ley ni bad  Dios loj Moisejs loj tijb guiaj nata', per d d bidiin bacha' loj Moisejs chi cwa'man ley guin, xt ad gojct nuguiaa ree b n Israel lojman por bacha' guin, bacha' ni ta'ngaj ta'ngaj gunidlojn. <sup>8</sup> Bal chi bi't ley guin gojc zian, yan,  mazri ni za'cdxoon naj guial gucaagdiajg ree bejn xcwent nejz c b ni rulu  xSprijt Dios ni ma rajp bejn con Dios! <sup>9</sup> Din chi bi't ley ni ridn  casti par ree bejn, con bacha' bi'tan, yan,  mazri ni za'cdxoon naj guial guien ree bejn xhienaag gac reeman naya delant loj Dios! <sup>10</sup> Abi' bal ni za'cdxoon gojc chi bi't xley Dios loj guidxliuj guie, yan achetczy lasajc guialza'cdxoon guin par guialza'cdxoon

ni naj por nejz c b ni ma rajp ree bejn con Dios. <sup>11</sup> Abi' bal ni ad r jnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

<sup>12</sup> Abi' guial yu'guijc ree zian, zeel sin guialrdxeb cayl  nan bejn ree. <sup>13</sup> Ad raguieentan zi'c been Moisejs, basiaaw lajd lojman chit   gagbee ree b n Israel guial ziquied guialrulaa bacha' lojman, bacha' ni laa gunit gajc. <sup>14</sup> Per ad lojtzi Moisejs baaaw, ne gajc xquiarguejn ree bejn baaaw. Din xt yandxej chi rool reeman loj xtiidx Dios ni baa Moisejs, achet rignia' reeman, tijbzi por Jesucrist zajc chignia' reeman laan. <sup>15</sup> Per xt yandxej chi rool reeman ni baa Moisejs ad rignia't reeman guial sta nayaaw xquiarguejn reeman. <sup>16</sup> Per b n rililadx Jesucrist, laaman rxhial xquiarguejnman. <sup>17</sup> Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman. <sup>18</sup> Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayajc ree zi'c r nman yayajc ree, abi' guixie guixie cusniman dunuj ree por xSprijtaman.

**4** Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yaguieenan mandad guin. <sup>2</sup> Dunujn achet raquie'chan, achet ni ad r njt sirv cayguieenan, ad caysquieetan bejn ree ad caychaa t  tan xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnejz delant loj Dios. <sup>3</sup> Per bal yu' b n ni ad rignia't xtiidxza'c Jesucrist ni cayneen, ad rignia'taman laan guial ad z taman loj xnejz Dios. <sup>4</sup> Abi' xinxxab rniabee loj guidxliuj guie ma basajyix xquiarguejn reeman, guial ad r nt reeman chililadx reeman, chit   gusni xtiidxza'c Jesucrist laa reeman abi' ad zajct guguiaa reeman xguial-

rniabeeman, laaman guial najman zi'c gajczi Dios. <sup>5</sup>Ad caytie'chtan dux ti-idix gajcan, ni caytie'chan naj xtiidixza'c Jesucrist, bén naj Dad par dunuj ree. Abi' ni ranazan lojdi guial cayguieenan sirv lëjt por guial rayënan Jesucrist. <sup>6</sup>Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiarguiejnan, guxhalaman dux quiarguiejnan din yayignia'n xhienaag naj xguialrniabeeman, guialrniabee raguiaa ree por Jesucrist.

### Yabajn ree por guialrliladx

<sup>7</sup>Gulejman dunujn par yaguieenan ni cayguieenan, majsi nayajczan zi'c guiajs bajn din guiguien guial gra guialrniabee zëed por Dios ad por dunujtan. <sup>8</sup>Majsi graløj guialzi caydüüdan per ad ralenya'tan. Majsi rulüü achetri zajc yaguieenan, per radxejl gajc xhienaag yaguieenan. <sup>9</sup>Majsi xhietëz rüjnnë bejn dunujn, per ad riro'nladxt Dios dunujn. Rguin reeman dunujn per ad runidlojt reeman dunujn. <sup>10</sup>Bantëez guin zio'n nadxu'n loj guialgüjt zi'cgajc guzajc Jesucrist, per zian ralüün guial raya'pan xguialnabanman. <sup>11</sup>Dxel la'tgaj naban, guixie guixie nadxu'n loj guialgüjt guial nayajcan xbejn Jesucrist, per zian ralüün guial raya'pan xguialnabanman, majsi guidxin dxej nit dux cuerpan. <sup>12</sup>Nadxu'n loj guialgüjt guial caytie'chan xtiidix Jesucrist, per por zian ma rajpidi guialnaban delant loj Dios.

<sup>13</sup>Loj xtiidix Dios rëb: "Guial bililadxan, zeel gunen ni gunen." Yan ziangajc guial raliduladxan xtiidix Dios zeel cayneen laan. <sup>14</sup>Din dunujn rayagbee guial Dios, bén basban dux Dad ree Jesucrist loj guialgüjt, ziangajc yasbanman dunuj ree guial ma nayajcan tijbzi con Jesucrist dxel lëjt con dunujn tijbzi chignëman dunuj ree lod zojbaman. <sup>15</sup>Din gra ni cayguieenan

në gra ni cayza'can, cayza'can zian din yaguieenan lëjt yudar din gusnuu gacxhieji ni rliladxidi Jesucrist. Zian ma gac ree bejn mazri zien gudëed reeman quixtëe loj Dios, guza't tëe reeman laaman zagdxë.

<sup>16</sup>Zeel ad ralenya'tan. Din majsi cay-o'xh dux cuerpan por mandad guin, per dux sprijtan guixie guixie caycüb Dios laan. <sup>17</sup>Achetczi lasajc ree guialzi ni caydüüdan loj guidxliuj guie din najn ni rdëd, per por guialzi guin ree rayalan xguialnaza'c Dios, guialnaza'c ni lasajc mazri abi' ad yu't dxej nitan. <sup>18</sup>Din dunuj ree ad cayguieent ree naguiejn yaya'p ree ni raguiaa ree loj guidxliuj guie, cayguieen ree naguiejn din yaya'p ree ni ad raguiaat ree. Din ni raguiaa ree loj guidxliuj guie yu' dxej nit reen, per ni ad raguiaat ree yan ad yu't dxej nit reen.

**5** Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios gunee dunuj ree stijb cuerp, cuerp ni ad gojct por bénguidxliuj zi'c rajc tijb yu, abi' cuerp guin yaya'p ree par tiblayaa. <sup>2</sup>La'tgaj raya'p ree cuerp guie loj guidxliuj ralu' ree guialquia, par dunuj ree xi nix diob guidxin dxej yaya'p ree cuerp ni yaya'p ree xanyabaa. <sup>3</sup>Din ad ganaxtizi Sprijt yayajc ree xanyabaa, nëgajc cuerp yaya'p ree. <sup>4</sup>La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial rayënan yayëjtan, ni rayënan naj guial yaya'pan cuerp cüb ni yaya'pan par tiblayaa din nit dux cuerpan ni rayal nit. <sup>5</sup>Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

<sup>6</sup>Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt nadxu' ree guial lod zojb dux Dad ree Jesucrist.



<sup>7</sup>Per dunuj ree zunaal reeman guial raliduladx ree laaman ad guial raguiaat ree xhienaag gac. <sup>8</sup>Zeel raya'p ree confians guin, abi' ma ray n ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist. <sup>9</sup>Zeel achet g ninan bal loj guidxliuj guie o bal xanyabaa, per ni ray n ree naj guial yaguieen ree zi'c r n Cristo. <sup>10</sup>Din dugra ree rayal yadxin lojman lod g nman guialguxtis din tijbgaj dunuj ree yaca' ni rayal ree, por ni zagdxe o por ni mal ni baguieen ree loj guidxliuj guie.

### **Xhienaag gap bejn nejz par guidxinman loj Dios**

<sup>11</sup>Zeel por respejt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c rayal, balzianclaa n  l jt g nbee dunujn guial dunujn cayguieencan xnejz. <sup>12</sup>Ad caylest dux valoran, ni ray nan naj guial yabaadi guial gagbeedi ni naj diidxli por dunujn, din gac yadxi'di diidx loj ree b n r jn naguiejn yaya'n reeman zagdxe delant loj ree bejn luar g n reeman xgab xhienaag naban reeman delant loj Dios. <sup>13</sup>Yan bal par bejn rajc duguijcan por ni cayguieenan, per cayguieenan laan por Dios. Abi' bal par l jt nad dguieenan zeel cayguieenan mandad guie, cayguieenan laan par yaguieenan l jt yudar. <sup>14</sup>Guial r n Cristo dunujn zeel cayguieenan ni cayguieenan, din dunujn rayagbee guial Cristo g jt par gra bejn abi' gra ree bejn ma naj zi'c beng t par dol. <sup>15</sup>Abi' Jesucrist g jtaman por gra bejn din b n chililadx ree laaman ad zabajntri reeman zi'tctzi r n reeman, ma guiban reeman zi'c r nman, laaman guial g jtaman por laa reeman abi' babanman stijb. <sup>16</sup>Zeel bal guia'xchej baguieen ree xgab guial naj Cristo tijbzi b nguidxliuj, per ad najtri dux xgab ree zian por laaman. Abi' ad rayidxga'tri ree guial chu naj

bejn, <sup>17</sup>din chut  z b n ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

<sup>18</sup>Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman. <sup>19</sup>Din tijbzi naj Dios con Jesucrist abi' por Jesucrist r jn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree. <sup>20</sup>Zeel dunujn nayajc b n canee por Cristo, cayd edan xtiidx Dios din gagbee ree bejn xhie rniab Dios g n reeman. Abi' por Jesucrist ranaaban lojdi: Gol guzuj zagdxe con Dios. <sup>21</sup>Din Jesucrist achetctzi dol beenman, per por dux tol ree baslaa Dios g jtaman zi'c tijb b ndol din por laaman, cuguaa Dios dunuj ree zi'c tijb b n ni ad way jnt dol.

**6** Zeel zi'c cayguieenan xmandad Dios, dunujn ranaab lojdi: Ad g nbee xli'a'di guial r n Dios l jt. <sup>2</sup>Din loj xtiidxaman r b:

Chi bidxin dxej guidxga'n l j,  
bidxga'n l j  
abi' chi bidxin dxej gapil perdon  
dxel beenan l j yudar.

Abi' dunujn rana lojdi guial ma bidxin dxej guin par l jt, ma bidxin dxej guidxga' Dios l jt n  dxej g nman l jt perdon.

<sup>3</sup>Dunujn ad cayguieentan tijb ni g n guial ad zaliladxtri ree bejn Jesucrist, ad cayguieentan tijb ni gui b ree bejn guial ad cayguieentan zi'c bal n bejn ree. <sup>4</sup>Par gra cayl n bejn ree guial dunujn nayajc b n cay jn sirv Dios caydaan t en xhiet  z ni raza'can, zi'c guialzi, tarbajw, ni naya, <sup>5</sup>n  guial naa ni r jn ree bejn dunujn. N  guial rgu' reeman dunujn ladxguiib, rgu' t e reeman

dunujn loj wadijl, ni radxagan guial tant zien ni raguieenan, ni ral en bacaal, ne guialrliaan ni radi udan. <sup>6</sup> Cayl u t en bejn ree chu nayajcan guial nabajnan zi'c rayal, guial rayagbeen conin naj diidxli, guial raya'pan pacens nayajc t en benza'c con ree bejn, guial nabajnan con xSprijt Dios, guial diidxli ray enan ben ren ree, <sup>7</sup> guial ranen ni naj diidxli, guial cayiyn Dios dunujn yudar, n  guial rad en consejw loj ree bejn o radxi'n xtiidx ree bejn con xtiidx Dios. <sup>8</sup> Yu' dxej rajp ree bejn dunujn respejt, yu' t e dxej rnieeguijdx reeman dunujn. Yu' dxej rniee reeman diidxa'c ree por dunujn, yu' t e dxej rniee reeman dunujn diidxguijdx. R ijnn  reeman dunujn zi'c b n rusquiee majsi diidxli naj ni raneen. <sup>9</sup> Yu' dxej r jn reeman zi'c b n ad n nbeet dunujn, majsi n nbee reeman dunujn. Majsi rul u ma yay jtan per ad ray jttan, abi' majsi xhiet ez r jnn  reeman dunujn per ad rugi jtt reeman dunujn. <sup>10</sup> Majsi yu' naya du luxdoon, per raguieenan naguiejn din guiguien guial yu' du luxdoon nix. Majsi b nprob dunujn per por dunujn zien ree b n ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadxan.

<sup>11</sup> B n Corinto, dunujn ma ranan gra por dunujn, achet ni naguie'ch par dunujn guial diidxli ray enan l jt. <sup>12</sup> Dunujn ad rlioxr ray enan l jt, l jt bal id r nriddi dunujn. <sup>13</sup> Per naj rniene' l jt zi'c rnieene' tijb dad gra xi'nman: Gol guy en dunujn zi'c ray enan l jt.

### **Nayajc ree zi'c xyadoo Dios naban**

<sup>14</sup> Gol gojp cudad xhie ree compromis gi undi con ree b n ad riladxt Dios, din garen naj xixgab ree b n ma zinal ree xnejz Dios guial loj xixgab ree b n contzi naban. Garen naj xixgab ree b n ridxga' xtiidx Dios guial loj xixgab ree b n

ad ridxga't laan. <sup>15</sup> L jt ragbee guial ad zajct gac Cristo tijbzi con xindxab, ziangajc garen naj b n riladx Cristo guial loj b n ad riladxt laaman. <sup>16</sup> Garen naj ree b n riladx dux Dad ree Dios guial loj ree b n riladx ni naladx reeman naj dios. Din dunuj ree guial raliduladx ree Dios naban, dunuj ree nayajc xyadoodan zi'c r b tiblajt loj xtiidxaman lod r b:

Naj gabajnn ' laa reeman gazu t en con laa reeman

bant ez guin che reeman.

Naj gac xDios reeman

abi' laa reeman gac da bejnan.

<sup>17</sup> R b t e loj xtiidx Dios:

Gol barii loj ree ben mal, gol been tiblajd.

Ad gi undi ni dxuudx din yaca'n l jt,

<sup>18</sup> abi' naj gac tijb Dad par l jt

gui ad l jt gaquidi da xi'ngaanan n  daxi'ndxa'pan.

Zian r b dux Dad ree Dios b n ca' gra guialrniabee.

**7** Ni guin ree naj ree promejs ni ma been Dios con dunuj ree nayajc ree b n riladx ree Jesucrist. Zeel rayal yaguieen ree naguiejn yabajn ree naya. Yasa'n ree tiblajd dol, xgab mal, n  gra ree ni dxuudx. Abi' guixie guixie yaguieen ree naguiejn yabajn ree zi'c r n Dios por respejt ni raya'p reeman.

### **Rabaa Pab guial bayiyn ree b n Corinto xgab por xtol reeman**

<sup>2</sup> Gol gojc benza'c con dunujn! Dunujn achet waguieenan l jt, achet ni mal waguieenan l jt ad wasquiee t etan l jt. <sup>3</sup> Ad naladxidi caneguijdxan l jt, din zi'c ma rmin lojdi diidz guial'xchej guial dunujn ray enan l jt, abi' majsi yay jtan o majsi yabajnan per tijbzi nayajcan con l jt. <sup>4</sup> D d ra'pan l jt confianz abi' d d rabaan 'n l jt. Majsi xhiet ez guialzi cayd udan, per zi'c rgu'di du luxdoon nix zeel d d rabaan, majsi xhiet ez cayza'can

<sup>5</sup>Din diizd chi badxinan niz Macedonia achetczi guial yaziiduladxan por gra ni cayza'can, zi'c ni rüjnnë ree bejn dunujn në guialnadxeb ni caydüüdan. <sup>6</sup>Per Dios bén ragu' luxdoo ree bén yu'naya luxdoo, laaman bagu' du luxdoon chi bi't Tito guie. <sup>7</sup>Abi' ad guialzi bi't-taman bayu du luxdoon nix, në guial bagu'di luxdooman zeel bayu du luxdoon. Naman du lojn guial dád rëndi gugiaaadi naj, yu' tēēdi xgab yu'naya tēēdi por naj. Laan naj ni rabaanë'n guial yu'quidi xgab por naj.

<sup>8</sup>Majsi naya guyu luxdoodi por gui'ch ni guxhalan lojdi, per achet naladxan. Majsi dád naya guyu luxdon chi guxhalanan guial ragbeen zunayadi tiblädëd, <sup>9</sup>per yan nix yu' luxdon, ad guial guyu nayatidi, yu' luxdoon nix din por guial-guyunaya guin ma bayüjndi xgab zēdi loj xnejz Dios. Guyunayadi abi' gudaandi zi'c rën Dios, abi' achet ni mal baguieenan lëjt. <sup>10</sup>Din chi runaya luxdoo bejn zi'c rën Dios, guialrunaya guin rüjn yudar persi rayüjn bejn xgab por xtolaman, zian rarii bejn loj casti, abi' ad yu't dxej yayüjn bejn xgab guial gulaaman loj casti guin. Per guial runaya luxdoo bejn abi' ad rüjntaman naguiejn chu'man loj xnejz Dios, dxel ad zajct gapaman guialnaban delant loj Dios. <sup>11</sup>Per lëjt gol baguiaa zi'c ma been yudar guial guyunayadi abi' gudaandi zi'c rën Dios. Por guial guyunayadi nayob beendi naguiejn bazuxnejzidi ni ma rnin cayüjn tijb lëjt, abi' balendi bidxeb tēēdi por ni cayüjnx. Dxel ma rënejzdoodi gazun con lëjt, badëë tēēdi laax casti zi'c rayal. Por gra ni beendi zian biguien guial achet dol rajpidi por zian. <sup>12</sup>Gui'ch ni guxhalan lojdi, ad guxhaltanan guialzi rünan xgab por bén cayüjn dol guin o guial rünan xgab por bén cazagdiaj por xtol bén guin. Guxhalan gui'ch guin lojdi din gulüüdi loj Dios guial yu'guijc-

quidi dunujn. <sup>13</sup>Laan naj ni rabaanë'n guial beenquidi zian.

Abi' yan mazri rabaan guial raguiaan Tito yu' luxdooman zagdxë baguiaadaman guial dád naza'c gojquidi con laaman. <sup>14</sup>Zeel ad basa'nxtutidi naj por gra zi'c bazatan lëjt lojman. Din gra ni rën por lëjt naj diidxli zi'c ragbeedi guial dunujn ganax diidxli raneen, abi' tēë diidxli naj ni raguie'chan loj Tito por lëjt. <sup>15</sup>Yan dad rusaaladxaman lëjt guial rusaaladxaman xhienaag bazoobidi xtiidxaman në gra respejt ni gopidi laaman chi guzuman con lëjt. <sup>16</sup>Dád nix yu' luxdon guial ra'pan lëjt confianz par gra.

### Guial rudëēd gon con guidib luxdoo

**8** Yan compniar raliduladx ree Jesucrist, rayënan gagbeedi xhienaag cayagnë Dios bén rililadx ree Jesucrist niz Macedonia. <sup>2</sup>Majsi xhietëez cazajc reeman, per ad rucwëēzt rguien guial dád rabaa reeman. Majsi dád bënprob reen, per dad rabaa reeman rudëēd reeman cintabl par gagnë reeman bejn ree. <sup>3</sup>Naj ragbee guial diidxli been reeman yudar bejn ree xt lod baneetzan laa reeman. Laa reeman been yudar mazri guial loj ni baguieenan xgab, sin guial chu güün laa reeman naguiejn. <sup>4</sup>Dád been reeman naguiejn du lojn din yatiëjban guial në laa reeman güün yudar bén rililadx ree Jesucrist, <sup>5</sup>abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rën reeman güün reeman zi'c rën Dios. <sup>6</sup>Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lëjt. <sup>7</sup>Dunujn rayagbee guial par gra zagdxë zēdi: Diidxli rililadxidi Jesucrist, ragbeedi xcwentaman, achet ryaadxidi

par guinieedi xtiidxaman, za'sindi par g iindi laaman sirv r n t edi dunujn, yan gol been naguiejn din guiguien guial najdi benza'c par g iindi yudar con ni ranan lojdi. <sup>8</sup>Ad r ntan l jt naguiejn guial gud edi ni rdo'p, per rugojnan l jt zi'c rabaa ree ben ren guial r jn reeman yudar, din bal r ndi guli di guial diidxli r ndi xcompniaridi. <sup>9</sup>Din l jt ragbee zi'c naza'c Dad Jesucrist, b n basa'n gra guialnaza'c xanyabaa, abi' bi'taman loj guidxliuj zi'c tijb b n ni achet rajp din por laaman yayal n  l jt xguialnaza'c Dios.

<sup>10</sup>Zeel rnin lojdi guial zagdxen gu-looxidi ni guzulojdi gudibijz. Yaloz l jt been xgabza'c guial g iindi yudar, abi' laa guzuloz gajquidi. <sup>11</sup>Yan zi'cgajc yu' luxdoodi nix guzulojdi, ziangajc gol babaa gusnuudi gud edi ni rdo'p zi'ctzi galguzujdi. <sup>12</sup>Din chi diidxli r n bejn g inman yudar, xhiet ez naag zajc g inman yudar. Ad rayalt gud edaman xt ni ad rajptaman.

<sup>13</sup>Ad canitan lojdi guial t didi tar-bajw cwe'quidi xt ni ad rajptidi par g iindi yudar b n ryaadx ree xhienin chit e xhie guiyaadx reeman, ni ray nan naj guial tibloj yaguieen dulasa' ree yudar. <sup>14</sup>Yan l jt zajc g iindi yudar b n ryaadx ree xhienin, dxel despuejs g in reeman l jt yudar con ni ryaadxidi. Zian tibloj yaguieen du lasa' ree yudar. <sup>15</sup>Loj xtiidx Dios r b: "B n bato'p zro' achet been sobr, abi' b n bato'p ta'nzi achet biaadxaman."

### Tito con ree xcompniaraman

<sup>16</sup>Quixt  Dios bad eman loj Tito lasa'gajc xgab r nan por l jt. <sup>17</sup>Yan chi raguie'chan lojman guidganajman l jt, laa cw b gajcaman guial ma r nman guguaaman l jt, ad beent naguiejn chu niniabee ni'taman.

<sup>18</sup>Abi' con laaman cayxhaalan stijb dux compniaran b n ma n nbee ree

dux compniar ree b n rliadx ree Jesucrist guidibczi, guial rul man bejn ree xtiidxza'c Dios zagdx. <sup>19</sup>Ma bacaabee t e ree dux compniar raliduladx ree Jesucrist laaman din saman con dunujn din g inman dunujn yudar yune'n ni cado'p. Abi' yudar guin cado'pan din guiguien guial ray nan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdx. <sup>20</sup>Zeel cwabee b n guie din saman con dunujn chit e xhie gucaquia reeman dunujn por gra yudar ni cado'p ni naca'n par yuga'snan. <sup>21</sup>Din dunujn ray nan yaguieenan gra zi'c rayal, ad naabtizi loj Dad Jesucrist, n  loj ree bejn.

<sup>22</sup>Yan cayxhaalan Tito con b n guin cayxhaaln n laa reeman stijb dux compniaran b n ma balu'been zien volt guial diidxli r nman g inman yudar, abi' mazri yan guial d d rajpaman l jt confians. <sup>23</sup>Bal chu guiniabdiidx por Tito, gol g jdx guial da compniaran najman, laaman cay jn naj yudar par g nan l jt yudar chinalidi xnejz Dios. Gui ad za' tio'p dux compniaran b n z  ree con laaman, dux compniar ree b n rliadx ree Jesucrist guxhaal laa reeman, abi' ruza't reeman Jesucrist zagdx. <sup>24</sup>Yan gol bal u loj reeman guial diidxli r ndi bejn ree, din por laa reeman gagbee ree los demazri ree compniar rliadx Jesucrist xcwentidi, din guguaia t e reeman guial ni diidxli naj ni ma r n loj reeman xcwentidi.

### Yudar par ree xbejn Jesucrist.

**9** Yan por yudar ni rayal yale'can par yaguieenan yudar dux compniar ree b n rliadx ree Jesucrist, ad ryaadxt ganin mazri xcwentan, <sup>2</sup>din naj ragbee guial ruladxidi g iindi yudar. Abi' xt nix yu' luxdon r n loj ree b n Macedonia guial l jt b n Acaya diizd gudibijz cay jndi naguiejn cay jndi yudar, abi' gra ree b n Macedonia been naguiejn

g iun yudar chi biguiejn reeman zian. <sup>3</sup>Zeel caxhalan Tito con za tio'p ree dux compniar ree din guiguien guial waliqui ni ma gunen por l jt xcwent yudar guin, din g iundi naguiejn g iundi yudar zi'c ma r n por l jt. <sup>4</sup>Din bal guidn n tio'p choon ree b n Macedonia ad yadxaaglojn l jt ad za'tidi porvinid, abi' natun par naj chit  ganin natun par l jt por confianz ni ra'pan l jt. <sup>5</sup>Zeel benan xgab r n loj Tito con za tio'p dux compniar ree guial mejorli ned gaj reeman guidganaj reeman l jt, din g iun t e reeman yudar guloox guto'p reeman yudar ni ma nadi din ma najn purvinid chi guialan. Zian guiguien guial diidxli r ndi yazaladxidi ad gualzi canabeetan l jt.

<sup>6</sup>Naj rni lojdi b n rx bin ta'n, ta'n gajc raca'man, gui ad b n rx bin zro', zro' gajc raca'man. <sup>7</sup>Tijbgaj l jt gol bad e zi'c naj xixgabidi gud edi, ad mal gant ad naguiejn t et, din Dios r nman b n razaladx guidib luxdoo. <sup>8</sup>Abi' Dios rajpaman gra gualrniabee par g unman l jt yudar gapidi gra ni ryaadxidi chit e xhie guiyaadxidi din g iundi yudar zi'c rayal. <sup>9</sup>Loj xtiidx Dios r b:

B n ni rgui's ni rajpaman abi' rud eman laan loj ree b nprob, ad yu't dxej yayanladx reeman ni zagdx ni r jnman.

<sup>10</sup>Yan Dios b n razaladx bin rx bin bejn, b n razaladx gualraw par ree bejn, laaman gul i l jt xhie g iundi din gapidi gra ni rayal gapidi, din gac g iundi yudar mazri b n ryaadx ree xhienin. <sup>11</sup>Zian mazri naj ni guneel Dios lojdi din gusnuu g iundi yudar yazaladxidi. Abi' por yudar ni guixhiaaln di dunujn par ree compniar riladx ree Jesucrist, laa reeman gud ed quixt e loj Dios. <sup>12</sup>Abi' yudar guin ad z jntan sirv naabzi par loj ni ryaadx reeman laan, g unan sirv n  par gud ed reeman mazri quixt e loj Dios. <sup>13</sup>Por yudar guin gagbee reeman guial cuzoobquidi xtiidxza'c Jesu-

crist zi'c riladxidi laan abi' guza't reeman Dios zagdx por zian, n  guial najdi benza'c rgui'sidi ni rajpidi par laa reeman n  par gra ree b n ryaadx laan. <sup>14</sup>Abi' z n reeman l jt, cwedx t e reeman Dios por l jt por xgab za'c ni banee Dios lojdi guial g iundi yudar. <sup>15</sup>Quixt e Dios por ni ma bazaladxaman duloj ree por xi'nman, xt ni'quid radxejlt xhie yaguie'ch ree por zian!

### Gualrniabee ni rajp Pab guial najman xi ap stol Jesucrist

**10** Naj Pab, yu' ree b n na guial benza'c naj chi za'n con l jt, abi' chi za'n zijt sin guial rdxeb rdiil n l jt. Per zi'cgajc ninieen  Cristo l jt con respejt n  con diidxza'c, rniabab lojdi guial <sup>2</sup>xi nix chi guialan guidganaj l jt ad r jnt naguiejn gadil n b n r b ree por da xgabzan cay nan ni cay nan, din ad rdxebtan ganen n laa reeman. <sup>3</sup>Walican nayajcan b nguidxliuj, per ad raguieentan naguiejn yaguieenan gan por dux xgabzan zi'c r jn ree b n ad zinalt xnejz Dios. <sup>4</sup>Ad raguieentan naguiejn yaguieenan bejn ree gan por dux xgabzan, dunujn raguieenan gan por xgualrniabee Dios, gualrniabee ni zajc guse'n xhiet ez ni mal. <sup>5</sup>Por gualrniabee guin baguieenan gan loj ni rudxiib ree bejn duguijcan, abi' baguieen t en gan loj guial nadxal reeman ni rudxoon g unbee reeman Dios. Zianan rase'nan xhiet ez xgab din chile' gucaagdijg reeman xtiidx Jesucrist. <sup>6</sup>Abi' l jt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree b n ad wazoobt diidx zagdx.

<sup>7</sup>L jt mazri ridxga'di zi'c ruguiaadi bejn. Bal yu' b n r jn xgab guial diidxli najman xbejn Cristo, rayal cu'guijcaman guial nayajc ree xbejn Cristo zi'cgajc laaman. <sup>8</sup>Abi' majsi ganin lojdi mazri xcwent gualrniabee ni banee Dios lon, ad ratutan din laaman banee

guialrniabee par g nan l jt yudar chignia'di mazri xcwent xnejzaman ad par gunijttan l jt. <sup>9</sup>Ad naladxidi guial r nzan gucheban l jt con ree da gui'chan. <sup>10</sup>Din yu' ree b n ni r b guial diidx naa abi' sin guialrdxeb rnien n l jt loj ree da gui'chan, abi' chi za'n con l jt ni'quid ruli t lasajcan par l jt, ni'quid radxat loj ree bejn ni rnien. <sup>11</sup>Per naj rnin lojdi guial b n r b ree zian rayal gagbee reeman guial zi'cgajc raneen n l jt loj dux gui'chan chi nadxu'n zijt, ziangajc zajc yaguieenan chi nadxu'n con l jt.

<sup>12</sup>Din dunujn ad raguieentan zi'c r jn ree b n rlies xvalor gajc, per ni'czi ta'n ad raguieentan xgab yaguieenan zian. Din nitontzi r jn reeman chi rlies xvalor gajc reeman, ruguiaa laagajc reeman xhienaag naj reeman par ree stijb xcompniar reeman. <sup>13</sup>Per dunujn ad ralest dux valor gajcan mazri guial loj ni rayal, din dunujn ranazan ni naj didixli zi'c gulej Dios dunujn yaguieenan, yan ma cw jbaman badxinan ladxidi. <sup>14</sup>Zeel ad g iindi xgab guial cad dt  caynabeen l jt, din yaloj dunujn bio'p ladxidi par yasiidan l jt xtiidxza'c Jesucrist. <sup>15</sup>Dunujn ad ralest dux valor gajcan por tijb ni been stijb bejn. Per ral  zan guial ni's xguialrliladxidi, din yasnuu yaguieenan l jt yudar gusnuu g iunbeedi ni rayal gagbeedi xhienaag rayal yaguieen ree. <sup>16</sup>Zian ma zile' yo'n mazri delant ladxidi par yatie'chan xtiidxza'c Jesucrist, per lod achut wazuloj chit   yales dux valor gajcan con ni ma been ben ren.

<sup>17</sup>Bal yu' b n r n guilies xvalor gajc, mejorli guiliesaman xvalor dux Dad ree Dios. <sup>18</sup>Din ad b n rliest xvalor gajc naj b n raya'n zagdxe loj Dios, b n raya'n zagdxe naj b n rlies xvalor Dios.

### Pab con ree ap stoles b n rusquiee ree

**11** Yan,  xi nix taandi naj con tio'p choon ree da xgab tontan! Per naj rni lojdi gol gudaan naj. <sup>2</sup>Naj r nan l jt zi'cgajc r n Dios l jt. Zi'cgajc tijb dad rajp xi'ndxa'p biin ni ma naj guxhlaa din chile' guidxinm naya loj xin tia' laam, zian r nan guidxin n l jt loj Cristo naya sin dol. <sup>3</sup>Per rdxeban chu' b n gusquiee l jt zi'c basquiee b  l Eva, abi' ad z jntridi xgab guidib luxdoodi xcwent Jesucrist. <sup>4</sup>Din chi ri't ben ren r man diidx lojdi xcwent Cristo, per garen guial zi'c ma bal iun l jt, o chi ri't b n ren r man diidx lojdi xcwent Sprijt, per ad lasa't xSprijt Dios b n ma nabann di, o chi ri't ben ren lojdi naman xhienaag din gapidi perdon, per garen guial loj ni ma ranan lojdi, l jt laa ridxga' gajquidi laa reeman. <sup>5</sup>Per naj ruli u achet ryaadxan delant loj ree b n r b laa reeman naj quijb xi ap stoles Jes s. <sup>6</sup>Din majsi achet sirv naj par ganen, per ad ryaadxtan guialrignia' abi' l jt ragbee guial diidxlin por gra ni ma baguiaadi baguieenan.

<sup>7</sup>Per,  chuj ni ni malan benan ya guial ad bentan benro' lojdi persi benan gan gojquidi xbejn Cristo, n  guial ad baquijxtan l jt chi basidan l jt xtiidx Dios? <sup>8</sup>Ben renli ree b n naj ree xbejn Cristo cwa'n xmilia reeman persi beenan naj yudar la'tgaj guzun con l jt persi basidan l jt xtiidx Dios. <sup>9</sup>Abi' chi guzun con l jt, chi biaadxan xhienin ad gunaabatan lojdi g iindi naj yudar, b n Macedonia ree b n rililadx ree Jesucrist laa reeman bidn  ni biaadxan nadxel. Ad goct wanin lojdi guneedi xhienin par naj, ad yu' t  t dxej ganin guial r jn naguiejn g iindi naj yudar. <sup>10</sup>Zi'c najn xbejn Cristo rnin lojdi ni naj diidxli, guial niz Acaya Achutczi zajc gudxoon guial chu' luxdon zagdxe guial gui n ni

benan con l jt. <sup>11</sup> Abi'  chexc zeel benan zian con l jt?  Guial ad r ntan l jt ya? Per Dios ragbee guial d d r nan l jt.

<sup>12</sup> Abi' gusnuu g nan zi'c cay nan xt yandxej guial ad zanaabtczan lojdi gi ndi naj yudar, din chit   xhie guinee ree b n ruladx guilies xvalor gajc guial naj reeman xbejn Jes s guial zi'cgajc cayguieenan cayi jn reeman. <sup>13</sup> Din laa reeman r bzi reeman guial naj reeman xi ap stoles Jes s, rusquieezi reeman bejn ree r jnzi reeman zi'c ruli  naj reeman xi ap stoles Jes s. <sup>14</sup> Per xt ni'quid radxat loj bejn por zian, din xt xindxab zile' guli loj loj bejn zi'c tijb xianjl Dios. <sup>15</sup> Dxel xt ni'quid radxat loj bejn guial b n ni cayi jn ree xmandad xindxab r b reeman guial laa reeman cayi jn xmandad Dios. Per laa reeman zayal reeman casti ni rayal reeman por ni cayi jn reeman.

### **Tarbajw ni gud d Pab guial najman xi ap stol Jesucrist**

<sup>16</sup> Yan canin l jt stijb: Ad naladxidi guial ad nad dguientan, per bal r jnndi xgab zian gol basa'n za naj ganen zi'c tijb b n ad nad dguient din n gajc naj gales da valoran majsi tibda'nzi. <sup>17</sup> Ad nat Dios guial gales da valoran zi'c cay nan, per gales da valoran zi'c tijb b n ad nad dguient. <sup>18</sup> Zi'c yu' zien ree b n rlies xvalor gajc por ni r jn reeman loj guidxliuj guie, yan ziangajc naj gales da valor gajcan. <sup>19</sup> Din guial najdi b n rignia' ad naw  gt naj taandi b n ad nad dguient ree. <sup>20</sup> Rdaandi b n rniabee ree l jt r jn reeman zi'ctzi r n reeman, rdaandi b n rtia' ree ni rajpidi, b n rusquiee ree l jt, o rniee reeman lojdi ganax ree diidx nab  abi' xt rti jbidi r  z reeman ro'di. <sup>21</sup> Majsi natu'n par naj, per naj rni lojdi guial ad baya'ptan valor guial naguieenn n l jt zian.

Per bal rlies xvalor reeman por xhiedxitzinin, n gajc naj zajc gales da valoran.

Canen lojdi zi'c tijb b n ad nad dguient, din ad xnejztan. <sup>22</sup> Per bal na reeman guial naj reeman b n Hebreo, n gajc naj naj b n Hebreo. Bal na reeman guial naj reeman b n Israel, ziangajc naj b n Israel gajc naj. Bal na reeman guial loj xdiaa Abraham z  d reeman, n gajc naj zial loj xdiaa Abraham. <sup>23</sup> Abi' bal na reeman guial xmandad Cristo cayi jn reeman, naj mazri cay nan xmandadaman. Majsi zi'c rniee b n ad nad dguient rnieen chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma guyun ladxguiib guial loj reeman, mazri ma gudijn ree bejn naj guial loj reeman abi' mazri zien volt ma guzun loj guialgijt. <sup>24</sup> Gaay volt ma gudijn ree b n Israel naj, abi' beegaj gudijn reeman naj zi'ctiubitap volt rugaz reeman duu ladan. <sup>25</sup> Choon volt gudijn reeman naj con yag, abi' tib volt bacaaguiaj reeman naj. Choon volt ma wej barcw lod za'n xan nijsdoo, abi' tibdxej tibguiaal baya'nan loj nijsdoo. <sup>26</sup> Guidibczi lod ma wan, gud  dan loj ree ni nadxeb chi gud  dan loj ree guiiw, loj ree b ngubaan, loj ree b n ladxan b n Israel ree n  loj ree b n ad najt b n Israel. Ma gud  d t  n loj ree ni nadxeb luguiedx ree, dajn ree, loj nijsdoo, n  loj ree b n rusquiee na reeman guial naj reeman xbejn Cristo. <sup>27</sup> D d ma guzaagdiajn. D d zien volt ma gul n baaal, ma gulaanan, ma we'can nijs, abi' ma guyu dxej ni achetczi gudawan. Ma gognajlan, ma biaadx t   da xaban.

<sup>28</sup> Abi' ad laatzanan ma guza'can, zien ree ni ma guza'can. Abi' guixie guixie r nan xgab por ree xbejn Cristo b n zojbej ree niz lod ma wan. <sup>29</sup> Bal xhie cazajc tijb ree b n rliladx Jesucrist, cay nan xgab por laaman. Abi' bal cusquiee reeman tijb ree b n rliladx Jesucrist par gi nman dol, d d ralenan yu' t  n laaman xgab. <sup>30</sup> Bal r jn naguiejn gales da valor gajcan, tijbzi ni ganin por naj,

naj por gualrzagdiaj ni ma gudëëdan. <sup>31</sup>Abi' Dios xDad Dad Jesucrist, laaman bèn rayal respejt guidib tiamp, laaman ragbee guial diidxli naj ni canen. <sup>32</sup>Tiamp chi canabee rey Aretas, wan luguedx Damasco dxel gunabee gobernador luguedx guin biaaw nejz par guiniaaz reeman naj. <sup>33</sup>Per guyu ree bèn ni badxe' naj lèn tijb dxüm abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

### Ni balüüloj lon

**12** Achet rüjn bejn gan guial guilies xvalor gajcaman, per rayal ganin lojdi por ree ni balüüloj lon në ree ni balüü Dad Jesucrist naj. <sup>2</sup>Naj nünbee tijb xinguaaw rliladx Jesucrist, ma gojc chidaj ijz wejx xanyabaa lod zojb Dios. Ad ragbeetan bal binë xcuerpix o xsprijtzix wej, ad ragbeetan, tijbzi Dios ragbee. <sup>3</sup>Bal binë xcuerpix o xsprijtzix wej, ad ragbeetan, tijbzi Dios ragbee. Per naj ragbee <sup>4</sup>guial wejx lod zojb Dios, lod biguejnx diidx ni xt ni'quid radxejlt xhienaag ninieex laan guial ad rayalt gagbee gra bejn laan. <sup>5</sup>Bén zii zajc galesan xvalor, per ad rliestan da valor gajcan, ni rnizan por naj por ree gualrzagdiaj ni ma gudëëdan. <sup>6</sup>Abi' majsi gales da valoran, ad cayüntan zi'c tijb bèn ad nadëdguient din ganax ni diidxli naj ni ganin. Per ad rüntan zian chitëë yadxaloj bejn naj mazri guial loj ni rayal por ni ruguiaa reeman rünan, o por ni rigujejn reeman rnien.

<sup>7</sup>Në par chitëë gales da valoran zro' por gra ni ma balüü Dios naj, cadëëdan tijb guialzi ni naj zi'cgajc zi'c chi yu' tijb guiëjch tiblajt bejn. Laan naj xchiin xindxab par güünnaax naj chitëë gales da valoran. <sup>8</sup>Choon volt ma canaan loj Dios din chiquiedaman guialzi ni cadëëdan, <sup>9</sup>per laaman na lon: "Zi'c rënan lüj achet gac, din mazri rguien da

gualrniabeen chi cazagdiaj bejn." Zeel rabaan por ree gualrzagdiaj ni cadëëdan din guiguien guial nabanen con xgualrniabee Cristo. <sup>10</sup>Rabaan por xhi-etëëz gualrzagdiaj ni cadëëdan, o në chi rnieeguidx bejn naj, o chi ryaadxan xhienin, o chi xhie rüjn bejn naj, në gra ree tarbajw ni cadëëdan, guial cadëëdan laan guial rënan Cristo. Din chi cazaagdajndxel mazri ra'pan xyudar Cristo.

### Yu' Pab xgab por ree bèn rliladx Cristo luguedx Corinto

<sup>11</sup>Gunenë'n lëjt por naj gajc zi'c tijb bèn ad nadëdguient, per lëjt rajp dol guial benan zian. Din lëjt naj bèn rayal guilies da valoran delant loj ree bèn ni rëb guial laa reeman naj quijb xi apóstoles Jesucrist. Din majsi tijbzi bèn ad rüjnt sirv naj, per achet ryaadxan delant loj reeman. <sup>12</sup>Chi guzun con lëjt ad balenya'tan guial gūnan milagr ree në gra los demazri ree ni badxalojdi ni benan në graloj ree ni benan ni been sirv zi'c sen guial diidxli najn xi apóstol Jesucrist. <sup>13</sup>Gra zi'c ma benan con gra ree compniar rliladx Jesucrist lod ma wan, ma benan laan con lëjt. Tijbzi ni ad bentan con lëjt naj guial ad rnitán lojdi guial güündi naj yudar con gra ni ryaadxan la'tgaj guzun con lëjt, per bal guneguidxan lëjt por zian ¡Gol been naj perdon!

<sup>14</sup>Yan ma cayūnan xgab guidganan lëjt stijb, laan naj ni yayon volt guidganan lëjt. Abi' ni'qui yan ad zanitan lojdi guial güündi naj yudar, ad ni rajptidi rënan, lëjt naj bèn rënan. Din ad xi'nt bejn rguuil xhienaag guibanman, dad guin ree rguuil xhienaag guiban ree xi'n reeman. <sup>15</sup>Abi' majsi gra ni ra'pan gūnan gaxt, o majsi yadib da cuerpan par gūnan lëjt yudar, per achet güünan. Majsi rulüü chi mazri rënan lëjt, ta'nzi rëndi naj.

<sup>16</sup>Walican guial ad gunaabtán lojdi niagnëdi naj nuneedi xhienin, per yu' ree



b n r b guial benan zian din nasinan par gusquien l jt. <sup>17</sup>  Wen basquieen l jt ya chi guxhalan b n bidganaj ree l jt? <sup>18</sup> N  chi r n loj Tito guial gui'taman guidganajman l jt abi' guxhalan laaman con stijb dux compniar ree b n rililadx Jesucrist,  wen yu' ni basquiee Tito lojdi ya?  Nid zi'c laaman zi'c naj tiblojzi naj xgab raguieenan ya abi' zi'cgajc r nan r jnman?

<sup>19</sup> Por gra ni ma ranan lojdi, ad naladxidi guial caylaj dunuj gajcan, din achet waguieenan l jt. Dios gagbee guial zi'c nayajcan xbejn Cristo cayneen n l jt, abi' gra ni caynan lojdi najn par yaguieenan l jt yudar chinalidi xnejz Dios guial ray nan l jt. <sup>20</sup> Din rdxeban guial chi guialan guidganan l jt ad zadxaaglojtan l jt zi'c r nan, abi' l jt ad zuguaatidi naj zi'c r ndi guguaadi naj. Rdxeban gadxaaglojn l jt con wadijl, guialnad dloj, guialrdxe'ch, guialrlies xvalor gajc, guialrniee guijdx lasa', guial ruza't bejn, guial r jn benro' n  guial ad nadxagtri lasa'di. <sup>21</sup> Rdxeb t en guial chi guidganan l jt stijb abi' yaya'nxtun por l jt delant loj Dios. Abi' d d chu' naya luxdon por zien ree lasa'di b n ad rb zt ree r jn dol, b n ad ray jnt ree xgab zi'c naban reeman. Ad rucw  zt rzun  reeman b n ad najt lacheel reeman, ad rucw  z t et reeman vijs ni rajp reeman o stijb ree ni ad r jnt sirv ni r jn reeman.

### Diidx bigra bacaa Pab loj gui'ch guie

**13** Yan ni yayon volt guidganan l jt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguieen guial diidxli naj ni canadi. <sup>2</sup> Abi' zi'c r n loj ree b n ni cay jn dol chi bialan bidganan l jt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganan l jt stijb, achetctzi ni t d zezi par ree b n ni cay jn dol. <sup>3</sup> Zian gagbeedi ni r ndi gagbeedi

guial Jesucrist cunee diidx ni rayal ganin lojdi. Abi' Jesucrist achet ryaadxaman par g  nman zi'c rayal g  nman con l jt abi' con l jt cul   xguialrniabee-man ni rajpaman. <sup>4</sup> Walican g  jt Jesucrist loj cr jz zi'c tijb b n ad rajpt guialrniabee, per yan nabanman por xguialrniabee Dios. Abi' zi'c g  jtaman zi'c tijb b n ad rajpt guialrniabee ziangajc dunuj ree rul   ad raya'pt ree guialrniabee, per zi'c nayajcan xbejn Cristo raya'pan xguialrniabee Dios par yaguieenan ni rayal yaguieenan con l jt.

<sup>5</sup> L jt gajc gol been xgab bal walidi rililadxidi Jesucrist. L jt gajc gol been xgab xhienaag nabandi. Gol gogbee guial ma nabandi con Jesucrist, bal id rniecezidi guial rililadxidi laaman. <sup>6</sup> Balzianclaa gagbeedi guial dunuj diidxli raliduladxan laaman. <sup>7</sup> Abi' rarejdxan Dios por l jt chit   g  ndi ni mal, ad par yaya'ntan zagdxe delant loj ree bejn, cayguieenan zian par g  ndi ni naj zagdxe, majsi par ree bejn ad cayguieentan zi'c rayal. <sup>8</sup> Per ad zajct yaguieenan tiblax ni naj diidxli, dunuj caynazan ni naj diidxli. <sup>9</sup> Zeel yu' du luxdoon nix achet g  nan ni cayza'ctzan din chile' sudxi'chidi loj ni rililadxidi. Abi' rarejdxan Dios din gagbeedi guidiblagaa xhienaag guibandi xnejz. <sup>10</sup> Abi' caxhalan gui'ch guie lojdi dxelri guidganan l jt, din chi guialan guidganan l jt ad ryaadxt gadil n l jt por guialrniabee ni bane Dad Jesucrist lon, guialrniabee ni baneeman lon par g nan l jt yudar chignia'di mazri zagdxe xnejz Dios, ad par gunijttan l jt.

<sup>11</sup> Yan compniar raliduladx ree Jesucrist par guloxan gui'ch guie, naj rni l jt: Gol badxe' luxdoodi zagdxe, gol been naguiejn gol gubajn zi'c rayal, gol bagu' luxdoodi gol gubajn t   zagdxe, gol babe'cdxe luxdoodi con ree xcompniaridi. Abi' Dios b n r n dunuj ree

rabe'cdxe t eman du luxdoo ree laaman  
gagn  l jt. <sup>12</sup> Xhiet ez hor ni radxaag ree  
xcompniaridi, gol bagajpdioz lasa'di zi'c  
rayal. <sup>13</sup> Gra ree dux compniar ree b n  
rliladx ree Jesucrist niz guie rugajpdioz  
reeman l jt.

<sup>14</sup> Dad Jesucrist g inle' gradi, guial  
r n Dios l jt abi' xSprijtaman gagn  l jt  
zianczi. Am n.

## Gui'ch ni guxhaal San Pabl loj ree b n Galacia rliiladx Jesucrist

### Rugajpdioz San Pabl b n rliiladx ree Jesucrist

**1** Naj Pab najn ap stol, per ad b n-  
guidxliujt bacaabee naj ad laa t  t  
reeman guxhaal naj, najn ap stol por Je-  
sucrist n  por dux Dad ree Dios b n bas-  
ban laaman loj guialgijt. <sup>2</sup>Gra ree dux  
compniar ree b n za' ree guie con naj  
ragajpdiozan l jt najdi b n rliiladx Je-  
sucrist niz Galacia. <sup>3</sup>Dux Dad ree Dios  
n  Dad Jesucrist g  nle' l jt yabe'cdxe  
t   reeman luxdoodi. <sup>4</sup>Jesucrist gijt por  
dux tol ree persi bab  man dunuj ree loj  
gra ree ni mal ni yu' loj guidxliujt guie  
zi'c goc xixgab dux Dad ree Dios. <sup>5</sup>Zeel  
rayalci yaya'p reeman respejt zianci.  
Am n

### Achetri diidx ren ni zajc yab   dunuj ree loj dol

<sup>6</sup>D d radxalon guial d d cari  
cab  ladxidi xtiidx Dios, abi' laaman  
guial r n Jesucrist l jt zeel gurejdxaman  
l jt. Per l jt diidx ren ma ridxga'di <sup>7</sup>abi'  
ni'quid xtiidxt Diosan. Diidxiczi yu'  
ree b n r n gagdxadi abi' r n reeman  
guchaa reeman zi'c naj xtiidx Cristo.  
<sup>8</sup>Per bal yu' b n ruli   l jt diidx ren ree  
guial loj ree diidx ni ma bal n l jt par  
gaquidi perdon, laaman ma rayal xcasti  
Dios, majsi chut  znin majsi naj gajc  
o majsi tijb xi anjl Dios. <sup>9</sup>Zi'c ma rnin  
l jt abi' yan ma rninan zatijb: Bal chu  
ruli   l jt diidx ren ree guial loj xtiidx  
Cristo ni ma bililadxidi, laaman ma  
rayal xcasti Dios.

<sup>10</sup>Ad raguiltan mod guial yaya'-  
nan zagdxre loj ree b nguidxliujt, r nan  
naguiejn din yaya'nan zagdxre loj Dios.  
Din bal g nan naguiejn yaya'nan zagdxre

loj ree b nguidxliujt dxel ad cuzobtran  
xtiidx Cristo.

### Xhienaag gojc zeel gojc Pab ap stol

<sup>11</sup>Compniar raliduladx ree Jesucrist,  
r nan gagbeedi guial xtiidx Cristo ni ma  
bal n l jt ad b nguidxliujt gul  guie  
laan. <sup>12</sup>Abi' ad cwa'tanan ad basid t  -  
tan laan por b nguidxliujt, Jesucrist gajc  
naj b n bal   laan naj.

<sup>13</sup>L jt ma biguejn guial chi guyu'n  
loj xreligion ree b n Israel, guzunaalan  
b n rliiladx ree xtiidx Dios din g nan  
laa reeman ni mal abi' benan naguiejn  
din gusa'n ni rliiladx reeman. <sup>14</sup>Abi'  
naj mazri guzudxi'chan loj religion guin  
guial loj ree lasa' zidn n tijbzi guial  
benan naguiejn benan gra ree xc-  
tumblr ree dux b ngulalan. <sup>15</sup>Per guial  
r n Dios naj, diidz chi gadan guial loj  
guidxliujt mal gulejman naj. Dxel chi  
beenman xgab. <sup>16</sup>Bal  loj xi'nman lon  
din gatiechan xtiidxza'caman loj ree b n  
ad najt b n Israel. Abi' chi goc zian achut  
loj bignabdiidxan, <sup>17</sup>ad watan Jerusal n  
nignan b n ma naj ree xi ap stoles Jes s  
gocli diidz chi gadan gac xi ap stol  
Jes s, laa wa gajcan niz Arabia dxel  
baye'can niz Damasco stijb.

<sup>18</sup>Chi goc choon ijz dxel wan  
Jerusal n persi benbeen B d abi' guzun  
con laaman chiin gubijdx. <sup>19</sup>Per achut  
ap stol ren baguiaan tijbzi Jacob bijch  
Dad Jesucrist. <sup>20</sup>Gra ni canin l jt naj  
diidxli abi' Dios ragbeecheaaw guial ad  
rusquieetan.

<sup>21</sup>Dxelri wan niz Siria n  niz Sili-  
cia. <sup>22</sup>Per ree b n rliiladx Cristo, b n  
zobj ree niz Judea ad way nbeet ree-  
man naj nadxel. <sup>23</sup>Rguiejnzi reeman r b  
ree bejn: "B n guzunal dunuj ree yaloy  
par g nman dunuj ree ni mal yan  
ma catie'chaman xtiidx Jesucrist, majsi  
yaloy beenman naguiejn din yasa'n ree  
ni raliduladx ree Jesucrist." <sup>24</sup>Abi' rud  

reeman quixtëe loj Dios guial në naj ma rililadx Cristo.

### Bachajg Pab bén naj ree apóstoles

**2** Chi goc chidaj ijz, dxel wan Jerusalén zatijb. Binë'n Bernabé con Tito, <sup>2</sup>din Dios na guial gan ni. Abi' Jerusalén guin badxaag dulasa'n tijb luar con ganax ree bén rniabee loj ree xbejn Cristo persi benë'n laa reeman diidx por xtiidx Jesucrist ni culün bén ad najt ree bén Israel. Benan zian din ad rëntan guial ni ma benan o ni cayünan gacan dxiin xlia'. <sup>3</sup>Per ni'qui Tito bén guzu ni con naj, majsi najman bén grieg ad beent reeman laaman naguiejn chu'man sen ni ru ree bén Israel. <sup>4</sup>Din guyu tio'p choon ree bén Israel been reeman zi'c ruliüü naj reeman dux compniaran persi gojc bachajg reeman dunujn par gula'ch reeman conin ad raguieentran guial ma raliduladxan Jesucrist din gac nabee reeman dunujn yaguieenan zi'c rniabee ley. <sup>5</sup>Per ni'czi tibda'n ad batiëjbtan nüjn reeman dunujn gan, din ad rayëntan cwëeladxidi xtiidxli Jesucrist ni ma zinalidi.

<sup>6</sup>Abi' ree bén rniabee loj ree xbejn Jesucrist achetri na reeman lon guial rayal günan, majsi chutëez naj reeman din delant loj Dios tiblojzi naj bejn. <sup>7</sup>Luar ninia reeman xhie mazri nünan, laa gogbee gajc reeman guial Dios gulej naj din gatiechan xtiidxza'c Jesucrist loj ree bén ad najt bén Israel, zi'cgajc gulejman Bëd din gutie'chaman diidxza'c guin ree loj ree bén Israel. <sup>8</sup>Abi' Dios bén bacaabee gajc Bëd din gacaman apóstol loj ree bén Israel, laagajcaman bacaabee naj din gacan apóstol loj ree bén ad najt bén Israel.

<sup>9</sup>Zeel Jacob, Bëd con Waj bén rniabee ree mazri loj ree bén rililadx Jesucrist, gogbee gajc reeman guial Dios naj bén banee naj guialrniabee guin. Abi' banee

yaa reeman zi'c tijb sen guial ma naya-jcan compniar guial ma za' tëe reeman conform guial naj con Bernabé yuglüün bén ad najt ree bén Israel, guiaad laa reeman guliüü reeman bén Israel ree. <sup>10</sup>Ni gunabzi reeman du lojn din yaguieenan yudar bënprob ree, abi' laan naj ni ruladxan günan.

### Gudilë Pab Bëd

<sup>11</sup>Per chi we Bëd guiedx Antioquía, dxel gudilë'n laaman guial ad cayüjntaman zi'c rayal. <sup>12</sup>Guial yaloj gudawnëman bén ad najt ree bén Israel. Per chi bidxin ree bén guxhaal Jacob guiedx Antioquía, dxel ad bachajgtraman bén ad najt ree bén Israel guial bidxebaman xhie niëjb ree bén zinal ley. <sup>13</sup>Në los demazri ree bén Israel bén rililadx ree Jesucrist bén zojb ree ni në reeman been zi'c been Bëd abi' xt në Bernabé been zian. <sup>14</sup>Zeel chi baguian guial ad cayüjnt reeman zi'c rëb loj xtiidxza'c Jesucrist, dxel rën loj Bëd delant loj gra reeman: "Lüj najl bén Israel abi' ad nabantil zi'c laa reeman, ¿chexc zeel rüjnl naguiejn guiban ree bén ad najt ree bén Israel zi'c naban ree bén Israel?"

### Guialrililadx Jesús rabëe bejn loj dol

<sup>15</sup>'Dunuj ree nayajc ree bén Israel diizd chi bayajl ree abi' ad yu't dxej babajn ree sin xley Dios zi'c ree bén ad najt bén Israel. <sup>16</sup>Per dunuj ree rayagbee guial achut zajc gac naya niz loj Dios por guial zinal bejn ley, gacaman naya guial rililadxaman Jesucrist. Zeel në dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

<sup>17</sup>'Yan bal cayguieen ree naguiejn yayajc ree naya delant loj Dios, laan ruliüü dunuj ree guial nayajcqui ree bëndol, ¿wen mazri bëndol cayüjn Cristo

dunuj ree ya? ;Dunuj ree rayagbee guial ad ziantan! <sup>18</sup> Din bal ma basa'nan xley Moisejs, abi' yaye'can con ley guin zatijb dxel naj gajc cayün naj bëndol. <sup>19</sup> Zeel ma basa'nan ley guin din gabajnan par Dios. <sup>20</sup> Abi' rünan cwent guial në naj güjt chi güt Cristo loj crüjz dxel ad nabanan da xtijban, ma nabannë'n Cristo. Abi' yan zi'c nabanan, ma nabanan zi'c rliiladxan Xi'n Dios, bén rën naj güjt tēeman por naj. <sup>21</sup> Abi' ad rüntan tiblax guial rën Dios dunuj ree, din bal nile' ni-ajc bejn naya niz loj Dios guial rüjn bejn zi'c rniabee xley Moisejs dxel achetri lasajc guial güjt Cristo.”

### Guialrliiladx Jesucrist rquied dol

**3** ;Bén Galacia, chexc zeel ad radëdguientidi! ;Chu bascajy xquiarguiejndi? Awa chi balün lëjt, delant loj gradi bagojnan lëjt par xhie güjt Cristo loj crüjz. <sup>2</sup> Yan rënzax gagbeen: ;Nabannëdi xSprijt Dios ya guial rüjndi zi'c rniabee xley Moisejs o por guial rliilaxidi xtiidx Jesucrist ni ma bacaagdiajguidi? <sup>3</sup> Xixpi nadidi zeel awa ma nabannëdi xSprijt Dios abi' yan nalaxidi guial din yayaalox gaquidi zi'c rën Dios rayal chinalidi ley. <sup>4</sup> ;Wen achet lasajc guialrzagdiaj ni gudëdidi ya, o guzagdiaj xlia'zidi ya? <sup>5</sup> Chi runee Dios xSprijtaman lojdi abi' rüjnman milagr ree delant lojdi, ;wen rüjnman zian ya por guial zinalidi xley Moisejs o por guial ma bililaxidi xtiidx Jesucrist ni ma bacaagdiajguidi?

<sup>6</sup> Gol basaaladx guial Abraham por guial bililadxaman Dios, been Dios laaman cwent zi'c tijb bén ad wayüjnt dol. <sup>7</sup> Zeel gol gogbee guial gra ree bén rliiladx Dios, laa reeman naj zi'c xi'n Abraham. <sup>8</sup> Diizd gocli mal ragbee Dios guial majsi loj ree bén ad najt bén Israel yu' ree bén güünman cwent zi'c bén ad wayüjnt dol guial rliiladx reeman laaman. Din tiblajt loj xtiidxaman

rëb guial rëbaman loj Abraham: “Günle'n gra ree bënguidxliuj por lüj.” <sup>9</sup> Zeel rüjnle' Dios gra ree bén rliiladx laaman zi'cgajc beenle'man Abraham guial bililadxaman laaman.

<sup>10</sup> Gra ree bén zinal xley Moisejs yu' casti par laa reeman din loj gajc libr ley guin rëb: “Bén ad zinalt güün gra zi'cgajczi rëb loj ley guin, yayalaman casti.” <sup>11</sup> Zeel rayagbee ree ad zile't gac bejn naya loj Dios por guial rüjnman zi'c rniabee ley. Din loj xtiidx Dios rëb: “Bén rliiladx Dios rajpaman guialnaban delant lojman guial ma rüjnman laaman cwent sin dol.” <sup>12</sup> Per ley guin ad rniabantan chililadx bejn laan, loj libr ley guin rëb: “Bén güün zi'c gajczi rniabee ley, zaxpaman guialnaban.”

<sup>13</sup> Jesucrist badxi'ca dunuj ree loj xmalidicion ley din laaman bayal casti ni rayal ree por ley guin, din loj libr ley guin rëb: “Ma zë maldicion guijc bén rëjt loj crüjz.” <sup>14</sup> Zian guzajc Jesucrist par chile' güünle' Dios bén ad najt ree bén Israel, zi'c beenle'man Abraham. Abi' guial rliiladx reeman Jesucrist zeel ma naban reeman con xSprijt Dios zi'c tal rëb Dios diizd guial'xchej.

### Xley Moisejs në xpromejs Dios

<sup>15</sup> Yan compniar raliduladx ree Jesucrist ganin lëjt xhienaag rüjn ree bënguidxliuj: Chi rajs tijb gui'ch abi' rgu' bejn laan firm, dxel achut zajc guse'n laan o gucaa guijc ree diidx ni ca loj gui'ch guin. <sup>16</sup> Ziangajc gol gogbee, chi been Dios promejs guial güünle'man Abraham con xdiaaman, ad rëbt loj xtiidx Dios guial güünle'man “bén zëed ree” loj xdiaa Abraham. Ad rëbtan zien bejn, rëban tijbzi bejn, din laaman rëb günle'n “Bén zëed” loj xdiaaman. Abi' bén zëed loj xdiaaman laaman naj Cristo. <sup>17</sup> Abi' ni canin lëjt naj guial xley Moisejs bi'tan tajpgayuu gajlbichii ijz despuejs ni been Dios promejs con

Abraham, zeel ad zajct guse'n ley guin promejs ni ma been Dios. <sup>18</sup> Din bal par yaca' ree ni rëb Dios loj Abraham rayal yaguieen ree zi'c rniabee ley, dxel ad promejstran. Per Dios bazaladx loj Abraham ni rëbman por promejs ni been-man lojman.

<sup>19</sup> Wed zanabdiidixidi lon, ¿par xhieza rüjn ley guin sirv? Badëë Dios ley guin din gagbee bejn guial najman bëndol, abi' been ley guin sirv xt dxej ni bi't Bén zëëd loj xdiaa Abraham zi'c tal been Dios promejs con laaman diizd guia'xchej. Bén naj ree xianjl Dios badëë ley guin loj Moisejs, abi' Moisejs badëëd laan loj ree bejn. <sup>20</sup> Per chi been Dios promejs con Abraham achutczí badëëd xtiidxaman, quijb laaman guneeñë Abraham.

### Xhie sirv rüjn ley

<sup>21</sup> Ad naladxidi canin guial ley guin za' contr xpromejs Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma naya-man loj Dios guial zinalaman ley. Per ad ziantan <sup>22</sup> din loj xtiidx Dios rëb guial dol rniabee gra bejn din gra ree Bén chililadx Jesucrist tia' reeman gra ni rëb Dios.

<sup>23</sup> Chi gad guialrliladx Jesucrist guidoonloj, gunabee ley dunuj ree, zi'c chi nayaaw bejn balëëz ree guidoonloj guialrliladx Jesucrist. <sup>24</sup> Zeel par dunuj ree ley guin naj ni balüü dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din güünman dunuj ree cwent zi'c tijb Bén ni ad wayüjnt dol guial raliduladx ree laaman. <sup>25</sup> Per yan guial ma raliduladx ree Jesucrist ad rüjntri naguiejn gulüü ley guin dunuj ree.

<sup>26</sup> Din guial raliduladx ree Jesucrist ma nayajc ree xi'n Dios. <sup>27</sup> Abi' guial barobnijs ree por Jesucrist zeel ma nayajc ree tijbzi con laaman din ma nabajnnë' reeman. <sup>28</sup> Abi' zi'c Bén Israel zi'c Bén ad najt Bén Israel, zi'c Bén naj

zi'c Bén nado' zi'c Bén ad najt zi'c Bén nado', zi'c xinguaaw zi'c béngunaa, par Cristo tiblojzi nayajc ree din ma nayajc ree tijbzi con laaman. <sup>29</sup> Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yajal ree ni rëb Dios loj Abraham diizd gulal.

**4** Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpax, zi'cgajc tijb mojs, majsi xieenx naj gra ni rajp xdadix. <sup>2</sup> Abi' yu' ree Bén rajp laax yu' tëë ree Bén rniabee laax në ree ni rajpax, xt chi guidxin dxej ni rëb xdadix tia'x ni rayalix. <sup>3</sup> Ziangajc dunuj ree, zi'c tijb xindoo bayajc ree yaloj guial bunaaldxi'ch ree gra ree xcostumbr ree bénguidxliuj. <sup>4</sup> Abi' chi bidxin dxej gojc zi'c rëb Dios gac, guxhaal xi'n-man Jesucrist loj guidxliuj guie, tijb Bén-guidxliuj gojc xniaaman. Abi' gubajjman zi'c rniabee ley ni basa'n Moisejs duloj ree <sup>5</sup> persi bile' babëëman dunuj ree loj ley guin bile' tëë nayajc ree Xi'n Dios.

<sup>6</sup> Abi' guial nayajc ree xi'n Dios, guxhaalaman xSprijt Jesucrist persi nabajj-në' reeman, abi' por Sprijt guin raguie'ch ree: “¡Dux Dad ree Dios!” <sup>7</sup> Zeel ad nayajctri ree zi'c mojs, ma nayajc ree xi'n Dios, ma rayal ree ni gunee Dios por Cristo.

### Yu' Pab xgab por ree Bén rliladx Jesucrist

<sup>8</sup> Yaloj chi gadidi güünbee quijb Dios, beendi sirv loj ree ni naladxidi naj Dios, per diidxi ad Diost reen. <sup>9</sup> Per yan guial ma nünbeedi Dios o guial ma nünbeeman lëjt, ¿chexc zeel rëndi yabi'di güüнди graloj ni ad rüjnt sirv ni beendi yaloj? ¿Chexc zeel rëndi gaquidi zi'c Bén nado' loj ree ni guin ree zatijb? <sup>10</sup> Abi' yan guial sta zinëdi cwent xhie dxej o xhie bëëw o xhie tiamp o xhie ijz naj ni zobjloj par lëjt par güüнди xhienin zi'c

goc xcostumbridi. <sup>11</sup>D d rdxeban por l jt, doolgui basid xlia'zan l jt.

<sup>12</sup>Zeel rniaaban lojdi compniar raliduladx ree Jesucrist, gol gubajn zi'c naban, zi'c benan persi gogbeedi guial tiblojzi nayajc ree. Ad canitan lojdi guial xhie ni mal ma beendi naj <sup>13</sup>din l jt ragbee guial yaloy chi basidan l jt xtiidxza'c Jesucrist, ragxuun nadxel. <sup>14</sup>Per majsi zian, gudaandi naj. Ad beentidi naj tiblady ad gul eladx t etidi naj, bidxga'di naj zi'c tijb xianjl Dios o zi'cgajc Jesucrist. <sup>15</sup>Naj ragbee guial bal zile'n xt guiallojdi zajc cw edi par guneedan lon. Laadx yan,  conzan guial rabaanedi naj? <sup>16</sup> O al rdxechidi naj ya guial rnin ni naj diidxli lojdi?

<sup>17</sup>Rnin lojdi guial ree b n cayiyn naguiejn guial guidxga'di xtiidx reeman, ad zagdxet r n reeman l jt, xixgab reeman naj din gusa'ndi ni basidan l jt abi' mazri guidxga'di xtiidx reeman. <sup>18</sup>Ad ni malt naj guial gui n bejn lasa' bejman, per par ni zagdxen   zianczi, ad chi za'tzan con l jt. <sup>19</sup>Par naj l jt naj zi'c da xi'nan. Abi' cazaagdiajn por l jt zatijb, zi'c rzagdiaj tijb b ngunaa chi rajl xi'nman. Abi' gusnuu gazaagdiajn xt chi ma zinalidi Jesucrist diidxli zi'c rayal. <sup>20</sup> Bal zianclaa za'n con l jt din ganen n quijb l jt, per yan ad ragbeetan xhienaag g nn n l jt!

### Agar con Sara

<sup>21</sup>Per gol guna, l jt b n r n ree guiban zi'c rniabee ley.  Wen id wayignia'di ni r b loj ley ya? <sup>22</sup>Loj ley r b guial guyu tio'p xi'n Abraham: Guyu xi'nman con tijb b ngunaa brii laj Agar b n goc xmojsaman, guyu t e stijb xi'nman con quijb xb ngunaaman b n brii laj Sara. <sup>23</sup>Xi'n Abraham con b ngunaa goc xmojsaman, guyux guial bagaal Abraham laaman. Per xi'nman xin guyu con quijb xb ngunaaman guyux ad por guial

bagaaltzi Abraham xb ngunaaman, n  par gac cumplid promeys ni been Dios lojman. <sup>24</sup>Yan, Sara n  Agar laa reeman naj ejempl por tio'p nejz ni yu' par chinal bejn. Tijb nejz guin naj guial chinal bejn ley ni bad ed Dios loj Moisejs ruguia' Sina , abi' b n zinal ree ley guin naj reeman zi'c b n nado' loj ley guin zi'c goc Agar loj Abraham. <sup>25</sup>L jt ragbee guial niz Arabia naj guia' Sina , abi' ree b n niz ni rn ee reeman guia' guin Agar. Per yan Jerusal n naj zi'c guia' guin, din gra ree b n z ed niz Jerusal n, b n zinal ree ley, laa reeman naj zi'c b n nado' loj ley. <sup>26</sup>Per dunuj ree du ladx ree naj Jerusal n ni yu' xanyabaa abi' Jerusal n guin ad najtan zi'c ni nado' loj ley guin zi'c ad gojct Sara loj Abraham. <sup>27</sup>Loj xtiidx Dios r b:

Babaa b ngunaa ni ad zajct chu' xi'n.  
Babaa da't guial ad n nbeetil  
guialrzagdiaj  
ni rd d b ngunaa ni rajl xi'n.  
Din b n ad rut xi'n, mazri zien xi'nman  
chu'  
guial loj b n ru xi'n.

<sup>28</sup>Rnin lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman. <sup>29</sup>Abi' l n ree dxejzii, xi'n Agar baze'x xi'n quijb xb ngunaa Abraham, ziangajc yan b n zinal ree ley ruze' reeman dunuj ree nabajnn ' ree xSprijt Dios, guial ma nayajc ree xi'n Dios, <sup>30</sup>Per,  xhie r b loj xtiidx Dios? R ban: "Balaagdxa xmojsil con guidib xi'nman, din ad rayalt gac tio'p lala' ni rayal tia' xi'n quijb xb ngunaa." <sup>31</sup>Zeel compniar raliduladx ree Jesucrist, dunuj ree ad nayajct ree zi'c xi'n b n naj zi'c b n nado' guin, nayajc ree zi'c xi'n quijb xb ngunaa Abraham guial ad rniabeet ley dunuj ree.

### Gol guzujdxi'ch loj ni rliladxidi xtiidx Dios

**5** Cristo naj b n bab e dunuj ree loj ni rniabee ley dunuj ree. Zeel gol guzujdxi'ch, ad bal guibandi zatijb zi'c b n nado' guial g iindi zi'c rniabee ley.

<sup>2</sup>Naj Pab rnin l jt. Bal rudi sen zi'c rniabee ley, achet lasajc guial rliladxidi Jesucrist. <sup>3</sup>Abi' rnin l jt zatijb: Chut  z b n ru sen guin rayal g iunman zi'c tal rniabee ley. <sup>4</sup>L jt guial r jndi xgab guial g iindi zi'c rniabee ley ma najdi naya delant loj Dios, laan r n gui b guial ad najtridi xbejn Cristo ad yu'guijc t  tridi guial r n Dios l jt. <sup>5</sup>Per dunuj ree por xSprijt Dios n  guial raliduladx ree Jesucrist nadxu'guijc ree guial yadxin ree naya delant loj Dios. <sup>6</sup>Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por guialrliladx guin zajc yabajn ree zagdxe yay n dulasa' ree. <sup>7</sup>L jt ma z di zagdxe.  Chu na lojdi guial ad zidxga'tidi ni naj diidxli? <sup>8</sup>Din xgab guin ad z  dtan por Dios, b n gule l jt. <sup>9</sup>Zeel gol gojp cudad "din con ta'nnijt zajc gusquiee reeman gradi." <sup>10</sup>Per naj ra'pan Cristo confians guial ad zusa'ntidi ni basidan l jt. Abi' Dios gud  d casti b n cusquiee ree l jt, majsi chut  znin. <sup>11</sup>Bal r n guial r jn naguiejn chu' ree bejn sen, ad zazunaltri ree b n Israel naj. Ziangajc bal gui n guial rayal chu' ree bejn sen, r n gui ban guial achet lasajc guial g jt Cristo loj cr jz. <sup>12</sup>Balzianclaa gra ree b n ruslen l jt guial rayal chu'di sen,  mejorli gutt g laagajc reeman tiblayaa!

<sup>13</sup>Din l jt ma gulaadi loj ley, per ad guial ad rniabeetri ley l jt din g iindi ni r ntzidi, rayal gui ndi g iun t   yudar lasa'di. <sup>14</sup>Din con tijbzi mandamient ma been bejn gra zi'c rniabee xley Dios. Mandamient guin r b: "Guy n ben ren

zi'c r n l j gajc." <sup>15</sup>Per bal rdxex'ch lasa'di abi' rdilidi, gol gojp cudad chit   zianzi la' lasa'di.

### Guialnaban ni runee xSprijt Dios

<sup>16</sup>Zeel rnin lojdi: Gol gubajn zi'c rniabee xSprijt Dios guibandi. Ad guibanridi zi'ctzi naj xixgabidi. <sup>17</sup>Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajct guiban bejn zi'ctzi r nman. <sup>18</sup>Per bal xSprijt Dios naj b n rniabee l jt dxel ad rniabeetri ley l jt. <sup>19</sup>Yan laa rguien gajc con ree nin z  d con xixgabzi ree bejn: Guialrzun  xinguaaaw ren o b ngunaa ren, guialr jn bejn nidxuudx, guialrajp bejn gadxagayaa vijs, <sup>20</sup>guial r n bejn graloj ni naladxaman naj Dios, guial r jn bejn guialbidxaa, guialrdxe'ch lasa', guialrdil, guialrz  bladx ni rajp bejn, guialralenya', guialrlies xvalor gajc, guialrlia' lasa' bejn, guial ru loj tibcwaa bejn o stib cwaaman, <sup>21</sup>guialrd dloj, guialrug jt bejn, guialrz dx, guialnala n  xhi-et  z ni mal lasa' ree ni guin. Rugojnan l jt zi'cgajc ma rnin lojdi yaloj, b n cay jn ree lasa' ree ni guin ad zayalt reeman lod rniabee Dios.

<sup>22</sup>Per ni z  d por xSprijt Dios naj, guialr n lasa' bejn, guialrabaa, guialrga'dxe luxdoo, guial yu' pacens, guialnaxanladx, guial rajc naza'c, guial r jn cumplid xtiidx, <sup>23</sup>guial r jn naya, guialrniabee bejn xixgab mal gajcaman. Abi' ad yu't ley ni rudxoon guial g iun bejn ni guin ree. <sup>24</sup>Abi' ree b n ma naj xbejn Cristo ma basa'n reeman gra dol, n  gra ree ni mal ni r n reeman g iun reeman din ma g jt Cristo por gra dol. <sup>25</sup>Yan bal ma nabajn ree con xSprijt Dios rayal



yabajn ree zi'c rniabee Sprijt guin yabajn ree.

<sup>26</sup>Ad yales dux valor gajc ree, ad yache'ch du lasa' ree, ad yad dloj du lasa' ree.

### Yaguieen du lasa' ree yudar

**6** Compniar raliduladx ree Jesucrist, min l jt, bal chu xcompniaridi r jn dol gan, l jt guial ma rajquidi mazri xtiidx Dios gol guneen man con ganax ree diidxza'c, din rayal cu'guijquidi guial n gajc l jt zajc g  n dol l jt gan. <sup>2</sup>Gol gogn  lasa'di loj xhiet z guialzi ni rd didi, zian ma cay jndi ni rniabee Cristo g  ndi.

<sup>3</sup>Bal yu' b n ni naladx guial rajcaman gra abi' achetzi rajcaman, dxel laagajcaman cusquiee laaman. <sup>4</sup>Tijbgaj bejn rayal g  n xgab bal nabancaman xnejz. Abi' bal nabanman xnejz, tijbzi laaman rayal yabaa luar g  nman xgab guial nabanman zagdxe loj gra ree bejn. <sup>5</sup>Din tijbgaj dunuj ree rayal yaya'p ree xhien-aag yabajn ree.

<sup>6</sup>Chut z b n cusiid xtiidx Dios, rayal g  nman yudar b n cul   laaman con ni ryaadxaman.

<sup>7</sup>Ad gusquiee l jt gajc, din achut zajc guze' Dios. Ni rx bin bejn laagajcan yato'paman. <sup>8</sup>Bal nabanman zi'ctzi naj xixgabaman zadxin dxej yayalaman casti. Per b n naban zi'c rniabee xSprijt Dios, por Sprijt guin yayalaman guialnaban tiblayaa delant loj Dios. <sup>9</sup>Ad rayalt yadxag ree guial yaguieen ree ni zagdxe,

din bal id zadxag ree chi guidxin dxej yaca' ree ni yayal ree. <sup>10</sup>Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree b n rililadx ree Jesucrist.

### Xconsejw Pab

<sup>11</sup>Gol baguiaa xi narooob ree lejtr ni can par l jt con quijb yan. <sup>12</sup>B n cay jn ree naguiejn chu'di sen, r jn reeman zian par yaya'n reeman zagdxe loj ree bejn luar sagdiaj reeman guial rililadx reeman Jesucrist. <sup>13</sup>Per ni'qui ree b n yu' sen guin ad r jnt reeman gra zi'c r b ley guin. R nzi reeman chu'di sen guin din g  n reeman nab  guial ma been reeman gan yu'di sen guin. <sup>14</sup>Per naj achet por ni g nan nab , tijbzi por guialg jt Dad Jesucrist. Abi' guial g jtaman loj cr jz ma basa'nan gra ree ni mal yu' loj guidxliuj guiee abi' ma g jtan par ree ni mal guin. <sup>15</sup>Din chi ma naj bejn tijbzi con Cristo, achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c nabanman. <sup>16</sup>Abi' ree b n ma zinal xnejz Cristo, Dios yaya laa reeman yabe'cdxe t  man luxdoo reeman n  gra ree b n didxli naj xbejn Dios.

<sup>17</sup>Diizd yan ad r ntran chu guche'ch naj. Din dib ni ca ree ladan laa reen rult  guial najn xiap stol Jesucrist.

<sup>18</sup>Compniar raliduladx ree Jesucrist, dux Dad ree Jesucrist g  nle' gradi. Am n.

## Gui'ch guxhaal San Pabl loj ree b́en ́Efesó rliiladx Jesucrist

### Rugajpdioz San Pabl b́en ́Efesó ree

**1** Naj Pab, najn tijb xi apóstol Jesucrist por xguialrniabee Dios. Cuan gui'ch guie par lějt guial diidxli zinalidi xtiidx Jesucrist, lějt guial ma najdi xbejn Dios luguiedx ́Efesó. <sup>2</sup>Dux Dad ree Dios nē Dad Jesucrist güünle' lějt yabe'cdxe tēē reeman luxdoodi.

### Rüjnle' Dios b́en rliiladx ree Jesucrist

<sup>3</sup>Quixtēē Dios, xdad Dad Jesucrist, dád benza'c najman, guial yan ma nayajc ree tijbzi con Jesucrist, ma beenle'man dunuj ree diizd xanyabaa con graloj guialnaza'c din gac yunaal ree xtiidxaman. <sup>4</sup>Laaman bacaabee dunuj ree por Dad Jesucrist diizd chi gad guidxliuj gacchaaw din yabajn ree naya sin dol lojman. <sup>5</sup>Abi' guial rēnman dunuj ree, diizd guia'xchej beenman guial yayajc ree xi'nman por Jesucrist zi'c beenman xgab gac. <sup>6</sup>Zeel ad racwēēzt raza't ree Dios zagdxē guial dád benza'c najman, ma beenle'man dunuj ree por Xi'nman Jesucrist, b́en rēnman, <sup>7</sup>b́en ma gudijx por dunuj ree chi guxhie' xrejman, abi' ma gojc perdon dux tol ree guial dád rēn Dios dunuj ree. <sup>8</sup>Zeel dád zro' guialrajc nē guialrignia' ma bazaladxaman duloj ree, <sup>9</sup>abi' ma balüüman duloj ree xhienaağ naj xixgabaman diizd gocli, zi'cgajczi ma beenman xgab gac. <sup>10</sup>Guiáad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa nē loj guidxliuj.

<sup>11</sup>Nētēē guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diizd guia'xchej, din laaman rüjn gra zi'c rēnman gac. <sup>12</sup>Abi' laaman ma been zian, din dunuj ree nayajc ree

b́en yaloj bililadx Jesucrist, yayajc ree b́en guza't laaman zagdxē por xguialrniabeeman. <sup>13</sup>Nēğajc lějt chi biguiejndi diidxli xhienaağ par gaquidi perdon dxel bililadxidi Cristo gojquidi tijbzi con laaman. Abi' zi'c rēb Dios guial guneeman xSprijtaman, dxel yan guial ma nabannēdi laaman, laaman naj zi'c tijb sen ni rultüü guial ma najdi par Dios. <sup>14</sup>Guial ma nabannē xSprijt Dios dunuj ree, yaca' ree ni rēb Dios guneeman chi ma bara xbejnman za' xanyabaa, din chitēē yacwēēz yaza't reeman zagdxē por xguialrniabeeman.

### Rniab Pab quiargueijn loj Dios

<sup>15</sup>Abi' guial ragbeen rliiladxidi Dad Jesús rēn tēēdi los demazri ree b́en naj xbejn Dios, <sup>16</sup>zeel ad rucwēēzt rudēn quixtēē loj Dios por lějt, beegaj rbedx rniaaban laaman. <sup>17</sup>Laaman naj Dios rniabee diizd xanyabaa, xDad Dad Jesucrist. Rniaaban lojman yazaladxaman quiargueijn lojdi din chignia'di ni guliüüman lojdi gusnuu tēē güünbeedi laaman mazri. <sup>18</sup>Rniaaban lojman din guixhialaman xquiargueijn di din chignia'di xhie rēn guiēb ni rbēzidi diizd chi bacaabee-man lějt, chignia' tēēdi guial ni za'cdxoon narooob tēē naj ni nagu'chaaw Dios par ree b́en naj xbejnman. <sup>19</sup>Rniaab tēēn lojman guial gagbeedi guial dád narooob naj xguialrniabeeman ni cayagnē dunuj ree raliduladx reeman. Laagajc guialrniabee narooob guin balüü Dios <sup>20</sup>chi basbanman Jesucrist abi' gule'caman laaman xladbeeman xanyabaa <sup>21</sup>lod badēeman guialrniabee lojman ni mazri lasajc guial loj gra ree guialrniabee, nē loj gra guialguxtis nē loj gra gobiarn. Abi' mazri lasajc guialrniabee guin guial loj gra ree guialrniabee yu', nē ni qui chu'ri ree loj guidxliuj guie. <sup>22</sup>Dxel basa'n Dios gran loj Jesucrist, bacaabee-man laaman din nabeeman gra ree b́en rliiladx laaman. <sup>23</sup>Guiáad ree b́en rliiladx laa-

man, guidiblagaa nabannëman laa ree-man abi' bantëez guin za'man din laaman guidiblagaa rniabee.

### Nayajc ree perdon guial rën Dios dunuj ree

**2** Gocli gojquidi zi'c bengüt loj Dios por ree ni mal në por ree dol <sup>2</sup>ni beendi guial binalidi nejz mal been tëëdi zi'ctzi rën xindxab güüнди, sprijtmal ni nabannë gajc ree bén ad ruzoobt xtiidx Dios. <sup>3</sup>Du gra ree ziangajc babajn ree guia'xchej. Baguieen ree zi'ctzi bayën ree, zi'ctzi goc dux xgab ree, abi' zi'c-gajc rayal ree bén ad ruzoobt xtiidx Dios casti, ziangajc nayal ree casti. <sup>4</sup>Per guial raya da't Dios dunuj ree rën tëëman dunuj ree, <sup>5</sup>zeel majsi bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon. <sup>6</sup>Chi basbanman Jesucrist nëgajc dunuj ree basbanman abi' zi'c rulüü ma nadxu'në' ree Jesucrist xanyabaa. <sup>7</sup>Dios been zian din dxej zëëd ree guiguien guial dád rënman dunuj ree, abi' benza'c tëë najman con dunuj ree por Jesucrist. <sup>8</sup>Guial naj Dios benza'c, zeel ma nayajc ree perdon, ad guial nayajct ree benza'c lojman. Por guial riladx zëëd xperdon Dios. <sup>9</sup>Ni'quid por ni zagdx ni ma baguieent ree zëëd perdon guin chitëë chu guilies xvalor gajc. <sup>10</sup>Por Dios nadxu' ree loj guidxliuj guie abi' por Jesucrist bachaaman mod babajn ree yalaj din yaguieen ree ni zagdx zi'c beenman xgab yaguieen ree dizd gocli.

### Tijbzi nayajc ree por Jesucrist

<sup>11</sup>Zeel lëjt bén ad najt ree bén Israel, gol basaaladx xhienaag guzajquidi yalaj. Bén Israel ree gulëëla'j lëjt bén ad yu't ree sen guial yu' reeman sen zi'c rniabee ley. <sup>12</sup>Tiamp zii ad beenbeetidi Je-

sucrist, ad gojctidi cwent loj ree bén Israel ad gojc tëëtidi cwent guial rayalidi ni rëb Dios gudëëman loj ree xbejnman. Contzi gubajndi achet gulëjzidi ad gubajnnë tëëtidi Dios. <sup>13</sup>Per yan guial ma riladxidi Jesucrist, lëjt guial guzujdi zijt loj Dios, por xrejn Jesucrist ma bibiguidi lojman. <sup>14</sup>Din Jesucrist babe'cdxe du luxdoo ree. Laaman bisüd guialrdxe'ch ni rudxoon gac ree bén Israel tijbzi con ree bén ad najt bén Israel. <sup>15</sup>Abi' por xguialgüjt Jesucrist gulox gra ree costumbr rniabee xley ree bén Israel güün ree bejn, laaman been persi gojc ree bén Israel con ree bén ad najt bén Israel zi'c tijbzi guiedx cüb guial ma nayajc ree tijbzi con laaman. Zian babe'cdxeman luxdoo ree bejn. <sup>16</sup>Din por xguialgüjt Jesucrist loj crüjz ma gulox guialrdxe'ch lasa' ree bén Israel con ree bén ad najt bén Israel, abi' ma nadxu'në' ree Dios zagdx guial ma nayajc ree tijbzi por Jesucrist. <sup>17</sup>Abi' laaman bidgagojn dugra ree, zi'c ree bén Israel zi'c ree bén ad najt bén Israel xhienaag yadxu'në' ree Dios zagdx. <sup>18</sup>Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnnë' ree. <sup>19</sup>Zeel ad najtridi zi'c bén zëëd lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman. <sup>20</sup>Lëjt naj zi'c zze' tijb yu ni cayajc, guíaad ree xi apóstoles Jesús con ree bén badëë xtiidx Dios loj ree bejn, naj ree-man zi'c xcimiant yu guin, guíaad Jesucrist naj zi'c guiaj zojbloj ni cayajcnë yu guin. <sup>21</sup>Abi' guial yagaj guzuloj cayajs yu guin, dxel cayë'pzi cayë'p ze' guin ni cayguie'ch ree najdi din yayajc ree tijbzi xyadoo Dios con Jesucrist. <sup>22</sup>Në yan guial ma najdi tijbzi con Jesucrist ma naj tëëdi tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

### Cwabee Pab din chigneeman xtiidxza'c Jesucrist

**3** Por zianan yu'n ladxguuib, naj Pab guial cay nan sirv loj Jesucrist din g nan yudar l jt b n ad najt ree b n Israel. <sup>2</sup>L jt ragbee guial naj Dios benza'c zeel baneeman dxiin guin lon din g nan l jt yudar chignia'di xtiidxaman. <sup>3</sup>Abi' laaman bal   naj xhienaag naj xixgabaman diizd gual, zi'cgajczi ma rnin lojdi diizd guia'xchej. <sup>4</sup>Chi goolidi laan, gagbeedi guial ma ragbeen xhienaag naj xixgab Dios par Jesucrist. <sup>5</sup>Tiamp gual achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma bal  man laan loj ree xi ap stoles Jes s n  loj ree b n bad   xtiidx Dios loj ree bejn. <sup>6</sup>Abi' ni goc zi'c tijb ni naguie'ch par ree bejn naj guial por xtiidxza'c Jesucrist, n  ree b n ad najt b n Israel ma rayal ni gud   Dios loj ree b n Israel guial ma naj reeman tijbzi, dxel ziangajc ma nayab reeman loj promeys ni been Dios por Jesucrist.

<sup>7</sup>Naj cugojn xtiidxza'c Jesucrist loj ree bejn, ad guial rayalt g nan dxiin guin. Guial naj Dios benza'c, zeel bazaladxaman guialrniabee lon par g nan laaman sirv. <sup>8</sup>Naj naj b n bigra b n lasajc ta'nz loj gra ree xbejn Dios, per guial naj Dios benza'c, bacaabeeman naj din g n didix loj ree b n ad najt b n Israel xcwent xguialnaza'c narooob Jesucrist, <sup>9</sup>n  par gugojnman zagdxe gra reeman xhienaag naj xixgab Dios b n been gra, xgab ni ad bal   gajtaman loj ree bejn. <sup>10</sup>Din yan zi'c naj ree b n rililadx Jesucrist, gagbee gra ree b n rajp guialrniabee xanyabaa guial gra lojczzi guialrajc rajp Dios. <sup>11</sup>Abi' diizd chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. <sup>12</sup>N  guial raliduladx ree Jesucrist ma raya'p ree nejz par loj Dios,

abi' con confians ma zajc yubiig ree lojman. <sup>13</sup>Zeel rnin lojdi ad runayadi por ree guialzi ni cad  dan por l jt, din zagdxen par l jt.

### D d r n Jesucrist dunuj ree

<sup>14</sup>Zeel ruzuxiban loj dux Dad ree Dios; <sup>15</sup>laaman naj Dad loj gra ni yu' loj guidxliuj n  xanyabaa. <sup>16</sup>Abi' rniaaban lojman por xguialrniabee narooobaman yazaladxaman l jt gojl n  guialrniabee por xSprijtaman din yayu luxdoodi, <sup>17</sup>guibann  t  di Jesucrist guial rililadxidi laaman. Din zian zi'c diidxli zinalidi zi'c r n Jesucrist dunuj ree, <sup>18</sup>dxel ma zajc gagbeedi con los demazri ree compniar raliduladx ree laaman guial gud dlaj abi' xt banczi naaloj zro' r nman dunuj ree. <sup>19</sup>Zeel rniaaban loj Dios gagbeedi plact r nman dunuj ree, guial mazri zro' najn guial loj ni raguieen ree xgab, abi' zian guidiblagaa guibann di Dios.

<sup>20</sup>Laaman, guial rajpaman guialrniabee par g nman mazri guial loj ni raguieen ree xgab o mazri guial loj ni ranaab ree lojman por xSprijtaman b n nabajnn ' ree, <sup>21</sup>abi' rayal yaza't reeman zagdxe gra dxej n  gra tiamp por Jesucrist, dunuj ree guial raliduladx ree Jesucrist. Am n.

### Nayajc ree tijbzi por xSprijt Dios

**4** Naj, yu'n ladxguuib guial cay nan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree b n ma naj ree xbejnman. <sup>2</sup>Gol gojc benza'c n  b n naxanladx, gol gojp pacens gol gudaan t   lasa'di guial r n lasa'di. <sup>3</sup>Gol been naguiejn gusnuu gaquidi tijbzi con xyudar xSprijt Dios b n rabe'cdxe du luxdoo ree par yayajc ree tijbzi. <sup>4</sup>Dunuj ree nayajc zi'c tijbzi cuerp, abi' dugra ree nabajnn ' xSprijt Dios, abi' zi'c ma nayajc ree xbejn Dios, ziangajc ral jz ree ni guneeman. <sup>5</sup>Tijbzi

Dad, tijbzi guialrliladx n  tijbzi guialrriobnijs raya'p ree. <sup>6</sup>Din tijbzi Dios yu', b n naj Dad par dugra ree, rniabeeman dugra ree, nabann man dugra ree r jn t eman ujs dugra ree.

<sup>7</sup>Per tijb gaj dunuj ree ma naj ni yaguieen ree, zi'ctzi ni banee Jesucrist yaguieen ree. <sup>8</sup>Zianan zeel r b loj xtiidx Dios:

Chi bay 'paman xanyabaa, beenman gan loj gra guialrniabee, abi' bad edaman loj ree bejn ni rayal g iun reeman.

<sup>9</sup>Abi',  xhie r n gui b lod r b "bay 'paman"? R n gui ban bi'taman loj guidxliuj. <sup>10</sup>Gui ad Jesucrist b n bi't loj guidxliuj, laagajcaman naj b n bay 'p xanyabaa persi canabeeman guidib guidxliuj n  xanyabaa. <sup>11</sup>Abi' ma bad eman loj ree bejn ni rayal g iun reeman, yu' reeman bayal gac ap stoles, yu'za reeman bayal gac b n rud e xtiidx Dios loj ree bejn, yu' reeman bayal gutie'ch xtiidxaman, yu' t e reeman bayal gud e consejw guli  t e reeman b n rililadx ree laaman.

<sup>12</sup>Zian bacaabee Jesucrist bejn ree din gusiid los demazri ree b n rililadx laaman, gac t e g iun reeman laaman sirv, gusnuu t e g iunbee reeman laaman, <sup>13</sup>xt yayaaloy yaliduladx ree yaguieenbee t e ree Xi'n Dios guidiblagaa, din yayaaloy yayignia' ree xhienaag rayal yunaal ree Jesucrist. <sup>14</sup>Dxel ad zayajctri ree zi'c ree xindoo rililadx xhiet eznin, ad zayajctri ree zi'c tijb ni r n bi niz ni niz guie por graloj ni r  ree b n raguiil mod gusquiee ree bejn, <sup>15</sup>rayal yay n du lasa' ree, yad  ree diidx yunaal t e ree ni diidxli din gusnuu yayignia' ree yaguieen t e ree zi'c r n Jesucrist b n rniabee dunuj ree.

<sup>16</sup>Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni

rayal yaguieen ree par yaguieen du lasa' ree yudar din gusnuu yay n dulasa' ree por Jesucrist.

### Guialnaban c b con Jesucrist

<sup>17</sup>Yan por Jesucrist rnin l jt: Ad bal guibanridi zi'c naban ree ben ad n nbeet Dios, din laa reeman naban zi'ctzi naj xixgab reeman, <sup>18</sup>nacay xquiarguiejn reeman, ad rajpt reeman guialnaban r n Dios gap reeman, guial ad rignia't reeman ache t et naladx reeman. <sup>19</sup>Ma been luxdoo reeman gojl, ma gul eladx laagajc reeman abi' cusnuu cayiun reeman graloj nidxuudx. <sup>20</sup>Per l jt ad beenbeetidi Jesucrist din guibandi zian, <sup>21</sup>bal walidi ma biguiejndi xcwenta-man bal wali t edi ma basiididi didixli z ed por laaman. <sup>22</sup>Gol basa'n zi'c gubandi yaloy, din ruxhiinzi zi'c gubandi yaloy con xgabmal ni basquiee l jt guial beendi zi'ctzi guy ndi. <sup>23</sup>Gol been naguiejn guidxaa xixgabidi guidiblagaa <sup>24</sup>din gaquidi zi'c tijb benc b been Dios zi'c r nman, con tijb guialnaban naya n  zi'c rayal por xdiidxliman ni ma biguiejndi. <sup>25</sup>Zeel ad bal rnieridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist. <sup>26</sup>Bal rdxe'chidi, ad g iundi dol. Ad gudxe' guialrdxe'ch guin luxdoodi d chej, <sup>27</sup>chit e ti bidi g iun xinxab l jt gan. <sup>28</sup>B n rban, rayal gucw ez cwanman abi' g iunman dxiin, din con dxiin zagdxe g iunman dxel ma rajpaman con xhie g iunman yudar b n ryaadx ree xhienin. <sup>29</sup>Ad rnice t edi diidxguijdx, gol gunee ganax diidxzagdxe ni g iun yudar chignia' ree ben ren b n gucaagdiajg ree laan din g iunan laa reeman sirv. <sup>30</sup>Ad rgu'nayadi xSprijt Dios, b n ma nabann di zi'c tijb sen guial ma najdi xbejnman par dxej ni guidxindi lojman. <sup>31</sup>Gol basa'n tiblad gra guialralenya', guialrdxe'ch, guialralen lasa', guialrguidxa'n  lasa', guial-

níee diidxguijdx loj lasa' nē graloj ni mal. <sup>32</sup> Gol gojc benza'c, gol baya lasa'di gol been tēē lasa'di perdon zi'c been Dios lējt perdon por Jesucrist.

### Zi'c rayal guiban ree Xi'n Dios

**5** Zi'c ma najdi xi'n Dios bën rēnman, gol been naguiejn güüнди zi'c laaman. <sup>2</sup> Gol gubajn zagdxē, gol guyēn lasa'di zi'c guyēn Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

<sup>3</sup> Yan lējt guial ma najdi xbejn Dios, ad rayalt guinee loj lasa'di diidx dxuudx, ni'qui graloj ree ni ad rüjnt sirv ad rzēēbladx tēēdi gra par lējt. <sup>4</sup> Ad rnieedi diidxguijdx ree, diidxtont ree, diidx ni ad rayalt guinee di din ad ni zagdxet reen. Mazri zagdxē gol badēē quixtēē loj Dios. <sup>5</sup> Din lējt ma ragbee guial ree bën naban nadxuudx nē ree bën rüjn ni ad rüjnt sirv, nē ree bën rzēēbladx gap gra (mazri yu'guijc reeman ni guin ree luar guiēn reeman Dios), dxel ad zile't chu' reeman lod rniabee Jesucrist con Dios. <sup>6</sup> Gol gojp cudad achu gusquiee lējt con ree diidx ad rüjnt wen, din por ree ni guin zēēd xcasti Dios par ree bën ad ruzoobt diidx. <sup>7</sup> Zeel ad güüнди zi'c rüjn reeman.

<sup>8</sup> Gocli gubajndi zi'c tijb bën nayaaw xquiarguiejn, per yan guial ma najdi tijbzi con Jesucrist, laaman naj biani par lējt. Zeel gol gubajn zi'c ree bën ma zinal biani guin, <sup>9</sup> din guial chinal bejn biani guin ma zile' güünman ni zagdxē zi'c rayal, nē ni naj diidxli. <sup>10</sup> Gol been naguiejn gol been zi'c ruladx Dios. <sup>11</sup> Ad nē lējt güün ni ad rüjnt ree sirv ni rüjn ree bën nayaaw xquiarguiejn, gol guneenē reeman din gagbee reeman ni rüjn reeman. <sup>12</sup> Din xt ratu bejn güman ni rüjn reeman ralan. <sup>13</sup> Per por xtiidx Jesucrist laa gagbee gajc reeman xhienin rüjn reeman. <sup>14</sup> Din zianan zeel rēb loj xtiidx Dios:

Batie'ch xbaaalil, lüj guial zinalil nejz mal.

Bariica loj dol din gusni Jesucrist xquiarguiejn.

<sup>15</sup> Zeel gol gojp cudad xhienaag nabandi, ad gontzi guibandi, gol gubajn zi'c bën yu' xquiarguiejn. <sup>16</sup> Gol been naguiejn guibandi zi'c rayal naga yu' tiamp, din lēn ree dxej guie ad xnejztri naban bejn. <sup>17</sup> Zeel ad gontzi nabandi zi'c naj xixgabidi, gol beenli naguiejn chignia'di xhienaag rēn Dios guibandi. <sup>18</sup> Ad südxidi, din gualrzüdx guin ruxhiin bejn. Zagdxeli gol cwējb nabee xSprijt Dios luxdoodi guidiblagaa. <sup>19</sup> Chi rinē lasa'di diidx, gol baza't ni ca loj ree salmos, loj ree himno, nē gra loj ree cant ni naj par Dios. Abi' guidib luxdoodi gol biil gol baza't tēē Dios zagdxē. <sup>20</sup> Abi' guixie guixie gol badēēd quixtēē loj dux Dad ree Dios por Dad Jesucrist por gra ni rüjnman par dunuj ree.

### Zi'c rayal guibannē lasa' ree bën rliadx Jesucrist

<sup>21</sup> Gol bazoob xtiidx lasa'di por respejt ni rajpidi Jesucrist. <sup>22</sup> Nē lējt bēngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist. <sup>23</sup> Din xinguaaw ree rniabee lacheel zi'c rniabee Jesucrist bën rliadx ree laaman, bën babēē laa reeman loj dol abi' naj reeman xbejnman. <sup>24</sup> Abi' zi'c ruzoob ree bën rliadx Jesucrist xtiidxaman, ziangajc ree bēngunaa rayal guzoob xtiidx lacheel reeman. <sup>25</sup> Nēgajc lējt xinguaaw nuxhliaa ree, gol guyēn lacheelidi zi'c rēn Jesucrist bën rliadx ree laaman, abi' xt güjtaman por laa reeman <sup>26</sup> persi bisüdaman xtol reeman, basiaman laa reeman por xtiidxaman nē por gualrirobnijs, <sup>27</sup> din guidxin reeman lojman nix da't nē ni'qui tijb ni mal, sin falt o dol ren ree, guidxin reeman lojman nayadxuj sin dol. <sup>28</sup> Yan ziangajc ree xinguaaw baxhliaa, rayal guiēn lacheel reex zi'c rēn

laagajc reex. Abi' xin ŕen lacheel, laa gajquixan ŕenx. <sup>29</sup>Din ni'qui tijb bejn ad rdxe'cht laagajcaman, ruyaanli laagajcaman rniajchi' t́eē laagajcaman zi'c ŕijnnē Jesucrist dunuj ree nayajc ree b́en rlliladx laaman <sup>30</sup>guial nayajc ree tijbzi con laaman. <sup>31</sup>Zeel zi'c ŕeb loj xtiidx Dios: “Xinguiaw gusa'n xdad xniaax din gaquix tijbzi con lacheelix abi' grop reex ma naj tijbzi bejn.” <sup>32</sup>Dád naẃeēg naj par chignia' bejn diidx guie ree, per caninan din zian naj Jesucrist con ree xbejnman. <sup>33</sup>Yan, xinguiaw ree, gol guýen lacheelidi zi'c ŕen ĺejt gajc. Guíaad ĺejt b́engunaa, gol gojp respejt lacheelidi.

**6** Nē ĺejt najdi xi'n, guial zinalidi Jesucrist, gol bazoob xtiidx ree xdadidi, din zian rayal ǵüündi. <sup>2</sup>Abi' mandamient yal0j ni ŕeb guial yu' ni yaca' ree bal yaguieen ree ni ŕeb: “Gojp respejt xdad xnial, <sup>3</sup>din guiban zagdx guiban t́eēl xchej loj guidxliuj guie.” <sup>4</sup>Négajc ĺejt dad na ad gusagdiaj xi'ndi chit́eē guidxe'ch reex por zian. Mejorli gol basni's reex zagdx, gol guneenē reex gol balüü t́eē reex zi'c ŕen Dios. <sup>5</sup>Nē ĺejt b́en ŕijn ree xchiin bejn, gol bazoob xtiidx b́en naj xpatrondi loj guidxliuj guie. Con guidib luxdoodi gol gojp respejt gol bazoob t́eē xtiidx reeman, gol gunaladx xchiin Jesucristan cayüjndi. <sup>6</sup>Gol been reeman sirv ad chi ruguiatzi reeman ĺejt par yaya'ndi zagdx loj reeman, gol gunaladx guial Jesucristan cayüjndi sirv guial diidxli cayüjndi zi'c ŕen Dios ǵüündi. <sup>7</sup>Gol been dxiin con gan, gol gunaladx xchiin Jesucrist cayüjndi, ad xchiint b́enguidxliuj. <sup>8</sup>Din ĺejt ma ragbee guial tijbgaj bejn majsi b́en ŕijn xchiin bejn o b́en ad ŕijnnt xchiin bejn, per gudē Jesucrist ni rayalaman zi'ctzi naj ni zagdx beenman. <sup>9</sup>Négajc ĺejt b́en naj ree patron, gol gojc benza'c con ree xmojsidi, ma gojczy rusagzidi laa reeman, din ĺejt ragbee guial b́en rniabee

laa reeman nē ĺejt yu'man xanyabaa, abi' ad rbetaman loj bejn.

### Gol guzudxi'ch loj ni rlliladxidi

<sup>10</sup>Rni t́eēn lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee naroobaman. <sup>11</sup>Gol gojp ĺejt gajc con xguialrniabee Dios din sudxi'chidi chit́eē ǵüün xinxab ĺejt gan con ree ni rusquiee. <sup>12</sup>Din ad cayguieent ree naguiejn yaguieen ree gan loj tijb ni naj b́eēl nē dxijt, caydijl ree con gra loj sprjtmal zi'c ree ni rajp guialrniabee, guialguxtis nē gra loj xsprijt xinxab ni yu' ni canabee t́eē loj guidxliuj guie. <sup>13</sup>Zeel gol gojp ĺejt gajc con xguialrniabee Dios din chile' taandi xhiet́eēz loj guialzi gui't sudxi'ch t́eēdi loj xhiet́eēz ni saquidi.

<sup>14</sup>Gol guzudxi'chcliza por ni diidxli ni ma ragbeedi, gol basnuu t́eē zi'c rayal guibandi. <sup>15</sup>Gol guzusin par guinieedi xtiidxza'c Jesucrist din por laan yadxu' ree zagdx con Dios. <sup>16</sup>Gol badxe'guijc t́eē guial guialrlliladx ni rajpidi naj ni ragnē ĺejt loj gra ni źeēd por xinxab. <sup>17</sup>Nē ni been Dios perdon xtolidi, laan naj ni rut́eē ĺejt, guíaad xtiidxaman naj zi'c tijb espad ni runee xSprijt Dios lojdi. <sup>18</sup>Ad gucẃeēz cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheeladxidi, gol gurejdx t́eēman por gra ree xbejnman. <sup>19</sup>Gol gurejdx gunab t́eēman por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidnē perdon. <sup>20</sup>Dios bacaabee naj par ganen xtiidxza'caman, abi' por zian yu'n ladxguuib. Per gol gurejdx gunab Dios chit́eē gadxeban ǵün xtiidxaman zi'c rayal ǵünan.

### Diidx bigra ca ree loj gui'ch guie

<sup>21</sup>Tíquico, tijb du lasa' ree b́en raýen da't ree, abi' diidxli cayüjnman dunuj

ree yudar cayguieen ree sirv Jesucrist, laaman gugojn lëjt gra xhienaag za'n xhie tëë cayünan, <sup>22</sup> din par zianczi caxhalan laaman din gugojnman lëjt xhien-aag nadxu'n niz guie yagu' tëëman luxdoodi. <sup>23</sup> Rniaaban loj Dios guial gra

ree bën riladx Jesucrist, cwe'cdxeman luxdoo reeman guiën tëë lasa' reeman, chililadx tëë reeman laaman nè Dad Jesucrist, <sup>24</sup> güünle' tëëman gra ree bën wali rën Dad Jesucrist.



## Gui'ch guxhaal San Pabl loj ree bén Filipos rliladx Jesucrist

### Rugajpdioz Pab bén rliladx ree Jesucrist

**1** Naj Pab con Timoteo, raguieenan sirv loj Jesucrist. Caycaan gui'ch guie par lëjt najdi bén rliladx Jesucrist luguiedx Filipos, në par ree bén rniabee lojdi rulüü tëë reeman xtiidx Dios në ree bén rüjn yudar bén rliladx ree Jesucrist. <sup>2</sup>Dux Dad ree Dios në Dad Jesucrist güünle' lëjt, yabe'cdxe tëë reeman lëjt.

### Rbejdx rniab Pab Dios por ree bén rliladx Jesucrist

<sup>3</sup>Zianczi chi rasaaladxan lëjt, rudën quixtëë loj da Dadan Dios. <sup>4</sup>Abi' zianczi chi rbedx rniaaban laaman dád nix ru luxdon, rbedx rniaaban laaman por gradi. <sup>5</sup>Din diizd dxej ni guzuloj rliladxidi Jesucrist dxel guzuloj raguieen ree tijbzi xgab par guire'ch xtiidxaman xt yan. <sup>6</sup>Ragbeechaawan guial diizd chi guzuloj rliladxidi xtiidx Dios, laaman cusnuu cayagnë lëjt din gaquidi zi'c rayal xt dxej gui't Jesucrist stijb. <sup>7</sup>Najczi guial günan xgab zian por gradi, din rusaaladxan lëjt, zi'c chi yu'n ladxguiib ziangajc chi culün conin naj diidxli xcwent Dios din tibloj cayüjnle'man dunuj ree. <sup>8</sup>Dios ragbee guial dád rusaaladxan lëjt guial rënan lëjt zi'cgajczi rën Jesucrist lëjt. <sup>9</sup>Rniab tëën lojman din mazri guiën lasa'di, abi' guixie guixie gusnuu guixhialaman xquiarguejndi din gagbeedi ni rayal güüندی, <sup>10</sup>din chile' cwedi ni naj mazri zagdxë. Abi' zian guibandi naya sin dol niz loj Dios, chitëë xhie naman contr lëjt dxej ni gui't Dad Jesucrist stijb. <sup>11</sup>Abi' por laaman zajc guibandi zi'c rën Dios zi'c balüü Jesucrist lëjt din gap ree bejn Dios mazri respejt guilies tëë reeman xvaloraman.

### Yabajn ree par Cristo

<sup>12</sup>Compniar raliduladx ree Jesucrist, rënan gagbeedi guial graczi ni guza'can cayüjn reen yudar persi care'ch xtiidxza'c Jesucrist. <sup>13</sup>Abi' yan, gra ree bén yu' lën palas në gra ree bén zojb niz guie ragbee reeman guial yu'n ladxguiib por guial najn xbejn Jesucrist. <sup>14</sup>Abi' chi baguiaa ree compniar raliladxnë' ree Jesucrist guial yu'n ladxguiib, mazri guzudxi'ch reeman abi' zien da't reeman guyu luxdoo gualtie'ch reeman xtiidx Jesucrist sin gualrdxëb.

<sup>15</sup>Per diidxliczi yu' reeman rtie'ch xtiidx Jesucrist guial rdëdloj reeman naj abi' rën reeman gac reeman mazri bén zojbloj. Per yu' reeman rtie'ch xtiidxaman guial naj xixgab reeman zagdxë. <sup>16</sup>Yu'za reeman guial rën reeman Jesucrist, catie'ch reeman xtiidxaman abi' ragbee reeman guial yu'n ladxguiib guial za'dxi'chnë'n xtiidxaman guial najcan diidxli. <sup>17</sup>Per yu' reeman ad walit reeman naj xixgab reeman zagdxë catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri lën ladxguiib guie. <sup>18</sup>Per achet güünan majsi zagdxë naj xixgab reeman o ad zagdxet ya, contzi ma catie'ch reeman xtiidx Jesucrist, laan naj ni rabaanë'n abi' mazri yabaan. <sup>19</sup>Din ragbeen guial yariin loj ni cadëëdan guial cabejdx canabidi Dios por naj në guial cayagnë xSprijt Jesucrist naj. <sup>20</sup>Naj ragbee guial ad yu't dxej guslaa Dios naj yaya'nxtun, sin gualrdxëb gulün bejn ree xhien-aag ra'pan respejt Jesucrist majsi nabanen o majsi guiëtan. <sup>21</sup>Din par naj la'tgaj nabanen cayünan laaman sirv, abi' bal guiëtan mazri zagdxen din ma gazun con laaman. <sup>22</sup>Per bal gabajnrnan loj guidxliuj guie, gusnuu günan sirv loj Cristo zi'c rayal, per ad ragbeetan conin naj zagdxë par naj. <sup>23</sup>Din loj grop ree ni

guin d d naw egan par gaben conin g nan, tijb r nan yaca' Dios naj din gazun con Cristo, laan naj mazri zagdxe par naj, <sup>24</sup> per por l jt r jn naguiejn gabajnrn. <sup>25</sup> Abi' naj ragbeen guial gabajnrn din g nan l jt yudar gusnuu chinanidi xnejz Dios, din chu' luxdoodi gusnuu chililadxidi Jesucrist. <sup>26</sup> Abi' chi guidganan l jt stijb, chu' ni yabaan di gud  t edi quixt  loj Jesucrist por ni beenman por naj.

<sup>27</sup> Per ganin l jt, gol been naguiejn gol gubajn zi'c rayal, zi'c r b loj xtiidx Jesucrist. Din bal guidganan l jt o bal id zialan, per r nan guiguiejn guial za'dxi'chidi nadxag t e lasa'di abi' tiblojz cay jndi naguiejn catie'chidi xtiidx Jesucrist. <sup>28</sup> Ad guidxebidi b n rdxe'ch l jt. Zian guiguien guial ma canijt reeman loj Dios, per l jt zian guiguien guial ma rajpidi perdon z ed loj Dios. <sup>29</sup> Din ad cwabeetidi par chililadxzidi Jesucrist, cwabeedi n  par sagdiajdi por laaman. <sup>30</sup> L jt con naj tiblojz cayd ud ree tarbajw par yatie'ch ree xtiidx Jesucrist, ma baguiaadi xhienaag rd edan tarbajw por xtiidxaman abi' yan caguiejndi guial cusnuu cay nan mazran.

### Nadxag yadxu' ree por Jesucrist

**2** Yan, zi'c ma yu' luxdoodi zagdxe por Cristo, zi'c ma yu' luxdoodi nix guial rusnuu r n lasa'di, n  zi'c ma nabann di xSprijt Dios n  zi'c yu' luxdoodi nix con lasa'di, n  zi'c raya lasa'di. <sup>2</sup> Gol basnuu gol gubajn zian din yagu'di luxdoon nix. Gol gubajn, gol guy n t e lasa'di tibloj, gol gojc tijbzi, gol been t e tijbzi xgab. <sup>3</sup> Ad s ebladxidi g undi gan loj ree lasa'di o guilies xvalor l jt gajc, mazri zagdxe gol been naya, gol been t e xgab guial stijb lasa'di mazri lasajc guial lojdi. <sup>4</sup> Ad bal chu'di xgab por l jtzi, gol guyu xgab por stijb lasa'di.

<sup>5</sup> Gol been xgab zi'c been Jesucrist xgab. <sup>6</sup> Din majsi laaman naj Dios, per ad

guzudxi'chtaman guial ni jbaman laaman naj Dios. <sup>7</sup> Basa'n xgualrniabee-man persi bi'taman loj guidxliuj guie zi'c tijb mojs abi' gojlaman zi'c tijb b nguidxliuj. <sup>8</sup> Abi' chi gocaman zi'c tijb b nguidxliuj beenman naya abi' bazoob xtiidx xDadaman, xt g jtaman loj cr jz, majsi ni natu naj guial r jt loj cr jz. <sup>9</sup> Zeel d d guialrniabee naroob bad e Dios lojman, bad e t eman lojman laj bejn ni mazri lasajc loj gra laj bejn. <sup>10</sup> Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, n  gra ree ni yu' loj guidxliuj, n t e ree ni yu' l n liuj. <sup>11</sup> Abi' gra bejn gui b guial Jesucrist naj Dad, zian guilies reeman xvalor dux Dad ree Dios.

### Xbejn ree Jesucrist naj zi'c tijb guij ni rulaa bacha'

<sup>12</sup> Zeel compniar raliduladx ree Jesucrist, zi'c r nan l jt abi' rmin l jt guial zi'c bazoobidi da diidxan chi guzun con l jt, ziangajc gol bazoob da diidxan mazri yan guial za'n zijt. Con guialrdxeb n  con respejt gol been zi'c rayal g un ree b n ma naj perdon. <sup>13</sup> Din por Dios z ed xgabza'c ni r jndi, abi' laaman ragn  l jt din g undi zi'c r nman.

<sup>14</sup> Gol been gra ni rayal g undi, achet guial ad zayuladxtidi achet t et guial tildiidxidi, <sup>15</sup> chit e xhie guinee bejn l jt o chit e xhie xfaltidi yadxelj reeman. L jt najdi xi'n Dios gol gubajn naya niz loj ree b n ad zinalt xnejz Dios, b n r jn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay, <sup>16</sup> guial za'dxi'chn di xtiidx Dios ni zidn  guialnaban. Abi' zian yabaan por l jt dxej ni gui't Jesucrist stijb guial gagbeen ad bentan dxiin xlia' ad bizaa t etan xlia'. <sup>17</sup> Din guial rliadxidi Dios laan naj zi'c tijb gon par laaman, abi' nix yu' luxdon majsi gui tan din yayaaloj gon guin

guial rabaan n gradi. <sup>18</sup>Yan ziangajc gol babaa, gol babaa zi'c rabaan.

### Timoteo n  Epafrodito

<sup>19</sup>Dad Jesucrist gagn  naj din diob gaxhalan Timoteo lod zobjidi din xhien-ladxan chi gagbeen xhienaag riga'di. <sup>20</sup>Din tijbzi Timoteo yu' l jt xgab zi'c yu'n l jt xgab. Achut b n ru l jt xgab zi'c laaman. <sup>21</sup>Graczi reeman ru xgab per por laagajc reeman, ad rut reeman xgab por ni r n Jesucrist g  n reeman. <sup>22</sup>Per ma ragbeedi xhienaag naj Timoteo, ma ragbeedi xhienaag cay jnman naj yudar persi catiechan xtiidx Jesucrist. Cay jnman naj yudar zi'c r jn bejn xDadaman yudar. <sup>23</sup>Zeel r nan gaxhalan laaman din guitixlojman l jt, gagbeezan xhienaag gariican loj cwent guie <sup>24</sup>Dad Jesucrist gagn  naj din diob guidgana quijb naj l jt.

<sup>25</sup>Abi' ruli  r jn naguiejn gaxhalan da miwan Epafrodito ladxidi. L jt guxhaal laaman din g  nman naj yudar loj ree ni ryaadxan. Abi' zian cay jnman naj yudar, tiblojzi cayzaagdiajn. <sup>26</sup>D d r nman guidganajman l jt abi' d d yu'man xgab guial gogbeedi gogxuuman. <sup>27</sup>Abi' walican gogxuuman zamer ni jtaman. Per baya Dios laaman, abi' ad laatzaman, n gajc naj bayaman, chit   chu'naya luxdon mazri zi'c ma guyu nayan. <sup>28</sup>Zeel diob gaxhal gajcan laaman din yabaadi chi guguaadi laaman stijb chit   chu'naya t  n mazri. <sup>29</sup>Gol babaa, gol baca'man guial najman tijb du lasa' ree b n rliladx Jesucrist. Zian gol guy n gra ree b n naj zi'c laaman. <sup>30</sup>Din zamer ni jtaman guial r jnman sirv loj Jesucrist, guzujman loj guialg jt guial beenman naj yudar loj ni ad bile't niijn quijb l jt naj yudar.

### Ni mazri lasajc

**3** Yan, compniar raliduladx ree Jesucrist, gol badxe' luxdoodi zagdxe

por Dad Jesucrist. Par naj achetan guial ganin l jt diidx ni ma rni gajcan tijb, din par l jt lasajc ree diidx guin chit   chu' ni gusquiee l jt. <sup>2</sup>Gol gojp cudad con ree bentont, b n ad nad dguient, benmal, b n r jn ree naguiejn din chu' ree bejn xsen b n Israel. <sup>3</sup>Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman b n nabajnn ' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr. <sup>4</sup>Majsi zajc gales da valoran guial zinaalan gra ree costumbr, per bal yu' b n rlies xvalor gajc, n gajc naj zajc g n zian. <sup>5</sup>Din chi goc toxman goolan, badxe' reeman naj sen ni ru ree b n Israel. Abi' b n Israel naj, loj xdiaa Benjam n zialan, rnien diidx Hebreo din xi'n ree b n rniece diidx Hebreo naj. Benan gra ni rniabee ley din b nfarisew gojcan. <sup>6</sup>Benan zi'cgajczi r jn ree b nfarisew, zeel xt guzunaalan b n rliladx ree Jesucrist din g nan laa reeman ni mal, benan gra zi'c tal rniabee ley abi' achut zajc ni jb guial ad cay ntan zi'c rayal. <sup>7</sup>Gra ni benan nadxel, par naj d d lasajcan nadxel, per yan achet lasajcan par naj, din yan Cristo mazri lasajc. <sup>8</sup>Abi' achet ni mazri lasajc guial loj ni n nbeen Dad Jesucrist, por laaman gra ni benan nadxel ma basa'nan tiblax, naj reen zi'c tijb guix par naj din nabee Cristo naj guidiblagaa, <sup>9</sup>abi' gacan tijbzi con laaman. Ad naladxtan por guial r nan zi'c rniabee ley achet dol ra'pan niz loj Dios, naladxan por guial rliladxan Jesucrist, din por guialrliladx guin ma naya bejn loj Dios. <sup>10</sup>Zeel r nan g nbeechaawan Cristo, g nbee t  n guialrniabee ni basban laaman, r n t  n gadaanan xhiet  z loj guialrzagdiaj ni gad  dan zi'c gudaanman, ma guidxin dxej gacan zi'c rayal gacan por xguialg jtaman. <sup>11</sup>Din yu'guican guial yabanan zi'c baban Jesucrist.

### Ni guneer Dios xanyabaa

<sup>12</sup> Ad canitan lojdi guial ma bayaaloj benan gra o guial najn benza'c, per cay n naguiejn din gacan zi'c r n Cristo gacan diizd chi guzulorj rniabeeman naj. <sup>13</sup> Compniar raliduladx ree Jesucrist, naj rni l jt guial ad wayaalojt g nan zi'c rayal, per cay nan naguiejn din yayanladxan gra ni benan gocli din gac gusunun par delant, <sup>14</sup> din yayaaloj g nan zi'c rayal din chile' gaca'n ni guneer Dios xanyabaa zi'c gurejdxaman dunuj ree por Jesucrist.

<sup>15</sup> Abi' dunuj ree guial ma rayagbee ree zagdxer ni r n gui b xtiidx Dios, rayal yaguieen ree xgab zian. Per bal garen naj xixgabidi guial loj ni canin lojdi, Dios gulu  l jt conin naj diidxli. <sup>16</sup> Per r jn naguiejn yabajn ree zi'c ma rayignia' ree.

<sup>17</sup> Compniar raliduladx ree Jesucrist, gol gubajn zi'c naban, gol baguiaa t   xhienaag naban ree b n naban zi'c naban. <sup>18</sup> Din zien volt ma rnin lojdi abi' yan caydxi'nanzatijb, xt ronanzanin l jt guial zien ree bejn naban zi'c ree b n ad rliadx guial g jt Cristo loj cr jz por dux xtol ree. <sup>19</sup> Abi' ree b n guin castizi naj ni rb z laa reeman din mazri ruladx reeman g  n reeman ni dxuudx. Abi' luar yatu reeman por ni r jn reeman aal mazri rlies xvalor reeman guial mazri r jn reeman xgab por ree ni yu' loj guidxliuj guie. <sup>20</sup> Per dunuj ree ma nayab ree xanyabaa abi' cayl jz ree guial diizd xanyabaa gui't Dad Jesucrist b n gudix por dux tol ree. <sup>21</sup> Laaman naj b n guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' g  nman zian con gualrniabee ni rajpaman par nabeeman gra.

### Gol badxe' luxdoodi zagdxer por Dad Jesucrist

**4** Zeel compniar raliduladx ree Jesucrist, r nan l jt r n t  n guidganan l jt, l jt rgu' luxdon zagdxer, abi' najdi zi'c tijb prem par naj, gol guzujdxi'ch loj ni rliadxidi Dad Jesucrist.

<sup>2</sup> Yan, rniaaban loj Evodia n  loj S ntique din guidxag cwe reeman guial naj reeman compniar loj ni rliadx reeman Dad Jesucrist. <sup>3</sup> Abi' ziangajc l j compniar ni cayguieen dxiin tijbzi, rniaaban lojl din g  nl yudar b ngunaa guin ree din laa reeman been naj yudar bire'ch xtiidx Jesucrist n  Clemente con ree benren, gra reeman ma yu' laj loj libr ni yu' laj ree b n guiban tiblayaa con Dios.

<sup>4</sup> Zianczi gol badxe' luxdoodi zagdxer por Dad Jesucrist. Naj rni l jt  Gol badxe' luxdoodi zagdxer! <sup>5</sup> Gol been naguiejn g  nbee gra bejn l jt guial najdi benza'c. Gol badxe'guijcer guial zamer gui't Dad Jesucrist zatijb.

<sup>6</sup> Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol bad   t   quixt   lojman. <sup>7</sup> Dios yabe'cdxer luxdoodi, zro' rabe'cdxeman luxdoo bejn mazri guial loj ni naladx bejn, abi' laan naj ni gagn  l jt din yayaalyuj luxdoodi yayaalyuj t   xquiarguiejndi guial ma najdi tijbzi con Jesucrist.

### Gol badxe'guijcer ganax ni zagdxer

<sup>8</sup> Naga gad lox g nan gui'ch guie, compniar raliduladx ree Jesucrist, rnin l jt gol badxe'guijcer ganax ni diidxli, ni rayal respejt n  ni naj xnejz. Gol badxe'guijcer ganax ni r jn sirv, ni naj zagdxer n  ni rayal g  n b n z  xnejz. Gol badxe'guijcer gra ni naj zagdxer n  ni guilies bejn xvalor.

<sup>9</sup> Gol been zi'c basidan l jt, zi'c ma bal n l jt, gol been zi'c rnin l jt zi'c ma

baguiaadi benan, zian gagnë Dios lëjt bén rabe'cdxe luxdoo ree bejn.

### Ni badëed ree bén filipos loj Pab

<sup>10</sup> Dád rabaan por Dad Jesucrist guial ma basaaladxidi naj. Ad canitan bayan-ladxidi naj, canin zian guial ad gojctri nüjndi naj yudar. <sup>11</sup> Ad canitan zian guial cayaadxan xhienin din ma basidan gadëëdan con ni ra'ptzan. <sup>12</sup> Ragbeen xhienaagan chi naban bejn loj guialprob ragbee tëen xhienaagan chi achet ryaadx bejn, din ma basidan rdaanan ni zëëdtzi, bal rawan o bal id rawan, bal rüjnan naj sobr o bal ryaadxan. <sup>13</sup> Rajc rdaanan ni zëëdtzi con xyudar Jesucrist. <sup>14</sup> Per zagdx naj ni beendi guial beendi naj yudar loj ni cazaagdiajn.

<sup>15</sup> Ragbee tëedi guial chi briin niz Macedonia din suloj gatie'chan xtiidxa'c Jesucrist, lëjtzi bazaladx xhienin lon guial loj gra ree guiedx lod ma rliladx reeman xtiidx Jesucrist, zi'c benan lëjt yudar ziangajc beendi naj yudar. <sup>16</sup> Ziangajc chi guzun luguiedx Tesalónica chi

biaadxan xhienin, bëlczí volt beendi naj yudar. <sup>17</sup> Ad cayguiltan mod din güüdi naj yudar mazri, ni rënan naj guial mazri yaya'ndi zagdx loj Dios. <sup>18</sup> Ma baca'n gra ni guxhaalidi con Epafrodito, yan xt sobr rüjnan naj, par naj ni guxhaalidi naj zi'c tijb ni nadsoon o tijb gon ni ruree nejxh, ni ruladx Dios. <sup>19</sup> Zeel Dios gunee lëjt gra ni ryaadxidi por ree ni za'c ni rajpaman xanyabaa con Dad Jesucrist. <sup>20</sup> ¡Abi' por guialrniabee ni rajp dux Dad ree Dios, rayalczi yaya'p reeman respejt goctëéz! Amén.

### Rugajpdioz ree bén rliladx Jesucrist bén Tesalónica ree

<sup>21</sup> Gol bagajpdioz gra ree bén ma naj xbejn Jesucrist, guiáad gra ree bén rliladx Jesucrist bén za'në' reen guie, rugajpdioz reeman lëjt. <sup>22</sup> Gra ree bén zojb ree guie, bén ma naj ree xbejn Jesucrist, në gra ree bén rüjn sirv loj rey, në reeman rugajpdioz lëjt.

<sup>23</sup> Dux Dad ree Jesucrist güünle' gradi. Amén.

## Gui'ch guxhaal San Pabl loj ree b́en Colosas rliladx Jesucrist

### Rxhiaal Pab xtiidx Dios

**1** Naj Pab, najn tijb xi apóstol Jesucrist, din zian ŕen Dios. Naj con Timoteo nayajcan compniar raliduladxan Jesucrist, <sup>2</sup>caycaan gui'ch guie par ĺejt guial diidxli zinalidi xtiidx Jesucrist, ĺejt guial najdi xbejn Dios luguiedx Colosas. Dux Dad ree Dios gúünle' ĺejt cwe'cdxe t́eeman luxdoodi.

### Rbejdx Pab Dios por ree xbejn Jesucrist

<sup>3</sup>Beegaj chi rarejdxan Dios, xDad Dad Jesucrist, rad́eedan quixt́e lojman por ĺejt. <sup>4</sup>Din ma baguiejnan xhienaag rliladxidi Jesucrist xhie t́e naag ŕendi gra ree b́en naj ree xbejnman. <sup>5</sup>Guial cabézidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. <sup>6</sup>Abi' ree diidxza'c guin ni ma bacaagdiaguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli ŕenman ĺejt. <sup>7</sup>Ĺejt gogbee diidxli guin ree chi balúu Epafras laa reen ĺejt. Laaman cayújn dunujn yudar abi' dád raýen laaman, din laaman diidxli cayújn sirv loj Jesucrist delant lojdi. <sup>8</sup>Abi' t́e laaman be diidx du lojn xhienaag ŕen lasa'di guial yu' xSprijt Dios luxdoodi. <sup>9</sup>Zeel diidx chi baguiejnan xhienaag nabandi, ad racwéetz rarejdxan Dios por ĺejt din chignia'di zagdx ree xhienaag ŕenman gúündi gunee t́eeman ĺejt gra loj guialrajc guixhial t́eeman xquiar-guiejndi por xSprijtaman. <sup>10</sup>Abi' zian guibandi zi'c rayal guiban ree b́en rliladx Jesucrist, din gúündi zi'c tal ruladxaman abi' gusnuu gúündi ganax ree ni zagdx gusnuu t́e gúünbeedi Dios mazri. <sup>11</sup>Abi'

ranaaban lojman din con xguialrniabee za'cdxoonman gagńeman ĺejt din sudxi'chidi, taan t́eedi xhiet́e loj guialzi t́edidi sin guial yalenyadi. <sup>12</sup>Abi' xt nix chu' luxdoodi gud́eedi quixt́e loj dux Dad ree Dios guial basiaman ĺejt din yayalidi ni rayal ree xbejnman, b́en zinal ree xnejzaman. <sup>13</sup>Laaman bab́e dunuj ree loj xguialrniabee xindxab abi' bagu' man dunuj ree loj xguialrniabee xi'nman Jesucrist b́en ŕenman, <sup>14</sup>abi' gudijxaman por dux tol ree, yan ma raya'p ree perdon loj Dios.

### Por xguialgújt Jesucrist ma nadxu'ńe' ree Dios zagdx

<sup>15</sup>Achut zajc guguaa Dios, per Jesucrist naj zi'c gajczi naj Dios. Abi' laaman mal rniabeeńeman Dios diidx chi gad guidxliuj gacchaaw. <sup>16</sup>Por Jesucrist gojc gra ni yu' xanyabaa ńe loj guidxliuj, zi'c ni ruguaa bejn zi'c ni ad ruguaataman. Abi' por laaman yu' graloj guialrniabee ńe graloj guialguxtis ni rajp ree ni ad rajt ruguaa ree bejn. Gran gojc por laaman ńe par laaman. <sup>17</sup>Mal yu' Jesucrist diidx guia'xchej chi gad guidxliuj gacchaaw, laaman dxiibguijc gra abi' rniabeeman gra. <sup>18</sup>Abi' laa t́eeman rniabee gra ree b́en rliladx laaman, b́en ma naj ree xbejnman. Laaman naj b́en yaloj abi' yaloj laaman baban loj ree bengüt din guiguien guial tijbzi laaman rajp guialrniabee loj gra. <sup>19</sup>Din bayuladx Dios gac Jesucrist zi'c gajczi naj Dios. <sup>20</sup>Abi' por Jesucrist gra b́enguidxliuj ma za' zagdx con Dios, zi'c ni yu' loj guidxliuj zi'c ni yu' xanyabaa. Za' bejn zagdx con Dios por xguialgújt Jesucrist loj crújz. <sup>21</sup>Gocli ad gojctidi tijbzi con Dios, gojquidi zi'c b́en bidxe'ch laaman guial beendi ganax ni mal. <sup>22</sup>Per yan ma za'di zagdx con Dios por ree guialzi ni gud́ed Jesucrist chi gütaman loj crújz din gac guidxindi lojman naya sin dol chit́e xhie naman lojdi. <sup>23</sup>Per par zian rayal sudxi'chidi loj

gualrliladx ni rajpidi, ad gucwëez chinalidi xtiidxza'c Jesucrist ni ma biguiejndi. Abi' diidxza'c guin gajc ree ma bire'ch guidib guidxliuj. Abi' naj naj tijb ree bén catie'ch diidxza'c guin ree.

### **Bacaabee Dios Pab din güünman sirv loj ree xbejn Dios**

<sup>24</sup> Abi' yan nix yu' luxdon por gualzi ni cadëedan gual rünan lëjt yudar abi' lasa'gajc gualzi ni gudëd Jesucrist cadëedan din chile' günan yudar bén riladx ree laaman bén ma naj ree xbejnman. <sup>25</sup> Din Dios bacaabee naj par günan sirv loj ree xbejnman. Abi' laaman banee dxiin guin naj din gulün lëjt xtiidxaman zi'c tal najn. <sup>26</sup> Diizd tiamp gulal ad bignia't ree bejn zagdx ni rën guiëb xtiidx Dios. Per yan ma balüüman ni rën guiëban loj ree xbejnman. <sup>27</sup> Din gugojn reeman bén ad najt ree bén Israel xhienaag naj xgualnaza'c za'cdxoonman. Abi' ni ad balüüt Dios loj ree bejn tiamp gulal naj gual nabannë Jesucrist lëjt abi' por laaman ragbeedi zagdx gual yu' dxej yayalidi xanyabaa. <sup>28</sup> Abi' dunujn batie'ch xtiidx Jesucrist, baneen'ën bejn ree, balüü tëen laa reeman con gra quiargueijn ni runee Dios din chi guidxin reeman lojman por Jesucrist ma naj reeman zi'c rënman gac reeman. <sup>29</sup> Abi' naj dád cayünan naguiejn cayünan dxiin guie con gualrniabee ni baneeman naj.

**2** Rënan gagbeedi gual cayün da'tan naguiejn cayünan lëjt yudar, në ree bén zojb guiedx Laodicea në gra ree bén ad wayünbeet naj. <sup>2</sup> Cayünan naguiejn din yayu luxdoo reeman din gusnuu guiban reeman tijbzi, guiën lasa' reeman chu' tëe xquiargueijn reeman din chile' güünbee reeman ni ad balüüt Dios bejn ree gulal abi' laaman naj Jesucrist, <sup>3</sup> por laaman zëed gra gualrajc në gualrignia'. <sup>4</sup> Canin diidx guie ree lojdi chitëe chu gusquiee lëjt con ree xtiidx zagdx

reeman. <sup>5</sup> Majs ad za'tan con lëjt, per yu'guican lëjt abi' rabaan gual cayüjndi zi'c rayal, za'dxi'ch tëedi loj gualrliladxidi Jesucrist.

<sup>6</sup> Zeel zi'c ma riladxidi Dad Jesucrist, ziangajc gol gojc tijbzi con laaman. <sup>7</sup> Gol been naguiejn gol binalaman guidiblagaa, gol guzudxi'ch loj gual riladxidi laaman zi'c ma basiididi ad gucwëez tëe gudëedi quixtëe loj Dios.

### **Guialnaban ni rudëed Jesucrist**

<sup>8</sup> Gol gojp cudad, ad tiëbidi güün ree bén rën gusquiee lëjt gan con ree ni rulüü reeman o con ree diidx ni ad rüjnt sirv ni zëed por ree costumbr o por ree gualrniabee yu' loj guidxliuj, din ad zëedt reen por Jesucrist.

<sup>9</sup> Din zi'cgajczi naj Dios, ziangajczi naj Jesucrist. <sup>10</sup> Abi' nabannëdi Dios guidiblagaa gual najdi tijbzi con Jesucrist, din laaman rniabee loj gra gualrniabee në loj gualguxtis. <sup>11</sup> Abi' tëe gual ma najdi tijbzi con Jesucrist ma yu'di xsenman, per ad lasa't sen ru ree bén Israel, sen yu'di por laaman najn gual ma basa'ndi dol tibläd. <sup>12</sup> Chi gurobnijsidi, laan rën guiëb gual güjtidi con Jesucrist abi' babandi con laaman stijb gual riladxidi Dios rajp gualrniabee persi basbanman Jesucrist loj gualgüjt. <sup>13</sup> Gocli gojquidi zi'c bengüt delant loj Dios por xtolidi në por gual ad guyutidi sen ni ru ree bén Israel. Per yan por Jesucrist, ma been Dios dux tol ree perdon abi' ma raya'p ree guialnaban con Jesucrist. <sup>14</sup> Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi güt Jesucrist loj crüjz abi' laaman naj bén gudijx laan por dunuj ree. <sup>15</sup> Abi' zian beenman gan gra loj ree gualguxtis në loj gra gualrniabee zëed loj xindxab. Basa'nx-tuman laa reeman loj ree bejn, beenman laa reeman gan gual güjtaman loj crüjz.

### Gol been xgab ni yu' ree xanyabaa

<sup>16</sup> Zeel achut rayal gula'ch l jt por ni rawidi n  ni r 'di o por guial ad r jntidi cwent dxej lanij o dxej ni yu' b ew c b o dxej raziiladx ree bejn. <sup>17</sup> Din gra ree ni guin naj zi'c tijb xbala Jesucrist abi' yan laaman naj b n ma bi't. <sup>18</sup> Ad ti bidi gutiaalguiiw b n r n ree anjl zi'c Dios l jt, par gusa'ndi xnejz Dios, din laa reeman rul   naj reeman b n naxanladx, per ad najt reeman laan r b t   reeman guial yu' ni rul  loj loj reeman. Dxel laagajc reeman rlies xvalor por xixgab gajc reeman. <sup>19</sup> Per laa reeman ad naban-n t reeman Jesucrist, b n rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xixgab Dios.

<sup>20</sup> Yan bal walidi ma g jtidi con Jesucrist par ree ni rb  guijc ree b n-guidxliuj,  chexquiza zeel ruzoobidi xti-idix ree b n r b: <sup>21</sup> "Ad rayalt gugaalil ni guin, ad gawil ni guin, ad guini-aazil ni guin"? <sup>22</sup> Gra ree mandamient guin yu' dxej nit reen, din b nguidxliuj gul  guijc laa reen. <sup>23</sup> Diidxiczi rul   lasajc da't ree mandamient guin guial tant r jn ree bejn naguiejn g  n reeman laa reen cumplid abi' r jn reeman b n naxanladx dxel rusagzi laagajc reeman, per achetci lasajc ree mandamient guin par gucw  z reen ni mal rz  bladix reeman g  n reeman.

**3** Zeel bal ma rajpidi guialnaban c b con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. <sup>2</sup> Ad g  ndi xgab ganax ree ni yu' loj guidxliuj, gol been xgab mazri ni yu' ree xanyabaa. <sup>3</sup> Gol gunaladx ma g jtidi par ree ni yu' loj guidxliuj abi' ma rajpidi guialnaban delant loj Dios por Jesucrist. <sup>4</sup> Abi' chi gui't Jesucrist stijb, b n runee dunuj ree

guialnaban, n  l jt yayal guibann  laaman loj xguialrniabee za'cdxoonman.

### Zi'c rayal guiban ree b n rliladx Jesucrist

<sup>5</sup> Yan, gol basa'n gra ree ni mal riga' loj guidxliuj guie. Ad sun di b n ren b n ad najt lacheelidi. Gol basa'n ni ad r jnt ree sirv, n  ree xgabmal n  ree ni mal yu'di gan g  ndi. Ad s  bladix t  di gapidi gra loj ni yu' loj guidxliuj din b n r jn zian laan r nman mazri luar Dios. <sup>6</sup> Abi' por ree ni guin z  d xcasti Dios par ree b n ad ruzoobt xtiidxaman. <sup>7</sup> Lasa' ree ni mal guin beendi chi gadidi g  nbee Jesucrist. <sup>8</sup> Per yan gol basa'n gra ree ni mal guin zi'c guialrdxe'ch, guialralen lasa', guialr jn ni mal lasa', guialrnieeguijdx n  guial rniee diidxguijdx. <sup>9</sup> Ad rusquiee loj lasa'di, din ad nabantridi zi'c gubandi gocli chi beendi ni mal ree, <sup>10</sup> din yan ma bidxaa mod nabandi. Ma najdi zi'c benc b guial chigagaj ma cayajquidi zi'c r n Dios gaquidi din g  nbeedi Dios mazri zagdx, b n runee l jt guialnaban. <sup>11</sup> Abi' chi ma rliladx bejn Jesucrist, achet g  nan chut  z najman, bal najman b n grieg o b n Israel, bal yu'man sen ru ree b n Israel o ad yu'taman laan ya, bal najman benzit o najman b n zojb dajn, bal najman zi'c b n nado' o ad najtaman zi'c b n nado' Per ni mazri lasajc naj guialrliladxaman Jesucrist, b n rniabee za' t  man con dugra ree.

<sup>12</sup> Abi' Dios r n l jt, zeel gulejman l jt din gaquidi xbejnman. Zeel gol baya bejn ree, gol gojc benza'c, gol gojc b n naxanladx, ad gaquidi bendxal, gol gojp pasens lasa'di. <sup>13</sup> Ad yalenyane' lasa'di. Gol been t   perdon lasa'di bal xhie r jnn  reeman l jt. Zi'c been Dad Jesucrist l jt perdon ziangajc gol been perdon bejn ree. <sup>14</sup> Gol badxe'guijc guialr n lasa' naj ni mazri lasajc. Abi' guialr n lasa' guin r jn yudar din guidxaa guiban bejn. <sup>15</sup> Gol cw jb nabee Jesu-



cris lëjt din yabedxe luxdoodi, din par zian gulej Dios lëjt par gaquidi tijbzi por Jesucrist gol badëë tää quixtää lojman por zian.

<sup>16</sup> Gol badxe'guijc da't xtiidx Jesucrist, gol balüü gol guneenë tää lasa'di zi'c rayal. Gol badëë quixtää loj Dios con ree cant në ree salmos në los demazri ree cant ni naj par Dios. <sup>17</sup> Xhietääz ni giüüdi ni guinee täädi, yaløj xgaj gol basaaladx Dad Jesús abi' por laaman gol badëed quixtää loj dux Dad ree Dios.

### Zi'c rayal guiban tijb famil

<sup>18</sup> Lëjt béngunaa yu' ree lacheel, gol bazoob xtiidx lacheelidi, din zian rayal giüün bén rililadx Jesucrist. <sup>19</sup> Abi' ziangajc lëjt xinguaaw yu' ree lacheel, gol gvyën lacheelidi ad gusagzi täädi laa reeman.

<sup>20</sup> Në lëjt xin naj ree xi'n, gol bazoob gra xtiidx ree xDadidi, din zian ruladx Dios. <sup>21</sup> Abi' ziangajc lëjt dad na, ad gusagdiaj xi'ndi chitää guidxe'ch reex abi' yaleny'a' reex.

<sup>22</sup> Lëjt bén rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguiaatzi reeman lëjt par yaya'ndi zagdx loj reeman, guidib luxdoodi gol been xchiin reeman por respejt ni rajpidi Dad Jesucrist. <sup>23</sup> Xhietääz nin giüüdi, gol beenan con gan. Gol gunaladx loj Jesucrist cayüjndi sirv, ad lojt bénguidxliuj. <sup>24</sup> Din lëjt ma ragbee guial zian yu' ni tia'di loj Dad Jesucrist guial cayüjndi laaman sirv. <sup>25</sup> Per par ree bén rüjn ni mal, laa reeman yayal casti por ni mal been reeman, din Dios ad rbetaman loj bejn.

**4** Nægajc lëjt bén naj ree patron, gol been zi'c rayal con ree bén rüjn xchiindi, gol gojc tää benza'c con laa reeman, din lëjt ragbee guial xanyabaa yu' bén rniabee lëjt.

<sup>2</sup> Gol guzusin, gol gurejdx Dios ad bal gucheeladxidi, gol badëë quixtää

lojman. <sup>3</sup> Gol gurejdx tää Dios por dunujn din guixhialaman nejz din gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguiib. <sup>4</sup> Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdx.

<sup>5</sup> Gol gubajjn zagdx delant loj ree bén ad waliladxt Jesucrist gol gunee tää xtiidxaman loj reeman beegaj chi chu' mod. <sup>6</sup> Chi rüdi diidx, gol be diidx xnejz din yayuladx bejn ni rnieedi gagbee täädi xhienaag yadxi'di ni rniabdiidx reeman lojdi.

### Rxhiaal ree xbejn Jesucrist xtiidx Dios

<sup>7</sup> Tíquico, tijb du lasa' ree, bén rayën ree, bén diidxli cayüjn naj yudar cayünan sirv loj Jesucrist, laaman gugojn lëjt gra xhienaag za'n niz guie. <sup>8</sup> Par zian caxhalan laaman din gugojnman lëjt xhienaag nadxu'n niz guie din yagu' tääman luxdoodi. <sup>9</sup> Abi' con laagajcaman caxhalan Onésimo, tijb du lasa' ree bén rayën gajc ree, bén naban zi'c rayal, bén naj bén ladxidi. Laa reeman gugojn lëjt gra ni cayajc niz guie.

<sup>10</sup> Aristarco, bén yu'në'n ladxguiib, laaman rxhiaal xtiidx Dios lojdi. Nægajc Marcw, bijchwin Bernabé rugajpdioz lëjt. Abi' ma bagojnman lëjt chunin naj Marcw, bal gui'taman guidganajman lëjt, gol baca'man zagdx. <sup>11</sup> Abi' nægajc Jesús, bén la gajc Justo, rxhiaal xtiidx Dios lojdi. Loj gra ree bén Israel rililadx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bén cagu' luxdon. <sup>12</sup> Në Epafra, bén ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejczy rbejdxaman Dios por lëjt din sudxi'chidi chinalidi xnejz Dios giüün täädi gra zi'c rënman. <sup>13</sup> Naj ragbee zagdx guial dád ruman xgab por lëjt, në por ree

bën Laodicea, në por ree bën Hierápolis.

<sup>14</sup>Lujc, doctor rayën da't ree, në Demas, në reeman rxhiaal xtiidx Dios lojdi.

<sup>15</sup>Gol bagajpdioz ree dux compniar ree bën riladx ree Jesucrist, bën zojb ree luguiedx Laodicea. Gol bagajpdioz tää Ninfas con los demazri ree xbejn Jesucrist bën rado'p ree lidxaman. <sup>16</sup>Chi ma gulox biilidi gui'ch guie, dxel gol guxhaalan loj ree bën riladx Jesucrist, bën

zojb ree luguiedx Laodicea, din në reeman gool laan. Nē gui'ch ni guxhalan loj reeman rayal yaxhaal reeman lojdi din nēgajc lējt gool laan. <sup>17</sup>Abi' gol gūjdx loj Arquipo din gūünman cumplid ni ma bacaabee Dad Jesucrist gūünman. <sup>18</sup>Naj Pab, quijb naj cuca lejtr guie ree par gūgajpdiozan lējt. Gol basaalex guial yu'n ladxguib. Dios gūünle' lejt. Amén.

## Gui'ch yalaj guxhaal San Pabl loj ree b n Tesal nica rliladx Jesucrist

**1** Naj, Pab con Silvan n  Timoteo, cayxhaalan gui'ch guie par l jt najdi b n rliladx Jesucrist luguiedx Tesal nica, dux Dad ree Dios n  Jesucrist gi nle' l jt yabe'cdxe t e reeman luxdoodi.

### Rud e Pab quixt e loj Dios

<sup>2</sup>Guixie guixie rad en quixt e loj dux Dad ree Dios por gradi, rasaaladx t en l jt chi rarejdx ranaaban laaman. <sup>3</sup>N  zianczi chi rarejdx ranaaban laaman, nadxe'duguijcan ni ma beendi guial rliladxidi laaman, n  guial r n lasa'di, nadxe'duguijcan t en guial cadaandi cab zidi gui't Dad Jesucrist stijb. <sup>4</sup>Compniar raliduladx ree Jesucrist, dunujn rayagbee guial Dios r n l jt, gulej t eman l jt. <sup>5</sup>Din chi baneen xtiidxzax'caman lojdi, ad diidxtizi bal  n l jt, bal  n l jt con xguialrniabee xSprijt Dios abi' rayagbeen guial diidxli naj ni caynan lojdi. L jt ragbee xhienaag babajnan chi badxu'n n l jt, babajnan zian din yaguieenan l jt yudar xhienaag guibandi.

<sup>6</sup>Abi' l jt nabandi zi'c babajnan lojdi n  zi'c bal   Jesucrist, abi' por xSprijt Dios babaadi bililadxidi ni banan lojdi, majsi d d guzagdiajdi. <sup>7</sup>Zian najdi tijb ejempl par gra ree b n rliladx Jesucrist niz Macedonia n  niz Acaya. <sup>8</sup>Por l jt bire'ch xtiidxaman ad tijbtizi luarzii ree, gra ladczi ruza't reeman xhienaag rliladxidi Dios, xt ni'qui chetri ryaadx yaguie'chan. <sup>9</sup>Din laagajc reeman r  diidx xhienaag baca'di dunujn chi budganajn l jt, xhie t e naag basa'ndi ni naladxidi naj ree dios persi binalidi quijb Dios naban abi' guzuloj cay jndi laaman sirv. <sup>10</sup>R  t e reeman

diidx xhienaag cab zidi gui't Jesucrist Xi'n Dios diidz xanyabaa, b n basbanman loj ree beng t, Jes s b n rab e dunuj ree loj casti ni z ed.

### Ni been Pab luguiedx Tesal nica

**2** L jt ragbee, compniar raliduladx ree Jesucrist, guial ad budganaj xli-a'tzan l jt, <sup>2</sup>majsi l jt ragbee guial luguiedx Filipos guna ree bejn diidxguijdx du lojn n  graloj ree gualzi bad ed reeman dunujn. Per Dios baneen dunujn valor persi bad n xtiidxzax'caman lojdi, majsi xhiet ez raza'can por ree b n rdx-e'ch dunujn. <sup>3</sup>Din ad baneen tan l jt diidx rusquiee, o par yaguieenn n l jt zi'ctzi ray nan ya, o par yasquieen l jt, <sup>4</sup>per zi'c bacaabee Dios dunujn din yaneen xtiidxzax'caman guial baguiaaman zile' yaguieenan ni rayal yaguieenan, laanan naj ni rad n ad par yaya'ntan zagdx loj ree bejn, par yaya'nan zagdx loj Dios, b n ragbee gra ni yu' luxdoo bejn. <sup>5</sup>L jt ragbee guial ad yu't dxej baneen n l jt zagdx naabzi par gui ndi dunujn, ache t et guijc badxiiban din yaca'n xmiliadi. Dios ragbee guial laan naj diidxli. <sup>6</sup>Ad radiiltan guza't ree bejn dunujn zagdx, ad radiil t etan guza'tidi dunujn zagdx, o guza't ree ben ren dunujn zagdx, <sup>7</sup>majsi guial naya-jcan xiap stol Jesucrist, raya'pan derejch yanabeen l jt gi ndi xhienin par dunujn, per ad raguieentan zian. L jt ragbee guial benza'c bayajcan chi badxu'n n l jt, zi'cgajczi tijb na rusni's rnij t e xi'n. <sup>8</sup>Abi' guial tant ray nan l jt, ad tijbtizi xtiidx Dios baneen lojdi, n  dux guialnabanan bay nan naneen por l jt, guial tant ray nan l jt. <sup>9</sup>Abi' l jt ragbee compniar, guial d d baguieenan dxiin. Dxej guiaal baguieenan dxiin, chit e yalu'n xchiindi guial gi ndi dunujn yudar yabajnan la'tgaj bal  n l jt xtiidxzax'c Dios.

<sup>10</sup>Lëjt në Dios ragbeecheaw guial chi badxu'në'n lëjt, babajnan xnejz zi'c rayal, abi' achet chile' gudxiibidi du guican, lëjt bèn riladix ree Jesucrist. <sup>11</sup>Lëjt ragbee xhienaag baneen lëjt consejw, xhie tää naag balu'n luxdoodi zi'c rüjn tijb dad con ree xi'nman. <sup>12</sup>Ma banan lojdi din guibandi zi'c rayal guiban bèn ma naj ree xbejn Dios, bèn rbejdx lëjt din yalayidi xanyabaa lod rniabeeman.

<sup>13</sup>Zeel në dunujn ad racwëëzt radëën quixtëë loj Dios, guial chi bigueiejndi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx bënguidxliuj. Abi' diidx guin ree naj ni rusni xquiarguejndi, lëjt guial riladixidi Jesucrist. <sup>14</sup>Abi' lëjt compniar raliduladx ree laaman, ma guzajquidi zi'c guzac ree xbejn Dios, bèn Israel zojb ree niz Judea, bèn riladix ree Jesucrist. Din zi'cgajc basagdiaj ree bèn ladxidi lëjt, ziangajc basagdiaj lasa' bèn Israel reeman laa reeman. <sup>15</sup>Abi' tää ree bèn Israel bagüjt reeman Dad Jesús, zi'cgajc bagüjt reeman bèn badëëd ree xtiidx Dios loj ree bejn, balaagdxa tää reeman dunujn, ad rüjnt reeman zi'c rën Dios, abi' contzi gra bejn rdxe'ch reeman. <sup>16</sup>Rudxoon reeman yalüün bèn ad najt ree bèn Israel xhienaag gac reeman perdon, zian laagajc reeman cutioob guijc xtol reeman, abi' yan ma cadëd reeman xcastiro' Dios.

### Guyën Pab niejman Tesalónica stijb

<sup>17</sup>Compniar raliduladx ree Jesucrist, chi basa'nan lëjt tio'p choondxej, majsi ad raguaaatan lëjt, per rasaaduladxan lëjt, abi' rayën nejzdoon yaguaan lëjt stijb. <sup>18</sup>Dád bayënan nudganajn lëjt. Naj Pab, zien volt da't guyënan nidganan lëjt, per badxoon xindxab niajc zian. <sup>19</sup>Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdx. Lëjt naj dux chiinan ni rabaanë'n yubiignë'n loj Dad Jesu-

crist chi gui'taman stijb. <sup>20</sup>Lëjt naj bèn rabaanë'n rlies täädi dux valoran.

**3** Zeel chi badxu'n luguedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtijban ni. <sup>2</sup>Abi' baxhaal dux compniaran Timoteo, bèn cayguieenë'n xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma riladixidi, <sup>3</sup>din ni'qui tijbidi ad zalenya't por ree gualzi ni cadëdidi, lëjt ragbee guial zian yaza'c ree. <sup>4</sup>Chi badxu'në'n lëjt, banan guial dád zien loj gualzi yadüüd ree, abi' lëjt ragbee guial laan naj ni ma gojc. <sup>5</sup>Zeel ad gudaantran, abi' guxhalan Timoteo din gagbeen xhienaag zinalidi ni riladixidi, din rdxeban gusquiee xindxab lëjt, abi' achetri sirv nüjn ni baguieenan por lëjt.

<sup>6</sup>Per yan ni ma baguaad Timoteo ni bidganajman lëjt, ma bagojnman dunujn guial zinalidi zagdx ni riladixidi Jesucrist në zi'c rën lasa'di. Laaman na guial zianczi yu' luxdoodi zagdx rasaaladxidi dunujn, abi' dád ma rëndi guguaaadi dunujn, zi'cgajc rayënan yaguaan lëjt. <sup>7</sup>Zeel, compniar raliduladx ree Jesucrist, majsi graloj tarbajw në gualzi caydüüdan, per dád nix yu' du luxdoon raguiejnan guial zagdx zinalidi ni riladixidi. <sup>8</sup>Abi' yan mazri nix ma bayu du luxdoon guial ma bayagbeen za'dxi'chquidi loj ni zinalidi xnejz Dad Jesucrist. <sup>9</sup>Dxel xt ni'quid radxejltan xhienaa yadëën quixtëë loj Dios por lëjt, guial dád nix yu' du luxdoon lojman por lëjt. <sup>10</sup>Dxej guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent guial riladixidi Jesucrist.

<sup>11</sup>Dux Dad ree Dios në Dad Jesucrist gagnë dunujn din gac yudganajn lëjt. <sup>12</sup>Abi' Dad Jesucrist gagnë lëjt din gusnuu guiën lasa'di mazri, guiën täädi gra lasa' bejndi zi'c rayënan lëjt. <sup>13</sup>Laaman gagnë lëjt sudxi'chidi loj xnejz Dios din

sudi naya sin dol lojman, dxej ni gui't Dad Jesucrist stijb con gra ree xbejnman.

### Zi'c rën Dios guiban ree xbejnman

**4** Yan, compniar raliduladx ree Jesucrist, raza'can lëjt liaadx, rana tëen lojdi por laaman, guial zi'c nabandi yan zi'c ma balüün lëjt guibandi, din güüнди zi'c rën Dios, gol been naguiejn gol basnuu mazri guibandi zi'c rënman.

<sup>2</sup>Din lëjt ma ragbee gra ni guxhaal Dad Jesús dunujn yanan ni güüнди. <sup>3</sup>Ni rën Dios naj guial guibandi naya lojman, guial ad güüнди nidxuudx ree con ree bèn ad najt lacheelidi. <sup>4</sup>Gol gogbee guial tijbgaj lëjt rayal guibannë lacheelidi zagdxe zi'c rën Dios con respejt, <sup>5</sup>ad chu' lacheelidi naabzi par grii xgustidi zi'c rüjn ree bèn ad nünbeet Dios. <sup>6</sup>Ni'qui tijbidi ad rayalt güünnaladx lasa'di, gusquiee lasa'di güüнди xhie nidxuudx con lacheel reeman. Din dux Dad ree Dios zudëedaman casti gra ree bèn rüjn zian, zi'c ma banan lojdi zi'c ma bagojnän lëjt. <sup>7</sup>Din Dios ad gurejdx-taman dunuj ree yayajc ree xbejnman par yabajn ree nadxuudx, gurejdxaman dunuj ree par yabajn ree naya. <sup>8</sup>Zeel bèn ad ridxga't ni ma banan lojdi, ad bënguidxliujtan ad ridxga'taman, Diosan ad ridxga'taman, bèn razaladx xSprijt duloj ree.

<sup>9</sup>Yan, xcwent guial guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di, <sup>10</sup>abi' laan naj ni cayüjndi con gra dux compniar ree bèn riladx ree Jesucrist niz Macedonia. Per raza'can lëjt liaadx din gusnuu guiën lasa'di mazri. <sup>11</sup>Gol been tëe naguiejn guibannë lasa'di zagdxe, gol guyu xgab xchiindi, zi'c ma ranan lojdi güüнди dxiin, <sup>12</sup>din guibandi zagdxe loj ree bèn ad riladxt Jesucrist në chitëe xhie guiyaadxidi.

### Ni gac chi gui't Dad Jesucrist

<sup>13</sup>Yan, compniar raliduladx ree Jesucrist, ad rayëntan guibandi sin guial gagbeedi xcwent ree bengüt, chitëe chu'nayadi zi'c ree bèn ad riladxt Jesucrist. <sup>14</sup>Din bal raliduladx ree guial güjtaman abi' babanman stijb, ziangajc raliduladx ree guial ree bèn ma güjt, bèn bililadx ree laaman, yasban Dios laa reeman por Jesucrist.

<sup>15</sup>Zeel zi'c ma rayignia'n xtiidxaman, dunujn rana lojdi guial gra ree xbejnman, bèn sta naban ree chi gui'taman stijb, ad zanedt reeman loj ree xbejnman bèn ma güjt ree. <sup>16</sup>Din dxejzii guiguien cha' bèn rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiat Dad Jesucrist diizd xanyabaa, abi' yaløj ree xbejnman bèn ma güjt ree yaban stijb. <sup>17</sup>Guiáad dux compniar ree bèn sta naban ree dxejzii, yadxaag ree con ree bèn baban guin, dxel yo' ree ladya loj ree zaj lod yadxaag ree Dad Jesucrist. Zian yo' ree yuchu'në' reeman tiblyaaa. <sup>18</sup>Zeel gol bagu' luxdoo lasa'di con ree diidx guin.

**5** Yan, compniar raliduladx ree Jesucrist, xhie dxej gac zian o goc gac zian ya, ad rüjnt naguiejn ganinan lëjt. <sup>2</sup>Din lëjt ragbeechaaw guial zi'cgajczi ri't tijb bëngubaan guxhin, chi achut rbëz laaman, zian guidxin dxej gui't Dad Jesucrist stijb. <sup>3</sup>Chi guiëb ree bejn: “Zagdxe zio' ree, achet gac”, dxel dxejczu gui't gualzi par laa reeman ni ad zariit reeman loj, zi'c chi rdxin hor ragnaa lën bëngunaa chi ma gal xi'nman. <sup>4</sup>Per lëjt compniar, ad zëtridi loj nejzmal din guiniaaz dxej ni gui't Dad Jesucrist lëjt zi'c chi ri't tijb bëngubaan. <sup>5</sup>Din graczidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay. <sup>6</sup>Zeel ad najt guial yabajn ree zi'c tijb bënnaayëjs, zi'c rüjn los de-

mazri ree bejn, rayal yatie'ch dux bacaal ree, yadxu' ree nadëdguiendxuj. <sup>7</sup>Bén zinal ree nejzmal zi'c tijb bënnaayëjs, zi'c tijb bengu', zian zinal reeman nejz guin. <sup>8</sup>Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj guialrliladx ni ma raya'p ree në loj ni rën Dios dunuj ree, abi' yadxu'dxi'ch tëë ree në loj ni ma raliduladx ree guial ma raya'p ree perdon. Abi' zi'c tijb xin suldad yu' xcascwix ni rutëë yaya'p tëë reen zi'c tijb ni gutëë dunuj ree loj ni mal <sup>9</sup>Din ad gurejdx Dios dunuj ree par yayal ree xcastiman, gurejdxaman dunuj ree din yayal ree perdon por Dad Jesucrist, <sup>10</sup>bén güit por dunuj ree, din majsi nabajn ree o ma bayëjt ree chi gui'taman stijb, per yo' ree yuchu'në' reeman. <sup>11</sup>Zeel gol bagu' luxdoo lasa'di gol been tëë yudar lasa'di din gagbeedi mazri xtiidx Dios zi'c ma cayüjndi.

### Ni rayal güün ree bèn rliladx Jesucrist

<sup>12</sup>Compniar raliduladx ree Jesucrist, raza'can lëjt liaadx, gol gojp respejt bèn rusiid ree lëjt xtiidx Dios, bèn rulüü ree lëjt rnieenë tëë reeman lëjt xhienaag chinanidi Jesucrist. <sup>13</sup>Gol gojc benza'c da't con laa reeman, gol guyën da't reeman por dxiin cayüjn reeman. Gol gubajnnë lasa'di zagdx.

<sup>14</sup>Ranaab tëën lojdi compniar, gol guneenë ree bèn ad rënt güün dxiin, gol bagu' luxdoo ree bèn ralenya'në xnejz

Dios, gol been tëë yudar bèn ad za'dxi'cht ree loj xnejzaman, gol gojp pacens gra reeman.

<sup>15</sup>Gol been naguiejn ad güündi ni mal bèn rüjn ree lëjt ni mal, zagdxeli gol gojc benza'c con lasa'di në con gra ree bejn. <sup>16</sup>Gol badxe' luxdoodi zagdx zianczi. <sup>17</sup>Ad gucwëëz cwedx guiniabidi Dios. <sup>18</sup>Gol badëë quixtëë lojman por gra, din zian rënman güündi, lëjt najdi xbejn Jesucrist.

<sup>19</sup>Ad rbexuudi nabee xSprijt Dios lëjt. <sup>20</sup>Gol bidxga' ni rniee ree bèn rudëëd xtiidxaman. <sup>21</sup>Yaløj xgaj gol gogbee zagdx xhietëëznin, dxel gol been ni naj zagdx. <sup>22</sup>Gol gubi'ca loj gra ree ni mal.

<sup>23</sup>Dios, bèn rabe'cdxe luxdoo bejn, laaman gagnë lëjt din gaquidi lojman naya guidiblagaa. Laaman gagnë xcuerpidi, gagnëman xsprijtidi në guidiblagaa di gaquidi nayadxuj lojman dxej gui't Dad Jesucrist. <sup>24</sup>Abi' Dios güün zian, din laaman, bèn rbejdx dunuj ree par güünman dunuj ree xbejnman, rüjn xtiidxaman cumplid.

### Diidx bigra ca ree loj gui'ch guie

<sup>25</sup>Compniar raliduladx ree Jesucrist, gol gurejdx gunab Dios por dunujn. <sup>26</sup>Gol badëë xtiidx Dios da cwentan loj gra ree compniar rliladx Jesucrist. <sup>27</sup>Abi' por laaman, naj rni lojdi rniabee tëën lëjt: Gol biil gui'ch guie loj gra ree compniar rliladx laaman. <sup>28</sup>Dux Dad ree Jesucrist güünle' lëjt.

## Gui'ch barojp guxhaal San Pabl loj ree b́en Tesalónica rlliladx Jesucrist

**1** Naj, Pab con Silvan nē Timoteo, cayxhaalan gui'ch guie par lējt rlliladxidi Jesucrist luguiedx Tesalónica, lējt najdi xbejn dux Dad ree Dios nē xbejn Dad Jesucrist. <sup>2</sup>Dux Dad ree Dios nē Dad Jesucrist gūinle' lējt yabe'cdxe tēē reeman luxdoodi.

### Rudēēd Pab quixtēē loj Dios

<sup>3</sup>Guixie guixie radēēn quixtēē loj Dios por lējt compniar raliduladx ree Jesucrist, din zian rayal yaguieenan guial mazri cusnuu rlliladxidi laaman, abi' tijb gajdi mazri ma rēn lasa'di. <sup>4</sup>Zeel dád nix yu' du luxdoon raza'tan lējt loj gra ree xbejn Dios, raguie'chan loj reeman pacens ni rajpidi nē guialrlliladx ni rajpidi, rdaan tēēdi gra ree ni rūjnnē ree bejn lējt nē gra ree guialzi ni cadēdidi. <sup>5</sup>Zian rguien xnejz naj xguialguxtis Dios, guial gulejman lējt din yayalidi lod rniabeeman, din por laan cadēdidi guialzi.

<sup>6</sup>Abi' guial gra ni rūjn Dios naj xnejz, zeel gudēēdaman casti gra ree b́en cudēēd lējt casti. <sup>7</sup>Guiáad lējt cadēdidi guialzi yan, guneeman lējt guialraziiladx con dunujn, dxej ni guliūloj Dad Jesucrist diizd xanyabaa galay xbianiman ni naj zi'c bajl, con ree xianjlaman b́en ca' ree mazri guialrniabee. <sup>8</sup>Dxel gudēēdaman casti b́en ad bayagbeet ree Dios, b́en ad guyēnt ree nuzoob xtiidxa'c Dad Jesucrist. <sup>9</sup>Gudēēdaman laa reeman casti tiblayaa, su reeman zijt par Dios nē par xguialrniabee za'cdxoonman. <sup>10</sup>Zian gac dxej ni gui't Dad Jesucrist, din guza't ree bejn laaman zagdxe por ree xbejman, yadxa tēē loj gra reeman laaman, abi' nē lējt, din ma bililadxidi xtiidxaman ni badūn lojdi.

<sup>11</sup>Zeel ad racwēēzt rarejdx ranaaban Dios por lējt din gagnēman lējt guibandi zi'c rayal, zi'c guredxaman lējt guibandi. Ranaab tēēn lojman guial con xguialrniabeeman gac cumplid gra xixgabzagdvedi nē gra ni rūjndi guial rlliladxidi laaman. <sup>12</sup>Abi' zian guiliesidi xvalor Dad Jesucrist, guiáad laaman guilies xvaloridi guial laaman con dux Dad ree Dios rēn reeman dunuj ree.

### Guliūloj b́en ca' xguialrniabee xinxab

**2** Yan, compniar raliduladx ree Dad Jesucrist, xcwent guial gui'taman stijb nē guial yadxaag ree con laaman, raza'can lējt liaadx, <sup>2</sup>ad bal tiēbidi tibrajtzi gusquiee ree bejn lējt, b́en rēb ree ma bidxin dxej gui't Dad Jesucrist. Ad guidxebidi gucaagdiaguidi zian, o na ree bejn guial tijb sprijt rēb loj reeman zian, o dunujn baxhaal gui'ch loj reeman lod raguie'chan zian. <sup>3</sup>Ad tiēbidi chu gusquiee lējt, din chi gad dxej guin guidxin, yalojxgaj guidxin ree dxej ni ad zuzoobtri bejn xtiidx Dios. Abi' guliūloj tijb b́en gūūn ganax ni rēn xinxab, b́en ma naj par gabijl. <sup>4</sup>Laagajc laaman guilies xvalor, abi' yalenman gra ni nūnbee bejn zi'c Dios nē gra ni rnaijchi' bejn zi'c dios, xt cweman lēn xyadoo Dios, abi' guiēbaman guial laaman naj Dios.

<sup>5</sup>Gol basaaladx guial zian rnin lojdi chi guzunē'n lējt. <sup>6</sup>Abi' yan lējt ma ragbee chu cutēē chitēē guliūlojman, la'tgaj guidxin dxej rayal guliūlojman. <sup>7</sup>Ma cayajc ree xgabmal guin, per yu' b́en cutēē gac reen cumplid. Chi ma bisūd b́en cutēē guin, <sup>8</sup>dxel guliūloj benmal guin, abi' Dad Jesucrist con tijbzi gulūjbaman gugūjtaman laaman, dxel con xbianiman ni guidnēman gunidlojman laaman. <sup>9</sup>Benmal guin por xinxab gui'taman, abi' dád gapaman guialrniabee. Gūūnman zien ree ni yadxaloj ree bejn, gūūn tēēman zien ree milagr par

gusquieeman. <sup>10</sup>Con graloj ree ni mal gusquieeman Bén canijt ree loj Dios, guial ad guyënt reeman ad cwëjb tëët reeman nililadx reeman ni diidxli zile' nuslaa laa reeman loj dol. <sup>11</sup>Zeel ruslaa Dios gusquiee gra ree ni guin laa reeman, abi' guililadx reeman ni ad najt ni diidxli, <sup>12</sup>din yaval gra reeman casti, guial ad bililadxt reeman ni diidxli guin, din mazri bayuladx reeman been reeman ni mal.

### Sudxi'ch reeman loj ni rililadx reeman

<sup>13</sup>Compniar, rën Dad Jesucrist lëjt. Zianczi rayal yadëën quixtëë loj Dios por lëjt, din diizd guia'xchej ma ba-caabeeman lëjt din laadi loj casti, guial ma nayadi por xSprijt Dios në guial ma bililadxidi ni naj diidxli. <sup>14</sup>Par zian gurejdx Dios lëjt gaquidi xbejnman chi badün xtiidxza'c Dad Jesucrist lojdi, din yayalidi xanyabaa lod za'man.

<sup>15</sup>Zeel, compniar raliduladx ree Jesucrist, gol guzujdxi'ch gol binal tëë ni balüün lëjt chi badxu'në'n lëjt, në ni ma banan lojdi loj gui'ch ren. <sup>16</sup>Abi' Dad Jesucrist gajc në dux Dad ree Dios Bén rën dunuj ree, Bén ragu' du luxdoo ree zianczi, Bén banee tëë ni ralëjz ree guial najman benza'c, <sup>17</sup>laaman yagu' luxdoodi gagnë tëëman lëjt din sudxi'chidi din gra ni guinieedi güün tëëdi gac zagdx.

### Rën Pab cwedx guiniab reeman Dios

**3** Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad, abi' guza't reeman xtiidxaman zagdx zi'cgajc beendi. <sup>2</sup>Gol gurejdx gunab tëëman din yabëëman dunujn loj ree benmal, loj ree bendxudx ad nabant xnejz, din ad grat bejn rililadx xtiidx Dad Jesucrist. <sup>3</sup>Per laa-

man zianczi rüjn xtiidxaman cumplid, abi' laaman gagnë lëjt din sudxi'chidi, guinia tëëman lëjt chitëë güüüdi ni mal. <sup>4</sup>Dunuyn rayagbeecheaaw guial laaman cayagnë lëjt cayüjndi gusnuu tëë güüüdi ni banan lojdi. <sup>5</sup>Gagnëman lëjt din guiëndi bejn ree zi'c rën Dios laa reeman gap tëëdi pacens zi'c gojp Dad Jesucrist pacens.

### Rüjn naguiejn güün bejn dxiin

<sup>6</sup>Yan, compniar raliduladx ree Jesucrist, por laaman ranabeen lëjt: Gol bariica loj chutëëz compniar gaz za' ad rënt güün dxiin, Bén ad naban tëët zi'c balüün lëjt. <sup>7</sup>Din lëjt ragbee xhienaag guibandi din guibandi zi'c nabajnan. Dunujn ad badxu'në'tan lëjt sin guial naguieenan dxiin, <sup>8</sup>achu tëët banee xlia' ni badaawan. Lëjt ragbee guial dád baguieenan naguiejn baguieenan dxiin, dxej guiaal baguieenan dxiin chitëë yalu'n xchiindi guial güüüdi dunujn yudar din gac yabajnan. <sup>9</sup>Majsi zajc nanabeen lëjt nüjndi dunujn yudar, per baguieenan dxiin par yalüün xhienaag rayal guibandi güüüdi zi'c raguieenan. <sup>10</sup>Chi badxu'në'n lëjt, ranan lojdi: Bén ad rënt güün dxiin, ad zajw gajctaman. <sup>11</sup>Per yan baguiejnan guial yu'di gaz za' ad rëntidi güüüdi dxiin, abi' rudi loj ni ad rayaltidi. <sup>12</sup>Par Bén zii ree dunujn rana ranabee tëën laa reeman por Dad Jesucrist yabedxe reeman, güün reeman dxiin din guiban reeman.

<sup>13</sup>Guiáad lëjt compniar, ad yalenyadi güüüdi ni naj zagdx. <sup>14</sup>Bal yu' tijbidi ad ruzoobt diidx guial güüüdi ni ranan loj gui'ch guie, gol baguiaa chu benan, ad guchajg tëëdi laaman din yatu lojman. <sup>15</sup>Per ad guguiaadi laaman zi'c tijb Bén rdxe'chidi, gol baguiaaman zi'c tijb bijchidi, gol guneenëman din guibanman zagdx.



**Diidx bigra ca ree loj gui'ch guie**

<sup>16</sup>Dad Jesucrist b n rabe'cdxe luxdoo bejn, laaman yabe'cdxe luxdoodi guixie guixie n  loj gra. Laaman sun  l jt.

<sup>17</sup>Naj, Pab, quijb naj cuca ree lejtr guie par gugajpdiozan l jt. Zian r nan con gra ree da gui'chan, zian naj ree da lejtran. <sup>18</sup>Dad Jesucrist g  nle' gradi.

## Gui'ch yaløj guxhaal San Pabl loj Timoteo

### Rugajpdioz Pab Timoteo

**1** Naj Pab, najn tijb xiapóstol Jesucrist por xguialrniabee Dios bèn rüjn perdon dux tol ree nè por Jesucrist bèn rayagbee ree gui't stijb. <sup>2</sup>Cucan gui'ch guie par lüj Timoteo, din par naj lüj naj zi'cgajc da xi'nän guial tiblojzi raliduladx Jesucrist. Dux Dad ree Dios nè Dad Jesucrist güünle' lüj, yayaman lüj yabe'cdxe tëëman luxdool.

### Rëb Pab loj Timoteo xcwent ree bèn rusquiee

<sup>3</sup>Zi'c rnin lojl chi briin za'n niz Macedonia, guial yaya'nl guiedx Éfeso din nabeel tio'p choon ree bejn ni chitëë ruluü reeman bejn ree ni ad najt diidxli. <sup>4</sup>Ad chililadx reeman ni rbëëguijc ree bejn, ad guidxga' tëë reeman ban za reeman, o chu rajc reeman xbenjol gulal reeman, din ad ni quint ree gagnë laa reeman par gusunuu chililadx reeman xtiidx Dios.

<sup>5</sup>Canabeen lüj din güün reeman zian din guiguien guial diidxli rën lasa' reeman, achet naladx reeman din guiguien tëë guial guidib luxdoo reeman rililadx reeman xtiidx Dios. <sup>6</sup>Din yu' reeman ad rüjntri zian guial ganax ree ni ren ni ad rüjnt ree sirv rü reeman. <sup>7</sup>Rën reeman guluü reeman bejn ree xhienaag naj xley Dios, abi' ni'qui laa reeman ad ragbeet xhie rën guiëb ni rnïee reeman ni'quid rignia't reeman ni naladx reeman naj zagdx culüü reeman bejn ree.

<sup>8</sup>Dunuj ree rayagbee guial zagdx naj ley guin par bèn rignia' xhie sirv rüjnan. <sup>9</sup>Abi' rayagbee ree guial ad baneet Dios ley guin par ree bèn naban xnejz niz lojman, baneeman ley guin par tëd ree bejn casti, bèn naban ree zi'ctzi naj xixgab

reeman, bèn ad ruzoobt ree diidx, bèn ad yu'guijct ree Dios, bèn rüjn ree dol, bèn ad rajpt ree Dios respejt, bèn ad rüjnt ree naguiejn guiën reeman Dios, bèn rugüjt xdad xniaa, nè par gra ree bèn rugüjt bejn, <sup>10</sup>rüjn tëën sirv par xcasti ree bèn za'në xinguaaw o béngunaa ren, par ree xin ruladx lasa' xinguaaw gajc o béngunaa ruladx lasa' béngunaa gajc, nè par ree bèn rban bejn ree par guto' reeman laa reeman zi'c mojs, nëtëë par ree bèn rusquiee nè ree bèn ruza't Dios par sudxi'chnë xguialrusquiee reeman nè par gra ree bèn rüjn xcontr ni naj diidxli. <sup>11</sup>Diidxli guie ree naj ni zëëd ree loj xtiidxza'cdxoon Jesucrist. Dux Dad ree Dios, bèn rayal respejt, laaman naj bèn basa'nnë naj diidx guin ree din gatiechan laa reen.

### Xhienaag baya Dios Pab

<sup>12</sup>Quixtëë Dad Jesucrist laaman cayagnë naj, rajp tëëman naj confianz abi' bacaabeeman naj par gatiechan xtiidxaman, <sup>13</sup>majsi yaløj gunen laaman diidxguijdx abi' guzunaalan bèn rililadx ree laaman din günan laa reeman ni mal abi' dád naya bennë'n laa reeman. Per Dios bayaman naj guial ad bignia'tan ni cayünan din gad naj chililadx Jesucrist. <sup>14</sup>Abi' dád benza'c gojcaman con naj, balüüman naj xhienaag chililadxan balüü tëëman xhienaag guiënan Dad Jesucrist.

<sup>15</sup>Diidxli ni ganin lëjt, rayal chililadx bejn: guial Jesucrist bi't loj guidxliuj par güünman xtol bejn perdon, abi' loj gra ree bejn naj naj mazri bëndol. <sup>16</sup>Per majsi najn mazri bëndol, baya Dios naj abi' gojp Jesucrist naj pacens din gagbee ree bèn chililadx xhienaag rajp Jesucrist pacens par chililadx bejn xtiidxaman, abi' zian gap reeman guialnaban tiblayaa con Dios. <sup>17</sup>Zeel zianczi rayal yaya'p reeman respejt yaza't tëë reeman zagdx guial najman rey bèn ad yu't dxej guiët, abi' rajpaman guialrniabee

par tiblayaa guial tijbzi laaman naj Dios abi' achut rajc ruguiaa laaman. Amén.

<sup>18</sup>Timoteo, par naj lüj naj zi'c da xi'-nan zeel rnin lüj been zi'c gunee reeman xcwentil diizd yaløj, abi' zi'c tijb suldad ni rej loj wadijl ad guidxebil niz loj ree bèn za' ree contr xtiidx Dios. <sup>19</sup>Guzudxi'ch loj ni rililadxil Jesucrist, been tēē ganaxzi ree xgab zagdxē par güünl zi'c rayal. Din yu' ree bejn guial ad rüjnt reeman zian, yan ma banijt reeman ni rililadx reeman Dios. <sup>20</sup>Zian ma guzajc ree Himeneo con Lejandr, zeel ma bayün laa reeman loj satanás din gusiid reeman guial ad rayalt guiniee reeman Dios diidguijdx.

### Xhienaag cwedx guiniab bejn Dios

**2** Yaløjdoon ni rnin lojdi naj guial cwedx guiniabidi Dios, cwedx guiniabidi laaman por gra ree bēnguidxliuj, gudēēd tēēdi quixtēē lojman. <sup>2</sup>Royal yarejdx yanaab ree Dios por ree rey nē por gra ree guxtis loj guidxliuj din chile' yabajn ree zagdxē gusnuu tēē yabajn ree zi'c rēn Dios. <sup>3</sup>Din laan naj ni zagdxē ni rayuladx tēē dux Dad ree Dios, bēn rüjn perdon dux tol ree, <sup>4</sup>bēn rēn guial gra bejn gac perdon guidxin tēē dxej gagbee bejn xhie rēn guiēb xtiidxli-man. <sup>5</sup>Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bēnguidxliuj. <sup>6</sup>Güjtaman loj crüjz persi gudijxaman por xtol gra ree bēnguidxliuj, zian naj ni balüü Dios bejn chi bidxin dxej bacaabeeman gac zian. <sup>7</sup>Zeel bacaabeeman naj gacan xi apóstol Jesucrist din gatiechan xtiidxaman, nē par gusidan bēn ad najt ree bēn Israel conin naj diidxli, xhie tēē naag chililadx reeman Jesucrist, walin ad rusquieetan.

<sup>8</sup>Yan rēnan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin gualrdxe'ch nē sin wadijl. <sup>9</sup>Rēn

tēēn guial ree bēngunaa su reeman zi'c rayal, ad tēdlaj suchaaw reeman con or, nē ree perl nē ree vistid zagdxē o guial tēdlaj güünchaaw guidxguijc reeman. <sup>10</sup>Din mazri zagdxē güün reeman ni naj zagdxē, zi'c rayal güün ree bēngunaa ni ma zinal xnejz Dios. <sup>11</sup>Abi' rayal gucaagdiajgzi reeman ache guiniee reeman chi rülüü ree xinguaaw xtiidx Dios. <sup>12</sup>Din ad zatiēēbtan guial gülüü tijb bēngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee bēngunaa xinguaaw, rayal gucaagdiajgzaman. <sup>13</sup>Din Dios, yaløj Adán beenchaawaman, dxelri Eva. <sup>14</sup>Din ad Adánt basquiee reeman, yaløj Eva basquiee reeman, abi' por guialrusquiee guin beenman dol. <sup>15</sup>Per zajc gac bēngunaa perdon, bal güün xchiinman zagdxē guial najman na, bal gusnuu chililadxaman Dios, guiēnman bejn ree guiban tēēman xnejz.

### Xhienaag guiban ree bēn rniabee

**3** Gol badxe'guijc da diidxan: Bal chu bēn rēn gap guialrniabee loj gra ree bēn rililadx Jesucrist par gülüüman laa reeman xnejz Dios, zagdxēqui naj ni rēnman güünman. <sup>2</sup>Per bēn rajp guialrniabee guin rayal güünman zi'c rayal chitēē chu guinieeguijdx laaman. Royal chu' tijbzi lacheelaman, guibanman zagdxē chu' tēē xquiarguejnman din gap ree bejn laaman respejt. Gacaman benza'c con ree bēn rdxin lidxaman, gac tēēman tijb bēn rignia' par gülüüman bejn ree. <sup>3</sup>Ad rayalt gacaman bengui', ni'qui bēn rguuil wadijl ad rayal tēēt yaguuilaman mod par tia'man xmilia ree bejn, rayal gacaman benza'c con chutēēz, gac tēēman bēn naxanladx ad zazēēbladx tēētaman milia. <sup>4</sup>Royal nabee lidxaman zi'c rayal din gülüü ree xi'nman xhienaa gap reex respejt guzooob tēē reex diidx. <sup>5</sup>Din bal id rajc rniabee lidxaman, xhieza naag nabeeman bēn rililadx ree

Jesucrist? <sup>6</sup> Zeel tijb bèn qui guzuløjri rliładx Jesucrist, ad rayalt nabeeman loj ree bèn ma rliładx chitëë guilies xvalor gajcaman abi' yayalaman lasa' casti ni bayal xindxab. <sup>7</sup> Bèn rajp guialrniabee guin xt ree bèn ad rliładxt Jesucrist rayal güünbee laaman guial najcaman benza'c chitëë yaya'nxtuman abi' güün xindxab laaman gan.

### Ni güün ree bèn rüjn yudar bèn rniabee ree

<sup>8</sup> Yan ziangajc ree bèn ma cwabee par güün reeman yudar bèn rniabee ree, rayal güün reeman zi'c rayal din gap ree bejn laa reeman respejt, güün cumplid xtiidx reeman, ad guië' tëë reeman, ad yaguiil tëë reeman mod par tia' reeman xmilia ree bejn. <sup>9</sup> Con xgabza'c chinal reeman ni ma balüü Dios dunuj ree. <sup>10</sup> Zeel yaløjxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din güün reeman yudar bèn rniabee ree. <sup>11</sup> Ziangajc ree béngunaa ni ma cwabee par güün reeman yudar, rayal güün reeman zi'c rayal din gap bejn laa reeman respejt ad zaneeguijdx reeman bejn, rayal guiban reeman zagdx abi' güün cumplid xtiidx reeman. <sup>12</sup> Abi' ree xinguaaaw cwabee guin par güün reex yudar bèn rniabee loj ree xbejn Cristo, tijbzi lacheel reex rayal chu', nabee tëë lidx reex con xi'n reex zi'c rayal. <sup>13</sup> Din bèn rüjn ree sirv zi'c rayal ad respejtzi rajp bejn laa reeman, sin guialrdxeb ma zile' guiëb reeman xhienaag rliładx reeman Jesucrist.

### Naroob naj bèn raliđuladx ree

<sup>14</sup> Gagnë Dios chile' guialan guidganan lüj. Per cucas gui'ch guie, <sup>15</sup> din bal gaglaan ma ragbeel xhienaag guiban bejn delant loj los demasri ree xbejn Dios, bèn ma naj ree xbejn Dios naban, abi' za'dxi'ch reeman rulüü tëë reeman xtiidxlıman. <sup>16</sup> Dunuj ree

rayagbee guial dád bèn naroođ najman, bèn raliđuladx ree:

Bi'taman loj guidxliuj zi'c tijb bénguidxliuj,

rëb xSprijt Dios guial laaman naj bèn naya

abi' baguiaa ree anjl laaman bi'taman loj guidxliuj.

Bre'ch xtiidxaman loj ree bèn ad najt bèn Israel,

guidibci bililadx bejn laaman abi' baca' Dios laaman xanyabaa.

### Bèn rusa'n ree guialrliładx reeman Jesucrist

**4** Ma bagojnchaaw xSprijt Dios guial zëëđ ree dxej ni yu' ree bejn gusa'n guialrliładx reeman Jesucrist, mazri guidxga' reeman xtiidx ree bënrusquiee në gra ree ni zëëđ por xindxab. <sup>2</sup> Mazri guidxga' reeman bënrusquiee ree, bèn wed rüjnz ree, bèn achetri ree rzajc guial rüjn reeman dol din ma naya' reeman zian. <sup>3</sup> Guiëb reeman guial ad najt guial guxhliaa ree bejn ad zajw tëët reeman graloj. Per Dios badxe' graloj guialraw par gaw ree bèn rliładx laaman, bèn ma ragbee ree conin naj diidxli abi' gudëëđ reeman quixtëe lojman. <sup>4</sup> Din gra ni badxe' Dios naj zagdx, achet ni rayal cwexuu bejn tia'man bal gudëeman quixtëe chi cayawaman laan. <sup>5</sup> Din chi rarejdx ranaab ree Dios con xtiidxaman rüjnle'man guijc ni yadaaw ree.

### Bèn rüjn sirv zagdx loj Jesucrist

<sup>6</sup> Zeel bal rulüüł bèn rliładx ree Jesucrist zi'c ma rnin, dxel cayüjnquil sirv Jesucrist zi'c rayal, abi' zian gusnuu gusidil mazri guial loj ni ma rajquil xcwent guialrliładx guin në ree diidxza'c ni zinalil. <sup>7</sup> Per ad guidxga'l ni rbëëguijc ree bejn, ni ad najt ree diidxli por Dios, mejorli basnuu basiđ sudxi'chil guibanl zi'c rën Dios. <sup>8</sup> Zagdx naj par güün bejn graloj ejercijs par gacaman gojl, per loj

gra xhietëëznin mazri lasajc guiban bejn zi'c rën Dios. Din ad lojtzi guidxliuj guie güün sirv guial naban bejn zi'c rën Dios, nëgajc xanyabaa lod gap bejn guialnaban tiblyaa. <sup>9</sup>Dunuj ree rayagbee guial ni diidxli naj ree diidx guie, abi' rayal chililadx gra bejn laan. <sup>10</sup>Zeel majsi cayza'can ni cayza'can, per cayguieenan ni cayguieenan guial raliduladxan Dios naban, bën naban par güünman yudar gra ree bejn, per mazri bën rililadx ree laaman.

<sup>11</sup>Zian rayal gusiidil bejn ree güjdx tää loj reeman din güün reeman zian. <sup>12</sup>Gojp cudad chitää guiëb ree bejn guial achet sirv lüj guial ad wayajctil bengol. Mejorli been naguiejn din gaquil tijb ejempl par ree bën rililadx Jesucrist, zi'c xhienaag rül diidx, zi'c nabanl, zi'c rën ben ren ree, zi'c rililadxil Dios nētää por ree xixgabza'quil. <sup>13</sup>La'tgaj guialan, basnuu biil xtiidx Dios loj ree bejn, guneenë reeman balüü tää reeman xhie rën guiëb xtiidx Dios. <sup>14</sup>Ad yayanladxil güünl zi'c rayal güünl por quiarguejn ni banee Dios lojl chi badxiib yaa ree bengol guiquil chi gogbee reeman guial lüj naj bën gule Dios.

<sup>15</sup>Badxe'guijc diidx guie ree din gagbee gra ree bejn guial cusnuu zël delant. <sup>16</sup>Gojp lüj con ni rusiidil bejn ree. Guzudxi'ch loj ni ma ragbeel, zian yabää lüj gajc loj casti yabää tää bën cucaagdiaj ree xtiidxil.

### Xhienaag güün Timoteo con ree bën rililadx Jesucrist

**5** Ad tilnël tijb bengol, badëeman consejw zi'cgajc xdadil, abi' xin naj ree xinguiaj, badëë reex consejw zi'cgajc bijchil. <sup>2</sup>Ziangajc béngunaa bengol ree badëë reeman consejw zi'cgajc xniaal, abi' biinguiaj ree, badëë reem consejw zi'cgajc bizanl con xgabza'c.

<sup>3</sup>Bidxga' ree béngunaa bizëjb ni diidxli achut rajp. <sup>4</sup>Per bal tijb béngunaa

bizëjb guin yu' ree xi'n o xiajg, dxel yaløj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdx, zian tää ruladx Dios. <sup>5</sup>Béngunaa naj diidxli bën bizëjb, bën ad rajptri chunin loj guidxliuj guie, tijbzi Dios naj bën yu'guijcaman güün laaman yudar dxel ad rucwëëzt rbejdx rniabaman laaman dxej guiaal. <sup>6</sup>Per tijb béngunaa bizëjb ni rüjn ni rëntzi, laaman naj zi'c tijb bengüt guial ad yu'guijctaman Dios. <sup>7</sup>Bagojn gra ree diidx guie bën ma rililadx ree Jesucrist chitää chu guinieeguijdx laa reeman. <sup>8</sup>Din bën ad rüjnt yudar xcompniar, abi' ni'qui xfamilaman bën zojb ree lidxaman ad rüjntaman yudar, laaman ma basa'n ni rililadxaman abi' piorli najman guial loj ree bën ad rililadx Jesucrist.

<sup>9</sup>Ad tia'l laj chutääz béngunaa bizëjb par gac reeman yudar, naabzi ree béngunaa bizëjb bën ma nadëd ree gayojn ijz abi' ad guzunëtaman ben ren la'tgaj naban lacheelaman. <sup>10</sup>Bal nünbee tää ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badëë lidxaman baya'n ree bejn bal gojcaman benza'c con ree bën rililadx Jesucrist bën bidxin ree lidxaman, bal beenman yudar bën rzagdiaj ree, bal been tääman naguiejn beenman ganax ni zagdx.

<sup>11</sup>Per ad tia'l laj ree béngunaa bizëjb benguiag ree, din despuejs rën reeman guxhliaa reeman abi' ad rüjntri reeman ni rayal güün reeman por Cristo guial rën reeman guxhliaa reeman stijb. <sup>12</sup>Dxel rüjn reeman dol guial ad rüjntri reeman ni ma been reeman compromis con Cristo. <sup>13</sup>Abi' tää ree benguiag guin zë reeman yu yu, zianz rajc reeman costumbr achetdzi rüjn reeman. Abi' ad laatzan, rzuloj ruza't reeman bejn, ru reeman loj xhietëëznin abi' rniece reeman ni ad rayalt guiniee reeman. <sup>14</sup>Zeel rë-

nan guial b́en naj ree b́engunaa bizějb benguiag, mejorli guxhliia reeman stijb, chu' xi'n reeman nabee tēē lidx reeman zi'c rayal, chitēē gudēēd reeman mod guinieeguijdx ree b́en ralen ree dunuj ree laa reeman. <sup>15</sup> Din yu' ree b́engunaa bizějb ma guro'nladx reeman xnejz Dios abi' ma zinal reeman xnejz xindxab.

<sup>16</sup> Abi' bal tijb b́en rliiladx Jesucrist naj xfamilaman tijb b́en baya'n bizějb, dxel laaman rayal gūiun yudar b́engunaa bizějb guin chitēē gacan mazri carg par ree dux compniar ree b́en rliiladx ree Jesucrist. Zian gūiun reeman yudar b́engunaa bizějb diidxli achutri rajp loj guidxliuj guie.

<sup>17</sup> B́en rliiladx ree Jesucrist rayal gap reeman respejt b́en rniabee laa reeman nē ree b́en rniee ruliūū tēē xtiidx Dios zi'c rayal, gudēē tēēdi loj reeman gra ni ryaadx reeman. <sup>18</sup> Din loj xtiidx Dios rēb: “Ad gudxe'di guijxh ro' ree begui'xh la't-gaj cayūjn reeb dxiin”, rēb tēē loj xtiidx Dios: “Rayal gax b́en rūjn dxiin”.

<sup>19</sup> Ad guidxga'di ni rudxiib ree bejn guijc tijb ree b́en rniabee ree b́en rliiladx Jesucrist, bal id yu' tio'p choon ree bejn rēb guial diidxli naj ni rniee reeman por laaman. <sup>20</sup> Per bal tijb b́en ma ca' guialrniabee rusnuu rūjnman dol, rayal guinieenēl laaman delant loj gra reeman d́in guidxeb los demazri reeman.

<sup>21</sup> Yan por Dios, por Jesucrist nē por ree anjl ni ma gulejman, naj rni badxe'guijc been tēē zi'c ma rnin ad cwel loj ree bejn, tiblojzi been con gra reeman. <sup>22</sup> Gojp cudad cwel tijb b́en ni nabee d́in ad ragbeetil bal yu' ni mal cayūjnman, dxel gūiun ree bejn xgab guial nēgajc lūj ruladx ni cayūjnman. Gojp cudad graloj ree dol.

<sup>23</sup> Nē guial guiē't guiē't ragxuu lēnl guial ad nadaant lēnl, ad rē'l nijs laga-zi mejorli gu' tibda'n vin.

<sup>24</sup> Yu' reeman laa rguien gajc xhie dol cayūjn reeman diidz chi gad reeman

gudēēd cwent loj Dios, per yu' reeman ad rguient xhie dol cayūjn reeman xt chi yadēēd reeman cwent loj Dios. <sup>25</sup> Zian-gajc yu' ree b́en ni laa rguien gajc ni zagdx ni cayūjn reeman, abi' yu' reeman ni'quid rguient ni zagdx ni cayūjn reeman, per yu' dxej gagbee ree bejn laan.

**6** Gra ree mojs rayal gap reeman respejt xpatron reeman chitēē chu guiniee diidxguijdx contr Dios o contr xtiidxaman ni caylūin. <sup>2</sup> Abi' bal rliiladx patron guin Jesucrist dxel rayal gap reeman laaman mazri respejt guial nēman rliiladx Jesucrist zi'cgajc laa reeman. Abi' tēē rayal gūiun xchiin reeman zi'c rayal guial cayūjn reeman sirv tijb xcompniar reeman b́en rliiladx Jesucrist compniar ni rēn reeman. Zian balūū ree bejn gūjdx tēē loj reeman d́in gūiun reeman zian.

### Guialnaza'c ni naj diidxli

<sup>3</sup> Bal yu' b́en ruliūū diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad ruliūūtaman bejn ree, <sup>4</sup> najzaman bendxal. Din ruladxaman tildiidxaman abi' ni'quid xnejzt rnieeman, dxel ni zēēd guialnadēd-loj, guial rdxe'ch, guial rniee diidxguijdx abi' ad rliiladxtri lasa' reeman, <sup>5</sup> ad rucwēēzt rdil reeman por ree ni ad rūjnt sirv ni yu' guijc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. B́en naj ree zian, biquied loj reeman. <sup>6</sup> Dad ben rijcw naj bejn chi ma rliiladxaman Jesucrist, per b́en za' conform con ni rajptzaman. <sup>7</sup> Din achet budnē' ree loj guidxliuj ache tēē zajc yunē' ree chi yayējt ree. <sup>8</sup> Bal raya'p ree ni yadaaw ree nē lajd ni yadojt ree con laan rayal yaya'n ree conform. <sup>9</sup> Per ree b́en rzēēbladx gac reeman rijcw loj guidxliuj guie ad rile't sudxi'ch reeman, laa rūjn gajc xindxab laa reeman gan. Mazri rūjn reeman xgab ni ad rūjnt sirv abi' rūjn reeman ni ad rayalt gūiun ree-

man ni rüjn persi rnijt reeman. <sup>10</sup> Din guial rzëëbladx milia laan naj xliuj gra ni mal. Abi' yu' reeman por guialrzëëbladx guin ma basa'n reeman ni rliladx reeman Dios abi' laagajc reeman cusagdiaj laa reeman.

### Ni rayal güün Timoteo

<sup>11</sup> Per lüj Timoteo, xbejn Dios, brica loj ree ni mal guin. Been naguiejn guibanl zagdxe, guibanl zi'c rën Dios, bililadxaman, gojc bën naxanladx, gojp pacens guyën tää ree ben ren. <sup>12</sup> Been da't naguiejn guzudxi'ch loj ni rliladxil xtiidx Jesucrist. Ad gusëëbil guialnaban ni naj guialnaban tiblyaaa, din par zian gulejman lüj abi' rëbil delant loj zien ree bejn xhienaag rliladxil Jesucrist. <sup>13</sup> Yan, por Dios bën razaladx guialnaban loj gra ni yu' loj guidxliuj në por Jesucrist bën ni gunee sin guialrdxeb loj Poncio Pilato, naj rniabee lüj <sup>14</sup> din guzoobil didix güünl ni rmin lojl, sin guial guchaal xhienin chitëë guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb. <sup>15</sup> Gui'taman dxej ni nabee Dios gui'taman, Dios bën rayal respejt bën naj tijbzi Dios rajp tääman gra guialrniabee, bën naj xrey ree rey naj tääman xDad ree dad. <sup>16</sup> Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bën-

guidxliuj ad waguiaat laaman ad zajc tää guguaa bejn laaman. ¡Par laaman naj respejt në guialrniabee par tiblyaaa! Amén.

<sup>17</sup> Bén naj ree benrijcw loj guidxliuj guie, güjdx loj reeman ad güün reeman benro' ad cu'guijc tää reeman guial ni rajp reeman najn par tiblyaaa, din guialnaza'c ni rajp bejn yu' dxej yaran. Mejrli cu'guijc reeman Dios bën naban din laaman razaladx da't dunuj ree graløj din chu' du luxdoo ree nix. <sup>18</sup> Güjdx loj reeman din güün reeman ni zagdxe, güün reeman zien ree ni rüjn sirv, cu' tää luxdoo reeman zagdxe güün reeman yudar bënprob ree. <sup>19</sup> Abi' zian guto'p reeman guialnaza'c ni güün laa reeman yudar loj ree dxej ni zëëd din yayal reeman guialnaban tiblyaaa xanyabaa.

### Xconsejw Pab

<sup>20</sup> Timoteo, badxe'guijc ni rayal güünl, Ad guidxga'l diidxduudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree bën ni naladx guial rajc da't reeman abi'za ad walit ni rajc reeman. <sup>21</sup> Din yu' ree bën rüjn zian yan, abi' ma basa'n reeman guialrliladx reeman Dios.

Dios güünle' lüj Timoteo. Amén.

## Gui'ch barojp guxhaal San Pabl loj Timoteo

### Rugajpdioz Pab Timoteo

**1** Naj Pab, najn tijb xi apóstol Jesucrist, Dios gule naj din gatiechan diidx por promejs ni beenman guial gudëë-daman guialnaban tiblyaa loj ree bën rliadx Jesucrist. <sup>2</sup>Naj caxhal gui'ch guie par lüj Timoteo bën rënan zi'c da xi'-nan. Dux Dad ree Dios con Dad Jesucrist güünle! lüj, yayaman lüj, yabe'cdxe tëë-man luxdool.

### Guialrülüü xcwent Jesucrist

<sup>3</sup>Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bën rünan sirv con guidib luxdon zi'c been ree da bengol gularan been reeman laaman sirv. <sup>4</sup>Chi rusaaladxan ni biinl, ma rën nejzdoon guguan lüj din yayu luxdon zagdxe. <sup>5</sup>Yu'guican guial lüj diidxli rliadxil Jesucrist, yaloj xnaxüjsil Loida con xni-aal Eunice bililadx laaman zian, zeel ragbeechaawan guial ziangajc rliadxil laaman.

<sup>6</sup>Zeel rmin lojl, been naguiejn din guiguien quiarguiejn ni banee Dios lojl chi badxib yan guijquil. <sup>7</sup>Din ad baneet Dios xSprijtaman duloj ree par yadxeb ree, banee xSprijtaman par yadxu'dx-i'ch ree, par yayën du lasa' ree, në par yaya'p ree tijb quiarguiejn zagdxe. <sup>8</sup>Zeel ad yatul guinieel xtiidx Dad Jesucrist, ad yatu nëtëël naj yu'n ladxguuib por laaman, con xyudar Dios gudaan guialzi ni rayal tädil guial guitie'chil xtiidxza'c Jesucrist. <sup>9</sup>Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diidx chi gad guidxliuj gacchaaw beenman xgab guial por Jesucrist gülüüman dunuj ree xhienaag rënman

dunuj ree. <sup>10</sup>Yan bi't Jesucrist bën güit por dux tol ree, rayagbee ree guial diidxli rën Dios dunuj ree. Abi' Jesucrist naj bën biquied guialrniabee loj guial-güjt abi' zian biguien guial yu' guialnaban, guialnaban tiblyaa par ree bën rliadx xtiidxaman.

<sup>11</sup>Zeel gulej Dios naj din gacan xi apóstol Jesucrist, din ganen xtiidxaman gülü tëën laan bën ad najt ree bën Israel, <sup>12</sup>abi' por zian cadëëdan guialzi ni cadëëdan. Per ad ratutan por zian, din naj ragbee chu rliadxan, abi' ragbeen guial laaman rajp guialrniabee par cu'chaawaman ni basa'nan lojman xt dxej ni gui'taman stijb.

<sup>13</sup>Badxe'guicj binal tëë ree diidxza'c ni ma balün lüj, tant zi'c rliadxil Dios në zi'c rën ree lasa'l guial ma nayajc ree tijbzi con Jesucrist. <sup>14</sup>Abi' con xyudar xSprijt Dios bën naban con dunuj ree, gojp ni banee Dios güünl.

<sup>15</sup>Lüj ragbee guial gra ree bën zojb niz Asia ma gulëëladx reeman naj, loj reeman no'ch Figelo con Hermógenes. <sup>16</sup>Dios gagnë ree xfamil Onesíforo, din laaman dád zien volt bagu'man luxdon. Abi' ad batunëtaman naj yu'n ladxguuib, <sup>17</sup>naabzi bi'taman Rom baguuilaman naj xt lodzi badxejlaman naj. <sup>18</sup>Abi' lüj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

### Zi'c tijb xsuldad Jesucrist

**2** Guiáad lüj xi'ngaan, guzujdx'i'ch loj yudar ni raya'p ree por Jesucrist. <sup>2</sup>Abi' ni biguiejnl rën delant loj zien ree bejn, balüün loj ree bën diidxli rliadx, bën ni zajc gülüü ree ben ren.

<sup>3</sup>Zi'c tijb suldadza'c, zian gudaan ree guialzi, zi'c najl xbejn Jesucrist. <sup>4</sup>Ni'qui tijb bën naj suldad ad rut loj ni ad najt xcwent ree suldad par chile' yaya'nman zagdxe loj bën rniabee laaman. <sup>5</sup>Ziangajc bën ni rguijt xhie tijb nin, rayal



quitaman xnejz din chile' tia'man prem.  
<sup>6</sup> Abi' bèn rüjn dxiin dajn, yaløj xgaj rüjn da'taman dxiin din gac yaca'man gualnaza'c.  
<sup>7</sup> Been xgab ni canin lojl, abi' Dad Jesucrist gagnë lüj din chignia'l gra.  
<sup>8</sup> Basaaladx Jesucrist, bèn güt abi' babanman, bèn zëed loj xdiaa rey Davi, zian naj xtiidxa'caman ni catiechan.  
<sup>9</sup> Abi' por zian cadëedan gualzi, xt naxiin lën ladxguib zi'c tijb benmal, per xtiidx Dios ad naxiitan.  
<sup>10</sup> Zianan zeel rdaanan gra par gūnan yudar bèn ni ma naj ree par Dios, din gap reeman perdon por Jesucrist yayal tēē reeman gualnaban za'cdxoon ni naj par tiblyaa.

<sup>11</sup> Waliqui ree diidx ni rēb:

Bal ma bayējt ree con laaman, ziangajc yabajn ree con laaman.

<sup>12</sup> Bal radaan ree xhietēēz ni raza'c ree, ziangajc yanabee ree con laaman.

Bal raguie'ch ree gual ad naguieenbeet reeman, ziangajc guiēbaman gual ad nünbeetaman dunuj ree.

<sup>13</sup> Bal id raguieen ree cumplid dux tiidx ree,

per laaman rüjn cumplid xtiidxaman din ad zajc guidxaa zi'c najman.

### Tijb bèn raya'n zagdx con xchiin

<sup>14</sup> Gūjdx loj ree bejn din gusaaladx reeman ni guie ree, abi' por Dios gūjdx loj reeman gual ad rdildiidx reeman por ree ni ad rüjnt yudar, ruxhiinzan bèn ni riguejn ree laan.  
<sup>15</sup> Been xt lod chile' gūünl din yaya'nl zagdx loj Dios, din chibiguil lojman zi'c tijb bèn ni rüjn dxiin abi' achet ni gustu laaman, gual cayüjnl xnejz con xtiidx Dios.  
<sup>16</sup> Ad gūl diidx ni ad rüjnt sirv, ni ad rüjnt yudar bejn ree. Din bèn rüjn ree zian zi'cri zinal reeman nejk mal,  
<sup>17</sup> abi' xtiidx reeman naj zi'c tijb gualgujdx ni rigaa. Lasa' ree bèn guin naj Himeneo con Fileto,  
<sup>18</sup> din ad zinaltri reeman zi'c naj xtiidx Dios. Rēb reeman gual xcwent gual ya-

ban ree bengüt mal gudëd gojc zian, abi' rüjndxa reeman xgualrliladx tio'p choon ree bejn.  
<sup>19</sup> Per xtiidx Dios ad zajc guidxaa ni'c tijb guiaj ni zojbdxi'ch. Abi' loj xtiidx Dios rēb: “Dios nünbee bèn naj ree xbejnman”, rēb tēē loj xtiidxaman: “Graczi ree bèn rēb gual nünbee reeman Dios rayal gusa'n reeman gra ni mal.”

<sup>20</sup> Lën tijb yu narooob, ad ganaxt ree ni or yu' o ni plajt, nēgajc ree ni goc con yag nē con bajn yu'. Din yu' reen rüjn sirv guixie guixie, yu' tēē reen ma naj dxej rüjn reen sirv.  
<sup>21</sup> Yan ziangajc bèn ni rüjn naguiejn guiban naya, laaman naj zi'c ni rüjn sirv chi rajc xhienin, laaman ma naj xbejn Dad Jesucrist nē ni gūün sirv par laaman, din za'man par gūünman gra ni naj zagdx.

<sup>22</sup> Zeel basa'n xixgab xinguiag, xgab ni ad rüjnt sirv, gubajn xnejz. Binal gualrliladx, gualrën lasa' nē gual yabedxe luxdoo con los demasri ree bèn ni con guidib luxdoo rbejdx rniab Dad Jesucrist.  
<sup>23</sup> Ad tildiidxil por tijb ni ad züjntil gan, o por tijb ni ad lasajc par tildiidxil, din lüj ragbee gual por zian rzuloj wadijl.  
<sup>24</sup> Abi' tijb bèn ni rüjn sirv Dad Jesucrist ad rayalt gacaman bèn ruladx wadijl, rayal gacaman benza'c con chutēēz, rayal gacaman tijb bèn ni gac gülüü ree bejn, gacaman bèn pacens  
<sup>25</sup> guzuxnejz tēēman con ree diidxzagdx bèn ni rüjn ree xcontr ni naj diidxli. Abi' rupent zian gūün Dios gual yayüjn reeman xgab din gagbee reeman ni naj diidxli.  
<sup>26</sup> Par laa reeman loj xtramp xinxab ni rniabee laa reeman gūün reeman ni rēnman.

### Xhienaag gac ree bejn dxej ni bigra ree

**3** Rayal tēē gagbeel Timoteo gual dxej ni bigra ni zēed ree, dād nawēēg gacan par ree bejn gual guiban reeman.  
<sup>2</sup> Din bejn ree, par laagajc reeman

güün reeman xgab, ganaxzi milia güün reeman xgab, abi' güün reeman ben-ro', ganax ree diidxdxal guiniee reeman, guinieeguijdx reeman Dios con ree bejn. Ad zuzoobtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios, <sup>3</sup>ad zëntri reeman ad zaya tēētri reeman bejn ree. Ganax diidx rusquiee guiniee reeman bejn ree, ad zucwēēzt güün reeman ni dxuudx ree, dád bēn nayaaladx gac reeman, abi' guidxe'ch reeman ni naj zagdx. <sup>4</sup>Yayü reeman laagajc ree bēn ni rajp laa reeman confians, sin guialrdxeb guiniee reeman xhietēēz ni gui't guijc reeman, dád guilies xvalor reeman, mazri ma güün reeman ni rēntzi reeman guial loj zi'c rēn Dios. <sup>5</sup>Gulüü guial dád benyadoo naj reeman, per ni'quid zaliladxt reeman xguialrniabee Dios.

Ad guchajguil bēn ni naj ree zian. <sup>6</sup>Din loj reeman no'ch bēn ni ru ree lidx ree bejn, abi' rüjn reeman gan bēngunaa ni naban ree con gadxagayaa ree dol, con gadxagayaa ree xgab ni ad rüjnt sirv, tibrajtzi rliladx reeman laa reeman <sup>7</sup>bēngunaa guin ree zianczi rusiid reeman, per ad ragbeetci reeman ni diidxli. <sup>8</sup>Gulal bēn ni brii ree laj Janes con Jambres been xcontr reeman Moisejs. Yan ziangajc naj ree bēn ni za' ree contr ni naj diidxli, laa reeman ma guxin xquiarguiejn reeman, ad zinaltri reeman zi'c rayal chililadx reeman. <sup>9</sup>Per ad xchejt güün reeman zian, din gra ree bejn gagbee guial rusquiee reeman zi'c goc con Janes nē Jambres.

### Rniabee Pab sudxi'ch Timoteo loj ni basiidaman

<sup>10</sup>Per lüj Timoteo, ragbeel zagdx xhie rulün bejn ree, xhienaag naban, xhienaag naj da xgaban, xhienaag rliladxan, xhienaag ra'pan pacens, xhienaag rēnan bejn ree, xhienaag rdaanan, <sup>11</sup>xhie ma been ree bejn naj,

xhie tēē ree guialzi ma gudēēdan. Lüj ragbee xhienaag guza'can luguiedx Antioquía, Iconio con Listra. Dád ma guzaagdiajn por gra ni ma been ree bejn naj, per Dios babēē naj loj gra ree guialrzagdiaj guin. <sup>12</sup>Abi' dunuj ree rayagbee guial gra ree bēn ni rēn guiban zi'c rēn Dios guialrliladx reeman Jesucrist, naj sagdiaj reeman por ni güün ree bejn laa reeman. <sup>13</sup>Per ree ben mal con ree bēn rusquiee, zi'cri zinal reeman nejz mal, rusquiee reeman bejn ree rusquiee tēē laagajc reeman.

<sup>14</sup>Per lüj basnuu guzudxi'ch loj ni ma basiidil, nē loj ni ma rliladxil, din lüj ragbee chu ree nin basiid lüj. <sup>15</sup>Abi' lüj diizd xindool nünbeel xtiidx Dios, diidx ni zile' güün lüj yudar gagbeel xhienaag naj perdon ni zēēd por guialrliladx Jesucrist. <sup>16</sup>Gra ni zēēd loj xtiidx Dios, por Dios zēēdan. Abi' rüjnan sirv par gusiid bejn bejn ree, par gudēē bejn consejw, par guzuxnejz bejn bejn ree, nē par gagbee bejn xhienaag rayal guibanman, <sup>17</sup>din gagbee xbejn Dios guidiblagaa din güünman graloj ni naj ni zagdx.

**4** Delant loj Dios nē delant loj Jesucrist, bēn gui't zi'c tijb rey par güünman guialguxtis loj ree bēn naban nē loj ree bēn ma güjt, naj rni lojl, <sup>2</sup>gutie'ch xtiidx Dios. Been naguiejn gunee xtiidxman ad chi yu'tzi mod. Been naguiejn chililadx ree bejn ni rnieel, gudilē ree bēn ad ruzoobt diidx, badēē tēē consejw loj ree bejn, balüü reeman sin guialyalenya'l. <sup>3</sup>Din zadxin dxej ad zatiējbt ree bejn gucaagdiajg reeman ni naj diidxli, ma güün reeman zi'ctzi rēn reeman, zaguiil reeman zien ree bēn gulüü laa reeman ganax ni ruladx reeman gucaagdiajg reeman. <sup>4</sup>Ad zidxga'tri reeman ni naj diidxli, mazri ma guidxga' reeman ni rbēēguijc ree bejn. <sup>5</sup>Per lüj Timoteo, gubajn nadēdguien, gudaan xhietēēz guialrzagdiaj tēdil, gutie'ch xti-

idxa'c Jesucrist, been mandad ni banees Dios lojl güünl.

<sup>6</sup>Din naj zamer gugüjt reeman naj, ma zidbig guialgüjt par naj. <sup>7</sup>Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal günan abi' ad basa'ntan ni rliladxan. <sup>8</sup>Yan prem ni rayalan ma cabëzan naj, prem ni gunees Dad Jesucrist lon chi guidxin dxej, bën rüjn guialguxtis zi'c rayal. Abi' ad lotzan guneeman prem guin, në loj gra ree bën yu' luxdoo nix cabëz reeman laaman.

### Ni rayal güün Timoteo

<sup>9</sup>Been naguiejn diob guidganajl naj, <sup>10</sup>din Demas ma guro'nladxaman naj guial mazri ruladxaman ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiáad Tito zëman niz Dalmacia. <sup>11</sup>Tijbzi Lujc za' con naj. Chi gui'til tanë Marcw din zile' güünx yudar guitie'chix xtiidx Dios. <sup>12</sup>Tíquico ma guxhalan laaman luguiedx Éfeso. <sup>13</sup>Chi gui'til tanë da cajpan ni basa'nan luguiedx Troas lidx Carpo, në ree da libran tanë ad yayanladx tēel guidnël da gui'ch reen.

<sup>14</sup>Lejandr bën naj herrer, dád zien ree ni mal ma beenman naj, per con Dios

yaguijxaman gra ni beenman. <sup>15</sup>Gojp cudad con laaman, din laaman dád rüjn xcontraman ni ranee ree.

<sup>16</sup>Yaloj chi guzun loj ree guxtis achutcsi been naj yudar, graczi reeman guro'nladx naj. Gagnë Dios ad zidxgatanan ni been reeman. <sup>17</sup>Per Dad Jesucrist been naj yudar banees tēëman naj gojl persi baloox gutiechan xtiidxaman, persi biguiejn ree gra ree bën ad najt bën Israel laan. Zian baslaa Dios naj, zi'c rliaa tijb bejn loj beedx. <sup>18</sup>Abi' Dad Jesucrist, laaman yabëë naj loj gra ni mal, laaman guinia naj xt chi guidxin dxej guidxinan lod canabeeman xanyabaa. jPar laaman naj respejt gra tiamp në zianczi! Amén.

### Diidx bigra ca loj gui'ch guie

<sup>19</sup>Bagajpdioz Prisca në Aquila në ree xfamil Onesiforo. <sup>20</sup>Erasto baya'nman Corinto, guiáad Trófimo ragxuman basa'nan laaman luguiedx Mileto. <sup>21</sup>Been naguiejn guda chi gad tiamp nayaag gui't. Eubulo, Pudente, Lino, Claudia në los demasri ree bën rliladx Jesucrist rugajpdioz reeman lüj.

<sup>22</sup>Dad Jesucrist gagnë lüj, abi' Dios güünle' gradi. Amén.

## Gui'ch guxhaal San Pabl loj Tito

### Rxhiaal Pab xtiidx Dios

**1** Naj Pab cayünan Dios sirv, naj najn xiapóstol Jesucrist par günan yudar bën ma naj ree par Dios xhienaag chililadx reeman laaman din gagbee tää reeman diidxli xhienaag guiban reeman delant loj Dios, <sup>2</sup> din yu'guijc ree guial zian yaya'p ree guialnaban tiblayaa delant loj Dios. Diizd chi gad guidxliuj gacchaaw, rëbaman guial yazaladxaman guialnaban guin, abi' dunuj ree rayagbee ree zagdx ree guial ad rnieet Dios diidx rusquiee. <sup>3</sup> Abi' chi bidxin dxiej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bën ni rüjn dux tol ree perdon. <sup>4</sup> Cucan gui'ch guie par lüj, Tito, guial najl zi'c da xi'nan guial tiblojzi raliduladx Jesucrist. Dux Dad ree Dios con Jesucrist bën günt por dux tol ree, yaya reeman lüj, güünle' reeman lüj yabe'cdxe tää reeman luxdool.

### Dxiin ni been Tito guiedx Creta

<sup>5</sup> Naj basa'n lüj niz Creta din güünl ni ryaadx günan ni. Abi' tijbgaj luguiedx gucaabeel bën ni nabee ree loj ree xbejn Cristo zi'c ma rnin. <sup>6</sup> Chi gucaabeel laa reeman rayal gucaabeel bën ni naban ree zi'c rayal chitää chu guinieeguidx laaman, bën ni yu' tijbzi lacheel, rililadx tää ree xi'nman Jesucrist, bën ni nünbee ree bejn guial ad nabant ree xi'nman zi'ctzi rën reex ad najt tää reex xin rusagloj. <sup>7</sup> Din bën rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tijbzi ni guiëbaman güün sirv, ad rayalt gacaman bënralenya', ad rayalt gacaman bengui', ni'qui ben ruladx wadijl, ad zaguiil tää-

taman mod xhienaag tia'man xmilia ree bejn. <sup>8</sup> Rayal gacaman bën ni gudää lidx yaya'n ree bejn chi rüjnan naguiejn, bën ruladx güün ganax ni zagdx, gac tää nabee laagajcaman. Rayal gacaman benza'c, guibanman zi'c rayal delant loj Dios nää delant loj ree bejn, ad rayalt guibanman zi'ctzi rënman. <sup>9</sup> Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tääman bën ni rnieeguidx ree xtiidxli Dios.

<sup>10</sup> Din dád zien ree bën ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bën Israel ni rülüü ley loj reeman no'ch mazri lasa' ree ben guin. <sup>11</sup> Lasa' ree bën guin ad rayaltri yatiëëb ree gülüü reeman bejn ree, din dád zien ree yu ma beendxa reeman gra tijb famil guial rülüü reeman laa reeman ni ad rayalt naabzi par güün reeman gan milia.

<sup>12</sup> Tijb gajc bën ladx reeman bën rëb reeman naj bën badää xtiidx Dios loj ree bejn, laaman rëb guial ree bën Creta ganax diidx rusquiee rniee reeman, dád nadoxh reeman, dád bën nala naj reeman abi' achetzi rën reeman güün reeman. <sup>13</sup> Abi' waliman, zeel gudilë reeman con diidxdoxh din chile' chinal reeman xtiidx Cristo zi'c rayal, <sup>14</sup> ad guidxga'ri reeman ni rbëëguijc ree bën Israel, ad güün teë reeman ni rniabee ree bën ni ma guro'nladx ree ni naj diidxli.

<sup>15</sup> Bën naya ree xquiarguejn, achet xgab mal rüjn reeman. Per ree bën rüjn ganax xgabdxuudx, bën ad rililadxt, achetzi xgab zagdx rüjn reeman guial ad nayat xquiarguejn reeman, ganax ree xgab mal yu' guijc reeman. <sup>16</sup> Laa reeman rëb guial nünbee reeman Dios, per rëbzi reeman din ad rüjnt reeman ni rën Dios. Dád bendxuudx naj reeman rusa-gloj tää reeman, ni'qui tijb ni rüjn sirv ad rajct rüjn reeman.

### Ni rayal gulüü Tito

**2** Per lüj Tito, balüü ree bejn gra zi'c tal naj xtiidxza'c Dios. <sup>2</sup>Balüü ree bengol din guiban reeman zagdxe, gustëdguien reeman din gap bejn laa reeman respejt, guidib luxdoo reeman chililadx reeman, guiën reeman bejn ree, taan tëë reeman xhietëëz ni sac reeman. <sup>3</sup>Ziangajc ree béngunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengu'. Rayal gulüü reeman bejn ree xhienaag naj ni zagdxe, <sup>4</sup>rayal gulüü reeman béngunaa guiag ree din guiën lacheel reeman con xi'n reeman, <sup>5</sup>din guiban tëë reeman naya delant loj Dios, nadëdguien, guinia lidx reeman, gac reeman benza'c guzoob tëë reeman xtiidx lacheel reeman chitëë chu guinieeguijdx xtiidx Dios.

<sup>6</sup>Ziangajc lüj Tito, badëë consejw loj ree xinguaaaw guiag din guiban reex nadëdguien. <sup>7</sup>Been naguiejn din güünl gra xnejz din guguaa reex xhienaag güün reex ni naj zagdxe. Chi rulüül laa reex, balüü reex zagdxe zi'c rayal, <sup>8</sup>con ganax ree diidx zagdxe chitëë xhie gudxiib ree bejn guijquil, din yaya'nxtu ree bën ni rdxe'ch dunuj ree guial achet yadxejl gudxiib reeman duguijc ree.

<sup>9</sup>Badëë tëë consejw loj ree bën naj ree mojs din guzoob gra xtiidx xpatron reeman, gac reeman benza'c ad yadxi'ro' reeman. <sup>10</sup>Ad cwan reeman xhie xieen xpatron reeman, gac reeman bën confians din guguaa gra ree bejn xhienaag naban reeman guial niza'cdxoon naj xtiidx dux Dad ree Dios bën rüjn dux tol ree perdon.

<sup>11</sup>Abi' Dios ma balüüman plact rënman dunuj ree, abi' guial rënman dunuj ree zile' gac gra ree bejn perdon. <sup>12</sup>Guial rënman dunuj ree rayagbee ree guial rayal yasa'n ree ni mal con ree ni ad rünjt sirv ni rayën ree yaguien

ree loj guidxliuj guie, din yabajn ree nadëdguien, zi'c rayal, zi'c rën Dios yabajn ree loj guidxliuj guie <sup>13</sup>la't-gaj caylëjz ree dxej za'cdxoon ni gac cumplid xtiidxza'caman zi'c ma naman duloj ree guial gui't dux Dios ree Dad Jesucrist con xgualrniabeeman, bën been perdon dux tol ree. <sup>14</sup>Laaman güit por dunuj ree din yabëëman dunuj ree loj gra dol abi' basiaman dunuj ree din yayajc ree xbejnzaman abi' yaguien ree naguiejn yaguien ree ganax ni zagdxe.

<sup>15</sup>Gra ni ma rnin lojl balüün laa reeman sin gualrdxeb badëëd reeman consejw, bazuxnejz reeman con gualrniabee ni ca'l. Ad tiëbil gusagloj reeman lüj.

### Ni rayal güün ree bën rliladx Jesucrist

**3** Basaaladx reeman din güün reeman ni rëb ree bën rniabee laa reeman në ni rëb ree guxtis, gac reeman bën nacaagdiajg susin tëë reeman par güün reeman ni naj zagdxe. <sup>2</sup>Ad guinieeguijdx reeman bejn ree, ad quüil reeman wadijl, gac reeman benza'c në bënchaawlax con chutëëz bënan.

<sup>3</sup>Gocli nëgajc dunujn baguienanan zi'ctzi bayënan, ad bazoobtan diidx, badxu'n loj nejz mal, baguienanan ni bayëntzan në zi'ctzi naj dux xgaban. Baguienanan ganax ni ad najt zagdxe, bayajcan bën nadëdloj, bidxe'ch ree bejn dunujn abi' badxe'ch gajcan laa reeman. <sup>4</sup>Per chi bidxin dxej dux Dad ree Dios bën baguijx por dux tol ree, balüüman loj ree bejn guial najman benza'c rën tëëman bejn. <sup>5</sup>Laaman been dux tol ree perdon, per ad guial baguienent ree xhie ni rüjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree gualnaban cüb. <sup>6</sup>Por Dad Jesucrist bën baguijx por dux tol ree, Dios bazaladx dunuj ree zro' da't

xSprijtaman. <sup>7</sup>Dxel zi'cgajc laaman ma nulabaman dunuj ree sin dol guial najman benza'c, yayal ree guialnaban tiblyayaa ni raléjz ree.

<sup>8</sup>Laan naj diidxli. Zeel rënan gusnuu gugojn diidx guie ree bén ni rliladx ree Dios din güün reeman naguiejn güün reeman ni naj zagdxe. Abi' nine ree naj ni zobjloj në ni güün sirv par gra ree bejn. <sup>9</sup>Per ad guidxga'l diidx ni ad rüjnt ree sirv ni rniee ree bejn, ad guidxga'l xtiidx ree bén ni ru ree xgab mazri chunin naj diidxli xdiaa gulal ree bejn. Ad guidxga' tēēl bén ni rdildiidx ree por xley Moisejs, din ad najtan ni zobjloj achet tēēt lasajc ni rniee reeman, achetzi sirv rüjn ree ni guin.

<sup>10</sup>Bal por tijb lējt rzuloj rlia' lasa' ree xbejn Cristo, guneenëman tib volt o tio'p volt, abi' bal id ruzoobaman xtiidxil mejorli babëëman lojdi. <sup>11</sup>Din lüj ragbee guial lasa' ree bén guie ma guro'nladx

reeman ni naj diidxli abi' laagajc reeman cunijt laa reeman por xtol reeman.

### Ni rayal güün Tito

<sup>12</sup>Chi gaxhalan Artemas o Tíquico lod zobjil, been da't naguiejn tagnaj naj luguiedx Nicópolis, din ni ma benan xgab gadëëdan tiamp nayaag. <sup>13</sup>Been tēē yudar Apolos në licenciad Zena zi'ctzi gaquil. Badëë gra ni ryaadx reeman din chinal xnejz reeman chitëë xhie guiyaadx reeman. <sup>14</sup>Në ree dux compniar ree rayal gusiid güün ni naj ni zagdxe, güün reeman yudar chi rüjn naguiejn güün reeman yudar chitëë guiban xlia'zi reeman.

### Diidx bigra ca ree loj gui'ch guie

<sup>15</sup>Gra ree bén za' con naj rugajpdioz reeman lüj. Bagajpdioz sii gra ree bén rën dunujn por guialrliladx ni raya'pan. Dux Dad ree Dios güünle' gradi. Amén.

## Gui'ch guxhaal San Pabl loj Filemón

**1** Naj Pab, yu'n ladxguiib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayën da'tan lüj. <sup>2</sup>Raxhaal tëën gui'ch guie par gra ree bën rililadx Jesucrist bën rado'p ree lidxil, në par Apia nètëë par Arquipo, bën naj dux compniar ree caytie'ch ree xtiidx Jesucrist. <sup>3</sup>Dux Dad ree Dios në Dad Jesucrist güünle! lëjt yabe'cdxe tëë reeman luxdoodi.

### Rudëë Pab quixtëë loj Dios por Filemón

<sup>4</sup>Beegaj chi rbedx rniaaban Dios rudën quixtëë lojman por lüj, <sup>5</sup>din ma cwa'n ruson guial dád rënl rililadx tëël Dad Jesús dád rën tëël gra ree bën ma naj xbejn Dios. <sup>6</sup>Rniaab tëën lojman guial lüj cayüjnl dunujn yudar par yatie'ch ree mazri xtiidx Jesucrist, gusnuu gagbeel gra ni zagdxë ni raya'p ree guial ma nayajc ree tijbzi con Jesucrist. <sup>7</sup>Dád nix yu' luxdon rabaa tëën guial rënl dux compniar ree bën rililadx ree Jesucrist, din por lüj bijch ma bayu luxdoo reeman zagdxë.

### Rniee Pab por Onésimo

<sup>8</sup>Zeel majsi ra'pan gualrniabee par ganin conin rayal güünl guial najn tijb xi apóstol Jesucrist, <sup>9</sup>per guial rayën du lasa', zagdxeli rniaaban lojl, naj Pab, ma najn tijb bengol abi' yan yu'n ladxguiib guial rtiechan xtiidx Jesucrist, <sup>10</sup>rniaaban lojl por Onésimo, bën naj zi'c da xi'-nan guial ma bililadxaman xtiidx Jesucrist ni ben lojman lën ladxguiib guie.

<sup>11</sup>Gocli achet sirv been Onésimo lüj, per yan zi'c rüjnman naj sirv zian-

gajc güünman lüj sirv. <sup>12</sup>Yan caydxi'n laaman lidxil, gunajchi'man zi'c rniajchi'l naj. <sup>13</sup>Guyënan nizujman con naj din rüjnman naj yudar luar lüj, la'tgaj yu'n ladxguiib guial rtiechan xtiidx Jesucrist. <sup>14</sup>Per ad guyëtan nünan xhienin sin xtiidxbeel din xhietëëz favor güünl por naj ad züjntilan naguiejn, güünlan guial guiënl. <sup>15</sup>Bal brii Onésimo lidxil tiblädëd, per gojc zian din chile' sunëman lüj tiblayaa, <sup>16</sup>per ad zi'ctri tijb mojs, mazri zagdxë guial loj tijb mojs, zi'c tijb bijchil bën rënl. Dád rënan laaman, per lüj rayal guiënl laaman mazri ad zi'ctzi tijb bejn, rayal guiënl laaman zi'c tijb bijchil por Jesucrist.

<sup>17</sup>Yan bal walil nayajc ree compniar por Jesucrist, baca' Onésimo gunaladx naj gajcan. <sup>18</sup>Bal yu' xhie beenman lüj, o bal yu' xhie ralaman lojl, naj yaguix laan. <sup>19</sup>Abi' naj Pab, quijb naj cuca diidx guie ree: Naj yaguixan, majsi rulüü ad rüjnt naguiejn ganin lojl din gusaaladxil guial xt xguialnabanl ralil lon. <sup>20</sup>Yan been naj favor guin guial rënl Jesucrist, zian bagu' luxdon guial nayajc xbejn Jesucrist.

<sup>21</sup>Naj caxhal gui'ch guie lojl abi' ragbeechaawan guial guzoobil da didxan, ragbee tëën guial mazri naj ni güünl guial loj ni canin lojl. <sup>22</sup>Been tëë porvinid lënu lidxil lod yaya'nan, din zi'c cabejdx canabidi Dios, ragbeen tiëbaman guidganan lëjt.

### Diidx bigra ca ree loj gui'ch guie

<sup>23</sup>Epafras, bën yu'në'n ladxguiib guial ratie'chan xtiidx Jesucrist, rugajpdiozaman lüj. <sup>24</sup>Nëgajc Marcw, Aristarco, Demas në Lujc, bën cayüjn gajc ree naj yudar caytie'chan xtiidx Jesucrist në reeman rugajpdioz lüj. <sup>25</sup>Dad Jesucrist güünle! lëjt.

## Gui'ch par ree b́en Hebreos

### Ma gunee Xi'n Dios xtiidx xDadaman

**1** Tiamp gulal, Dios guneeně ree dux b́engulal ree zien volt ně gadxagayaa mod por ree b́en baděě xtiidx Dios loj ree bejn, <sup>2</sup>per yan ma guneeněman dunuj ree por Xi'nman. Dios been gra ni yu' xanyabaa ně loj guidxliuj por Xi'nman. Abi' gra basa'n loj Xi'nman. <sup>3</sup>Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por guialrniabee ni rajpaman.

### Xi'n Dios naj mazri b́en zobjloj guial loj ree anjl

<sup>4</sup>Zianan zeel laaman naj mazri b́en zojbloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios b́en rajp gra guialrniabee <sup>5</sup>Din ad yu't dxej rěb Dios loj ree anjl:

Lij naj da xi'nan,  
abi' diizd yan gultin guial lij naj da xi'nan.

Achut tēet loj anjl rěbaman:  
Naj gac Xdadil, abi' lij gac da xi'nan.

<sup>6</sup>Per chi guxhaal Dios Xi'nman loj guidxliuj, Xi'nman b́en rajp guialrniabee zi'cgajc laaman, dxel rěbaman:

Gra ree da anjlan,  
gol guyen da Xi'nan, gol gojp tēeman respejt.

<sup>7</sup>Abi' chi gunee Dios por ree anjl, rěbaman:

Naj rin ree da anjlan zi'c bi, rin tēen laa reeman zi'c bajl.

<sup>8</sup>Per por Xi'nman rěbaman:  
Dad Dios, xguialrniabeel naj par tiblyayaa,

abi' guidib tiamp nabeel zi'c rayal.

<sup>9</sup>Lij ruladxil ni naj zagdxe

abi' rdxe'chil ni mal.

Zeel Dios b́en naj xDiosil  
baneeman lij mazri guial rabaa guial loj  
gra ree b́en za'něl.

<sup>10</sup>Rěb tēeman:

Dad, diizd yaloj lij been guidxliuj ně  
xanyabaa  
con gra ni yu' loj reen.

<sup>11</sup>Gra reen yu' dxej nit reen,

per lij ma nabanl tiblyayaa.

Gra reen yayox zi'c tijb lajd,

<sup>12</sup>gusie'til laa reen zi'c rusie't bejn  
xabaman,

abi' zuchaal laa reen zi'c ruchaa bejn  
xabaman,

per lij ad yu't dxej guidxaa zi'c najl

abi' zianczi gapil guialnaban.

<sup>13</sup>Ad yu't dxej rěb Dios loj tijb ree  
xianjlaman:

Gurej da ladbeen xt gūnan gan nabeel  
b́en rdxe'ch ree lij.

<sup>14</sup>Din gra ree anjl naj sprijt cayūjn ree  
sirv loj Dios, abi' rxhiaalaman laa ree-  
man din gūn reeman yudar b́en ni gap  
ree guialnaban tiblyayaa delant loj Dios.

### Ad yasa'n ree diidx ni yaběe dunuj ree loj dol

**2** Zeel rijn naguiejn yayidxga' ree xtiidx Dios ni ma bacaagdiajg ree chitěe yasa'n ree xnejzaman ni ma zunaal ree. <sup>2</sup>Din zi'c goc cumplid gra xtiidx Dios ni gunee ree anjl diizd gocli, b́en ad bazoobt diidx, b́en been ree dol, laa reeman bayal casti ni rayal reeman. <sup>3</sup>Xhieza naag laa ree loj casti bal ně dunuj ree ad zayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diizd yaloj, abi' ree b́en biguiejn laan, laa reeman bagojn dunuj ree. <sup>4</sup>Yan zi'c ma cwa' bejn guialrignia' rent guialrignia' ren por xSprijt Dios zi'c naj xixgabaman, abi' por ree sen ně ree milagr con los demazri ree ni



radxaloj bejn, zian ma bal   Dios guial ni diidxli naj ree diidx guin.

### Jesucrist rab   bejn loj dol

<sup>5</sup>Dios ad bad  taman guialrniabee loj ree xianjlaman par nabee reeman lod yaya'p ree guialnaban c b ni cayza't ree, <sup>6</sup>din yu' tiblajt loj xtiidx Dios lod r b bejn:

Dios,  chu naj b nguidxliuj zeel rusaal-adxil laaman?

 Chu naj xi'n b nguidxliuj zeel r jnl xgab por laaman?

<sup>7</sup>Guyu tijb tiamp ni baletil xi valoraman guial loj ree anjl.

Per despuejs ma beenl laaman b n zobjloj,

bad  l guialrniabee lojman din nabeeman gra ree ni beenchaawil,

<sup>8</sup>abi' gra basa'nl lojman.

Chi bad   Dios guialrniabee lojman par nabeeman gra, achetcki ni baya'n ni ad zanabeetaman majsi dunuj ree sta ad cayguiaat ree guial nabeeman gra. <sup>9</sup>Per dunuj ree rayagbee guial guyu tiamp ni balet Dios xvalor Jes s guial loj ree anjl. Yan ma ca'man guialrniabee abi' rajp bejn laaman respejt por gualzi ni gud daman chi g taman por gra bejn, abi' zian gojc guial r n Dios dunuj ree.

<sup>10</sup>Por Dios yu' gra, abi' laaman rniabee gra ni yu', abi' r nman chu' zien ree xi'nman xanyabaa. Zeel por gualzi ni gud d Jesucrist bayaaloj bazoobaman xtiidx Dios, abi' tijbzi por laaman ma zajc yaya'p ree perdon. <sup>11</sup>B n ma naya ree delant loj Dios, por Jesucrist naya reeman. Abi' tant Jesucrist tant ree b n ma naya por laaman, tijbzi Dios naj xdad reeman. Zeel ad ratut Jesucrist r baman loj reeman: Da bichan. <sup>12</sup>Zi'c ca tib lajt loj xtiidx Dios lod r b:

G n diidx loj ree da bichan xcwentil, abi' chi yadxaag lasa' reeman golan cant ree ni guza't l j zagdx.

<sup>13</sup>R b t eman:

Tijbzi Dios yu'guican gagn  naj;

abi' r baman:

Laa naj guie con ree da xi'nman xin bazaladx Dios naj.

<sup>14</sup>Abi' zi'c b nguidxliuj tibloj najman rejn con b  l, ziangajc gojc Jesucrist chi bi'taman loj guidxliuj persi gojc g jtaman, abi' por xgualg jtaman beenman gan loj guialrniabee ni gop xindxab loj guialg jt. <sup>15</sup>Zian beenman persi bab eman bejn ree loj guialnadxeb xieen guialg jt, b n ni guidib tiamp ni naban reeman rdxeb reeman guialg jt zi'c rdxeb bejn xpatronman. <sup>16</sup>Din laaman ad bi'ttaman loj guidxliuj par gagn man anjl ree, bi'taman par gagn man b n naj ree xdiaa Abraham. <sup>17</sup>Zeel gojcaman zi'cgajcki b nguidxliuj, persi bidxin dxej gojcaman tijb bixhioz zobjloj delant loj Dios, bixhioz ni raya bejn, b n r jn t   cumplid xtiidx Dios persi gojc gudijxaman por xtol ree bejn. <sup>18</sup>Abi' guial laagajcaman guzagdiaj been t   xindxab guial ad zuzoobtaman xtiidx Dios, zeel laaman zajc gagn  ree b n ni cay jn xindxab naguiejn g  n reeman dol.

### Jes s naj mazri b n zobjloj guial loj Moisejs

**3** Zeel compniar, l jt guial ma najdi xbejn Dios, l jt guial ma bacaabeman l jt par gaquidi xi'nman, gol badxe'guijc Jesucrist guial laaman naj bixhioz zobjloj, b n raliduladx ree, b n guxhaal Dios loj guidxliuj. <sup>2</sup>Din Jesucrist bazoobaman xtiidx Dios b n bacaabee laaman zi'c bazoob Moisejs xtiidx Dios delant loj ree b n Israel. <sup>3</sup>Per mazri rayal Jesucrist respejt guial loj Moisejs guial mazri zobjlojman, zi'c tijb b n ni r jn yu mazri ruza't reeman laaman zagdx guial loj yu guin. <sup>4</sup>Gra yu yu'czi tijb b n r jn laan, per Dios laaman been gra ni yu'. <sup>5</sup>Abi' Moisejs bazoobaman xtiidx Dios, beenman sirv lojman chi bad  daman xtiidxaman loj ree b n Is-

rael persi bagojnman laa reeman ni rëb Dios. <sup>6</sup>Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yalenya' ree abi' yalëéz ree xt dxej bigra.

### Gol guzujdxi'ch loj xnejz Dios

<sup>7</sup>Zeel, zi'c rëb xSprijt Dios:

Bal rucaagdiajguidi xtiidx Dios yan dxej, <sup>8</sup>ad cwexuudi zi'c been ree bén ad bacaagdiajgt xtiidxaman chi been reeman laaman prueb chi guzu reeman loj yujbidx.

<sup>9</sup>Abi' yagaj naj lod ad bacaagdiajgt ree xbéngulalidi xtiidx Dios majsi baguiaa reeman milagr ni beenman delant loj reeman loj tiuu ijz niz loj yujbidx.

<sup>10</sup>Zeel bidxe'ch Dios bén guin ree, abi' rëbaman:

“Xgab ren rüjn reeman, ni'quid rüjnt reeman naguiejn din gagbee reeman xhienaag rënan güün reeman.”

<sup>11</sup>Zianan zeel bidxe'ch Dios abi' rëbaman guial ad yu't dxej gap reeman xguialraziiladx Dios.

<sup>12</sup>Zeel gol gojp cudad compniar raliduladx ree Jesucrist, chitëë chu' tijbidi guial por xixgab malidi ni rudxoon chililadxidi, guibi'cadi loj xnejz Dios bén naban. <sup>13</sup>Mejorli guixie guixie gol guneenë gol badxe' tëë luxdoo ree lasa'di naga yu' tiamp, chitëë ad zuzoobtridi xtiidx Dios guial ma been dol lëjt gan. <sup>14</sup>Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guia'xchej.

<sup>15</sup>Abi' zi'c ma rnin lojdi, loj xtiidx Dios rëb: Bal rucaagdiajguidi xtiidx Dios yan,

ad bal gaquidi nad zi'c goc ree bén ad bazoobt xtiidx Dios gocli.

<sup>16</sup>Abi', ¿chuza ree nin ad bazoobt xtiidx Dios majsi biguiejn reeman ni gunee-man? ¿Nid bén Israel ni babëë gajc ree Moisejs Egipton ya? <sup>17</sup>Abi', ¿nid laagajc reeman bidxe'ch Dios loj tiuu ijz ya por dol ni been reeman abi' zien reeman güjgt loj yujbidx? <sup>18</sup>Abi', ¿nid bén guin gajc reen rëb Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman? <sup>19</sup>Zian rayagbee ree guial ad gojpt reeman guialraziiladx guin guial ad bililadxt reeman ni rëb Dios loj reeman.

**4** Zeel yan guial sta raya'p ree promejs ni been Dios guial yaya'p ree xguialraziiladxaman, rayal yaya'p ree cudad chitëë awa raya'p ree promejs guin yaya'n tijb dunuj ree guial ad zaya'pt ree guialraziiladx guin. <sup>2</sup>Din dunuj ree ma bacaagdiajg ree xtiidxza'c Jesucrist zi'c-gajc laa reeman, per laa reeman achet sirv been guial bacaagdiajg reeman didx guin ree, guial ad bililadxt reeman laan. <sup>3</sup>Per dunuj ree guial ma baliduladx ree xtiidx Dios, ma raya'p ree guialraziiladx guin, sa'n por ree bén ad bililadxt rëb Dios:

Guial bache'ch reeman naj zeel ma benan xgab

guial ad zajpt reeman da guialraziiladxan.

Diizd chi gule'cchaaw Dios guidxliuj baloox xchiinman, <sup>4</sup>zi'c rëb loj xtiidxaman por dxej ni raziiladx bejn:

Chi gulox been Dios gra xchiinman dxel ni goc gajdx dxej baziiladxaman.

<sup>5</sup>Per par ree bén ad bazoobt xtiidxaman rëbaman:

Ad yu't dxej gap reeman da guialraziiladxan.

<sup>6</sup>Bén biguiejn ree xtiidx Dios yaloj, ad gojpt reeman guialraziiladx guin guial ad bazoobt reeman xtiidxaman, per sta

yu' ree bén ryaadx gap guialraziiladx guin. <sup>7</sup>Zeel chi gudéd zien ijz, Dios gulëeca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:

Bal riguejndi xtiidx Dios yandxej, gol bazoob xtiidxaman.

<sup>8</sup>Din bal por Josué niajp ree bén Israel guialraziiladx, ad nuza'tt Dios zatijb dxej. <sup>9</sup>Zeel xt yandxej yu' guialraziiladx guin par ree xbejn Dios. <sup>10</sup>Din bén rajp xguialraziiladx Dios, raziiladxaman xieen gra xchiinman zi'c baziiladx Dios chi gulox been xchiinman. <sup>11</sup>Zeel rayal yaguieen ree naguiejn yaya'p ree guialraziiladx guin, chitëë chu güün zi'c been ree bén ad bazoob xtiidx Dios.

<sup>12</sup>Din xtiidx Dios nabanan rajp tëen guialrniabee. Mazri rëëzan guial loj tijb espad ni nadoxh grop lad, rëëzan lën luxdoo bejn në lën xsprijtaman. Xt lën dxijt në lën yob rëëzan, abi' por laan ragbee bejn bal ni mal o ni zagdxe naj ni rënman güünman. <sup>13</sup>Achetzci ni been Dios zajc guiguie'ch lojman, din gradooczan ruguiaaman, abi' lojman naj yadëed ree cwent.

### Jesús naj bixhioz mazri zobjloj

<sup>14</sup>Zeel guial ma raya'p ree bixhioz ni mazri zobjloj, abi' laaman naj Jesucrist Xi'n Dios, bén ma zobj xanyabaa, rayal yasnuu yadxu'dxi'ch ree loj ni raliladx ree laaman. <sup>15</sup>Din Jesucrist bén naj dux bixhioz zobjloj ree laaman zajc gagnë dunuj ree chitëë güün dol dunuj ree gan. Din në laaman guzajc graloj zi'c-gajc cayza'c ree, per laaman ad yu't dxej beenman dol. <sup>16</sup>Zeel con confianz ma zajc yabiig ree loj Dios yarejdx yanaab reeman, bén rën dunuj ree par yayaman dunuj ree. Abi' guial rënman dunuj ree, laaman gagnë dunuj ree loj hor ni yayën ree chu güün dunuj ree yudar.

**5** Gra bén rajc bixhioz mazri zobjloj, Dios gulej laaman loj ree bejn persi

rbejdx rniabaman Dios por ree bejn. Abi' lojman rudëë bejn gon par Dios në ree be ni guiët por ree xtol ree bejn. <sup>2</sup>Abi' guial benguixliuj gajc naj bixhioz guin, zeel ragbeeman xhienaag rzajc bejn. Zeel rile' rajpaman pacens bén ni ad ragbeet xhienin rüjn, në ree bén ad zinalt xnejz Dios. <sup>3</sup>Abi' guial yu' chi rüjn bixhioz guin dol zeel nëman rugüjt tijb be zi'c gon par Dios por xtolaman, zi'cgajc rüjnman por ree bejn.

<sup>4</sup>Abi' achut zajc guiëb guial gacaman bixhioz zobjloj, Dios naj bén rbe laaman zi'c guleman Aarón. <sup>5</sup>Ziangajc gojc con Jesucrist, ad laataman rëb guial gacaman bixhioz zobjloj par dunuj ree, Dios bacaabee laaman, chi rëbaman: Lüj naj da Xi'n'an, abi' diidx yan gulin guial lüj naj da Xi'n'an.

<sup>6</sup>Ziangajc rëb zatib lajt loj xtiidx Dios por Jesucrist:

Lüj naj bixhioz par tiblayaa zi'c goc Melquisedec bixhioz.

<sup>7</sup>Chi guban Jesucrist loj guidxliuj guie dád biinman gurejdx gunabaman Dios bén zajc yabëë laaman loj gualgüjt ni gudëdaman. Dxel bidxga' Dios Jesús badëëman laaman valor guial bazoobaman gra xtiidxaman. <sup>8</sup>Majsi Xi'n Dios najman, per basiidaman bazoobaman diidx majsi guzagdiajman. <sup>9</sup>Abi' guial guidiblagaa beenman gra ni rën Dios güünman, zeel por laaman tiblayaa ma yu' perdon par gra ree bén guzoob xtiidxaman. <sup>10</sup>Abi' Dios naj bén gule laaman par gacaman bixhioz zobjloj zi'c goc Melquisedec bixhioz.

### Royal yasnuu yaguieenbee ree xtiidx Dios

<sup>11</sup>Dád zien ni yu' ganin lëjt por ree ni guin, per nawëëg najn par ganinan zi'c rënan guial dád nen rignia'di. <sup>12</sup>Ma gojc xchej da't nünbeedi xtiidx Dios, yan bal zajcan, lëjt ma rayal gulin ben ren ree, per lëjt sta ryaadx chu' bén gulin lëjt xti-

idx Dios stijb ni basiididi guia'xchej. L jt naj zi'c tijb xindoo ni r ' ganax lejch luar gawix graloj. <sup>13</sup> Abi' gra ree b n naj zi'c xindoo ad wayajct gaw graloj, ad zile't gagbee reeman conin naj xnejz. <sup>14</sup> Per ree b n ni cusnuu cayignia' xtiidx Dios, laa reeman naj zi'c b n ma raw graloj guial ma rignia' reeman conin naj zagdex con t enin naj ni mal.

**6** Zeel rayal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhien-aag yasa'n ree ni mal ni baguieen ree yaloj, o xhienaag yaliduladx ree Dios, <sup>2</sup> o xhienaag tiobnijs bejn, o xhienaag yadxiib du yaa ree guijs bejn, o xhienaag yasban Dios beng t ree, o xhienaag g  n Dios xguialguxtisaman chi guidxin dxej yad ed ree cwent lojman, <sup>3</sup> zagdxeli naj guial yasnuu ree yasiid ree xtiidxaman. Abi' Dios gagn  dunuj ree din chile' yaguieen ree zian.

<sup>4</sup> Din b n ma ragbee ree xcwent Dios, b n ma n nbee ree xcwent ree ni yu' xanyabaa, b n ma gubajn ree con xSprijt Dios, <sup>5</sup> abi' bayuladx reeman xtiidxza'c Dios, ma ragbee t e reeman xhienaag nabee Dios, <sup>6</sup> dxel rusa'n reeman guial chinal reeman xtiidxza'c Jesucrist, par laa reeman d d naw eg naj chu' reeman loj xnejz Dios, din zi'c rul u cucaa reeman Jesucrist Xi'n Dios loj cr jz zatijb din guze' ree bejn laaman. <sup>7</sup> B nguidxliuj ree naj reeman zi'c tibia' guidxliuj ni r ' guibidx guia ni ryajb, abi' bal rajc da't guiniaa guin par b n r jn dxiin lojn dxel r jnle' Dios laan. <sup>8</sup> Per bal ganax gui jch n  ree gui'xh mal rliejn lojn, dxel ad r jntan sirv, abi' mazri z ed gajxh casti par guidxliuj guin abi' casti guin naj guial che'can.

### Ni nuzujdxi'ch dunuj ree loj xnejz Dios

<sup>9</sup> Ad caynatan zian por l jt, din dunujn rayagbee guial zagdxen cay jnndi, guial zinalquidi ni rayal g  ndi din laadi loj xcasti Dios. <sup>10</sup> Abi' laaman r jn xguialguxtisaman zi'c rayal, abi' ad zayanladxtaman ni zagdex ni beendi n  guial ma bal  di guial r ndi laaman, abi' beendi yudar cusnuu t e cay jnndi yudar dux compniar ree b n raliduladx ree Jesucrist. <sup>11</sup> Per dunujn ray nan guial gusnuu g  ndi zian xt dxej chigra, sin guial yalenyadi din yayalidi ni cab zidi tia'di. <sup>12</sup> Ad gaquidi b n ploj, gol been zi'c been ree b n bililadx Dios sin guialralenya' tia' reeman ni r b Dios tia' reeman.

<sup>13</sup> Chi been Dios promejs loj Abraham, baza't laagajcaman din achut b n mazri lasajc guial lojman, <sup>14</sup> abi' r baman loj Abraham: "Naj diidxli g nle' l j abi' d d zien ree xdiaal chu'." <sup>15</sup> Abi' Abraham guyuman pacens ad balenya'taman persi cwa'man ni r b Dios gud eman lojman.

<sup>16</sup> Chi r jn bejn jurar, r jnman jurar por stijb b n mazri lasajc guial lojman din guiguien guial diidxliqui g  nman ni r baman. <sup>17</sup> Ziangajc yan, guial r n Dios gull uman loj ree b n ni tia' ni r baman guial ad yu't dxej guchaa xixgabaman por promejs ni beenman, zeel beenman jurar. <sup>18</sup> Tio'p ni ad zaze'nt been Dios, beenman promejs been t eman jurar abi' rayagbee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din g  nman dunuj ree yudar guial ma raya'p ree confianz guial gac zi'c ma r baman. <sup>19</sup> Abi' guial rayagbee ree guial gac zi'c ma r b Dios, zeel nadxu'dxi'ch ree loj xtiidxaman zi'c nuzujdxi'ch tijb ganch guiib tijb barcw. Abi' guial nadxu'dxi'ch ree diidx xanyabaa z edan, <sup>20</sup> lod ma guyu Jes s par guixhialaman nejz par

dunuj ree, bén ma naj bixhioz zojbloj tiblyayaa zi'c goc Melquisedec.

### Jesús naj bixhioz zi'cgajc gojc Melquisedec

**7** Melquisedec gojc rey Salem gojc tēeman xbixhioz Dios bén yu' xanyabaa. Chi baza Abraham loj wadijl lod beenman gan rey gudilnē ree laaman, dxel bigchaagloj Melquisedec laaman, abi' beenle'man Abraham. <sup>2</sup>Dxel loj gra ree ni been Abraham gan, beenman laan chii lala' abi' badēeman tijban loj Melquisedec. Melquisedec rēn guiēban “rey ni rüjn xguialguxtis zi'c rayal”, Abi' guial gojcaman xrey Salem rēn guiēban “rey rabe'cdxe luxdoo ree bejn”, din Salem rēn guiēb “ni rabe'cdxe luxdoo ree bejn”. <sup>3</sup>Melquisedec guin achut ragbee chu naj xDadaman, o xniaaman o chu ree nin naj xdiaaman. Achut ragbee goc gojlaman goc tēē güjtaman. Laaman goc bixhioz zi'cgajc Jesús Xi'n Dios bén ma naj bixhioz par tiblyayaa.

<sup>4</sup>Gol been xgab xi bén lasajc gojc Melquisedec nadxel. Zeel xt dux bēngulal ree Abraham badēē tib part loj chii ni beenman gan loj ree rey ni gudilnēman. <sup>5</sup>Loj ley rēb guial ree bixhioz Israel ni zēēd loj xdiaa Leví rajp reeman derejch tia' reeman tib part loj chii ni rajp ree bén Israel, majsi tijbzi loj xdiaa Abraham zēēd gra reeman. <sup>6</sup>Melquisedec majsi ad zēēdtaman loj xdiaa Leví, per cwa'!-man tib part loj chii ni been Abraham gan. Dxel beenle'man Abraham bén cwa' xpromisejs Dios. <sup>7</sup>Abi' dunuj ree rayagbee guial bén rüjnle' stijb bejn, mazri lasajcaman guial loj bén rüjnle'man. <sup>8</sup>Per gra ree bixhioz ni rtia' tib part loj chii la' ni rajp ree bejn, rējt gajc reeman zi'cgajc dunuj ree. Sa'n Melquisedec bén cwa' tib lia' ni been Abraham gan, loj xtiidx Dios ruzat' laaman zi'c rülüü sta nabanman. <sup>9</sup>Yan zi'c rülüü yaguie'ch ree guial Leví

con ree bixhioz ni zēēd loj xdiaaman bén ni rtia' ree tib part loj chii ni rajp ree bejn nē reeman badēē tib part guin loj Melquisedec loj hor ni bigchaagloj Melquisedec dux bēngulal ree Abraham. <sup>10</sup>Din chi bigchaagloj Melquisedec dux bēngulal ree Abraham, ad wayut Leví, per loj xdiaa Abraham zēēd Leví.

<sup>11</sup>Bal por ree bixhioz Levitas nile' ni-ajc bejn naya delant loj Dios por ley ni guyu par ree bén Israel, dxel ad rüjntri nagueijn ni't stijb bixhioz bén naj zi'c Melquisedec ad zi'ct Aarón. <sup>12</sup>Din chi bidxaa bixhioz nēgajc ley bidxaa, <sup>13</sup>din dux Dad ree Jesucrist laaman naj bixhioz guin. Per ad lojt xdiaa ree bixhioz zēēdaman, loj diaa ren zēēdaman abi' ni'qui tijb ree xdiaaman ad gojct bixhioz. <sup>14</sup>Dunuj ree rayagbee guial loj xdiaa Judá zēēd dux Dad ree Jesucrist abi' Moisejs ad baza'ttaman diaa guin chi rēbaman chu reenin gac bixhioz.

<sup>15</sup>Per laa rguien gajc guial Jesucrist naj bixhioz zi'cgajc Melquisedec, <sup>16</sup>guial ad lojt xdiaa Leví zēēdaman zi'c rēb loj ley par gac bejn bixhioz, najman bixhioz guial rajpaman guialrniabee guibanman tiblyayaa. <sup>17</sup>Din ze rēb loj xtiidx Dios por laaman:

Lüj naj bixhioz par tiblyayaa,

lasa' bixhioz ni goc Melquisedec.

<sup>18</sup>Zianan zeel gojc ley guin tiblyad guial ad beentan sirv guial nüjn bejn zi'c rniabee ley guin. <sup>19</sup>Ad bile't nüjn ley guin gan nibajn bejn zagdxe delant loj Dios. Per luar ley guin zagdxe naj guialrliladx ni raya'p ree din por guialrliladx guin ma raya'p ree nejz par yadxin ree loj Dios. <sup>20-21</sup>Gulal chi ru bejn rajcaman bixhioz, achet promisejs been Dios, per chi bacaabee Dios Jesús gacaman bixhioz, Dios been promisejs zi'c ca tiblyajt loj xtiidxaman lod rēb:

Dux Dad ree Dios ma been promisejs abi' ad zuchaat xixgabaman:

“Lüj naj bixhioz par tiblayaa, lasa' bixhioz ni goc Melquisedec.”

<sup>22</sup> Zeel zian zagdxe naj nejl cüb ni guxhal Jesús par yadxin ree loj Dios. <sup>23</sup> Gulal zien gojc ree bixhioz per guial rdxin dxej rëjt reeman ad bile't niacj reeman bixhioz par tiblayaa. <sup>24</sup> Per Jesús ad yu't dxej guiëtaman ad yu' tëët dxej lox guial najman bixhioz. <sup>25</sup> Zianan zeel rille' rabëëman bejn ree loj xcasti Dios, bén rën ree gap nejl par guidxin reeman loj Dios por laaman, din laaman rajpaman guialnaban par tiblayaa par cwedx guiniabaman Dios por laa reeman. <sup>26</sup> Zeel laaman naj bixhioz zobjloj bén rayaadx ree gagnë dunuj ree. Din laaman naj bén naya nali, achet ni mal rüjnman, nayaman loj Dios, garen najman guial loj bëndol, abi' zobjaman xanyabaa cwë' Dios. <sup>27</sup> Laaman ad ryadxt güünman zi'c rüjn ree bixhioz zobjloj guial guixie guixie rugüjt reeman be gui'xh zi'c gon par Dios. Yaloj por xtol gajc reeman dxel por xtol ree ben ren. Per Jesús con tib volt güjtaman por dux tol ree, ad ryaadxtri guiëtaman stijb. <sup>28</sup> Por ley bile' gojc ree bejn bixhioz zobjloj majsi ad nayaalojt naya reeman niz loj Dios. Per despuejs rëb Dios guial diidxliczi xi'nman gac bixhioz zobjloj, laaman nayaaloj nayaman niz loj Dios zianci.

### Jesús naj dux bixhioz zobjloj ree

**8** Loj gra diidx ni caydü ree ni mazri lasajc naj guial Jesucrist naj dux bixhioz zobjloj ree, bén ni ma zobj xanyabaa xladbee Dios bén rniabee. <sup>2</sup> Ni ma rüjnman sirv guialbixhioz, lën yadoo ni bazoob Dios, ad bénguidxliujt. <sup>3</sup> Gra ree bixhioz zobjloj loj guidxliuj guie xchiin reeman naj guial rinë reeman gon rugüjt tëë reeman be ree zi'c gon par Dios. Ziangajc Jesucrist bén naj dux bixhioz zobjloj ree yu' ni badëëman loj Dios. <sup>4</sup> Abi' bal sta za' Jesucrist loj

guidxliuj guie ad niactaman bixhioz, guial ma yu' ree bixhioz ni rinë ree gon loj Dios zi'c rniabee ley ni basa'nnë Dios Moisejs. <sup>5</sup> Per gra ni rüjn ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh güün Moisejs yadoo, dxel rëb Dios lojman: “Baguiaa zagdxe din güünl zi'cgajczi balün lüj ruguia' Sinaf.” <sup>6</sup> Per mazri zagdxe naj ni rüjn Jesucrist, bén bayal naj dux bixhioz zobjloj ree, din mazri zagdxe naj nejl cüb ni guxhalaman din chile' yadxin ree loj Dios. Abi' por nejl cüb guin mazri zagdxe naj ree xpromejs Dios par bejn.

<sup>7</sup> Bal por ley nile' nibajn bejn zagdxe delant loj Dios, dxel ad rüjnt naguiejn niu nejl cüb. <sup>8</sup> Per baguiaa Dios guial ad cayüjnt ree bejn zi'c rayal zeel rëbaman: Naj rni guial guidxin dxej gaxhalan nejl cüb par ree bén Israel në ree bén Judá.

<sup>9</sup> Per nejl cüb guin ad najtan zi'c ley ni basa'nan loj xbéngulalidi chi babën laa reeman Egipto. Abi' guial ad bazoobt reeman da diidxan zeel gulëladxan laa reeman, zian rëb Dios.

<sup>10</sup> Rëb tëëman: Zian ma baya'n diidx gac con ree bejn chi guidxin dxej guijc reeman yasa'nan da leyan abi' lën luxdoo reeman gucanan. Dxel naj gac xDios reeman, abi' laa reeman gac da bejnan.

<sup>11</sup> Dxejzii ree ad rüjntri naguiejn gusiid ree bejn lasa' reeman.

Ni'qui bijch reeman par güünbee reeman naj, din gra reeman güünbee naj, diidz xindobëz xt bengol.

<sup>12</sup> Abi' naj güün perdon gra ree ni mal ni ma been reeman,

abi' ad yu't dxej gusaaladxan xtol reeman.

<sup>13</sup> Chi r b Dios guial guixal nejz c b guin r n gui ban guial achetri sirv r jn nejz gulal guin ni gop ree bejn par guidxin reeman lojman, abi' ni ad r jntri sirv nayob nitan.

### **Yadoo ni yu' loj guidxliuj n  yadoo ni yu' xanyabaa**

**9** Dunuj ree rayagbee guial chi binal bejn ley ni cayguie'ch ree naj nejz gulal, loj ley guin z ed xhienaag gui n bejn Dios, xhie t e naag rayal g  n reeman tijb yadoo loj guidxliuj guie. <sup>2</sup> L n yadoo guin guz eb tijb lajd persi gojcan tio'p l n. Tijb l nan ni naj niz ro' port, lod brie laj lod nada abi' l n guin guzobj ni ru gandel n  tijb mex ni gudxib ree guidxtil ma gogle'. <sup>3</sup> Dxel stijb l n guin xijch lajd guin brie laj lod mazcsi nada. <sup>4</sup> L n guin guyu tijb altar ni or lod rgu' reeman goxyal n  tijb caj ni brie laj xcay xpromejs ree Dios. Abi' caj guin nad  ban or zi'c l nan zi'c xijchan. L n caj guin yu'chaaw guiaj ni ca ree guidxii xmandamient Dios n  xvar Aar n ni baga' con stijb re or ni guyuchaaw mana. <sup>5</sup> Dxel guijc caj guin guzobj tio'p xfigur ree anjl b n la ree querubines abi' con xhiil reeman rusiaaw reeman guijc lod ruroob bixhioz zobjloj xrejn ree be por xtol ree bejn. Per por yan ad r jnt naguiejn guzatan mazri ree ni guin lojdi.

<sup>6</sup> Chi gulox been reeman gra zi'c rayal gac l n tijb yadoo loj guidxliuj guie, dxel guixie guixie guyu ree bixhioz l n yadoo guin per naabzi lod brie laj lod nada, lod rguieen reeman ni rayal g  n reeman par Dios. <sup>7</sup> Per stijb l n guin lod la mazcsi nada, tijbzi bixhioz zobjloj ru ni tib volt l n tib ijz. Abi' ad zajct chu'man bal id zin man xrejn ree be din g  n Dios perdon xtolaman n  xtol ree bejn. <sup>8</sup> Por ree ni guin ruli  xSprijt Dios dunuj ree guial

la'tgaj r jn sirv lod brie laj lod nada ad yu't mod chu' bejn lod la mazcsi nada. <sup>9</sup> Gra ree ni guin najzi reen tijb ejempl par dunuj ree yan, din gon n  ree be ni bin  ree bejn par Dios, ad beent reen sirv par nayaaloy ninialadx reeman guial ma naya reeman loj Dios. <sup>10</sup> Gra ree costumbr ni gop reeman zi'c ree con ni gudaw reeman, n  ree ni gu' reeman n  gra ree ni rayal g  n reeman din naladx reeman guial ma naj reeman naya, laan naj ni gunabee ley g  n ree bejn xt dxej ni bachaa Dios gra.

<sup>11</sup> Din yan ma bi't Jesucrist, b n naj bixhioz zobjloj par dunuj ree, abi' por laaman ma raya'p ree yaya'p t e ree ni ma r b Dios yaya'p ree. Abi' mazri zagdex naj l n yadoo lod ma guyuman mazri lasajc yadoo guin guial ad zobjtan loj guidxliuj guie ad gojc t etan por ree b nguidxliuj guie. <sup>12</sup> Jesucrist ma guyuman l n yadoo lod nada da't, per ad con xrejnt ree go'n dob z o xrejn ree dxib, guyuman con quijb xrejnman. Laaman con tib volt guyuman, ad r jnt naguiejn g  nman zian stijb abi' por laaman raya'p ree perdon par tiblayaa. <sup>13</sup> Tiamp gulal xrejn ree dxib o xrejn ree go'n o cobd j ni we'c ree vagdob z ruroob bixhioz guijc ree bejn persi naladx reeman ma naya reeman. Yan bal zian naladx reeman guial raya'n reeman naya, <sup>14</sup> diidxgui con xrejn Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni r n Dios b n naban. Din por xguialrniabee xSprijt Dios, Jesucrist b n ad beentczi dol, bad e laagajcaman zi'c tijb gon par Dios.

<sup>15</sup> Zeel por Jesucrist ma raya'p ree tijb nejz c b par yadxin ree loj Dios. Din por xguialg jt Jesucrist ma yu' perdon par dux tol ree n  xtol ree b n ni binal ley, gra ree b n naj xbejn Dios zian yaca' ree ni r b Dios yaya'p ree par tiblayaa. <sup>16</sup> Din zi'cgajc tijb b n rlies tijb gui'ch

guial chu yaya'nnë ree ni rajpaman, ad züjnt gui'ch guin dxiin xt chi ma güjtaman. <sup>17</sup> La'tgaj naban bén guin achet sirv rüjn gui'ch guin, rüjnan sirv xt chi ma güjtaman. <sup>18</sup> Zeel diizd tiamp gulal par guzuloj been sirv ley ni basa'n Dios loj Moisejs, bagüjt reeman tio'p choon ree be gui'xh persi gulëë reeb rejn. <sup>19</sup> Din chi gulox bagojn Moisejs gra ree bejn gra ni zëed loj xley Dios dxel cwa'man guidxlad xiil ni nayë' culor xnia bacaman laan guijs tib xidx yag ni la hisopo, dxel badxe'man laan loj nijs ni no'ch xrejn ree go'n dobëz con xrejn ree dxib dxel bacojpaman laan loj libr ley në guijs ree bejn <sup>20</sup> rëbgajman: "Rejn guie naj tijb sen guial ma banee Dios xleyaman lojdi par güündi laan cumplid." <sup>21</sup> Bacojp tëëman rejn guin lën yadoo në guijs gra ree ni rüjnnë ree bixhioz dxiin lën yadoo. <sup>22</sup> Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

### Xrejn Jesucrist rquied dol

<sup>23</sup> Zeel par guiguien guial ma naya ree ni beennë ree bixhioz dxiin lën yadoo guin, gojc naguiejn bagüjt reeman be ree persi beenle' reeman ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be. <sup>24</sup> Abi' Jesucrist ad lënt yadoo ni been bénguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios. <sup>25</sup> Jesucrist ad biaadxt niëjtaman zien volt por dol ree, ad beentaman zi'c been ree bixhioz zojbloj guial gazobijz binë reeman xrejn ree be lën yadoo lod brii laj lod nada da't. <sup>26</sup> Din bal id zian, zien volt niëjtaman diizd chi gocchaaw guidxliuj. Per chi bidxin dxej bi'taman, con tib voltzi badëë laagajcaman par guiëtaman

din chiquied dux tol ree. <sup>27</sup> Zi'cgajc gra bejn tib voltzi rëjt reeman, dxel zëed ni yadëed reeman cwent loj Dios. <sup>28</sup> Zian-gajc Jesucrist tib voltzi badëë laagajcaman par guiëtaman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignëman Bén cabëz ree laaman.

### Ad leyt riquied dol

**10** Ley ni basa'nnë Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz güjt ree be par Dios zi'c gunabee ley güün bejn, per ad guyut dxej ni naladx reeman guial ma bayaaloj naya reeman loj Dios. <sup>2</sup> Din bal ninaladx reeman guial ma naya reeman con tib volt ni bagüjt reeman be ree par Dios, dxel ad ryaadxtri nüjn reeman zian guial ma ragbee reeman achetri xtol reeman. <sup>3</sup> Per ad gunaladxt reeman zian, gazobijz rusaaladx xtol reeman chi rugüjt reeman be ree par Dios, <sup>4</sup> din xrejn ree go'n në xrejn ree dxib ad zajct chiquiedan xtol ree bejn.

<sup>5</sup> Zeel chi bi't Jesucrist loj guidxliuj, rëbaman loj Dios:

Ad rëntil xrejn ree be

ni'qui los demazri ree ni ridnë bejn par lüj,

zeel baneel naj cuerp ni ra'pan loj guidxliuj guie.

<sup>6</sup> Ad rëntril guial ruze'c reeman be ree par lüj

ni'qui xrejn ree be ni ridnë reeman por xtol reeman.

<sup>7</sup> Zianan zeel rën:

"Laa naj guie, Dad Dios, zialan par günan zi'c rënl, zi'c ca loj libr por naj."

<sup>8</sup> Jesucrist yaloj rëbaman guial ad rënt Dios xrejn ree be, ni'qui los demazri ree ni rinë bejn par laaman, ni'qui guial ruze'c reeman be ree por xtol reeman zi'c rniabee ley güün reeman. <sup>9</sup> Chi gulox rëb Jesús zian, dxel rëb tëëman: "Laa



naj guie, Dad Dios, zialan par günan zi'c rën'l." Zianan baloox Jesucrist guial rinal ree costumbr ni rëb loj ley abi' guxhalaman tijb nejz cüb par yadxin ree loj Dios. <sup>10</sup> Yan ma nayajc ree naya delant loj Dios guial ma been Jesucrist zi'c rën Dios, badëäd laagajcaman güjtaman por xtol ree bejn, con tib volt par tiblyaaa, ad ryaadxt güünman zian stijb.

<sup>11</sup> Gra ree bixhioz Israel guixie guixie za' reeman cayüjn reeman gra ni rniabee ley güün reeman, abi' guixie guixie rugüjt reeman be ree par Dios. Abi' majsji zien volt rüjn reeman zian per ad rquiedt guialrugüjt be guin ree xtol ree bejn. <sup>12</sup> Per Jesucrist con tib volt badëäd laagajcaman güjtaman por xtol ree bejn, ad ryaadxt güünman zian stijb. Dxel gurejman xladbee Dios, <sup>13</sup> lod cabëzaman guidxin dxej nabeeman loj gra ree bén rdx'e'ch laaman. <sup>14</sup> Din laaman con tib volt badëäd laagajcaman güjtaman por xtol ree bejn dxel tiblyaaa ma naya ree bén rililadx laaman. <sup>15</sup> Abi' dunuj ree rayagbee ree guial walin din por xSprijt Dios zëäd ree diidx ni ca loj xtiidx Dios guial rëb Dios:

<sup>16</sup> Zianan ma baya'n diidx gac con ree bejn chi guidxin dxej: Guijc reeman gusa'n da leyan abi' lën luxdoo reeman gucanan

<sup>17</sup> Abi' rëb tëëman:

Ad yu't dxej gusaaladxan xtol reeman në graløj ree ni mal ni ma been reeman.

<sup>18</sup> Abi' zi'c ma yu' perdon par dol, ad rüjntri naguiejn guiët ree be por dol.

### Royal yubiig ree loj Dios

<sup>19</sup> Zeel compniar raliduladx ree Jesucrist sin guialrdxeb ma zajc yadxin ree lod zojb Dios por xrejn Jesucrist, <sup>20</sup> din chi badëäd xcuerpaman persi güjtaman, guxhalaman tijb nejz cüb ni zidnë guialnaban par dunuj ree. <sup>21</sup> Yan zi'c ma rniabee Jesucrist dunuj ree, bén naj bixhioz zojbloj xanyabaa, <sup>22</sup> con

guidib du luxdoo ree ma zajc yubiig ree loj Dios con tijb guialrliladx ni wali ree raliduladx ree laaman, con tijb quiar-guiejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya. <sup>23</sup> Zeel royal yadxu'dxi'ch ree loj ni raliduladx ree Dios, din laaman züjn cumplid xtiidxaman zi'c ma rëbaman. <sup>24</sup> Royal yaguieen ree xgab xhienaag yalu' ree luxdoo ree dux compniar ree yayën tëë du lasa' ree yaguieen tëë ree ni naj zagdx. <sup>25</sup> Ad rayalt yaguieen ree zi'c rüjn ree bén ad rejtri ree lod radxaag lasa' ree dux compniar ree par chignia' reeman mazri xtiidx Dios, royal yalu' ree luxdoo du lasa' ree, abi' mazri yan guial ma rayagbee ree guial ma zidyob dxej gui't Jesucrist stijb.

<sup>26</sup> Din bal ma rayagbee ree xtiidxli Jesucrist abi' baguieen ree xgab yaguieen ree mazri dol, dxel ad yu'tri por chu zajc yayajc ree perdon. <sup>27</sup> Ni cabësi dunuj ree naj xguialguxtis doxh Dios, tijb bajl lod yayal ree bén ad ruzoobt xtiidxaman. <sup>28</sup> Chi bal id been tijb bejn zi'c rniabee ley ni basa'nnë Dios Moisejs, abi' yu' tio'p choon testiw guial ad beent bén guin zi'c rniabee ley guin, dxel ad yu'tri mod laaman loj guialgüjt ni rayalaman.

<sup>29</sup> Yan gol been xgab, ¡xixpi mazri castiro' yayal bén rnieeguijdx xSprijt Dios bén ragnë dunuj ree! Bén ni naladx guial achet lasajc Xi'n Dios, abi' rüjnman desprejs xrejnman, rejn ni rulüü guial gac zi'c rëb Dios, rejn ni rusia xtol bejn. <sup>30</sup> Dunuj ree rayagbee guial rëb Dios: "Naj royal güin guialguxtis, naj gudë ni royal bejn." Rëb tëëman: "Dios naj bén ni yaca' cwent por ni cayüjn bejn." <sup>31</sup> ¡Abi' nadxeb yayal bejn xcasti Dios bén naban!

<sup>32</sup> Per lëjt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra guialzi ni gudëdidi. <sup>33</sup> Yu'di zien loj da't guialzi badëäd ree bejn lëjt, abi' baze' reeman lëjt de-

lant loj ree bejn, yu' t edi ad gul eladxtidi b n guzac ree zian. <sup>34</sup>Ad gul eladxtidi b n ni guyu ree ladxguiib, abi' chi baca' ree bejn gra ni rajpidi, babaagajquidi guial ma ragbeedi mazri lasajc ni rajpidi xanyabaa, n  ree ni rajpidi ni, taan reen tiblayaa. <sup>35</sup>Zeel ad gusa'ndi guialrliladxiidi Jesucrist, din por guialrliladx guin d d zagdxo naj ni tia'di. <sup>36</sup>R jn naguiejn gapidi pacens din chile' g iindi zi'c r n Dios, zian tia'di ni ma r baman guneeman lojdi. <sup>37</sup>Din loj xtiidx Dios r b:

Nayob, d d nayob gui't b n naj gui't, ad zaglaataman.

<sup>38</sup>Abi' b n naban zi'c r nan, guidib tiamp ni nabanman rliladxaman naj.

Per bal gusa'nman ni rliladxaman naj, ad zabaan tan laaman.

<sup>39</sup>Per dunuj ree ad nayajct ree zi'c ree b n rusa'n ni rliladx reeman Jesucrist abi' rayal reeman casti, dunuj ree nayajc ree b n rliladx Jesucrist diidxli par chit e yayal ree casti.

### Guialrliladx Dios

**11** Yan,  xhienin naj guialrliladx? Guialrliladx naj guial guidiblagaa yaliduladx ree gac zi'c cayl jz ree gac, n  guial waliqui ni raliduladx ree ni ad raguiaat ree. <sup>2</sup>Dux b ngulal ree baya'n reeman zagdxo delant loj Dios guial bililadx reeman laaman.

<sup>3</sup>Zi'c raliduladx ree Dios, dunuj ree rayagbee guial con xtiidxaman beenman xanyabaa n  guidxliuj n  gra ni raguiaa ree, achetctzi ni beenman con ree ni raguiaa ree yan.

<sup>4</sup>Guial bililadx Abel Dios, zeel zagdxo naj gon ni bad eman guial loj Ca n, abi' baya'nman zagdxo delant loj Dios abi' cwa' Dios gon ni bazaladx Abel lojman. Zian majsi ma g jt Abel, per sta rguiajt xhienaag bililadxaman Dios.

<sup>5</sup>Guial bililadx Enoc Dios zeel ad g jttaman, guidib nabanman ziaman xanyabaa abi' ad badxejlt ree bejn laaman guial ma zign  Dios laaman. Per chi gadaman chign  laaman, loj xtiidx Dios r b guial bayuladx Dios zi'c gubanman.

<sup>6</sup>Abi' achut zajc g iin zi'c r n Dios bal id rliladxaman laaman. Chut ez b n r n gap nejz par guidxinman loj Dios rayal chililadxaman guial yu' Dios chililadx t eman guial laaman rud e ni r baman gud eman loj ree b n raguil laaman.

<sup>7</sup>Guial bililadx No  Dios dxel chi r b Dios lojman guial gac ree ni gadaman guguaa gac bazoobaman xtiidxaman, beenchaawaman tijb barcw din laaman con ree xfamilaman loj ni r b Dios gac. Dxel por guialrliladx guin biguien guial gra b nguidxliuj rayal casti ni r b Dios, abi' baya'n No  zagdxo delant loj Dios guial bililadxaman xtiidxaman.

<sup>8</sup>Ziangajc Abraham guial bililadxaman Dios, bazoobaman xtiidxaman chi r baman lojman din grii ladxaman cheman lod tia'man guidxliuj ni gud ed Dios lojman. Abi' brii ladxaman ni'quid ragbeetaman banguin cheman. <sup>9</sup>Guial bililadxaman Dios, gubajnman zi'c benzit loj guidxliuj ni r b Dios gud edaman lojman. Gurejman l n ree carp ni naj n  guid, ziangajc Isaac n  Jacob n  laa reeman rayal guidxliuj guin. <sup>10</sup>Gubajn Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

<sup>11</sup>Ziangajc Sara, por xguialrliladxaman, majsi ma najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial r jn Dios cumplid xtiidxaman. <sup>12</sup>Zian gojc majsi bengol da't ma naj Abraham per gojcaman famil. D d zien ree xdiaaman guyu zi'c ree bajl xanyabaa, zi'c ree  x ni riga' ro' nijsdoo ni ad zile't guiyab.

<sup>13</sup> Gra ree bén ma bazatan xt bidxin dxej güjt reeman bililadx reeman Dios, majsi ad baguiaat reeman gojc cumplid gra ree promejs ni been Dios loj reeman, per guial rlliladx reeman ragbee reeman guial zajc zi'c rëb Dios abi' rabaa reeman. Laa reeman ragbee guial tio'p choon dxejzi zëed reeman loj guidxliuj guie ad tiblyaat. <sup>14</sup> Abi' ree bén rniee zian, zian rguienchaaw guial sta rguuil reeman lod diidxli gac ladx reeman. <sup>15</sup> Din bal por guidxliuj lod guza reeman cayüjn reeman xgab, dxel zile' nayejc reeman ni stijb. <sup>16</sup> Per laa reeman mazri rüjn reeman xgab por tijb luar lod naj mazri zagdxe, mazri rüjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

<sup>17</sup> Guial bililadx Abraham Dios, dxel chi been Dios laaman prueb din gugüjt xi'nman Isaac din gudëedaman laaman zi'c gon par Dios, cwëjb Abraham majsi tijbzi Isaac guin naj xi'nman, majsi ragbee tëeman guial rëb Dios lojman: <sup>18</sup> "Por xi'nl Isaac gacxhieje da't xdi-aal." <sup>19</sup> Per Abraham yu'guijcaman guial rajp Dios guialrniabee xt par yasbanman bengüt ree, abi' zi'c ruluüü baban xi'nman stijb chi gudëedaman prueb guin.

<sup>20</sup> Ziangajc Isaac por guialrlliladxaman Dios dxel chi beenle' ree xi'nman Jacob con Esaú, rëbaman xhienaag gac con tijbgaj reeman. <sup>21</sup> Abi' ziangajc Jacob guial bililadxaman Dios ziangajc beenle'man grop ree xi'n Xiëb chi ma guidxin hor guiëtaman. Dxel cwa' yagrli-adxaman abi' gurejdx gunabaman Dios. <sup>22</sup> Ziangajc Xiëb guial bililadxaman Dios, chi ma guidxin hor guiëtaman, rëbaman guial grii ree bén Israel Egipto, abi' rëbaman loj reeman xhienaag güünnë reeman xdxijtaman.

<sup>23</sup> Por guial bililadx ree xdad xniaa Moisejs Dios chi gol Moisejs guin,

baquie'ch reeman laax choon bëew guial baguiaa reeman najx xindoza'cdxoon, abi' ad bidxebt reeman guial rëb bén naj rey guial guiët gra ree xindobëz. <sup>24</sup> Abi' chi goc Moisejs guin bengol, guial bililadxaman Dios, gojc xixgabaman cwexuuman niajcaman xi'n xi'ndxa'a'p rey Egipto. <sup>25</sup> Par laaman zagdxeli naj sagdiajman con ree xbën Israelaman, luar nüjnman dol niro'nladxaman laa reeman din niajpaman ni rëman, ni ad rdaant ree par tiblyaaa. <sup>26</sup> Par laaman mazri lasajc sagdiajman zi'c Cristo luar niajpaman gra ree guialnaza'c ni yu' Egipto, din mazri yu'guijcaman guialnaza'c ni yayalaman delant loj Dios. <sup>27</sup> Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c ruluüü ruguiaaman Dios bén ad zajct gugiaaa ree bejn.

<sup>28</sup> Në guial bililadx Moisejs Dios, beenman lanij pascw, abi' gunabeeman baroob ree bén Israel rejn ro' xport lidx reeman, din chi téd xianjl guialgüjt, ad zugüjttaman xi'n yaloj ree bén Israel. <sup>29</sup> Guial bililadx ree bén Israel Dios, gudëd reeman zi'c loj yujbidx lod bixal loj nijsdoo la nijsdoo xnia. Per chi guyën ree bén Egipto nidëd reeman, loj hor guin bayaaw nijs guin dxel gu' reeman nijs abi' güjt reeman.

<sup>30</sup> Guial bililadx ree bén Israel Dios, chi baza' gajdx dxej ni biaw reeman guiedx Jericó, dxel bazaj ze' ni nayaw guiedx guin. <sup>31</sup> Abi' Rahab bén goc bëngunaa dxuudx luguiedx Jericó, guial bililadxaman ad güjttaman chi güt ree los demazri ree bén ladxaman bén ad bazoobt ree diidx, guial baca'man bén Israel ni we ree bigla'ch luguiedx guin.

<sup>32</sup> Yan, ¿xhie mazri ganin lojdi? Ad zadaant tiamp guin ganin lojdi xcwent Gedeón, Barac, Sansón, Jefté, Davi, Samuel në xcwent ree bén badëë xtiidx Dios loj ree bejn. <sup>33</sup> Gra reeman bililadx

Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni rëb Dios loj reeman abi' basiaaw reeman ro' ree beedx. <sup>34</sup> Guzuj reeman loj bajl ro' abi' achet goc reeman, gulaa reeman loj guialgüjt con espad, guyu reeman gojl chi ruluüci ad yu't reeman gojl, guzudxi'ch reeman loj wadijl abi' balaagdxa reeman benzit ni gudilë reeman. <sup>35</sup> Në ree béngunaa ni güit ree xfamil, por guial bililadx reeman Dios baban ree xfamil reeman stijb.

Per yu' ree bejn majsi güjt reeman, per par laa reeman mazri zagdxe guzagdiaj reeman loj ree bén bagüjt laa reeman, luar nusa'n reeman guialrliladx reeman Dios par gap reeman stijb guialnaban cüb ni mazri lasajc. <sup>36</sup> Yu' tëë reeman guzagdiaj baze' ree bejn laa reeman, gudijn ree bejn laa reeman, xt guxhii ree bejn laa reeman con caden abi' guyu reeman ladxguiib. <sup>37</sup> Yu' reeman bagüjt ree bejn con guiaj, yu' tëë reeman bagüjt reeman gulëëxhün reeman laa reeman con sierr, güjt tëë reeman con espad. Yu' tëë reeman biza gra lad najcw reeman guid xab xiil në guid xab dxib, probza laa reeman naya biza reeman, graloj beennë ree bejn laa reeman. <sup>38</sup> Biza reeman niz loj yujbidx, niz ruguia' ree, në graloj lën ree guiajbiliaa. Bén guin ree ad rayal nibajn reeman loj guidxliuj guial dád benza'c gojc reeman. <sup>39</sup> Abi' majsi biguien guial gra reeman diidxli bililadx reeman Dios, per ad cwa't reeman ni rëbaman loj reeman. <sup>40</sup> Din laaman beenman xgab tijb ni mazri zagdxe par dunuj ree, abi' ad gojc gajt ni rëbaman loj reeman din tijbzi yaca' ree ni rëbaman con laa reeman.

### yunaal ree Jesús

**12** Zeel, zi'c ma bacaagdiajg ree por zien ree bejn xhienaag bililadx reeman Dios, rayal yasa'n ree tblad gra

dol në gra ree ni rudxoon yaguieen ree zi'c rayal, ad zalenya' tëët ree yunaal ree nejn ni ma balüü Dios dunuj ree. <sup>2</sup> Rayal yadxë'guijc ree Jesucrist din por laaman zëëd guialrliladx ni raya'p ree abi' por tijbzi laaman rayaaløj guialrliladx ni raya'p ree. Gudaanman guialzi ni gudëdaman loj crüjz, ad batutaman güjtaman zian din ragbeeman guial chi ma gulox guzagdiajman, dxel gui't guialrabaa. Abi' yan ma zojbaman xladbee Dios xanyabaa.

<sup>3</sup> Gol been xgab xhienaag guzagdiaj Jesucrist chi basagdiaj ree béndol laaman, chitëë yadxaguidi, ad yalenyadi por ni cazajquidi. <sup>4</sup> Din majsi cusagdiaj ree bejn lëjt guial cayüjndi naguiejn ad cayüjntidi dol, per ad wazujtidi loj guialgüjt por zian. <sup>5</sup> ¿Wen ma bayanladxidi ya xhienaag banee Dios lëjt consejw najdi xi'nman? Loj xtiidxaman rëb:

Xi'n, bidxga' zi'c runee dux Dad ree Dios lüj consejw,

ad bal yalenyadi chi guzuxnejzaman lüj.

<sup>6</sup> Din rüjnnamaan bén ni naj ree xi'nman,

ruzuxnejzaman laa reeman guial rënman laa reeman.

<sup>7</sup> Zeel gol gudaan guialzi, din zagdxe najn par lëjt. Rüjnnë Dios lëjt zi'c rüjnnë bejn xi'nman, ¿wen yu' dad ad ruzuxnejz xi'n ya? <sup>8</sup> Yan bal id ruzuxnejz Dios lëjt zi'c rüjnnë gra ree xi'nman, rën guiëban guial ad najtidi xi'nman diidxli, ad najtaman xDadidi. <sup>9</sup> Lëjt ragbee guial chi bayajc ree xindoo, gudijn dux dad ree dunuj ree din yacaagdiajg ree xtiidxaman abi' raya'p reeman respejt. Yan, ¿chexc di ad ree yazoob xtiidx dux Dad ree Dios bén yu' xanyabaa, din yaya'p ree guialnaban con laaman? <sup>10</sup> Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdxe. Per Dios ruzuxnejzaman dunuj ree par tijb ni mazri zagdxe par dunuj

ree, ruzuxnejzaman dunuj ree din yabajn ree naya zi'c laaman. <sup>11</sup> Diidxliczi achet guialnaa naj nix loj hor ni cad dilan, rag-naalil. Per ree b n ni rusiid ruzoob diidx zian, laa reeman naban zagdxe, naalyuj delant loj Dios.

### Ad cw  ladxidi xtiidx Dios

<sup>12</sup> Zeel gol bagu' luxdoodi, gol bad  d valor l jt gajc zi'c tijb b n raca'ladx chi ma badxag da'taman. <sup>13</sup> Gol been naguiejn gol gubajn xnejz, din ree b n ragdxa xhie g  n reeman, ad gusa'n reeman xnejz Dios, chu' luxdoo reeman zagdxe chinal reeman laan.

<sup>14</sup> Gol been naguiejn guibandi zagdxe con gra ree bejn, gol gubajn naya delant loj Dios din b n ad nabant naya ad zile't guguaaman dux Dad ree Dios.

<sup>15</sup> Gol gojp cudad chit   chu' tijbidi gusa'n tibladi zi'c r n Dios gagn man l jt chit   chu' tijbidi gac zi'c gui'xh nala ni r jn guialquia abi' guxhiinan gra xcompniaridi. <sup>16</sup> Ni'qui tijbidi ad rayalt sun di b n ad najt lacheelidi, ad cwe'quidi tibladi ni zagdxe ni z  d ree por Dios chit   saquidi zi'c guzac Esa , por tijb guialraw bato'man guialrniabee ni rayalaman guial najman b n yaloj loj bijchaman. <sup>17</sup> Abi' l jt ragbee guial chi guy n Esa  n jnle' xdadaman laaman ad beenle'taman laaman zi'c rayalaman. Majsidi d d biinman gunabaman laan, per ad bile't nuchaaman ni beenman.

<sup>18</sup> L jt gadidi chibig lod ad najt par gugaalidi zi'c gubig ree b n Israel gualal guijc guia' Sina  lod baguiaa reeman cayajc bajl guijc guia' guin, baguiaa reeman go'xh ya's ni basiaaw guijc guia' guin abi' rbi' gaj tijb bidoxh yagaj zi'c bidojn. <sup>19</sup> Dxel biguiejn reeman bibejdx tijb trompejt abi' biguiejn reeman cha' Dios guneen man laa reeman. Per guialtant bidxeb reeman biguiejn reeman cha'man d d guzajc reeman laaman liaadx ad rnien man laa reeman. <sup>20</sup> Din

ragbee reeman guial naw  g naj ni gunabee Dios g  n reeman chi r baman: "Chut  z bejn o be gui'xh ni gugaal guijc guia' guie rayal gui taman o gui tib con guiaj o con lans." <sup>21</sup> Nadxeb naj ni baguiaa reeman xt Moisejs r b: "Rnijn guialtant rdxeban."

<sup>22</sup> Per l jt ma bibiguidi loj Dios, ad guzajctidi zian. Ma yu' nejz par guidxindi ruguia' Si n, xanyabaa lod naj Jerusal n ladx Dios b n naban, lod nadxag lasa' ree zien da't ree anjl, <sup>23</sup> d d nix yu' luxdoo reeman r n reeman laaman lod yadxaj lasa' ree xbejn Dios b n ni ma ca ree laj loj libr xanyabaa. Ni zojb Dios, b n yanab cwent loj gra bejn, ni t   za' xSprijt ree b n guban zi'c rayal laa reeman ma naya reeman por Dios. <sup>24</sup> Ni gajc zojb Jesucrist, b n guxhal nejz c b ni raya'p ree par yadxin ree loj Dios. Chi g t Abel xrejnman gunab gac guialguxtis, per con Jesucrist ad gojct zian, g jtlaman, guxhie' t   xrejnman par yayajc ree perdon.

<sup>25</sup> Zeel gol gojp cudad gol bidxga' Dios, laaman najman b n rnien  dunuj ree. Din bal b n ni ad bidxga't ree xtiidx Moisejs b n bad  d xtiidx Dios loj guidxliuj guie ad gulaat reeman loj casti ni rayal reeman, diidxguii dunuj ree nid zayal ree xcasti Dios ya bal id zayidxga' ree xtiidx Jesucrist, b n guza diidz xanyabaa din guinien man dunuj ree. <sup>26</sup> Chi guneel Dios b ngulal ree ruguia' Sina , binij guidxliuj. Per yan ma r baman: "Gunin guidxliuj zatijb, per ad guidxliujtzi, n  xanyabaa." <sup>27</sup> Chi r b Dios guial g  nman zian zatijb, r n gui ban guial gunijman gra ni beenman, din chiquied ni rayal chiquied din yaya'n ni ad rayalt chiquied. <sup>28</sup> Zeel rayal yad  d ree quixt   loj Dios guial ma rayal ree lod canabeeman, lod ad yu't dxej nit, abi' con respejt n  guialrdxeb yaguieen ree ni ruladxaman. <sup>29</sup> Din dux Dios ree naj zi'c tijb bajl ni ruzel'c gra.

**Xhienaag güün bejn ni yayuladx Dios**

**13** Ad cwëz guiëndi xcompniaridi bén rililadx ree Jesucrist. <sup>2</sup>Ad yayanladxidi gudëe lidxidi yaya'n ree bén ri't, din zian yu' ree bén baca' ree xianjl Dios sin guial gagbee reeman chunin.

<sup>3</sup>Gol basaalex bén yu' ree ladxguuib, gol gunaladx guial në lëjt yu' ladxguuib con laa reeman. Gol been tëë xgab por ree bén ni cazagdiaj, gol gunaladx guial në lëjt cazagdiaj.

<sup>4</sup>Gol gojp respejt guialruhxhlaa, ad gusquiee lacheelidi. Din Dios zudëe-daman casti bén za'në xinguaaw o bën-gunaa ren, në gra ree bén ni rüjn ree ni dxuudx con ree bén ad najt lacheel reeman.

<sup>5</sup>Ad sëëbladxidi milia, gol baya'n conform con ni rajpidi din Dios ma rëb: "Gra dxej za'n con lüj, abi' ad yu't dxej gabëladxan lüj." <sup>6</sup>Abi' con confianz zajc yaguie'ch ree:

Da Dadan Dios najt bén ragnë naj ad rdxebtan majsi xhietëez güünnë ree bejn naj.

<sup>7</sup>Gol basaalex ree bén ni gunabee ree lojdi, bén ni balüü ree lëjt xtiidx Dios. Gol been xgab xhienaag gubajn reeman gol binal tëë zi'c bililadx reeman Jesucrist.

<sup>8</sup>Abi' Jesucrist laagajcaman nieey, laagajcaman yan në zianczi. <sup>9</sup>Ad tiëbidi gusquiee graløj ni rülüü ree bejn lëjt, din ad najt reen zi'c rayal chinalidi Cristo. Mazri zagdx gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajct gawidi, din costumbr guin ree achet yudar rüjn ree delant loj Dios.

<sup>10</sup>Dunuj ree raya'p ree tijb bén güüt por dunuj ree, laaman najt zi'c tijb xgon bejn por xtolaman, gon ni ad zajct gaw ree bixhioz rüjn ree sirv lën yadoo guin. <sup>11</sup>Bixhioz zøjbloj guin, laa-

man rinë xrejñ ree be ni rudëed ree bejn zi'c gon por xtol reeman, rinëman rejñ guin lën yadoo lod rayal chinëman laan. Dxel ree begüt guin re'c reeb ro' guiedx lod achut zøjb. <sup>12</sup>Ziangajc gojc con Jesucrist, ro' guiedx Jerusalén güjtaman par gusiaman bejn xtol reeman par xrejñman. <sup>13</sup>Zeel yunaal ree Jesucrist majsi gulëe reeman laaman luguedx Jerusalén, në majsi xhietëez guialxto o guialrzagdiaj yadüüd ree zi'c laaman.

<sup>14</sup>Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylëjz ree lod yabajñ ree tiblayaa. <sup>15</sup>Zeel con xyudar Jesucrist ad yacwëez ree yadëed ree quixtëe loj Dios, laan najt gon yadëed ree lojman, abi' zian raxhoobdol ree guial nayajc ree xbejnman. <sup>16</sup>Ad yayanladxidi güündi ni zagdx güün tëë lasa'di yudar con ni gactzidi, din laa reen najt ni ruladx Dios.

<sup>17</sup>Gol bazoob xtiidx ree bén rniabee lojdi, bén rülüü ree lëjt xtiidx Dios. Gol gojp reeman respejt din laa reeman ruguiaa lëjt din chinalidi xtiidx Dios, guial ragbee reeman yadëed reeman cwent loj Dios. Gol been ni yabaanë reeman ad ni cu'nayat laa reeman, din guial ad ruzoobt diidx achet sirv güünan lëjt.

<sup>18</sup>Gol gurejdx gunab Dios por dunujñ. Dunujñ rayagbee guial achet ni mal cayguieenan, abi' rayënan guial gra ni yaguieenan, yaguieenan laan xnejz. <sup>19</sup>Rniaaban lojdi din cwedx guiniabidi Dios por najt, din guneeman permis diob guialan din gazun con lëjt zatijb.

**Diidx bigra ni bacan loj gui'ch guie**

<sup>20</sup>Dios bén rabe'cdxe luxdoo ree bejn, bén basban Jesucrist, rajpaman dunuj ree zi'c rajp tijb bejn xiil, por xguial-güjtaman zianczi ma raya'p ree nejz par yadxin ree loj Dios, <sup>21</sup>laaman gagnë lëjt par gra ni najt zagdx din chile' güündi zi'c rënman. Laaman gagnë dunuj ree

din yayajc ree zi'c rënman guial ma nayajc ree tijbzi con Jesucrist. ¡Laaman rayal yaya'p ree respejt zianczi! Amén.

<sup>22</sup> Compniar raliduladx ree Jesucrist, ad narooft gui'ch guie, per rniaaban lojdi ad yaleny'a'di por ree diidx ni canin lëjt cunen lëjt consejw. <sup>23</sup> Rugojn tēēn lëjt guial ma barii dux compniar ree Timoteo ladxguiib abi' bal nayob gui'taman

niz guie, dxel du gropan yo'p yudganajn lëjt.

<sup>24</sup> Gol bagajpdioz gra ree bén rniabee lojdi bén ni rulüü ree lëjt, nē gra ree dux compniar ree bén rliladx ree Jesucrist. Abi' ree bén Italia rugajpdioz ree-man lëjt.

<sup>25</sup> Dios güünle' gradi. Amén

## Gui'ch bacaa Santiaaw

### Rxhiaal Santiaaw xtiidx Dios

**1** Naj naj Santiaaw, cayünan xchiin Dios në xchiin Dad Jesucrist, ruga-jpdiozan gra ree bën naj xdiaa Israel, nare'chidi guidib guidxliuj.

### Quiarguejn zëed loj Dios

<sup>2</sup>Gradi compniar raliduladx ree Jesucrist, rnin lëjt, gol babaa majsi xhietëez loj gualrzagdiaj tédidi. <sup>3</sup>Lëjt ragbee, chi rdëdidi gralojn gual riladxidi Dad Jesucrist, zian rusididi gapidi pasens. <sup>4</sup>Per gol been naguiejn güün pasens guin lëjt yudar din gaquidi zi'c rën Dios, gusnu-udi loj xnejzaman, chitëë guiyaadxidi xhienin.

<sup>5</sup>Bal chu lëjt riaadx chu' mazri xquiar-guejn, gol gunab xquiar-guejndi loj Dios. Laaman gunee gra ni riaadxidi, ad zabexuutaman gunee man laan. <sup>6</sup>Per rayal chililadxidi gual gunee man laan, ad rayalt chu' nawëëguidi, din bën ru nawëëg luxdoo naj zi'c xtüjp nijsdoo ni rinë bi ni guiezi. <sup>7</sup>Bën naj zian ad cwëzidi gunee Dios ni guiniabidi, <sup>8</sup>din bën ru nawëëg, ad rüjntaman tijbzi xgab, ad rinal tëetaman tijbzi nejz.

<sup>9</sup>Lëjt gual najdi bënprob gol babaa, din loj Dios najdi bën zobjloj. <sup>10</sup>Guiáad lëjt benrijcw, gol babaa gual ma rag-beedi achet lasajc gualrijcw loj Dios, din gualrijcw guin najn ni téd zi'c rdëd guiaa rial dajn. <sup>11</sup>Lëjt ragbee chi rbëë loj gubijdx gojl, dxel rucwi-dxan gui'xh, rba'y ree xguiaan, dxel ad nixtri rguienan. Ziangajc benrijcw yu' dxej guiëtaman majsi galay gra ree ni rajpaman.

### Bén rdaan ree rdëd loj gualrzagdiaj

<sup>12</sup>Chabaa bën rzudxi'ch loj xnejz Dios rdaan tëeman xhietëez rzajcaman gual

riladxaman Jesucrist. Chi ma gudaan-man loj gualrzagdiaj, tia'man coron ray-alaman, laan naj gualnaban tiblayaa ni cwëb Dios yazaladxaman loj ree bën rën laaman.

<sup>13</sup>Bal chu rüjn xgab güün ni mal, ad najtan ni naladxaman gual Dios rudxe' xgab guin guijcaman. Din ad yu't dxej guiën Dios güünman ni mal, ni'quid rgu' tëetaman xgab guijc bejn güünman ni mal. <sup>14</sup>Xixgabmal gajc bejn rudëë laaman gan güünman ni mal. <sup>15</sup>Zeel por xgabmal guin rüjn bejn dol, dxel chi ma rniabee dol guin laaman, stijbzi xcasti Dios rayalaman.

<sup>16</sup>Gradi compniar raliduladx ree Jesucrist, diidxli rënan lëjt, ad gusquiee lëjt gajc. <sup>17</sup>Graczi xgab zagdxe në gra ni za'c zëed loj Dios, bën been gra ree bajl yu' xanyabaa. Ad yu't dxej guidxaaman, zianczi rüjnman ni zagdxe.

<sup>18</sup>Gual guyënman, zeel baneeman gualnaban tiblayaa duloj ree, gual ma raliduladx ree xtiidxaman, din yayajc ree zi'c ree bin yaloj yaca'man loj gra ree ni beenman. <sup>19</sup>Zeel yan ma ragbeedi nine ree.

### Royal yasa'n ree gra ni mal riga' loj guidxliuj

Rënan lëjt, zeel rnin lojdi gradi compniar raliduladx ree Jesucrist: Gol guzujsin din gucaagdiajguidi, ad yoolad-xidi gual guinieedi ni'qui gual yalendi, <sup>20</sup>din bën ralen ad zajct güünman ni rën Dios. <sup>21</sup>Zeel gol gulëëladx gra ni ad najt zagdxe në gra ni mal riga' loj guidxliuj guie, gol gojc bënchaawladx, gol bazoob xtiidx Dios ni ma bacaagdiajguidi, din laan yabëë lëjt loj dol. <sup>22</sup>Per gol been zi'c rëb xtiidxaman, ad aal rucaagdiajgzidan, chitëë gusquiee lëjt gajc. <sup>23</sup>Din bën rucaagdiajgzidi laan abi' ad rüjntaman zi'c ma bacaagdiajgaman, najman zi'c tijb bën ruguiaa loj guiaawajn, <sup>24</sup>per chi ma ziaman, rayanladxaman xhien-



aag naj lojman. <sup>25</sup> Per b́en ad rayanladxt ni bacaagdiajgaman ŕujnman naguiejn chignia'man xtiidx Dios mazri, din laan nayaaloj rabēē tēen dunuj ree loj dol. Rzudxi'chaman loj nejz guin, ŕujn tēeman ni rēn Dios. B́en ǵuūn zian chu' lux-dooman zagdxex por ni cayūjnman.

<sup>26</sup> Bal chudi naladx zinalidi xnejz Dios zagdxex per ad rajptidi cudad xhienin guineeidi, cusquiee lējt gajc, dxel achet lasajc guial naladxidi zinalidi xnejz Dios. <sup>27</sup> Din par dux Dad ree Dios b́en zinal xnejzaman zagdxex naj b́en ŕujn yudar xindo bizējb ree nē ree b́engunaa bizējb chi rzagdiaj reeman, rajp tēeman cudad chitēē yabaman loj ni mal riga' loj guidxliuj.

### Ad rayalt yalej ree loj ree bejn

**2** Gradi compniar raliduladx ree Jesucrist b́en rniabee, ad rayalt cwedi loj ree bejn. <sup>2</sup> Yaguie'ch ree, chu' tijb bejn lod rado'pidi, najcwaman lajd zagdxex yu' tēē guibnil or yaaman, chu' tēē tijb b́enprob najcwaman lajd senci, <sup>3</sup> abi' mazri ǵuūncwenti b́en najcw lajd zagdxex guin, guiebidi lojman: “Gurej guie, laan naj luar zagdxex”, guiaad loj b́enprob guin guiebidi: “Yagaj guzuli o gurej luyuj zii ya.” <sup>4</sup> Chi ŕujndi zian, ¿nid cabedi bejn loj gajquidi ya?, ¿nid rula'chidi ya chi ŕujndi gra ree xgabal guin? <sup>5</sup> Gradi compniar raliduladx ree Jesucrist, rēnan lējt, gol bacaagdiajg nine: Dios gule b́en naj ree b́enprob loj guidxliuj din chililadx da't reeman laaman, din yalay reeman lod rniabee-man zi'c cwēbaman loj ree b́en rēn laaman. <sup>6</sup> Guiaad lējt rusa'n xtudi b́enprob ree. Wen, ¿id benrixcw guin ree rusagzi lējt ya rudxig tēē reeman lējt loj guxtis? <sup>7</sup> ¿Id laagajc reeman rnieeguidx Jesucrist ya, b́en naj b́enlasajc? Zi'c najman Xi'n Dios, ziangajc najdi xi'n Dios, guial nuchajquidi laaman.

<sup>8</sup> Bal walidi ŕujndi ni ca loj xley Dios, zi'c ca loj xtiidxaman ni rēb: “Guyēn bejn ree zi'c rēn ĺuj gajc”, dxel zagdxex qui cayūjndi. <sup>9</sup> Per bal mazri ŕujncwenti tijb bejn guial loj stijbaman, dxel ma cayūjndi dol, ma rajpidi dol guial ad ŕujntidi cumplid xley Dios. <sup>10</sup> Din bal chutēēz zinal gra ni ca loj ley guin per ad ŕujntaman tijb ni rayal ǵuūnman, ma cusaglojman guidib ley guin. <sup>11</sup> Dios gajc rēb: “Ad sunēl xinguaaaw ren o b́engunaa ren”, rēb tēeman: “Ad gugūjtil bejn.” Per bal id za'nēl xinguaaaw o b́engunaa ren ya per rugūjtil, dxel ma cusagloj xley Dios. <sup>12</sup> Zeel gol gunee gol been tēē zi'c ree b́en yadēēd cwenti diidxli loj Dios por xtiidxaman ni rabēē dunuj ree loj dol. <sup>13</sup> Din b́en ad rayat ree lasa', ad zayat Dios laa reeman dxex ǵuūn xguial-guxtisaman. Per b́en raya ree lasa' ad najtan ni guidxex reeman dxex guin.

### Royal yaguieen ree ni rēn Dios

<sup>14</sup> Zeel rnin lējt, ¿xhie sirv ǵuūn bal chu guieb, rliladxan Dios, abi' ad ŕujntaman ni rēnman? ¿Wen, guialzi rliladxaman ya gacaman perdon? <sup>15</sup> Yaguie'ch ree, tijb dux compniar ree, b́en rliladx Jesucrist, najman xinguaaaw o b́engunaa ya, guiyaadx xabaman con ni gawaman, <sup>16</sup> abi' guieb tijb lējt loj reeman: “Yaguiajdi zagdxex, gawidi zagdxex ad gagnajl tēēdi.” Per bal id rudēēdi ni riaadx reeman, ¿xhieci gan guiebidi zian? <sup>17</sup> Ziangajc rzajc b́en rēb rliladx Dios abi' ad ŕujntaman ni rēnman, achet lasajc guial rēbaman rliladxaman laaman.

<sup>18</sup> Xt zajc chu na lojl: “Ĺuj na rliladxil Dios, guiaad naj ŕunan ni rēnman.” Yan baluū naj guial rliladxil laaman guial ad ŕujntil ni rēnman, guiaad naj gulūn guial rliladxan guial ŕunan zi'c rēnman. <sup>19</sup> Zagdxex ŕujnl bal rliladxil yu' tijbzi Dios, per nē ree xinxab rliladx zian, abi' xt rnij reex guial rdxex reex. <sup>20</sup> Zeel ad bal natontil, bignia' achet lasajc guial

chililadx bejn Dios bal id rüjnman ni rënman. <sup>21</sup> Basaaladx, dux béngulal ree Abraham, bayagbee Dios laaman zi'c bën ad beent dol, guial beenman ni guyën Dios, chi rëbaman lojman din nugüjt xi'nman Isaac nudëë tëëman laax zi'c gon lojman. <sup>22</sup> Ma qui ruguiaal, guial bililadxaman, zeel beenman ni guyën Dios. Guial beenman zian, zeel bigu-ien guial diidxli bililadxaman laaman. <sup>23</sup> Zian gojc cumplid ni ca loj xtiidx Dios, lod rëb: "Bililadx Abraham Dios, zeel bayagbeeman laaman zi'c bën ad beent dol", bayagbee tëë ree bejn laaman zi'c tijb xmiw Dios.

<sup>24</sup> ¿Ma bignia'di yan ya? Rayagbee Dios bejn zi'c tijb bën ad wayüjnt dol guial rüjnman ni rënman, ad guialzi rëbtaman rililadxaman laaman. <sup>25</sup> Ziangajc gojc con tijb bën brii laj Rahab, bën goc béngunaa dxuudx, bayagbee Dios laaman zi'c bën ad beent dol guial beenman ni rën Dios, chi badëëd lidxaman baquie'chloj tio'p ree bën Israel we ladxaman biquiaa reeman xhienaag chu' ree xsuldad reeman, been tëëman laa reeman yudar persi zia reeman nejk ren. <sup>26</sup> Din bën achet xsprijt ad zajct guibanman. Ziangajc rzajc tijb bën rililadx Dios: bal id züjnman zi'c rënman, achet lasajc guial rëbaman rililadxaman laaman.

### Du lüdx ree naj zi'c tijb luar lod guidxa ni mal

**3** Gradi compniar raliduladx ree Jesucrist, rnin lëjt: Ad bal ziendi guiën gac mextr gulüü xtiidx Dios, din ma ragbeedi, dunujn guial ralüün xtiidxaman, mazri zro' naj guialguxtis ni güün Dios con dunujn bal id zaguiënan zi'c rayal. <sup>2</sup> Du graczi ree rüjn xhietëëz dolan gan yu' dxej, per bal chu lëjt ad rüjnt dol ni'qui tijb diidxguijdx ad ririi tëët ro'di, najdi bën naya delant loj Dios, rajc tëë rniabee lëjt gajc. <sup>3</sup> Lëjt ragbee, chi ralu' ree fren ro' ree way din che reeb lod

rayën ree, zian raguieen ree gan ranabee reeb. <sup>4</sup> Ziangajc ree barcw, majsi narooob reen, majsi por mazt rucadxaa bidoxh laa reen, per con tijb guiidobëz ni la timón, con laan ma zajc chinë bejn laan lod rëntzaman. <sup>5</sup> Ziangajc naj du lüdx ree, najn ni dobëz, per narooob guialquia rüjnman. Najn zi'c tijb guij dobëz, per majsi najn ni dobëz, rüjnman guialquia narooob ruze'can dajn narooob. <sup>6</sup> Du lüdx ree naj zi'c tijb guij, zajc yanee në' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxel zianczi grii diidx zëëd loj xindxab du ro' ree. <sup>7</sup> Rayagbee ree guial graloz ree bedoxh zajc gagnadoo, xt në ree be rzuj në ree bëël nëtëë ree be yu' loj nijs, yan ma gognadoo reeb por ree bënguidxliuj. <sup>8</sup> Per lüdx bejn achut wayüjn gan nabee laan, najn zi'c tijb ni ad zajct gagnadoo, zi'c tijb ni guidxa venen rugüjt. <sup>9</sup> Con du lüdx ree ranee ree diidx zagdx par dux Dad ree Dios, abi' con laagajcan raneeguijdx ree bejn, bën been gajc Dios zi'c najman. <sup>10</sup> Gradi compniar raliduladx ree Jesucrist, du ro' ree ririi diidx zagdx në diidxguijdx, per ad rayalt gacan zian. <sup>11</sup> Lëjt ragbee, lod rajch nijs zagdx ad zajct grii nijs naxij, <sup>12</sup> ad zajc tëët tia aceitunas loj yag higo, ad za zajct tia higo loj yag uv, ad zajc tëët grii nijs zagdx lod ririi nijs naxij.

### Ni rüjn bën ca' quiarguiejn rudëë Dios

<sup>13</sup> Bal chu lëjt naladx rajc rignia' tëë gra xtiidx Dios, rayal gacaman bënchaawlax guiban tëëman zi'c rayal, zian guiguien guial yu' xquiarguiejnman. <sup>14</sup> Per bal guidxa guialnadëd-loj luxdoodi rën tëëdi gra par lëjt gajc din gaquidi mazri bën zojbloj, ad güüdi benro' guial rajquidi xtiidx Dios, cusquieezidi guial rüjndi zian. <sup>15</sup> Lasa' quiarguiejn guin ad Diost rudëë laan, xquiarguiejn gajc bën riga' loj guidxliuj guien, zëëd tëën loj xindxab. <sup>16</sup> Din lod

yu' guialnadëdloj lod yu' tää bén rën gra par laagajcaman, ni yu' wadijl në gra loj ni mal. <sup>17</sup> Per bén rajp quiargueijn runee Dios, yaloj rüjnman naguiejn guibanman zagdxë lojman, gac tääman bén ad rüjnt nabë, në benza'c, gap tääman bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tääman cumplid ni guinieeman. <sup>18</sup> Bén rüjn ree naguiejn ribajn sin wadijl, raguiil reeman mod guinieenë reeman bejn zagdxë, zian rbajn reeman zi'c rën Dios.

**4** ¿Ban zëed guial ralen lasa'di në guial rdilidi? ¿Id zëedan por xgabmal ni rüjnidi ya? <sup>2</sup> Rzëëbladxidi gapidi ni ad rajptidi, zeel xt rugüjt lasa'di din tia'di ni rëndi, rdëdloj täädi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rëndi, din ad rniabtidan loj Dios. <sup>3</sup> Abi' bal rniabidan, ad runeetaman laan, din ad rniabtidan par güüнди ni zagdxë, rënzidan din guibandi zi'ctzi rëndi. <sup>4</sup> ¡Bén rusquiee! ¿Id ragbeedi ya guial chu rinal ni mal yu' loj guidxliuj ad zajct gaquidi xmiw Dios? Zeel bal chu rën chinal ni mal guin, laagajcaman za' contr Dios. <sup>5</sup> Ad ca xlia'tzi loj xtiidxaman lod rëb: “Badxe' xSprijt Dios du luxdoo ree, rënman Sprijt guin, xt neelojman laaman.” <sup>6</sup> Dád zro' naj yudar rüjn Dios dunuj ree, zi'c ca loj xtiidxaman lod rëb: “Dád naza'c Dios con ree bén rüjn naya lojman, per ad rüjn cwenttaman bén rüjn ree benro'.” <sup>7</sup> Zeel gol bazoob xtiidx Dios, ad gudëedi mod güün xindxab lëjt gan, zian chiquiedix loj xnejzidi. <sup>8</sup> Gol gubig loj dux Dad ree Dios din güün cwenttaman lëjt, guiáad lëjt bëndol, gol bariica loj dol, guiáad ree bén yu' nawëeg luxdoo guial chinalidi xnejz Dios, con guidib luxdoodi gol binalaman. <sup>9</sup> Gol guyu xgab, gol guyu naya gol biin tää por xtolidi, luar guxijdxidi gol biin, luar chu' luxdoodi nix gol

guyu naya, <sup>10</sup> gol been naya loj Dios, din guiliesaman xvaloridi.

### Ad rayalt yala'ch du lasa' ree

<sup>11</sup> Gradi compniar raliduladx ree Jesucrist, ad bal rnieeguijdx lasa'di, din bén rnieeguijdx o bén rula'ch lasa', ma caneeguijdxaman cula'ch tääman xley Dios. Bal rula'chidan, ad cayüntridi zi'c rniabeen, lëjtli ma canabee laan. <sup>12</sup> Per tijbzi Dios basa'n ley guin rüjn tääman guialguxtis, laaman ca' guialrniabee guial yabëeman në guial gunijtaman. Per lüj, ¿chu najl zeel rula'chil bejn?

### Dux guialnaban ree naj ni tibrajtzi

<sup>13</sup> Yan gol bacaagdiajg nine lëjt bén rëb ree: “Yan o guixie ya yo'n loj tijb ciuda, ni yadxu'n tib ijz, yaguieenan negojs lod yaguieenan gan zro' da't milia.” <sup>14</sup> Ni'quid ragbeetidi xhie gac guixie, din dux guialnaban ree naj zi'c tijb bëj rguien tibrajt, stibrajt ma gunidlojn. <sup>15</sup> Zagdxeli naj guiëbidi: “Bal gunee Dios dunujn guialnaban, yaguieenan nine o ni ni ya.” <sup>16</sup> Per lëjt mazri zinalidi xtiidx dxalidi, abi' laa reen naj ni mal. <sup>17</sup> Zeel bén ragbee xhienaag güünman ni zagdxë abi' ad rüjntaman laan, ma cayünman dol.

### Ni rüjn ree benrijcw

**5** ¡Lëjt, najdi benrijcw! Gol bacaagdiajg nine, gol biin gol gurixdiajg tää, din ma zëed lod sagdiajdi, <sup>2</sup> tant zien ni rajpidi xt rxin reen, guiáad xabidi xt raw be laa reen. <sup>3</sup> Gra or në plajt ni rajpidi xt rzobëj reen, laagajc reen rülüü ni mal rüjnidi, laagajc reen gac zi'c tijb bajl gustib lëjt. Ma zidyob güün Dios xguialguxtisaman, guiáad lëjt gule'cchaaw ni lasajc ree loj guidxliuj guie. <sup>4</sup> Gol baguiaa, laa ree bén been xchiindi canab din quixidi laa reeman, xt Dios bén ca' gra guialrniabee ma biguiejn guial caygu' reeman guialquia. <sup>5</sup> Na-

bandi zi'ct rëndi, per cusni'szidi ni ad züjnt lëjt sirv chi guidxin dxej güün xguialguxtis Dios. <sup>6</sup>Din xt baguillidi mod persi bagüjtidi bën ad beent ree xhienin, abi' achet gojc nüjn reeman chitëë niëjt reeman.

**Raya! yarejdx ree Dios  
yaya'p tää ree pasens**

<sup>7</sup>Gradi compniar raliduladx ree Jesucrist, gol gojpp pasens xt dxej gui't dux Dad ree Jesucrist stijb, zi'c rdaan tijb bën rüjn dxiin dajn, rbëzaman guia yaloj xt guia bigra din yalesaman ni guxübinman. <sup>8</sup>Ziangajc lëjt gol gojpp pasens, ad yalenyadi, din ma zidyob dxej gui't dux Dad ree Jesucrist.

<sup>9</sup>Rni tää lëjt, ad yalenyadi nã lasadi, chitëë xhie casti yayalidi, din ma zidyob dxej güün xguialguxtis Dios. <sup>10</sup>Gol binal zi'c been ree bën badëë xtiidx Dios loj ree bejn, gojpp reeman pasens gudaan tää reeman graloj guialrzagdiaj gudëd reeman. <sup>11</sup>Rayagbee ree guial xiquilbaa ree bën rdaan loj guialrzagdiaj. Ma biguiejndi xcwent bën brii laj Job, xhienaa gudaanman chi guzagdiajman, ragbee täädi xhienaa beennë Dios laaman, chi gulox gudëdaman loj gra guialrzagdiaj guin, din Dios dád naza'caman raya tääman bejn ree.

<sup>12</sup>Gol gojpp cudad chi rüjndi xhie compromisan loj bejn, ad guza'tidi Dios o xhie stijbnin ya, chitëë gudëd Dios lëjt

casti, zagdxeli naj guinieedi diidxli güün tää xtiidxidi cumplid.

<sup>13</sup>Bal chu lëjt cazagdiaj, gol gurejdx Dios, o bal yu' luxdoodi zagdx, gol biil par laaman. <sup>14</sup>Guiáad bal ragxuu tijb lëjt, rayal guinieedi bën rniabee ree lëjt guial najdi bën riladx Jesucrist, din cwedx reeman Dios por laaman quiëëb tää reeman laaman sejt por laj Jesucrist. <sup>15</sup>Bal cwedx reeman Dios con guidib luxdoo reeman, zayajc bënragxuu guin, yales Dios laaman, abi' bal xhie dolan ma beenman, güünman laan perdon. <sup>16</sup>Zeel gol baxhoobdol loj lasadi gol gurejdx tää Dios por lasadi din yayajquidi, din tijb bën zinal xnejz Dios, chi rbejdxaman laaman, rüjn cwentaman laaman. <sup>17</sup>Zi'c bën brii laj Elías bën badëë xtiidx Dios loj ree bejn, gojcaman bënguidxliuj zi'cgajc dunuj ree, abi' chi gudi'n gunabaman loj Dios guial ad zalt guia, dxel ad golt guia choon ijj garol. <sup>18</sup>Chi guredxaman Dios zatijb, zianz bazuloj gol guia, dxel bayu guialnaza'c loj guidxliuj.

<sup>19</sup>Gradi compniar raliduladx ree Jesucrist, bal chu lëjt rarii loj xnejz Dios abi' por stijb bejn yayejquidi, <sup>20</sup>gol gogbee guial chutëëz bën rasiejc tijb bëndol loj nejj zagdx chitëë chinalaman ni mal, laaman rabëë bëndol guin loj casti, abi' majsi ma beenman zien dol, gran gag perdon.

## Gui'ch yaloj bacaa San Pedr

### Rxhiaal Béd xtiidx Dios loj ree bejn

**1** Naj Béd, najn tijb xi apóstol Jesucrist, laaman guxhaal naj, cucan gui'ch guie par lèjt najdi bèn bire'ch gra lad abi' zojbidi guiedx riga' ree niz Ponto, Galacia, Capadocia, Asia Menor nē Bitinia. <sup>2</sup>Ma gulej dux Dad ree Dios lèjt diizd gocli, zi'c goc xixgabaman. xSprijtaman gulëëca lèjt din guzobidi diidx gac tëë luxdoodi naya delant lojman por xrejn Jesucrist. Zro' güünle' Dios lèjt yabe'cdxe tëëman luxdoodi.

### Ni ralëjz ree gunee Dios

<sup>3</sup>Quixtëë Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios. <sup>4</sup>Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tëët dxej nitan. <sup>5</sup>Guial rliadxidi Dios, laaman rnij lèjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lèjt perdon.

<sup>6</sup>Zeel rabaa da'tidi majsi tëdidi graloj guialrzagdiaj tiblädëd, <sup>7</sup>din por guialrzagdiaj guin guiguien chu diidxli rliadx Dios, zi'c rüjnnë reeman or, rudëëd reeman laan loj bajl din gagbee reeman bal najn ganax or. Or guin najn ni rniidloj, zeel mazri lasajc guialrliadx laaman, bal chu taan xhietëëz loj guialrzagdiajn, din ad yu't dxej nit xguialrliadxidi. Abi' dxej gui't Jesucrist stijb, lasa' guialrliadx guin naj ni ruladx Dios, guiáad ree bejn nē ree anjl guza't reeman laaman zagdxë gap tëë reeman laaman respejt guial rusnuu rliadxidi laaman.

<sup>8</sup>Ad waguiaatidi Jesucrist per rëndi laaman, abi' yan rliadxidi laaman ma-

jsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiëbidi, <sup>9</sup>din lèjt ragbee, guial rliadxidi, ma nüjn Dios lèjt cwent zi'c ree bèn achet xtol.

<sup>10</sup>Diizd gocli, bèn badëë ree xtiidx Dios loj ree bejn basiid reeman been tëë reeman naguiejn niagbee reeman xhienaaag güün Dios bejn ree perdon, abi' rëb reeman xhienin güün Dios par lèjt guial najman benza'c. <sup>11</sup>Por xSprijt Jesucrist gogbee reeman diizd gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tëë gac zian. <sup>12</sup>Per balüü Dios laa reeman guial ni gunee reeman ad najtan par laagajc reeman, najn par lèjt, abi' yan lèjt ma rignia'di ni guin ree por ree bèn catie'ch xtiidxza'c Jesucrist por xguialrniabee Sprijt zëëd xanyabaa. Nē ree anjl ma rën nejz-doo gagbee nine ree.

### Ze rayal guiban ree xi'n Dios

<sup>13</sup>Zeel gol guzusin gol bastëdguien tëë, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb. <sup>14</sup>Zi'c ree xi'n Dios nazobdiidx reeman, ad bal guibanridi zi'c gubandi gocli chi gadidi güünbee laaman. <sup>15</sup>Laaman gule lèjt, zeel gol been naguiejn guibandi naya delant lojman, din laaman naj bèn naya nali. <sup>16</sup>Zi'c rëb loj xtiidxaman: “Gol gubajn naya delant lon, din naj naj bèn naya nali.” <sup>17</sup>Yan bal rnieedi Dios “Dad”, bèn rüjn xguialguxtis tibloj, bal conin rüjn tijb gaj bejn, rayal gapidi laaman respejt guidib tiamp guibandi loj guidxliuj guie. <sup>18</sup>Din lèjt ragbee guial babëëman lèjt loj costumbr ni basa'nnë ree xbëngulalidi lèjt, costumbr ni ad rüjnt ree sirv, abi' lèjt ragbee guial gojx din yariidi loj reen, per ad gojxt con ree ni rnijt, zi'c or o plajt ya, <sup>19</sup>gojx con xrejn za'cdxoon Jesucrist ni guxhie'man loj crüjz chi

gütaman zi'c tijb xiil zagdxē be ad nax-int, be rugjüt reeman par Dios por xtol ree bejn. <sup>20</sup>Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rēnman lējt. <sup>21</sup>Zeel por laaman rliladxidi Dios bēn basban laaman badēē tēēman guialrniabee lojman, yan con guidib luxdoodi ma rliladxidi Dios rbēz tēēdi ni guneeman.

<sup>22</sup>Yan, guial ma ruzoobidi xtiidxaman ni naj diidxli, ma naya luxdoodi delant lojman din guiēn lasa'di zi'c rayal, zeel gol guyēn lasa'di con guidib luxdoodi. <sup>23</sup>Din ma bidxaa mod nabandi, zi'c ruluū gojlidi stijb, abi' guialnaban zinalidi ad zēēdtan por tijb bēn nit, zēēdan por xtiidx Dios, diidx naban, diidx ni ad zanijt, <sup>24</sup>din loj xtiidxaman rēb: Gra bēnguidxliuj naj zi'c gui'xh dajn, guiáad ni rajp reeman naj zi'c xguiaa gui'xh guin.

Rbidx gui'xh guin, abi' riadj xguiaan, <sup>25</sup>per xtiidx Dios ad yu't dxej nitan. Abi' laan naj xtiidxza'c Jesucrist ni ma biguejndi.

**2** Zeel gol basa'n gra ni mal, gra ni rusquiee, ad bal rüjnzidi, gol basa'n guialnadēdloj nē guial rnieeguijdx lasa'di. <sup>2</sup>Zi'c re'c ree xindo quigojlnejzri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandī dīn yabandi loj ree bengüt con gra ree bēn nuchajg Jesucrist chi gui'taman stijb, <sup>3</sup>bal walidi ma ragbeedi guial naj Dios benza'c.

### Jesucrist naj zi'c guiaj naban

<sup>4</sup>Gol bibig loj Jesucrist, laaman naj zi'c guiaj naban. Been ree bēnguidxliuj laaman tiblād, per par Dios najman bēn lasajc, laaman gule laaman. <sup>5</sup>Ziangajc lējt, guial ma rliladxidi Jesucrist, najdi zi'c ree guiaj naban ni cayājcnē xyadoo Dios. Najdi bixhioz naya luxdoo rüjn sirv

lojman, din nabandi zi'c ruladx Dios, laan naj ni rudēēdi lojman zi'c gon por Jesucrist. <sup>6</sup>Rēb loj xtiidx Dios:

Gol baguiaa, guzoban tijb guiaj zagdxē luguiēdx Jerusalēn.

Laan naj guiaj nabee, guiaj zojbloj, nilasajc tēē.

Bal chu chililadx laan, ad yu't dxej yaya'nxtuman.

<sup>7</sup>Par lējt, guial rliladxidi Jesucrist, laaman naj zi'c guiaj lasajc da't. Per par ree bēn ad rliladx rajc cumplid ni rēb loj xtiidx Dios, lod rēb:

Guiaj ni gulēēgo'n ree bēn rüjn yu, yan laan naj guiaj zojbloj.

<sup>8</sup>Rajc tēē cumplid ni rēb stib lajt loj xtiidxaman, rēban:

Laaman naj guiaj rirejl guia' ree bejn, abi' rureeyujn laa reeman.

Rzajc reeman zian, guial ad ruzoobt reeman xtiidx Dios, zian rajc ni rēbaman xcwent reeman.

<sup>9</sup>Per lējt naj bēn guleman, najdi bixhioz rüjn ree sirv lojman, guial najman dux rey ree. Lējt ma naya luxdoo delant lojman, abi' gulejman lējt din chigtie'chidi diidx xcwent ree ni zagdxē rüjnman. Laaman babēē lējt loj nejz mal, persi bagu'man lējt loj xnejz za'cdxonman. <sup>10</sup>Gocli achutczī najdi, per yan ma najdi xbejn Dios. Gocli ad ragbeetidi guial raya Dios lējt, per yan ma ragbeedi.

### Zi'c rayal guiban ben rliladx Dios

<sup>11</sup>Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tiēbidi güün ree xgab mal lējt gan, din xgab mal guin ree rüjn naguiejn zianczi din gusa'n ree bejn xnejz Dios. <sup>12</sup>Gol gubajñ zagdxē loj ree bēn ad nünbeet laaman, zian majsi rnieeguijdx reeman lējt yan, rēb reeman najdi benmal, per chi guguiaa reeman guial zagdxē naj ni cayājndi, dxel guza't reeman laaman zagdxē, dxej ni yadēēd reeman cwent lojman.

<sup>13</sup>Guial rliadxidi Dad Jesucrist, gol bazoob xtiidx gra ree bèn rniabee loj guidxliuj guie. Gol bazoob xtiidx pristent rniabee xnaciondi <sup>14</sup>nè xtiidx gubernador bèn rxhiaalaman din gudë-daman casti bèn rüjn ree ni mal guilies tëëman xvalor ree bèn rüjn ni zagdxe. <sup>15</sup>Din rën Dios güündi ni zagdxe ree din gucwëëzidi ro' ree bentont ad rignia't abi' rnieeguijdx reeman lëjt.

<sup>16</sup>Zajc güüнди zi'c rëndi, per ad por ziantzi güüнди ni naj ni mal, gol been zi'c rayal güün ree xbejn Dios. <sup>17</sup>Gol gojp respejt gra bejn zi'c rayal, gol guyën ree bèn rliadx Jesucrist, gol bidxeb Dios, gol gojp tëë respejt pristent rniabee xnaciondi.

### Gol gudaan loj gualrzagdiaj

<sup>18</sup>Lëjt bèn naj ree mojs, gol bazoob xtiidx ree xpatrondi, gol gojp tëë reeman respejt, ad bèn najtzi ree benza'c raya tëë reeman lëjt, nè ree bèn naj bendxuudx. <sup>19</sup>Din zagdxe naj guial chu rdaan loj gualrzagdiaj, majsi ad rayaltaman laan, rdaanman laan guial rënman güünman ni ruladx Dios. <sup>20</sup>Bal chu lëjt rzagdiaj por ni mal rüjndi, achet lasajcan, per bal rzagdiajdi por ni zagdxe rüjndi abi' rdaandi loj gualrzagdiaj guin, laan lasajc delant loj Dios, <sup>21</sup>din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman. <sup>22</sup>Ad yu'tczi dxej beenman dol abi' ni'qui tijb diidx rusquiee ad briit ro'lman. <sup>23</sup>Chi rëb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rëb-taman loj reeman guial yaguijx reeman ni cayüjnnë reeman laaman, graczan basa'nman loj Dios bèn rüjn xguialguxtis zi'c rayal. <sup>24</sup>Guzagdiaj Jesucrist loj crüjz por dux tol ree persi babëëman dunuj ree lojn din yabajn ree zi'c rën Dios, abi' por lod bidxeelguijdxaman ma

bayüjnman du luxdoo ree naya. <sup>25</sup>Gocli gubajndi zi'c xiil rzëëb, per yan ma najdi xbejn Jesucrist bèn rën lëjt rajp tëëman lëjt zi'c tijb bèn rajp xiil.

### Zi'c rayal guiban ree bèn ca' lasa'

**3** Nè lëjt bəngunaa ma yu' ree lacheel, gol bazoob xtiidx lacheelidi, din bal chu lacheelidi ad rliadxt xtiidx Dios, per chi guguaa reex zi'c nabandi, dxel guililadx reex. Ad rüjnt naguiejn xhie guieëbidi loj reex, <sup>2</sup>chililadx reex guial guguaa reex nabandi zi'c rayal rajp tëëdi laa reex respejt. <sup>3</sup>Chi rzujchaawidi, ad bal rdëdlaj rüjnchaaw guidxguijquidi ni'qui guial güüнди ujs ganax ni or o gacwidi ganax lajd lasajc. <sup>4</sup>Mazri zagdxe naj guial güüнди naguiejn gac luxdoodi naya delant loj Dios, gol gojc benza'c nè bèn chaawladx, din laan ad yu't dxej nitan, abi' laan mazri lasajc delant lojman. <sup>5</sup>Din zian gubajn ree bəngunaa binal ree xnejzaman goc da't, bililadx reeman laaman bazoob tëë reeman xtiidx lacheel reeman. <sup>6</sup>Zian been Sara, bazoob xtiidx lacheelaman Abraham, abi' guneeman laaman "Dad". Gaquidi zi'c xi'n Sara, bal rüjndi ni zagdxe sin guialrdxeb.

<sup>7</sup>Ziangajc lëjt xinguaaaw, gol gubajnnë lacheelidi zagdxe, gol gojp reeman respejt ad guialzi najt reeman bèn nada, rayal güüнди zian guial nè reeman rayal guialnaban tiblayaa razaladx Dios, guial najman benza'c. Zian gol gubajn, chitëë xhie gudxe! nawëëg lëjt chi cwedx guinibidi laaman.

### Xhie rayal güüнди chi xhie güün nè reeman lëjt

<sup>8</sup>Zeel rnin loj gradi: Gol gubajnnë lasa'di zagdxe, gol bachajg lasa'di, gol been xgab tijbzi, gol guyën lasa'di zi'c rayal, gol gojc benza'c nè bèn chaawladx. <sup>9</sup>Ad yadxi'di ni mal rüjn ree bejn lëjt, ad yadxi'di diidxguijdx ni na reeman lojdi, gol gurejdx Dios din gag-

nëman laa reeman, din Dios gulej lëjt par gagnëman lëjt. <sup>10</sup>Din rëb loj xtiidxaman: Bén rën guiban zagdxë chu' tëë luxdooan zagdxë, rayal gapaman cudad ad guinieeman diidxguijdx ad guinee tëëman diidx rusquiee.

<sup>11</sup>Cwëëladxaman ni mal, güünman ni zagdxë güün tëëman naguiejn guibannë ree lasa'man zagdxë, zian rayal guibanman zianczi.

<sup>12</sup>Din dux Dad ree Dios rnaij bén rüjn ree ni rënman rüjncwent tëëman xtiidx reeman chi rbejdx reeman laaman, per ralenman bén rüjn ree ni mal.

<sup>13</sup>Achut güün lëjt ni mal, bal cayüjndi naguiejn güüindi ni zagdxë. <sup>14</sup>Per xiquilbaadi bal cusagdiaj bejn lëjt guial cayüjndi ni zagdxë. Ad chu'di xgab ad guidxeb tëëdi por zian, <sup>15</sup>gol gojp respejt gol badxë'guijc tëë dux Dad ree Jesucrist. Gol guzujsin din yadxi'di xtiidx ree bén guiniabdiidx lojdi xcwent ni riladxidi, per gol badxi' xtiidx reeman zagdxë con diidx zagdxë ree. <sup>16</sup>Gol gubajn zagdxë din guiguien guial achet ni mal yu'guijquidi din yaya'nxtu ree bén mieeguijdx lëjt, guial rüjndi ni zagdxë riladx tëëdi Jesucrist. <sup>17</sup>Mazri zagdxë naj sagdiaj bejn guial güünman ni zagdxë, bal zian rën Dios, luar sagdiajman guial güünman ni mal.

<sup>18</sup>Din xt Jesucrist guzagdiaj, güjtaman tib voltzi por dux tol ree majsi ad beentaman dol, per güjtaman duxcwent ree nayajc ree bëndol, zian guxhalaman nejz din gac yadxin ree loj Dios, güjtaman zi'c bénguidxliuj per babanman por xSprijtaman. <sup>19</sup>Chi gadaman yaban, wej xSprijtaman bigneenëman xsprijt ree bengüt lod nayaaw reeman. <sup>20</sup>Sprijt guin ree naj xsprijt ree bén ad bazoobt diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayüjn Noé barcw, abi' xhujnzi bejn gulaa loj nijs banijt guidxliuj tiamp

zii. <sup>21</sup>Nijs guin naj zi'c gualrirobnijs ni rulüü guial ma nayajc ree perdon. Gualrirobnijs guin ad rënt guiëban guial najn par gusian dux cuerp ree, rulüün guial caynaab ree loj Dios din yaya dux quiar-guiejn ree, guial ma raya'p ree gualnaban cüb guial baban Jesucrist loj ree bengüt, <sup>22</sup>bén bayë'p xanyabaa abi' zama'n xladbee Dios lod canabeeman anjl ree në ree sprijt ca' gualrniabee.

### Gol beennë quiarguiejn ni banee Dios dxiin

**4** Zeel zi'c gudëd Jesucrist loj gualrzagdiaj, në lëjt rayal taan lojn. Din por gualrzagdiaj guin rüjn bejn dol tibladd, <sup>2</sup>din güünman zi'c rën Dios guidib xguialnabanman luar güünman zi'c naj xixgabaman. <sup>3</sup>Xchej da't gubajndi zi'c naban ree bén ad nünbeet Dios, gubajndi zi'tctzi guyëndi, beendi zi'tctzi gojc xixgab dxuudxidi, gu'di, badxajg lasa'di persi beendi nidxuux ree, guzüdix da'tidi, guyën tëëdi ni ad najt ree Dios, laan naj ni rbijxhladx Dios. <sup>4</sup>Per yan guial ad zinaltridi zi'c naban ree bén naban zian, zeel radxa loj reeman, mieeguijdx tëë reeman lëjt. <sup>5</sup>Per rayal yadëed reeman cwent loj Dios bén za' par güün xguialguxtisaman con ree bén naban në ree bén ma güjt. <sup>6</sup>Din në ree bén ma güjt biguiejn xtiidx Dios chi guban reeman loj guidxliuj guie, din guiban reeman loj Dios majsi par ree bénguidxliuj ma güjt reeman.

<sup>7</sup>Ma zidyob dxëj nit guidxliuj, zeel gol bastëdguien gol guzujsin tëë din cwedx guiniabidi Dios con guidib luxdoodi. <sup>8</sup>Ad yayanladxidi guial guiën lasa'di zi'c rayal, din bén rën lasa' rüjnman perdon majsi xhietëëz rüjnnë reeman laaman. <sup>9</sup>Bal yu' tijb xcompniaridi rniab luar lidxidi din yaya'nman, gol badëedsii lidxidi con guidib luxdoodi ad yalenyadi. <sup>10</sup>Loj tijb gajdi ma banee Dios quiarguiejn din güüindi



ni rayal gūūndi. Zeel gol been lasa'di yudar con ni rajc rūjndi, din guiguien guial cayūjndi zi'c rayal con quiarguiejn ni bazaladxaman lojdi. <sup>11</sup> Bal chu lējt ca' quiarguiejn par gulūū xcompniaridi, rayal guinieedi ni naj diidxli zi'c tal rēb loj xtiidx Dios, ziangajc bēn ca' quiarguiejn par gūūnman yudar dux compniar ree, rayal gūūnman laan con gojl razaladx Dios lojman. Gra ni cayūjndi, gol beenan din guza't ree bejn Dios zagdxē por Jesucrist, bēn rayal respejt nē guialrniabee zianczi. Amén.

### Gol gudaan gra guialrzagdiaj

<sup>12</sup> Gradi compniar raliduladx ree Jesucrist, rēnan lējt, zeel mnin lojdi, ad ru nawēēguidi guial zro' naj loj guialrzagdiaj cadēdidi, din laan naj zi'c prueb par lējt. Ad rudi xgab chexc zeel cazajquidi zian. <sup>13</sup> Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaadi xbianiman dxej gui'taman stijb. <sup>14</sup> Xiquilbaadi bal chu na diidxguijdx lojdi guial zinalidi Jesucrist, din gra dxejczī za'nē xSprijt Dios lējt, bēn ca' guialrniabee. <sup>15</sup> Achet lasajc bal cazagdiajdi guial bagūjtidi bejn, o por guialgubaan, o por guial rūjndi ni mal o guial rudi lod ad rayaltidi. <sup>16</sup> Per bal chu cazagdiaj guial zinalaman xnejz Jesucrist, ad rayalt yatuman, rayal gudēēman quixtēē loj Dios guial ma najman xbejn Jesucrist.

<sup>17</sup> Gol gogbee, guial rtiējb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczī naag sac ree bēn ad rēnt guzoob xtiidxza'caman. <sup>18</sup> Nacli ree bēn zinal xnejz Dios nawēēg naj guial yaguij reeman xanyabaa, pi-orli ree bēndol bēn ad nūnbeet ree Dios, xhieczī naag naj luar lod yayal reeman. <sup>19</sup> Zeel bēn cazagdiaj ree zi'c naj xixgab Dios, rayal gusnuu gūūn reeman ni zagdxē gusa'n tēē reeman gran loj Dios,

laaman gagnē laa reeman. Laaman bazaladx guialnaban rūjn tēēman zi'c rayal.

### Consejw par ree bēn rliladx Jesucrist

**5** Yan rēnan gudēdan consejw loj ree bēn rniabee ree lojdi, naj guial ca'n guialrniabee zi'cgajc laa reeman, naj tēēn testiw xcwent ni guzagdiaj Jesucrist, zi'cgajc laa reeman guguijan xbianiman dxej gui'taman stijb, zeel rēnan guiēn nine ree loj reeman. <sup>2</sup> Rnin lojdi, gol gunaj ree xbejn Jesucrist, bēn rayal ree gulūūdi din gusnuu chinal reeman xnejz Dios. Ad gūūndi dxiin guin guialzi ragbeedi rayal gūūndi laan, gol beenan guial yu'di gan gūūndi laan, con guidib luxdoodi gol beenan, ad bal gūūndi laan guialzi rzēēbladxidi milia. <sup>3</sup> Ad guial ca'tidi guialrniabee din nabeedi zi'c tal rēndi, rayal guibandi zagdxē din guguaa ree bēn rliladx Jesucrist din guiban reeman zian, <sup>4</sup> din chi gui't bēn rniabee dunuj ree stijb, dxel guneeman tijb niza'cdxoon ni ad yu't dxej nit.

<sup>5</sup> Ziangajc lējt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tēē xtiidx ree xcompniaridi, din: Ralen da't Dios bēn rūjn ree benro', per dād benza'can con ree bēn rūjn naya. <sup>6</sup> Zeel gol been naya loj Dios, bēn ca' gra guialrniabee, din guiliesaman xvaloridi chi guidxin dxej. <sup>7</sup> Gol basa'n gra xgab yu'di loj Dios, din laaman rnij lējt.

<sup>8</sup> Gol guzujsin, gol gojp cudad, din xindxab xin ralen da't lējt, za'x zi'c tijb beedx rliaan, rguilix chu gūūnx gan. <sup>9</sup> Zeel ad tiēbidi gūūnx lējt gan, gol guzujdx'i'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bēn rliladx Jesucrist guidib guidxliuj. <sup>10</sup> Per chi ma gudēdidi ta'n loj guialrzagdiaj, dxel gagnē Dios din gusnuu gūūndi naguiejn guibandi zi'c rēnman, su tēēdi rejs, sudxi'chidi, gap tēēdi segur guial zinalidi xnejzaman. Laagajcaman

naĵ Dios cayiĵn dunuj ree yudar loj gra ni cayza'c ree, abi' ma gulejman dunuj ree din yayal ree tiblayaa lod rniabee-man guial nachajg ree Jesucrist. <sup>11</sup>Laaman rayal respejt, din tijbzi laaman ca' guialrniabee zianczi. Amén.

### **Diidx bigra ca ree loj gui'ch guie**

<sup>12</sup>Silvan, tijb dux compniar ree, bén ragbeen naban zi'c rën Dios, laaman been gui'ch guie din ganin lojdi tio'p

choon diidx, par gunen lëjt consejw nëtëë par gugojnan lëjt guial diidxli rën Dios lëjt, zeel gol basnuu gol guyën-man gol guyën tëë lasa'di. <sup>13</sup>Bén rliladx ree Jesucrist, bén ma gulej Dios zi'cgajc lëjt, bén zojb ree Babilonia, rugajpdioz reeman lëjt. Nè Marcw xin nūnan zi'c da xi'nan rugajpdioz lëjt. <sup>14</sup>Guial rën lasa'di, gol bagajpdioz lasa'di xhietëëz horan radxaaglojdi. Yabe'cdxe Dios luxdoodi guial ma nuchajguidi Jesucrist.

## Gui'ch barojp bacaa San Pedr

### Rxhiaal Béd xtiidx Dios loj ree bejn

**1** Naj, Simón Béd, najn tijb xi apóstol Jesucrist rün tēen sirv lojman, cucan gui'ch guie par lējt guial rajpidi lasa'-gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bēn rabēē bejn ree loj dol. <sup>2</sup>Güinle' Dios lējt mazri, yabe'cdxe tēēman luxdoodi guial ma nünbeedi laaman nē dux Dad ree Jesucrist.

### Zi'c royal gac ree xbejn Jesucrist

<sup>3</sup>Por xguialrniabee Dios ma banee-man gra ni rayaadx ree, din yaya'p ree guialnaban tiblyaaa, yabajn tēē ree naya delant lojman, din ma naguieenbee ree Dios bēn gule dunuj ree guial ca'man guialrniabee naj tēēman benza'c. <sup>4</sup>Zeel ma beenman promejs du loj ree, promejs narooB ree ni lasajc ree, abi' por laa reen ma yu' xSprijt Dios luxdoodi, ma been tēēdi tiblyad gra ree ni ad rüjnt sirv nē ree ni mal riga' loj guidxliuj guie. <sup>5</sup>Zeel gol been naguiejn por guialrliladx ni rajpidi gol gubajn zagdx, din guial guibandi zagdx, dxel mazri ma gagbeedi xhienaag guibandi. <sup>6</sup>Abi' guial gagbeedi xhienaag guibandi, ma zajc gucwēēz xixgabmalidi, abi' guial gucwēēzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, <sup>7</sup>dxel guial guibandi naya delant lojman, ma zajc guiēn lasa'di, abi' guial guiēn lasa'di, ma zajc guiēndi gra ree bejn.

<sup>8</sup>Bal yu'guijquidi nine ree cusnuu tēē cayüjndi naguiejn guibandi zian, dxel ad naban xlia'tzidi, ad beenbee xlia' tēētidi dux Dad ree Jesucrist. <sup>9</sup>Per bēn ad rüjnt naguiejn guiban zian, laaman naj zi'c tijb bēnlutia'p o zi'c tijb bēn ad ruguiaat

zijt, ma bayanladxaman guial biquied Dios xtolaman ni beenman guia'xchej. <sup>10</sup>Zeel min lojdi, compniar raliduladx ree Jesucrist, zi'c ma bacaabee Dios lējt ma gulej tēēman lējt, gol been naguiejn gol guzudxi'ch loj xnejzaman, din bal sudxi'chidi, ad zayajbtridi loj dol. <sup>11</sup>Zian gapidi nejz nali din chu'di lod rniabee dux Dad ree Jesucrist tiblyaaa, bēn babēē dunuj ree loj dol.

<sup>12</sup>Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tēēdi ni diidxli ni ma bacaagdiajguidi. <sup>13</sup>La'tgaj naban loj guidxliuj guie, naladxan rayal gunen consejw lojdi con ree diidx guin. <sup>14</sup>Din por dux Dad ree Jesucrist ma gogbeen guial ma zidyob dxey yazaan loj guidxliuj guie.

<sup>15</sup>Zeel cayün da'tan naguiejn rniēnē'n lējt, din gusaaladxidi da diidxan majsi ma güjtan.

### Bén baguiaa ree xguialrniabee Jesucrist

<sup>16</sup>Chi ranan lojdi xhienaag naj xguialrniabee Jesucrist xhie tēē naag gui'taman stijb, ad balēēguijctan ni banan lojdi. Din con quijb du lojn baguiaan xbianiman <sup>17</sup>chi biguien cha' Dios diizd xanyabaa, gulesaman xvaloraman baza't tēēman laaman zagdx, rēbaman: "Xin guie naj da xi'nān, rēnan laax rabaanē' tēēn laax." <sup>18</sup>Abi' dunujn nayajc bēn biguien cha' Dios diizd xanyabaa chi nadxu'nē'n Jesús ruguia' zii, lod biguien xbianiman.

<sup>19</sup>Zianan zeel mazri raliduladxan ni rēb ree bēn badēēd xtiidx Dios loj ree bejn, zeel zagdx naj bal yu'guijquidi ni rēb reeman, din xtiidx reeman naj zi'c tijb guij rusni lod nacay la'tgaj rareguiaal. Yan ziangajc lējt chaawladx cusnuu cayagbeedi xcwent Dios xt chi gui't Jesucrist stijb, bēn naj bajl rusni par dunuj ree, dxel ma gagbeedi graczan zi'c

tal najn. <sup>20</sup>Per gol gogbee guial ni'qui tijb xtiidx Dios ad zajct chignia' bejn por xixgabzaman. <sup>21</sup>Din b́en badēēd ree xtiidx Dios loj ree bejn, ad guneet reeman xtiidxaman zi'c goczi xixgab reeman, gunee reeman ni basajb xSprijt Dios guijc reeman.

### B́en rulūū ree diidx rusquiee

(*Judas 4-13*)

**2** Zian zi'c guyu ree b́en rusquiee loj ree b́en Israel tiamp gulal rēb reeman rudēēd reeman xtiidx Dios loj ree bejn, ziangajc chu' ree b́en rusquiee gulūū lējt ni rusquiee ree, yaguiil reeman mod din gulūū reeman lējt ni ad najt diidxli par gagdxadi. Ad zatiējbt reeman nabee Jesucrist laa reeman, majsi baguijxaman xtol reeman, zeel ad zaglaat gunijt Dios laa reeman. <sup>2</sup>Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios. <sup>3</sup>Abi' guial rzēēbladx reeman milia, yaguiil reeman xhie ni rusquiee gulūū reeman lējt din tia' reeman xmiliadi, per ziangajc ad zalaat reeman loj xcasti Dios ni cabēz laa reeman, din diidx gocli mal yu' casti ni yayal ree b́en rŭjn zian.

<sup>4</sup>Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabēz reeman dxej gŭin xguialguxtisaman. <sup>5</sup>Ad been tēētaman perdon benmal guyu ree tiamp gulal, banijtaman laa reeman con nijs. Tijbzi Noé b́en balūū xhienaag chinal ree bejn xnejz Dios, laazaman naj b́en gulaa con zagajdx ree bejn. <sup>6</sup>Ziangajc chi been xguialguxtis Dios con ree guiedx Sodoma nē Gomorra, baze'caman laa reen xt bayajc reen cobdēj, abi' laan naj ejempl par ree b́en guiban nadxuudx zi'c ree b́en guiedx zii ree. <sup>7</sup>Per baslaa Dios b́en brii laj Lot, b́en guban zi'c rēn Dios guyu tēēman xgab guial baguiaaman zi'c guban

ree benmal guin. <sup>8</sup>Abi' guial gubajman zagdxe, zeel guixie guixie guyunaya da'taman por ree nidxuudx biguiejnman baguiaa tēēman been ree b́en guin. <sup>9</sup>Rajc rŭjn Dios yudar b́en ruzoob ree xtiidxaman xhiētēēz loj prueb cadēd reeman, abi' ma naj xhie gŭinnēman benmal ree dxej gŭin xguialguxtisaman.

<sup>10</sup>Laan naj ni yayal ree b́en naban zi'ctzi rēn reeman, ad rēnt reeman nabee Jesucrist laa reeman, dád nad reeman, ad ratut reeman, ad rdxeb tēēt reeman rnieeguijdx reeman b́en naj ree xianjl Dios. <sup>11</sup>Abi' ni'qui ree xianjl Dios, majsi rajp reeman mazri gojl nē guialrniabee, per achet diidxguijdx rēb reeman lojman contr laa reeman.

<sup>12</sup>Lasa' ree b́en guin naban reeman zi'c ree be, ad yu't xquiarguejn reeman abi' rnieeguijdx reeman ni ad rignia't reeman, guidiblagaa rŭjn reeman ni rēntzi reeman sin xgab. Zi'c ree be zēēdzi reeb loj guidxliuj guie par guiniaaz reeb din guiēt reeb, ziangajc laa reeman por nidxuudx rŭjn reeman ma cusēēb laagajc reeman, <sup>13</sup>abi' yaguijx reeman gra ni rŭjnnē reeman bejn ree.

Rabaa da't reeman guial rŭjn reeman ni dxuudx ree, ni natu ree.

Naj reeman zi'c tijb manch, ruxhiin reeman lanij rŭjndi chi rawidi tijbzi, abi' rabaa da't reeman guial rusquiee reeman lējt.

<sup>14</sup>Ad zajct guguaa reeman tijb b́en gunaa sin guial ad zŭjnt reeman xgabdxuudx, ad rucwēēzt rŭjn reeman dol rusquiee tēē reeman b́en ad rignia'za'ct ree xtiidx Dios din gŭin reeman dol, abi' dád nasin reeman par gŭin reeman gan ni rzēēbladx reeman, laa reeman ma naj par yayal reeman xcasti Dios. <sup>15</sup>Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam b́en badēēd xtiidx Dios loj ree bejn, xi'n b́en brii laj Beor, chi guyēnman nŭjnman gan milia por ni mal nŭjn-

man. <sup>16</sup>Per chi zëman ziguienman ni mal guin, bacwëez Dios laaman, basneeman xburaman zi'c tijb bejn, zian bacwëez Dios xixgabtontaman.

<sup>17</sup>Yan bën rusquiee cuzat reen lojdi naj reeman zi'c bizë ni ad yu't nijs, zi'c zaj ni ad nët guia, zeel rayal reeman lod nacay da't lod ad yu' tëët dxej yarii reeman. <sup>18</sup>Ganax ree diidx nabë rü reeman, diidx ad rüjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bën qui cusa'nri ree nejzmal. <sup>19</sup>Rëb reeman guial achut rayal nabee bejn, per ad rignia't reeman guial nidxuudx rüjn reeman rniabee laa reeman, din graczi ni ad rajct rucwëez rüjn ree bejn, laan naj ni rniabee laa reeman. <sup>20</sup>Chi ma beenbee ree bejn dux Dad ree Jesucrist guial laaman naj bën babëë dunuj ree loj dol ma basa'n tëë reeman nidxuudx yu' ree loj guidxliuj guie, abi' rtiëjb reeman rniabeen laa reeman stijb, dxel pi-orli guiban reeman guial chi gad reeman güünbee laaman. <sup>21</sup>Zagdxeli naj ad nünbeet reeman xnejzaman, guial beenbee reeman laan abi' basa'n reeman xtiidzxa'caman ni ma biguiejn reeman. <sup>22</sup>Con laa reeman rajc cumplid diidx ni rëb: “Rayaw bë'cw ni bayëbib, guiáad cüch qui gojzri con nijs naya rayub loj nizbajn.”

### Ni gac chi gui't Jesucrist stijb

**3** Gradi compniar raliduladx ree Jesucrist, rën da'tan lëjt, nine naj gui'ch rarojpx rhialan par lëjt. Loj grop gui'ch guie cayünan naguiejn ganenë'n lëjt din güündi xgab zi'c rayal. <sup>2</sup>Gol basaaladx ni rëb ree bën badëëd xtiidx Dios loj ree bejn tiamp gulal, gol basaaladx tëë xtiidx dux Dad ree Jesucrist, bën babëë dunuj ree loj dol, xtiidxaman ni baliüü ree apóstoles lëjt.

<sup>3</sup>Gol badxe'guijc, chi ma zidyob nit guidxliuj, chu' ree bën guze' lëjt abi'

guiban reeman zi'ctzi rën reeman. <sup>4</sup>Abi' na reeman lojdi: “¿Gon promejs been Jesucrist guial gui'taman stijb? Ma güjt gra ree dux bëngulal ree, abi' graczi ni yu' loj guidxliuj guie sta naj gajc diidx chi gocchaaw guidxliuj.” <sup>5</sup>Na reeman zian, guial ad rënt reeman yayagbee reeman guial diidx tiamp gulal mal yu' xanyabaa në guidxliuj abi' por xguialrniabee Dios brii guidxliuj guin loj nijs. <sup>6</sup>Gojc xchej, dxel con nijs gajc banijt Dios bën gocli ree. <sup>7</sup>Per xanyabaa në guidxliuj raguiaa ree yan, ma naj guial gunijt Dios laa reen con bajl por xguialrniabeeman dxej ni güün xguialguxtisaman con ree bën ad ruzoobt xtiidxaman.

<sup>8</sup>Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxej naj zi'c timil ijz, guiáad timil ijz naj zi'c tib dxej. <sup>9</sup>Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

<sup>10</sup>Zi'c tal ri't tijb bëngubaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

<sup>11</sup>Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios. <sup>12</sup>Con gan gol gulëjz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii. <sup>13</sup>Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

<sup>14</sup>Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidxaa-

gloj Dios lëjt naya sin dol, riga'dxenë tëë lasa'di. <sup>15</sup> Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bén rayën da't ree, ziangajc naman lojdi loj ree xtiidxaman, zi'ctzi naj quiarguiejn ni bazaladx Dios lojman. <sup>16</sup> Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëëg guial chignia' bejn, dxel bén ad rajctczi ree në ree bén ad zinalt xtiidx Dios con guidib luxdoo, ruchaa

reeman ni rën guiëb xtiidx Pab, zi'cgajc rüjnnë reeman ni zëëd ree loj xtiidx Dios, zeel laagajc reeman cusëëb laa reeman.

<sup>17</sup> Compniar raliduladx ree Jesucrist, rënan lëjt, zeel yan guial ma ragbeedi nine ree, gol gojp cudad chitëë güün ree bén rën ree gusquiee lëjt gan, chitëë gucwëëz sudxi'chidi loj xnejz Dios. <sup>18</sup> Zagdxeli gol been naguiejn güünbeedi mazri dux Dad ree Jesucrist, bén baguijx dux tol ree, gol been tëë naguiejn gagbeedi mazri guial rën da'taman dunuj ree. Laaman rayal respejt gra tiampczi.

## Gui'ch yaløj bacaa San Juan

### Jesucrist runee guialnaban tiblyaa

**1** Gui'ch guie naj par gugojnan lëjt xcwent Jesucrist, bën mal yu' gocli diizd chi gad guidxliuj gacchaaw. Ma bacagdiajgan, ma baguiaan ni beenman, baguiaan laaman zagdxe, ma baqui' tēen laaman con quijb du yaan. Laaman naj bën runee guialnaban, <sup>2</sup>ma bi'taman loj guidxliuj, ma baguiaan laaman, dunujn nayajc testiw ragojn tēen lëjt xcwent-taman. Laaman naj bën runee guialnaban tiblyaa, najman bën guzunē Dios diizd gocli bi't tēeman loj guidxliuj. <sup>3</sup>Zeel ragojnan lëjt ni ma baguiaan ni ma baguiejn tēen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist. <sup>4</sup>Ragojnan lëjt nine ree loj gui'ch guie din chu' luxdoodi zagdxe, zi'c yu' du luxdoon zagdxe.

### Royal yanaab ree loj Dios din güünman dux tol ree perdon

<sup>5</sup>Ni ne naj ni balüü Jesucrist dunujn, yan ragojnan lëjt guial naj Dios biani, achetzi dol nabannēman. <sup>6</sup>Bal yaguie'ch ree nadxu'nē' reeman abi' zunaal gajc ree nejz mal rasquiee ree ad zunaalt ree diidxli.

<sup>7</sup>Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du lasa' ree. Abi' xrejñ xi'nman Jesucrist chiquied gra dux tol ree.

<sup>8</sup>Bal yaguie'ch ree achet dux tol ree yu', rasquiee dunuj gajc ree, ad cayguie'ch tēet ree diidxli. <sup>9</sup>Per bal yaxhoobdol ree loj Dios, rayagbee ree zagdxe guial güünman ni naman, güünman perdon dux tol ree, chiquied tēeman gra ni mal yu' du luxdoo ree. <sup>10</sup>Per bal yaguie'ch ree ad waguieent ree dol,

raguieen reeman zi'c bēnrusquiee, ad raliduladx tēet ree xtiidxaman.

### Bén rēn Dios rayal guzoobaman xtiidxaman

**2** Xi'n, rucan nine ree par lëjt chitēē güüindi dol. Per bal chu lëjt rüjn dol, raya'p ree bën guinee por dunuj ree loj Dios, laaman naj Jesucrist bën ad wayüjntczi dol. <sup>2</sup>Por xguialgüjtaman naj dux tol ree perdon, abi' ad dux toltzi ree, nē gra xtol ree bēnguidxliuj.

<sup>3</sup>Bal razoob ree xtiidx Dios, zian raya'p ree segur guial ma naguieenbee reeman zagdxe. <sup>4</sup>Per bal chu rēb: "Nün-been Dios", abi' ad ruzoobtaman xtiidxaman, rusquieeman, din ad walit ni rēbaman. <sup>5</sup>Per bēnruzoob xtiidxaman, diidxli rēnman laaman con guidib luxdoooman, zian rayagbee ree guial ma nabajnnē' reeman. <sup>6</sup>Bēn rēb nabannēman Dios, rayal guibanman zi'c guban Jesucrist.

### Bén zinal ree xnejz Dios rēn lasa' reeman

<sup>7</sup>Gradi compniar raliduladx ree Jesucrist, diidx canin lojdi yan ad diidx cübt reen, xtiidx gajc Jesucristan ni ma biguiejndi diizd yaløj, laagajcanan canin lojdi yan. <sup>8</sup>Per canin laa reen zi'c rullüü diidx cüb reen, din por Jesucrist nē por lëjt ma rguien guial ma cusa'ndi ni mal abi' zinalidi ni zagdxe.

<sup>9</sup>Bal chu rēb zinal xnejz Dios abi' ralen lasa'man, sta zinalaman nejz mal. <sup>10</sup>Bēn rēn lasa' zinalaman xnejz Dios, abi' ma naj nawēeg guial güün dol laaman gan. <sup>11</sup>Per bēn ralen lasa', nabanman loj nejz mal, ad ragbeetaman ban cheman, din nejz mal guin basa'n laaman zi'c tijb bēnlutia'p.

<sup>12</sup>Xi'n, rucan gui'ch guie par lëjt, din ma gojc xtolidi perdon por xguialrmiabee Jesucrist. <sup>13</sup>Cucan nine ree par lëjt guial najdi bēn ma rignia' mazri chunin naj Je-

sucrist. Bén ma yu' gocli diizd chi gad guidxliuj gacchaaw, cucan ni ne ree par lëjt bén ma rignia' ta'n chunin naj Jesucrist din ma beendi gan ad züjntidi ni zëed loj xindxab, cuca tëen nine ree par lëjt bén qui guzuløjri ree cayignia' chunin naj Jesucrist din ma nünbeedi dux Dad ree Dios.

<sup>14</sup> Bacan nine ree par lëjt guial ma rignia'di mazri chunin naj Jesucrist bén ma yu' gocli diizd chi gad guidxliuj gacchaaw, baca tëen nine ree par lëjt guial ma rignia'di ta'n chunin naj Jesucrist, din za'dxi'chidi zinal tëedi diidxli xnejz Dios con guidib luxdoodi, ma been tëedi gan ad züjntidi ni zëed loj xindxab.

<sup>15</sup> Ad sëëbladxidi ni ad najt zagdxé ni rüjn ree bejn loj guidxliuj, bal chu rën mazri ni riga' loj guidxliuj guie, ad rëntaman dux Dad ree Dios, <sup>16</sup> din achetczi ni mal yu' loj guidxliuj guie zëed loj Dios, ni rajc gajc loj guidxliuj guien, rüjn reeman zi'c naj xixgab dxuudx reeman, rzëëbladx reeman gap reeman gra ni ruguiaa reeman, rüjn tëë reeman benro' por gra ni rajp reeman. <sup>17</sup> Per guidxliuj guie yu' dxej nitan con guidib ni mal yu' lojn, per bén naban zi'c rën Dios rajpaman guialnaban tiblyaa con laaman.

### Yunaal ree ni naj diidxli

<sup>18</sup> Xi'n, rnin lojdi ma zidyob dxej nit guidxliuj, din ma biguiejndi guial rayal gui't tijb bén su contr Jesucrist guiëb tëëman laaman naj Jesucrist. Yan zien ree bén ralen laaman ma balüüloj, zeel rayagbee ree guial ma zidyob dxej nit guidxliuj. <sup>19</sup> Bén ralen ree Jesucrist, du- loj gajc ree brii reeman nayajc ree bén rliladx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman du- loj ree guial raliladx ree Jesucrist, per gojc nine din guiguien guial ad grat reeman naj dux bejn ree. <sup>20</sup> Jesucrist baneé xSprijt Dios lojdi, abi' por laaman

gradi ma ragbee ni naj diidxli. <sup>21</sup> Cucan nine par lëjt, ad guial ad ragbeetidi conin naj ni diidxli, cucanan guial ma ragbeedan, abi' lëjt ragbee guial ni'qui tijb ni rusquiee ad zajct gui't loj ni diidxli guin. <sup>22</sup> Yan, ¿chu naj bén rusquiee? Bén rusquiee naj bén rëb guial ad Jesúst naj bén guxhaal Dios loj guidxliuj. Bén rëb zian naj zi'cgajc naj bén za' contr Jesucrist guial ad rliladxtaman Dios ni'qui xi'nman Jesucrist. <sup>23</sup> Din chutëez bén rëb guial ad najt Jesucrist Xi'n Dios, laaman ad nünbeet dux Dad ree Dios, per bén rëb Jesucrist naj Xi'n Dios nè dux Dad ree Dios nünbeeman.

<sup>24</sup> Zeel gol binal diidx ma biguiejndi diizd guia'xchej chi bililadxidi Jesucrist. Bal chinalidi diidx guin ree, dxel ziz nabannëquidi dux Dad ree Dios con xi'nman Jesucrist. <sup>25</sup> Abi' ni ma rëb Jesucrist gunee man naj guialnaban tiblyaa.

<sup>26</sup> Cucan diidx guie ree par lëjt por ree bén rën gusquiee lëjt. <sup>27</sup> Per nabannëdi xSprijt Dios, bén banee Jesucrist, ad ri- aadxtidi bén gülüü lëjt, din Sprijt guin gajc rulüü lëjt gra, abi' ganax diidxli ad ni rusquieet, zeel gol gubajn zi'c rni- abeeman din gusnuu gaquidi tijbzi con Jesucrist.

<sup>28</sup> Yan rnin lojdi xi'n, gol binal xnejz Jesucrist, chitëë yadxeb ree chi gülüülo- jman, ad zaya'nxtu tëët ree lojman chi gui'taman. <sup>29</sup> Lëjt ragbee guial rüjn Dios zi'c rayal, ragbee tëedi guial graczi ree bén rüjn zi'c rayal, laa reeman naj xi'n Dios.

### Bén naj ree xi'n Dios

**3** Gol been xgab, plact rën dux Dad ree Dios dunuj ree, zeel balëë dulaj ree xi'n Dios, abi' waliczan nayajc ree xi'nman. Per bén ad zinalt ree xnejz Dios ad nünbeet reeman dunuj ree zi'c xi'nman, din ad nünbeet reeman laaman. <sup>2</sup> Gradi compniar raliduladx ree Jesucrist, rënan lëjt, rnin lojdi: Ma nayajc ree xi'n Dios,



majsi ad rayagbeet ree xhienaag yayajc ree chi gui't Jesucrist stijb, per raya'p ree segur guial yayajc ree zi'c najman, din xt nadxel yaguiaa ree diidxiczi xhienaag najman. <sup>3</sup>Graczi ree bën rliadx guial gac zian, rüjn reeman naguiejn guiban reeman naya delant loj Dios zi'c laaman, guial achet xtolaman.

<sup>4</sup>Per graczi ree bën ad zinalt ni rniabee Dios, cayüjn reeman dol, din dol naj guial ad rüjnt reeman ni rniabeeman. <sup>5</sup>Lëjt ragbee guial bi't Jesucrist loj guidxliuj din chiquiedaman xtol ree bejn, abi' laaman ad guyutczidxej ad yu' tët dxej nünman dol. <sup>6</sup>Zeel bën naj ree tijbzi con laaman rüjn reeman naguiejn ad rüjnt reeman dol, per graczi bën rüjn dol zianczi ad wayignia't reeman chu najman, ad wayünbee tët reeman laaman. <sup>7</sup>Xi'n, ganin lëjt, ad bal tiëbidi chu gusquiee lëjt, din bën cayüjn ni rën Dios, laaman naya delant lojman zi'c naya Jesucrist delant lojman. <sup>8</sup>Per bën yu' loj dol xbejn xindxaban, din xindxab rüjn dol diizd yalaj, abi' Jesús Xi'n Dios bi'taman loj guidxliuj par zianczi din güünman gan loj xgualrniabee xindxab.

<sup>9</sup>Zeel ni'qui tijb ree bën ma zinal xnejz Dios ad rusnuutri rüjn dol, din ma nabannëman Dios, ad rayal tëttri güünman dol din ma najman xi'nman. <sup>10</sup>Laa rguien gajc chu reenin naj xi'n Dios chutëë reenin naj xi'n xindxab, din chutëëz ad rüjnt ni rën Dios ad rën tët lasa'man, dxel ad najtaman xi'n Dios.

### Royal yayën du lasa' ree

<sup>11</sup>Abi' lëjt ma biguiejndi xtiidx Dios diizd guia'xchej guial rayal yayën dulasa' ree. <sup>12</sup>Ad rayalt yaguieen ree zi'c been Caïn, cwëjbaman gunabee xindxab laaman, zeel bagüjt bijchaman. Caïn been zian, din beenman ganax ni mal, guiaad bijchaman been ni zagdx.

<sup>13</sup>Zeel gradi compniar raliduladx ree Jesucrist, ad gagdxadi bal yalen ree bën-

guidxliuj lëjt guial ma zinalidi xnejz Dios. <sup>14</sup>Dunuj ree rayagbee guial ad nayajct ree zi'c bengüt par laaman, ma raya'p ree guialnaban delant lojman, guial rayën du lasa' ree. Per bën ad rënt lasa', sta najman zi'c bengüt par Dios. <sup>15</sup>Graczi bën ralen lasa' najman zi'c bën rugüjt bejn, abi' lëjt ragbee, tijb bën rugüjt bejn ad rajptaman guialnaban tiblyaa delant loj Dios. <sup>16</sup>Ma rayagbee ree conin naj guial rën lasa', guial güjt Jesucrist por dunuj ree, yan ziangajc dunuj ree rayal yayën dulasa' ree xt yayëjt ree por laa reeman. <sup>17</sup>Per bal chu tijb dunuj ree ad riaadxt xhienin loj guidxliuj guie abi' ruguiaaman tijb bën cayaadx laan abi' ad rüjntaman laaman yudar, dxel, çxhienaag guiëbaman guial rënman Dios? <sup>18</sup>Xi'n, ganin lëjt, ad con diidxtizi yaguie'ch ree guial rayën dulasa' ree, rayal guiguien guial rayën dulasa' ree por ni raguieen ree.

### Raya'p ree segur guial za' në Dios dunuj ree

<sup>19</sup>Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yaguieen ree delant lojman. <sup>20</sup>Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duloj ree, abi' laaman ragbee gra. <sup>21</sup>Zeel zi'c rënan lëjt min lojdi, bal ragbee du luxdoo ree guial cayguieen ree ni zagdx, dxel raya'p ree segur guial cayguieen ree ni zagdx delant loj Dios. <sup>22</sup>Laaman gunee graczi ni yanaab ree lojman guial razoob ree xtiidxaman ni rniabeeman, abi' raguieen ree naguiejn raguieen ree ni ruladxaman. <sup>23</sup>Ni ne naj ni rniabeeman yaguieen ree guial yaliduladx ree Jesucrist naj xi'nman yayën tët dulasa' ree zi'c gunabee-man dunuj ree. <sup>24</sup>Bën rüjn ree ni rniabee Dios, laa reeman nabannë Dios abi' Dios

nabannë laa reeman, rayagbee tää ree guial za'man con dunuj ree por xSprijtaman bën baneeman duloj ree.

### Bén ad rliadxt Jesucrist ad yu't xSprijt Dios luxdooan

**4** Gradi compniar raliduladx ree Jesucrist, rënan lëjt, rni tää lojdi: ad rliadxidi chutëöz bën rëb rnieeman xtiidx Dios. Yaløj xgaj gol gogbee zagdx bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree bën rusquiee, rëb reeman rniee reeman xtiidxaman. <sup>2</sup> Yan din gagbeedi chu reenin rniee xtiidx Dios: Laa reeman naj bën rliadx guial Jesucrist bi't zi'c bënguidxliuj. Bén rliadx ree zian yu' xSprijt Dios luxdoo reeman. <sup>3</sup> Per bën ad rliadxt ree zian ad yu't xSprijtaman luxdoo reeman, laa reeman naj bën ralen Jesucrist. Ma biguiejndi guial rayal gui't tijb bën su contr laaman. Abi' diidz yan ma za' sprijt guin guidxliuj, zeel zien ree bën ralen Jesucrist ma yu' loj guidxliuj guie.

<sup>4</sup> Per lëjt xi'n ma najdi xi'n Dios, guiaad ree bën ralen Jesucrist ad zajct güün reeman lëjt gan, din mazri narooob guialrniabee ca' bën nabannë lëjt guial loj bën nabannë bën zinal ree nejz mal loj guidxliuj guie. <sup>5</sup> Bén za' ree contr Jesucrist rüjn reeman xgab tijbzi ni riga' loj guidxliuj guie rniee reeman, guiaad ree bën ad rliadxt Jesucrist rüjncwent reeman ni rëb reeman. <sup>6</sup> Per dunuj ree ma nayajc ree xbejn Dios, abi' bën ma nünbee ree Dios rucaagdiajg reeman ni ranee ree, guiaad ree bën ad nünbeet Dios ni'quid rüjncwentt reeman ni ranee ree, zian rayagbee ree chu nabannë xSprijt Dios bën rulüü dunuj ree diidxli chutëenin nabannë sprijt ni rulüü ganax ni rusquiee.

### Rën Dios dunuj ree

<sup>7</sup> Rënan lëjt, rmin lojdi rayal yayën dulasa' ree, din guialrën lasa' zëöd loj Dios. Gra bën rën lasa' naj xi'n Dios nünbee tää reeman laaman. <sup>8</sup> Abi' bën ad rënt lasa' ad wayünbeetaman Dios, din guialrën lasa' zëöd loj Dios. <sup>9</sup> Balüü Dios guial rënman dunuj ree, din majsi tijbzi xi'nman Jesucrist, guxhaalaman laaman guidxliuj din yaya'p ree guialnaban delant loj Dios por laaman. <sup>10</sup> Rën Dios dunuj ree. Ad dunujt ree bayën laaman, yaløj laaman guyën dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree. <sup>11</sup> Rënan lëjt, zeel rmin lojdi, zi'c rën Dios dunuj ree, ziangajc rayal yayën dulasa' ree. <sup>12</sup> Majsi achut waguiaa laaman, per bal rayën dulasa' ree, nabannë'qui ree Dios, abi' diidxli rayën reeman.

<sup>13</sup> Dunuj ree rayagbee guial nabannë' reeman abi' laaman za' con dunuj ree, din ma banee xSprijtaman duloj ree. <sup>14</sup> Abi' dunuj gajcan baguiaa ragojn tää guial guxhaal Xi'n Dios loj guidxliuj guie persi güjtaman por xtol gra ree bejn. <sup>15</sup> Chutëöz rëb guial Jesucrist naj Xi'n Dios nabannëman Dios, abi' Dios nabannë laaman. <sup>16</sup> Dunuj ree rayagbee raliladx tää ree guial rën Dios dunuj ree. Por laaman zëöd guial rayën dulasa' ree. Abi' bën rën lasa' nabannëman Dios, guiaad Dios nabannë laaman.

<sup>17</sup> Bal wali rayën ree Dios zi'c rënman, ad najtan ni yadxeb ree dxej güün xguialguxtisaman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux guialnaban ree nabannë' reeman loj guidxliuj guie. <sup>18</sup> Bén rën Dios, ad rdxebtaman, din bën rën laaman diidxli, ad rdxebtraman, per bën ad rënt laaman rdxebaman, din rüjnman xgab casti ni yayalaman, zeel bal chu rdxeb, ad walita-

man rënman laaman. <sup>19</sup> Dunuj ree rayën Dios, din yaløj laaman guyën dunuj ree. <sup>20</sup> Bal yu' Bén rëb: “Rënan Dios”, abi' ralen lasa'man, rusquieeman. Din bal id rën lasa'man Bén ruguiaaman, ¿xhien-aag guiënman Dios Bén ad waguiaataman? <sup>21</sup> Laagajcaman na: Bén rën Dios rayal guiën lasa'man.

### **Guial raliduladx ree Jesucrist zeel raguieen ree gan loj ni mal**

**5** Gra ree Bén rlliladx guial Jesús naj Bén guxhaal Dios, laa reeman naj xi'nman. Bal chu rën dux Dad ree Dios, në gra ree xi'nman rënman. <sup>2</sup> Chi rayën ree Dios raguieen tëë ree ni rniabee-man, dxel rayagbee ree guial rayën ree gra ree xi'nman. <sup>3</sup> Guial guiën bejn Dios naj guial güünman ni rniabeeman. Abi' ad nawëëgt naj guial güünman ni rniabeeman, <sup>4</sup> din gra Bén naj xi'nman ma rüjn gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin. <sup>5</sup> Bén rlliladx guial Jesús naj Xi'n Dios, tijbzi laaman zajc güün gan loj ree ni mal yu' loj guidxliuj.

### **Ni rulüü Dios dunuj ree xcwent Jesucrist**

<sup>6</sup> Jesucrist bi't loj guidxliuj, gurobnijsaman guxhie' tëë xrejman loj crüjz. Ad gurobnijsztaman, në guxhie' xrejman. XSprijt Dios naj testiw, laaman rü diidxli xcwent ree nine.

<sup>7</sup> Choon testiw yu' xanyabaa: xDadaman Dios, Jesucrist në xSprijt Dios, guiyon reeman naj tijbzi Dios.

<sup>8</sup> Yu' tëë choon testiw loj guidxliuj: XSprijt Dios, në guial gurobnijs Jesucrist con ni guxhie' xrejman loj crüjz, guiyon reen rü diidx tijbzi.

<sup>9</sup> Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, din xtiidxaman mazri lasajcan. <sup>10</sup> Bén rlliladx Xi'n Dios, laa-

man rlliladx ni rëb Dios xcwentaman. Per Bén ad rlliladxt laaman, rüjnman Dios zi'c Bén rusquiee, din ad rlliladxtaman ni rëbaman xcwent Xi'nman. <sup>11</sup> Abi' ni rëbaman naj guial ma baneeman guialnaban tiblayaa duløj ree, guialnaban guin zëëd por xi'nman. <sup>12</sup> Bén za'në Xi'n Dios tijbzi, laaman naban tiblayaa delant loj Dios, per Bén ad za'nët laaman tijbzi, laaman ad ca't guialnaban guin.

### **Ni bigra ca loj gui'ch guie**

<sup>13</sup> Cuan nine ree par lëjt najdi Bén rlliladx Jesucrist Xi'n Dios din gagbeedi guial ma ca'di guialnaban tiblayaa delant loj Dios.

<sup>14</sup> Rayagbee ree zagdx: chi yanaab ree xhienin lojman, rüjncwentaman dunuj ree, bal yanaab ree zi'c rënman. <sup>15</sup> Bal rayagbee ree rüjncwentaman dunuj ree chi ranaab ree xhienin, ziangajc rayagbee ree zagdx guial guneeman ni ranaab ree.

<sup>16</sup> Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gudëë Dios guialnaban tiblayaa lojman, bal zajc gac dol guin perdon. Yu' dol ni ad zajct gac perdon, abi' ad canitan guial cwedxidi Dios por Bén rüjn dol guin. <sup>17</sup> Graczi ni mal naj dol, per yu' dol ni zajc gac perdon.

<sup>18</sup> Rayagbee ree guial Bén ma naj ree xi'n Dios ad rusnuutri rüjn reeman dol, din Jesucrist Xi'n Dios naj Bén rniaj laa reeman, abi' xindxab ad zajctri nabeex laa reeman. <sup>19</sup> Rayagbee ree guial nayajc ree xbejn Dios, per ree bénguidxliuj, Bén ad najt ree xbejn Dios, xindxab rniabee laa reeman. <sup>20</sup> Rayagbee tëë ree guial Jesucrist Xi'n Dios ma bi'taman loj guidxliuj guie, guxhalaman dux quiar-guiejn ree, persi baguieenbee ree Bén naj quijb Dios. Yan nadxu'në' reeman tijbzi por Xi'nman Jesucrist. Tijbzi laaman naj Dios, por laa tëëman yu' guialnaban

tiblayaa. <sup>21</sup>Xi'n, gol gojp cudad chitëë  
chinalidi ni naladx ree bejn naj Dios.

## Gui'ch barojp bacaa San Juan

### Rxhiaal Waj xtiidx Dios loj ree bejn

**1** Naj, bén rniabee loj ree bén riladx Jesucrist, rxhialan gui'ch guie lojdi najdi bén gulej Dios riladx tēēdi Jesucrist, diidxli rēnan lējt, abi' ad tijbtizi naj, nē gra ree bén zinal xtiidx Dios. <sup>2</sup>Rēnan lējt guial ma nabannē' ree xtiidx Dios abi' laan nabannē dunuj ree zianci. <sup>3</sup>Dux Dad ree Dios con Xi'nman Jesucrist gūinle' lējt, yaya reeman lējt, yabe'cdxe tēē reeman luxdoodi guial zinalidi xtiidxaman rēn tēē lasa'di.

### Rniabee Dios yayēn du lasa' ree

<sup>4</sup>Dád nix guyu luxdon chi gogbeen yu' ree xcompniaridi, diidxli zinal xtiidx Dios naban tēē reeman zi'c rniabee dux Dad ree Dios. <sup>5</sup>Yan, zi'c rēnan lējt najdi dux compniar ree, gol been wen gol guyēn lasa'di. Ni canin lojdi ad nicūbtan, diidx ni bacaagdiajg gajquidi diidz guia'xchejn. <sup>6</sup>Guial rēn Dios naj guial guiban bejn zi'c rniabee Dios, abi' ni rniabeeman ni bacaagdiajguidi diidz guia'xchej naj guial rayal guiban bejn, guiēn lasa'man.

### Bén rusquiee ree bejn

<sup>7</sup>Rnin zian, din gra ladczi guidxliuj ziza zien ree bén rusquiee ree bejn,

guial ad riladxt reeman bi't Jesucrist loj guidxliuj zi'c bejn, bén rūjn zian rusquieeman abi' za'man contr Jesucrist. <sup>8</sup>Gol gojp cudad chitēē gusēēbidi ni rayalidi por ni cayūjndi, din tia'di gra ni rayalidi delant loj Dios.

<sup>9</sup>Chutēēz bén racaa guije zi'c balūū Jesucrist bejn ree ad nabannētaman Dios, per bén zinal xtiidx Jesucrist zi'c balūūman bejn ree, laaman nabannē Dios con Xi'nman. <sup>10</sup>Bal chu gui't lidxidi abi' ad rulūūtaman xtiidx Dios zi'c balūū Jesucrist, ad cu'di laaman lēnū, ad gūūncwent tēēdi ni rnieeman. <sup>11</sup>Din bén rūjncwent xtiidxaman, rēn guiēban guial ma za'man conform con ni rusquiee bén guin.

### Diidx bigra ca ree loj gui'ch guie

<sup>12</sup>Zien ree ni rēnan ganin lējt, per ad rēntan gucanan loj gui'ch, din wed ad zaglaat guialan guidganan lējt din ganenē' quijb naj lējt din chu' du luxdoo ree zagdxē tijbzi. <sup>13</sup>Bén naj ree bén ma gulej Dios, dux compniar raliduladx ree Jesucrist bén zojb ree niz guie, rugajpdioz reeman lējt.

## Gui'ch bayon bacaa San Juan

### Rugajpdioz Waj Gayo

**1** Naj, b́en rniabee loj ree b́en rliadx Jesucrist, rxhialan gui'ch guie par luj Gayo najl da miwan diidxli ŕenan luj.

<sup>2</sup>Zi'c ŕenan luj rniaaban loj Dios zi'c źel zagdx e loj xnejzaman ziangajc grii zagdx gra ni cayujnl gunee t́éeman luj guialnadaan. <sup>3</sup>Dád nix guyu luxdon chi guna garol dux compniar ree guial diidxli nabanl zi'c ŕeb loj xtiidx Dios. <sup>4</sup>Achet mazri ni rgu' luxdon zagdx e zi'c chi riguejnan guial diidxli naban ree da compniaran zi'c ŕeb loj xtiidx Dios.

<sup>5</sup>Zi'c ŕenan luj Gayo, rnin lojl guial zagdx e da't naj ni cayujnl con dux compniar ree b́en rliadx Jesucrist abi' mazczi zagdx e naj ni rujnl con ree b́en źeéd lood ren. <sup>6</sup>Din laa reeman na delant loj gra ree b́en rliadx Jesucrist, b́en rado'pné' reen guie, guial gunajchi'l laa reeman, zeel zagdx e güünl guial güünl laa reeman yudar con ni ryaadx reeman guial cayujn reeman sirv loj Dios din gusnuu xnejz reeman. <sup>7</sup>Din brii reeman zigtie'ch reeman xtiidx Jesucrist abi' ad rtiéjbt reeman tia' reeman ni rudéé ree b́en ad rliadxt laaman. <sup>8</sup>Zeel dunuj ree b́en raliiduladx ree Jesucrist, rayal yaguieen ree yudar b́en catie'ch ree xtiidxaman, zian yaguieen ree yudar guire'ch ni naj diidxli.

### Ad ruzoobt Diótrefes diidx

<sup>9</sup>Ma guxhalan tijb gui'ch loj ree dux compniar ree b́en rliadx ree Jesucrist, per Diótrefes guial ruladxaman nabeeman ad rujncwenttaman dux tiidxan. <sup>10</sup>Zeel bal guidganan léjt dxel ganené'n laaman xcwent guial rnieeguijdxaman rníee t́éeman diidx rusquíee contr dunujn abi' ad tijbtzi laan rujnman né ad rudéét lidxaman yaya'n dux bejn ree b́en źeéd ree lood ren, ad rtiéjbt t́éetaman gudééd lidx ree ben ren yaya'n reeman, abi' ree b́en rudééd lidx ad rtiéjbtaman chu' reeman lén yadoo.

<sup>11</sup>Zi'c ŕenan luj Gayo rnin lojl ad chinalil nejj mal, been ni naj ni zagdx e din b́en rujn ni zagdx e laaman naj xbejn Dios per b́en zinal ni mal ad núnbeetaman Dios.

<sup>12</sup>Graczi reeman ruza't Demetrio zagdx e guial binalaman zi'c rayal, laa nen gajc xhienaag nabanman xt dunujn raza't laaman zagdx e abi' luj ragbee guial diidxli naj ni raguie'chan.

### Diidx bigra ca ree loj gui'ch guie

<sup>13</sup>Zien ni ŕenan ganin lojl per ad ŕentan gucanan loj gui'ch, <sup>14</sup>din wed ad zaglaat guialan guidganan luj, dxel ganené' quijb naj luj.

<sup>15</sup>Yabe'cdxe Dios luxdool, dux miw ree b́en riga' ree guie rugajpdioz luj, bagajpdioz t́eé gra dux miw ree.

## Gui'ch bacaa San Judas

### Rugajpdioz Judas b́en náj ree b́en gule Dios

**1** Naj, Judas bijch Santiaaw, caýinan sirv Jesucrist, cucan gui'ch guie par lějt najdi b́en ma gulej dux Dad ree Dios guial ŕenman lějt, abi' dux Dad ree Jesucrist canaj lějt. <sup>2</sup>Gusnuu yaya Dios lějt, yabe'cdxeman luxdoodi guíen t́eđi laaman.

### B́en ad rnieet ree diidxli

(2Pe. 2:1-17)

<sup>3</sup>Gradi compniar raliduladx ree Jesucrist, ŕenan lějt, diidz gocli guýenan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej ŕijn naguiejn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaalój, guial nayajc ree xbejn Jesucrist. <sup>4</sup>Din yu' ree b́en ŕijn b́en rliladx naabzi par go'ch reeman lojdi. B́en guin ree diidz gocli ma ragbee Dios guial rayal reeman casti, din ad rdxebt reeman laaman, rudxiib reeman guijc naj Dios benza'c, abi' naban reeman zi'ctzi ŕen reeman. Ad rtiějbt reeman nabee Jesucrist laa reeman, laaman naj tijbzi dux Dad ree b́en rniabee dunuj ree.

<sup>5</sup>Majsi ma ragbeedi ni ganin lějt, per ganinan din gusaaladxidi guial majsi baběe Dios b́en Israel ree Egipto, per despuejs baniytaman b́en ad bililadxt ree laaman. <sup>6</sup>Ně ree anjl ad bazoobt xtiidx Dios niniabee reeman lod baděeman loj reeman, basiaawaman laa reeman lod nacay da't xt dxej gúin xguialguxtisaman. <sup>7</sup>Nětěe ree b́en Sodoma con ree b́en Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guýen ree-

man, zeel basagzi Dios laa reeman, baniytaman baze'c t́eđman laa reeman, laan naj ni rayal yaguiaa ree chitěe yaguieen ree zian.

<sup>8</sup>Per ni'czi zian, yan ziangajc ŕijn ree b́en raguuil mod par go'chzi reeman lojdi, ŕijn reeman xgab guial zajc gúin reeman zi'ctzi ŕen reeman, ruxhiin laagajc reeman, ad rtiějb t́eđt reeman nabee Jesucrist laa reeman, rnieeguijdx t́eđ reeman b́en naj ree xianjl Dios. <sup>9</sup>Per chi gudildiidx ree arcangel Miguel con xindxab guijc xcuerp Moisejs, ni'quid bayaxt anjl guin niějbaman diidxguijdx loj xindxab guin, tijbzi ni ŕebaman naj: "Ladxaa Dios gusa'nan lúj." <sup>10</sup>Abi' yan b́en raguuil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx ŕijn reeman, ad ŕijnt reeman laan xgab, contzi ŕijn reeman laan zi'c ree be guial ad ŕijnt reeb xgab. Zian cusěeb laagajc reeman delant loj Dios.

<sup>11</sup>¡Prob laa reeman!, guial zinal reeman ni mal zi'c been Caín, mazri zinal reeman milia zi'c been Balaam, guiét t́eđ reeman zi'c güt Coré chi guýenman niniabeeman luar Moisejs. <sup>12</sup>Laagajc reeman ruxhiin lanij ŕijndi chi rado'pidi din gawidi tijbzi, guidiblagaa ad ratut reeman raw reeman ad ŕijn t́eđt reeman xgab por ree bejn, ŕijnz reeman xgab par cha ĺen reeman. Naj reeman zi'c zaj ni ad nět guia ni rině bi, zi'c ree yag rbidx abi' ria'xh reen guial ad rtiat reen. <sup>13</sup>Naj reeman zi'c xtújp nijsdoo chi rajsan zro'da't, din zi'c ririí bichijn loj nijs guin, ziangajc sin guialxtu ŕijn reeman nidxuudx ree, naj t́eđ reeman zi'c ree bajl xanyabaa ni basěeb xnejz, dxel tiblayaa ma rayal reeman lod nacay da't.

<sup>14</sup>Abi' b́en brii laj Enoc, laaman gojc gajdx loj ree xdiaa Adán, guneeaman xcwent ree b́en guin chi ŕebaman: "Naj baguiaa dux Dad Dios zidnė zien da't ree xianjlaman <sup>15</sup>zidgaguieen xguialguxti-

saman con gra ree bejn, din guiëbaman xhie casti rayal ree benmal por gra ni mal been reeman në por diidxguijdx ni gunee reeman laaman guial naj reeman bëndol.”<sup>16</sup> Lasa' ree bën guin achetczi ruladx reeman, abi' graczi mieeguijdx reeman. Zianczi rüjn reeman zi'ctzi rën reeman, abi' zianczi ruza't laagajc reeman zagdxe ruza't tëë reeman bejn ree zagdxe din cwentzi güün ree bën guin ni rën reeman.

### Mod rayal guiban ree xbejn Dios

<sup>17</sup> Per lëjt compniar raliduladx ree Jesucrist, rën da'tan lëjt, gol basaaladx guial bën goc ree xi apóstoles Dad Jesucrist<sup>18</sup> rëb reeman: “Chi ma zidyob nit guidxliuj, chu' ree bën guze' gra ni zëëd loj Dios güün tëë reeman zi'ctzi naj xixgabdxuudx reeman.”<sup>19</sup> Lasa' ree bën guin naj bën rlia' lasa' ree bën ma zinal xnejz Dios, abi' naban reeman zi'ctzi rën reeman, ad yu't xSprijt Dios luxdoo reeman.

<sup>20</sup> Per lëjt compniar raliduladx ree Jesucrist, gol guzudxi'ch loj ni riladxidi,

din gualrliladx guin zëëd loj Dios. Gol gurejdx gunab Dios con xyudar xSprijtaman.<sup>21</sup> Gol basnuu gol binal guial rën Dios la'tgaj cabëzidi guidxin dxej gunee Jesucrist guialnaban tiblyaaa duloj ree guial rayaman dunuj ree.

<sup>22</sup> Gol been yudar bën sta yu' nawëëg ree luxdoo.<sup>23</sup> Gol been yudar bën zë ree loj nejzmal, zi'c rüjn tijb bën rüjn yudar bën cayajb loj bajl, gol guyën reeman por ad chu'ladxidi zi'c rüjn reeman, gol gojpcudad chitëë yabidi loj xtol reeman.

### Diidx bigra ca ree loj gui'ch guie

<sup>24</sup> Yu' tijbzi Dios ca' guialrniabee par guiniaman lëjt, chitëë yabidi loj dol, din chu' luxdoodi zagdxe sin dol chi guidxindi xanyabaa lod za'man.<sup>25</sup> Laaman naj tijbzi Dios bën babëë dunuj ree loj dol por dux Dad ree Jesucrist, rayalaman respejt din gra naj xieenman, tijbzi laaman ca' guialrniabee con guialguxtis diizd gocli, yan con gra tiampczi. Amén.



## Ni balüü Jesucrist loj San Juan

**1** Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xi-anjlanan din gulüüman ni guin ree lon, naj Waj xbejn Jesucrist, bën cayiijn laaman sirv. <sup>2</sup> Abi' canin ni diidxli xcwent xtiidx Dios, xcwent Jesucrist në xcwent gra ree ni baguian.

<sup>3</sup> Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

### Rxhiaal San Juan gui'ch loj guigajdx ree yadoo

<sup>4</sup> Naj Waj cucan gui'ch guie par lëjt najdi xbejn Cristo, lëjt bën naban ree loj guigajdx ree xguiedx Asia. Dux Dad ree Dios, bën gui't bën naj Dios diidz goci në yan, në guigajdx ree sprijt za' lod canabeeman, në Jesucrist, laa reeman giüinle' lëjt yabe'cdxe tää reeman luxdoodi. <sup>5</sup> Jesucrist been gra ni naj giüinman, laa tääman goc bën yaloj baban loj ree bengüt abi' laaman rniabee gra ree bën rniabee loj guidxliuj. Laaman rën dunuj ree abi' con xrejman basiaman dux tol ree <sup>6</sup> abi' beenman dunuj ree zi'c bën rniabee, been tääman dunuj ree bixhioz rüjn sirv xDadaman Dios. Zeel Jesucrist rayalaman respejt në gualrniabee zianci. Amén.

<sup>7</sup> iGol gogbee gual gui'taman loj zaj! Gra ree bejn guguiaa laaman xt ree bën ni guliiz lans cwëllënman, abi' gra ree bēnguidxliuj goon da't chi guguiaa reeman laaman. Laan naj diidxli. Zian gac.

<sup>8</sup> Dux Dad ree Dios bën rajp gra gualrniabee. Laaman gui't, laaman naj Dios diidz guia'xchej, në yan, laaman rēb por laagajcaman: “Naj naj zi'c lejtr A con Z,

lejtr ni rzuloj në ni rlioxnē alfabeto, naj ca' gra gualrniabee.”

### Baguiaa San Juan xgualrniabee Cristo

<sup>9</sup> Naj Waj tijb ree lasa'di bën rliidx Jesucrist. Tijbzi nadxu' ree loj xgualrniabeeman, tijbzi cayzaagdiaj ree abi' caydaan ree por laaman. Naj guyu'n ladxguiib loj yuj riga' loj nijsdoo lod la Patmos gual rtiexan xtiidx Dios në gra ree ni ragbeen xcwent Jesucrist. <sup>10</sup> Chi yu'n ladxguiib loj yuj riga' loj nijsdoo guin, guyu tijb dumingw chi guza'can zi'c bën rnie'xhchaal por xgualrniabee xSprijt Dios, abi' xichan biguejnan zi'c cha' trompejt abi' biguien rejs da't cha' tijb <sup>11</sup> bën ni rēb:

—Naj naj zi'c lejtr A con Z, lejtr ni rzuloj në ni rlioxnē alfabeto, din tijbzi naj naj bën rniabee. Bacaa loj gui'ch gra ni cuguiaal dxel guixhiaalil gui'ch guin loj guigajdx cwaa ree da bejnan bën zojb ree niz Asia, luguiedx Éfeso, Esmirna, Pérgamo, Tiatira, Sardis, Filadelfia në Laodicea.

<sup>12</sup> Dxel chi badxi' lon par guguian chunin rnieenē naj dxel baguian gajdx ree candeler or. <sup>13</sup> Abi' galay ree candeler guin baguian tijb ni naj zi'c tijb bejn, najcwaman tijb lajd yool xt guia'man, abi' naxii tijb cinch or luxdooan. <sup>14</sup> Naquichbēj guiycaman zi'c naj guidxlad xiil, zi'c naj guiajnayaag naquich naj guidxguiycaman abi' zi'c bajl re'criani guiaalojman. <sup>15</sup> Abi' guia'man rdiinan bacha' zi'c guiib ni la bronze chi yu'n loj gui, abi' cha'man naj rejs zi'c rüjn nijs naquie' chi rguiajtan. <sup>16</sup> Guiáad yaaman ladbee ca'man gajdx bajl xanyabaa. Abi' ro'man ririi tijb Espad ni nadoxh da't grop lad, guiáad lojman rulaa bacha' zi'c chi rusni gubijdx gojl da't.

<sup>17</sup>Dxel chi baguian laaman biajban guia'man zi'c bengiüt. Per laaman guxhoob yaa ladbeeman guican, naman:

—Ad rdxe bil, naj naj bén rniabee diizd guia'xchej abi' par tiblayaa. <sup>18</sup>Ma güjtan, per yan ma babanan, abi' ma nabanantiblayaa, abi' naj rniabee guialgüijt në gabijl. <sup>19</sup>Yan bacaa ni ma baguiaal në ni cuguaal në ni qui gacri. <sup>20</sup>Ni në rën guieb guigajdx ree bajl xanyabaa ni baguiaal yan ladbee, në guigajdx ree candeler or. Guigajdx ree bajl xanyabaa guin rën guieban gajdx ree bén rniabee guigajdx cwaa ree da bejnan niz Asia, abi' guigajdx candeler or guin rën guieban guigajdx cwaa ree da bejnan.

### Diidx par ree bén Éfeso

**2** Yan bacaa ni guixhiaalil loj bén rniabee ree da bejnan luguiedx Éfeso. Bacaa: “Bén ni ziza galay ree candeler or, bén ni ca' gajdx ree bajl xanyabaa con yaa ladbeeman, laaman na lojdi: <sup>2</sup>Naj ragbee xhie cayüjndi. Naj ragbee xhie tarbajw cadëdidi, ragbee tëen guial ad ralenya'tidi. Naj ragbee guial ad rdaantidi bén mal ree, abi' ma beendi prueb bén na ree naj xi apóstoles Jesucrist majsi achut naj reeman abi' ma gogbeedi guial ganax diidx rusquiee miee reeman. <sup>3</sup>Naj ragbee guial rajpidi pacens abi' ma guzagdiajdi guial rëndi naj sin guial yalenyadi. <sup>4</sup>Per yu' ni ad ruladxtan rüjndi: guial ad rëntridi naj zi'c guia'xchej. <sup>5</sup>Gol basaaladx xhienaag guyëndi naj guia'xchej guial zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gaxhalan casti par lëjt abi' ad zajctridi biani par los demazri ree bejn, bal id zayüjndi xgab. <sup>6</sup>Per yu' ni cayüjndi zi'c rayal, guial rdxe'chidi ni rüjn ree ben nicolaítas, zi'cgajc rdxe'chan por ni rüjn reeman. <sup>7</sup>Bén rën ree gucaagdiajg, gol bacaagdiajg ni miee xSprijt Dios par ree

da bejnan: Bén ni güün gan loj dol, naj gudë ni gawaman ni rtia loj yag ni runee guialnaban ni zojb xanyabaa lod zojb Dios.”

### Diidx par ree bén Esmirna

<sup>8</sup>Yan bacaa ni guixhiaalil loj bén ni rniabee ree da bejnan luguiedx Esmirna. Bacaa: “Bén rniabee diizd guia'xchej në par tiblayaa, bén ni güit abi' babanman stijb, laaman na lojdi: <sup>9</sup>Naj ragbee xhienaag cadëdidi tarbajw por ni rüjn bejn lëjt, ragbee tëen loj guialprob ni nabanandi majsi diidxli najdi benrijcw guial ma zinalidi xtiidx Dios, abi' ragbeen xhienaag rnieeguidx bejn lëjt, bén ni na ree naj reeman bén Israel xbejn Dios majsi laa reeman naj xbejn xinxab. <sup>10</sup>Ad rdxebtidi guialzi ni tëdidi din xinxab güünx gan din cu' ree bejn tio'p choondi ladxguiib par guiguien guial diidxli zinalidi xnejz Dios. Chii dxej tëdidi guialzi guin ree, per gol guzujdx'i'ch xt dxej guiëtidi, abi' naj yazaladx lëjt guialnaban tiblayaa. <sup>11</sup>Bén rën ree gucaagdiajg gol bacaagdiajg ni na xSprijt Dios par ree da bejnan: Bén güün gan loj dol, achetri güün guialgüijt ni rarojp laaman.”

### Diidx par ree bén Pérgamo

<sup>12</sup>Yan bacaa ni guixhiaalil loj bén rniabee ree da bejnan luguiedx Pérgamo. Bacaa: “Bén ca' espad ni nadohx grop lad ro', laaman na lojdi: <sup>13</sup>Naj ragbee guial luguiedx zojbidi xinxab rniabee ni. Per majsi zian lëjt za'dxi'chidi con naj ad ruwëëzt rililadxidi naj ni'qui lën ree dxej ni bagüjt reeman Antipas, tijb ree xcompniaridi bén ad bacwëëzt bililadx naj, bén bagüjt reeman ladxidi lod rniabee xinxab. <sup>14</sup>Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bén ad rusa'nt ni basiid Balaam bejn ree, bén rëb loj Balac xhienaag guzaalguiiwaman bén Israel ree din gaw reeman guialraw ni ma

gurej loj ree xdios Balac guin, në par been reeman graloj ree nidxuudx con ree bén ad najt lacheel reeman. <sup>15</sup> Stijb ni ad ruladxtan naj guial lojdi no'ch ree bén ad rucwëëzt rüjn zi'c rüjn ree bén nicolaítas. <sup>16</sup> Zeel gol bayüjn xgab por ni rüjndi, bal id züjndi zian nayob gaxhalan casti din günan guialguxtis con laa reeman con espad ni ririi ro'n. <sup>17</sup> Bén rën ree gucaagdiajg, gol bacaagdiajg ni na xSprijt Dios par ree da bejnan: Bén rüjn gan loj dol, naj gudë mana gawaman, guialraw xanyabaa ni ad nünbeet ree bejn. Gudë tëën tijb guiaj naquichdoo lod ca laj cübaman ni achutczí ragbee, tijbzi bén tia' guiaj guin gagbee.”

### Diidx par ree bén Tiatira

<sup>18</sup> Yan bacaa ni guixhiaalil loj bén rniabee ree da bejnan luguiedx Tiatira. Bacaa: “Xi'n Dios, bén re'criani guiaaloz zi'c bajl, bén rdiin bacha' guia' zi'c guuib ni la bronze, laaman na lojdi: <sup>19</sup> Naj ragbee ni cayüjndi, ragbeen xhienaag rëndi naj, xhienaag riladxidi naj, xhie cayüjndi por naj abi' ad ralenya'tidi. Naj ragbee guial mazri zagdx cayüjndi yan guial loj guia'xchej, <sup>20</sup> Per yu' ni ad ruladxtan cayüjndi: Rdaandi Jezabel, bén-gunaa ni na rudëëd xtiidx Dios. Abi' rtiëjbidi rulüüman da bejn reen dxel ruzaalguiiwaman laa reeman rüjn reeman ni dxuudx ree con ree bén ad najt lacheel reeman, abi' raw reeman guialraw ni ma gurej loj ree xdios ree bén-guidxliuj. <sup>21</sup> Ma badën tiamp din yayüjnman xgab, din gusa'n xguialdxuudxaman, per ad rëntaman. <sup>22</sup> Zeel yan gaxhalan guialguijdx par laaman, gaaman gagxuuman. Abi' bén rüjn ree zi'c rüjnman, bal id reeman guchaa mod ni naban reeman ziangajc zro' naj guialzi ni téd reeman, <sup>23</sup> gugüjtan gra ree bén ma been xgab guiban zi'c naban béngunaa guin. Zian gagbee ree da bejnan guial naj ragbee xhie yu' guijc bejn xhie tëë

yu' luxdoooman, xhie xgab rüjnman. Naj gune lëjt ni rayalidi bal gonin rüjndi. <sup>24</sup> Par gra ree da bejnan bén zojb ree luguiedx Tiatira, lëjt bén ad zinalt ree zi'c rusiid Jezabel guin bejn ree, lëjt guial na reeman ad ragbeetidi xt ni bigra xcwent xindxab guial ad ridxga'tidi laa reeman, achetri ni ganin lojdi, <sup>25</sup> tijbzi ni rmin lojdi: Gol guzujdx'i'ch loj ni ma ragbeedi xt chi guialan stijb. <sup>26</sup> Bén güün gan loj dol, abi' gusunuu güünman zi'c rënan guidib tiamp ni guibanman, naj gudë guialrniabee lojman din nabeeman loj ree nacion. <sup>27</sup> Nabeeman loj ree nacion guin zi'c tijb bén ni ca' tijb var guuib, zi'czi rlia' bejn tijb guiajs zian güünnëman bén ni ad rënt ree guzoob diidx. Gudën guialrniabee guin lojman zi'c banee da Dadanan lon, <sup>28</sup> gudë tëën lojman bajl xanyabaa ni rliejn rsildoo. <sup>29</sup> Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

### Diidx par ree bén Sardis

**3** Yan bacaa ni guixhiaalil loj bén rniabee ree da bejnan luguiedx Sardis. Bacaa: “Bén naban con guigajdx ree xSprijt Dios abi' ca'man gajdx bajl xanyabaa, laaman na lojdi: Naj ragbee gra ni cayüjndi ragbee tëën guial ma güjtidi, majsi par ree bejn nabandi. <sup>2</sup> Zeel gol batie'ch xbacaalidi, gol been naguiejn chitëë nit ni sta cayüjndi, din naj ruguian guial ad cayüjntidi xnejz delant loj da Dadan Dios. <sup>3</sup> Gol basaaladx ni ma biguiejndi në ni ma basiididi, abi' gol been zian, gol bayüjn xgab zi'c ni cayüjndi. Din bal id zatie'ch xbacaalidi zi'c cayüjndi, dxel zi'c ri't tijb bëngubaan ziangajc chi gagbeedi ma bi't casti par lëjt. <sup>4</sup> Per luguiedx Sardis, yu' tio'p choon ree bejn sta naya, laa reeman naj bén gacw lajd naquich abi' sa reeman con naj, din rayal reeman laan. <sup>5</sup> Bén güün gan loj dol, chi guidxin hor, zian gacwaman lajd naquich abi' ad zuse'n

tëetan lajman loj xlibr guialnaban. Abi' delant loj Dios në loj ree anjl guien guial laaman naj da bejnan. <sup>6</sup> Bén rën ree gucaagdiajg, gol bacaadiajg ni rëb xSprijt Dios par ree da bejnan.”

### Diidx par ree bén Filadelfia

<sup>7</sup> Yan bacaa ni guixhiaalil loj bén rniabee ree da bejnan luguiedx Filadelfia. Bacaa: “Bén naya nali, bén naj diidxli, bén rajp guialrniabee loj gra zi'c gojp rey Davi guialrniabee, tijbzi laaman rajp guialrniabee par guixhialaman tijb nejz ni achut zajc gusiaaw o gusiaawaman tijb nejz ni achut zajc guixhial, laaman na lojdi: <sup>8</sup> Naj ragbee gra ni cayüjndi. Gol gogbee guial majsi ad rajptidi guialrniabee, per naj ma guxhal tijb nejz din guitie'chidi da diidxan sin guial chu gutëë lojdi, din zinalquidi da diidxan abi' ad goct rëbidi guial ad najtidi da bejnan. <sup>9</sup> Lëjt guguaa ni günan con ree xbejn xinxab bén rëb ree naj reeman bén Israel xbejn Dios, abi' rusquieezi reeman. Guguaadi ni günan laa reeman, guidgazuxib reeman lojdi, gagbee tëë reeman xhienaag rënan lëjt. <sup>10</sup> Abi' zi'c ma bazoobidi diidx gapidi pacens guial chinalidi da diidxan, ziangajc ganan lëjt chi guidxin dxej gui't guialzi loj guidib guidxliuj, zi'c tijb prueb par gra ree bén-guidxliuj. <sup>11</sup> Nayob guialan loj guidxliuj stijb. Gol guzujdxi'ch loj ni ma ragbeedi chitëë tia' ben ren ni rayalidi. <sup>12</sup> Bén güün gan loj dol, naj gudë lojman tijb luar zojbloj lën yadoo zojb xanyabaa lod naban da Dadan Dios, ni guibanman tiblayaa. Dxel tiblajtaman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zojbaman. <sup>13</sup> Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

### Diidx par ree bén Laodicea

<sup>14</sup> Yan bacaa ni guixhiaalil loj bén rniabee ree da bejnan luguiedx Laodicea. Bacaa: “Bén ni rüjn cumplid xtiidx, bén ni been gra ni rayal güünman, bén naj diidxli, bén rniabeenë Dios diidx goci chi gad guidxliuj gacchaaw, laaman na lojdi: <sup>15</sup> Naj ragbee gra ni cayüjndi. Ad najtidi zi'c nijs nayaag o zi'c nijs laa. jBalzianclaa tiblayaa niajquidi zi'c nijs nayaag o zi'c nijs laa! <sup>16</sup> Per lëjt najdi zi'c nijs nayool, ni'qui nadxa' ni'quidza nayaagt, dxel zi'c laa rabëë gajc ro' bejn nijs nayool guin, zian ma rënan gabëladxan lëjt. <sup>17</sup> Lëjt rëb guial najdi benrijcw, rajpidi gra abi' achet ryaadxidi. Per ad ragbeetidi guial achet rajpidi, najdi bénprob, bén zibëël, achet sirv lëjt, najdi bénlutia'p niz lon guial ad nabantidi xnejz. <sup>18</sup> Zeel rnin lojdi, zi'c rzii bejn ganax or, zian gol been naguiejn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayüjn xgab din guiguie'ch xguialx-tudi abi' guiguiendi naya delant lon. Në chi rzii bejn tijb rumed par guiaaloz bejn din guguaaman zagdxë, zian gol been naguiejn din gapidi da guial rignia'n din guguaadi zagdxë. <sup>19</sup> Rdilnë'n abi' ruzuxnejzan gra ree bén rënan. Zeel gol bagu' luxdoodi gol bayüjn tëë xgab xhienaag nabandi. <sup>20</sup> Gol gogbee guial naj cabedx lëjt, zi'c chi rniece tijb bejn rulidx stijb bejn. Cabëësan chu guidxga' naj, zi'c chi rgu' bejn stijb bejn din gaw reeman tijbzi. Abi' bén guidxga' naj ma nabannë'n laaman abi' laaman nabannë-man naj. <sup>21</sup> Bén güün gan loj dol naj gudë cwë'n cweman lod canabeen, zi'cgajc naj chi gulox benan gan loj dol, gure cwë' da Dadan Dios lod canabeeman. <sup>22</sup> Bén rën ree gucaagdiajg, gol bacaagdiajg ni na xSprijt Dios par ree da bejnan.”

**Rlies reeman xvalor Dios xanyabaa**

**4** Chi gulox bacan diidx guie ree, baguian niz ladia dxel baguian tijb port naxal xanyabaa. Abi' Bén guneenë gajc naj diisd guia'xchej Bén naj cha' zi'c trompejt, laaman na lon:

—Wë'p guie din gulün lüj ni gac ree chi ma gojc ree ni rnin lojl.

<sup>2</sup>Loj hor zii gajc por xgualrniabee xSprijt Dios, chi gogbeen ma za'n xanyabaa yagaj baguian tijb yagxhil zagdxé zi'c xi yagxhil tijb rey, lojn zojb tijb bejn. <sup>3</sup>Abi' Bén zojb loj yagxhil guin rulaaman bacha' zi'c ree guiaj zagdxé ni lasajc wayëjx, ni la jaspe në cornalina. Abi' guijc yagxhil guin ca tijb guidgij ni rulaa bacha' zi'c guiaj zagdxé ni la esmeralda. <sup>4</sup>Abi' gadëd ro' yagxhil guin baguian zagajlbitap ree yagxhil zagdxé abi' loj ree yagxhil guin zojb ree gajlbitap ree bengol najcw reeman lajd naquich yu' coron or guijc reeman. <sup>5</sup>Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios. <sup>6</sup>Baguia tëen delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaaloj reeb. <sup>7</sup>Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj. <sup>8</sup>Tijb gaj ree be guin yu' xho'p xhiil reeb, abi' xijch xhiil reeb në lën xhiil reeb yu' zien da't guiaaloj reeb. Abi' dxej guiaal ad rucwëëzt rëb reeb:

Naya nalil, naya nalil naya nalil najl dux

Dadan Dios,

lüj guial ca'l gra guialrniabee,

lüj guial najl Dios diisd guia'xchej në yan abi' gui'til.

<sup>9</sup>Beegaj chi rlies ree be guin xvalor Bén ni zojb loj yagxhil guin, Bén naban tiblyaa, beegaj ruza't reeb laaman zagdxé rudëëd reeb quixtëë lojman, <sup>10</sup>guigajlbitap ree bengol zojb yagaj, bazuxib reeman lojman, Bén ni zojb loj yagxhil abi' nabanman tiblyaa, abi' ruzuxib reeman lojman rudxiib xcoron reeman niz lojman, rëbgaj reeman:

<sup>11</sup>Dux Dad ree Dios, lüj rayal guiya'p respejt,

diidxza'c në guialrniabee.

Din lüj beenchaaw gra ni yu'

abi' lüj rëb guial chu' gra ni yu',

abi' yu' reen.

**Tijb gui'ch ni nadüüb con Bén naj zi'c xi xiil Dios**

**5** Dxel baguian guial Bén zojb loj yagxhil zagdxé ni naj zi'c xyagxhil tijb rey, ca'man tijb gui'ch yaaman ladbee. Gui'ch guin zi'c lojn zi'c xijchan ca lejtr abi' nadiüüban, abi' naguiidan con gajdx se chitëë chu guixhial laan. <sup>2</sup>Loj hor guin baguian tijb anjl Bén gojl da't, rbidxa'man rejs rëbaman:

—¿Chu rayal chiquied ree se guie abi' guixhial loj gui'ch guie?

<sup>3</sup>Per ni'qui xanyabaa, ni'qui loj guidxliuj, ni'qui lën liuj ad bidxejlt Bén ni rayal guixhial gui'ch guin, ni'qui par guguaaman ni ca loj gui'ch guin. <sup>4</sup>Abi' naj dád binan chi baguian guial achut rdxejl guixhial loj gui'ch guin në par guguaaman ni ca loj gui'ch guin. <sup>5</sup>Dxel na tijb ree bengol guin lon:

—Ad roonl, baguiaa nial ma yu' tijb Bén ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman Bén naj zi'c tijb beedx loj xdiaa Judá por guialrniabee ni rajpaman, laaman za loj xdiaa rey Davi.

<sup>6</sup>Abi' chi baguian, dxel baguian guial galay lod za' yagxhil zagdx ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb bén naj zi'c xi xiil Dios rguien xsen lod bidxeelguijdxaman chi gütaman. Abi' yu' gajdx xcajchaman con gajdx guiaalojman, guigajdx guiaalojman naj guigajdx xSprijt Dios bén rxhiaalamaj guidib guidxliuj. <sup>7</sup>Bibig bén naj zi'c xiil guin cwa'man gui'ch guin ladxaa bén zojb loj yagxhil guin. <sup>8</sup>Chi cwa'man gui'ch guin, guidap ree be za' gajxh cwë' yagxhil guin në gra guigajl-bitap ree bengol guin bazuxib reeman lojman. Tijb gaj ree bengol guin ca' reeman tijb gaj arp ca' tēē reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios. <sup>9</sup>Bengol guin ree rool reeman tijb cant cüb ni rēb:

Lij rayal tia' gui'ch guin  
abi' guixhialil se ni naguiidnēn.  
Din lūj gūjtil  
abi' con xrejnl ni guxie'l gudijxil  
por graloj bejn din gac reeman xbejn Dios,  
achet güünan xhietēēz diidx rniece reeman,  
o xhie loj diaa, o xhie guiedx o xhie nacion zēēd reeman.

<sup>10</sup>Beenl laa reeman rey  
been tēēl laa reeman bixhioz par dux

Dad ree Dios,  
abi' laa reeman nabee loj guidxliuj.

<sup>11</sup>Baguia tēēn biguiejn tēēn cha' zien ree anjl gadēd ro' yagxhil zagdx guin con guidap ree be guin në ree bengol guin. Abi' bēnguixiujczi naj reeman por mil naj reeman. <sup>12</sup>Abi' dād rejs rniece reeman rēb reeman:

Bén naj zi'c xi xiil Dios, bén güt,  
laaman rayal tia' guialrniabee,  
laaman rayal gap guialnaza'c,  
quiarguiejn, në gojl,

respejt, guza't reeman laaman zagdx, guilies tēē reeman xvaloraman.

<sup>13</sup>Dxel biguiejnan cha' gra ree ni been Dios, zi'c ni yu' ree xanyabaa, loj guidxliuj në ni yu' ree lēn liuj në ree ni yu' loj nijsdoo, rēb reen:

Bén zojb loj xyagxhil guialrniabee në bén naj zi'c xi xiilaman,  
par laa reeman naj  
respejt, diidxza'c, guialrniabee,  
abi' guilies reeman xvalor reeman zianczi në par tiblyaa.

<sup>14</sup>Chi gulox rēb reen zian, dxel guidap ree be za' yagaj rēb reeb:

—Amén.

Abi' guigajlbitap ree bengol za' yagaj bazuxib par gap reeman laaman respejt, bén ni naban zianczi në par tiblyaa.

### Guigajdx ree se

**6** Dxel baguian biquied bén naj zi'c xi xiil Dios se yaloj guin, abi' zi'c chi rbidxa' guziaaw zian biguiejnan gunee tijb ree be guin, rēbib:

—;Guda!

<sup>2</sup>Dxel baguian gulentie tijb way naquich, abi' bén dxiib laab ca'man tijb xi arcw flejch. Abi' cwa'man tijb coron guial ma beenman gan, dxel briiman persi ziguieenman gan mazri.

<sup>3</sup>Chi biquied bén naj zi'c xi xiil Dios se barojp guin biguiejnan rēb be barojp guin:

—;Guda!

<sup>4</sup>Dxel gulentie tijb way xnia, abi' bén dxiib laab ca'man tijb espad narooob në guialrniabee par gustijlaman bejn ree loj guidxliuj din gugūjt lasa' reeman.

<sup>5</sup>Chi biquied bén naj zi'c xi xiil Dios se bayon, biguiejnan rēb be bayon guin:

—;Guda!

Dxel baguian gulentie tijb way ya's, abi' bén dxiib laab ca'man tijb xijglibr. <sup>6</sup>Abi' galay guidap ree be guin biguiejnan cha' tijb bén rēb:

—Tib quil trigo lasajcan tib dxej dxiin abi' choon quil cebada lasajcan tibdxej dxiin, per ache güünl sejt në vin.

<sup>7</sup>Chi biquied bén naj zi'c xi xiil Dios se badajp guin, biguiejnan rëb be badajp guin:

—¡Guda!

<sup>8</sup>Dxel baguian gulentie tijb way naguiëch, abi' bén dxiib laab laman guialgüjt, abi' zinal gabijl laaman. Cwa' reeman guialrniabee par gugüjt reeman tib part loj tajp lala' ree bénguidxliuj. Yu' reeman guiët por wadjl, o por guialrliaan, o por guialguijdx, o por ree be doxh yu' loj guidxliuj.

<sup>9</sup>Chi biquied bén naj zi'c xi xiil Dios se bagaay guin, baguian xan altar za' ree xsprijt ree bén bagüjt reeman guial bililadx reeman guzujdxi'ch tée reeman loj xtiidx Dios. <sup>10</sup>Abi' rbidxa' reeman rejs rëb reeman:

—Dios, Dad bén rniabee, lüj naj bén naya nali abi' rüjn zi'c rayal, ¿za plact gaglaal par güün xguialguxtil con ree bén ni bagüjt dunujn loj guidxliuj din yaguijx reeman ni been reeman?

<sup>11</sup>Dxel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c güit reeman, bén ni cayüjn gajc ree sirv Dios.

<sup>12</sup>Chi baguian biquied bén naj zi'c xi xiil Dios se baxo'p guin, dxel guxu rejs da'tt abi' gubijdx gojcan nagas zi'c tijb lajd ya's. Guiáad bëw gojcan naxnia zi'c rejn, <sup>13</sup>abi' ree bajl xanyabaa biajb reen loj guidxliuj zi'c ryajb ree higo ni ya' loj yag higo chi rbi' bidoxh. <sup>14</sup>Dxel gunidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen. <sup>15</sup>Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c bén nado', në ree bén ad najt zi'c bén

nado', gra reeman baquie'chloj lën guiaj-biliaa në lën ree yalaj. <sup>16</sup>Abi' rëb reeman loj ree guia' në loj ree yalaj:

—Gol biajb du gujcan, gol baquie'ch tée dunujn loj bén zojb loj xyagxhil guialrniabee në loj xcasti bén naj zi'c xi xiil Dios, <sup>17</sup>din ma bidxin dxej doxh ni gudëed reeman casti, abi', ¿chu zajc taan casti guin?

### Tibgayuu tiuubitap mil ree bén Israel

**7** Chi gulox baguian ni guin ree, baguian tajp ree anjl za' reeman guidap xquin guidxliuj par gucwëz reeman bi ni zëed guidap xquin, chitëe guibi' bi loj guidxliuj, ni'qui loj nijsdoo, ni'qui ree loj yag. <sup>2</sup>Dxel baguian stijb anjl zëedaman niz lod rliejn gubijdx, ca'man xse Dios naban. Abi' dád rejs guneenëman guidap ree anjl guin, bén ni ca' ree guialrniabee par güün reeman ni güün reeman con guidxliuj në con nijsdoo, <sup>3</sup>rëbaman loj reeman:

—Ad xhie güüнди guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

<sup>4</sup>Dxel biguiejnan bël reeman cwa se guin lucwaj. Por gra ree bén Israel, tibgayuutiubitap mil reeman cwa se guin lucwaj. <sup>5</sup>Din chiptio'p mil ree bén zëed loj xdiaa Judá cwa se guin, në chiptio'p mil ree bén zëed loj xdiaa Rubén në chiptio'p mil ree bén zëed loj xdiaa Gad. <sup>6</sup>Në chiptio'p mil ree bén zëed loj xdiaa Aser, në chiptio'p mil ree bén zëed loj xdiaa Neftalí, në chiptio'p mil ree bén zëed loj xdiaa Manasés, <sup>7</sup>con chiptio'p mil ree bén zëed loj xdiaa Simeón, chiptio'p mil ree bén zëed loj xdiaa Leví, në chiptio'p mil ree bén zëed loj xdiaa Isacar, <sup>8</sup>chiptio'p mil ree bén zëed loj xdiaa Zabulón, chiptio'p mil ree bén zëed loj xdiaa José, chiptio'p mil ree bén zëed loj xdiaa Benjamín cwa se guin lucwaj reeman.

**bénguixiuj najcw lajd naquich**

<sup>9</sup>Dxel baguian bénguixiuj ree, per bénguixiuj ree ni'qui chut zajc gulab laa reeman, bén ni za ree gadxagayaa guiedx, gadxagayaa diaa, bén rniee ree gadxagayaa diidx bén za ree gra lad në gadxagayaa nacion. Za' reeman delant loj xyagxhil bénrniabee në delant loj bén naj zi'c xi xiilaman. Najcw reeman lajd naquich ca' tëë reeman zijn. <sup>10</sup>Abi' rëb reeman rejs da't:

Dunujn raya'pan perdon por dux Dadan  
Dios

bén zojb loj xyagxhil gualrniabee  
në por bén naj zi'c xi xiilaman.

<sup>11</sup>Abi' gadëd ro' yagxhil guin con guidap ree be ni za' yagaj con guigajlbitap ree bengol, gadëd yagaj za' gra ree anjl abi' bazuxib reeman delant loj xyagxhil Dios xt basajb guiyc reeman liuj par gap ree-man laaman respejt, <sup>12</sup>rëb reeman:

¡Amén! gualrniabee, gojl,  
gualrajc, respejt, diidxza'c,  
gualrlies xvaloraman në quixtëë,  
naj reen par dux Dad ree Dios zianczi në  
par tiblayaa. Amén.

<sup>13</sup>Loj hor zii tijb ree bengol guin gun-abdiidx lon:

—¿Chu ree bén ni najcw lajd naquich  
guin, ban tëë ree bénan?

<sup>14</sup>Badxi'nan rën:

—Ad ragbeetan Dad, lüj ragbee.

Dxel naman lon:

—Laa reeman naj bén guzagdiaj da't  
abi' naquich xab reeman guial ma naya  
reeman ma biquied xtol reeman con  
xrejn bén naj zi'c xi xiil Dios. <sup>15</sup>Zeel za'  
reeman delant xi yagxhil Dios, abi' dxej  
guiaal cayüjn reeman sirv lod zojbaman.  
Abi' bén zojb loj yagxhil guin ma za'man  
con laa reeman, abi' laaman gap laa ree-  
man. <sup>16</sup>Ad yu'tri dxej guiliaan reeman,  
ad ze'c tëët reeman nijs, ad zudxüü tëët  
gubijdx laa reeman, ad zagnalaa tëët ree-  
man. <sup>17</sup>Din bén naj zi'c xi xiil Dios bén

za' galay lod za' xi yagxhil Dios, laaman  
gap laa reeman zi'c tijb bén rajp ree xiil  
abi' chinëman laa reeman lod rajch nijs  
ni runee guialnaban. Dxel Dios laaman  
gutiaa loj reeman gra ree nijs brii loj ree-  
man chi biin reeman.

**Guigajdx se**

**8** Chi biquied bén naj zi'c xi xiil Dios  
se ni goc gajdx guin, bayajcdxe  
xanyabaa cost garol hor. <sup>2</sup>Dxel baguian  
gajdx ree anjl za' reeman delant loj  
Dios, cwa' reeman gajdx trompejt. <sup>3</sup>Dxel  
bi't stijb anjl con tijb chaabacwi ni or,  
guzuliman delant lo altar guin abi' yu'  
bén badëëd zien yaal din cu'man goxyaal  
guin loj altar or ni za' delant loj yagx-  
hil zagdx ni naj zi'c xyagxhil tijb rey,  
din tijbzi chë'pnë goxyaal guin xtiidx gra  
ree xbejn Dios, diidx ni rniee reeman chi  
rbejdx rniab reeman laaman. <sup>4</sup>Dxel diidx  
ladxaa anjl guin brii goxyaal guin con  
ree xtiidx ree xbejn Dios, diidx ni rniee  
reeman chi cabejdx canab reeman laa-  
man, abi' wë'p reen niz loj Dios. <sup>5</sup>Dxel  
bacha anjl guin chaabacwi guin guij ni  
yu' loj altar guin abi' bazurlojman laan  
loj guidxliuj. Abi' dád rejs guridxa' guzi-  
aaw, gojc naquie', wë'p nijs, abi' bi't  
xudoxh.

**Trompejt ree**

<sup>6</sup>Dxel guigajdx ree anjl ni ca' ree  
trompejt guin, guzujchaaw reeman par  
gucwejdx reeman laan.

<sup>7</sup>Chi bacwejdx anjl yaloy guin  
trompejt ni ca'man, biajb guiajyabaa loj  
guidxliuj no'chan bajl në rejn. Dxel cost  
gurol guidxliuj we'c con ree yag në ree  
gui'xh naga' yu' lojn.

<sup>8</sup>Chi bacwejdx anjl barojp guin  
trompejt ni ca'man, dxel zi'c naj guia'ro'  
ni cacaguij naj ni biajb loj nijsdoo, abi'  
cost garol nijsdoo bayajcan rejn loj hor  
guin. <sup>9</sup>Abi' cost garol ree be ni naban



loj nijsdoo güjt reeb abi' cost garol ree barcw ni yu' loj nijsdoo gunidloj.

<sup>10</sup>Chi bacwejdx anjl bayon guin trompejt ni ca'man, dxel biajb bajl xanyabaa ni narooob ni cacaguij zi'c chi rtiaguij guied, loj cost garol guiiw ni yu' në cost garol ree lod rajch nijs biajban.

<sup>11</sup>Bajl xanyabaa ni biajb lan Ajenjo, abi' cost garol nijs guin ree gojc nala abi' dád zien ree bejn güjt guial bayajc ree nijs guin nala.

<sup>12</sup>Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bëew në cost garol ree bajl xanyabaa bicajy. Abi' guial bicajy reen, dxel cost garol dxej në guiaal ad basnit.

<sup>13</sup>La'tgaj cuguian ni guin ree, biguiejnan zi'c chi rzuj tijb bisia xanyabaa. Dxel biguiejnan cha' tijb anjl rbixdiajman rëbaman:

—¡Prob, per prob, per probza ree bën ni yu' loj guidxliuj por zachoon trompejt ni ryaadx gucwejdx za choon ree anjl!

**9** Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guilibliaw par guixhialan ro' bizë ni ad yu't lod rliox. <sup>2</sup>Chi guxhialan ro' bizë guin tijb go'xh yo'xhchab brii lën bizëë guin zi'c chi ririi go'xh lën tijb horn narooob, xt bascajy go'xh guin gubijdx në bi. <sup>3</sup>Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb guialrniabee par gac reeb bedoxh zi'c-gajc nixüb. <sup>4</sup>Per gunabee reeman laa reeb chitëë xhie güün reeb guixya' ree, ni'qui ree yag, ni'qui ree gui'xh naga'. Naabzi ree bën ni ad yu't ree xse Dios lucwaj. <sup>5</sup>Per ad par gugüjtt reeb bejn, naabzi par sagdiaj reeman gaay bëew. Abi' lod rudidxa' reeb riyajnan zi'c ryajn lod rudidxa' nixüb. <sup>6</sup>Lën ree dxejzii quuil ree bejn guialgüjt, per ad zadxejlt ree-

man laan. Guiën reeman guiët reeman per ad zëjtt reeman.

<sup>7</sup>Bi'tsu guin ree naj reeb zi'c naj ree way ni ma za' par che reeb loj wadijl, guijc reeb yu' zi'c coron or, abi' loj reeb naj zi'c loj bejn. <sup>8</sup>Abi' guidxguijc reeb naj zi'c guidxguijc béngunaa, guiáad dxidlay reeb naj zi'c dxidlay beedx. <sup>9</sup>Guidib luxdoo reeb nada'cwan zi'c guuib, abi' xhiil reeb rijnan naquie' zi'c rajc naquie' chi ruxüünnë ree way carejt loj wadijl. <sup>10</sup>Abi' xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëew. <sup>11</sup>Anjl ni rniabee bizë ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëb reen bën ruloox.

<sup>12</sup>Zian rliox guialzi yaloj, dxel gui't zatio'p guialzi.

<sup>13</sup>Chi bacwejdx anjl baxo'p trompejt ni ca'man, dxel biguiejnan tijb cha' bejn briin galay ree cajch ni za' guidap xquin altar or ni za' delant loj Dios. <sup>14</sup>Cha' bën biguiejnan rëbaman loj anjl baxo'p bën ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

<sup>15</sup>Zian bidxin or, bidxin dxej, bidxin bëew në ijz ni naj par laa guidap ree anjl guin din gugüjt reeman garol ree bénguidxliuj. <sup>16</sup>Abi' biguiejnan bël naj xsuldad reeman bën dxiib ree way. Naj reeman tio'pgayuu millon. <sup>17</sup>Ze baguian way guin ree con ree bën dxiib laa reeb: Bën dxiib ree way guin, guidib luxdoo reeman nada'cw guuib culor xnia, ni sul në ni naguiëch. Abi' guijc ree way guin naj reen zi'c guijc ree beedx, abi' ro' reeb ririi bajl, go'xh në azufre. <sup>18</sup>Abi' garol ree bénguidxliuj güjt por bajl guin, go'xh guin në azufre guin ni ririi ro' reeb. <sup>19</sup>Con ro' ree way guin rugüjt reeb

bejn ree, abi' con xbaan reeb rucheelguidx reeb din lupunt xbaan reeb najn zi'c guijsc bëel.

<sup>20</sup> Per los demasri ree bén ni ad güjtt por ree guialzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronze në ree dios guiaj con ree dios yag, dios ni ad rajct ruguiaa, ad rajct riguejñ ad rajc tëtët rza reeman.

<sup>21</sup> Ad bacwëëz tëtët rugüjt reeman bejn ree, ad basa'n tëtët reeman guialbidxaa, ad basa'n tëtët reeman ni dxuudx ni rüjn reeman con bén ad najt lacheel reeman, ad basa'n tëtët reeman guialgubaan.

### Tijb anjl ca' gui'ch

**10** Dxel baguian stijb anjl bén gojl da't, zidguiajtaman xanyabaa lën tijb zaj abi' guijcaman dxiib tijb guidgij. Lojman naj zi'c gubijdx, abi' guia'man naj zi'c tio'p bajl ziool. <sup>2</sup> Dxel ca'man tijb librdoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj. <sup>3</sup> Dxel guridxa'man rejs da't zi'c rbidxa' beedx, chi guridxa'man guridxa' gajdx ree guziaaw. <sup>4</sup> Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguiejñan cha' tijb bén na lon diizd xanyabaa:

—Ad gucaal ni guneë guigajdx ree guziaaw guin, din ad rayalt gagbee ree bejn laan.

<sup>5</sup> Abi' anjl ni baguian za'li loj nijsdoo në loj guidxliuj gules yaa ladbeeman xanyabaa, <sup>6</sup> abi' badëë xtiidxaman por bén naban tiblayaa, bén been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni rayal gac. <sup>7</sup> Din chi gucwejdx anjl ni goc gajdx trompejt ni ca'man dxel ma bidxin dxej gac zi'c naj xixgab Dios, zi'c bagojnman loj ree bén badëë xtiidx Dios loj ree bejn bén ni rüjn ree sirv lojman.

<sup>8</sup> Dxel zatijb gaj guneë bén ni guneenë naj diizd xanyabaa, naman:

—Wej bica' librdoo ni zojbyal loj ladxaa anjl ni za' loj nijsdoo në loj guidxliuj.

<sup>9</sup> Dxel wan lod za' anjl guin, rën lojman din guneeman librdoo guin lon, dxel naman lon:

—Cwa'n gudawan. Ro'l guiatan nejxh zi'c dxijn, per lënl nala yaban.

<sup>10</sup> Dxel cwa'n librdoo guin ladxaa anjl guin, abi' gudawan. Ro'n biguiajtman nejxh zi'c dxijn, per chi gulox gudawan nala biguiajtman lënan. <sup>11</sup> Dxel bagojn reeman naj guial gusnuu gugojnan bejn ree ni na Dios gac con zien ree nacion, rey ree në ree guiedx, xhietëëz diidx rniece reeman.

### Tio'p ree testiw

**11** Abi' baneeman tijb var ni rti'a'beenë bejn, naman lon:

—Bisu bica'bee xyadoo Dios në altar, dxel gulabil bén cayajp ree Dios respejt lën yadoo guin. <sup>2</sup> Per ad tia'beel lule' yadoo guin din lule' guin ma badëë Diosan loj ree bén ad najt ree bén Israel, laa reeman naj bén gusagdiaj ree bén Jerusalén loj choon ijz garol. <sup>3</sup> Abi' naj gaxhalan tio'p ree da bejnman din guza't reeman naj. Grop reeman gacw lajd ya's, abi' laa reeman guinieë da didxan choon ijz garol.

<sup>4</sup> Grop ree bén guin naj grop ree yag olivo në grop ree candeler ni za' loj dux Dad ree Dios bén rniabee loj guidxliuj. <sup>5</sup> Bal chu bén rën güünnë laa reeman xhienin, ro' reeman grii bajl din gugüjt reeman bén rdxe'ch ree laa reeman. Zian guiët ree bén rën güün laa reeman xhienin. <sup>6</sup> Grop ree bén guin rajp reeman guialrniabee par gusiaaw reeman xanyabaa chitëë gal guia loj choon ijz garol guin chi guinieë reeman da didxan. Rajp tëë reeman guialrniabee par guchaa reeman nijs gacan rejñ, abi' zajc guiniab reeman din gui't graloj guialzi

loj guidxliuj bëltëez volt rën reeman. <sup>7</sup>Per chi ma bayaaloj tiamp ni guiniee reeman da diidxan, dxel tijb monstruo, tijb be doxh grii lën bizë ni ad rliox, be guin ca'pnë laa reeman abi' güünb laa reeman gan abi' gugüjtib laa reeman. <sup>8</sup>Dxel gaa xcuerp reeman lünejz luguiedx Jerusalén lod güüt xdad reeman Jesucrist loj crüjz, luguiedx ni naj yan zi'cgajc Sodoma në Egipto. <sup>9</sup>Dxel galoj ree bejn bën nree ree gadxagayaa diidx, bën gralad ree, bën za graloj ree nacion zugüiaa reeman gaa xcuerp ree bën guin lünejz choon dxej garol, per ad zatiëjbt reeman guiguie'ch ree bën guin. <sup>10</sup>Abi' ree bën naban loj guidxliuj dád yabaa reeman guial ma güjt ree bën guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree bën guin laa reeman. <sup>11</sup>Per chi ma bayaaloj choon dxej garol guin, yasban Dios bën guin ree dxel chixche reeman abi' gra ree bën gugüiaa dád guidxeb reeman. <sup>12</sup>Dxel dád rejs biguien cha' tijb bën ni gunee xanyabaa, rëbaman loj grop ree bën guin:

—Gol wë'p guie.

Abi' wë'p reeman xanyabaa lën tijb zaj delant loj gra ree bën rdxe'ch laa reeman. <sup>13</sup>Hor ni bayë'p reeman xanyabaa bi't tijb xudoxh abi' zien ree ni bize'n luguiedx guin abi' gajdx mil bejn güjt. Guíaad gra ree bën ad güjtt dád bidxeb reeman abi' gules reeman xvalor Dios bën yu' xanyabaa. <sup>14</sup>Zian rliox guialzi rarojp, dxel laa zëed gajc guialzi ni rayon.

### Trompejt ni goc gajdx

<sup>15</sup>Chi bacwejdx anjl ni goc gajdx guin trompejt ni ca'man, dxel rejs da't biguien cha' ree bejn xanyabaa rëb reeman: Ma bidxin dxej yaya'n gra xguialrniabee guidxliuj loj dux Dad ree Dios

në loj Jesucrist abi' nabee reeman zianczi në tiblayaa.

<sup>16</sup>Guigajlbitap ree bengol zobj loj xyagxhil reeman delant loj Dios, bazuxib reeman xt basajb loj reeman liuj gojp reeman laaman respejt, <sup>17</sup>rëb reeman:

Dux Dadan Dios, lüj rajp gra guialrniabee

abi' najl Dios yan në diizd gocli abi' gui'til.

Quixtëe lüj guial ma culüü xguialrniabee narool bil ni rajpil

abi' ma guzulojl canabeel.

<sup>18</sup>Bénguidxliuj ree bidxe'ch reeman, per ma bidxin dxej gulüü xguialrdxe'chil.

Ma bidxin dxej güün xguialguxtil con ree bengüt

par gudëel ni rayal tia' ree xbejn

bën badëed ree xtiidxil, në ree bën bililadx lüj.

Në ree bën rajp lüj respejt.

Ma bidxin dxej zi'c ree benzobjloj në ree bën ad zobjlojt tia' reeman ni rayal reeman,

dxel gunidlojl bën ruxhiin ree loj guidxliuj.

<sup>19</sup>Chi gulox rëb reeman zian, bixal xyadoo Dios xanyabaa dxel biguien xcaxj promejs ni been Dios diizd gocli. Dxel guzuloj rë'p nijs, rajc naquie', rëez guzi-aaw, bi't xudo'xh abi' dád zro' bjajb guiajyabaa.

### Tijb béngunaa në tijb dragon

**12** Dxel gojc tijb sen ro' xanyabaa. Balüüloj tijb béngunaa nadüüban man gubijdx, abi' nuzuj guia'man loj bëew abi' guijcaman yu' coron ni gocchaaw con chiptio'p bajl xanyabaa. <sup>2</sup>Yu' xi'n béngunaa guin abi' rbixdiajman ragnaa lënman guial ma gal xi'nman. <sup>3</sup>Per gojc stijb sen xanyabaa. Balüüloj tijb dragon ro', tijb bedoxh najb culor xnia. Yu' gajdx guijquib, chii xcajchib yu' tëe tijb coron tijb gaj guijquib.

<sup>4</sup>Abi' con xbaanb bazaalib cost garol bajl xanyabaa loj guidxliuj. Dxel guzujb loj béngunaa guin din gawib xi'nman naabzi galix. <sup>5</sup>Gojl xi'n béngunaa guin tijb xindo niguiaaw, abi' laax nabee loj guidxliuj con tijb var guuib. Dxel biquied reeman laax loj xniaax, bidxinx lod zojb Dios lod canabeeman. <sup>6</sup>Abi' béngunaa guin baxüünman par niz lod naj ganax yujbidx, lod ma beerchaaw Dios par laaman, lod gudëed reeman ni gawaman choon ijz garol.

<sup>7</sup>Dxel guyu wadijl xanyabaa, anjl ni la Miguel con ree xi anjlaman gudijlnë reeman dragon guin con ree xi anjlib. <sup>8</sup>Per ad beent be guin gan con ree xi anjlib loj anjl Miguel con ree xi anjlaman, dxel ad gojctri nibajn be guin xanyabaa con ree xi anjlib. <sup>9</sup>Zianan zeel bazaal reeman dragon guin loj guidxliuj con ree xi anjlib. Dragon guin naj bëël gulal ni la xindxab në satanás xin rusquiee gra ree bénguidxliuj.

<sup>10</sup>Dxel biguien cha' tijb bejn rejs da't diizd xanyabaa rëbaman:

—Ma bidxin dxej baslaa Dios dunuj ree, ma bidxin xguialrniabeeman chi nabeenëman Jesucrist, din ma biquied bën rbe'c xguialquia ree dux compniar ree, bën rdxinnë ree guialquia guin loj dux Dad ree Dios dxej guiaal. <sup>11</sup>Abi' dux compniar ree been reeman gan por rejn ni guxie' bën naj zi'c xi xiil Dios në por ni rëb reeman xhienaag rliladx reeman xtiidx Dios, ad bidxebt reeman majsi niëjt reeman. <sup>12</sup>Zeel gol badxe' luxdoodi nix gra ree bën zojb xanyabaa per, jprobza lëjt bën zojb ree loj guidxliuj në ree be yu' loj nijsdoo! Din ma biguiajt xindxab lod zojbidi, dád rdxe'chix guial ragbeex sta'nz dxej raya'n par laax.

<sup>13</sup>Chi baguiaa dragon guin guial ma biajbib guidxliuj, dxel briinalib béngunaa naj xniaa xindo guin. <sup>14</sup>Dxel badëë reeman tio'p xiil béngunaa guin zi'c xiil bisiaro' din gac suman loj bëël guin xt

lod naj ganax yujbidx, lod gudëed reeman ni gawaman choon ijz garol. <sup>15</sup>Abi' gulëë ro' dragon guin tijb guiw nijs din chinën béngunaa guin. <sup>16</sup>Per bixal loj guidxliuj persi gu'n guibidx nijs gulëë ro' dragon guin. Zian been guidxliuj béngunaa guin yudar. <sup>17</sup>Dxel dád bidxe'ch dragon guin béngunaa guin, abi' zitilnëb sta'n ree bën ni za loj xdiaaman, bën ruzoob ree xtiidx Dios zinal tëë reeman xtiidx Jesucrist.

### Tio'p ree bedoxh

**13** Wej dragon guin bisub ro' nijsdoo. Abi' naj baguia guial brii tijb monstuo loj nijsdoo, tijb bedoxh be yu' gajdx guijc, chii xcajchib abi' loj tijb gaj cajch guin yu' tijb gaj coron, abi' loj guigajdx guijquib ca tijb diidx ni rnieeguidx Dios. <sup>2</sup>Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badëëdib loj monstuo guin xluarib lod rniabeeb abi' guialrniabeero' ca'b par nabeeb. <sup>3</sup>Tijb guijc monstuo guin baguian tijb lod nadxeelguidx ni rulüü ad zusbajnt laab, per bayajc lod nadxeelguidx guin abi' gra ree bénguidxliuj badxaloj abi' binal reeman monstuo guin. <sup>4</sup>Dxel gojp da't reeman respejt dragon guin guial badëëdib guialrniabee loj monstuo guin gojp da't tëë reeman respejt monstuo guin, rëb reeman:

—¿Chu naj zi'c monstuo guin abi' chu zajc til con laab?

<sup>5</sup>Monstuo guin gojcchaaw ro'b par guilies xvalor gajquib, abi' guinieeguidxib Dios, gojpib guialrniabee par güünb zian loj choon ijz garol. <sup>6</sup>Abi' guneeguidxib Dios, guneeb diidxmal ree por laaman, por xyadooman në por gra ree bën zojb xanyabaa. <sup>7</sup>Gojp monstuo guin permis par sub contr ree xbejn Dios abi' güünb laa reeman gan. Abi' gojpib guialrniabee par nabeeb grolaj ree

bejn, bén ni rníee ree gadxagayaa diidx, bén gra lad ree, gra ree nacion. <sup>8</sup> Gra ree bén ad cat laj loj xlibr guialnaban diidx chi gad guidxliuj gacchaaw, loj xlibr bén naj zi'c xi xiil Dios bén güt por ree bejn, gra reeman gap da't respejt monstroo guin. <sup>9</sup> Bén rën ree gucaagdiajg, gol baaagdiajg. <sup>10</sup> Bén naj che ladxguuib, cheman ladxguuib. Bén naj guiët con espad, con espad guiëtaman. Zeel bén naj ree xbejn Dios ad yadxaguidi ad gucwëëz tëë chililadxidi Dios.

<sup>11</sup> Dxel baguian stijb monstroo ren briib loj guidxliuj, yu' tio'p xcajchib zi'c xcajch xiil, per cha'b naj zi'c cha' dragon. <sup>12</sup> Abi' lasa'gajc guialrniabee ca' monstroo ni brii loj nijsdoo lasa'gajcan ca'b abi' por laab gojp da't ree bejn respejt monstroo ni brii loj nijsdoo, monstroo ni bayajc lod nadxeelguijdx ni ruliüüci gugüjt laab. <sup>13</sup> Abi' monstroo ni brii loj guidxliuj në gajquib rüjn milagr narooob ree, xt rajc rniabeeb rguiajt bajl diidx xanyabaa xt loj guidxliuj delant loj ree bejn. <sup>14</sup> Zian rusquieeb bën-guidxliuj ree por ree milagr ni rüjnb delant loj monstroo ni brii loj nijsdoo, abi' rniabeeb rüjn ree bën-guidxliuj tijb xfigur monstroo ni brii loj nijsdoo, monstroo ni bidxeelguijdx con espad abi' gubajnb. <sup>15</sup> Abi' monstroo ni brii loj guidxliuj xt gojpib guialrniabee par gudëëdib guialnaban loj xfigur monstroo ni brii loj nijsdoo, par guinee figur guin në par gugüjtib gra ree bén ni ad rajpt respejt figur guin. <sup>16</sup> Gunabee tëë monstroo ni brii loj guidxliuj gra ree bejn, zi'c ree bengol zi'c ree xindoo, benriycw ree në ree bënprob, bén naj ree zi'c bën nado' në ree bén ad najt zi'c bën nado', din chu' sen yaa reeman ladbee o lucwaj reeman. <sup>17</sup> Abi' achut zajc sii o guto' ya bal id ca reeman sen guin, abi' sen guin naj laj monstroo guin o xinumbríb.

<sup>18</sup> Guie ryaadx guialrignia'. Bén rajp guialrignia' cwëë xcwentaman con

xnumbr monstroo guin, abi' numbr guin naj xho'pgayuu gayojnbixho'p. Con numbr guin ririi laj tijb bën-guidxliuj.

### Cant ni biil tibgayuu tiubitap mil ree bejn

**14** Baguia tëën guial za' bén naj zi'c xi xiil Dios guijc dajn ni la Sión. Bén naj zi'c xi xiil Dios za'man con tibgayuu tiubitap mil ree bejn, graczi reeman ca lucwaj reeman laj bén naj zi'c xi xiil Dios në laj xDadaman. <sup>2</sup> Abi' biguiejnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusijdx zien ree bejn arp. <sup>3</sup> Dxel rool reeman tijb cant cüb delant loj yagxhil lod zojb bén rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bén tibgayuu tiubitap mil guin, laa reeman naj bén gulaa loj ree bën-guidxliuj. <sup>4</sup> Abi' laa reeman naj ree xinguaaaw ni ad bagaalt bën-gunaa, gojc reeman naya abi' zinal reeman bén naj zi'c xi xiil Dios bantëëz guin rejman. Laa reeman naj ree bén gulaa loj ree bën-guidxliuj abi' zi'c guialnaza'c yaloj ni rinë bejn loj Dios zian naj reeman delant loj Dios në delant loj bén naj zi'c xi xiil Dios. <sup>5</sup> Ad goct basquiee reeman, nayadxuj reeman delant loj Dios.

### Ruson ni badëë guiyon ree anjl

<sup>6</sup> Dxel baguian tijb anjl rzujman xanyabaa con tijb ruson ni naj par tiblayaa par gugojnman gra ree bén naban loj guidxliuj, xhietëëz diidx rníee reeman, o xhietëëz loj diaa zëëd reeman, o xhietëëz ciuda o nacion zëëd reeman. <sup>7</sup> Dxel dád rejs gunee anjl guin rëbaman:

—Gol bidxeb Dios, gol gules xvaloraman, din ma bidxin hor yadëëd ree bejn cwent lojman. Gol gojp da't respejt bén been xanyabaa, guidxliuj në nijsdoo në lod rajch nijs.

<sup>8</sup>Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda narooob guin gra ree bén-guidxliuj guial güün reeman graloj ree nidxuudx, graloj ree dol ro'.

<sup>9</sup>Dxel rejs da't gunee anjl bayon guin rëbaman:

—Bal chu gap da't monstuo guin respejt con xfigurib abi' tiëbaman tia xsenb lucwajman o yaaman, <sup>10</sup>bén zii yayal xcasti narooob Dios, zro' da't gudë-daman laaman casti. Abi' sagdiajman loj bajl ni caye'c azufre delant loj ree xianjl Dios në delant loj Bén naj zi'c xi xiil Dios.

<sup>11</sup>Ad yu' tëët dxej yayü' bajl guin. Ni'qui radxe ni'qui guiaal achet gualraziiladx par ree Bén rajp da't respejt monstuo guin con xfigurib, o Bén ca ree xsenb.

<sup>12</sup>Zeel Bén naj ree xbejn Dios Bén ruzoob ree xtiidxaman abi' rliiladx reeman Jesucrist, ad rayalt yalenyä' reeman.

<sup>13</sup>Biguiejn tëën cha' Bén ni na lon dizd xanyabaa:

—Bacaa ni ganin lojl: “Diizd yan xiquilbaa ree Bén rëjt con gualrliladx Jesucrist.”

Dxel rëb xSprijt Dios: “Walican din ma yaziiladx reeman xcwent ree gualzi ni gudëd reeman abi' chinë reeman gualbenza'c reeman.”

### Guialnaza'c ni runee guidxliuj

<sup>14</sup>Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or guiycaman abi' yaaman ca'man tijb hoz ni nadoxh ro'. <sup>15</sup>Dxel brii stijb anjl lën yadoo abi' rejs da't guneeaman Bén ni zojb loj zaj guin rëbaman:

—Badxe' xi hosil, battüüg ree gualnaza'c loj guidxliuj din ma gojl reen ma bidxin tiamp ni yado'p reen.

<sup>16</sup>Abi' Bén zojb loj zaj guin badëed xi hosaman loj guidxliuj abi' bato'paman gualnaza'c loj guidxliuj.

<sup>17</sup>Dxel brii stijb anjl lën yadoo ni naj xanyabaa, ca' gajcaman tijb hoz ni nadoxh ro'. <sup>18</sup>Dxel niz loj altar brii stijb anjl Bén rajp gualrniabee par bajl, abi' dád rejs guneeëman Bén ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

<sup>19</sup>Dxel badëed anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios. <sup>20</sup>Dxel xijch ciuda guin bixii ree uv guin abi' lën lod bixii ree uv guin birii rejn. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

### Bén naj ree xi anjl Dios con guigajdx ree gualzi

**15** Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx gualzi. Gualzi guin ree naj gajdx ni chigra gac din con gualzi guin ree gusiaaloj Dios xcastiman.

<sup>2</sup>Baguia tëën zi'c nijsdoo, per najn zi'c tijb vidr xculor bajl. Dxel lojn za' ree Bén been ree gan loj monstuo, loj figur con loj xnumbrib, ca' reeman arp ni badëed Dios loj reeman. <sup>3</sup>Abi' cayool reeman xcant Moisejs xbejn Dios në xcant Bén ni naj zi'c xi xiil Dios, rëb cant guin: Narooob në ni diidxli radxaloj bejn naj ree ni rüjnl, dux Dadan Dios Bén rajp gra gualrniabee.

Xnejz da't në zi'c rayal rüjnl, lüj guial rniabeel gra ree bénguidxliuj.

<sup>4</sup>¿Chu ad zadxebt lüj?

¿Chu ad zuza'tt lüj zagdxë, dux Dadan Dios?

Tijbzi lüj naj Bén naya nali abi' bénguidxliuj gui't gap da't reeman lüj respejt

guial ma balüül bejn ree guial xnejz rüjnl.

<sup>5</sup>Chi gulox baguian ni guin ree, dxel baguian bixal luar lod mazri nagle' lën xyadoo Dios xanyabaa. <sup>6</sup>Abi' lën yadoo guin briei gajdx ree anjl bén ca' ree gajdx ree guialzi, najcw reeman lajd naquich ni rdiin bacha', abi' naxii tijb cinch or luxdoo reeman. <sup>7</sup>Abi' tijb guidap ree be ni za' lod za' Dios, badëëb loj tijbgaj ree anjl guin tijb cojp or ni guidxa xcasti Dios bén naban guidib tiamp në par tiblyaa. <sup>8</sup>Abi' lën yadoo guin gudxan xgo'xh xbacha' Dios në xguialrniabee-man. Achut gojc niu lën yadoo guin xt chi ma gulox guigajdx ree guialzi ni zidnë ree anjl guin.

### Cojp ni guidxa ree xcasti Dios

**16** Dxel biguejnan cha' bejn rejs da't guneeman diizd lën yadoo guin, rëbaman loj guigajdx ree anjl guin: —Gol chej, gol bigla't xcasti Dios ni yu' loj guigajdx ree cojp guin loj guidxliuj.

<sup>2</sup>Dxel wej anjl yaloy guin, bala'taman ni yu' loj xcojppaman loj guidxliuj. Abi' gra ree bén ni yu' xsen montruo guin bén gop da't ree respejt xfigurib, briei guiadxyoodx lad reeman, ni rdoob da't.

<sup>3</sup>Abi' anjl barojp guin bala'taman ni yu' loj xcojppaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

<sup>4</sup>Anjl bayon guin bala'taman ni yu' loj xcojppaman loj ree guiiw në lod rajch ree nijs abi' nijs guin ree bayajc reen rejn.

<sup>5</sup>Abi' biguejnan rëb anjl ni rniabee ree nijs guin:

—Xnejz naj ni cayüjnl në zi'c cayüjn xguialguxtisil, Dad Dios, lüj naj Bén naya nali, najl Dios yan në diizd gocli. <sup>6</sup>Din bénguidxliuj ree guxhie' reeman rejn bagüjt reeman xbejn reel në ree Bén badëëd ree xtiidxil. Zeel ma

badëëdil rejn guië' reeman, abi' zian rayal reeman.

<sup>7</sup>Abi' niz loj altar biguejnan cha' stijb Bén rëb:

—Walican, Dad Dios Bén rajp gra guialrniabee. Xnejz në zi'c rayal cayüjn xguialguxtisil.

<sup>8</sup>Abi' anjl badajp guin bala't ni yu' loj xcojppaman loj gubijdx din guze'can bejn ree zi'c bajl. <sup>9</sup>Gra reeman we'c por xguialnalaa da't gubijdx guin. Per ni'qui zian ad bayüjnt reeman xgab por xtol reeman, ad baza'tt reeman Dios zagdx guneeguidxli reeman laaman, laaman guial najman Bén rniabee ree guialzi guin.

<sup>10</sup>Anjl bagaay guin bala'taman ni yu' loj xcojppaman lod rbej montruo ni rniabee guin, abi' bicajy loj guidxliuj, abi' xt rawya' lüdx ree bejn por guialzi ni cadëd reeman. <sup>11</sup>Per ni'czi zian ad basa'nt reeman ni mal ni rüjn reeman, al mazri been reeman por guialzi ni gudëd reeman në por guiadx ni gudxib lad reeman, guneeguidx reeman Dios Bén zojb xanyabaa.

<sup>12</sup>Anjl baxo'p guin bala't ni yu' loj xcojppaman loj guiiwro' la Eufates abi' gubidx nijs loj guiiw guin. Zian bixal nejz din tëd ree rey Bén zëëd ree lad lod rliejn gubijdx. <sup>13</sup>Dxel baguian ro' dragon guin, con ro' montruo guin në ro' Bén rusquiee rëb rudëë xtiidx Dios loj ree bejn briei choon ree sprijt mal ni naj zi'c bidx. <sup>14</sup>Guiyon ree sprijt guin naj xsprijt xindxab, abi' rüjn reen milagr abi' rej reen lod za' gra ree rey loj guidxliuj persi rado'p reeman din til reeman con Dios Bén rajp gra guialrniabee, dxej ni gui'taman guidguieenman gan loj gra reeman.

<sup>15</sup>Rëb Jesucrist:

—Gol badxe'guijc guial dxejczy guialan zi'c chi ri't tijb xingubaan tijbzi golp. Xiquilbaa ree Bén rbëz naj, Bén za'sin ree chi guialan din chitëë

yaya'nxtu reeman zi'c chi rniaaz bén za' zibëël.

<sup>16</sup> Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

<sup>17</sup> Abi' anjl bagajdx guin bala't ni yu' loj xcojpmaman loj bi, abi' diidx lën yadoo ni yu' xanyabaa niz lod za' xyagxhil Bén rniabee, biguien rejs da't cha' Bén rëb:

—Ma bayaaløj gojc ni rayal gac.

<sup>18</sup> Abi' guzuloj rë'p nijs, rajc naquie', rbidxa' guziaaw dxel bi't xudoxh, tijb xudoxh ni ad goct wayi't diidx guzuloj yu' bejn loj guidxliuj, din xu guin naj ni mazci ni doxh. <sup>19</sup> Abi' gula' ciuda narooob guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëë xcasti ro'man loj ciuda narooob guin. <sup>20</sup> Abi' gunijt ree gra yuj riga' loj nijsdoo në ree guia'. <sup>21</sup> Biajib tëë guiajyabaa guijc ree gra ree bénguidxliuj, dxel tijbgaj ree guiaj yabaa guin na' reen cost tiuu quil. Abi' ree bejn guneeguijdx reeman Dios, por ree guialzi guin, guial dád ni doxh gojc chi biajib ree guiajyabaa guin.

### Guialguxtis ni güün Dios con béngunaa dxuudx

**17** Abi' tijb guigajdx ree anjl guin bi'taman naman lon:

—Guda din gulün lüj casti ni rayal béngunaa dxuudx ni zojb loj nijsro', <sup>2</sup>laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguuiwaman bejn ree loj guidxliuj con ree ni ad rüjnt sirv ni rüjnman.

<sup>3</sup> Abi' por xSprijt Dios binë anjl guin naj lod naj ganax yujbidx. Ni baguian tijb béngunaa dxiibaman tijb monstuo xnia, abi' guidib ladib ca diidxguijdx par Dios, yu' gajdx guijquib con chii xcajchib. <sup>4</sup> Abi' béngunaa guin najcwaman lajd murad në ni xnia, najcchaawnën

ganax or në ree guiaj zagdxë në ree perl. Abi' ca'man tijb cojp or guidxa ree ni nabixhladx lojn në ree ni dxuudx ni rüjnman. <sup>5</sup> Abi' lucwajman ca tijb letrer ni achutczri rignia' ni rën guiëban, rëb loj letrer guin: “Babilonia, ciuda narooob ni naj xniaa ree béngunaa dxuudx në xniaa ree ni dxuudx ni rajc loj guidxliuj,” <sup>6</sup> Dxel gogbeen guial rzüdx béngunaa guin con xrejñ ree xbejn Dios, con xrejñ ree Bén ni güt guial gunee reeman xtiidx Jesús. Abi' dád badxalon chi baguian zian. <sup>7</sup> Dxel na anjl guin lon:

—¿Chexc zeel dád radxaloj? Naj gusignia' lüj ni rën guiëb béngunaa ni baguiaal në monstuo ni dxiibaman, be ni yu' gajdx guijc con chii xcajch. <sup>8</sup> Monstuo ni baguiaal, laab naj be guban gocli, per yan ad nabantrib. Per guliülojb lën bizë ni ad yu't lod rliox dxelri nidlojb tiblayaa. Abi' ree Bén naban loj guidxliuj, Bén ni ad cat ree laj loj xlibr guialnaban diidx gocli chi gad guidxliuj gacchaaw, laa reeman yadxaloj chi guguaa reeman monstuo ni guban gocli, be ad nabant yan per gui'tib.

<sup>9</sup> Guie ryaadx quiarguejn. Guigajdx guijc monstuo guin rën guiëban gajdx guia' lod zojb béngunaa guin <sup>10</sup> rën tëë guiëban gajdx ree rey. Gaay ree rey guin ma gudëëd xguialrniabee, abi' Bén baxo'p guin naj Bén canabee yan. Dxelri nabee Bén bagajdx guin, per ad xchejt nabeeman. <sup>11</sup> Abi' monstuo ni guban gocli, abi' yan ad nabantrib, laab gac rey baxujñ, per loj gajc gajdx ree rey guin grii rey gac xhujñ dxel yayalib lod rayalib casti par tiblayaa.

<sup>12</sup> Guidxii cajch ni baguiaal rën guiëb chii ree rey ni ad wazulojt nabee. Per chi tia' reeman guialrniabee, ad xchejt nabee reeman con monstuo guin. <sup>13</sup> Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstuo guin, <sup>14</sup> abi' til reeman con Bén naj zi'c xi xiil



Dios. Per güün bén naj zi'c xiil guin laa reeman gan din laaman naj Dad loj gra ree dad, naj tëëman rey loj gra ree rey. Abi' bén za' ree con bén naj zi'c xi xiil Dios, laa reeman naj bén bazoob xtiidx Dios, bén ma naj ree par laaman abi' didixli zinal reeman xnejz Dios.

<sup>15</sup> Na tëë anjl guin lon:

—Nijs ni baguiaal lod zobj béngunaa dxuudx guin laan rën guiëb graloj ree bén nrie graloj ree diidx, bén gra lad ree, bén zëëd ree gra loj ree nacion. <sup>16</sup> Abi' monstroo guin con guidxii xcajchib ni baguiaal, guidxe'ch reeman béngunaa dxuudx guin, tio'nladx reeman laaman, gusa'n reeman zibëelaman, gaw reeman xbëelaman abi' guze'c reeman laaman. <sup>17</sup> Dios yazaladx loj guidxii ree rey guin quiarguejn din güün reeman zi'c rënman. Yaya'n reeman diidx din yayü xguialrniabee reeman loj monstroo guin, xt gac cumplid ni rëb Dios gac. <sup>18</sup> Abi' béngunaa ni baguiaal, laaman naj ciuda narooob ni rniabee ree rey yu' loj guidxliuj.

### Biajb guiedx Babilonia

**18** Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj, <sup>2</sup>abi' rnieeman rejs da't rëbaman:

—Ma biajb, ma biajb Babilonia ma naj ciuda narooob guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuuj, bedxuudx ree be rbijxhladx ree bejn. <sup>3</sup> Din zi'c chi rusüdx bejn stijb bejn, zian ma batiaalguiiw ciudaro' guin gra ree bénguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bén rüjn negojs loj guidxliuj ma naj reeman rijcw por graczi ree ni dxuudx rajc ni.

<sup>4</sup> Dxel biguejnan cha' stijb bén gunee diidx xanyabaa rëbaman:

—Gol brii loj ciuda guin, da bejn ree, chitëë go'chidi loj ree dol ni rajc ni chitëë tëdidi guialzi ni gac ree loj ciuda guin. <sup>5</sup> Din dád zien xtól reeman zeel ma bidxinan xt xanyabaa, abi' Dios ad zayanladxtaman ni mal guin ree. <sup>6</sup> Gol beennë ciuda guin zi'cgajc beennën ben ren ree, gol been din yaguijxan xcastin tio'p volt mazri guial loj ni beennën bejn ree abi' gol basagdiajn tio'p volt mazri guial loj ni basagdiajn ben ren ree. <sup>7</sup> Gol basagdiaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bén rniabee, ad najtan bén bizëjb ad yu' tëët dxej chu'nayan.” <sup>8</sup> Zeel tijbzi dxej guidxajg lasa' ree guialzi par ciuda guin, zi'c guialgüjt, guialrunaya, guialrliian, dxel che'can con bajl. Din narooob xguialrniabee dux Dad ree Dios bén gudëëd casti ciuda guin.

<sup>9</sup> Abi' ree rey ni yu' loj guidxliuj, bén babaa ree guial been reeman ni dxuudx con ciuda guin, zoon reeman, naya sagdiaj reeman chi guguaaa reeman go'xh ni caye'can. <sup>10</sup> Abi' zijt su reeman chi guguaaa reeman casti ni cadëdan, dxel guiëb reeman:

—¡Probza lüj, probza lüj Babilonia, ciuda narooob ni guyu gojl par gra! Din tibrajtzi bi't casti par lüj.

<sup>11</sup> Abi' ree bén rüjn negojs loj guidxliuj zoon reeman zu tëë luxdoo reeman naya por ciuda guin, din achutri sii ni ruto' reeman, <sup>12</sup> zi'c or, plajt, guiaj zagdx ree, perl, lajd zagdx ree, lajd sed ree culor murad con ni xnua, në graloj ree tabl ruree nejxh në graloj ree ni been reeman con ree tabl zagdx, bronce, guiib con marmol në marfil. <sup>13</sup> Ad zajc tëëtri guto' reeman canel në graloj ree ni ruree nejxh, ad zajctri guto' reeman goxyaal, mirra, perfum, vin, sejt oliv, harin zagdx, trigo, go'n, xiil, way, carrejt, ad

zajc tēetri ree guto' reeman bejn ree.

<sup>14</sup> Abi' guiëb reeman loj ciuda guin:

—¡Ad rajptril guialnaza'c ni bayuladx da'til, tiblayaa ma banijtil zi'c gubanl con gra ree ni za'c ni gopil!

<sup>15</sup> Gra ree bén been negojs, bén gojc ree rijcw por ciuda guin, zijt su reeman guialrdxeb reeman casti ni cadëd ciuda guin. Zoon reeman, zazagdiaj reeman, zunaya reeman. <sup>16</sup> Abi' guiëb reeman:

—¡Probza, probza ciuda narooob guin! Laan guial guzujchaawan con ree lajd zagdx, lajd culor murad con ni xnía, laan guial guzujchaawan con or, con perl në con guiaj zagdx <sup>17</sup> din, ¡tibrajtzi gunidloj gra ree guialnaza'c guin!

Gra ree bén zë lën barcw, zi'cgajc xcapitan ree barcw, gra ree mariner në los demazri ree bén rüjn dxiin lën barcw, guzudxe reeman zijt <sup>18</sup> chi baguiaa reeman go'xh ni cayë'c ciuda guin, abi' gurixdiaj reeman rëb reeman:

—¿Goc guyu tijb ciuda lasa' ciuda ro' guie?

<sup>19</sup> Abi' barooob yuj guijc reeman, roon reeman abi' guyunaya luxdoo reeman rëb reeman:

—¡Probza!, probza ciuda narooob guin por xguialnaza'can gra ree bén been negojs bén rajp ree barcw gojc reeman rijcw, din tibrajtzi gunidlojn.

<sup>20</sup> Dxel biguien cha' bén na:

—Per lëjt bén zojb ree xanyabaa, lëjt najdi xi apóstoles Jesucrist, lëjt bén rudëd ree xtiidx Dios në los demazri ree bén naj xbejn Dios, gol babaa por ni cazajc ciuda guin din zian cayüjn Dios xguialguxtisaman por ni beennë ciuda guin lëjt.

<sup>21</sup> Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazalbin guiaj guie con guidib da gojlan zian nidoxh sac ciuda narooob Babilonia, abi' achutri guguaa Ba-

bilonia guin stijb. <sup>22</sup> Ad zaguietri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zaguietri loj ciuda guin. Achutri bejn güün dxiin ni, ni'qui xnaquie' mulin ad zaguietri ni. <sup>23</sup> Achetri guij che'c loj ciuda guin, achutri guxhliaa. Gra ree bén been negojs loj ciuda guin ganax bén zojbloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

<sup>24</sup> Abi' loj ciuda guin bagüjt reeman bén badëd ree xtiidx Dios, në ree bén rililadx Dios, abi' por ciuda guin bagüjt reeman los demasri ree bén ma güjt loj guidxliuj.

**19** Chi gulox baguian biguiejn tēen zian, dxel dád rejs biguiejnan cha' zien da't ree bén canee xanyabaa rëb reeman:

¡Quixtëe Dios! Por dux Dad ree Dios

zëd perdon, respejt në guialrniabee,

<sup>2</sup> din laaman waliman abi' xnejz rüjn xguialguxtisaman,

ma badëdaman casti béngunaa dxuudx ni bazaalguiiw

bénguidxliuj ree con ree xni malaman,

ma been Dios guialguxtis con laaman persi baguijxaman ni bagüjtaman xbejnman.

<sup>3</sup> Abi' biguiejnan rëb reeman stijb:

—¡Quixtëe Dios! Ad yu't dxej yayü' go'xh ni cayë'c ciuda guin.

<sup>4</sup> Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rëb reeman:

—¡Quixtëe Dios! ¡Diidxza'c guin ree naj par laaman!

<sup>5</sup> Abi' niz lod za' yagxhil guin biguiejnan cha' bén rëb:

Gradi zi'c bengol zi'c xindoo

gol gules xvalor dux Dad ree Dios,

lëjt rüjndi laaman sirv abi' rajpidi laaman respejt.

**Xgualruxhliaa bën naj zi'c xi xiil Dios**

<sup>6</sup> Biguiejn tëen zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:

¡Quixtëe Dios! Din ma canabee dux Dad ree Dios,

bën ca' gra gualrniabee.

<sup>7</sup> Yan yadxe' du luxdoo ree zagdxe, yabaa ree yales tëe ree xvaloraman.

Din ma bidxin dxej guxhliaa bën naj zi'c xi xiilaman

abi' bën gac lacheelaman ma za'chaawaman.

<sup>8</sup> Najcwaman lajd zagdxe, ni naquich, naya rulaa tëen bacha'.

Din lajd naquich guin rën guiëban ni zagdxe ni been ree xbejn Dios.

<sup>9</sup> Abi' na anjl guin lon:

—Bacaa: “Xiquilbaa ree bën naj gui't loj xgualruxhliaa bën naj zi'c xi xiil Dios.”

Na tëe anjl guin:

—Ni guie ree naj xtiidxli Dios.

<sup>10</sup> Dxel bazuxiban loj anjl guin par ga'p da'tan laaman respejt, per naman lon:

—Ad güünl zian. Din zi'cgajc lüj xmandadzi Dios cayguieen, zi'cgajc gra ree lasa'l bën wali ree rüjncwent xtiidx Jesucrist. Gojp da't respejt Dios.

Din por Jesús zëed ni rniece ree bën rudëed xtiidx Dios.

**Bën dxiib tijb way naquich**

<sup>11</sup> Dxel baguian zojbyal xanyabaa baguia tëen tijb way naquich. Bën dxiib laab laman: Bën ruzoob xtiidxaman në bën wali, din xnejz rüjn xgualguxtisaman në xwadijlaman,

<sup>12</sup> guiaalojman rulaan bacha' zi'c bajl abi' zien ree coron yu' gujccaman, tib lajtaman ca laj tijb bejn ni achut rignia', tijbzi laaman ragbee xhie rën guiëban,

<sup>13</sup> guidib rejnzi xabaman, abi' laman Xtiidx Dios.

<sup>14</sup> Abi' ree xsuldadaman bën yu' xanyabaa zinal reeman laaman dxiib reeman way naquich, najcw reeman lajd zagdxe ni naquich ni naya tëe.

<sup>15</sup> Ro'man ririi tijb espad ni nadoxh ro', con espad guin gudëedaman casti bënguidxliuj, në con var guiib nabeeman laa reeman. Zi'c rë'p bejn guijc uv par guixiin, zian gudëedaman loj reeman casti naroob ni zëed por Dios bën rajp gra gualrniabee. <sup>16</sup> Loj xcajpaman con cüdaman ca ree diidx ni rëb: “Rey bën rniabee loj ree rey në Dad bën rniabee loj ree dad.”

<sup>17</sup> Dxel baguian tijb anjl za'liman loj gubijdx, dád rejs rbidxa'man, rbejdxa-man gra ree be ni rzuj xanyabaa, rëbaman:

—Gol guda, gol bachajg lasa'di lod gunee Dios ni gawidi zro' da't, <sup>18</sup> zi'c xbëel ree rey, xbëel ree capitan, xbëel ree bën achut rüjn gan, zi'c xbëel ree way, xbëel ree bën rbib laa reeb, xbëel gra ree bejn, zi'c xbëel ree bën naj zi'c bën nado' në xbëel ree bën ad najt zi'c bën nado', zi'c xi bëel ree bengol në ree xindoo.

<sup>19</sup> Dxel baguian monstroo con ree rey yu' loj guidxliuj në ree xsuldad reeman, nadxag lasa' reeman par til reeman con bën dxiib way naquich guin con ree xsuldadaman. <sup>20</sup> Per laa reeman gunaaz reeman monstroo guin con bën rusquiee rëb rudëe xtiidx Dios loj ree bejn, bën rüjn milagr niz loj monstroo guin. Abi' por ree milagr guin basquieeman bën guyu ree xsen monstroo guin gojp tëe reeman respejt xfigurib. Abi' monstroo guin con bën rusquiee ni rëb rudëe xtiidx Dios loj ree bejn, grop reeman guidib naban reeman bazaal reeman laa reeman loj bajl lod caye'c azufre. <sup>21</sup> Abi' los demazri ree xbejn monstroo guin güjt reeman con espad ni ririi ro' bën dxiib way naquich guin, abi' gudaw ree be ni rzuj xanyabaa

laa reeman, xt gudxa lën reeb gudaw ree xbeël reeman.

### Ti mil ijz

**20** Dxel baguian zidguiajt tijb anjl xanyabaa, ca'man xguiibliaw bizë ni ad yu't lod rliox, ca' tēeman tijb caden narooob. <sup>2</sup>Abi' gunaazaman dragon, bëël gulal ni la xindxab në satanás, guxhiiman laab con caden guin por timil ijz. <sup>3</sup>Dxel bazaalaman laab lën bizë ni ad yu't lod rliox abi' basiaawdx'i'chaman bizë guin chitëë gusquieeri reeb bejn ree loj guidxliuj xt chi ma bayaaloj timil ijz dxel yariib lën bizë guin tiblädëd.

<sup>4</sup>Dxel baguian yagxhil zagdxë ree lasa' xyagxhil ree rey, lojn zojb ree bën ni ma cwa' guialrniabee par güün reeman guialguxtis. Baguia tēen xsprijt ree bën ni biru' yëjn guial gutie'ch reeman xtiidx Dios në gra ni ragbee reeman por Jesús. Laa reeman ad gojpt respejt monstroo guin ni'qui xfigurib abi' ad cwëjbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz. <sup>5</sup>Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz. <sup>6</sup>Xiquilbaa ree bën yaban yaloj! Laa reeman ma naya niz loj Dios abi' ad zayaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenë reeman laaman timil ijz guin.

<sup>7</sup>Chi ma bayaaloj timil ijz guin, dxel yarii xindxab guin lod nayaawix <sup>8</sup>Par gusquieex bejn ree guidib guidxliuj. Gusquieex Gog në Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo. <sup>9</sup>Gra lad gui't reeman, guido'p reeman gadëd lod za' ree xbejn Dios në gadëd ro' guiedx lod rënman. Per laaman diizd xanyabaa guixhiaalaman bajl ni guze'c bën guin

ree xt yadëj reeman. <sup>10</sup>Abi' xindxab ni basquiee laa reeman laax chu' loj bajl lod caye'c azufre, lod ma za' monstroo con bën rusquiee rëb rudëë xtiidx Dios loj ree bejn, lod ad yu't dxëj yarii reeman lod sagdiaj tēë reeman dxëj guiaal.

### Yadëed ree bejn cwent loj Dios

<sup>11</sup>Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj në xanyabaa, gunidloj reen tiblyaa. <sup>12</sup>Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xguialguxtisaman con ree bengüt guin zi'c ca loj ree libr guin xcwent ree ni been reeman. <sup>13</sup>Nijsdoo bayü xbengütan, abi' guialgüjt bayü xbengütan, abi' ree bengüt ni za' lod cabëz reeman guidxin dxëj ni yadëed reeman cwent loj Dios, bibig reeman yagaj din güün xguialguxtis Dios con laa reeman bal conin been reeman. <sup>14</sup>Dxel guialgüjt con lod guzu ree bengüt gulëjz reeman guidxin dxëj yadëed reeman cwent loj Dios, grop reen bazaal reeman loj bajl, bajl guin naj guialgüjt barojp. <sup>15</sup>Abi' loj gajc bajl guin bayal ree bën ad cat laj loj xlibr guialnaban.

### Xanyabaa cüb con guidxliuj cüb

**21** Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaloj ma gunijt reen, ziangajc nijsdoo. <sup>2</sup>Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád za-'chaawan zi'c rzuzchaaw tijb biingunaa chi ma guxhliiam con xin gac lacheelim. <sup>3</sup>Abi' dád rejs biguiejnan cha' bën gunee lod za' xyagxhil Dios, rëbaman:

—Ma za' Dios con ree bejn, guiban-nëman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman. <sup>4</sup>Laaman gutiaa loj reeman nijs biin reeman, dxel achetri guialgüjt chu', guial-roon, guialrunaya në guialzi, din gra ree ni guyu gocli ma gudëd reen.

<sup>5</sup>Abi' bën zojb loj yagxhil guin, naman:

—Gra cayünan nicüb.

Na tëëman:

—Bacaa ree diidx guie, din laa reen naj diidxli ni rayal chililadx bejn.

<sup>6</sup>Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diidx guia'x-chej në par tiblyaa. Bën re'c nijs, naj yazaladx nijs lojman nijs ni ririi lod rajch nijs ni runee guialnaban.

<sup>7</sup>Bën ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nän. <sup>8</sup>Per ree bën rdxeb sudxi'ch loj ni rliladx reeman naj, bën ad rliladxt ree naj, bën ruladx ree güün ganax ni mal, bën rugüjt ree bejn, bën rüjn ree nidxuudx con ree bën ad najt lacheel reeman, bën rüjn ree guialbidxaa, bën rën ree ni naladx reeman naj ree Dios, në gra ree bën rusquiee, laa reeman rayal loj bajl lod caye'c azufre, bajl guin naj guialgüjt rarojp.

### Jerusalén cüb

<sup>9</sup>Dxel tijb guigajdx ree anjl bën ca' ree guigajdx ree cojp ni guidxa guigajdx ree guialzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel bën naj zi'c xi xiil Dios.

<sup>10</sup>Abi' por Sprijt binë anjl guin naj guijc tijb guia' narooob, guijc tijb guia' ya. Ni balüüman naj Jerusalén, xciuda narooob Dios zidguiajtan xi xanyabaa Dios. <sup>11</sup>Rulaan bacha' por xbacha' Dios. Abi'

bacha' guin naj zi'c xbacha' tijb guiaj lasajc, guiaj zagdxe ni la Jaspe, nayni zi'c tijb vidr. <sup>12</sup>Gadëd ro' ciuda guin naj tijb ze' narooob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwa ree bën Israel, tijb gaj lad port guin ca zi'c la tibcwa ree gaj reeman. <sup>13</sup>Choon ree port guin naj niz lod rliejn gubijdx, abi' choon reen naj niz lod rëëz gubijdx, za choon ree port guin naj niz lad norte, za choonan naj niz lad sur. <sup>14</sup>Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bën naj zi'c xi xiil Dios.

<sup>15</sup>Anjl ni guneenë naj ca'man tijb var or din tia'beenëman ciuda guin con ree port guin con ze' guin.

<sup>16</sup>Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan. <sup>17</sup>Dxel cwa'man midid ze' guin, abi' ze' guin najn gayojnbitap mejtr zi'c naj xmidid bénguidxliuj zi'c bare'xh anjl guinan.

<sup>18</sup>Ze' guin gojcnën guiaj ni la Jaspe, abi' ciuda guin najnën ganax or, zi'cgajczi naj vidr nayni. <sup>19</sup>Xguiaj cimiant ze' guin najcchaawnën gadxagayaa ree guiaj zagdxe. Guiaj yaloj guin najcchaawnën con guiaj ni la Jaspe, guiaj barojp guin najcchaawnën guiaj ni la zafiro, guiaj bayon guin najcchaawnën guiaj ni la ágata, guiaj badajp guin najcchaawnën guiaj ni la esmeralda, <sup>20</sup>guiaj ni bagaay guin najcchaawnën guiaj ni la ónice, guiaj ni baxo'p guin najcchaawnën guiaj ni la cornalina, guiaj bagajdx guin najcchaawnën guiaj ni la crisólito, guiaj goc xhujn najcchaawnën con guiaj ni la berilo, guiaj goc gaa najcchaawnën guiaj ni la topacio, guiaj ni goc chii najcchaawnën guiaj ni la crisoprasa,

guiaj ni goc chiptib najcchaawnën guiaj ni la jacinto, guiaj ni goc chiptio'p najcchaawnën guiaj ni la amatista. <sup>21</sup> Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najnë tijbgaj port. Abi' nejz narooob ni naa galay ciuda guin najn ganax or, zi'c tal naj tijb vidr ni rdëd biani grop xijch.

<sup>22</sup> Ni'qui tijb yadoo ad baguiatan loj ciuda guin din dux Dad ree Dios bën ca' gra guialrniabee con bën naj zi'c xi xiilaman, laa reeman naj xyadoo ciuda guin. <sup>23</sup> Abi' loj ciuda guin ad rüjnt naguiejn gusni gubijdx ni'qui bëëw, din xbacha' Dios rusni ni abi' bën naj zi'c xi xiilaman laaman naj bajl ni. <sup>24</sup> Bén zëed ree lod rent lod ren sa reeman loj bacha' guin, bën ma naj ree perdon. Abi' ree rey loj guidxliuj guie guidnë xguialza'cdxoon reeman loj ciuda guin. <sup>25</sup> Xport ciuda guin ad yu't dxej yaaw reen radxe, abi' ni ad zut guiaal. <sup>26</sup> Gra xguialza'cdxoon con gra xguialzagdx ree bën zëed lood rent lood ren, guidxin reen loj ciuda guin. <sup>27</sup> Per ad yu't dxej chu' ni dxuudx loj ciuda guin, ni'qui ree bën rüjn ni dxuudx ni'qui ree bën rusquiee, bën cazi ree laj loj xlibr guialnaban ni ca' bën naj zi'c xi xiil Dios, laaz reeman chu' loj ciuda guin.

**22** Balüü tää anjl guin lon tijb guiiw naya ni razaladx guialnaban, naynidxuj zi'c tijb guiaawajn. Ririi nijs guin lod za' xyagxhil Dios con bën naj zi'c xi xiilaman, <sup>2</sup> abi' zën galay loj nejz narooob ni naa galay ciuda guin. Galay nejz guin naa guiiw guin, abi' grop lad guiiw guin zojb yag ni runee guialnaban ni rtia chiptio'p loj ninejxh, gazobëëw ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan. <sup>3</sup> Achetri ni mal chu' ni, abi' Dios con bën naj zi'c xi xiilaman cwe loj xi yagxhil reeman guiáad ree xbejn reeman gap da't laa reeman re-

spejt. <sup>4</sup> Abi' ni guguaaloj reeman Dios, bën ni ca ree lajman lucwaj. <sup>5</sup> Achetri guiaal chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblyaaa con laaman.

### Ma zidyob gui't Jesucrist

<sup>6</sup> Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bën razaladx diidx loj ree bën rudëed xtiidxaman loj ree bejn, laaman guxhaal xi anjl din gulüüman bejn ree ni ma zidyob gac. <sup>7</sup> Dad Jesucrist rëb guial nayob gui'taman.

¡Xiquilbaa ree bën ridxga' ni ca loj libr guie ni rugojn ni gac!

<sup>8</sup> Naj Waj, baguiatan biguiejn tää ni guin ree. Abi' chi gulox baguiatan biguiejn tää ni guin ree, dxel bazuxiban par ga'p da'tan respejt anjl ni balüü ree ni guin lon. <sup>9</sup> Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompniaril bën rudëed ree xtiidx Dios, në ree bën ridxga' ree ni ca loj libr guie. Zeel Dios gojp da't respejt.

<sup>10</sup> Na tääman lon:

—Ad guquie'chil diidx ni zëed ree loj libr guie, diidx ni rugojn ree ni gac, din ma zidyob gac reen. <sup>11</sup> Gol basa'n ree ben mal con xni mal reeman, abi' ree bën naban nadxuudx zu naban reeman nadxuudx bal zian ruladx reeman. Per bën rüjn ree zi'c rayal gusnuu güün reeman zi'c rayal abi' ree bën naban zi'c rën Dios gusnuu guiban reeman zi'c rën Dios.

<sup>12</sup> Rëb Jesucrist:

—Gol badxe'guijc guial nayob guialan, abi' guidne'n ni rayal tijbgaj bejn bal gonin been tijbgajman. <sup>13</sup> Naj naj zi'c lejtr A con lejtr Z, lejtr ni rzulojnë ni rlioxnë tää alfabeto, din tijbzi naj rniabee diizd guia'xchej në par tiblyaaa.

<sup>14</sup>Xiquilbaa ree bén ni naj zi'c ree bén ma gudiib xab guial ridxga' ree-man xtiidx Dios, din gac chu' ree-man niz ro' xport ciuda guin din gap tée ree-man derejch gaw ree-man ni nejxh ni rtia loj yag runee guialnaban. <sup>15</sup>Abi' xi-jch ciuda guin yaya'n ree benguijdx, bén rüjn ree guialbidxaa, bén rüjn ree ni dxu-udx con ree bén ad najt lacheel ree-man, bén rugüjt ree bejn, bén ni rajp ree ree-spejt ni naladx ree-man naj dios, në ree bén ruladx cwëëguijc ni rusquiee nree tée ree-man diidx rusquiee ree. <sup>16</sup>—Naj Jesús ma guxhal da anjlan din gugojn-man lëjt gra ree ni guie din guiëbidi laan loj gra ree bén rliladx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsildoo.

<sup>17</sup>XSprijt Dios con biinxdüb ni gac lacheel bén naj zi'c xi xiil Dios rëb ree-man:

—Guda.

Abi' bén riguijch nree ree-man zian, rëb gajcaman:

—Guda.

Chutëëz bén re'c nijs, gol guda, abi' bén rën zajc guië'man nijs runee guialnaban lagajzi.

<sup>18</sup>Gra ree bén riguijch ree diidx ni zëëd loj libr guie ni gac, naj rni lojdi bal chu bén gucaa guijc ni zëëd loj libr guie, ziangajc zusro' Dios guialzi ni zëëd loj libr guie par laaman. <sup>19</sup>Ziangajc bal chu chiquied xhie diidx guijc ree diidx ni zëëd loj libr guie ni gac ziangajc chiquied Dios guijc ni rayalaman loj yag runee guialnaban ni ruza't libr guie ad zayu tëëtaman loj xciuda Dios ni ruza't libr guie.

<sup>20</sup>Bén ragbee guial diidxli naj gra ree ni guie, rëbaman:

—Walín, nayob guialan.

Zian gacan Dad Jesús, ¡Guda!

<sup>21</sup>Dad Jesús güünle' gradi. Amén.